


Godna mo Awai  
mona go



The New Testament in the Amanab language of Papua New Guinea

**Godna mo Awai mona go**  
**The New Testament in the Amanab language of Papua**  
**New Guinea**  
**Nupela Testamen long tokples Amanab long Niugini**

Copyright © 2001 The Bible Society of Papua New Guinea

Language: Amanab

Dialect: Amanab

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-07

---

PDF generated using Haiola and XeLaTeX on 11 Nov 2022 from source files dated 9 Oct 2020

c3aa68d3-f454-5eb2-b8b2-3405de6bf338

## Contents

Matyu . . . . .	1
Mak . . . . .	70
Luk . . . . .	137
Jon . . . . .	225
Aposel . . . . .	287
Rom . . . . .	362
1 Korin . . . . .	399
2 Korin . . . . .	434
Galesia . . . . .	458
Efesus . . . . .	471
Filipai . . . . .	484
Kolosi . . . . .	493
1 Tesalonaika . . . . .	502
2 Tesalonaika . . . . .	510
1 Timoti . . . . .	515
2 Timoti . . . . .	525
Taitus . . . . .	533
Filemon . . . . .	538
Hibru . . . . .	540
Jems . . . . .	568
1 Pita . . . . .	582
2 Pita . . . . .	592
1 Jon . . . . .	599
2 Jon . . . . .	608
3 Jon . . . . .	610
Jut . . . . .	612
Sumi Yi Puguiag Mo . . . . .	615

## MATYU

### Suialag Mo Matyu Ginofena

### Hwa buk enaig esog

Hwa ginofba Matyu enaig sihifeg autunam God Israel elim sihi fwahani asa Sisas ati enam upugug. Afa God enaig sihifena og ka elim ningihiaiba asa ma blo nem pese lambi. Hwa suialag moba eba mango Ju elni mungu mo. Amo, enag suialag mo eba mungwali elni gafa fenig.

Maia Sisas hwa bite la gofenaba mangwal sa Sisasim puguna ena mom Matyu sihiageg. Afa Matyu enaig sihifiah-gena maia Sisasim afag foklanam afa ikan ehem tigidatinibi asa ehe pese buhianam afa sisi gam fukukana.

Afa mingnag kwania mo Matyu sihiageg eba Godna bog meg mom sihi. Tok Pisinba enaig seflifig Godna Kingdom. Afa Sisas enaig gafuga ofefnaba ogra Godna bog meg mom sihiageaka. Ena bukla eba afala gohug mo feg. Ena moba Sisas elim ogfufenugeg mo.

1. Afa angig mo sapta 5 fegim ikag 7 la pugug eba enaig esog Sisas mugla mo sihina. Afa ena nai yi Sisas enaig esona Godna elni nihe sa ma enaig gohei.
2. Afa angigieg mo sapta 10 la Sisas heafna patalfuiag elim enaig sihifeni og elim kana mo osihigon fibi sa ne mangwal fife.
3. Afa olyi nai mo sapta 13 la eba Godna bog meg lasug mo.
4. Afa fignieg mo sapta 18 la eba haig nihe nufuna patalfuiag el sa ma fi.
5. Afa afala gohug mo sapta 24 fegim ikag 25 la pugug eba enaig esog awaieg osuna mangwal sa haig haig puguiagefe.

#### *Sisasna simbianingag eba enaig eseg*

<sup>1</sup> Ena moba Sisas God Gisfu Fwahag Elni simbianingam suwigig. Ehe Devitna simbianinga afa Devit Abrahamna simbianinga.

<sup>2</sup> Abrahamna leg Aisak. Aisakna leg Jekop.

Jekopna leg Juda afa heafna nilite. <sup>3</sup> Judana legnigi Peres i Sera i.

Ehenigina afag Tamar. Peresna leg Hesron.

Hesronna leg Ram. <sup>4</sup> Ramna leg Aminadap.

Aminadapna leg Nason. Nasonna leg Salmon.

<sup>5</sup> Salmonna leg Boas. Heafna afag Rahap.

Boasna leg Obet. Heafna afag Rut. Obetna leg Jesi.

<sup>6</sup> Jesina leg Devit eba misog el. Devitna leg Solomon. Autunam heafna afag eba Uriana angwag.  
<sup>7</sup> Solomonna leg Rehoboam. Rehoboamna leg Abiya. Abiyana leg Asa. <sup>8</sup> Asana leg Jehosafat. Jehosafatna leg Jehoram. Jehoramna leg Aisaia.  
<sup>9</sup> Aisaiana leg Jotam. Jotamna leg Ahas. Ahasna leg Hesehia. <sup>10</sup> Hesekiana leg Manase. Manasena leg Emon. Emonna leg Josaia.  
<sup>11</sup> Josaiana leg Jekonia afa heafna nilite. Enanam Babilon el Israel elim wanafunam heafgelni bite la lasani.  
<sup>12</sup> Maia lasanibi Jekoniana leg Sealtiel. Sealtielna leg Serubabel.  
<sup>13</sup> Serubabelna leg Abiut. Abiutna leg Eliakim. Eliakimna leg Eso. <sup>14</sup> Esona leg Sadok. Sadokna leg Akim. Akimna leg Eliut.  
<sup>15</sup> Eliutna leg Elieser. Elieserna leg Matan. Matanna leg Jekop. <sup>16</sup> Jekopna leg Josep.  
 Josep Mariana alagag. Afa Maria Sisasim wanigana. Sisasba seflig Krais God Gisfu Fwahag El. <sup>17</sup> Afa Abrahamna simbianinga gohugum ikag Devit nai yi pugug eba 14 la gohug. Afa Devitna simbianinga afohianam enanam Babilon Israel elim ambe wanafuna eba 14 la gohug. Ena nai yi gofenaba God Gisfu Fwahag Elbi gohna eba gwenag eseg 14.

*Maria Sisasim God Gisfu Fwahag Elim wanigana*

*Luk 2:1-7*

<sup>18</sup> Sisas Krais, God Gisfu Fwahag El, gohug mo enaig eseg ehena afag Maria ati Josepim eso fwahini og ma Josepnai yi gai. Afa mas ika gana mo, afa nangunibi Maria Godna Sungwabug ati afnialigni fena. <sup>19</sup> Ehena alagag Josep eba suialag el. Ehe ogna ehem flagim fwaha. Ehe mo ambala sihiagim oksina afa sa mas Mariam afwanef mo faina mo. <sup>20</sup> Josep enam onigkafnaba afa itila Godna oflanai el blona ehem puguna. Enag oflanai el esona og, “Josep Devitna simbianinga nofeka Mariam flagiba embefe. Sa hig enaba afnialigni wanigiahba el mas enaig eseg mo eba Godna Sungwabug ehe faig enag luwalba. <sup>21</sup> Enaba fagonai luwal wanigafe. Afa ne ehena unehlagimba Sisasim unehlig asa mungwali heafna elni amtakwalig mo huguflaitinam afa ehfum lambfe asa God ehengelim mas mungwa faifi.”

<sup>22</sup> Enaba pugunaba Ainiyag ati Godna mo fli sihiule elni mengig la sihi fwahanaba ena moba nufunam puguna, mo fli sihiule el esona og;

<sup>23</sup> “Higim, angwafig mungu angwaming alagagla ga fwainig afnialigni afa fagonai luwal foklafe. Afa unehlagba Emanuelim seflife.” *Ais 7:14*

Enag mog unehlaba ‘God bigim wanga.’ <sup>24</sup> Josep ginim buhianam asa gwenai esena Ainiyagna oflanai el asa sihinagenaba asa ehe enag angwafigbi flana. <sup>25</sup> Angwafigbi flanam mas mungua kifela ahginimo awai esug afena afa asa luwal fagona waniganaba. Afa asa ehe Sisasim unehlana.

## 2

### *Afwambanai anwena el ambe Sisasim nuguni*

<sup>1</sup> Maria Sisasim Betlehemla wanigana, ena provins Judia. Enanam Herot misog el gofnaba. Afa enanam osu puguglanai anwena el, ambena Jerusalem la apukenam. <sup>2</sup> Afa sahini og, “Hanai yi luwalba gohug eba Ju elni misog el? Ehena bagnofut osu puguag la ka nangugum nasa ka ambe gohug koka ehena unehlagim figifi.”

<sup>3</sup> Misog el Herot ena mom hignam olug fingifena afa Jerusalem lanai el gwenai esini. <sup>4</sup> Afa Herot saglag pris mi afa nihe mo anwena el mi unetiginam maia laskuahlanaba asa fasahtigi fenigena og, “Kraisba, God Gisfu Fwahag Elbi hag kembang la gohug?” <sup>5</sup> Afa sihini og, “Betlehem la Judianai yi ehe pugufe autunam Godna mo fla sihiule el ati ena moba ginofe fwahana, enaig esona og;

<sup>6</sup> Nofeka enaig onigi Betlehem Judanai eba mingnag suialag Judana kembang sumifenig. Asa enag kembang misog el pugufe eba ehe Israel, kana elim, nangwahiagefe.”

### *Mai 5:2*

<sup>7</sup> Herot enag afwambanai anwena elim efkwek moaini fasahtigifiage na og ansi bagnofutni ombusugbi puguna. <sup>8</sup> Herot sahinigenam asa Betlehemgam ningitigina og, “Afunam yisigiafuhun, nangunim asa kam ambe sihini. Ka sa ikanam mongkogini kwakwagenam ehena unehlam figefuku.”

<sup>9</sup> Afa ehengel ena mom higinim asa afuna afa bagnofna ombusug ilawana asa osu puguiag la nangunibi enag esena ika sisi gofna enanai yi sa luwal gifni. <sup>10</sup> Afa maia bagnofutim nangunim asa ehengel fwina sifakalini. <sup>11</sup> Asa afu lala saiyegim afa ehena afag Maria enam nangwaginim afa apaiyena mongkogini kwakwaginim asa luwalna unehlagim figifugwalina afa wula pigaginim afa gawig lambinagin lambwaini. Gawigba enaba gol i, paura i, sanda i enag lambwaini. <sup>12</sup> Itila God blo sihini og, “Nofe ne pese Herot nangum afu.” Asa ehengel wahgifini ming minagam heafgelni kembangamba afuna.

### *Josep Isipgim wankana*

<sup>13</sup> Ainiyagna oflanai el blona Josepim itila sihinagena og, “Pugu wanka Isipgim ikanam eyi wanafim ka ma nem

sihinaiba asa Herot luwalim oyisgi og ka tige-faka.” <sup>14</sup> Josep buhianam pugu wankana sinaini Isippim. <sup>15</sup> Josep Isipi yi wanafiba asa Herotba lahafe. Enaba Ainiyag mo fla sihiule elni mengig la ati sihi fwahana. Ehe esona og; Ka kikiafena luwalim unenaiba asa Isipim fwahanam blofe.

*Hos 11:1*

*Herot esonaba asa mungwali luwalim kwaskofini*

<sup>16</sup> Herot nengeawan afa mas anwena el ambe ehem apukena mo, heafa kam mwakwalinig. Asa olug kakagenam afa mingnag elim ningitigina Betlehemgam og ma luwalim mungwali kwaskofeafui. Luwalba ninganai enaba sambaga yia enaig og masa kwaskofeafui. <sup>17</sup> Enaigba esiniba eba God mo fla sihiule el Jeremaiana mengig la ati sihi fwahana. Enaig esinibi asa nufunam puguna. Ehe og;

<sup>18</sup> Afa Rama nai el higni Resel ati heafna luwaligim weonafena. Elbi haig kwenifini mo, awai. Eba ehena luwalig mungwali awaiena mas amban mo gafena mo.

*Jer 31:15*

*Josep pese angwagna luwalnam wanblona*

<sup>19</sup> Afa maia Herotim lahanaba, Ainiyagna oflanai el Isipi yi Josepim itila pugu sihinagena. <sup>20</sup> Ehe og, “Ese pese Israelgam angwafigni luwalnam wanika. Ati elbi pigig oga ehem tigi kumohli.” <sup>21</sup> Afa sa Josep buihia wankana Israelgam.

<sup>22</sup> Afa ika higinaba Arkelaus Herotna leg puguna Judiana misog el gofna. Josep esim ikagim embefena. Afa itila God sihina Josepim, nasa Josep Galili provins gam wankana. <sup>23</sup> Afa wankanam ming kembang la Nasaret la wanafna, enaigba esenaba mo fla sihiule elni moaihla og elbi enaba seflig eba Nasaret lanai el.

### 3

*Jon mo sihifenam bula laitiafna*

*Mak 1:2-8, Luk 3:1-18, Jon 1:19-28*

<sup>1</sup> Enanam Jon bula laitiaule el pugunam el fwainig la Judiana kembangla mo sihiagekana. <sup>2</sup> Enaig esona og, “Olug waikefi. Godna bog meg ati blog afa Godna sawieg la big saiyenam asa heafna luwalig afohie.” <sup>3</sup> Autunam Aisaia mo fla sihiule el ati sihi fwahana, el enaig esona. Jon eba enaig el. Aisaiana mo enaig esona og;

El fwainig la el mungu pugu mo sihiagafe enaig esofe, Ainiyagna mina numwehiagi, heafna mina, mina suf faki.

*Ais 40:3*

<sup>4</sup> Jonba tata lag lofug fatinam. Ena tata lagba eba kamel. Afa afiai kigifena afa fane negba sanglik i afa ihif suwig

i enag neakafna. <sup>5</sup> Enanam Jerusalem el i Judia el i afa Jordan bula auguiakana enag mungwali ambe gohna Jon nangum. <sup>6</sup> Ambena heafgelni amtakwaligim sihiagini afa sa Jon Jordan bula laitina.

<sup>7</sup> Afa farisi el i Sadyusi el i ambe ona bula apaiye, Jon nangwagnam afa esoni og, “Nengelbi gihiana luwalig, amban ne sihinigbi ma Godba ma nem amtakwali ghiagefe asa ne embemba afuofe. <sup>8</sup> Sa ne suialag nihe fi asa ma el anwenafi ne ati nufunam olug waikefig. <sup>9</sup> Nofeka enaig onigwagi Abraham kagelni simbianinga asa ka gafa suialag el. Ka nem sihinig God ehe eseba hwa funba Abrahamna simbianingag apuke gofe. <sup>10</sup> Mal ati li mog la gi. Li fug suialag lugwag fwainigba, eba higfihinim suwi la laitife. <sup>11</sup> Ka nem bulaba laitigba eba enaig eseg ati ne olug waikefig. Afa el sumi yi obloba ehena kigmogba kana kigmogim filafeg. Kaba suialag elmo naka ehena mong lofugba flaukuna. Eba nem bulaba Godna Sungwabugni afa suwina laitife. <sup>12</sup> Elbi enaba obloba forkba ningana flagim ogna fungsige mungwali lambuhiage witinai. Ognawit agoguli heafna wit lala fwaha afa fungsige mo lambinam suwi la laitife.”

### *Jon Sisasim bula fatina*

*Mak 1:9-11, Luk 3:21-22*

<sup>13</sup> Afa enanam Sisas Galili fwahanam Jordan la pugunam blona Jon nangum og ma kam Jon bula fati. <sup>14</sup> Afa Jon ehem gwenam afa esona og, “Nemble he kam bula fati. Haig esegba nane ka nanguba blog?”

<sup>15</sup> Afa Sisas mungwag ehem sihina og, “Sese, ati ka nem sihinag. Enaig big sahfeba eba ati big Godna sawieg la big sahofo.” Afa sa Jon ehena mom patalukuna. <sup>16</sup> Afa Sisas bula penam afa puguna ikana gofnaba ikagna of bafuna afa nangunaba Godna Sungwabug gamp lofug peblona Sisas nai yi gahlana. <sup>17</sup> Afa mengig hevenla lagofna og, “Sona elbi eba kana leg, ka ehem fwina membenag. Ka olug ehem suialafenag.”

## 4

### *Satan Sisasim yuhna*

*Mak 1:12-13, Luk 4:1-13*

<sup>1</sup> Godna Sungwabug Sisasim el fwainigam wanikina og ma Satan yuhnai. <sup>2</sup> Afa 40 osuna Sisas mas fane nenamo, maia 40 osuna awaienaba ehem fwina bini lahana. <sup>3</sup> Afa Satan blona ehem puguna afa sihina og, “Afa ne Godna leg fegba eba sane funim esoiba sama amba lofei.”



<sup>4</sup> Afa Sisas esona og, “Godna moba enaig esog og, ‘Amba mungu mas elim nofkenagagba fai. Godna mo munguhe eba sa elimba nofkenagagba fai.’”

<sup>5</sup> Maia Sisas enaig sihifenaba Satan Sisasim sulflanam Jerusalem gam wanikina. Wanikina Godna kwania lala wofugug sisia nemug la lasuwona. <sup>6</sup> Afa Sisasim sihina og, “Afa ne Godna leg fegba eba sa ne puso pekai eba ati Godna mo sihig;

Eba heafna oflanai elim sihiniba oflanai el ambe nem ningana kehli apaiyeufufe eba mas nem fun sig mong yi pifi.”

*Sam 91:11,12*

<sup>7</sup> Sisas sihina og, “Godna mo enaig esog, ‘Nofeka Ainiyagim nimbiafna Godim yuhna.’”

<sup>8</sup> Satan Sisasim mungwanam mug gam fuko wanikinam afa sa mungwali bite i afa suialag gawig i ofgunagena. <sup>9</sup> Afa Sisasim sihina og, “Ma ne kam mongkogini kwakwagenam kana unehlagim fingi feiba, ka sa nem bite i gawig i mungwali faife.” <sup>10</sup> Afa Sisas sihina og, “Satan, esimika Godna mo enaig esog, ‘Godim ahnai skaufenam afa sa heafna unehlagim mungu fingife.’”

<sup>11</sup> Afa sa Satan Sisasim fwahanamba. Afa oflanai el ambe Sisasim kwefuni.

*Sisas Galili yi gafugafena*

*Mak 1:14-15, Luk 4:14-15*

<sup>12</sup> Sisas enaig higina og ati Jonimba kalabusig asa Galili provins gam pese ikana. <sup>13</sup> Afa ehe Nasaret mo fwahanam ika Kaperneam la mo gafena. Kaperneam Galili bu megim gifni muhla Sebulun Naptali elni bite la. <sup>14</sup> Enamba Godna mo fla sihiule el Aisaia ati sihi fwahana. Enaig esona og;

<sup>15</sup> Sebulun i Naptali i nengelni bite gifni bu wagieg mina ikagla gwesim Jordan gohfa eba Galili kaksag afwambanai el auguia. <sup>16</sup> Enag elbi sikuleg la auguia, ati kwania ombusug pugunig asa nangug. Afa amban el sikuleg pigieg la afohiafiba asa ombusenife. *Ais 9:1,2*

<sup>17</sup> Enanam Sisas mo sihiagena og, “Godna bog meg ati blog sa ne olug waikefinim saiye afu.”

*Sisas sambaga sambaga patalfuiag elim uneni*

*Mak 1:16-20, Luk 5:1-11*

<sup>18</sup> Sisas Galili bu blugmini ikan sambaganigi etesum-inegim nangwagna Saimon Pita mi Andru mi. Sambaganigi fufwalana sawagim kigiag hofefna. Sambaganigiba sawag gafuga ahfegofna. <sup>19</sup> Sisas sihini og, “Au, kam ahpatal blu ka nem elim ahlambigim ofgunige.” <sup>20</sup> Sambaganigi ikagna fufwala ahfwahnam ahkana Sisasim ahpatalkuna.

<sup>21</sup> Sisas wankan afa ming etesuminegim nangwagna Sebedini legnigim Jems mi Jon mi afa heafningina alag bot la auguiafenaba fufwala kokohiag kwelwagia flafna. Sisas uneni. <sup>22</sup> Sambaganigi heafningina bot na afa alag na ahfwatinam ahkana Sisasim ahpatalkuna.

*Sisas mo sihifnam afa elim suiala feitifeakafna*

*Luk 6:17-19*

<sup>23</sup> Sisas mungwali Galili yi wagiakana ikafnam laskuhlag lala seifofnam saglag angwafigim ogfunigiafna afa Godna bog meg mom sihinigiafna afa mungwali haig haig gihna elim suiala feiti feafna. <sup>24</sup> Afa mungwali el ena mo higwaginim sihiagenim asa Sirianai el haig haig gihna elim lambifini. Elig susuna, mwaifig simbigahlagulem, nilagini, afa mong lihlina Sisas suiala fetifeafna. <sup>25</sup> Afa kaksag Galilina afa Dekapolisina Jerusalem lanai afa Judianai afa Jordan bu magigi nai el enag mungwali Sisasim patalfuia gohna.

## 5

*Sisas mug la mo sihini*

*Luk 6:20-23*

<sup>1</sup> Sisas el kaksagim nangwagnam afa sa mug gam fukukana. Mug la fuko gafenaba afa heafna patalfuiag el ehem nigi afuna. <sup>2</sup> Afa sa Sisas mo patalfuiag elim enaig ogfufeni og;

<sup>3</sup> Ambangel asa enaig onigife, kaba suialag el mo God sa kam kweafui, afa enag el sa ma sifakalifi afa sa ma Godna bog megam saiyefoi.

<sup>4</sup> Ambangel sa wewatini auguia enamba sa ma sifakalifi eba God ehengelim olug enesieg faifi.

<sup>5</sup> El sa heafgelni unehlam pigapaiyegohug enaba sa ma sifakalifi afa mungwali bite eba ehengelni.

<sup>6</sup> El sa suialag nihem membigim patalfug, enaig elbi ofe enaiba sa fane i bu i bini pigig eba sa ma sifakalifi eba God ihla fenugefe.

<sup>7</sup> El sa mingnag elim aflafegonug enaba sa ma sifakalifi eba God ehengelim aflafenife.

<sup>8</sup> Elni olug sa afsug gohon enaba sa ma sifakalifi eba Godim nangufe.

<sup>9</sup> El sa ninimum tigevlakig enaba sa ma sifakalifi eba enaig seflififi Godna luwalig.

<sup>10</sup> El sa suialag nihem patalfugum asa kinig flig enaba sa ma sifakalifi eba sa ma Godna bog meg saiyefoi.

<sup>11</sup> "Afa sa nem nangwagfi ne kana mungu afufufe eba nem amtakwalig mo sihigonifi afa kokwaitififi asa haig haig mo

nem mwakwal hiagifi enaba sa ne sifakalifi. <sup>12</sup> Sa ne olug enesieg na afohiefiba afa sifakalifi mungwag nem kwania faifi, eba heven la nem nengeniawo. Afa gwenaiig esini el mo fli sihiaule elim ati gofgam amtakwalinagini.”

*Godna elbi sol afa ombusugug lofug*

*Mak 9:50, Luk 14:34-35*

<sup>13</sup> “Nengelbi bite na sol. Afa solba mileakaba awaieba sa ne haig esibi, sa ma pese mileaklafei? Enaig solba sa mas gafugafei eba el kokofe fatigim afa mongni pigageg. <sup>14</sup> Nengelbi bitena ombusugug. Kembang sisi yi mug la gi enag mas meagam seaifoi. <sup>15</sup> El sa wi gaflagim mas meagam kumohlai eba awai, eba ambala gafla uku afa enaba lalanai elim mungwali ombusugufenig. <sup>16</sup> Afa sa ma nengelni ombusugug mingnag el nangui. Afa sa ma nengelni suialag nihem nanguagi asa ne esig. Asa ma nengelni Apina unehlagim heven lanai fingi fi.”

*Godna nihe mo*

<sup>17</sup> Sisas enaig esona og, “Nofeka onig neafa kam og blo Mosesna nihe mo afa mo fli sihiaule elni mo fingi fati me eba awai, eba ka ihla fenagefe. <sup>18</sup> Ka nem nufunam sihinig, maia of i bite i awaieba, mas ena nihe moba weti nemug awaie, awai eba nihe moba gwese gofnaba afa sa mungwali pugug. <sup>19</sup> Enaig eseg afa amban weti nihe mo mas fatinafe eba mingnag elim ogfunig sa ma gwenaiig esi enaig elbi Godna bog megam weti nemug feg. Afa amban el ena nihe mo patalkunam elim ogfu fenugeba eba Godna bog megam ehe gosefe. <sup>20</sup> Ka nem nufunam sihinig afa neana nihe farisi elni afa nihe mo anwena elni suialag nihem filafeg fwainigba eba mas ne Godna bog megam seaifoi.”

*Sisas olug kakageg nihe sihina*

*Luk 12:57-59*

<sup>21</sup> Sisas esona og, “Ati ne higig ena moba simbianingam flini og, ‘Nofeka elimba tigifati afa amban enaigba eseiba eba pugu kotefe.’ <sup>22</sup> Afa ilawo ka nem osihin el sa heafna nilitem olug kakagenag eba pugu kotefe. Afa amban sa heafna nilitem amtakwalig mo faig enaba kaunsil nai ika pugui afa el esofe ‘Neba suialag el mo’ enaba ma suwilagig kembangam ikai, awaiye. <sup>23</sup> Afa sa ne sime la Godim faigim oblofufe afa sa ne pese oningig nimbeafna nilite nem haig mo sihinafe. <sup>24</sup> Eba sa Godim faig mo fwahanam ika sihiagefenam asa ne pese sime gam Godim faigim mo ika.

<sup>25</sup> “Afa sa nem el ogna kot ena ne mina la ahkafiba asa ati ikagna sihiagafe. Eba ma sa nem uku kwefihiage elni ninga nem la fwahafe afa ehe nem uku plismanna ninga

la fwahaiba, asa plisman mo nem kalabusi fwahafe. <sup>26</sup> Ka nem nufunam sihinig neba kalabus lala gafiba afa ma ne mungwali kig pese faiba asa nem fwaihifi.”

*Sisas el aga taitug mo sihina*

<sup>27</sup> Sisas enaig esona og, “Ati ne higig autunam enaig esogona og nengel angwafigni nofeka aga taitu fi. <sup>28</sup> Afa ka nem enaig sihifenig, afa sa amban mungu angwafigim nangunam afa oniginagefe eba gwenaign eseg ati keahlag. <sup>29</sup> Afa asa neana nihiginai nofug amtakwaligim nangunam eseba enaba sa fagaflaiti sa ma enaig awaie eba mas neana elig mungwali suwilagig kembig la fati. <sup>30</sup> Afa asa neana nihiginai ninga amtakwaligim keahrafe eba sa higeflanam fati sa ma enaig awaie eba mas neana elig mungwali suwilagig kembig la fati.”

*Sisas sihina el angwafig ningihiagim*

*Matyu 19:9, Mak 10:11-12, Luk 16:18*

<sup>31</sup> Sisas esona og, “Autunam enaig esogona og, ‘Amban heafna angwafigim ningihiagba eba sa angwafigni ningihiag pepa faifni.’ <sup>32</sup> Afa ilawo ka nem osihin el sa heafna angwafigim ningihiafe angwafig haig ese fwainig enag elbi eba heafna moala ehe angwafigim enaigba esenag afa ena angwafig ming alagagim flaiba eba ehenigi ati aga taitu ahfeg.”

*Sihi fwahag*

<sup>33</sup> Sisas pese esona og, “Ming mo simbiangam finibi ati ne higni enaba enaig eseg. ‘Nofe ne mwakwalinim afa nufunam moalag. Afa ne Ainiyag gim sihi fwahanagim sa ne nufunam ese.’ <sup>34</sup> Afa ilawo ka nem osihin nofe ne nufunam enaigba esogo. Nofe ne hevenimba seflinim afa wasneig mo sihi, hevenba eba Godna kwefihiage sime. <sup>35</sup> Afa nofe ne bitemba seflinim afa wasneig mo sihi ena bite eba God enanai yi mong pafeuguia. Nofe ne Jerusalemimba seflinim afa wasneig mo sihi eba kwania misog elni kembig. <sup>36</sup> Afa nofe ne misog angmowaginam afa wasneig mo sihi afa ne mas neana lapogum mungu busug mi yimilig mi esei. <sup>37</sup> Afa sa ne enaig esogo, ei afa awai gwenag ehe. Mingnag moba eba Satan lamb puguiafug.”

*Nofe ne haigba mungwagba esegon*

*Luk 6:29-30*

<sup>38</sup> Sisas esona og, “Ati ne higig autunam enaig esogona og amban ambanim nofugim amtakwale fatiba eba sa ne mungwag amtakwale fatina. Afa ma amban ambanam gogum tuto klaitiba eba sa ne mungwa ehena gogum tuto

klaiti. <sup>39</sup> Afa ka nem enaig sihi fenig el asa nem amtakwalig haig ofi nofe ne mungwagba esegon magofi. Ma nem ambanba angmoglababa tigeiba asa wahigife ming eheganai nehna. <sup>40</sup> Ma ambanba nem kotimenam afa neana lofug hugu flaiba afa sa ne ming kunam lofug ena gafa fai. <sup>41</sup> Afa ma ambanba nem wasneigni og hwa gawig flauku muhla faka afa sa ne mo hilife membi yi uku pugu. <sup>42</sup> Afa ma amban nem mangwalim og kam fai afa asa fai. Afa asa amban enaig membefe og ne kam esug fai afa kasa nem mungwag fai enaba nofene masig fatina.”

*Sisas esona angoluwagim membegon*

*Luk 6:27-28, Luk 6:32-36*

<sup>43</sup> Sisas enaig esona “Ati ne higig autunam enaig esogona og hihem mungu membenaiba afa angoluwag mo olug kakage goni. <sup>44</sup> Afa ilawo ka nem osihin angoluwagim gafa asa ne membegon, afa sa ne Godim sihinibi asa ma God elim aflafeni asa nem amtakwalig hiagifug. <sup>45</sup> Enaig ne esibi eba nengelni heven lanai alag esofe ‘Kana luwal’, afa maia ehe osum sisigam esegba nasa laugonug el amtakwaligim afa suialag elim. Afa maia bum ninghiagba bu feg el suialagim afa amtakwalig elim. <sup>46</sup> Afa el asa nem membegonug afa enaig ne membegonug, enaba mangig wag ne flife? Afa kig lambiule el gwenai esig. <sup>47</sup> Afa sa ne nimbeafna hihe mungu sihigon enaig nihe mas mingnag elni nihe gose feg mo. Afwambanai el ati enaig esig. <sup>48</sup> Afa asa ne fwina suialag afufum nengelni alag hevenla suialag gwenai feg.”

## 6

*Nihe elim kwegfwag*

<sup>1</sup> Afa Sisas mo sihin gofena, “Ne numwehifum nofe ka enaig onig ka suialag nihe mingnag elim ogfugonibi asa ma kam nangwagi eba mas nem nimbeafigelni heven lanai alag gau fai.

<sup>2</sup> “Afa ne membeg ne og ka esug elim mangwal faigo ne nofe ka elim gof ningitigi asa ma fuf gofiba asa ati sambaga mengig el enaig esifafife laskuhlag lala afa mina la enaig esogonibi asa ma el ehengelni unehlagim figifegoni. Ka nem nufunam sihinig enag mungwag faig ehe ati pese flig. <sup>3</sup> Ne membeg ne og ka esug elim kwaganim eba sa nihiginai ninga ofefiba eba mas sahagani ninga anwenafei. <sup>4</sup> Enaig esegba neana kusguog gafugag meagam seifugo, afa neana alagba ati nangug mangwal sa meagam go enaba nem asa mungwag faife.”

*Godim sahanag nihe**Luk 11:2-4*

<sup>5</sup> Sisas enaig esona, “Ne Godimba asahinifibi nofe ne sambaga mengigna el lofwagfi eba enaig esifafife laskuhlag lala afa mina embegam agfohiaba asa beteni og ma kam mingnag el nangwagi. Ka nem nufunam mo sihinig enag mungwag faig ehe ati pese flig. <sup>6</sup> Ne betenba ofefiba ika lala megam seifonam mengig kikisenam asa ne betenba fe neana alagba meagam go ati anwenafeg meaganaimba eba nem mungwag faife.

<sup>7</sup> “Afa ne betenba ne ofefiba nofe ne mempbug mo sihiage enaiba afwambanai el. Eba enaig onigig ka ma mempbug mo sihiba asa ma God higi. <sup>8</sup> Nofe ne ehengelni nihem patalfu afa ne maisim nimbeafna alagimba sahanag fwainig fiahba eba ati anwenafeg mangwal mungwali sa nem awaienig. <sup>9</sup> Asa ne enaig sahi;

Kagelni Api ne heven la ga sama el neana unehlagim fingi fini.

<sup>10</sup> Neana bog meg ma bloi,  
neana sawieg asa heven la pugug  
asa ma hwa bite la gwenag ese.

<sup>11</sup> Enag osuna sa kam fane faiba sa ma gwese gofi.

<sup>12</sup> Asa ne kagelni amtakwalig mo esmunagim huguflaitini  
asa kagel gwenag esig  
el kagelim amtakwalig gonug asa kagel ehengelim esmunagim huguflaiti gonug.

<sup>13</sup> Nofe ne kam fwati ma kam yuhnag pugunibi  
eba sa kam amtakwalig la nai lambim.

<sup>14</sup> “Sa higim ne mingnag elni amtakwalig mo esmunagim huguflaitiniba eba nengelni alag heven la ga enag nengelni amtakwalig mo esmunagim huguflaiti nife. <sup>15</sup> Afa ne mingnag elni amtakwalig mo esmunagim huguflaiti gonug fwainigba eba nengelni alag mas nengelni amtakwalig mo esmunagim huguflaitini.”

*Sisas fane foiyu mo sihina*

<sup>16</sup> Sisas esona og, “Ne faneba ne afoiyufiba nofe ne amtakwalig boseagi sonaigba sambaga mengig el sa esifafife amtakwal bosegig sa mingnag el nangwagigim anwenafig og eba fane foiyugofiba ka nem nufunam sihinig enag mungwag faig ehe ati pese flig. <sup>17</sup> Afa ne faneba afoiyugofiba asa ne lapogum pitigifiage afa nofbosugum bulasug flai, <sup>18</sup> eba sa mas el nem anwenafini fane sa ne foiyug. Neana alag meagam seifogofba eba ati hefba anwenafeg eba ati nangug meaganaiba eba nem mungwag faife.”

*Suialag wag heven la go**Luk 12:33-34*

<sup>19</sup> Afa Sisas esona og, “Nofe ne suialag gau hwa bite la agoguli hwa biteba sismo afa ambig enag wagiba amtakwale skofig afa ukwefule el bog tofugum asa ukwefig. <sup>20</sup> Afa nengel asa suialag gau hevengam agoguli hevengamba mas sismo ambigei enag wagiba amtakwale skofig afa ukwef el mas bog tofunam saiye ukwefi. <sup>21</sup> Afa hanai yi neana suialag gawig go asa neana olug enanai yi go.”

*Nofugba eligni ombusugug**Luk 11:34-36*

<sup>22</sup> Sisas enaig esona, “Nofugba eligni ombusugug neana nofug suialag gohugba eba neana elig mungwali ombusig. <sup>23</sup> Afa neana nofug amtakwaleba eba neana elig mungwali sikulufeg. Afa ombusugug sa seifog neana nihi go enag kulofefiba eba kwania kulufefe.”

*El mas sambaga misog elniba gafugafei**Luk 16:13*

<sup>24</sup> Sisas enaig esona og, “Mas amban sambaga misog elni mom higinam patalkui. Eba ming mo membeba afa ming mo oksife afa asa ehe ming i mo hinaiba afa ming i mo mas fatinafe. Nofe ne Godna gafugag mi afa kig gafugag mi lambtigi”.

*Nofene fwina onigwage**Luk 12:22-31*

<sup>25</sup> Sisas enaig esona og, “Nofe ne fwina nimbeafnam nofkikenam onigwageakafim afa ne esog mangwal kawo ne? Afa nofe ne nihim oniginam afa esog mangwal lofug ka fatife? Eba nofkikena fanemba flafug afa elig lofugba flafug! <sup>26</sup> Ati ne twafigim nangwagig mas faneba yihi afa mas agoguliaginim fane lalaba sugui. Nengelni alag hevenla ga enag sa faneba faig. Atiaho sa ne twafigimba flafug? <sup>27</sup> Amban sa nengelina fwina onigwage asa heafna nofkikenaba hili fwahafe?

<sup>28</sup> “Haig esegba asa ne fwina lofugumba onigig. Ati ne li sisigimba nangug haig apukefig. Ehe mas wasneig gafugafei afa lofugba gweli. <sup>29</sup> Afa ka nem sihinig autunam misog el Solomon na mungwali wag suialag skonaba mas suialag li sisig lofena mo. <sup>30</sup> Pos gafa afa siniba eba ati higfihinim suwi la lambaitife. Enaig posba God ehe wagwageg fwahag. Afa asa nengel weti olug onigina asa ne numwehe onigi neanga Godba nem wag faife. <sup>31</sup> Nofe ne kaksag onigwagi afa esogo mangwal fane afa bu big ahagafe afa esogo mangwal lofug big laitiagifi? <sup>32</sup> Afwambanai elbi enaigim fwina onigwagegim afa sa yisigeo. Afa nengelni alag hevenla

ga enaba ati anwenafeg asa nem enaig ene mungwali yi fli. <sup>33</sup> Afa enaig ne esofifiba eba sa Godna bog megim gose onigibi afa asa ne ehena suialag nihe gose patalfuiba eba sa nem mingnag gawig gafa nem faifi. <sup>34</sup> Nofe ne siniba fwina onig eba algana kinig pugufe. Glaunai kinig eba heafa gwenanam mungu.”

## 7

### *Nofe ne elni minag kagim fahigenage*

*Luk 6:37-38, Luk 6:41-42*

<sup>1</sup> Afa Sisas esona, “Nofe ne mingnag elni minag afuagim fahigegonugi afa enaig esogo sonaba el amtakwalig ne enaigba esibi ma sa God nem gwenai esenife. <sup>2</sup> Godba nengelni minag afuagim fahigihagefe asa ati ne mingnag elim esegonug eba gwenai esefe. Asa ne mingnag elim haig hili faigog eba gwenai hili nem faife. <sup>3</sup> Afa ne nilitem nangunam afa esog nilite ka nem fungsige noflanai weti fla fatina. Afa mas ne nimbef mo ne onigi mo aga nimbeafna nofla sa gi. <sup>4</sup> Haisegba asa ne esog nilite ka nem fungsige weti neana noflanai fla fatina afa nimbef mo aga nofla gi. <sup>5</sup> Eba ne sambaga mengig el ilawana nimbeafna noflanai aga fla fatinam afa numwehe nangufe asa nimbeafna nilite na noflanai mo fla fatina. <sup>6</sup> Nengel nofe ne mangwalba flinim Godim sa ati mwalunum afa malangim faigo afa nimbeafgelni suialag nemug engig nofe ne tatam laitigon masa pigaskofife masa nem wahgi kwaskofife.”

### *Elni suialag beten*

*Luk 11:9-13*

<sup>7</sup> Sisas esona, “Nengel ne Godim mangwaliba sahnibi eba ne flife. Afa ne yisigibi asa ne nangufi. Ne mengigiba tigibi eba God nem pitigiefonfie. <sup>8</sup> Asa mungwali el Godim sahnigim asa mangwalba lambifug. El mangwalba yisigifiba eba nangufe. Afa el mengigiba otigefiba eba God piginafe. <sup>9</sup> Afa luwal asa alagim sahanafe kam amba fai asa alag fun flagim faig enaigho esifafefe? Awai. <sup>10</sup> Afa luwal esog kam sawag ebinengu fai asa atiaho sa alag sombine faife? Awai, mas enaigba esei. <sup>11</sup> Nengel amtakwalig el afa ne nimbiafena luwalim mo mangwal mangwal suialag lambwaigog. Enaig fenaba enag sa ne numwehe anwenafi. Eba nengelni alag heven la ga enag sa ambangel ehem sahinigbi asa ehengelim fwina suialag fenig.

<sup>12</sup> Asa mingnagim esinibi mangwal sa ne membeg asa nem esinig. Enag mo enaho nihe moba afa Godna mo fli sihiule elni mo mog mu.”



*Nufunam nofkikenag gag eba mina weti*

*Luk 13:24*

<sup>13</sup> Sisas esona og, “Nengel asa mengig wetiklug megam asa ne saiyego. Mengig awaieg minaba eba kwania fegim afa pigiageg gwenaig ihlafeg afa ena minagamba kaksag el fafufiafu. <sup>14</sup> Afa mengig ikag nofkikena flagba eba wetiklug nemug ena minaba haig esig mungwali el patalfuihia mo eba mungu mungu el ehe ena minaba yisigi nangug.”

*Li i afa lifug i*

*Luk 6:43-44, Luk 13:25-27*

<sup>15</sup> Sisas esona og, “Nengel numwehi agfohefim mwakwal el Godna mo fli sihiule el ambefe eba sangwalinai malang sip-sipni lofug laitigogum afa ambe sipsipni muhla agfohiegim og na sipsipim kwahagafi. <sup>16</sup> Asa ne nangwag ehengelni nihem asa ne anwenafi ehe enaig esig. Afa nasigna we mas aibi lei afa susugna li mas fwatamofba lugwi. <sup>17</sup> Eba enaig eseg li suialag fug mungwali suialag leg afa li amtakwaliba fug amtakwali leg. <sup>18</sup> Afa li suialag mas fug amtakwali lei afa li amtakwalig mas fug suialag lei. <sup>19</sup> Mungwali li amtakwalig mas fug suialag lei enaba higfihig afa lambig suwi la laitig. <sup>20</sup> Asa ne nangwag ehengelni nihem afa asa ne anwenafi eba naho mwakwal el Godna mo fli sihiule.

<sup>21</sup> “Mungwali el asa kam seflig og ‘Ainiyag Ainiyag’ eba mas afui Godna bog megam saigo, awai. Amban kana alagna sawiegim patalkuiba eba ena ho Godna bog megamba oseifu. <sup>22</sup> Enanam ka mungwali elim kwefihiagefe el kam sihinife og ‘Ainiyag Ainiyag’, ati ka neana unehlag la mo fli sihiafug. Afa neana unehlag la ati ka sanel amtakwalig ningitigifi afa neana unehlag la ka haig haig kigmog ogfug. <sup>23</sup> Enanam ka esofe ne mango kana nufunam el mo. Nengel amtakwalig el gwesim afu.”

*Sambaga lala laskwas mo*

*Luk 6:47-49*

<sup>24</sup> Sisas enaig esona, “Amban kana mom hignam patalkuiagofiba eba naho suialag onigig el enag lalaba bite wasneig yi nimblag. <sup>25</sup> Enamba bu kwania fenam bu yi bugoi bifwat i fefiba mas toafoi eba bite ati sumulim kehlag. <sup>26</sup> Afa amban kana mom higinam afa patalblu fwainigba eba naho etetig el asa lalaba engig sisiyi nimblag fwahagba. <sup>27</sup> Afa maia bu kwania fenam bu i bugo i bifwat i fenam asa ena lalaba tofufefe.”

<sup>28</sup> Sisas maia ena mo sihinaba, el nubwel saglag i afa humoan i sineminefini ehena anwenagim. <sup>29</sup> Mangwal nihe mo anwena el mo ogfug, eba awai. Eba gwenag anwena el nemug fena.

## 8

*Sisas elim elig amtakwaligna suialafe fatina**Mak 1:40, Luk 5:12-14*

<sup>1</sup> Sisas mug gum fwaha pekana afa kaksag el sum patalfuna. <sup>2</sup> Afa el elig amtakwaligna seflig lepra blonam mong kokoni kwakwagena Sisasim sihina og, “Ainiyag ne membegba eba sa ne kam suialafe fati.”

<sup>3</sup> Sisas tuhnam sihina og, “Ei ka membeg, sa ne suialafefe.” Maia enaig esonaba ikagna ena gihba awaiena elbi enaba pugu suialafena. <sup>4</sup> Afa Sisas ehem sihina og, “Nofe ne elim sihin. Ikanam prisim nimbeafna eligim ogfunim afa sa Godim faig enaig autunam Moses ati sihi fwahana asa ma anwenafi neana gih ati suialafeg.”

*Sisas amini misog elni gafugag elim suialafe fatina**Luk 7:1-10*

<sup>5</sup> Sisas ika Kaperneam kembang la pugunaba afa amini misog el Rom lanai enag blona Sisasim sahna. <sup>6</sup> Og, “Saglag, kana gafugag el gihegba lala gi. Ati kigba mungwali lihlifeg afa susu kwaniafeg.” <sup>7</sup> Afa Sisas ehem sihina, “Eba ka ikanam asa ehem suialafe fatife.” <sup>8</sup> Amini misog el ehem sihina og, “Saglag, kaba suialag el mo na ne kana lalagamba blo, esug mo behig sihiba sa ma kana gafugag elbi suialafei. <sup>9</sup> Ka enaig sihifeg kanga ka sa misog elim ahnai skaufen. Ka gafa ati soldiaba feg enag kam ahnai skaufinigi. Afa sa ka ambanim sihinafe ika eba ehe ikafe, afa ka ming elim sihinafe aublo eba ehe blofe. Afa ka kikeafna gafugag elim sihinafe hwam gafugafe, eba ehe ika esefe.”

<sup>10</sup> Sisas ena mom higinam ehena olug figifena afa el asa ehem patalfuna enam sihini og, “Ka nem nufunam sihinig mas ka ambanim mungu Israel lanai elimba olug onigi kwania feg hwaig elbi nanguna mo. <sup>11</sup> Afa ka nem sihinig kaksag el osu puguag lanai osu peg lanai ambenam afa Abraham Aisak Jekopna wahlenam asa saiye nam Godna bog megam augunam ahagafe. <sup>12</sup> Afa ambangel enaig onigig kagel sa Godna bog megamba saiye eba God ningitigiba asa afwambagam sikulufeg la eba wewatonam heafgelni gog tutoa ahgafife.” <sup>13</sup> Sisas amini misog elim sihina, “Seika eba neana gafugag elbi suialafefe asa neana olug onigig la enaig gohug.” Afa maia sihiagafe gofnamba elbi enaba ati suialafena.

*Sisas Pitana kowagim suialafe fatina**Mak 1:29-31, Luk 4:38-39*

<sup>14</sup> Sisas ikana Pitana lala seifonam nangunaba Pitana kowag gihna kifela gifni ehena elig fwina nolugenagena.

15 Sisas ehenam ningam tohnamba gih gweyi awaienaba afa sa buhianam Sisasim fane tuhlu faina.

*Sisas kaksag elim suiala feitifena*

*Mak 1:32-34, Luk 4:40-41*

16 Osupegnam kaksag el sanel simbigahlaule elim wan ambegohna Sisas nangum maia mo esonaba asa sanelim ningitigina afa mungwali gih elim suiala fetifena. 17 Godna mo fla sihiule el Aisaia autunam ena mo sihinaba asa enaba ena mo nufunam puguna. Aisaia og;

Ehe bigelni haig haig gihim lambinam afa lambkuna. Ais  
53:4

*Sisasim patalfuiag na mo*

*Luk 9:57-60*

18 Afa Sisas kaksag el nangwaginam maia ambe ehem wahkinaba asa ehe heafna patalfuiag elim esoni, "Ause, na kwehegam maligim afu." 19 Afa enanam nihe mo anwena el Sisasim blo sihina og, "Saglag, ka nem mungwali kembang patal fefkufufe." 20 Afa Sisas ehem sihina og, "Afa sangwali malang bite meg ati go enana yi gig afa twafigni gag ati feg afa Nufunam Elbi heafna kugigbi awai." 21 Afa ming el eba patalfuiag el sihina og, "Ainiyag, kam fwahaiba ka ma kikiafena alagim fakanam." 22 Sisas ehem sihini og, "Mangofi, kam patalku. Amban ati lahag enaig el sa ma heafgelni melig pigieg elim bite la skui."

*Sisas esonaba afa bifwat tigiafona*

*Mak 4:36-41, Luk 8:22-25*

23 Sisas heafna elim bot la wankana. 24 Kwania bifwat ikagna bu mina sah blona afa bu blona bot megam sefua minefena. Afa Sisas non gifini. 25 Asa patalfuiag el afu Sisasim ihlafuni og, "Ainiyag, kam kwagan, muhla ati bigim awai ofe!"

26 Sisas wahigi sihini og, "Haisegba sa ne embefig? Nengelni olug onigig weti klug." Asa ehe buhianam efef mi bu mi kweniba asa bifwat tigiafona. 27 Enag el sineminefinim hefum sawagini og, "Sonag elbi eba haig el asa efef i bu i ehena mom sa higig?"

*Sambaganingi el sanel sambagalaule*

*Mak 5:1-17, Luk 8:26-37*

28 Afa Sisas bu ehengam ikanam afa Gadara bite la puguna. Afa sambaganingi el sanel sambagalaule hugskug fun meg menai afwahanam afa Sisas ahufwana. Eheningi elim fwina kwagaiti ahfiahkafena asa el mas ena mina afui. 29 Eheningi ahunena og, "Ainiyag ne Godna leg haisegba ne kam es-enig? Eba maisife atiaho ne glau kam amtakwalig mungwa faigim?"

<sup>30</sup> Afa muhlagig kaksag tata fane enanai yi ahagafu. <sup>31</sup> Afa enag sanel Sisasim fwina sahini og, “Afa kam ningitigiba asa ka afunam sonag kaksag tatana elig saiye go.”

<sup>32</sup> Afa Sisas ehengelim sihini og, “Se afu!” Afa sanel eheningim fwahanim tata la afu saiye gona asa enag kaksag tata kikini afunam bu la apaiye gonam mungwali pigina.

<sup>33</sup> Afa tata yuwigig el nangunim asa kembang gam kikini afunam elim ena mom sihigoni. <sup>34</sup> Afa mungwali el kembang lanai afunam Sisasim uflini. Afa nangunim ehem wasneig mo sihini og, “Sa ne kangelni hwa bitem fwaha ika.”

## 9

*Sisas elim ninga mong lihliga suialafe fatina*

*Mak 2:1-12, Luk 5:17-26*

<sup>1</sup> Asa Sisas bot la fukunam ikana. Afa ehagam ikana heafna kembang la puguna. <sup>2</sup> Kig lihliga elim mingnag el yisgofbog la Sisas nangum flifuna. Sisas nanguagnam ehengelni olug onigigim afa kig lihliga elim sihina og, “Nilite, sa ma neana olug wasneig gofi, ati ka neana mungwali nufwefbi huguflafatig.”

<sup>3</sup> Afa nihe mo anwena el Sisasim higinim. Enag hefum sihiageni og, “Enag elbi amtakwalig mo sihig. Ehe Godna sigagla gohug.”

<sup>4</sup> Afa Sisas ati heafgelni olugum anwenafeni og, “Eba haiseg nengelni amtakwalig onigig olug yi go. Eba amtakwalig. <sup>5</sup> Afa ka enaig sihifeba, ‘Atika neana mungwali nufwef huguflafatig,’ asa ne mas anwenafe nufunam mo sihig me awai awai me. Afa ka enaig sihifeba, ‘Buihiaka’ asa ne anwenafe nufunam sihig me awai awai me. <sup>6</sup> Afa ilawaba ka nem ogfunag Nufunam El eba ese fe nufwef huguflafatife.” Asa kig lihliga elim sihina, “Buihianam kife lala gam flauku.” <sup>7</sup> Asa el buihianam heafena lala gam ikana. <sup>8</sup> Afa mungwali nanguinim sineminefini. Afa sa mungwali sihiageafuna, “Godba suialag nemug. Ehe kwania wasneig elim faini.”

<sup>9</sup> Sisas nanai yi mo fwahanam ikana. Ikanam kig lambiule elim heafna gafugag lala nanguna. Ehena unehlagba Matyu. Sisas ehem sihina, “Kam patal blu,” asa buihia sum ikana. <sup>10</sup> Maia Sisas Matyuna lala ahagaflafnaba mingnag el kig lambiule el i afa nufwef el i ambe auguna. Augunam asa Sisas heafna patalfuiag el i wahanam ahagana. <sup>11</sup> Afa farisi el nangunim, afa patalfuiag elim sahigoni og, “Haisegba nengelni anwena el ika enaig elbi sefu waniau?”

<sup>12</sup> Afa Sisas higina maia sihiag fiahflanaba, asa sihini og, “El gihnaba eba sa afui doktaba nangui, afa el gih fwainig

eba mas afu nangui. <sup>13</sup> Afu mog mu yisigi Godna buk la go. Autunam God sihina, ‘Ka mas membenig mo Godim sis esug tuhlu faigba, ka membeg ne elim aflafena.’” Sisas esog, “Kaba mango blog suialag elim uneni mo. Ka amtakwalig elim unenig sa ma kam patalfui.”

*Fane foiyuogna mo*

*Mak 2:18-22, Luk 5:33-39*

<sup>14</sup> Afa enanam Jonna patalfuiag el ambe Sisasim sahini, “Kagelni niheba fane fafoiyu gofe. Haisegba kagel i farisi el i hwa nihe patalfuia afa neana patalfuiag el mas enaig esig mo?”

<sup>15</sup> Afa Sisas angwafig flagim lasug mo sihini og, “El mungu angwafig flagim, mingnagim buyisnig. Flana augiafnaba, heafna hihe mas foiyugona mo, awai. Afa nengigim angoluweg el enag elim wanig afunaba, afa sa heafna hihe fane foiyugona.”

<sup>16</sup> Afa Sisas mingnag lasug mo sihini og, “El mas yimieg lofug autunai lofugi wahe gweli. Maia gigiafibi, eba yimieg lofug wetifenam afa autunai lofug mo kwafofe. <sup>17</sup> Enaig mo eseg, el mas yimieg wain bug autunai sis lofug foglaba mas sugfui eba awai. Maia yimieg wain bug memewiafukoba, afa asa sisna lofug fog kwafug. Afa bu pe sufug na lofug amtakwalig. Asa yimieg wain bug glaunai sis lofuglaba eba sa efi fwinam eba sa suialag ahgofi.\*

*Sisas sambaganigi angwafigim wangane fefatiawagana*

*Mak 5:22-43, Luk 8:41-56*

<sup>18</sup> Afa Sisas ehengelim sihi gofenaba afa Junai misog el blona mong kokoni kwakwag penam Sisasim sihina, “Ilawo kana naina luwal ati lahad. Asa ne blo ningana kana luwalim tuhwiba asa ma buihiai.” <sup>19</sup> Afa Sisas buihia patalkuia gofnaba afa asa patalfuiag el gwenai esini.

<sup>20-21</sup> Afufefnaba afa angwafig mungu wahkig lala gim fawofeakafna 12 yia. Hefum enaig esona og, “Ka ehena lofugumba tuhwiba asa ma kam wanganefe.” Enaig oniginam nasa blona Sisasna masig muhla pugunam afa asa ehena lofugum embegim tuhna.

<sup>22</sup> Afa Sisas waikefe nangunam afa sihina og, “Angwafig, neana olug onigi ma aflahlana gofi. Neana suialag onigig eba nem waginefefe.” Afa asa gwenanam angwafig waginefena.

<sup>23</sup> Sisas ika pugunam misog elni lala megam sefukana. Afa nangunam nubwel el wewat lufufna enaig la augiafnaba enaba heafgelni aflafegim ogfuni. <sup>24</sup> Afa Sisas esona, “Apuke afu. Ena naini luwalba mas lahad mo awai, eba esug

\* **9:17:** Jisasna mo enaig esog heafna yimieg mo mas ika seifui autunai nihe monaba gohi.

nongi.” Afa ehem titige watigohna. <sup>25</sup> Afa maia apukenaba afa Sisas gwesim sefu ikana. Luwalim lahanamba ningana kehlanamba afa asa luwal buhiana. <sup>26</sup> Afa ena mo asa ika minefena.

<sup>27</sup> Sisas nanai yi fwaha ikana. Ikafnaba sambaganigi noftetini el Sisasim ahune ahkana og, “Nimba Devitna simbianinga afa kam kusguni.” <sup>28</sup> Enaig esohokafna afa Sisas lala gam sefunaba afa sambaganigi el ehem ningi ahsefunaba afa sa Sisas sahtigina og, “Ne haig onigig ahfeg, ne honigig ka neana nofugum ma wangene feawagime awai awaime?” Sambaganigi el esohona, “Ei Ainiyag, eba ne esefe!”

<sup>29</sup> Enaig esohonaba asa Sisas ningana nofugum tuhwanam sihina og, “Enaig eseg nenigina suialag olug onigig safegba eba nenigina nofugug suialafeawagig.” <sup>30</sup> Afa sa ehenigina nofug bahiawagena. Afa Sisas wasneig mo faini og, “Nofeka ahsihi enag gafugag ka esegba.” <sup>31</sup> Afa mas ena mo ahigina ahpataalkuna mo awai, eheba ahka ahsihinaba mungwali el higiwagini ena moba.

<sup>32</sup> Maia Sisas fwahakafnaba afa mingnag el mo lagig etetig elim Sisas nangum wanig afuna. Enag elim sanel amtakwalig memtog pwakafini. <sup>33</sup> Afa Sisas sanelim ninimu flaminefena ningihiana. Asa elbi mo lagna, asa elbi mungwali onigwagflafna. Afa asa enaig esogona, “Hai! Autunaba Israelna bitelaba mas big enaig nangufini mo, awai.” <sup>34</sup> Afa farisi el esogona, “Sanelni misog el ehem kigmog faig. Enana kigmog la sanelim ningi tigiifeule.”

<sup>35</sup> Sisas haig haig kembang la fapugufiahkana. Ehe laskuhlag lala sefukanam, Godna bog megam suialag mo sihinuwagena. Afa ehe haig haig gih wangene fetifeule. <sup>36</sup> Afa Sisas mungwalim elim nangwagna. El enaig esini ofeg sipsipna yuwigig el fwainig afa etetiagig ahwagikifna. Mungwali onigig etetiagafufna eba mas hefgelni kwaganangiagi. Afa Sisas ehengelim aflafena. <sup>37</sup> Afa asa heafena patalfuiag elim sihini og, “Enag afwambanai elbi enaig eseg asonai nefganai nubwel goh, afa nubwel gafugag elbi awai enam lambigimba. <sup>38</sup> Afa sa ne asona alagim sahinibi asa ma gafugag elim ningitigiba enag heafena nefganai sa ma afu lambi.”

## 10

*Aposelni unehlag mo*

*Mak 3:13-19, Luk 6:12-16*

<sup>1</sup> Sisas unenig heafena 12 pela patalfug el laskuhlag asa kigmog faigba sa sanel ningitigig afa gihinam ugwegim. Ehengelmi kanog fwatig Aposel.

<sup>2</sup> Enag 12 pela Kanog Fwatig el apukeg. Ehengelni unehlag enaig: Saimon heafena Grik unehlagba Pita, heafena sumineg Andru, Jems Sebedina leg, heafena etegsumineg Jon. <sup>3</sup> Filip, Bartolomyu, Tomas, Matyu, autunam Matyuna gafugag kig lambiule, Jems Alfiusna leg, Tadius, <sup>4</sup> Saimon, autunam ehe ika mo sihiaule, ka mas membeg mo membina el bigim misog el gohunigim, Judas Iskariot, enag mwauule el. Nengigim Sisasim angoluweg elni ninga la fwahani.

*Sisas aposelim gafugagim ningihiag*

*Mak 6:7-13, Luk 9:1-5*

<sup>5</sup> Sisas enaig 12 pela elim ningitigim, enag ehe mungwalim sihinim, “Nofeka afwambanai elim muhlafe afa nofeka Samariana latui seaifu, <sup>6</sup> amo, sane Ju nai el mo afu. Mungwalim enaig eseg sipsip lofug ehengelni yuwigig el awai. <sup>7</sup> Sane sihiafu hwa mo, ‘Godna bog meg ati blog afa Godna sawieg big saiye nam asa heafna luwalig afo.’ <sup>8</sup> Sa ne ugwegim, lahag buihagim, gihinam lofug amtakwalig ugwegim, sanel ningitigim. Ka nengelim kigmog esug faig enag elim kwaganig esug faig. <sup>9</sup> Nofeka wula la kig fanugufu. Awai. <sup>10</sup> Maia afuafefiba esug afwiagim. Mangofi wula, mingnag lofug, mong lofug, agat flaufiagim. Gafugag el mingnagim kwagani afa ehem sama kwagfwi.

<sup>11</sup> “Haig haig latu i sa ne apukenam sa ne yisigi suialag elim. Amban sa nem eheafna lala gam wanikig sa ne eheafna lala mungu gan sa ne ika. <sup>12</sup> Ne afu ena lala saiye nam sane enaig mo faigo, ‘God nem suiala fenife.’ <sup>13</sup> Sina lalanai nem suialafenagigba, eba neana suialag mo sa ma ehem ginfi. Afa nem kwaganig fwainigba eba ena suialag mo sa ne pese flauku. <sup>14</sup> Afa ambangel nem masig fatigonigim, afa ena mo higigim oksigbi. Maia ne ena kembang fwaha ikagim ofefiba sa ne munginai smof mo bwia bufe. <sup>15</sup> Ambangel sa nem masig fatinig eba ehengelnim mugwag amtakwalig pugunife. Autunam Sodom mi Gomora mi sa puguni ena kinigim gosenag.”

<sup>16</sup> Sisas enam sihiagena, “Sahig, enaig eseg malang ninimule sipsipim ona kwaskofe, afa ka nem ningitigiba asa el nem ona amtakwalehiagi. Sa ne numwehe nofiagifibi enaig esi wemlo lofug afa gamp lofug aflahlanafe. <sup>17</sup> Numwehe onigfibi afa mingnag el nem ona lambinim olyi aitagim. Afa enag el heafgelni laskuhlag lala saiye nem wanafu wena fifiletififi. <sup>18</sup> Afa el mas kam membini asa gavmanna nofla nem hugfuwanfuagim. Eba sa ne kana suialag mo sihigoni afa afwambanai elbi sa ma higi. <sup>19</sup> Maia nem lambi aitibi nofeka onigwaginim afa haig mo big sihiagifi. Afa gwenanam enana mo ne esibi asa God nem faifi. <sup>20</sup> Ena moba

nimbiafena mo amo, eba awai. Eba God nengelni alagna Sungwabug ehe nengelni mengig la sihife.

<sup>21</sup> “Afa el heafgelni nilitem lasefug mingnag elni ninga la fwahig. Afa el heafgelni luwalim enaig esi. Afa luwal heafgelni alagafagim mo flafugoni afa sa lasefug mingnag elni ninga la fwahig. <sup>22</sup> Afa ne kana el ofefiba asa mungwali el nem olug kakagegonfi. Afa amban kana mom asa fwina kehlag ukuiafiba eba God i ugweg hawagafefe. <sup>23</sup> Maia ha kembang lanai nem haig esegonibi enag kembang fwahanam ikagna afuiagoh afa sa ming kembang afu. Maia Nufunam El bloiba ne mas Israelna mungwali kembang gafugagba augwi eba awaie. Eba nufunam.”

*Kinig humoanim pugunig eba luwalim gafa pugunife*

<sup>24</sup> “Luwal saglagim filafefe afa gafugag el misog elim filafefe, eba awai. <sup>25</sup> Asa el saglag mi luwal mi gwenai esgonibi eba sa luwalna olug enesieg gohi. Afa gafugag el gwenai mungwalofug. Afa ka nengelni humoanig fenig. Afa el humoanim sefig Belsebul, eba sanelna humoan asa ehena luwaligim kwania unehlag amtakwalig faigog.”

*Ambanim sa big embebafinifi*

*Luk 12:2-7*

<sup>26</sup> Afa Sisasa enag esona, “Nofeka elim embefini, awai. Glauwaba sisagegoh afa nengigimba enaba ambala pugufe. Afa ena sisag moba eba mungwali anwenafifi. <sup>27</sup> Afa Ka nem efkwekna mo sihinig sa ne afu ambala sihi. Afa muhufuna mo ne higig sa ne afu mungwali elim ambwaitina sihigon. <sup>28</sup> Ambanba ona nem tigifati nofeka embefi. Enag el haiseg neana sungwabugimba tigifati, eba awai. Afa sa ne Godim embefena. Ehe mungu esefe elig ni sungwabugni suwi lagig kembang la lambi aitifefe. <sup>29</sup> Asa ne weti sambaganingi twafig wetiklu kigna flig afa mungu twafig mas bite la pei eba nengelni Api mas membeg mo. <sup>30</sup> Nengelbi enaig, God ati nengelni lapogum suwigig. Afa ati nengelnim anwenafenig. <sup>31</sup> Afa God weti twafigim membegim nangwaghiage asa nem gafa fwina membenig. Afa asa nofeka embefi.”

<sup>32</sup> Sisasa esog, “Afa amban el sihife og, ‘Ka Sisasa el,’ asa ka kikiafena oflanai Alagim enaig sihifenafe, ‘Enaba kana el.’ <sup>33</sup> Afa amban el mingnag elni nofla kam mas fatinaiba asa ka kikiafena oflanai Alagna nofla ehem ka mas fatinafe.

<sup>34</sup> “Nofeka onigi kaba blog enaig eseg mungwali auguiagim blo mo, awai, ka blog esegba el kokohiagig. <sup>35</sup> Afa mingnag el kana mo flig;



Afa mingnag kam mas fatinig enaba fagonai luwaligna humoanigni hefum flafihiagife. Afa enaig esifi mulwal ango i afag i hefum flafihiagife. Afa kowag gwenaign esifi hefum flafihiagife. <sup>36</sup> Mungu lalanai hefum mwanagife. *Mai 7:6*

<sup>37</sup> “Amban el sambaga onigigna gohug, asa afahumonig luwaligna fwina oniginag afa kamo weti onigina fenag eba mas kana el auguiafi. <sup>38</sup> Afa amban el mas patalfug mo afa hefum li katigeg la lahagim mas numweheg mo eba mas kana fei. <sup>39</sup> Afa amban el onigig heafena nofkikenagag aluwegfenam asa hefum nawo sisife eba enaig el mas nufunam nofkikena flai afa amban ehefum pigaupinam kam patalfu oblofiba eba sa wahkig nofkikena gagflai.”

<sup>40</sup> Sisas heafena patalfuiag elim esoni, “Amban nem fla suiala ofeflafliba eba ati kam esenag. Afa God kam ningihiag asa amban kam suiala ofeflafliba eba ati ehem esenag. <sup>41</sup> Afa amban Godna Mo Fla Sihiaule Elim nangugum anwenafeg asa ehem numweheafila asa ma God enag elimbi suiala fiahflai afa asa Sihiaule Elim enaig esenag. Afa amban suialag elim nangugum anwenafeg asa ehem numweheafila asa ma God enag elimbi suiala fiahflai afa asa suialag elim enaig esenag. <sup>42</sup> Afa amban kana elim kweafuimba asa God ehem suiala feahflafe. Afa kana el eba unehlag fwainig asa amban el ehem luputug bu faimba eba God mas enag weti kwefuagimba eteti.”

## 11

<sup>1</sup> Afa Sisas heafena 12 pela patalfuiag elim ena mo sihi fwahanim asa enanai fwahanam sihiakana.

<sup>2</sup> Maia Jon bula laitiag el kalabus lala gafenaba afa asa Kraisa God Gisfu Fwahag El haig haig gafugag esenaba enam mo higina. Asa heafena patalfuiag elim ningitigina Sisasim nangugum. <sup>3</sup> Afa afu apukenam Sisasim sahini og, “Ne naho Jon sihi fwahanaba naho ne blog naiba ming elim kagel nengenife.”

<sup>4</sup> Afa Sisas sihini, “Ati ne nangug afa higig asa Jonim pese afunam sihini. <sup>5</sup> Ati nofug hafinig el bahiaskofeg afa mung amtakwalna wangene fiahsaieg afa lepra elim wangeneg afa ang tetini ati mo higig afa el melig pigieg buguiagafeg afa gawig fwainig el Godna Suialag Mo higig. <sup>6</sup> Afa el kam oniginaiba afa heafena olug onigigba wasneig gofefe enaig elba sa ma sifakale.”

<sup>7</sup> Maia afunaba asa Sisas mingnag elim sihini. Ehe Jonim esona og, “Autunam ne el fwainig la afunam asa Jonna mo higini. Ne haig elim noka nangu? El enaig pos lofug efef petla fakafefugu enaig ne nangui me? Jonba mango enaig

mo. <sup>8</sup> Mangwal figim ne membig afu nangug? Ne membig nangug el suialag nemug lofugna nangu? Jonba mango enaig mo. Eba el suialag lofugnaba lala suialag la ga. <sup>9</sup> Haisegba ne afug? Ne Godna Mo Fla Sihiaule El nangug. Ei, Jonba enaig el. Ka nem nufuna mo sihinig, hwa elbi mingnag Mo Fli Sihiule Elim gosenig. <sup>10</sup> Enaig elbi autunam Godna Buk ati sihi fwahana. Enaba God esog;

Sahig, Kana mo flaukwiag elim ningihiaiba. Afa ehe Godna Gisfu Fwahag elim gosenam asa mina numwehiage ikafe asa ma el kam olug onigini. *Mal 3:1*

<sup>11</sup> Sisas esona, “Ka nem nufunam mo sihinig Jon bula laitiag el mungwali autunai elim pugu gosenig. Afa ambangel wetiklug saiweg Godna bog megam enaba Jonim gosinig. <sup>12</sup> Afa ilawana Jon nai yi pugunam blog ilawanga pugug afa sa wasneig el Godna bog megam bagagigim afa wasneig el membeg oga bagaginim asa fla. <sup>13</sup> Mungwali Godna Mo Fli Sihiule el i afa Mosesna nihe mo i sihig ena mo sihi mangwal sa sumi pugufe. Ena moba ati gofena autunam maisim Jon fiahfenaba. <sup>14</sup> Afa ena moba enaig esona Elaijaba pese blogim. Afa amban ena mog moba membegba asa fla, Jonba Elaija. <sup>15</sup> Afa amban anganaba eba sa ne higi.”

### *Glaunai el mas suialag oningig*

<sup>16</sup> “Afa el ilawo auguia enaba haig el asa ka nem luwal lasugum mo sihinig. Mungwali el enaig esig luwal fane suguafogla auguiaba afa gosis seafla. Afa luwal mingnag luwalim unegoni. <sup>17</sup> Afa kagelbi fuf i anba i guwagibi asa nengel mas ahfe. Afa kagelbi wewatioahba asa nengel mas wegoi. <sup>18</sup> Afa glaunai el luwal lofug enaig esig asa Jon wainbug i fane i mas nena mo eba oga Godna unehlagim fingife afa el esoni sanel amtakwalig ehem sefu gohna. <sup>19</sup> Afa maia ka Nufunam El blogba afa ka bu i fane i ahagagig asa el esogona, ‘Sa nangu! Ena el bu i fane i ati fwina ahagagini. Ehe kig lambig el i afa ming amtakwalig el i wana.’ Ehengel enaig sihifini. Afa Godna suialag gafugag ogfunig Godna anwena eba nufunam.”

### *Mingnag kembang lanai mas Sisasim olug onigini mo Luk 10:13-15*

<sup>20</sup> Sisas mingnag kembang kaksag Godna kigmog ogfuiagena asa ena kembang lanai mas heafgelni amtakwalig fwahini mo, afa asa Sisas ehengelim fenugena. <sup>21</sup> Sisas esog, “Korasin lanai el i Betsaida lanai el i niasabanig, afa mangigim ne enaigba nesig. Afa Tair lanai el i Saidon lanai el i nanguiteba enag kigmogum asa ati ne nangug asa autunam heafgelni amtakwaligim fwahite afa kokohiag lofug i smof

i asa heafgelni nihim esiagini enaba heafena kusugogum ogfuni. <sup>22</sup> Ka nem nufunam sihinig nengegim God kwefihiagenam mungwag faigim. God Tair lanai mi Saidon lanai mi mungwag amtakwalig faigim afa nengelim mungwag amtakwalig numwehe faife. <sup>23</sup> Afa Kaperneam lanai el, ne onigig koka suialag el hevengam afufe. Eba awai. God suwilagig kembangam nem laitife. Afa Sodom nanguiteba enag kigmogum ne nangug asa Sodom lanai onigig waikefite asa ma heafena kembang glau kwesegofite. <sup>24</sup> Ka nem nufunam sihinig nengegim Sodom lanai God kwefihiagenam mungwag amtakwalig faigim afa nengelim mungwag amtakwalig numwehe faife.”

<sup>25</sup> Afa enanam Sisas Godim sihina og, “Api, ne heven lanai i bite lanai i Ainiyag el goh. Ka nem suialag onag. Afa enag nufunam mo ne anwena elim kumohlanig afa ne etetig elim enag nufunam mo meaglanai eseg ambala opugug. <sup>26</sup> Ei, Api enaba nimbafena suialag onigig ne eseg.

<sup>27</sup> “Kana alag kam mungwali gawig faig. Afa el mas Godna legimba anwenafig mo. Api munguhe ena luwalimba numweheg anwenafeg asa ena luwal apiim numoheg anwenafenag asa amban elim wegifwatigim alagim ogfunig.

<sup>28</sup> “Afa nihe mo el wasneig gafugag nem faigog. Afa ambangel asa yingmung fiahsaieg, aublo, ka sa neana kinig flafatinife. <sup>29</sup> Afa ne kana mom skaufenibi asa ka nem ogfunibi sa ne kana gafugag anwenafi. Afa kaba mango fwinam fenugeah mo eba ka kikefum skaufeg asa ne hekulia flafim. <sup>30</sup> Afa hwa gafugag ka nem faigbi eba hefeg afa mas kinig mo.”

## 12

### *Farisi el Sisasim sahini Esug Auguiag Osunam*

#### *Mak 2:23-28, Luk 6:1-5*

<sup>1</sup> Afa enanam eba Esug Auguiag Osunaba Sisas aso gam ikana. Afa heafena patalfuiag el binipiginaba asa ehengel asonai lambi ahagigim ofinibi.\* <sup>2</sup> Maia farisi el enam nangunim Sisasim og, “Sa nangu, neana patalfuiag el bigelni Esug Auguiag Osuna nihe mo flafug.”

<sup>3</sup> Sisas sihini, “Amo, enag el mas flafug mo. Mas ne suwigni mo haig asa Devit eseg? Maia Devit heafena el binipigibi. <sup>4</sup> Afa ehe Godna lala sefunam asa ehe heafena el amba Godim faig wanena. Nihe mo sihi pris mungu sa enamba ahagai. Devit heafena elim flafu wanena. <sup>5</sup> Atiaho ne Mosesna nihe moba anwenafig afa Esug Auguiag Osuna

\* **12:1:** Patalfuiag el mas ukwefig mo. Afa farisi el enaig esogog nofena Esug Auguiag Osunaba gafugafi.

enaig eseg prisba Godna Kwania Lala la gafugafifini. Afa ehe mo Esug Auguiag Osuna nihe mo flafuni asa God ehem esoni og, 'Ne mas mangwal fig mo.' <sup>6</sup> Ka nem sihinig amban sa go, Godna Kwania Lala goseg. <sup>7</sup> Godna mo sihig;

Ka mas sis faigiba membeg mo, ka membeg ne elim aflafegoni.

6:6

*Hos*

Ati ne ena mog mo anwenafigbi ne mas enag elim fegonigi haig eseg fwainig. <sup>8</sup> Asa Nufunam Elbi eba Esug Auguiag Osuna misog el."

*Elni ninga amtakwalig*

*Mak 3:1-6, Luk 6:6-11*

<sup>9</sup> Sisas enanai fwaha ikanam laskuhlag lala puguna. <sup>10</sup> El ninga amtakwalna gafena. Mingnag el ogra Sisasna amtakwalig nihem yisigi nangunim asa mingnag elim mo faigo. Ehem sihini og, "Atiaho bigelni nihe mo esog sa enaigba ihlafe elni gihim Esug Auguiag Osuna suialafefati?"

<sup>11</sup> Afa ehe sihini, "Ambana tata bume la Esug Auguiag Osuna peba. Sa ne haisefe? Eba ne fwaklafatife. <sup>12</sup> Eba el tatam gosinig. Afa bigelni nihe mo esog asa ma bigel Esug Auguiag Osuna suialafefati." <sup>13</sup> Afa Sisas elim sihina og, "Ninga susnufiafo." Maia ninga susnufiafonaba asa ehena ninga suialafena gwenai ming ninga mungwalofug. <sup>14</sup> Afa farisi el fwahinim sihiagini ogra Sisasim tigi.

*Sisas Godna Gisfu Fwahag El*

<sup>15</sup> Afa Sisas ena mom higinam asa nanai fwaha ikana. Afa nub el sum patal afuna asa Sisas mungwali gih elim wangene fetifena. <sup>16</sup> Afa Sisas wasneig mo faini og, "Nofeka mingnag elim sihigon." <sup>17</sup> Ehe enaig eseg Godna mo ambala upugug. Autunam mo flaule el Aisaia Godna mo faini. <sup>18</sup> Ehe enaig esog;

Eba gafugag el ka kanog fwahag. Ka ehem fwina membenagim afa sifakalenag. Kikiafena Sungwabug ka ehem faife asa ehe mungwali elim suialag nihe mo sihinigefe. <sup>19</sup> Ehe mas haig esei afa mas ambwatina fei. Ehe mas mo fwina ambala sihi. <sup>20</sup> Bwei mas wasneig mo ehe enam mas toawagi afa suwi weti lagi ehe mas fufufakai. Ehe enaig eseaka enai ihlafegba ehe suialag nihe ublug pugug. <sup>21</sup> Afa afwambanai el nengeafufiba asa ma kwagani.

*Ais 42:1-4*

*El sihig Sisas sanelni gafugag el*

*Mak 3:20-30, Luk 11:14-23, 12:10*

<sup>22</sup> El mungu sanel esinagana mas mo lagwage afa nof tetina. Enaig elim Sisas nangum wanig ambena. Afa asa

Sisas ehem ati suialafatinaba asa nofug wagenefena afa mo lagana. <sup>23</sup> Afa mungwali sineminefini afa esogona og, “Ena elbi Devitna simbianinga me awai awai me?” <sup>24</sup> Afa farisi el higinim ene mom afa esogona, “Amo, ehe Belsebulni kigmog la sanel amtakwaligim ningi tigifiaka. Belsebul eba sanelni misog el.”

<sup>25</sup> Sisas ehengelni onigigim ati anwenafeni esona og, “Amo, neba etetig, ambangel kantri kwefihiagim asa hefum hagfe eba ena kantri amtakwalefe. Afa kembang i mungu lala nai i hefum hagfe eba gwenai esefe amtakwalefe. <sup>26</sup> Satan heafena gafugag elim amtakwale aitiba asa hefum pwatihi-agife. Afa pwatihiaginim afa asa mangwal sa Satan nangwagihagefe eba enag tigeufefe. <sup>27</sup> Ne onigi ne esogog ka Belsebulni kigmog la sanelim ningitigifiaka. Afa nufunamba asa amban neana elim kigmog faife? Asa nimbiafena el ogfufe neana onigig amtanafeg. <sup>28</sup> Ka Godna Sungwabugni kigmog la sanelim ningitigifiakaba asa ne anwenafi Godna bog meg enag ati pugug.

<sup>29</sup> “Haisenam asa el sefukanam wasneig elni lala gawig ugwefe? Afa ilawo ehe wasneig elim sa wena kikenagegim eba sa lalanai gawig ugwefe.

<sup>30</sup> “Amban kamble i ahgohug fwainigba enag elbi eba kana angoluweg. Amban kam lambigim kwefwag fwainigba eba taitufeule el. <sup>31</sup> Afa ka nem sihinig haig haig nihe amtakwalig afa amtakwalig mo Godim esini, eba ma God elni amtakwaligim flafatinifi. Afa amban amtakwalig mo Godna Sungwabugim esinibi eba God mas enaigim flafatini. <sup>32</sup> Afa amban amtakwalig mo Nufunam Elim esonaiba, eba God ma enam amtakwaligim flafatinife. Asa amban amtakwalig mona Godna Sungwabugim esonaiba eba glau afa nengigim God mas enam amtakwaligim flafatinai.”

*Li amtakwalig heafa gwenai fug lugug*

*Luk 6:43-45*

<sup>33</sup> “Li figetini fug suialag afa li ambieg eba fug amtakwalig. Afa fug haig afa li gwenai. <sup>34</sup> Ne sombine lofug! Nengel amtakwalig el asa nengelni mo sihi enag mas nugweg mo. Mango sa onigig la go enam elbi mo sihife. <sup>35</sup> Suialag el nugweg onigigim kehlagim eseg. Afa amtakwalig el amtakwalig onigigim kehlagim eseg.

<sup>36</sup> “Ka nem sihini ma God kwefihiagenam mungwag faife ehe kwefihianigefe mungwali elni haig haig esug mo. <sup>37</sup> Haig mo sa ne sihig eba God nem kwefihiagefe afa ne suialag me awai awai me.”

*El Sisasim sahini kigmogum kam ogfun*  
*Mak 8:11-12, Luk 11:29-32*

<sup>38</sup> Farisi i afa nihe mo anwenafeg el i Sisasim sihini og, “Tisa, kagel membeg koka neana wasneig ogfuiagim nangui. Asa kagel anwenafi God nem kigmog faig.”

<sup>39</sup> Sisas sihi og, “Amtakwalig el afa Godim mas onigini afa enaig el membeg kigmog ona nangu. Afa ka mas nem kigmogim ogfunug mo. Afa mo flaule el Jonana kigmog sa ne nangu. <sup>40</sup> Afa sambaga mungu osuna afa sambaga mungu sinaini Jona kwania sawagna atag la sefugini. Asa gwenaig esefe Nufunam Elbi sambaga mungu osuna afa sambaga mungu sinaini bite megam sefugife. <sup>41</sup> Afa nanam God kwefihianigefe afa Ninivenai el bigiagafenam asa nengelim setigifi. Ehengel Jona na mo higinim asa heafgelni amtakwalig nihe masigim fatini. Ka nem sihinig amban sa go asa Jona gosenag. <sup>42</sup> Afa nanam God kwefihianigefe eba saganai bitenai Kwin<sup>†</sup> buhianam asa nengelim setigifi. Heafena membia kembig fwaha blonam asa Solomon na suialag mo higina. Ka nem sihinig amban sa go Solomon gosenag.

*Sanel pese blogum*  
*Luk 11:24-26*

<sup>43</sup> “Maia sanel elim fwaha ikanam ehe bu fwainig bitegam ikanam gagim yisigife afa mas uflag mo. <sup>44</sup> Hefum esog, ‘Ka pese kiafena lala gam ika.’ Afa pese blo pugug ehe nangu ena lala esug go afa ombusig go afa ati numwehiageg. <sup>45</sup> Ehe ika sanel elegeg la gohug ena wanblog. Ena sanel fwina amtakwalig afu saiwegim agfo. Ilawona el gwenag fena afa glauaba fwina amtakwalig. Eba nengelim amtakwalig elim gwenaig pugunifi.”

*Sisasa afagna nilitena*  
*Mak 3:31-35, Luk 8:19-21*

<sup>46</sup> Afa maisim Sisasa mo sihi gofenaba heafena afagna sumini puguna ambe afwambala afofenaba ona Sisasa sihini. <sup>47</sup> Mungu el Sisasa sihina, “Neana afagna sumini puguna afwahie ona nem sihini.” <sup>48</sup> Afa Sisasa wahigife sihina, “Amban kana afag? Amban kana nilite?” <sup>49</sup> Ehe heafena patalfuiag el ninga bulni sufici esona og, “Sa nangu, hwa el kana afagna nilitenaba. <sup>50</sup> Amban kana heven lanai Alagna sawiegim esofefiba eba kana afag, nilite, mulwal nemug.”

<sup>†</sup> 12:42: Sa nangu 1 Kin 10:1-10

# 13

*Sisas sihi el kon gug asola aitiageg*

*Mak 4:1-9, Luk 8:4-8*

<sup>1</sup>Ena osuna Sisas lala fwahanam ikana bu blugyi pugunam oyna ogfufenuge. <sup>2</sup>Afa nubwel el Sisasim olya fatini asa ehe bot la ika peganam mungwali bu blugyi afohiafena. <sup>3</sup>Afa Sisas kaksag lasug mo sihini og, “El enai eseg kon gug asola laitiageg. <sup>4</sup>Laitiage ika afa mingnag gug mina la apaiyeba afa twafig ambe apaiyegim lambagafig. <sup>5</sup>Afa mingnag mo funkisigig yi apaiyenam ikagna puguiageg. Eba bite mas fwina pegag mo. <sup>6</sup>Maia osu puguba asa aptukwahla skofeg. Afa bagag mas apaiye eba pigife. <sup>7</sup>Afa mingnag mo usieg weg amtakwalig la apaiye. Afa usieg pugugum asa kikeg. <sup>8</sup>Afa mingnag mo suialag bite la apaiyegim fugleg. Mingnag 100, mingnag 60, afa mingnag 30 enaig puguiageg. <sup>9</sup>Amban anganaba eba sa ne higi.”

*Haisenaba sa Sisas lasug moba sihina*

*Mak 4:10-12, Luk 8:9-10*

<sup>10</sup>Afa patalfuiag el Sisasim ambe sahini, “Haise ne elimbi lasug mo sihini?”

<sup>11</sup>Afa wahigife sihini, “Enag moba Godna nangwaghiageg autunam God mas elim sihinig afa glau eba ati nem mog mo upugugnig afa enag mingnagim mas anwenafini mo. <sup>12</sup>Amban ati mangwal fegba eba God ehem faiba asa kaksag fefe. Amban el enaig fwainigba eba God ehena weti flafatife. <sup>13</sup>Okwenag el nofna nangug afa mas numwehe nangug mo. Afa angugna higigim eba mas numwehe higig mo. Afa mas numwehe anwenafig mo. Enaba nufunam nasaka ena lasug mo sihig. <sup>14</sup>Aisaia mo fli sihiafug el sihinaba ena elbi ena mom nufunam esini;

Ena elbi higafufenaba afa mas anwenafini mo. Afa nanguafufenaba mas numwehe nanguini mo. <sup>15</sup>Afa ehengelni misogyn onigwagig mas ombuseni mo afa ehengelni angug titie skofena afa nofug kohla skofena. Afa ena nihem patalfwiagba eba God sihig ehengelni angug ati higig, afa nofug ati nangug, afa olug onigig ati anwenafig. Afa ka nangum ati waike ambe enaig esigbi eba ka wangenefe laitife. *Ais 6:9,10*

<sup>16</sup>Afa Sisas esoni, “Se sifakali nengelni angug ati ne higig afa nofug ati ne nangug. <sup>17</sup>Ati ka nem sihini mangwal ati ne higigim afa nangug kaksag suialag el afa mo fli sihiafug el oyna higinim afa nangu asa ehengel mas higinim afa nangu.”

*Sisas kon gug laitiag mog mo sihina*

*Mak 4:13-20, Luk 8:11-15*

<sup>18</sup> “Sahig sane anwenafi hwa lasug mog mo kon gug laitiageg. <sup>19</sup> Ambangel Godna bog meg mom ati higigim afa mas anwenafig mo eba enaig eseg kon gug mina la apaiyeg. God ena mo olug yi laitig afa Amtakwalig El eba Satan blo lambig. <sup>20</sup> Afa kon gug funkisigig yi apaiyeg eba enaig eseg el Godna mo higigim ikagna sifakale flag. <sup>21</sup> Eba kon bagag lofug mas pekag mo. Eba makwalig gohogum awaieg. Eba maia ehena olug Godim oniginagba asa mingnag el ehem kinig i afa ninimu mo i faigba. Eba ehena onigig tigeufefe. <sup>22</sup> Afa kon gug usieg weg la apaiyeg eba enaig eseg el Godna mo higigim afa heafena gagim onigigim afa ehe fwina kigim onigka. Eba ena onigig blonam kike fakag. <sup>23</sup> Afa kon gug suialag bite la apaiyeg eba enaig eseg el mo higigim afa anwenafig. Eba fug asa enaig lugufeg mingnag 100, mingnag 60, afa mingnag 30.”

*Lanuwe lasug mo*

<sup>24</sup> Sisas ming lasug mo sihina og, “Godna bog meg enaig eseg eba el suialag kon gug asola laitiageg. <sup>25</sup> Afa maia sinaini el askaba eba el amtakwalig blogim afa lanuwe amtakwalig kon la taitufiakag. <sup>26</sup> Maia kon fug oluguba asa lanuwe nahlum wahe pugug. <sup>27</sup> Afa gafugag el asona alagim sihini og, ‘Ati ne suialag kon gug laitiagegba afa ilawamo kaksag lanuwe amtakwalig puguiagego.’ <sup>28</sup> Ehe sihi, ‘Amtakwalig el enaig eseg!’ Afa gafugag el sihi, ‘Ne og kagel lanuwem fagahiagife?’ <sup>29</sup> Afa ehe sihi, ‘Amo, nofeka lanuwe fagahiagi eba masa na kon nahlum fagaitifife. <sup>30</sup> Sa fwahi, ma wahe pugunam ma kon fug luwiba asa ma gafugag el lambi. Enanam ka gafugag elim sihinibi asa ma lanuwe fagahiaginim wena kike skofini wehlagi. Wehlaginim asa ma kon mo lambwagini asa ma kana fane lala sugui.’ ”

*Mastet li fug lasug mo*

*Mak 4:30-32, Luk 13:18-19*

<sup>31</sup> Sisas ming lasug mo sihina og, “Godna bog meg enaig eseg eba el aso la lifug fatigba. Ena libi mastet. <sup>32</sup> Ena li fug wetiklug afa maia pugugba enaba kwaniafegim mingnagim asonai fanem kwaganangeg. Eba li lofug kugum asa twafig gag kagagla nimblagig.”

*Yist lasug mo*

*Luk 13:20-21*

<sup>33</sup> Sisas ming lasug mo sihina og, “Godna bog meg enaig eseg angwafig yist amba la kokofegim ambam nahlum



waheg. Yistba enaba smof lofwag ambam nana pipki. Enaba weti fegim afa kwaniafeg.”

*Haisegba enag Sisas enaig lasugum sihig*

*Mak 4:33-34*

<sup>34</sup> Hwa mungwali mo Sisas lasug mo sihig. Ehe mas ambala sihina mo afa mungwali mo ehe lasug mo sihini. <sup>35</sup> Ehe enaig eseg Godna mo ambala upugug. Autunam mo fli sihiafug el sihini og;

Ka lasug mo sihiagim. Afa mangwal sa autunam meagam sefugo bite puguia fwainig fiafenaba asa ka sihife.  
*Sam 78:2*

*Sisas lanuwe lasug mog mo sihinig*

<sup>36</sup> Afa Sisas lasanam ika lala sefu ikana. Heafena patal-fuiag el ambe sihini og, “Sa ne kagelim lanuwe lasug mog mo sihin.”

<sup>37</sup> Ehe wahigi sihini, “Ena elbi suialag kon gug laitiageg eba Nufunam El. <sup>38</sup> Afa aso eba mungwali bite, afa suialag kon gug eba el Godna bog megam saiyeafo. Afa lanuwe amtakwalig eba Satan na el. <sup>39</sup> Afa amtakwalig el lanuwe laitiageg eba Satan. Maia nefgenai lambigim ofefiba asa enanam mungwali awaiefefe. Afa gafugag el eba oflanai el. <sup>40</sup> Enaig el pos amtakwalig angogoluagigim sa suwi la tuhlu maia eba gwenaig esefe enanam mungwali awaiefefe. <sup>41</sup> Nufunam Elbi heafena oflanai el ningitigiba asa afufe. Ehengel afu saiyeenam fahigiagife Godna bog meg la. Asa mungwali mangwal i amtakwalig eseg afa amtakwalig el mi asa numwehwaginim. <sup>42</sup> Asa suwi kwania la lambi aitime. Enana yi eyu watinam gog kike skofefe. <sup>43</sup> Enanam suialag el osu lofwag laukwag skofefe saiyeenam heafgelni Apina bog meg gam. Amban angana eba sa ne higi.”

*Kig meagam go lasug mo*

<sup>44</sup> “Godna bog meg enaig eseg kaksag kig lofug bite la sefu go. Asa el bumekokogim nangugum ehe pese titi fwahag. Asa sifakalegim ikanam asa heafena gawig faigim asa ena bite ati flag.”

*Kopu lasug mo*

<sup>45</sup> “Hwaba ming Godna bog meg lasug mo. Eba enaig eseg el membeg oka kopu suialag yisigi. <sup>46</sup> Afa maia fwina suialag kopu yisgegoba asa heafena mungwali gawig faig asa ena kopu ati flag.”

*Fufwala lasug mo*

<sup>47</sup> “Hwaba ming Godna bog meg lasug mo. Eba enaig eseg fufwala kwania el bula fatinam asa haig haig sawag

ati lambina. <sup>48</sup> Maia fufwala la memtola pugunaba bu blug yi skogofena. El gafenaba asa sawag kwefskofena. Sawag suialag sob yi fatiafena afa sawag amtakwalig flafenam fatiafena. <sup>49</sup> Enanam mungwali awaieba enaig eseg enaba sawag lasugum sihig. Afa amtakwalig el i afa suialag el i mungwali wahegofenaba. Asa oflanai el ikanam amtakwalig elim lambinam laitina. <sup>50</sup> Afa suwi kwania la lambinam aitife. Enana yi eyu watinam gog kike skofefe.”

*Glaunai onigig afa autunai onigig*

<sup>51</sup> Sisas sahtigina, “Atiaho ne ena momba anwenafig.” Heafena patalfuiag el pese sihi, “Ei, kati anwenafig.” <sup>52</sup> Afa ehe sihini, “Enag sa nihe mo anwena el, Godna autunam mom anwenafeg afa ehe Godna glaunai bog meg mom enag mungwali anwenafe auwageg. Eba enaig eseg el gawig lala sefu ikanam afa glaunai gawig afa autunai gawig asa lambogifi.”

*Nasaret lanai el Sisasim masig fatini*

*Mak 6:1-6, Luk 4:16-30*

<sup>53</sup> Afa Sisas ena lasug mo enana yi fwahana. <sup>54</sup> Afa heafena kembang gam pese ikana. Ehe laskuhlag lala la mo sihinigena afa mungwali higinim sa sineminefni. Ehengel sahini, “Amban maia ehem anwenafeg kigmog faig? <sup>55</sup> Bigel anwenafini heafena alag lala nimblaule el. Sinaba ehena legho maia? Sinaba Mariana legho maia? Ati big anwenafig Jems, Josep, Saimon, afa Judas heafena sumineg pugug. <sup>56</sup> Heafena muwalig mungwali big auguia. Hanai yi maia ehe enaba anwenafeg kigmog flag?” <sup>57</sup> Afa asa ehengel mas ehem sifakalini mo. Afa Sisas sihini og, “Afa mungwali el sihig, mo fli sihiafug el eba misog el. Afa heafena kembang lanai afa heafena nilite ehem mas higini mo.” <sup>58</sup> Afa mungwali ehem mas olug onigini mo asa enanai yi Sisas mas wasneig gafugag esena mo.

## 14

*Haisenaba Jon bula laitig el lahana*

*Mak 6:14-29, Luk 3:19-20, 9:7-9*

<sup>1</sup> Enanam Herot Galili nai misog el higina Sisasna wasneig gafugag puguna. <sup>2</sup> Ehe heafena elim sihini, “Eba Jon bula laitig el afa pese buihia, asa ehe enaig kigmog wasneig gafugag esena.”

<sup>3-4</sup> Afa Herot ena onigina asa heafena suminegna angwagim flana. Autunam Herodias Filipni yi gana. Jon Herotim esona, “Eba amtakwalig suminegna angwafig flagba.” Afa Herot heafena elim sihini, “Jonim kehlanim asa

lala meg gam wena sumul yi kiki fwahi.” <sup>5</sup> Herot membena Jonim tigi afa enaig esegba ka Ju elim embefinig. Asa Ju el onigini Jon eba mo fli sihiaule el.

<sup>6</sup> Afa mingnag el ambe kuhlunim afa sifakalini afag enaig osuna Herotim foklana. Herodiasna legba nainai ehe buhianam elim olyi ilani. Herot nangunam sifakalena. <sup>7</sup> Asa Herot angwafigim moamo sihina fwahanam, “Mangwalim ne membeg sane kam sahana ka ne faife.” <sup>8</sup> Ena angwafig afagna onigigim patalkuna. Afa sahana og, “Ka membeg ilawo Jon bula laitig elna misog sob yi fakanam kam blu fai.”

<sup>9</sup> Afa mungwali el misog elni mom higinim asa ehengelni olug kinig. Afa heafena gafugag elim esoni sesi. <sup>10</sup> Asa ehe elim ninghianaba afa asa ikana Jonna unehligim hige flaitina. <sup>11</sup> Afa ena misog sob yi fatinam flau bluna asa angwafigim faina afa ehe flanam afagim uku faina. <sup>12</sup> Jonna patalfuiag el ambenam afa asa elig behig flifu kumohluni afa sa Sisasim ena mom sihini.

*Sisas 5,000 elim fane faini*

*Mak 6:31-44, Luk 9:10-17, Jon 6:1-13*

<sup>13</sup> Maia Sisas ena mo higinam ehe enanai yi fwahanam afa bot la hefswaimu bite behigam ikana. El ena higinim afa kembang fwahanam asa biteamina afuna sum. <sup>14</sup> Sisas bu blug yi pugunam afa nubwel elim nangwagina aflafenim afa gih elim suiala fetifena.

<sup>15</sup> Maia osu pegim ofefenaba afa heafena patalfuiag el ambe ehem sihini og, “Osu ati ope afa hwa biteba lala fwainig. Hwaina sa ne ningitigi kembang gam sama afui fane yisgiawogi.” <sup>16</sup> Sisas sihini og, “Ehengel mungwali wanai yi auguiagim. Nengel sa ne fane faigo.” <sup>17</sup> Ehengel ehem sihini, “Ambaba afala gohug afa sawagba sambaga enaig hwaba afogwa.” <sup>18</sup> Afa ehe sihini og, “Kam osum lambina.”

<sup>19</sup> Sisas esoni mungwali pos la apaiye augu. Ehe ambaba afala gohug enaig lambinam afa sawag sambaga lambtiginam asa ofgam nof fena afa Godim suialag onanam. Asa ehe kosko fenam asa heafena patalfuiag elim faini. Patalfuiag el flinim afa asa magiauwigini. <sup>20</sup> Mungwali ahgawaginim afa ihlafe skofena. Patalfuiag el fane pese lambini afa 12 sob yi laitnim afa sob yi memtola pugua skofena. <sup>21</sup> Enanam 5,000 saglag ati ahgawagini afa angwafig i luwal i mas suwigini mo.

*Sisas bu sisi ika*

*Mak 6:45-52, Jon 6:16-21*

<sup>22</sup> Afa Sisas patalfuiag el wasneig mo faini asa bot la gof afu ehagam maligim. Asa ehe mingnag elim sihini og, “Pese lala gam afu.” <sup>23</sup> Ati sihinigenam asa ehe mungu kukana

mug gamba oyna Godim sihina. Sikuleofe fenaba ehe mungu gofena. <sup>24</sup> Enanam bot maia membigam ikanaba. Efef kwania blona botim minam gofla pahlana afa bu botim figi figi fiaflana. <sup>25</sup> Maia ohugukafnaba Sisas bu sisi blo patalfuiag el nai yi muhla opugufena. <sup>26</sup> Maia Sisas blo afenaba afa patalfuiag el nangunim embembe fiaginim esogona og, “Sonaba iflaf oblo!” Asa ehengel eyu watigona.

<sup>27</sup> Afa sa Sisas ikagna mo lagna og, “Nofe ne embefi, eba kaho. Sa olug enesieg fli.” <sup>28</sup> Afa Pita esona og, “Ainiyag, eba neaho? Sa ne kam sihinaiba kasa neanangum bu sisi yi blo.”

<sup>29</sup> Afa Sisas ehem sihina og, “Se blo.” Asa Pita botim fwahanam pe bu sisi yi Sisas nangum ikana. <sup>30</sup> Afa ehe bifwatim nangunam embefena asa ehem bu meg gam pe akofnaba asa Sisasim unena og, “Ainiyag, kam kweagfu!”

<sup>31</sup> Asa Sisas ikagna Pitam ninga na kehlanam asa ehem sihina og, “Neana olug onigi wetiklu, Haisegba sa ne sambaga onigigba flag?”

<sup>32</sup> Afa maia bot la ahfukunaba asa bifwat awaiena. <sup>33</sup> Afa bot la auguiafnaba Sisasna unehlagim fingi finim esogona og, “Eba nufunam nemug ne Godna leg.”

### *Sisas Genesaret lanai elim wangene fetifena*

#### *Mak 6:53-56*

<sup>34</sup> Afa sa wankana bu mo koflakanam ika ehgam Genesaret kembang wanpuguna. <sup>35</sup> Maia wanpugunaba asa Sisasim nangunim anwenafini. Asa mo sihiagafuna mingnag kembang gam og ma gih elim Sisas nangum wanambe. <sup>36</sup> Afa Sisasim fwina sahani gih elim fwatiba og ma ehena lofug meigim tuhwibi. Ambangel enaig esibi asa ehengelim wangene feskofefe.

## 15

### *Sisas esog farisini nihem*

#### *Mak 7:1-13*

<sup>1</sup> Enanam mingnag farisi el afa mingnag Mosesna nihe mo anwenafeg el Jerusalem fwahinim ambegohna Sisas nangum afa sahini og, <sup>2</sup> “Haisegba asa neana patalfuiag el fane ahagaba, ehe mas bula ningam suwagi asa autunam simbianinga ofugoni, afa ehe simbianingana nihe flafug.”

<sup>3</sup> Sisas wahigi sihini, “Neagaba nimbiafig elni nihe ne goseg ufug afa Godim nihe mo ne flafug. <sup>4</sup> Afa God esonig ‘Sa ne nimbiafna afa humoanigim asa ahnai skau fegonim’ afa ming mo enaig esog, ‘Afa amban alag mi afag mi amtakwalig mo faigba eba tigibi asa ehem lahafe.’ <sup>5</sup> Afa ne esog afa amban el gawig nubwel fegba asa ma alag mi afag mi kwagani, afa ehe esog, ka mas ne kwagani afa hwaba

gawigba Godim ka faig.” Farisi el onigig hwaba suialag nihe. <sup>6</sup> “Maia amban enaig esegba ehe mas alagim ahnai skau fenag mo. Afa enaig mina feg Godna nihe mo sum fatigim afa nimbiafna nihe mo mo ne goseg ufug. <sup>7</sup> Nengel sambaga mengigna el. Nimbiafngelni mom autunam Aisaia ati sihi fwahana, eba nufunam. Ehe enaig esona, <sup>8</sup> God sihi; Sona elbi mengigna kana unehlagimba figifig afa olug onigigba alganam afwahie. <sup>9</sup> Ehe ofgugonug elni nihe mo afa ena moba seflifinim Godna nihe mo. Asa enag elbi kam munum lotu finig.” *Ais 29:13*

*Mangwal sa elim nufwehinag*

*Mak 7:14-23*

<sup>10</sup> Afa Sisas elim uneni ka nangum ambegoh afa esoni og, “Ne higinim sa ne anwenafi! <sup>11</sup> Mango sa ne mengna negba, eba mas elim nufwehi enag mo, amo eba awai. Asa mango mengmenai pugug eba naho elim kwenag Godim lotu fenagim.”

<sup>12</sup> Afa patalfuiag el Sisasim ambe sihini og, “Atiho ne anwenafeg farisi enag mo higigim afa olug kakage skofena?” <sup>13</sup> Ehe pese sihini, “Mungwali gau kana heven lanai Api mas suguageg mo eba sa fagahiagefe. <sup>14</sup> Se fwati, sonag elbi nof tetini el. Ehe ming nof tetini elim ningana kehla kunam afa ahkanam asa bume la ahpefe.”

<sup>15</sup> Afa Pita ehem sihina og, “Sa kagelim numwehe sihini enag lasug mog mom.” <sup>16</sup> Sisas sihini, “Atiaho, ne kana patalfuiag el ne mas ihlafig mo? <sup>17</sup> Mas ho ne anwenafig mo? Mango sa el negim ehnogam pekagim asa atam ikag. <sup>18</sup> Afa mango sa olug onigig lanai gohugum afa asa mengig la puguiageg. Eba naho elim nufwehinag. <sup>19</sup> Afa amtakwalig onigig oluginai pugug eba enaig eseg: aisilni tigege, angwafig kehlag, aga taituna, ukwefna flag, makwal mo, moalamp mo. <sup>20</sup> Enaig niheba naho elim nufwehinag. Afa el mas ninga bulasuwage ehe fane negba eba mas nufwehig mo afa Godim lotu fenagim mas kwenag mo.”

*Angwafigna olug onigig*

*Mak 7:24-30*

<sup>21</sup> Sisas enanai yi fwahanam ika Tairnai yi afa Saidonnai yi kembig muhla ika puguna. <sup>22</sup> Afa angwafig mungu Kenan lanai enanai yi gafena enag blonam Sisasim unena og, “Ainiyag, Devitna simbianinga kam aflafena. Sanel kana nainai luwalim amtakwalenageg.” <sup>23</sup> Afa Sisas mas ehem wahigi lagna mo. Afa heafna patalfuiag el ambefenaba sihina og, “Pese ningihia makai afa angwafig sum une blofena.” <sup>24</sup> Sisas sihina, “Eba God kam ningihiagba na kam

blog Israelnai elim sipsip lofug awaiegba enam ka kwaganig. Neba neafa afwambanai el.”

<sup>25</sup> Afa angwafig blo Sisasna kig muhla penam sahana, “Ainiyag, sa kam kweafu!” <sup>26</sup> Afa Sisas pese sihina, “Naiba mas ihlafegmo luwalna fane malangim laitigonuba.”

<sup>27</sup> Angwafig sihina, “Ei, nufunam ne sihina. Afa malangba alagna sime skaunai ogug fanefe.”

<sup>28</sup> Sisas wahigi sihina, “Angwafig, neana olug onigigba numweheg. Mangwal sa ne membeg eba pugufe.” Gwe-nanam luwalim suialafena.

<sup>29</sup> Sisas enanai fwahanam Galili bu ehebeg mina ika pugunam afa mug la fukogafena. <sup>30</sup> Nubwel el ambe Sisasim nanguni. Asa enag el lambug ambegona mong waikafona, nof tetini, mong ninga lilina, mo tetini, afa mingnag gih el afa sa Sisas nai yi mong muhla lasani. Afa sa Sisas suialafetifena. <sup>31</sup> Afa nanguni, maia mo tetini mo lagwagini, mong waikafona suialafe skofena, mong lilina afuna, afa nof tetini bahia skofena asa mungwali Israelnai Godim figifini.

### *Sisas 4,000 elim fane faini*

#### *Mak 8:1-10*

<sup>32</sup> Sisas heafena patalfuiag elim awamonim og, “Ka hwa elim aflafenig, asa sambaga mungu osuna kam waniaflag afa fane awai. Kam esug ningitigiagim oksig masa bini pigife, afa mina la afuian kilale apaiyegofe.” <sup>33</sup> Patalfuiag el ehem sihini og, “Hwaba bite fane fwainig. Hana sa big fane amba flinim asa big hwa kaksag elbi faigofe.” <sup>34</sup> Sisas ehengelim sahini, “Hanansi bret ne skug?” Afa esogona, “Ka bret elegeg la gohug afa mungu mungu weti sawag, enaig ka skug.”

<sup>35</sup> Sisas mungwali elim esoni og asa bite la apaiye au-guiaka. <sup>36</sup> Afa sa bret elegeg la gohna afa sawag enag lambinam. Afa Godim enaig esona hwaba suialag ka nem suialag onag. Sihi fwahanam asa bret i sawag i koskofenam, afa patalfuiag elim fainiba asa mungwali elim mangegoni. <sup>37</sup> Afa ahagaginim asa ihlafe skofena. Afa mingnag bret mo gwese afgokufna asa pese lambogini elegeg la gohna enaig sobini memtola pugua skofena. <sup>38</sup> Saglagba enaba ahaganamba 4,000 saglag. Afa angwafig i luwal i eba mas suwigini mo. <sup>39</sup> Afa Sisas elim ningitigi minefenam asa ehe mo bot la fukoganam afa sa Magadan bitegam ikana.

## 16

### *Misog el ogra kigmogim nangu*

#### *Mak 8:11-13, Luk 12:54-56*

<sup>1</sup> Afa farisi i Sadyusi i Sisas nangum ambegonam. Ona Sisas gihi nangu asa sahani og, “Sa kam Godna kigmogim

ogfun.” <sup>2</sup> Afa pese sihini, “Maia osu pegba ne sihi, ‘Of kagatotofeg eba osu suialagna.’ <sup>3</sup> Afa leanaba ne sihi, ‘Of bufegim nugwag ofe.’ Afa ne ofim nangu asa ne anwenafi mangwal pugufe afa ne mas anwenafig mo kigmog mogim ka ogfuna eba gwese gohfufe hwa osunagafa. <sup>4</sup> El glau ohnanam eba amtakwalig afa Godim masig fatinig. Enaig el kigmogim oga nangu asa Godim mas fwina onigi mo. Ka mas nengelim kigmog ogfuni, awai. Eba Jonana kigmogim mungu ne nangufi.” Asa Sisas fwahanam ikana.

### *Farisi ni Sadyusi ni yistim*

#### *Mak 8:14-21*

<sup>5</sup> Maia patalfuiag el bum apaiyegohnam ehegam maligim apukunam afa ehengel etetini bret lambug afuiagim. <sup>6</sup> Afa Sisas ehengel lasug mo sihini, “Bwata, afa numwehifibi farisi ni Sadyusi ni yistim.” Yistimba enaba smof lofwag bretim esegba asa pipkig. <sup>7</sup> Patalfuiag el hefum sihiagini, “Mas big bret lambu ambeg mo asa Sisas enaig esog.”

<sup>8</sup> Sisas ati anwenafini ehengelni moba afa ehe enaig esona, “Haisegba enaig moba ne sihiagi kagelni bret awai. Hei, neana olug onigig wetifeg. <sup>9</sup> Atiaho ne mas anwenafig mo? Ka onigig ne mas etetig mo autunam bret afala gohug enag ka faini 5,000 elim afa sob 12 gohna asa ne pese lambini. <sup>10</sup> Afa bret elegeg la gohug eba 4,000 el ahagagini asa ne pese elegeg la gohna enaig sobini lambini. <sup>11</sup> Ka mango bretim eso mo. Haiseg ne mas anwenafig mo? Numwehifibi farisi ni Sadyusini yistim.” <sup>12</sup> Afa ehengel ati anwenafini Sisas mas enaig mo bretna yistim sihina mo, eba awai. Eba farisi ni Sadyusi ni mom sama numwehi.

### *Sisasba amban*

#### *Mak 8:27-30, Luk 9:18-21*

<sup>13</sup> Sisas Sisaria Filipai distrik gam ikana, afa heafena patalfuiag elim sahini og, “El esogo amban maia Nufunam Elbi?” <sup>14</sup> Afa ehengel sihini og, “Mingnag esogo ne Jon bula laitiag el, afa mingnag esogo ne Elaija, afa mingnag esogo Jeremaia amo ming el mo fli sihiule.”

<sup>15</sup> Sisas sahtigina, “Afa nemba haig onigifig? Kaba amban maia?” <sup>16</sup> Pita wahigi sihina, “Ne Kraisa God Gisfu Fwahag el afa Godba nofkenagag, nemble heafna leg.”

<sup>17</sup> Sisas pese sihini, “Saimon Jonna leg ena mo sane sihigba, mango el nem sihina mo, eba heafa kana alag heven lanai nem upugunag. Asa ne enam sifakalena. <sup>18</sup> Ka nem sihinag ne Pita neana unehlagba eba fun. (Mo enag ne sihigba enaig eseg fun.) Enaig eseg el lala fun la nimblag. Enag fun la kana elim ka lasanig. Afa Satanna wasneig mas kana elim filafati.

<sup>19</sup> Eba Godna bog meg ki ka nem faife. Afa mangwal sane kikiseg bite la asa God gwenai gese. Afa mangwal sane pigi fwaha bite la asa God gwenai gese.” <sup>20</sup> Afa Sisas heafna patalfuiag elim kweni, og, “Nofeka sihi kaba Kraisa God Gisfu Fwahag El.”

*Sisas heafna laha buihiana mo sihina*

*Mak 8:31–9:1, Luk 9:22-27*

<sup>21</sup> Gwenanam Sisas patalfuiag elim heafna mom ambala sihini og, “Eba sa ka Jerusalem gam ikafe. Afa misog el i, el Godum sis tuhlu faiule i, afa nihe mo anwena el i asa kam kaksag kinig faife. Afa kam lahafe afa sambaga mungu osuna ka pese buihiafe.” <sup>22</sup> Pita Sisasim suflaukunam afa fenagena og, “Sama God gwenai esei, hwa enaig mas nem sa pugunai.”

<sup>23</sup> Afa Sisas wahigi Pitam sihina, “Is kam fwaha, Satan! Ne enaig membeg kana mina oga kagfo. Neana mo mango Godna onigig mo awai, eba elni onigig.”

<sup>24</sup> Afa Sisas enaig sihifeni, “Afa amban membeg kana patalfuiag el ogofiba asa ehe mas hefum onigig mo afa ehe sama li katige la lahagim numwehenam afa sa kam patal blui. <sup>25</sup> Afa amban el onigig, heafna nofkena aluwegfenam asa hefum nawo sisife eba enaig el mas nufunam nofkena gagim flai. Afa amban kam patal oblofiba asa ma heafna nofkena fwahai eba asa ehe wahkig nofkena gag flai. <sup>26</sup> Eba mas suialafeg mo afa el mungwali bitenai gawig lambigba asa hefum awaife. Afa mungwali gawig mas elim nofkena fai. <sup>27</sup> Afa Nufunam El eba Godna kigmogna afa oflanai elim wanblofe. Asa enanam ehe mungwali elim haig haigim kwefiahaginam asa faifi. <sup>28</sup> Ka nufunam sihi mingnag el wanai yi goh maisim pigieg fwainig fefiba asa enag el nangufe Nufunam el enaig asa kwania misog el lofug blofe.”

## 17

*Sisasna elig algam puguna*

*Mak 9:2-13, Luk 9:28-36*

<sup>1</sup> Enwesog la gohug osuna maia ika awaienaba afa Sisas Pitana, Jemsna, afa Jonna enam sulfu wankanam afu mog gam fukwalafuna. Ehe fwaimu auguiafena. <sup>2</sup> Afa auguiafenaba nanguini Sisasna elig algam fena. Heafna nofbosug ombusug osu lofug. Afa heafna fatitiag lofug busugnemwag fena. <sup>3</sup> Maia patalfuiag el nangunibi ikagna Moses i Elaija i ahpugunam Sisasim ahwani lagofena. <sup>4</sup> Afa Pita Sisasim sihina, “Ainiyag, eba suialag bigel wanai yi auguiafim. Ne membegba asa ka wanai yi lala weti sambaga



mungu nimblage. Ming neana, ming Mosesna, afa ming Elaijana.”

<sup>5</sup> Afa Pita sihi gofenaba asa leango ombusug peblonam sagfla skofena. Afa enag leangolaba God sihini og, “Hwaba kana leg mungu ka fwina membenag afa ka ehem sifakalena asa ehena mo higinim.”

<sup>6</sup> Afa patalfuiag el higinim embefini asa nofbosug mo bite gam kumuni. <sup>7</sup> Afa Sisas blonam ningana tutuhenugenam sihini og, “Buguiagafe, nofeka embefi.” <sup>8</sup> Asa bahia nanguniba afa mas ming elimba nangunim mo eba Sisas mungu gofena.

<sup>9</sup> Afa mog lanai apaiye ambeafenaba Sisas wasneig mo sihini og, “Asa ne nangug enaba nofeka elim sihigoni sama ikan Nufunam el lahanam buihiafei.”

<sup>10</sup> Afa patalfuiag el sahani og, “Haisegba asa nihe mo anwena el enaig sihifini Elaija gose blofe asa Nufunam El mo sum blofe?” <sup>11</sup> Afa Sisas sihini, “Eba nufunam, Elaija ma gose blofe asa ehe mungwali numwehiagefe. <sup>12</sup> Ka nem nufunam sihig Elaijaba ati blog afa el mas ehem anwenafig mo eba heafgelni onigig la ehem haig haig ese flini. Eba gwenai esinife, Nufunam Elim asa kinig faife.” <sup>13</sup> Asa patalfuiag el anwenafini Sisas enaig esona Elaija eba Jon bula laitiag el.

*Sisas luwalim nilag simbigahlagim ugweflakana  
Mak 9:14-29, Luk 9:37-42*

<sup>14</sup> Sisas wanblona kaksag el yi wanpuguna. Afa sa mungu el blo mongkogini kwakwagenam Sisasim sihina og, <sup>15</sup> “Ainiyag, sa ne kana luwalim aflafena. Nilag ehem amtakwalnageg afa suwi la i bu la i fapefiaka. <sup>16</sup> Afa ka wanikig nimbiafna patalfuiag el nai yi wani puguba afa ehengel mas ugweflakig mo.”

<sup>17</sup> Sisas pese enaig sihifeni og, “Mungwali el hosa gohkaba eba olug onigig mas suialafig mo afa maisi nengel flaflafafu. Hanana saka gafiba asa ne anwenafife? Kamoksig wahkig nem wangagim. Sa luwalim osum wani blu.” <sup>18</sup> Sisas nilagim fenaminefena asa nilag luwalim fwaihia ikana. Afa luwal ikagna ugwena.

<sup>19</sup> Afa patalfuiag el ehe fwaimu augunam Sisasim sahini og, “Haisegba kagelbi mas nilagibi ningihig mo?” <sup>20</sup> Afa wahigi sihini, “Eba nengelni olug onigig wetiti, ka nem nufunam sihinig afa nengelni olug onigig wetiti mastet sisig lofwag enaig, asa ne enag mogum enaig esoiba ‘Susum ika’ asa ikafe. Eba sa ne mangwalim mungwali ihlafife. <sup>21</sup> Afa Godim asa sahanifibi asa ne fane fwaigo eba sa ne enaig ena nilagibi ningitigi.”

*Sisas heafna laha buihiagim pese sihina*

*Mak 9:30-32, Luk 9:43-45*

<sup>22</sup> Afa ehengel Galili bite la afu apukenam Sisas sihi og, “Eba Nufunam Elim flinim asa mingnagna elni ninga la fwahibi. <sup>23</sup> Afa ehem tigife asa sambaga mungu osuna awaieba asa pese buihiafe.” Maia sihi fwahanaba asa patalfuiag el olug kinig eskofena.

<sup>24</sup> Afa ming nanam Sisas heafna patalfuiag elim wankana Kaperneam bite la wanpuguna afa Godna Kwania lalanai kig lambiule el Pitam sahani, “Atiaho nengelni anwena elbi kigba Godna Kwania lala namaunim takisbi fafaife?” <sup>25</sup> Pita sihini, “Ei”. Afa maia ehe lala gam ika pugunaba afa Sisas gof sahana, “Saimon ne haig onigig feg? Misog el ambangelni kig lambogig heafna luwalna me awai afwambanai elni me lambig?” <sup>26</sup> Pita sihina, “Afwambanai elni”. Asa Sisas esona, “Enaig esegba luwal mas kig faig mo. <sup>27</sup> Afa nofe ne big enaig esi eba masa bigim lagonife. Sa ne bu gam ikanam fofwalana sawagim etiawage asa ilawana ne flanam asa ne kig mengig la nangu. Enag kigba eba bigim ihlafenife asa flanam Godna kwania lalanai elim fai.”

## 18

*Amban hefum gosegba*

*Mak 9:33-37, Luk 9:46-48*

<sup>1</sup> Enanam patalfuiag el ambena Sisasim sahini, “Afa amban sa Godna bog megam goseg pugufe?” <sup>2</sup> Asa Sisas luwalim awamonam bluna olyi lasuna. <sup>3</sup> Afa enaig esona, “Ka nem sihini, afa olug onigig ne waike luwal lofwag fwainigba eba mas nengel saiye afui Godna bog megamba. <sup>4</sup> Amban enag luwal lofenam hefum ahnai skaufeba, eba sa goseg pugui Godna bog megba.”

*Sa ne nufwehimo fwaha ika*

*Mak 9:42-48, Luk 17:1-2*

<sup>5</sup> “Amban kana unehla la luwalim awamonam kweafwiba eba naho kam gwenag esenag. <sup>6</sup> Afa luwal sa kam olug oniginag, enag sa amban wanikinam nufwehimo laba husi-afwibi, asa God ehem mungwag faife eba kwania kinig feg. Afa enaig elim fun kwania wuneg la wena kikenim bu megam fatife eba weti kinig feg. <sup>7</sup> Eba amtakwalig, mangwal sa kaksag hwa bite la gohka eba elim nufwehinag. Enaigba wahkig gofife, afa amban mingnag elim enaig esegonibi, niasabanig.

<sup>8</sup> “Afa neana ninga i mong i nem huguflaku mangwal la husufwagba eba sa hegefłaiti. Eba suialag feg ninga mong fwainig asa God i hafufe. Enaig amtakwalig neana elig

mungwali goh afa nem suwi wahkig lagig yi flinim fatife.  
 9 Afa neana nofug nem huguflaku mangwal la husufwagba eba sa fogafila. Eba suialag feg mungu nofug fwainig asa God i hafufe. Enaig amtakwalig sambaga nofug goh afa nem suwi lagig latu yi flinim fatife.

10 “Ne numwehifibi nofe ne luwalim pagaupenam afa eso, esim gofiba. Afa ka nem osihini heafgelni oflanai el kana heven lanai Apina nofbosugim wahkig nangwafu. 11 Afa el minam eteti afuna asa Nufunam El blonam asa pese lambig.”

### *Sipsip mungu awaie*

*Luk 15:3-7*

12 “Afa el 100 sipsip tata lofwag enaig ese wanga. Afa mungu sipsip minam eteti ikag. Ne haig onigig, el enaig eseg? Ehe mingnagim sipsip mo mog la lasanam afa mungu sipsipim yisgiakana. 13 Afa mungwali mas awaiena mo ehe sifakaleg, afa mungu pese flagim asa ehem fwina sifakalenag. 14 Afa gwenaign eseg nengelni heven lanai Alag mas membeg mo luwal lofwag mungu awaiegba.”

### *Nilitem niheugwag nihe*

15 “Afa maia neana nilite nem haise naiba asa ika nangunam asa nimbe fwaimu ahwaganam sa niheaugu. Ma atiaba higigba eba sa wanim blunam asa mungu nilite ahfe. 16 Afa ehe neana mo higi fwainigba eba sa mungu me awai sambaga me sa ne pese afu nangu. Eba sama neana mom ahigi. 17 Afa ehe nengelni mo higi fwainig gwenai esegba eba sa Godna elim sihigoni. Afa ehe Godna elni mo higig fwainigba. Asa nengel ehem enaig onigig fini sonaba angoluwag el.

18 “Ka nem sihinig, afa mangwal sa nengel kikisig bite la, asa God gwenaign esefe. Afa sa nengel pigi fwahaiba bite la, asa God gwenaign esefe. 19 Mingnag mo ka nem afai, ambanani hwa bite la hafiba asa mangwalim mungu onigig ne ahsihinaiba asa kam heven lanai Alag eba nengelim esenife. 20 Hanai yi sambaga me awai sambaga mungu me kana el ambe laskuhlafiba eba ka olyi wangafife.”

### *Gafuga el oksig mungwag faigim fwahag*

21 Pita blo Sisasim sahana og, “Ainiyag, afa nilite kam haig esenagofiba asa hanasi nagim ka ehem mas esenai? Afa mas ka enwesog la gohug mungwag faiyiba eba atiaho ihlafeg?”

22 Afa Sisas ehem sihina og, “Amo eba, enwesola gohug mas ihlafeg mo. Sa gwenaign ese enwesola gohug enaig afa ne pese ese ikan asa ne mas pese suwigi. 23 Ka nena ena mo fai, eba Godna bog megam enaig eseg. Misog el membeg heafna elim gafugagim oagna fahigiage. 24 Afa kigim

fahigiag ofefenaba afa gafugag elim wanig ambena og masa mungwag enaig 10 million kina pese fai. <sup>25</sup> Afa enaig el kig awaiena pese faigim asa misog el esonig og, ‘Koka kig pese fla eba enaig eseg enag elni heafna angwag na luwal na afa mungwali gawig na lambinim asa mingnag elim faigoiba asa ka enana kig fla.’ <sup>26</sup> Afa el enag mo higinam asa mongkogini misog elni muhla kwakwagena afa esona og, ‘Sa kam aflafena, ningenafiba nofeka ahmona ese afa eba ka nem mungwali kig mungwag pese faife!’ <sup>27</sup> Afa misog el ehem aflafena asa esona, ‘Kig hosa ne kana flanag eba ka nem nangu fwahafe’ afa sa ehem fwahana.

<sup>28</sup> “Afa el ikanam ming el gwenaig gafuganai apuguiafenam. El kig weti flana ming elni hosa misog el ehem fwahana. Ena kigba enaig eseg mungu mungu kina. Afa sa elim wuneglig yi kehlanam og, ‘Sa kam mungwag fai.’ <sup>29</sup> Afa heafna hihe mongkogini kwakwagena afa esona og, ‘Sa kam aflafena, ningenafiba nofeka ahmona ese afa eba ka nem mungwag faife!’ <sup>30</sup> Ehe oksina enaig esegim asa ehem polisni ninga la fwahanam maia ikan ma mungwag kam fai. <sup>31</sup> Afa mungwali mingnag gafuganai el enaigim nangunim asa ehengelni olug amtakwale skofena. Afa sa misog elim sihini og el enaig eseg.

<sup>32</sup> Asa misog el ehem awamona afa esona og, ‘Ne amtakwalig gafugag el. Gof kana kaksag kigna ne mas nungwe gafuga fena mo. Afa ne og, sa kam aflafena, asa ka nem nangu fwahana. <sup>33</sup> Ka nem aflafena asa neanga gwenaig ese.’ <sup>34</sup> Afa misog el ehem olug kakagena afa mingnag el ninga la ehem fwahanaba asa ma susu flanam ikan maia mungwali mungwag faiba.

<sup>35</sup> “Kana heven lanai alag asa nem gwenaig esinifi. Asa nimbiafna nilite mas amtakwalig mungwag faig mo sa kana Alag heven lanai gwenaig nengelim esenifi.”

## 19

*Sisas sihina angwafig flag nihem*

*Mak 10:1-12, Luk 16:18*

<sup>1</sup> Sisas ena mo sihi fwahanam asa Galili bite fwahanam afa Judia gam ikana. Ena biteba Jordan bu embegam. <sup>2</sup> Afa kaksag el ehem patalfuna. Enanai yi mingnag gih elim suiala fetifena.

<sup>3</sup> Afa farisi nangum ambegona. Ona Sisasim gihi nangunim afa ehena mom pagaupigo asa sahini og, “Aseg, sa saglag heafna membug la angwafigimbi ningihiai, atiaho bigelni nihe mo ihlafeg?” <sup>4</sup> Afa Sisas wahigi sihini og, “Mas ho ne Baibelna mo ne nanguni mo? Autunam God elim

eseagenaba afa sa saglag mi angwafig mi eseawagena. <sup>5</sup> Afa God esog, 'Asa ma kwamblog el heafna alagim afa afagim fwatiginam ika heafna angwagim hawagenam afa sama mungwafe.' <sup>6</sup> Afa mas enmuna flagafe eba ati mungwafeg. Asa el nofekawu pwatihiagahfe eba God ati waheg fwatigig."

<sup>7</sup> Afa farisi ehem enaig sahinifini og, "Haisegba Mosesna nihe mo sihig, el membeg heafna angwagim oningihiafiba asa ma ginofe faiba sama ukwi?" <sup>8</sup> Sisas pese sihini og, "Nengelni olug liputini enaig esenaba ena mog Mosesna nihe mo sihina og, 'Sesi'. Afa autunam eba mas enaigofena mo. <sup>9</sup> Ka nem sihini angwafig ming saglag i apugu afe fwainigba enam heafna alagag ninghianam afa ming angwafig flagba eba enaig ati mingnag angwafigim fapugu fenig."

<sup>10</sup> Afa patalfuiag el sihini og, "Afa nofeka angwafigim ningihia afa konigig angwafigim flag fwainigba eba suialafeg." <sup>11</sup> Sisas sihini, "Nengelni mo angwafigim flag fwainigba. Mungwali el enag mo mas membi higigim. Afa ambanim sa God fai eba sa ehe ena mom patalkui. <sup>12</sup> Eba haig haig mog el enaig eseg mas angwafig lambi. Mingnag elbi maia afag wanigagba eba elig amtakwalig, afa mingnag elbi heafgelni nihem enaig eseg laligim pukunig, afa mingnag elbi angwafig lambi fwainigba eba heafgelni mungwali onigig Godna bog megam sefugo. Amban ena moba anwenafigba eba sa ne fla."

*Sisas esog luwalim sa wanambe*

*Mak 10:13-16, Luk 18:15-17*

<sup>13</sup> El luwalim Sisas nangu wanambena og ma Sisas kagelni luwalim ningana tohunigenam asa Godim sihina. Afa patalfuiag el elim esogoni, "Mangofi, asim wanafu." <sup>14</sup> Afa Sisas sihini og, "Sama luwalim wanambe ka nangum afa nofene kwegoni. Amban el enag luwal lofegba eba Godna bog megba enaig elni." <sup>15</sup> Afa ehe luwalim ningana tohunigenam enanai fwahanam ikana.

<sup>16</sup> Afa el Sisasim blo sihina og, "Anwena el, ka membeg wahkig nofkena flagim afa sa ka suialag gafugafe?"

<sup>17</sup> Afa ehem sihina, "Haisegba ne kam sahanag og, 'Mango suialagba?' God mungu eba ehe suialag. Ne membeg wahkig nofkena flagimba sa ne Godna nihe mo patalku."

<sup>18</sup> El sahanag, "Ham nihe mo sa ka patalkufe?" Sisas wahigi sihina og, "Hwa niheba enaig eseg, nofeka elim tigeftati, afa nofeka ming angwafigim aga fatinai, afa nofeka ukwefe, afa nofeka ming elim makwal mo sihina. <sup>19</sup> Afa sa ne nimbiafna alag mi afag mi ahnai skaufen, afa sa ne nimbiafna hihem aflafen asa ati nimbefum enaig esifafefe."

<sup>20</sup> Kwamblog el Sisasim sihina og, "Kaba ati enam mungwali

nihem patalku. Ilawaba ka mangwal esefe?” <sup>21</sup> Sisas esona, “Ne suialag elbi ofefiba eba sa nimbafena mungwali gawig mingnag elim faibi asa ne kig flanam afa ena kig gawig fwainig elim mimagen. Ne enaig esegba eba sa ne suialag wag heven lanai flafe, afa sa ne kam sum patalku.”

<sup>22</sup> Kwamblog elni kaksag gawig fenaba, afa ehe ena mom higinam olug kinigafenaba asa ikana. <sup>23</sup> Afa Sisas heafna patalfuiag elim esoni og, “Nufunam ka nem sihinig, asa elbi gawig nubini feg, enaba Godna bog megam wasneife mas ikagna seaifoi. <sup>24</sup> Ka nem pese osihin, kamelba tata kwania. Atiaho sa enaba gwelig nil megamba seaifoi? Enaba gwelig nil megam hugufeiba eba fwina wasneig. Asa enaig el membeg Godna bog megam seaifoiba eba gwesim numweheg.”

<sup>25</sup> Afa maia patalfuiag el ena mo higinim sineminefnim etetiagini. Ehengel sahini og, “Amban sa ihlafefe Godna el pugufe?” <sup>26</sup> Sisas nofna fahiagenam sihini og, “El mas neana mo enaig esi. Afa God ehe ihlafefe mungwali eseagegim.” <sup>27</sup> Afa Pita esona, “Is sahiig, kagel ati ka mungwali gawig fwatiagigim asa ka nem sum patalfug. Mangwal sa God kam faife?”

<sup>28</sup> Sisas ehengelim sihini og, “Ka nufunam mo sihiig, maia enanam mungwali gawig pese yimieg pugua minefeiba asa Nufunam El ehe ganam mungwali nangwagihigefe. Afa enanam ne kana 12 pela patalfuiag el augunam asa ne Israelna 12 pela simbianingam nangwagihigife. <sup>29</sup> Afa ambangel sa kam sum patalfu eba naho heafna lala, nilite, mulwal, alag, afag, luwal, afa aso fwatigim eba sa 100 gwesim hiliflai afa eba nofkena wahkig gag flafe. <sup>30</sup> Afa ilawo kaksag el goseg afuia eba ambe sum afwahiefufe afa kaksag el sa sum ambe eba afu gosefe.”

## 20

### *Sisas lasug mo sihi aso gafuga el*

<sup>1</sup> Sisas pese gwena mo sihiagena, “Godna bog megam eba gwenai eseg. Mungu el leana kumbi ikag gafugag elim yisigi lambinam asa heafna aso la lasanfe. <sup>2</sup> Afa gafugag el ehe sawiefig mungu osuna gafugafim asa mungu kig denarius\* lambim. Asa asona alag asogam ningitigi. <sup>3</sup> Osu bahigini asona alag pese ika mingnag elim nangwaganaba esug afofena. <sup>4</sup> Afa ehe sihini, ‘Neangafa afu aso gafugafi asa ka nem kig suialag faife.’ <sup>5</sup> Asa ehengel afuna. Afa osu misosuf gigini afa osu gahagwagna asona alag pese mingnag elim gwenaig esini. <sup>6</sup> Maia osu opegfenaba ehe pese ika

\* **20:2:** Denarius eba Romna kig.

gofenaba nangwagna mingnag el esug safewagfenaba asa ehengelim sahini og, 'Haisegba asa ne esug ese afu?' <sup>7</sup> Afa ehe esogona, 'Mas kam amban gafugag fwahianig mo.' Afa asona alag sihini, 'Neangafa ese afu kana aso gafugafi.'

<sup>8</sup> "Maia osu pe fenaba asona alag heafna misog gafugag elim unenam sihina og, 'Gafugag elim mungwalim unenim kig mimangin. Afa sa sumi nai elim mimangin ikan kan kan goflanai elnai yi pugu.' <sup>9</sup> Afa ambangel sa sumi yi apuke gafuga fini enag mungu mungu kig denarius lambini. <sup>10</sup> Afa el sa leana gafuga fini enag enaig onigini og eba ka kig denarius kaksag lambfi. Afa ehengel gafa mungu mungu kig denarius lambini. <sup>11</sup> Afa kig denarius lambinim afa sona alagim lagini. <sup>12</sup> Ehe og, 'Sona elbi sumi yi apuke gafugafigi eba moalagig gafugafigi afa kagelbi osu iholna gafugafigi ikag osupeg. Afa ehengelni kigba kagelni mungwalofug kig.'

<sup>13</sup> "Afa asona alag wahigi sihini, 'Hihe, ka mas nem amtakwale fati. Ena kig mungu sa ka nem faigba enaba ati big sihiage afwahana. <sup>14</sup> Sa flanam ika kikeafena sawieg la ka sumi elim gwenag kig faig. <sup>15</sup> Hwa kigba eba kikeafena. Ena kigba sa ka kikeafena onigi la enaigba esefe. Haisegba nane ninimug eba ka membeg ming elim kaksag kig lambwaig?' "<sup>16</sup> Sisas enaig mo sihiage blo afwahafenaba enaig esona og, "Ambangel sa sum agfo eba afu gosebi afa ambangel sa goseg enaba ambe sum afofe."

*Sisas heafena lahagna mo sihina*

*Mak 10:32-34, Luk 18:31-33*

<sup>17</sup> Afa enanam Sisas Jerusalem gam fukwakofenba heafna 12 pela patalfuiag elim wankafenaba enaig sihifeni og, <sup>18</sup> "Sa hig, ilawo big Jerusalem gam afuofeba eba Nufunam Elim flinim Godim sis tuhlu faiule el i afa nihe mo anwena elni ninga la fwahibi asa sihiagenim tigifatifi. <sup>19</sup> Afa angoluweg elni ninga la faigoiba asa ehem moalamp mo fainim, afa wena fliflifena gife, afa li katigegla fli kahlifi asa sambaga mungu osuna puguiba asa ehe pese buihiafe."

*Jems i Jon i memb ahfeg misog gafugag el ahpuguiagim*

*Mak 10:35-45*

<sup>20</sup> Afa Sebedini angwag heafna legnigim wanblonam mongkogini kwakwagena Sisasna kig mungu la penam, oga sahana. <sup>21</sup> Afa Sisas sihina, "Haiseg?" Afa angwafigi enaig esona og, "Sa kam sihi fwahanaiba, maia ne kwania misog el puguiba asa ma kana luwalnigim ahblonam ming nihiginai ninga la gai afa ming blonam sahanai ninga la gai."

<sup>22</sup> Afa Sisas luwalnigim wahigi sihini og, "Asa ne sahigba mas ne anwenafigi mo. Sa ne ihla ahfei ena susugba ahflai, asa ena susug kaf kamble flafe." Luwalnigi sohona og, "Eba

ka sahfe.” <sup>23</sup> Sisas enaig sihifeni, “Ei nufunam, eba ne kana susug kaf lanai ahnefe. Asa amban kana nihiganai ninga la gai afa amban sahananai ninga la gai ka mas kikiaba hwaiba esoi. Kikeafna alag ati sambaganigi suialag kugba numwehiage fwahag amban sa ena kugba flafe.”

<sup>24</sup> Afa mingnag 10 pela patalfuiag el ena mom higinim sambaganigim fegonigini. <sup>25</sup> Asa Sisas ehengelim unenim sihini og, “Ati ne anwenafig afwambanai elni misog el ehe munguhe, afa ehengelni kwania el wasneig numweheg. <sup>26</sup> Nofeka nimbefum enaig esiagi. Amban membeg misog elbi ogofiba ehe sa ma mingnag elim ahnai skaufeni. <sup>27</sup> Afa amban membeg gosofefiba ehe sa ma nengelni esug gafugag el pugui. <sup>28</sup> Asa ma Nufunam El gwenaig esei, mango blog el ehem kwefug mo, amo eba awai. Eba ehe ming elim kwaganigim afa heafna nofkena gag faig asa kaksag elim pese lambigim pigi fwatig.”

*Sisas sambaganigi elim nofug amtakwaligna suialafe fati-wagena*

*Mak 10:46-52, Luk 18:35-43*

<sup>29</sup> Sisas Jeriko kembig fwahanam wankana afa el nubwel ehem sum patalfuna. <sup>30</sup> Maia maisim afuiafenaba sambaganigi el nofug hafinigna mina embeg la ahafena. Ahiginaba og ati Sisasba oblo asa ahunena, “Nemba Devitna simbianinga sa kam aflafeni!” <sup>31</sup> Afa mungwali el ehenigim fegonigini og, “Afwai.” Afa eheba fwina ahunena, “Ainiyag, nemba Devitna simbianinga sa kam aflafeni!” <sup>32</sup> Afa Sisas gofenaba awamonim, sihini og, “Mango ka nem fenfe?” <sup>33</sup> Afa sohona, “Ainiyag, ka membe ahfeg ne kam nofugum bahia aitin!” <sup>34</sup> Afa Sisas aflafenim ehenigina nofugum tuhwagenaba asa ikagna nofug bahiawagena afa sa Sisasim ahpatalkuna.

## 21

*Sisas Jerusalem la ika puguna*

*Mak 11:1-11, Luk 19:28-40, Jon 12:12-19*

<sup>1</sup> Afa Sisas heafna patalfuiag elim Jerusalem gam wankana. Wankan ena mug la unehlagba Oliv muhla Betfage kembig la wan puguna. Afa sa Sisas sambaga patalfuiag elim gof ningitiginam <sup>2</sup> enaig esoni og, “Ahkan okwena kembig la ahpugunam, afa ne ikagna ahnagoiba donki-tata mungu li mog la wena kiki fwahig asa luwaligim wanigofufe. Asa ahpigunam kam ahwani bluna. <sup>3</sup> Asa amban ma nem haig moba sihinibi asa ahsihina og, Ainiyag enana ogna gafugafe, eba nem ikagna ningitigife.” <sup>4</sup> Afa enaba



pugugba eba Godna mo nufunam pugug. Ena moba Godna mo fla sihiule el ati sihi fwahana. <sup>5</sup> God og;

Mungwali Saion lanai elim ena mo sihigon, sa nangu, nengelni misog el ati nem oblon, ehe mo flafla fwainig el afa ehe donki-tatana nihi yi fuko agagim oblo afa ehe donkina luwaligna gwenaign eseg. *Sek 9:9*

<sup>6</sup> Afa sa sambaganigi el Sisasna mo ahiginam gwenaign sahfen. <sup>7</sup> Asa ahkanam donki luwalig nahlum ahwani bluna. Afa heafnigina kwiyieg lofug hugufu askona donkina nihi yi asa Sisas enana yi fuko ganam ikana. <sup>8</sup> Afa kaksag el heafgelni kwiyieg lofug hugfunim mina la suguafuna afa mingana mo li kigag totwaginim gwenaign esini. <sup>9</sup> Maia Sisas ikafenaba asa mingnag gosini afa mingnag sum afofena afa mungwali sogona og;

Sa Devitna simbianingam unehlagim fingifi fukwaligo. God sa ma suialafenai asa ehe Ainiyag na kigmogla oblo. Asa God sisinaim, ehena unehlagim fingifi fukwaligo.

<sup>10</sup> Maia Sisas ika Jerusalem la seaifunaba afa mungwali el ena kembang lanai sahawag ahfewagfna og, “Sona elbi amban maia?” <sup>11</sup> Afa el afuiafenaba wahigi sihigoni, “Hwaba Sisas Galili lanai ehe Nasaretna Godna mo fla sihiaule el.”

*Sisas Godna kwania lala ika puguna  
Mak 11:15-19, Luk 19:45-48, Jon 2:13-22*

<sup>12</sup> Afa Sisas Godna kwania lala ika pugunam el enanai yi kigna gawig mimage gofini asa ena elim fenigenam afwambala ningitigina. Afa el eyi mingnag kantri na kig mimange wagig simem Sisas waike waike fetifeni. Afa twafig gamp mimange wagig pegag simem gwenaign esena. <sup>13</sup> Afa ehe sihini og, “God heafna buk la enaign sihifeg ‘Kana lalaba seflig God i sihiag ahfeg lala’ afa ne esigbi ena lalaba eyi ukwef el meagam afu saiye afwahie.”

<sup>14</sup> Afa enanai yi nofug hafinigna afa mong kukwalini ambe Sisasim nanguni. Afa ehe suialafetifena. <sup>15</sup> Afa Godim sis tuhlu faiule el i afa nihe mo anwena el i kigmogim nanguni afa higinim luwal esogona, “Devitna simbianingam sifakalini” asa enag el olug kakagiagini. <sup>16</sup> Asa Sisasim sahini, “Atiaho ne luwalna moba higig?” Afa ehe sihini og, “Ei ati ka higig. Mas ho ne ena Godna ginofba suwigig mo? Suialag sifakaleg mo weti luwal sihigbi eba God ehe eseg.”

*Sam 8:2*

<sup>17</sup> Sisas enanai yi elim fwatinam Betani kembang la ika gini.

*Sisas esonaba li fofena  
Mak 11:12-14, 11:20-24*

18 Afa leana Sisas pese Jerusalem gam ikan binilahana. 19 Afa fig li mina ehembe la nangunam ikan muhla pugu-nam. Asa nanguna figeg behig gofena, fug awai. Asa liim esona, “Ne mas fOGLEI eba ne gwese gofufe.” Asa ikagna li fofena. 20 Afa patalfuiag el enam nangunim sineminefini og, “Haisegba na sa sona fig libi ikagna fofeg?”

21 Afa Sisas sihini og, “Ka nem nufunam sihinig, afa neana olug Godim oniginiba asa mas ne sambaga onigigufufi eba ne ihlafife hosa ka li esegba. Enaba neangafa gwenaig mugum ne esogofe, ‘Susum ika bula pe’ asa gwenaig esefe. 22 Afa neana olug onigi gwese gohugba eba mangwaliba ne Godim sahinibi asa ehe esefe.”

*El Sisasna kigmogim sahini*

*Mak 11:27-33, Luk 20:1-8*

23 Sisas ika Godna kwania lala pese sefunam elim ogfuni ofefenaba afa Godim sis tuhlu faiule el i afa saglag el i ambe Sisasim sahini, “Haisegba asa ne enaigba eseg? Amban nem sihina?” 24 Afa Sisas wahigi sihini, “Ka gafa ka nem mungwag asahtigi ma atiaba ne kam ihla osihinifibi ka sa nem sihin haig sa ka eseg. 25 Amban maia esonaba asa Jon bula laitina, God me awai el me?” Asa ehengel hefum sihiwagini “Haig sihi sa big finifi? Afa big esogofiba, God ehem esona eba ehe sihife ‘Haisegba ne mas Jon na moba fli ni mo?’ 26 Afa big esogoiba, el ehem esona eba asa big mungwali elim embefig onife ati mungwali onigig Jon eba Godna mo fla sihiaule el.” 27 Asa Sisasim wahigi sihini, “Kagel mas anwenafig mo.” Afa Sisas sihini, “Kangafa ka mas nem sihini amban sa kam esenag.”

*Sambaganigi luwalna lasug mo*

28 Sisas pese sihini og, “Ne haig onigignafig numwehe onigwaganim asa sihi. El enaig esena heafna leg sambaga. Ehe etegim ika sihina og, ‘Sa ne glaba aso gafugafegimba ikai.’ 29 Ehe sihina, ‘Kam oksi’ afa onigiwagean fwahanam afa sa aso gam ikana. 30 Afa alag ikana suminegim gwenaig sihina afa sumineg og, ‘Ei eba ka ikafe’ afa ehe mas ikana mo.

31 “Amban alagna olugba patalkuna?” Ehengel esogona, “Eteg”. Asa Sisas sihini og, “Ka nem osihini nengel sumineg lofug. Nengel mas Jonna onigig patalkuna. Afa kig lambiule el i afa mina la afwamine angwafig i asa asaiyenam Godna bog megam gose afufe. 32 Afa Jon blog Godna suialag mina nem ogfunig afa mas ne ena mo flig mo. Afa kig lambiule el i afa mina la afwamine angwafig i ena moba flig. Ati ne enaba nangug afa mas ne olug waike ena mo flig mo.”

*El amtakwalig asonaim nangwagihigife*

*Mak 12:1-12, Luk 20:9-19*

<sup>33</sup> Sisas saglagim sihini og, “Sahig ming lasug mo, el enaig eseg wain aso fegim bogna gohla fwahag enag asolaba lifug pagag bumeko fwahag afa sime la lala kwina fe fwahag. Afa ehe elim enanai yi lasug fwahagim ehe mo membi yi kembangam ikag. <sup>34</sup> Maia wain fug pwatigim ofefiba asa asona alag heafna elim ningitigiba asa afu asa gafuga lanai elim sihigonife og asona alag membeg heafna mungwehigenai asa fai. <sup>35</sup> Afa maia afu apukenaba asa aso gafuga lanai el patageminefinim ming elim tigaminefini, afa ming elim mo tigi fatini, afa ming i mo fun na wagini. <sup>36</sup> Afa asona alag mingnag elim ningitigina ena elbi numwehena afuna. Maia apukenaba gwenag esegoni. <sup>37</sup> Afa sumi yi mo heafna legim ninghianam og, ‘Sama kana luwalim numwehe fli.’ <sup>38</sup> Afa aso lanai el luwalim nangunim hefum sihiawageni og, ‘Sonaba maia alag lahaqba enag flag. Ause, nafu tigi fati asa big heafna safeg asa bignag fli.’ <sup>39</sup> Afa luwalim kehlinim asola afwambagam fli fatinim tigeekini.”

<sup>40</sup> Afa Sisas sahini og, “Maia asona alag bloiba asa haig esenifi?” <sup>41</sup> Afa esogona, “Eba amtakwalig elim tigi fatinim afa aso amo ming elim faifi eba ambangel asa mungwehigenai alagim ikagna faifi.” <sup>42</sup> Sisas ehengelim sihini og, “Ena moba ati Godna bukla goh. Haiseqba ne na mas anwenafiq mo? Mo enaig ikafeg;

Ena sumulba lala nimblawagiq el esugum fli fatiq eba naho  
 God esenagba asa sumulba gohug. Afa enaba fwina  
 suialafeg maia nangugbi. *Sam 118:22*

<sup>43</sup> “Nasa ka nem osihi, God heafna bog megam nengelni ninganai flanam afa mingnag elim faife asa enag el nai yi fug lugufe. <sup>44</sup> Afa amban ena aga la peba asa ehem tigia fwatife. Afa aga ambanim penam asa ehem figi fakafe.”

<sup>45</sup> Pris el i afa farisi el i ena lasug mom higinim anwenafini eba Sisas ehengelni nihem sihina. <sup>46</sup> Asa ehengel ogna ehem kehli afa mingnag elim embefegoni. Og eba ati onigiq Sisas ehe Godna mo flaule el.

## 22

*Alagag la gag bu yis mo*

*Luk 14:16-24*

<sup>1</sup> Afa Sisas ehengelim pese ming lasug mo sihini og,  
<sup>2</sup> “Godna bog megam enaig eseg, misog elni leg angwafiq aflaba asa misog el kwania bu yis ofen. <sup>3</sup> Afa ehe elim sihinig og, ma ambe fane ahagai. Maia enena osu pugunaba asa heafna gafugag elim ningitigina og afu enaig elim sihigon,

sa ma ambe. Afa el oksu ni ka mas ambe. <sup>4</sup> Afa pese minanag gafugag elim ningitigina og, ‘Elim afu sihigon ati ka faneba numwehiage fwahag. Ati ka kwania bulmakau lambag kwagig. Mungwali ati gohug asa ambe ena bu yis ahaga.’ <sup>5</sup> Afa maia sihigonibi mas higinu mo eheba heafna gafugag la ahkawag minefena. Ming el mo heafna aso gam ikana afa ming mo heafna ming gafugag la ikana. <sup>6</sup> Afa mingnag mo misog elni gafugag elim kikegonuginim kwaskofini. <sup>7</sup> Afa misog el olug kakagenam asa heafna amiim ningitiginaba afu elim kwaskofinim afa ehengelni kembigim suwina tuhlugoni. <sup>8</sup> Afa heafna gafugag elim esoni og, ‘Faneba ati ka numwehe fwaha asa el sa ka sihini fwaha mango wangene el mo ena mo sa hwa faneba ambe ahagai.’ <sup>9</sup> Asa mungwali minehug afu elim ulambinim asa sihigoni asa ma hwa bu yis la ambe. <sup>10</sup> Afa gafugag el afu ambangelim gafa ulambinim asa sulfu wan ambena. Wan ambenam suialag el i amtakwalig el i asa lalam tiflagna.

<sup>11</sup> “Afa misog el sefu ikana nangwagna. Afa nangunaba el mungu mas bu yis la lofug yimieg fatina mo. <sup>12</sup> Afa sahana, ‘Hihe, haisegba ne seaifug afa ne mas yimieg lofug fatig mo.’ Afa ehe malfwai gofena. <sup>13</sup> Afa misog el gafugag elim sihini og, ‘Ningam mungum wena kikenaginim afa afwambagam sikigieg megam fli fati. Asa ma enanai yi, el wewatinam heafgelni gog tuto ahgafife.’” <sup>14</sup> Sisasa mo sihi afwaha fenaba og, “God kaksag elim unenigim afa mungu mungu elim kanog fwatig.”

*Mangwal sa big misog el mi God mi faigofe  
Mak 12:13-17, Luk 20:20-26*

<sup>15</sup> Farisi el afuna hefum mina tohlagini ogna Sisasa mom klimoani. <sup>16</sup> Afa farisi elni patalfuiag el mi afa Herotna el mi asa ningitini og, “Ogfuiag el, kagel ati ka anwenafig neana moba nufunam afa ena nufunam moba ati ne elim Godna mina ogfu fenigeg afa ne mas onigi, ne gauna haig haig elim gafa sihinagfeg. <sup>17</sup> Sa kagelni sahigim kam wahigi sihin. Bigna nihe atiaho enaig sihifeg sa big kigba Romna misog elbi fai me awai awai me?”

<sup>18</sup> Afa Sisasa ehengelni amtakwalig onigigim anwenafinim afa esona og, “Mangigim ne kam ogihini? Nengel sambaga mengigna el! <sup>19</sup> Sa kam takis kig ogfuni.” Asa ehengel mungu kig flibina. <sup>20</sup> Afa Sisasa sahini og, “Amban na nofbosug i unehlag i asa nanai yi go?” <sup>21</sup> Afa esogona, “Sisar, Romna misog el.” Asa Sisasa sihini og, “Sisarnaba asa Sisarim fai afa Godnaba asa Godim fai.” <sup>22</sup> Afa ena mom higinim afa ehengelni olug fingi feskofenaba asa ehem lasu afuna.

*Sisas sihini el melig pigieg buihiagafeg mo  
Mak 12:18-27, Luk 20:27-40*

<sup>23</sup> Ena osuna Sadyusi el Sisasim nangum ambena. Sadyusi el enaig onigini og melig pigieg elbi mas buihiagafe. Afa sa Sisasim sahini og, <sup>24</sup> “Ogfuiag el, Moses enaig sihifena, afa el luwal fwainig laha gba heafna sumineg sa ma ehena esig angwafigbi flai asa ma luwal etegna sigag la unefei. <sup>25</sup> Afa autunam elegeg la gohug nilite ka afwaihiafena. Eteg angwafig flana maia lahanaba luwal fwainig. Asa esig angwafig agafena. <sup>26</sup> Afa ehem angigieg flana afa ehem gafa luwal fwainig lahana. Asa gwenai pigifeakan sumineg atamolug nai yi puguna, <sup>27</sup> afa sumi yi enag angwafigim gafa lahana. <sup>28</sup> Afa autunai la maia enanam melig pigieg buihiagafeba asa ehe amban na angwag fefe afa mungwa nilitena enag angwafig mungu flini?”

<sup>29</sup> Asa Sisas wahigi sihini og, “Godna buk i afa heafna kigmog i ne mas anwenafig mo asa ne etetiagig. <sup>30</sup> Afa maia enanam melig pigieg buihiagafenam mas angwafig lambi eba ehe Godna oflanai el lofi. <sup>31</sup> Afa enag onigig melig pigieg buihiagafe ena moba eba ati Godna buk la gofna afa ne mas higig mo ena mo God nem faini. God enaig sihifena og, <sup>32</sup> ‘Kaba Abraham, Aisak, Jekop na God.’ Eba mango melig pigig elni God mo, eba heafa nofkena elni God.” <sup>33</sup> Afa mungwali el ena mom higinim ehengelni olug fingi fiasaina.

*Godna nihe mo goseg  
Mak 12:28-31, Luk 10:25-28*

<sup>34</sup> Afa maia farisi el higinim Sadyusi el Sisasim mas ihla sihini mo asa mungwali wahrenam Sisasim afu nanguni. <sup>35</sup> Mungu el eba nihe mo ogfuiag el. Ehe ogra Sisasna mom klimoanim asa sahini og, <sup>36</sup> “Ogfuiag el, ha nihe mo asa mingnagim gosinig?”

<sup>37</sup> Afa Sisas ehem enaig sihifena, “Sa ne Godim nimbiafena Ainiyag fwina membena. Sa ne nimbiafena olug ni, sungwabug ni, afa onigi na fwina Godim membena. <sup>38</sup> Ena nihe moba kwania fegim ehe goseg. <sup>39</sup> Afa angigieg nihe mo gwenaig esog og, sa ne nimbiafena hihem fwina membena asa ne nimbefum enaig sifafefe. <sup>40</sup> Afa ena sambaganigi nihe molaba mungwali Moses na nihe mo i afa Godna mo fli sihiule elni mo i enanai yi sefu ahgo.”

*Sisas sahana Elim Godba Gisfu Fwahag  
Mak 12:35-37, Luk 20:41-44*

<sup>41</sup> Afa farisi el laskuhla gofnaba Sisas ehengelim sihini og, <sup>42</sup> “Elbi sonaba God ati Gisfu fwahag elim pese lambigim, enaba ambana simbianinga?” Afa ehengel wahigi sihini,

“Eba Devitna simbianinga.” <sup>43</sup> Afa Sisas sahini og, “Haiseg nasa Godna Sungwabug Devitim olug onigi la fainaba asa Devit ehena unehlagim seafлана, Ainiyag. Devit enaig esona og;

<sup>44</sup> God Ainiyag kana Ainiyagim sihinag sa kana nihiginai ninga la pegafim ikan ikan ka sa kike neana fagiule elim tigi feskonam asa ka nem faife. *Sam 110:1*

<sup>45</sup> “Afa Devit ehem seafлана, Ainiyag. Haisegba enag ehe Devitna simbianinga?” <sup>46</sup> Mas amban pese sihina mo afa enag osuna ikan hefum lahafe ehem sahnigim embefini.

## 23

*Farisi el i nihe mo el i elim gasaf lambfяafufna  
Mak 12:38-39, Luk 11:43,46, 20:45-46*

<sup>1</sup> Afa Sisas heafna patalfuiag el mi afa mingnag el mi sihinuwagena. <sup>2</sup> Ehe enaig esona og, “Farisi el i nihe mo anwena el i Mosesna nihe mona nem ogfu fegonuwugini. <sup>3</sup> Afa ena mo sa nem faigoba enaba asa higinim patalfu. Nofeka ehengelni nihem patalfu, mangofi. Mom sihigim afa ehe mas enam patalfu mo. <sup>4</sup> Afa ehe elim kinig kike faigog, afa ena kinigba elim, kahli afa eheba mas ena kinigim ningana weti sehilini mo. <sup>5</sup> Afa mungwali haig haig asa esiagibi eba elim og sa ma kam nangwagi. Afa betenna wagna wawag gigim afa betenna kwieg lofug la we bugugni kigfig fwatig. <sup>6</sup> Afa kwania bu yis la ehe oyna misog el lofug augu afa laskuhlag lala ehe oyna sime suialag la gose augu. <sup>7</sup> Afa ehe enaig membig laskuhlag fohugla el sa ma ehengelim une goni og saglag el afa ogfuiag el. <sup>8</sup> Afa ese nem enaig seflifife ogfuiag el. Eba mungu neana ogfuiag elbi, afa ne nilitena fiakag. <sup>9</sup> Afa hwa bite la nofeka elim sefli alag fei eba nengelni alagba mungu he heven la ga. <sup>10</sup> Ese nem seflifi ne saglag el eba el mungu he nengelni saglag elbi eba God ati Gisfu fwahag elim pese lambigim. <sup>11</sup> Amban nengelni Ainiyagba asa neana gafugag el fefe. <sup>12</sup> Amban hefum figi fukuagba eba God ehem pagaupife afa amban hefum figi fukuag fwainigba eba God ehem figi fukufe.”

*Sisas farisi el mi afa nihe mo anwena el mi fenugena  
Mak 12:40, Luk 11:39-52, 20:47*

<sup>13</sup> Sisas enaig sihifeni og, “Niasabanig, farisi el i nihe mo anwena el i amtakwalig nem pugunufe. Eba ne sambaga mengigna el. Ne elim mina kikise gonig Godna bog megam saiyegim. Afa nimbeba mas ne saiye afa el oyna saiye afa ne gwegonufu.”

14 Sisas enaig sihifeni og, “Niasabanig, farisi el i nihe mo anwena el i amtakwalig nem pugunufe. Eba ne sambaga mengigna el. Afa ne esig angwafigim makwale gonigim afa ne ehengelni lala lambigonig. Afa enaig esigim afa ne makwalig kwinam beteniaska. Ena mog eba God amtakwalig susug nem numwehe faife.”

15 Sisas enaig sihifeni og, “Niasabanig, farisi el i nihe mo anwena el i amtakwalig nem pugunufe. Eba ne sambaga mengigna el. Afa ne biteamina afwaminefig afa bu mina botla afug eba mungu elim neana patalfuiag elim ne fwahig. Afa enaig patalfuiag elbi nem kwaganig gose ikafe suwilagig latu minagam.

16 “Ne nof tetini el mingnagim wanafu mina ogfugonig eba nem amtakwalig pugunufe. Ne enaig sihi fegonug afa amban Godna kwania lalam unehlag seflanam afa mo sihi fwahafe eba esug sihi fwahag. Afa amban Godna kwania lalanai golim seflanam afa mo sihi fwahafe eba asa ena mo nufunam eseg.\* 17 Nengel moietet el afa nof tetini el. Mangwal sa goseg, gol me awai Godna kwania lala me? Mas ne anwenafig mo lala goseg asa Godna lala enag golim esenagba eba Godna nemug. 18 Afa ne elim sihigonig, afa amban sis tuhlu Godim fai simem seflanam afa mo sihi fwahafe eba esug sihi fwahag. Afa amban Godim fai sisim seflanam afa mo sihi fwahafe eba asa ena mo nufunam eseg. 19 Ne nufunam nof tetini! Mangwal sa goseg sime me awai sis eyigig me? Afa mas ne anwenafig mo sime goseg, asa Godim fai sime enag sisim esenagba eba Godna nemug. 20 Asa maia amban Godim fai sime seflanam afa mo sihi fwahafe eba sime i afa mangwal enanai yi afugwagim ena mo wasneig fwahag. 21 Afa maia amban Godna kwania lala seflanam afa mo sihi fwahafe eba lala mi afa God eyi agag lala ena mo wasneig fwahag. 22 Afa amban heven seflanam afa mo sihi fwahafe eba Godna nangwaghiageg simem seflag afa God ehe enanai yi pegagim seflag ena mo wasneig fwahag.”

23 Sisas enaig sihifeni og, “Niasabanig, farisi el i nihe mo anwena el i amtakwalig nem pugunufe. Eba ne sambaga mengigna el. Afa yasmuel unehlagba mint, dil, kumin ne lambigim afa 10 pela hap suguafugim Godim mungu fai. Enam weti nihe mo ne fwina onigig afa kwania nihe mo enaig eseg elim numwehe gwefihiaginim, asa aflafegoni, afa suialag olug onigig mas ne esig mo. Asa ne esi afa nofeka kwania nihe mo fwahi. 24 Ne nof tetini el mingnagim wanafu mina ogfugonig! Ne buba ahagaba nambaganai bulanai

\* 23:16: Farisi el kwania mo mas fatini afa weti nihe fwina onigini.

lambuhiagig afa ne mas nanguna mo kamel-tata bu la go afa ne ena nahgum neg.”

<sup>25</sup> Sisas enaig sihifeni og, “Niasabanig, farisi el i nihe mo anwena el i amtakwalig nem pugunufe. Eba ne sambaga mengigna el. Afa ne kap i plet i sisinai mungu gigiafiagig afa mo fla flag i afa faghagig i enanai yi memtola pugu go. <sup>26</sup> Ne farisi nof tetini. Kapim ilawana mo sa ne meagam numwehe gigiafinim asa ma afwambanai yimieg.”

<sup>27</sup> Sisas enaig sihifeni og, “Niasabanig, farisi el i nihe mo anwena el i amtakwalig nem pugunufe. Eba ne sambaga mengigna el. Ne biteg fe lofug lambo bite bigna fatig fwahi. Afwambagam mo suialag go afa meagam mo kig i lofug i nongi go. <sup>28</sup> Nengel gafa gwenai esig. Afwambagam mo el nem nangwagi ne suialag el afa meagam mo sambaga mengigna fegim amtakwalig nihe go.”

<sup>29</sup> Sisas enaig sihifeni og, “Niasabanig, farisi el i nihe mo anwena el i amtakwalig nem pugunufe. Eba ne sambaga mengigna el. Nengel Godna mo fli sihiule elni biteg kifem suialafe flig afa suialag elni biteg kifem waganagig. <sup>30</sup> Ne enaig esogog afa sa ka kagelbi simbianga la wan auguia fiteba eba mas ka esite Godna mo fli sihiule elim kwaskofi. <sup>31</sup> Asa neana mo ogfug nimbe ne elni luwalig Godna mo fli sihiule elim kwaskofig. <sup>32</sup> Sa esi, ilawana simbianga haig esini sa ne gwenai ihla fwahi. <sup>33</sup> Nengelba sombine afa sombinena luwalig. Haisegba ne onigig asa God mas kam suwi lagig latuigimba ningitigi? <sup>34</sup> Sa hig, ka nem osihin ka kikiafena Godna mo fli sihiule el mi, anwena el mi, afa ogfuiag el mi nem ningitiginiba. Afa asa ne mingnagim kwaskofi, afa mingnagim li katigegla tigi kahlifi, afa mingnagim laskuhlag lala la wena fifiletififi afa mingnagim patagemine fifibi asa mingnag kembig gam afwiamine fefe. <sup>35</sup> Asa ambangel suialag elim kwaskofig, enag elbi pigigba eba Abel la pugugum ika Sekaraia la pugug ena susuba eba mungwag ne flifi. Sekaraia Berekiana leg nengelni simbianiga olyi Godna lala afa Godim sis faig sime la tigeini. <sup>36</sup> Ka nem nufunam sihinig enag mungwali susug mungwag eba nem ilawonai elim pugunufe.”

*Sisas Jerusalem lanai elim aflafeni*

*Luk 13:34-35, 19:41-44*

<sup>37</sup> Sisas sihini og, “Jerusalem lanai luwal, Jerusalem lanai luwal, ne Godna mo fli sihiule elim kwaskofini afa el God nem sa ningitigigba ne fun na kwaskofi. Wahkig ka membeg nengelni elim lamblu kiafnai yi muhla lambugofum afa ofenai kakaruk afag heafna luwaligim lamblu anglag meg gam kumo lambugu afa mas ne enaigim membeg mo. <sup>38</sup> Asa



God enag lalam neana fwahafe eba esugo fufe. <sup>39</sup> Ka nem enaig sihofen mas ne kam nangui ikan kan ne enaig esogofe, ‘God sa ma suialafenai asa ehe Ainiyagna kigmog la oblo.’ ”

## 24

*Sisas sihig Godna kwania lala amtakwalefe*

*Mak 13:1-2, Luk 21:5-6*

<sup>1</sup> Sisas Godna kwania lalam fwaha ikafenaba heafena patalfuiag el ambeafenaba ehem og sa nangu sona lala. <sup>2</sup> Afa Sisas sihini og, “Glau ne mungwali fun lalam ne nangug, ka nem nufunam sihinig eba mas gofi. Nengigimba asa fun mungwali bite la apaiyefe afa mas mungu gofi.”

*Haig haig kinig pugufe*

*Mak 13:3-13, Luk 21:7-19*

<sup>3</sup> Enana Sisas Oliv mug la gafena. Afa patalfuiag el ambe sisag mona Sisasim sahini, “Sa kam sihini ansi Godna kwania lalam amtakwalefe asa mangwal eseba sa ka anwenafi eba nemble blogim afa mungwali awaiyefe.” <sup>4</sup> Sisas wahigi sihini og, “Numwehifibi masa el nem mwakwale gonife. <sup>5</sup> Afa kaksag el ambenam kana unehlag la mwakwale afwaihena esogofe, ‘Kike Krais, God kam kanog fwahag.’ Ena mo kaksag elim mwakwalenife. <sup>6</sup> Afa ne higife faghagig mo asa nofeka olug kinig eskofe. Afa eba asa sonaigba pugufe afa mungwali awaiye osunaba maisim. <sup>7</sup> Afa mingnag el afu mingnag elim angoluwig i hagfi afa mingnag misogyn elni el afu mingnag misogyn elni el i hagfi. Afa haig haig biteamba eba bini kwania i afa asag i puguiagefe. <sup>8</sup> Mungwali enaigba ofe angwafig luwalim susugim oningis.

<sup>9</sup> “Asa enanam nem lambinim mingnag elim lamb-waigoiba sa nem kwagi aitif. Afa ne kana el afwaihiefiba asa mungwali el nem olug kakagegonife. <sup>10</sup> Kaksag el kam onigigim fwahinim afa hefum mwauiajinim afa olug kaka-giagifi. <sup>11</sup> Afa kaksag mo fli sihiaule mwakwale el apukenam kaksag elim gasafihigife. <sup>12</sup> Eba amtakwalig nihe fwina kwania pugufe asa nubwel el mingnagim membegonugim yiskos siagife. <sup>13</sup> Afa ambangel wasneig afwaihian ikan maia kinig awaieba asa ehe suialag gofufe. <sup>14</sup> Afa Godna bog megam suialag mo mungwali kembig sihiageafufe asa mungwali el higwagife eba ati mungwali awaiyegim opugu.”

*Amtakwalig fwina pugufe*

*Mak 13:14-23, Luk 21:20-24*

<sup>15</sup> “Ne nangufi mangwal fwina amtakwalig sa afsug kwegig mengig megam gofufe. Enam autunam Daniel Godna mo fla sihiaule el ati sihi fwahana. (Amban sa enam suwiginam

sama anwenafe.) <sup>16</sup> Afa enanam Judia nai el apukenam sa embem mug gam afufe. <sup>17</sup> Afa amban lala la sisi gohugba asa nofeka mangwalba lalanaiba apuke lambug afu. <sup>18</sup> Afa amban asola gohugba nofeka pese lalagamba ika lofugba fla. <sup>19</sup> Enanam amtakwalegefe angwafig afnialigni afa angwafig luwalna! <sup>20</sup> Afa sa ne Godim sahini, ne mas fwina ninegna afa esug auguia osunaba enaig enaba embem afui. <sup>21</sup> Enanaba kinig kwania fiahgenam puguiagefe. Autunam God bite gafugagfenam blo gla pugug enaig kinig mas gofena mo. Afa nengigim mas enaig pese pugui. <sup>22</sup> Afa God ikagna futefwagba fwainigba eba mungwali el awaiefe. Afa God kanog fwatig ena elim oniginigim asa futeafonig.

<sup>23</sup> “Afa enanam maia el nem sihinibi og, ‘Sanangu Kraiss ohogo amo ehe akwenaiyigo eba el God Gisfu fwahag el.’ Nofeka ena mo higim. <sup>24</sup> Asa mwakwale Kraiss, afa mwakwale Godna mo fli sihiule el ambe apukefe. Afa ambenam haig haig kigmog ogfuiag gifi afa God kanog fwatig elim gaba enaig esehiagi me. <sup>25</sup> Enamba mahim fiahba ati ka nem sihi fwahanig.

<sup>26</sup> “Afa el nem sihigonibi og, ‘Ehe bite behig go.’ Nofeka asim afu. Afa esog, ‘Ehe wanai yi sefu go.’ Nofeka higim. <sup>27</sup> Afa afwei osu puguiagam pugunam blo osu pegam ikafe asa mungwali el enam nangufi. Asa Nufunam El gwenai esefe oblofiba. <sup>28</sup> Hanai yi el melig pigieg afogwa enanai yi gungwe ambe laskuhlag.”

### *Nufunam El blofe*

*Mak 13:24-27, Luk 21:25-28*

<sup>29</sup> Sisas enaig sihifeg,

Gwenanam maia kinig awaiyeba asa ikagna enaig esefe, osu sikulufefe afa was mas laugwi afa bagnofut apaiyefe, afa oflanai wasneig wag fufiahsaifi. *Ais 13:10, 34:4*

<sup>30</sup> “Afa enanam Nufunam Elni ogfuiag of la pugufe. Afa sa mungwali bitenai el wewati gofe asa ehengel Nufunam Elim nanguibi sisi leango la kwania wasneigini afa kwania ombusugini wahe blofe. <sup>31</sup> Afa fuf kwania mwasiba asa ehe heafena of lanai elim sambaga sambaga bite ehembegam ningitigiba asa mungwali bitegam afu God kanog fwatig elim lambwagiufefe asa mungu la afu laskuhlafe.”

### *Ansi sa Sisasba blofe*

*Mak 13:28-31, Luk 21:29-33*

<sup>32</sup> “Sa ne fik li lasug mo anwenafi. Afa maia li kag auwiauofefiba afa sa li figeg yiminig pugufe asa ne anwenafi eba suialagna meyofo. <sup>33</sup> Gwenai ese maia ne nanguibi asa mungwali puguiagefe sa ne anwenafi eba ati muhla

meyiofeg afa eba pugufe. <sup>34</sup> Ka nem nufunam sihinag sonag el maisi afofiba asa mungwali enaig puguiagefe. <sup>35</sup> Of i bite i mungwali awaiyeba afa kana moamo wahkig gwesegofufe.”

*Nengel ati numwehiagifm*

*Mak 13:32-37, Luk 17:26-30,34-36*

<sup>36</sup> “Mas amban anwenafe hag osuna sa enaigba pugufe. Godna oflanai el i afa heafena Leg mas anwenafig mo eba Alag mungu anwenafeg. <sup>37</sup> Hosa ilawana Noa wansena gwenai gese maia Nufunam El oblofiba. <sup>38</sup> Afa maisi bu pugua fwainig fiahfenaba enanam mungwali el hefum ahagifini afa angwafig lambwagifini gwenai gese afufenaba asa Noa mungu wanseafuna sip yi ba. <sup>39</sup> Afa mungwali mas anwenafini mo enaig puguiagim. Gwenai geseafufenaba asa bufle kwania blona mungwali kalefena lambkuna. Maia Nufunam El oblofiba asa gwenai gese. <sup>40</sup> Sambaganigi el asola gafuga ahfegofiba asa God mungu flaiba afa ming mo gofufe. <sup>41</sup> Afa sambaganigi angwafig na ahsne gofiba asa God mungu mo flaiba afa ming mo gofufe. <sup>42</sup> Asa numwehifibi mas ne anwenafig mo hag osuna nengelni Ainiyag blonigim. <sup>43</sup> Hwa mo asa ne anwenafi. Afa lalana alag anwenafegba ansi sinaini sa ukwef el blofe ehe numwehego mas fwahai ukwef el lala gam sefu blogim. <sup>44</sup> Asa neanga numwehe, Nufunam El enag osuna oblofiba ne eteti gofife.”

*Sambaganigi gafugag elni lasug mo*

*Luk 12:42-46*

<sup>45</sup> “Amban sa misog el goseg fwahagba, asa mingnag gafugag elim fane mimangenigeg? Eba sawieg el onigig anwena. <sup>46</sup> Enaig el sama sifakale maia misog el pese blo ehem nanguiba asa suialag gafuga fegofufe. <sup>47</sup> Ka nem nufunam sihinig misog el ehem fwahaiba asa heafena mungwali gawig nangwaghiagefe. <sup>48</sup> Afa gafugag el amtakwaligba ehe onigig misog el eyi maisife. <sup>49</sup> Afa ehe gohugum mingnag gafugag elim kwagaitifegim asa uflogna bu ahagaule elim fane wan neg afa bu wan neg. <sup>50</sup> Afa enag osuna ehe etetife asa heafna misog el enanam pese blo pugufe. Gwenanam ehe mas anwenafe. <sup>51</sup> Afa misog el blonam ehem hige hige feskofefe. Afa sa ehem sambaga mengigna elim wahe fwatiba asa enanai yi eyu watinam gog kike skofefe.”

## 25

*10 pela angwafig angwamingna lasug mo*

<sup>1</sup> Sisas esona og, “Enanam Godna bog megam enaig esefe 10 pela angwafig angwaming heafgelni lam lambini afu uflini el mungu angwafig oyna fla. <sup>2</sup> Afa afala pugufe

angwafig onigi etetig afa afala pugufe angwafig onigig anwena. <sup>3</sup> Onigig etetig angwafig heafgelni lam mo lambinim afa wel mo mas lambini mo. <sup>4</sup> Afa onigig anwena angwafig mo wel botol la lam nahugum lambugafuna. <sup>5</sup> Ena el ogna angwafig fla enag maisi fiahfena. Afa angwafig nengiafuhun nof tuta feaisainaba non askafena.

<sup>6</sup> “Afa ambagolugini el uneni og, ‘Hwag el ati oblo angwafig flagim. Au ambenam asa afu.’ <sup>7</sup> Asa mungwali angwafig angwaming bugia gafenam afa heafgelni lam numwehiagini. <sup>8</sup> Afa onigig etetig angwafig onigig anwena angwafigim sahigoni og, ‘Is ai, kangelim nimbiafgelni wel sugfu faigo. Kagelni lam ona fuflu skofe.’ <sup>9</sup> Afa ehengel wahigi sihigoni og, ‘Amo hwaba mas bigim ihlafeni. Naiba nimbiafena afu stoa lanai lambinim.’ <sup>10</sup> Afa onigig etetig angwafig maia wel lambigim afuiafenaba asa enanam el angwafig flagim ika puguna. Mingnag angwafig asa ati numwehiagini, ena mo angwafig buyis la sefu wankanaba asa el mengig kikise fwahana.

<sup>11</sup> “Afa mingnag angwafig sumi yi ambenam esogona og, ‘Ai saglag, kangelim mengig pigini!’ <sup>12</sup> Afa ehe wahigi sihini og, ‘Amo, ka mas nengelim anwenafinig mo!’ ” <sup>13</sup> Afa Sisas esona, “Ne mas anwenafig mo ansi osuna sa nengelni Ainiyag blofe asa numwehifibi.”

### *Sambaga mungu gafugag el lasug mo*

#### *Luk 19:11-27*

<sup>14</sup> “Godna bog megam enaig ese mungu el ona membi ika. Ehe gafugag elim unenigim afa heafna gawig mimagenigim sama numwehe lambfufi. <sup>15</sup> Afa kig mungu mungu mimagenugegim afa amban sa wasneig gafugafe asa ehem mo 5,000 kig faig afa ming elim gweifeg ehem mo 2,000 kig faig afa yiskosule mo 1,000 kig faigim asa ehe mo ikag. <sup>16</sup> Afa el 5,000 kig flanam enana uku ikagna gafugag fenam afa ming 5,000 kig flana. <sup>17</sup> Afa el 2,000 kig gwenaig esena ming 2,000 kig flana. <sup>18</sup> Afa ming el mo 1,000 kig flanam ukunam mas enana gafugagfena mo eba ukunam bite konam misog elni kig kumohla fwahana.

<sup>19</sup> “Maia managenaba asa misog el pese blonam afa heafna elni gafugagim fahigiage. <sup>20</sup> Afa el 5,000 kig flanam afa ming 5,000 kig flablu faina. Ehe og, ‘Ainiyag, ne kam 5,000 kig kana ninga la fakagba sa ka enana gafugafegim ka pese ming 5,000 kig flag.’

<sup>21</sup> Heafna misog el ehem sihina og, ‘Ei, ne sawieg el neana gafugag eba suialag. Ne enag wetim numwehiaflagba asa ka nem aluwegig faiba sa ne numwehiaflafe. Aublo ka sifakaleba sa ne gwenaig ese.’ <sup>22</sup> Afa el 2,000 kig flanam

gwenaiḡ esena blonam og, ‘Ainiyag, ne kam 2,000 kiḡ kana ninga la fakagba sa ka enana gafugafegim ka pese ming 2,000 kiḡ flag.’

<sup>23</sup> “Heafna misog el ehem sihina og, ‘Ei, ne sawieg el neana gafugag eba suialag. Ne enag wetim numwehiaflagba asa ka nem aluwegig faiba sa ne numwehiaflafe. Aublo ka sifakaleba sa ne gwenaiḡ ese.’ <sup>24</sup> Afa el 1,000 kiḡ flanam blonam og, ‘Ainiyag, kati anwenafeg neana onigig wasneig. Neflanai neana aso la ne mas ihi afa ne esug lambiule. Afa ming el maia gafugafegba asa ne ena nai lambiḡ. <sup>25</sup> Enag ka embefeg ena kigna gafugafegim asa ka neana kiḡ ukugum bite megam kog kumohlag. Neana kiḡ honaba, sa nangu.’

<sup>26</sup> “Afa heafna misog el wahigi enaiḡ sihifena og, ‘Nea amtakwalig yiskosug gafugag el. Atiaho ne anwenafeg neflanai kana aso la ka mas ihi afa ka esug lambiule afa ming el maia gafugafegba asa ka ena nai lambiḡ? <sup>27</sup> Haisenaba ne mas kiḡba uku fakana mo benglaba? Afa maia ka pese oblofiḡba asa ka enana kiḡ i afa winmoni i flafe. <sup>28</sup> Ena kiḡ flinim asa ming elim fai hosa 10,000 kiḡ flag. <sup>29</sup> Asa ambana nubwel goh eba mingnag faife asa kaksag fenafe. Afa ambana enaiḡ fwainig wetifegba eba enaba mweahlanafe. <sup>30</sup> Afa enag amtakwalig gafugag elim afwambagam sikulufeg megam flafatiba, asa enanai yi eyu watinam gog kike skofefe.’ ”

### *Sumi yi kwefihiageḡfe*

<sup>31</sup> “Maia Nufunam El heafna oflanai elim pese wan oblofiḡba asa ehe kwania misog el fefe. Ehe heafna suialag kife la ganam ena nai yi mungwali elim kwefihiageḡfe. <sup>32</sup> Afa mungwali bitenai el ambe ehena nofbosugam laskuihlafe. Asa ehe mungwali elim kwefihiagenam asa mange tigife gwenaiḡ esefe sipsip nangwaghiageḡ el sipsip mi meme mi mange tigife. <sup>33</sup> Eba lambinam sipsipim nihigim lasani afa memeim saḡagam lasani. <sup>34</sup> Afa sa misog el nihiginai elim sihinifi og, ‘Aublo, kana alag asa nengelim suialafhiageḡ. Au ambenam nimbiafena gau fli eba Godna bog megam. Ilawana mungwali bite puguia fwainig fiahfenaba God ati numwehe fwahana. <sup>35</sup> Asa bini kam lahanaba ne kam fane faini afa bu hef kam fenaba ne kam bu efiyaini afa ka afwambanai fenaba ne kam nimbiafena lala gam wanigafuna. <sup>36</sup> Ka lofug fwainig fenaba ne kam lofug faini afa kam gihenaba ne kam wanigaflafena, afa ka kalabus lala la ka gafenaba ne kam ambe nanguni.’ <sup>37</sup> Afa enag suialag nihe el esogona og, ‘Ainiyag, ahanana saka nem binilahagiba nanguni afa fane faini, afa bu hef ne fenaba ka nem bu efiyaini? <sup>38</sup> Ahanana sa ne afwambanai fenaba ka nem lala gam wanigafuna, afa lofug fwainig ne fenaba

ka nem lofugba faini? <sup>39</sup> Afa ahanana nem gihenaba ka nem wanigaflafena, afa kalabus lala ne gafenaba ka nem ambe nanguni?’ <sup>40</sup> Afa misog el wahigi sihinifi og, ‘Ka nem nufunam mo sihinig ne mungu esug elim esinig eba kana nilite enaho ne kam esenag.’

<sup>41</sup> “Afa sa misog el sahananai elim sihinifi og, ‘Kam fwahinim afu. God nem heafna mona esinibi. Sa ne suwi lagig kembang gam afu. Ena kembang Satan mi afa heafna gafugag el mi ati numwehiagig fwahanig. <sup>42</sup> Asa bini kam lahanaba ne mas kam fane faini mo afa bu hef kam fenaba ne mas kam bu efiyaini mo, afa ka afwambanai fenaba ne mas kam nimbiafeni lala gam wanigafuna mo. <sup>43</sup> Ka lofug fwainig fenaba ne mas kam lofug faini mo afa kam gihena, afa ka kalabus lala la ka gafenaba ne mas kam ambe wanigaflafena mo.’ <sup>44</sup> Afa ehengel esogona og, ‘Ainiyag, ahanana ka nem nanguni bini i afa bu hef i afa afwambanai ne fena afa lofug fwainig ne fena afa gihena, afa kalabus lala ne gafena asa ka nem mas kwegfuni mo?’ <sup>45</sup> Afa asa ehe wahigi sihinifi og, ‘Ka nem nufunam mo sihinig ne mungu esug elim mas esinig mo enaho ne kam mas esenag mo.’ <sup>46</sup> Afa enaig elbi afunam susu amtakwalig wahkig gohug lambfi afa suialag nihe elbi eba afunam nofkena wahkig gohug lambfi.”

## 26

*Misog el Sisasim tigigim sihiagini fwaihini*

*Mak 14:1-2, Luk 22:1-2, Jon 11:45-53*

<sup>1</sup> Maia Sisas ena mo mungwali sihiage fwahanaba asa heafna patalfuiag elim enaig sihifeni <sup>2</sup> og, “Ati ne anwenafig sambaga osuna mungu goh enaba Pasova buyis.\* Afa Nufunam Elim mingnag elni ninga la faife asa ehem li katigegla kahlifi.”

<sup>3</sup> Afa enanam saglag pris el i afa Israelna saglag el i Kaiafasna lala laskuiahlana ehe misog pris. <sup>4</sup> Afa maisim Sisasna minam yisginage aflafena oyna mwakwalinim asa kehlinim tigi. <sup>5</sup> Afa esogona og, “Mas big Pasova buyis laba esi masa el nanguim afa ninumugonam apukenam hagfe.”

*Angwafig Sisasim sanda bug sugfuna*

*Mak 14:3-9, Jon 12:1-8*

<sup>6</sup> Sisas Betani kembang la ehe Saimon na lala gafena. Ena elbi autunam gih lepra fena. <sup>7</sup> Enana angwafig sanda fun botolna flanam asa ubluna, enag sandaba kaksag kigna. Asa lala fukona afa Sisasba sime la gafenaba asa angwafigbi

\* **26:2:** Pasova enanam Israel pese onigini autunam God Israelim Isipinai sulfuna.

sanda bug Sisasna misog la sugfunagena. <sup>8</sup> Afa patalfuiag el enam nangunim ninimugona afa esogona og, “Mangigim sanda bugba awaieg fatig? <sup>9</sup> Asa big fwahiteba ma el kigna flite sa big kig kwania flite afa asa big gau fwainig elim kwaganite.”

<sup>10</sup> Sisas ati ehengelni mom anwenafenim afa enaig sihifeni og, “Haig esegba sa ne angwafigimba kinigbi faig eba kam suiala feaflag. <sup>11</sup> Afa el gawig fwainig gwenaiig wangafufe. Afa kable ka mas nem gwenaiig wangafi. <sup>12</sup> Afa angwafig sanda bug asa kana elig yi sugfug eba kana eligim numwehiagflag asa biteg kife la fakife. <sup>13</sup> Ka nufunam nengelim sihinig afa mungwali bite asa ena suialag mo sihiafufe asa enaig angwafig ati eseg eba sihiafufiba asa ehem onigifi.”

*Judas ona Sisasim elni ninga la faka*

*Mak 14:10-11, Luk 22:3-6*

<sup>14</sup> Enanam Sisasna patalfuiag el mungu unehlagba Judas Iskariot ehe ikanam saglag prisim nangwagena. <sup>15</sup> Afa esona og, “Mangwal ne kam faife asa ka Sisasim nengelni ninga la fakafe.” Afa asa ehem 30 kig silva suwiginim asa faini. <sup>16</sup> Afa Judas mina yisiginam ona Sisasim ehengelni ninga la faka.

*Sisas patalfuiag elim Pasova buyis wanena*

*Mak 14:12-21, Luk 22:7-14,21-23, Jon 13:21-30*

<sup>17</sup> Enanam ena buyis seflig ‘Bret Yist Fwainig’ puguna. Asa ena buyis la angig osuna patalfuiag el Sisasim ambe nangunim esogona, “Hanai yi ne membeg kagel asa fane numwehiagifi afa sa ne nefe Pasova buyisba?” <sup>18</sup> Afa Sisas esoni og, “Afu kembig la apukenam afa saiyenam asa ena elim kana mo ufu sihini, ‘Anwena el enaig esog kana osuba ati awaiegimba muhlafe koka Pasova buyis patalfuiag elim neana lala wane.’ ”

<sup>19</sup> Afa patalfuiag el gwenaiig esini maia Sisas esonibi afa asa enag fanem numwehiagini. <sup>20</sup> Afa kwekwe watini Sisas 12 pela patalfuiag elim sime la peganam fane wanena. <sup>21</sup> Afa ahagaflafnaba asa esona og, “Ka nufunam nem sihinig nengelina amban mungu kam ikanam elim mwaufe.”

<sup>22</sup> Patalfuiag el ena mom higinim olug kinig eskofena afa hefum sawagini mungu mungu esogona og, “Ainiyag, mango ne kam sona mo?” <sup>23</sup> Afa ehe pese wahigi sihini og, “Nengelina amban mungu ka fane ahneau enag ehe kam ikanam elim mwaunife. <sup>24</sup> Nufunam Elbi eba lahafe, ati Godna buk la sihi fwahana asa lahafe. Afa amban sa Nufunam Elim, elim mwaunufe eba niasabam. Eba suialag afag mas ehem wanigaite.” <sup>25</sup> Afa Judas mwaug el Sisasim

sahana og, “Anwena el mango ne kam sona mo?” Afa ehe wahigi sihina og, “Ei eba neana mo.”

*Sisas Ainiyagna fane ogfuni*

*Mak 14:22-26, Luk 22:15-20, 1 Korin 11:23-25*

<sup>26</sup> Afa sa ahagaflafenaba sa Sisas bret mungu flanam Godim sahanam asa patalfuiag elim kukoskofenam mangeni afa esona og, “Lambinim ahaga, hwaba kana elig.” <sup>27</sup> Afa wain bug kafna gwenaig esena flanam Godim sahanam asa mangeni afa esona og, “Sa mungwali enaba ahaga. <sup>28</sup> Hwaba kana taf ena taf eba ogfu fwaha Godna mo sihi fwahag ena moba nufunam. Ka taf sugfoiba asa kaksag elni nufwehi mo huguflaitinife. <sup>29</sup> Ka nem sihinig ka mas nem pese wain bugba wan nei eba ikan ikan sa ka mulug wain bug nem kikeafna Alagna bog megam saiynam wan nefe.” <sup>30</sup> Afa mwanafi fatinim ena kembang mo fwahinim asa Oliv mug gam afuna.

*Sisas esona Pita kam mas fatinafe*

*Mak 14:27-31, Luk 22:31-34, Jon 13:36-38*

<sup>31</sup> Afa Sisas heafna patalfuiag elim esoni, “Nengel nangufe maia mangwal kam opugunafiba gla sinaini afa nengel kam fwahinim asa ne embem afufe afa Godna buk ati enaig sihifeg og;

Ka sipsip nangwaghiage elim tigeiba sama sipsip mo embem afuaminafe!

*Sek 13:7*

<sup>32</sup> “Afa ka pese buhiae afa ka nengelim Galili gam gosenifi.” <sup>33</sup> Afa Pita wahigi ehem esona og, “Mangofi, afa mingnag mungwali nem fwahi afuiba afa kaba mas enaig ese kafi.” <sup>34</sup> Afa Sisas ehem esona og, “Afa ka nem nufunam sihinag enaba gla sinaini kakaruk mwasiag fwainig fefiba asa ne sambaga mungu nagim esofe ne kam mas anwenafeg mo.” <sup>35</sup> Afa Pita ehem sihina, “Mangofi, kaba nei mungwal big lahawagife afa ka mas esoi, ‘ka mas nem anwenafenag mo’, awai nemug.” Afa mungwali patalfuiag el mungu mo esogona.

*Sisas Getsemani aso la betenena*

*Mak 14:32-42, Luk 22:39-46*

<sup>36</sup> Afa Sisas patalfuiag elim wankanam enag bite seflig Getsemani. Ehe og, “Hwa nai yi auguiafiba kaba osum betennegim ako.” <sup>37</sup> Afa Sisas Pita mi afa Sebedina luwalnigi mi wankana. Afa ehena olug kinig fwina eseafenaba. <sup>38</sup> Afa ehe sihini og, “Kam olug kiniageg kam lahagim ati meyofoe, hwa nai yi auguiafiba asa nofkikena fiahflafim.”

<sup>39</sup> Ehe gwesim mwakwalig hili ikanam asa nofbosug bite la penam betenena, “Kanapi ena kafteba sa ne kana ninga



lanai mwehlai. Asa nofene kana membug la ese afa kasa nimbiafena membeg la ese.”

<sup>40</sup> Afa ehe pese blo nangwagnaba afa patalfuiag el non askafena. Sisas Pitam sihina og, “Atiaho, sa ne kai mungu aua mas nofkena big afeg mo? <sup>41</sup> Sa ne nofkena fiahflafiba afa beteneflaf masa nem yahunag pugunibi ne mas wasneig afofi. Sungwabug mo sawiefeg afa elig mas kigmog mo.”

<sup>42</sup> Afa ehe pese sambaga nagim ikanam betenena enai esona og, “Kanapi, eba ne mas ena kafba mwehlai afa ne og sa ka neba eba ihlafeg, ka membeg nimbiafena onigi la sa ma pugui.” <sup>43</sup> Afa ehe pese blo nangwagnaba afa patalfuiag el non askafena eba ehengelni noftuta fiahsaina.

<sup>44</sup> Afa ehe pese fwatinam ikanam sambaga mungu nagim gwenai betenena. <sup>45</sup> Afa ehe pese blonam patalfuiag elim sihini og, “Mahiaho ne askaba afa hekulafla? Is sa hig, ati opugu mwauule el Nufunam Elim amtakwalig elni ninga la fwahagim. <sup>46</sup> Buguia gafenam nafuiago. Ati mwauule el oblo!”

*Judas Sisasim elni ninga la fwahana*

*Mak 14:43-50, Luk 22:47-53, Jon 18:3-12*

<sup>47</sup> Sisas maisim mo sihi gofenaba el ambena. Ena elimbi saglag pris i afa saglag el i ningitiginibi. Asa pina i afa maluwi i lambinim asa Judas wanblona. Judasba eba 12 pela nai patalfuiag el mungu. <sup>48</sup> Ena mwauule el i afa el i laskuhla sihiageni, ehe enaig esoni og, “Ka ma ambanim asanktata ofeflafiba eba naho asa ne kehli.”

<sup>49</sup> Asa Judas ikagna blona Sisasna muhla pugunam og, “Ei Ainiyag”, afa asa ehem asanktata fiahflana. <sup>50</sup> Afa Sisas ehem enaig esona og, “Hihe, mangwal sa ne fegim oblo, eba sese.” Asa el Sisasim ambe kehlini.

<sup>51</sup> Afa enana maia Sisasim okehlifinibi heafna el mungu pina skoflanam misog prisni gafugag elim angugum hige-flaitina. <sup>52</sup> Afa Sisas esona og, “Pina pese hugufe. Afa amban pina skoflagba eba pina ehem tigeiba asa lahafe. <sup>53</sup> Atiaho ne anwenafeg eba ka kikeafna apiim sahanaiba eba 12 pela ami i afa mingnag ami i oflanai elim ningitigiba asa ikagna ambe kam kwegfufi? <sup>54</sup> Afa ka enaigba eseba eba Godna mo mas nufunam pugui. Godna buk ati enaig sihifena asa enaig kam pugunafe.”

<sup>55</sup> Afa Sisas mungwali elim sihini og, “Ne enaig onigig kaba ukwef el ho nane pinana malunaba fla blug kam flig? Afa mungu mungu osuna ka Godna kwania lala gafenam elim ogfufenig fakafenaba afa ne mas kam flini mo. <sup>56</sup> Afa enaig mungwali asa pugugba eba ati Godna mo fli sihiaule el ati

ginofi fwahini asa nufunam pugu.” Afa mungwali patalfuiag el Sisasim fwahanim embem afuminefena.

*Sisasim kot la wanigafuna*

*Mak 14:53-65, Luk 22:54-55,63-71, Jon 18:13-14,19-24*

<sup>57</sup> Afa enag el Sisasim kehlinim Kaiafasna lala gam wani-gafuna. Kaiafas eba pris misog el. Afa saglag el i afa nihe mo anwena el i ena lala laskuiahlana. <sup>58</sup> Afa Pita sum sum fiahkan ikana pris misog elni lalam ambagala ikagofena. Ehe bog megam sefunam anwasag el nai yi wahe auguiafena. Ehe oyna Sisasim nangwag gofum maia haig esofinifibi. <sup>59</sup> Afa saglag pris i afa mungwali saglag el i laskuiahlanam mingnag elim og ma haig mo Sisasim mwakwal mo sehini asa ehem tigi. <sup>60</sup> Afa mas mangwalim nangunim mo asa kaksag el goba ambeafnaba ehe gwenai-g mwakwale mo esini. Afa sumi yi sambaga el ahblona, <sup>61</sup> afa ahsohna, “Sonag elbi enaig esog, ‘Eba ka esefe Godna kwania lala bubugenam afa sambaga mungu osuna ka pese nimbalafe.’”

<sup>62</sup> Afa pris misog el buihia gonam afa Sisasim esona, “Haisegba nane mas ena mo mungwag sihini mo?” <sup>63</sup> Afa Sisas eba mwalfwaigofna. Asa pris misog el ehem pese sahana, “Afa Godna unehlag la nofkenagag ka ilawo nem sahana sa ne nufunam sihi, asa kagelim sihi neaho Kraiss, Godna leg?”

<sup>64</sup> Afa Sisas wahigi ehem sihina, “Ei gwenaho ati ka nem mungwali osihini, nengigim ne nanguibi Nufunam El Godna nihiginai ninga la ganam afa ofla leango i wahe blofe.” <sup>65</sup> Afa gwenanam asa pris misog el heafna lofug piple skofenam afa esona, “Ehe Godim mwalapinag. Nofena mingnagna mo higigon, magofi. Nimbe ati ne higig ena mwalap moba. <sup>66</sup> Afa ne haig onigifig?” Afa ehengel wahigi sogona og, “Ehe enaigule afa sa ma lahai.”

<sup>67</sup> Asa ehem nofbosug la memp kusufinim afa tige-kini afa mingnag ehem ningafana pupu flaminefini, <sup>68</sup> Afa esogona, “Neaho Kraiss asa Godna mo kam sihin, ambangel nem tigafu?”

*Pita hefum sisagana*

*Mak 14:66-72, Luk 22:56-62, Jon 18:15-18,25-27*

<sup>69</sup> Pita ambagala gafena afa gafugag angwafig angwaming blo muhla ehem pugunam afa esona og, “Neanga Sisas Galili lanai i ne sahfekafena.” <sup>70</sup> Afa Pita mungwali elni nofla awaiena og, “Amo awai, kaba mas enaba anwenafeg mo, mo sa ne sihigba.” <sup>71</sup> Afa gwesim hili ika bog mengig muhla gohfnaba afa ming angwafig angwaming blo nangunam gwenai-g esona maia mungwali el gogafnaba og, “Hwag elbi

Sisas Nasaret lanai i ehe sahfekafna.” <sup>72</sup> Afa Pita pese enaig esona og, “Nufunam nemug, ka mas enaig elbi anwenafenag mo!”

<sup>73</sup> Afa ma nagig fwainig el muhla afohiafena nag ambe Pitam og, “Nufunam ehe neba enanai el he eba ati nim-beafna mengig pugug.” <sup>74</sup> Afa Pita enaig esona ka maste nufunam oi, atiaba ka enaig esegba eba God sa ma kam amtakwale fati! Ehe enaig esona og, “Nufunam nufunam nemug ka mas enag elbi anwenafenag mo!” Pita enaig sihife gofnaba gweyi ikagna kakaruk moasiyina. <sup>75</sup> Asa ehe pese ena mom onigina Sisas sa sihina og, maia maisim kakaruk moasiag fwainig fefiba ne sambaga mungu nagi esofe ka mas ehem anwenafenag mo. Afa asa afwambagam pugu ikafnaba nugwakal ufwe feagena.

## 27

*Sisasim Pailat nangum wanig afuna*

*Mak 15:1, Luk 23:1-2, Jon 18:28-32*

<sup>1</sup> Asa leana saglag Pris i afa saglag el i mungwali laskuhlanam Sisasim tigi fatigim sihiagini. <sup>2</sup> Afa wasneig wena kikenaginim asa wanig afuna. Wanig afunam Pailatba gavmanna misog el nai yi fwahini.

*Judas mwauule el lahana*

*Aposel 1:18-19*

<sup>3</sup> Judas mwauule el enam nangunam anwenafena maia el Sisasim tigigim sihi waginibi asa hefum pese afwanefena. Afa ehe ena 30 kig silva flanam ogra uku saglag pris mi afa saglag el mi pese fai. <sup>4</sup> Judas enaig esona og, “Kati amtakwalegeg. El haig eseg fwainig ka nengelni ninga la fwahagba asa ehem tigife.” Afa wahigi ehem sihini og, “Mango kagelni moala mo eba nimbafena moala.”

<sup>5</sup> Asa Judas ena kig Godna kwania lala la laiti fwaha ikana. Ikanam we la luguna. <sup>6</sup> Afa saglag pris ena kig flinim esogona, “Hwa kigba elni tafim na flag asa bigelni nihe mo sihig nofene Godna lala na kig i wahe faki.” <sup>7</sup> Afa ehengel sihiageni ena kigba asa big bite enana fli. Ena biteba el bite sospen gafugafe fiahgiafufena ehengelni flagoni. Afa ena biteba angoluweg elni melig pigieg na bitefe fwahini. <sup>8</sup> Asa enaba seflig Taf Bite gwese goh.

<sup>9</sup> Enanam Godna mo fli sihiule el Jeremaia na mo nufunam puguna. Autunam ehe ati sihi fwahana og, “Ehengel ena 30 kig silva lambini eba hanansi kig Israelnai el sihiagini asa ehem flifi. <sup>10</sup> Afa enanai yi el bite sospen gafugafe fiahgiafufena asa ena kigba ena bite flini, eba enaig eseg God kam ati sihinag.”

*Pailat Sisasim sahana**Mak 15:2-5, Luk 23:3-5, Jon 18:33-38*

<sup>11</sup> Gwenanam Sisas Pailatna nofbosugam gofena. Pailatba gavman na misog el. Afa sahana, “Neaho Ju elni misog el?” Afa Sisas esona, “Ei, ati ne sihig.” <sup>12</sup> Saglag pris i afa saglag el i Sisasim ninga bulni sufini afa Sisas mas wahigi sihini mo. <sup>13</sup> Afa Pailat ehem sahana, “Mas ho ne ena kaksag moba higig mo asa nem kufi fwahig?” <sup>14</sup> Afa Sisas mwalfwai gofenaba asa Pailat oniginagegofena.

*Pailat sihina ma Sisas lahai**Mak 15:6-15, Luk 23:13-25, Jon 18:38–19:16*

<sup>15</sup> Enanam Pasova buyis la maia ambanim membi finibi asa gavman na misog el kalabus nai elim mungu fwahafena. <sup>16</sup> Afa enanam el mungu gofena mungwali ati anwenafini ehem amtakwalig el heafna unehlagba Sisas Barabas. <sup>17</sup> Asa mungwali el laskuiahlanaba afa Pailat sahini og, “Ambanim ka fwahafe, Barabas me awai Sisasim me eba el seflig God Gisfu Fwahag El?” <sup>18</sup> Pailat ati anwenafini el Sisasim ambofehlinim asa ehena ninga la fwahini.

<sup>19</sup> Afa maia ika elim kwefihiageg kife la gafenaba afa heafna angwag enag mo faina og, “Ka itila nangugba enag elbi esinigbi eba haig eseg fwainig.”

<sup>20</sup> Saglag Pris i afa saglag el i mungwali elim kuku sihiaginim og sa Pailatim sahini ehe sa ma Barabasim mo fwahanam afa Sisasim mo tigi. <sup>21</sup> Afa Pailat mungwalim sahtigina og, “Ambanim sa ka fwahafe?” Afa ehengel mungwali esogona og, “Barabas.”

<sup>22</sup> Afa Pailat sahini og, “Sisasim, el seflig God Gisfu Fwahag El sa ka haig esenafe?” Afa ehengel esogona og, “Li yi kukufenagi!”

<sup>23</sup> Afa esona, “Haisegba? Mango maia fenaba?” Afa fwina esogona, “Li yi kukufenagi!”

<sup>24</sup> Pailat ati anwenafenim ehengel mas mom higini mo afa ogra hefum hagim asa ehe ehengelni nofla ningam bula suwagena. Afa og, “Sonag elbi lahaiba eba kana moala mo eba nimbiafgelni moala.”

<sup>25</sup> Afa mungwali ehem sihini og, “Ehena tafba kagel i afa kagelni luwalim mi sa ma gofi!”

<sup>26</sup> Afa ehe Barabas mo ehengelim fwahanim asa Sisasim soldia na ninga la fwahanim asa wena fliflifinaginim afa sa li yi kukufenagife.

*Soldia Sisasim afwanef mo**Mak 15:16-20, Jon 19:2-3*

<sup>27</sup> Afa Pailatna soldia Sisasim gavman na lala wanigafuna. Mungwali soldia ambenam ehem waki fakana. <sup>28</sup> Afa ehena lofug mo hugufli fatinim afa tafnaig lofug fatini. <sup>29</sup> Afa nasigna we kugunim misog la fatini eba enaig eseg misog elni mwakwal lofug. Afa misog elni mwakwal agat nihiginai ninga gam faini. Afa mongkogini kwakwaginim asa afwanef mo sihini og, “Ei nemba Ju elni misog el.” <sup>30</sup> Afa ehem memp kusufini afa agat pese flinim enana misog gim tigini. <sup>31</sup> Ehengel gwenai esenaginim afa lofug hugufli fatinim afa pese heafna lofug fatini. Afa kehlinim wanigafuna ona li yi kukufenagi.

*Sisasim li katigegla kukufenagini*

*Mak 15:21-32, Luk 23:26-43, Jon 19:17-27*

<sup>32</sup> Afa wanig afuiafenaba Saimon Sairini nai elim uflinim og Sisasim kwefunam li katigeg sa kufehlakuna. <sup>33</sup> Afa afu Golgota bite la apukena. Ena unehlag mog eba seflig melig misog bite. <sup>34</sup> Afa enanai yi wain bug flinim miaklana buna wahe nehini. Afa Sisas gihinam oksina.

<sup>35</sup> Asa li katigegla kukufenaginim afa katna gosisini asa amban nana Sisasna lofug flai. <sup>36</sup> Afa nanai yi auguiafenaba nangu flafena. <sup>37</sup> Afa sisi ehena misog laba enaig ginof sihig mangwal el esena. Ena ginof enaig eseg og:

Hwaba Sisas eba Ju elni misog el.

<sup>38</sup> Afa enanam Sisasna muhla sambaganigi ukwef elim lambtinim asa mingim nihiginai ninga gam li katigegla kahlini afa mingim sahasam ningagam gwenai esini. <sup>39</sup> Afa kaksag el afu muhla angmuwagi finibi fafufena. Afa ehem afwanef mo enaig esogona, <sup>40</sup> “Sa ne ona ka Godna Kwania lala boflaitinam asa sambaga mungu osuna pese nimblafe. Afa ne Godna legba naiba sa li katigegla fwahanam pe!”

<sup>41</sup> Afa saglag pris i nihe mo anwena el i afa saglag el i gwenai esogona og, <sup>42</sup> “Ehe mingnag elim fakwaganfe kafena afa mas hefum mo ihlafenam kweagfwi. Ehe eba Israelna misog el? Atiaba pegba asa big ehem olug onigini. <sup>43</sup> Eba ati ehe Godim oniginagim afa esog, ‘Kaba Godna leg’. Sa big nangug ma atiaba God ehem ilawo okwefugfiba.” <sup>44</sup> Afa sambaganigi ukwef el li katigegla nai Sisasim gwenai esohona.

*Sisas lahana*

*Mak 15:33-41, Luk 23:44-49, Jon 19:28-30*

<sup>45</sup> Afa osu misosuf gigini si mungwali bite kigi fakana ikan ikan sambaga mungu aua la puguna. <sup>46</sup> Afa ena sambaga mungu aua awaiegim ofefenaba asa Sisas fwina unena og,

“Eli Eli lema sabaktani?” Ena moba og, “Kana God kana God haisegba nane kam afwaha?”

<sup>47</sup> Afa mingnag el muhla afohiafenaba ena mo higinim afa esogona og, “Sona elbi Elaijam ounenag.” <sup>48</sup> Afa el kikini ikagna ikana spans flanam wain bug la figihianam aga la kikenam afa sa Sisasim nehna.

<sup>49</sup> Afa mingnag el esogona og, “Au maisim, nawo nangwafufum ma atiaba Elaija blo okwefufiba!”

<sup>50</sup> Maia Sisas pese unenaba asa heafna sungwabug sugu fwagenaba asa olug pwatfuna.

<sup>51</sup> Afa gwenanam Godna Kwania lala nai lofug olyi plewagena pekan pitikafena afa asag ihlafonam fun tutohia apaiyefena. <sup>52</sup> Afa bitegfeg tofpi fiahkana afa Godna el kaksag pigina enanam bigiagafena. <sup>53</sup> Maia Sisas pese buihianaba asa ehengel bitefeg fwahinim afa afu Jerusalem la apukenaba asa kaksag el nangwagini.

<sup>54</sup> Soldiana misog el afa soldia i Sisasim anwasag fiahfofena. Afa enanam haig haig i afa asag i eseaginaba enam nangunim asa ehengel embefinim afa esogona og, “Nufunam he, sona elbi Godna leg he!”

<sup>55</sup> Afa kaksag angwafig ambe membiagig afofenaba hegafa nanguni. Ena angwafigbi Sisasim Galili nai patalbina asa Sisasim kwefu. <sup>56</sup> Afa mingnag angwafig eba Maria Makdala la nai angwafig. Afa ming Mariaba eba Jemsna i Josepna i afag. Afa ming angwafig Sebedina legnigina afag.

### *Sisasim fun meg la fakini*

*Mak 15:42-47, Luk 23:50-55, Jon 19:38-42*

<sup>57</sup> Osupeгна Josep Arimatea la nai el blona Pailatim nanguna. Josepba kig kaksagna el afa eba Sisasim patalkuiag el. <sup>58</sup> Ehe Pailatim sahana ogra Sisasim flauku. Asa Pailat soldiaim esoni, “Sisasim pitigiflinim asa Josepim fai.” <sup>59</sup> Afa Josep ena melig flanam flaukunam asa yimieg lofugna kikenagina. <sup>60</sup> Josep heafna mulug fun meg ati numwehiage fwahana asa enanai yi sefuku fakana. Asa fun mogug teuitfeku mengigim pwakafenam asa ikan. <sup>61</sup> Maria Makdala la nai afa ming Maria i membi agig hawag fenaba asa fun megim ahnangufena.

### *Soldia fun megim anwasfefofena*

<sup>62</sup> Afa numwehiagig osuna mo awaienaba afa ming osuna mo asa saglag pris i afa farisi el i Pailat nangugum afuna. <sup>63</sup> Afunam esogona og, “Saglag luwal ka onigig autunam enag mwakwal el nofkena ati sihi fwahana og, ‘Sambaga mungu osuna awaiyeba asa ka pese buhiafe.’” <sup>64</sup> Asa ma ne esoiba sa ma soldia afui bitegfem sambaga mungu osuna anwasafe.

Masa heafna patalfuiag el ambenam flifunam elim enaig esogonife ehe ati pese buihiag. Enag mwakwale mo sumi puguniba eba fwina amtanafefe.” <sup>65</sup> Asa Pailat esona og, “Sesi, soldia sulfunim afunam biteg la numwehe anwasa fiahfofum.” <sup>66</sup> Asa ehengel afunam bitegim kikisinim asa soldia mo kaguni afofena.

## 28

### *Sisas pese buihiana*

*Mak 16:1-10, Luk 24:1-10, Jon 20:1-18*

<sup>1</sup> Afa esug auguia osuna maia awaienaba afa leana gubi Maria Makdala la nai i afa ming Maria i bitegfe ahnangwagim ahblona. Eba Sande angig osuna sahfen. <sup>2</sup> Afa asag kwania ihlafona asa Ainiyagna oflanai el penam blo puguna. Afa fun fla waike fenam asa enanai yi sisi gafena. <sup>3</sup> Ehena eligbi afwe lofena afa heafna lofugba busbusiagena leango lofug. <sup>4</sup> Afa anwasag el ehem fwina embefenagini afa kiafigig geaskofenam apaiye melig pigieg lofug afogwafena.

<sup>5</sup> Afa enag oflanai el sambaganigi angwafigim sihini og, “Nofeka embe ahfe, ati ka anwenafeg nenigi Sisasim ahyisgiegim ahblo. Enag elbi li katigegla tiginu kahlig. <sup>6</sup> Eba mas ohiaba gif mo eba ati pese buihiakag ehe ati enaig sihifena. Sa ahblo ahnangu ehena kifegim. <sup>7</sup> Asa pese ikagna ahkanam patalfuiag elim ahsihini, asa enaig sihi afen, ‘Ehe ati pese buihiagim eba Galili gam gof ikafe asa ne enanai yi ehem nangufi. Ati ka nem sihinig.’”

<sup>8</sup> Afa angwafig enanai ahfwahanam ahkana, afa ehenigi embeafiahfnaba afa ming ehege mo sifakale ahfena. Asa kikini ahkanam patalfuiag elim ahsihini. <sup>9</sup> Afa ahkafenaba Sisas gwei ikagna pugu ulambina ehe enaig esoni og, “Leana”. Asa ehenigi ahblonam ehena mongim ahkehlanam unehlagim fingi ahfena. <sup>10</sup> Afa Sisas sihini og, “Nofeka embe ahfe asa ahkanam kana nilitem ahsihinim asa Galili gam afu sa ma kam enanai yi nangui.”

### *Anwasag elni mo*

<sup>11</sup> Angwafig maisi ahkafnaba afa mingnag anwasag el kembang gam afunam saglag prisim sihi goni mungwali sa haig haig Sisasna biteg la puguna. <sup>12</sup> Afa saglag pris i afa saglag el laskuhlana mo sihiawagenim asa ena soldiaim kaksag kig faigona. <sup>13</sup> Afa ehengel soldiaim enaig sihife goni og, “Sa ne enaig sihifini og, ‘Heafna patalfuiag el sinaini ati ambeg meligbi flifug maia ka askafenaba.’ <sup>14</sup> Afa atiaba gavman na misog el ena moba ati higigba eba kagel ehem

sihinagifi eba mas ne olug kakageni.” <sup>15</sup> Afa soldia kig flinim gwenaiḡ esini. Ena mo Juda nai el sihiageafuiḡ ika gwesego.

*Sisas og sa gafugafi*

*Mak 16:14-18, Luk 24:36-49, Jon 20:19-23*

<sup>16</sup> Afa 11 pela patalfuiḡ el Galili gam afunam mog la apukena, Sisas ati ehengelim sihi fwahiani. <sup>17</sup> Maia ehengel Sisasim nangunim ehena unehlagim fingifini afa mingnag sambaga onigina fini. <sup>18</sup> Afa Sisas muhla pugunam sihini og, “Mungwali heven la nai i afa bite la nai i God kam kigmog faigba asa ka lambugu. <sup>19</sup> Enaiḡ esegba afa sa ne afu mungwali elim esegonigibi asa ma kana patalfuiḡ el afohi. Sa ne ehengelim bula Alagna afa Legna afa Godna Sungwabug ni unehlag la laiti. <sup>20</sup> Afa sa ne ogfu feḡonigi sa ma ena mo mungwali patalfui sa ka nem faig. Nofeka eteti eba ka nem wahkig wangafufe ikan ikan enag osuna awaiyefe.”



## **Mak Suialag Mo Mak Ginofena Hwa buk enaig esog**

Ena buk wa bigim oghunug Sisas kigfutug i afa unehlag nalog i feg sa ma ehe ahnaig ahnaig lahlag gafugag esei. Afa maia ehe elim oghunugim afa nimbasam ningitigim afa elni amtakwalig hugufaitinigim sa big anwenafig ehe kigfutuk i afa unehlag nalog nai i feg. Sisas enaig esog Kaba Inim El feg afa ka bonam eso ka wahafe asa elim pese wanbife. (10:45)

Mak mang nup Sisasna mom sihiagiah mo afa ehe nup Sisasna gafugagim ohnaig sihifiageg. Yuwana Mak ohnaig esog Jon bu wa aitiag el bonam gafugafeg afa Sisasim bu wa fatig afa Satan Sisasim yuhnagim. Afa sumi yi el sa ahnaig ahnaig kinig kahligim Sisas enaig elim afafenigim asa ehengelim numwehe offunig. Yuwana Sisasna pahluhuiag elim mas Sisasna gafugagim numwehe anuwenafini mo. Afa sumi yi wo ehengel ambawa anuwenafig.

Afa Sisasna angoluwag ehem kinig faig afa Makna sumi yi mo ohnaig esog Sisas ati wahagim afa peske buhiag.

*Jon buwa aitiag el enag sihinugekafena Sisasna mina toholakak*

*Matyu 3:1-12, Luk 3:1-9,15-17, Jon 1:19-28*

<sup>1</sup> Ohuna momba sifakalig mo lahlag Sisas Kraiss Godna legna mo. Autinam newug God Gishu Fwahiana el mungom, ona emba ka wa ningihiaf mungwali elim kwaganigim. (Ehena wunehalamba Kraiss, enag wunehalamba enag enaig eseg, elim kwaganigim God nangum wanbogum.) Enag Israel el enag elim enam nisanafafema.

<sup>2</sup> Enag enaig apekugonam enaig eso profet Aisaia ginofena enam. Profet el enag enaig eseafena Godum mengigim higifinim enag elim sihinugekafena. Godna mo enag Aisaia ginofena;

Emba el kana mom ombuogum ka ningihiaf, emba wa neana gof yikaf. Mina nem numwehianagegim. *Mal 3:1*

<sup>3</sup> El enag bete amtakwaligwa agafuf el hwanigwa. Enaig wunonugum, 'Ainiyagna mina numwehياهو, wankeneg mina esi. Enaig esi, nimbefena olug enag numwehiagi.' *Ais 40:3*

Aisaia enaig ginofena iwanam.

<sup>4</sup> Enag Jon, buwa aitiag el, bete bihig wa ena puguna, enag Aisaia ginofena, enaig mo sihinugena, "Negel olug

enag wahigifi, ahanaig ahanaig amtakwalig enag eso hwati. Enaigba ne esimbi, God nem enag ahanaig ahanaig amtakwaligim hugufatinif. Enaigba ne esimbi, emba sa ka nem buwa aiti.” Jon enag enaig sihinugena.

<sup>5</sup> Enag esoh el Judia provins wanai Jerusalem kimbig nalg yinai, afa mingnag kimbig Judia provinswa ena kimbig wanai gamba Jon nangum ambogona mo higigim. Eheafena amtakwaligim enag sihiagigim, enag Jon buwa aitina.

<sup>6</sup> Jon lofug lahlag awaienamba Jon kamelna lag lofugugum fatiafena. Sis lofug hugufugum kigiugwafena. Afa negba angtita wang suwig buk enag ehba neafena.

<sup>7</sup> Enag enaig mo Jon sihinugena, “El mungo kana sumi yi ombo. Ehenafutukmba kam flafaitig. Kamba wangeneg elmo enag ahanaig ehafena gafungagba ka esemo.

<sup>8</sup> Yawoamba kamba nem buwa mungo aitiaka. Ehemba kana sum bonam, emba sa nem Godna Sungwag miman-geni.”

*Jon Sisasim bu wa fatini*  
*Matyu 3:13-17, Luk 3:21-22*

<sup>9</sup> Enananamba Sis Nasaret kimbig Galili provins wa agafena, enag ena kimbigim wahia bona. Jon Sisasim Jordan bu wa fatina.

<sup>10</sup> Afa Sisas buwanai fusufu pugunamba yikagna gwenagehe nangonamba of pitigiafonam Godna sungwag gamp lofug pembona Sisas nangum.

<sup>11</sup> Awagna wune of wanai pugunam esona, “Nemba kana leg, ka nem membenag. Kana olug nem lahlafenag.”

<sup>12</sup> Eso yikagna Godna sungwag Sisasim bete bihig gam el hwanigam esim ningihiana, og, “Eso ka!”

<sup>13</sup> Was enag mingwo puguka wahana afa mingwo yawo puguna gofnamba ena bete amtakwalig el hwanigwa Sisas enag aganam, eso Satan, sungwag amtakwalig enag, onanawo Sisasim gihnam wanigim ahanaig ahanaig amtakwalig esegim enam. Afa Sisas mas ena mom higna pahalukunamo. Sisas enag ehewaimu mungo sisnga auguiafenamba. Ensel, Godna gafungag wanai of wanai Sisasim kwegfuni.

*Sambaga sambaga sawog kikiaogog elim Sisas wunoni*  
*Matyu 4:12-17, Luk 4:14-15*

<sup>14</sup> Mayi Jon kalabus yi namba, Sis Galili provinsgam bona puguna Godna mo lahlag sifakalig sihinugena, “Ena mo God yuwana sihina, enag ati pugug.

15 Ati muhwa puguagim ofe God elim wanagagim God afalig fenigim. Olug wahigifinim, ahanaig ahanaig amtakwaligim enag hwati. Godna mo lahlag sifakalig higinim pahalukahu.” Sisas enag enaig mo osoni.

16 Sisas Galili wahegmeg bu muhwa langwagofena enag Saimonmi ehefena suminigmi Andrumi nangwauguna. Sambaga ningigi enag fufwala aitiagahfegofena Galili wahegmeg buwa, gwenais gwesa ahfehenam sawog ahwambugo ahfegofena.

17 Sisas sambaga ningigim enag enaig sihefeni, “Neningigi sawog ahwambugofena, yuwamba kam ahpahalumbo, enag ka nem sihinugem elim ah sulufugum, elim ahsulufunam ka nangum ah wan bogum.” Sisas enag enaig sihifeni.

18 Yikagna el sambaga ningigi enag sawug kikiaugug gafungag enam ahwahianam Sisasim ahpahalukuna.

19 Enagna gwesim wesig hilikanam eso Sebedini leningingim, Jems mi Jon mi enam Sisas nangwauguna. Sambaga ningigi enag botwa ahgofenamba fufwala numwehiag ahfegifini.

20 Sisas sambaga ningigim wunoni, enag sambaga ningigi ehefena awagim Sebediim ahwahiana ahkanamba, eso, awagwo botwa agafena, ena gafungag wanai elingimba gweyi gofofena. Enag sambaga ningigi ahkanam Sisasim ahpahlukuna.

*Sisas Satana nihiyinai amtakwaligim mungo elni nihiyinai hugufatina*

*Luk 4:31-37*

21 Sisas ehefena nihiyinaim Kaperneam gam wankana. Mayi Sabat osu pugunamba, eso Sisas ehefena nihiyinaim Kaperneam nuwagig lalagam saho wankana. Sabat osunam Israel elmbi enaig esifini gafungafi hwanig, yusug auguiafena. Auguiafenamba enag ehefena nuwagig lalagam ahuafena Godna mo higigim. Enag Sisas gamba gwenais eswanfena. Sisas ehefena nihiyinaim Kaperneam nuwagig lalagam saho wankana. Ena lalawa elksa wahegagena agafena. Sisas tisana kugwa gohnam sihinugena.

22 El enag Sisasna mo higinim ol wahegesaina, enag enaig sihinugehufena, “Mingnag elbi Mosesna mom sisifugunu gifini. El enag enaig sihigoni ‘Ufuana mo higinim, pahalukahu.’ Afa Sisasba enaig sihinugehmo! Awai! Ehmba enaig sihifeni, ‘Kikefena mo higinim, pahaluku.’ Enamba enaig esenam, mayi sihinugeimba, amangal higinim olug wahigifigmbi. Ehefena mo kifutugum enag.” El enag sihinogugini.

<sup>23</sup> Enanam el mungo nuwagig lala wa agafena enag Satana nihiyinai amtakwalig ehena nihiyi gofena.

<sup>24</sup> Mo enaig osona, hlehlefukona, “Sisas Nasaret wanai, amang na kam bogum fenigim ombo? Amang na kam amtakwalehiagegimho? Ati ka nem olninginag. God nem gishu fwahiagim nem ningihiag ehefena gafungafegim.”

<sup>25</sup> Sisas Satana nihiyinai amtakwaligim enam nunumuafanam, enaig osona, “Mengig ka penifenam, elim enam wahianam pugubo.”

<sup>26</sup> Enag Satana nihiyinai amtakwalig enag kiafigikninina hlehlewo fukonam ehena nihiyinai puguna.

<sup>27</sup> Enag mungwal el enag olug wahig saina enag ehefum ol mewa sihiagahufena. Elimba amangwo? Elimba mulug mo. Elmbi suelimba anuana Satana nihiyinai amtakwaligim sihinigmbi enag ehena mengigim pahalug ahuag.

<sup>28</sup> Enag esenamba ena mo enag yikagna yikanam mungwal kimbis Galili provinswa eyi puguna.

*Sisas Pitana angwagna afagim numwehenagena*

*Matyu 8:14-15, Luk 4:38-39*

<sup>29</sup> Sisas yikagna nuwagi lalam wahianam enag Saimon Andruana lalagam wankana mungwal Jemsmi Jonmi gamba.

<sup>30</sup> Saimona angwagna afagim eligim gih nolog gegofena enag kukwa gifini, enag yikagna ahunam Sisasim sihini.

<sup>31</sup> Enag Sisas ehenangum yikana, ningagana kikehalanam gifiolohuna. Afa eso gih nolog enag gweyi awaienamba, eso angwafig enag gweyi bwihianam wohof gafungafena elim kwagana.

*Sisas enagsa elim lahlafenugena*

*Matyu 8:16-17, Luk 4:40-41*

<sup>32</sup> Owuipegnam sinainim, gihna elim Sisas nangum wambuk ambogona, mingnag wo gihna, mingnag wo Satana nihiyinai amtakwalig nihiyi gohonfini enaigim.

<sup>33</sup> Mungwal el enag kimbis wanai ena lala mengig muhwa mungwal nuwagena.

<sup>34</sup> Ahanaig ahanaig gihim Sisas numwehenugena. Satana nihiyinai amtakwalig wahegagena enam Sisas nigitigina. Satana nihiyinai amtakwalig enag Sisasim ati olningini. Enaig fenamba enag Sisas Satana nihiyinai mengigim ka penifeni.

*Sisas Galiligim langwakana*

*Luk 4:42-44*

<sup>35</sup> Leawa kwimbiyim, Sisas bwihianam lala kimbisim wahianam, bete el hwanigam yikana, Godum sihinafena.

<sup>36</sup> Enag Saimon eh efena nihiyinaim wankanam Sisasim yisigiahuna.

<sup>37</sup> Ahunam wufuinim eso Sisasim enag sihini, “Amang fegim osumba na bok? Mungwal el enag nem yisigiahu, ogogum ‘Kam kwagan,’ enam.”

<sup>38</sup> Sisas mungwag sihinugena, “Yuwanamba kawo mungwal mingnag kimbig muhwa gohka esim nahunam enanayi ka sihinugekam. Enaig fegmba enag ka osum bok.” Sisas enaig sihifeni.

<sup>39</sup> Enag Sisas yikana mungwal kimbigim Galili provins wa, enanayi langwagofena. Sisas mungwal nuwagigim lalawa mo sihinugena, enag Satana nihiyinai amtakwaligim elni nihiyinai ningitigiafena.

*Sisas el mungom enehnam numwehenagena*

*Matyu 8:1-4, Luk 5:12-16*

<sup>40</sup> El mungo enehogog amtakwalig Sisas nangum bonam. Mogukuk kwakwagenam wenamonag sahna, “Na sawiyifegba, emba sa na kam enag lahlafenagei.” Sisasim enaig sahanafena.

<sup>41</sup> Sisas enag nalg afafena, mas embefenamo yikagim enaig elni muhwa puguagim enag eh efena ningagana enag elim tuhunam, enag sihina, “Ka sawiyifeg, nem ma lahlefei.” Sisas enaig sihifena.

<sup>42</sup> Yikagnamehe gih gweyi awaienam enag lahlafena.

<sup>43</sup> Sisas enag elim tifutuk mo sihinagenam eso yikagna ningihiana.

<sup>44</sup> Sisas enag osona. “Nofeka amaniam sihinam esel ka nem esenag enam. Awai! Godna lala nalgim yika pris nangum. Pris el enag enaig esfafif amang amang ofa enag el mayi wambuk ambogomba eso pris enag ofa enag Godum fa faiyif. Yikanam enag elim enag nimbefena eligim enam ogfunai, eso ma nem sihinai, ‘Nem gihba ati awaieg.’ Mayi nem enaig sihifenaimba eso Mosesna mom pahalukwi. God ena mo autinim Mosesim faina enag Moses ginofena, ena mo enag enaig osog. Amaniam gih nihiyinai awaiegmba eso ma enaig esei amang amang enag Godum fai. Nembale enaig esei. Esba na feimba emba el olningif nem gih ati wanganefeg.” Sisas elim enana enai sihifena.

<sup>45</sup> Afa enag el enag yikanam muhwa sihiagena, ena mo enag mungwal kimbigam yikagna kagena enag elksa enag Sisasim yisigiahefena. Enaig fenamba enag Sisas yikagim elni nofwa kimbigam sahoagim enag wahiana. Awai! Kimbig meigim el hwanigam gofena. Ahanagna, ahanagna kimbig wanai enag el enag Sisas nangum ambogwafena.

## 2

*Sisas el mungom numwehenagena eligim lihilifegena enaigim*

*Matyu 9:1-8, Luk 5:17-26*

<sup>1</sup> Mingnag osuwi mayi kanamba eso Sisas piskenam Kaperneamgam yikana, lala wa agafena enag mungwal el enag higini.

<sup>2</sup> Enaig fenamba eso mungwali el enag nuwagena, dalam megim enag el mungwal kigfana. Mengig muhwa gamba kuk goho hwanig fenam enam. Eso Sisas mo sihinugegofena.

<sup>3</sup> Figinyegwa gohna el enag elim elig lihiligim Sisas nangum ombugun.

<sup>4</sup> Kuk enag kigfagena mungwal el enag, enag ahnaig esigim Sisas muhwamba ombugugum fakihmo. Enaig fenamba enag wofusigim ofukwalagonam, eso enag wofus tutuni Sisas esel gofna enaihwa. El gihna kukwa gifini, enam weawa kikehalafinim opigona ehefena kuk noholugum weawa hilihili fak apeigona.

<sup>5</sup> Ati olningini Sisasba emba wa kwegofuf. Sisas anuwana fenamba enag elni olningugugum enag ati olningini, enag Sisas gihna elim enam sihina, “Nilite, ahnaig ahnaig amtakwalig esoh nesena, enamba, ati ka nem hugufatinag.” Sisas enag enaig sihifena elim enam.

<sup>6</sup> Mingnag anuana el auguiafena. El enag Mosesna mom ati olninginim enag ogofunugifini. Enag el enag auguiafenamba Sisasna mom higifinim, ol mewa enaig olningugefafena,

<sup>7</sup> “Amangim enaig sihimba feg? Elmbi elimba Godum kiapasefag flafatig. Aman ahnaig ahnaig amtakwaligimba hugufatif? God mungwehe!” Anuana el enag enaig olningugefafena.

<sup>8</sup> Yikagnam gweyiehe Sisas ehelni olugum enam olningini. Enaig fenamba enag Sisas elim enag sihini. “Amang figim negelmbi nimbefena olyimba enaig olningugefa?”

<sup>9</sup> Aman elim ningagag elig enag lilhi fesaina enamba sihinaf, ‘Ahnaig ahnaig amtakwalig esoh nesena enamba ati ka nem hugufatinag.’ Enamba amanwo enaig sihifena, ena, mo enag yinime? Awaime? Mas na nangunimo. Afa amanwo sihina, ‘Bwihianam nimbefena kuk fanam yika.’ Aman enaig sihifena, ena mo enag yinime? Awaime? Embawa na nanguf.

<sup>10</sup> Enag yawomba ka nem ogofuni kamba El Enag God Ningihiana Of wanai enag yawomba ka nem ogofunug God kam tifutuk faig mungwal bete esel enam enaig ahnaig ahnaig amtakwaligim hugufatinigim.” Sisas enaig sihifena.

Enag Sisas elim elig enag lihlig feagena enam sihina, “Ya-womba ka nem sihina,

11 Bwihianam nimbefena kuk fanam nimbefena lalagam yika.”

12 Sisas mayi enai sihifenamba eso mungwal elni nofwa gihna el enag bwihianam, ehefena kuk fanam yikagna pugukana. Enaig mayi esenamba, eso mungwal el enag olug wahegesaina, eso Godna wunehalam gufiyi sisyigem fukwalagonam. Enaig osogona, “Autinamba mas ka enaigba nangufinimo.”

*Sisas Livaim wunona*  
*Matyu 9:9-13, Luk 5:27-32*

13 Sisas piske yikanam wahegimeg bu Galili muhwa engig wa langwagofena. Enagsa el ehe nangum ambogonamba, enag. Sisas Godna mom sihinugena.

14 Sisas yikanam, Alfiusni legim Livaim nangona. Livaiba takis wambuguk el enag takis lala wa agafena. Sisas Livaim sihina, “Kam pahalumbo.” Livai bwihianam Sisasim sum pahalukuna.

15 Sisas enag esena yikanam Livaini lalagam fukonam agafenamba wohof neawofena. Sisas ehefena nihiyinai gamba mungwal auguiafena. Eso enagsa takis wambahug el i mingnag el gimba ahnaig ahnaig amtakwalig esehufena enag el gimba auguiafena.

16 Mingnag anuana el Mosesna mo fig afa Farisi el. Enag el Sisasim nangunim ahnaig ahnaig elngi ahagafafena, takis wambuguk el afa mingnag elim osogoni amtakwalig el, enag el Sisas ga wohof ahagafafena. Farisi el enag nangunim, enag Sisasna nihiyinai elim sahigoni, “Amang fegim wohof mba mungwal el gimba ahaga, takis wambuguk el, ahnaig ahnaig amtakwalig esehug el gimba? Amang fegim Sisasba enaig elimbi wan neawofena?” Farisi mayi enaig sahigonibi.

17 Sisas mom enam higinam eso sihini, “Amangal gih hwanig mba mas dokta nangumbi ahwi. Awai! Gihna mungwehe dokta nangumbi fehuf. El enaig osogona, ‘Kagelmbi wangeneg el!’ Kamba enaig elim wunonugum bwahmo. Awai! Kamba bogum el ahnaig ahnaig amtakwalig esehufena enam wunonugum ka bok.”

*Sisas wohof kwegahug mo sihina*  
*Matyu 9:9-13, Luk 5:27-32*

18 Mingnam Jonna nihiyinai afa Farisi el gimba wohofum kwegfini. Mingnag el ambogonam Sisasim enaig sihifini. “Ahnaig asegmbe enag Jonna nihiyinai afa Farisi el gimba

wohofumba kwegig ahufena, afa neana nihiyinaimba mas wohofum enag kwegifinimo?”

19-20 Enag Sisas sihini, “Enag aman angwafig afafimba, ehena nilite i, hiheg i, enag nuwagif sifakalinigim, angwamig fak el, mungwal gofofimba, enag yuhwahofeg. Mayi el enaig nuwagimba, wohofum kwegime? Awai! El mulug angwamig fak enag agagba mas wohofumba kwegi. Enag hwaonam mingnag el elim enam mayi fighuimba, afa enanayi gohog hwanigwa mayi feimba enanamba sa yuhwafe ehena hiheg so wohofum enag kwegig. Enag kamba el angwamig mulug fag lofug. Enag ka gofopenamba kikefena nihiyinai mungwal esel enag ohunanam enag el sa sifakali, mas wohofum ba kwegi. Eenam hwaonamba el amtakwalig kam sulufif, kam amtakwalefif, enag mas ka gofofi kikefena nihiyinai ga mungwal mba enag enanamba sa kana nihiyinai enag afafinim wohofum kwegi.” Sisas enaig sihifeni.

21 Sisas sawiyifena Farisim mulug olningugigim ogo-funugum enaig fenamba enag ahnaig ogofunuhmo mulugum enam. Enag el enag autinai mom mahiyim pahalug ahuafena. Enaig fenamba enag Sisas wanag enag wahiyini, enag wohofum enag mas kwegifinimo. Enag Sisas Farisim piskanam osoni. “Afa aman lofug nimyegmba fanam autinai lofug megimba kwelif? Awai! Enaigba eseimba, emba ena lofug nimyeg enag autinaim kufuwahiamba, meg pugunam numbif.

22 Enag amanwo nimyeg wain bugba efiyif sis meme lofug autinai wulawamba? Emba, awai! Enaigmba eseimba wainbug ena wolawa kukunam mungwal amtakwalenam awaief. Awai! Elmbi mulug wainmbug mba mulug wola wa fanunguf.”

*Sisas Sabat osunam, gafungagim kwegahugum sihina  
Matyu 12:1-8, Luk 6:1-5*

23 Mungwagim Sabat osunam enag, enanam Sisas ehafena nihiyinai ga mungwal aisagafe kafena wit asowa. Enag withi rais lofug enaig feg. Ena wit fug enag pwatahaga fehufena.

24 Enag Farisi el enanayi gofwehenam Sisasim nanguni. Farisi el enag Israelna lotum Ainiyag el fini. Enag Farisi el enag Sisasim sihini, “Mosesna moamba enaig osog, ‘Sabat osunam enag nofeka gafungafim, enag osuinamba esug ehe auguiafum,’ Mosesmba enaig sihifena.” Enag Farisi enag Sisasim enaig sahanafini, “Amang figim neana nihiyinai mba enaig mba esig?”

25 Sisas Farisim sahini, “Mas na ginofumba buk wa naiimba numwehe fahegagikmo amang eseli Devit autinam



esegena enamba. Enanam enag Devitna nihiyinaim enag wohof awaienimba ena bini pigina.

<sup>26</sup> Enanam enag Abiatar Israel pris elni mungwal sisiyi feni, alawieg feni. Prisni gafungag enaig fena, amang amang mungwal el prisim faifinimba, pris enag Godum faifini. Enanam Devit Godna lalagam sahonam bret fa nena Godna nohmbofogam gifini enag. Ena bret enag kwegig, pris mungo ahagafena. Enag Devit nenam ehafena nihiyinaim gamba faini. Enaig esenamba yuhwafena. Ena mo enag mas na fahegaginimo?" Sisas enaig sahinena Farisim.

<sup>27</sup> Sisas enaig osona, "God enag elimbi mas enaig si-hifenigmo, 'Negel enag Sabat osuwum kwegfu!' Awai! God Sabat osuwum gishu fwahiag elim kwaganigim.

<sup>28</sup> Kamba El Enag God Ningihiana Of Wanai, enag Ainiyag ka feg. Sabat gamba enag kamble mungo osog amang yuhwamba feg Sabat osuinamba."

### 3

#### *Sisas elim Sabat osunam numwehenagena*

*Matyu 12:9-14, Luk 6:6-11*

<sup>1</sup> Sabat osunam enag Sisas Israel elni nuwagig lalagam piskanam yikana. Enanayi el mungo ningagag lilihig agafena.

<sup>2</sup> Enag mungwal el enanayi Sisasim nangwagofofena. Enaig olningini. "Elim enam wa numwehenageime? Awaime? Yuwa Sabat osunam enag Sisas wa gafungafeime? Awaime?" Mungwali el enag enaig olningini. Sisas mba enag Sabat osuinamba gafunga feimba, emba nunumufinim kotinif.

<sup>3</sup> Sisas el ningagag amtakwaligim enam sihina. "Bonam olugi goh."

<sup>4</sup> Sisas sahini el mungwal elim eseli nangwagofofena enam, "Ahnaig Mosesna momba osog? Sabat osunam enag bigba lahlafeime? Awaimba, big amtakwalefeime? Enag osunam enag amang big fimbi enag yuhwamba fef? Enanam enag big elimbi kwaganime lahla goheigim enam? Awaimba nawo elim enam kugwag sungo feime?" Sisas enag elim enag enaig sahinina. Enag el ati olningini Sabat osunam elim lahla fehiaogug yuhwafef, enag el enag mas osogonamo.

<sup>5</sup> Enag Sisas nofna nangwagihiagegofenamba enag ehim olug kakagna. Afa Sisas ati olningini enag elni olug enag numwehegim olningugig hwanig. Enag Sisasim olug kinina, enag Sisas ningagag amtakwalig elim enam sihina, "Ningagag fa suf." Enag el enag ningagag fasufinimba ningagag ena yuhwafena.

<sup>6</sup> Yikagnam Farisi apekugo ahunam nuwagena Herotna nihiyinai ga mungwal. Enag nuwagenam sihiagehufena, “As big Sisasimba finim eso big tige gif?” Enaig sihiagehufena.

*Elksa wahegagena wahegimeg buwa nuwagena*

*Luk 6:17-19*

<sup>7</sup> Sisas ehefena nihiyinaim wankana ena kimbigim wahiyinim wahegimeg bugam ahuna. Enagsa el enag ambogonam Sisasim pahalug ahuefena. El Provins Galilina, mingnag provins Judianai,

<sup>8</sup> mingnag kimbig nalog Jerusalem wanai, provins Idumeanai, mingnagwo Jordan mingig yinai afa mingnagwo kimbig Tair muhwa nai, afa mingnag Saidon kimbig enagsa el enag amang Sisas fegim eseli enam higini, enag el enag Sisas nangum amgogona.

<sup>9</sup> Sisas ehefena nihiyinai elim sihini, “Enagsa el gofwehe enag ka wa kaguwonuf, enag bot numwehiagifum, keso esim yika fugom.”

<sup>10</sup> Enagsa elim gihnam enag numwehehianug akafena. Enag mingnag el wahegagena gihna enag ambogonam Sisasna nihiyi, og, ona nawo Sisasim tuhum.

<sup>11</sup> Mingnag el Satana nihiyinai amtakwalig nihi mewa gohonfini enaig elim enam wanambogona. Satana nihiyinai enag Sisasim nangunim, enag elni mogukuk kwaogonuginim Sisasim enaig wunini, “Nemba Godna leg.”

<sup>12</sup> Enag Sisas Satana nihiyinaim enam tifutuk mo sihini, “Nogofeika sihim kamba aman!” Sisas enaig sihifeni.

*Sisas elim 12 fenam wambnam gisfu hwatina ehefena mo figim gafungagim ahuagim*

*Matyu 10:1-4, Luk 6:12-16*

<sup>13</sup> Sisas mugam fukokanam. Enag eso amangalim esel ogum, “Kawo gisfuhwatim,” elim enam awamoni, og, “Ambogo,” eso el enag ehenangum

<sup>14</sup> 12 fena enag elim enam gisfu hwatina ona, “Kawo wan gohonifefum, afa enam enag keso ningitigim kana mom sihigonugehugum.

<sup>15</sup> Kawo ehelim enag tifutik faiyim, so ma Satana nihiyinai amtakwaligim enam hugufuhiagonugi.”

<sup>16</sup> Enaig fenamba enag eso 12 fenam enag elim enag gisfunam hwatina Saimonumwo enag meng wunehlam faina Pitam,

<sup>17</sup> Afa Sebedini leningigim sambaga ningigim enag enaig wunehalam faini Boanerges, enag Boanerges wunehalamba enaig eseg ‘hugni luwal’,

18 Andru, Filip, Bartolomyu, Matyu, Tomas, ming Jems Alfiusna leg, Tadius, Saimon, Selot elyinai, (Enag Selot el enaig eseahufena mingnag el amang amang amtakwalig eseahufena Selot el enag elim enam tifutuk mo sihigon ahufena.)

19 Judas Iskariot, Judasba el esel enengim Sisasim mingnag elim wa fainif, og, “Ma tigege enag el.”

*El enaig osogona. “Satan Sisasim tifutuk faig”*

*Matyu 12:24-32, Luk 11:14-23, 12:10*

20 Eso Sisas lalagam yikana, enag, elksa piske ambogonam nuwagena. Enaig fenamba ena Sisas eh efena nihiyinaim enag wohof ahanana wanehmo.

21 Sisasna niliteg el higinim, eso ambogona ogona, “Nawo Sisasim wanigiahum.” Mingnag el enag enaig osogona. “Sisasba mwetitig el.”

22 Mingnag el, Mosesna mom anuanafig, Jerusalem kimbigh wanai ambogonam, enaig osogona, “Belsebul, ming wunehalamba Satan, enag Sisasna nihiyi gofwehe, Belsebulmba eh efena nihiyinai amtakwaligna Ainiyag amtag. Belsebul Satan enag Sisasim tifutuk faig, so ma Satana nihiyinai amtakwaligim hugufuhianugei.” Anuana el enag enaig osogona.

23 Sisas elim enam wunoni, “Ka nangum ambogo,” enaig osonim eso enawasim sihini, “Ahnaig asenam eso Satan mba eh efena nihiyinaimba hugufatif?”

24 El mungwa kimbigh wanai mba toogonam esi ka osu ka feimba emba mas tifutinam gohwi.

25 El mungo lalanaimba apeigonam esim ahu osum ahumba fimb, emba mas tifutinim auguiafi.

26 Enag Satan mba eh efumba tigeimba emba ehena nihiyinai enag olugyi towoguf, emba mas tifutinim auguiafi. Awai! Emba wa yikagnam wa awaief! Enag Satana nihiyinai amtakwalig ka ningitigigba Satana tifutukni ka esehmo. Awai!

27 “Afa el mungwamba ahnaig yika sahogum tifutuk elni lalagamba ehena gawigmba wambuhmo. Awai! Enaigba eso fefimba emba so ma tifutuk elim enag weana kikenam wahianam, eso ma mungwali gawig enag ehena lalanaimba wambugei.” Sisas eh efena mom sihiagena elimba ogo-funugum ehe Satanaimba enamba flafatif.

28-30 El enag enaig sihiagini. “Sisas mba Satana nihiyinai amtakwalig ehena nihiyi go.” Enaig fenamba, enag Sisas sihini, “Yini newug ehe, ka nem osonug, ahnaig ahnaig amtakwaligim elmbi esimbi, afa mungwal mo ahnaig ahnaig

amtakwalig enag elmbi sihiaginim enamba Godum asah-nafimbi, elimba embawa God hugufatinif. Afa aman Godna sungwagimba kiagaseafaimba, emba God enag mas hugufatinai, yawo ohunanam afa enengim gamba. Awai! Ehena amtakwalig mba gwesenam gofuf.” Sisas enaig sihifeni.

*Amangal Godum pahalug ahufefimba enag elmbi Sisasna niliteg*

*Matyu 12:46-50, Luk 8:19-21*

<sup>31</sup> Eso enanam enag Sisasna afagna suminimbugugna ambogonam apekugona. Enag ambagam gofofenamba eso el mungom ningihiyini ogog yika Sisasim wunona.

<sup>32</sup> Elksa Sisasna muhwa ogwiefena, enag el enag Sisasim sihini, “Higi, neana afagna suminimbugugna muluwalningagna ambagam gofohmba nem wununug.”

<sup>33</sup> Eso Sisas elim enag sahini, “Amangalwo kana afahumoanig suminimbugug mba?”

<sup>34</sup> Enag enaig sahinenam eso el esel ehena muhwa ogwiefena enam nangwagihiagenam eso osona, “Ohunag elmbi kana afahumoanig suminimbugug muluwal ningag.

<sup>35</sup> Amanga Godna sawiegim pahalug ahuagimba, enag el enag kana suminimbugug, muluwalningag, afahumoanig,” Sisas enag enaig sihifena.

## 4

*Sisas enawasim sihinugena el mungo wit nog rais lofug asowa aitiagena enam*

*Matyu 13:1-9, Luk 8:4-8*

<sup>1</sup> Sisas wahegimeg bu muhwa piskanam elim mo ohofunugena. Elksa Sisas nayi ambogonam nuwagena enaig fenamba. Enag Sisas botgam fukukanam agafena bot buwa gofena enanayi. Elksa engigwa bu muhwa auguiafena,

<sup>2</sup> enag eso Sisas enagsa mo enawasim enaig sisifunugena.

<sup>3</sup> “Negel higil! El mungo yikanam asowa wit nog rais lofug aitiagena.

<sup>4</sup> Enag aitiagafenamba mingnag witwo mina wa apeigona. Enag twafig ahagana.

<sup>5</sup> Mingnag betewo hun etinyaksa singaugum afugwafenamba enag betewo wesig sisigam fena enaig betewa mingnag witwo apeigona. Enag betewo nalig fe hwanig, enag wit weg mas numwehe bete megam apeigonam ahunamo. Enaig fenamba enag wit enag yikagna apekugona.

<sup>6</sup> Enaig fenamba enag osuwu mayi pugunamba enag wit enag ehesafesaina. Ena wit enag bagag hwanig fenamba ena ehesafesainam eso pigina.

<sup>7</sup> Mingnag betewo we nasna gofofena enag mingnag witwo enag olugyi apeigona. Enag eso we nasna enag apekugonam wit nogum enam kilmoane sungofini enag wit apekugonam wesig fesaina mas fug lenamo.

<sup>8</sup> Mingnag witwo bete lahlagwa apeigona, enag apekugonam numbiasaina, enaig fenamba ena fug lena. Mingnagwo enagsa feg 30, mingnagwo gwesim hilinam enagsa newog feg 60, mingnag gwesim hilinam amtakwal wahegageg feg 100.”

<sup>9</sup> Afa enam enag Sisas sihini, “Aman anganamba, ena mom ma numwehe higinam afa olningi.”

*Amang fegim Sisasba enawasimba sihiafena*

*Matyu 13:10-17, Luk 8:9-10*

<sup>10</sup> Elksa mayi ahunamba, Sisas mungo gofena. Ehena nihiyinai 12 fenam afa mingnag el Sisasna muhwa gofofena, enag gamba apeigona enag enawasim enam Sisasim sahini.

<sup>11</sup> Enag Sisas enaig sihifeni, “God nem ati ogofunug mog mo megam sahogo enam, ena mo mba enaig eseg, amangal Godum pahalug ahuaafena, enamba God wa wanagafuf. God ehe afalig fenam, God ehefena wanagagim enam nem ogo-funugeg. Aman Godum pahalugua hwanigba eso enamba enawasim mungo wa higif.

<sup>12</sup> Autinam God profet Aisaiam ogofuna enag Aisaia enaig ginofena,

Enag emba wa nangunim, afa mas nangwi afa enag moamba higinim moamba afa mas olnigigba fi enaig fenamba, enag olugbi mas wahigifi, enag ehefena ningalni ah-naig ahnaig amtakwaligim enag God mba mas hugu-fuiti fani. Ais  
6:9,10

Aisaia enaig ginofena.” Enag Sisas enaig sihiagena.

*Sisas wit nog mog mo esel enawasim fug legmo*

*Matyu 13:18-23, Luk 8:1-15*

<sup>13</sup> Sisas enaig sahinena, “Enawasim enag mas nol-ningigmo. Enamba nolningig hwanigmba emba mingnag enawasim enamba ahnaig olningig na fif.

<sup>14</sup> El esel yihugeg elimba Godna mom yihugeg.

<sup>15</sup> Mingnag nogwo minawa apeigog. Enag enaig feg, el mayi Godna mom higigmbi gwenanam ehe Satan bogum ehelni oluyinai Godna mom enag wambuk.

<sup>16</sup> Mingnag el wo enaig esig. Wit nog betewa apeigog hun singaugumwo afugwahba ena bete wo wesig sisiyigam gi. El enag enaig feg, ena mom enag yikagna higigim, enag sifakalinig,

17 enag Godna momba mas numwehe oluyi saigogmo, mas numwehe kifutuk olninginigmo. Afa enengim mingnag el mayi Godna mom piga wambuk apeigonam ehim enag kinig faiyimbi ehena Godum olningenag enag yikagna gweyi awaief.

18 Mingnag elwo enaig eseg. Wit nog we nasnawa olugyi apeigona. Enaig el enag Godna mom higigim.

19 Afa ahnaig ahanaigim ohuna betenaim enam membebonug enaig elni olugyi nag Godna mom kilmoanegonugini enag enaigmba el mas fug legmo.

20 Mingnag elwo enaig esig, wit nog bete lahlagwa apekugog. Ena Godna mo ehigigim, figim kikeheligmbi enag el enag fug leg. Mingnagwo enagsa feg 30, mingnag wo gwesim numwehe hilinam enagsa newag feg 60, mingnag wo gwesim ilinam amtakwal wahegagna feg 100.” Sisas enaig sihifeni.

*El wi kumoahal agonuhmo, gwenaig eso Godna moa gamba elim ofugon*

*Luk 8:16-18*

21 Sisas enaig shifeni, “Enag aman mungwamba wi fanam somp mewa afa kife mewamba kumoahalaime? Awai! Sime sisiyi fa foholuf.

22 Amang amang gawig esel yawamba megam agfo enag enag enagimba amba wa apekugof. Afa mungwal gawig aman atukulegim auguiagba, emba wa ena wi ambawa puguf.

23 Amangal anganamba, eso ma numwehe higinim afa olningi.”

24 Sisas enaig sihifeni, “Mo esel na higig, enamba numwehenim olningi. Amang enaihwa na fagmba enaigmba mingnag God nem faif, emba mingnag enag enagsa nem faif.

25 Aman Godna olningugugum numwehe kikehalagmba emba God enagsa faif. Afa aman Godna olningugugum kikehalag hwanigmba, emba mas kikehalai. Yuwanam wesig esel fana ena gamba awaief.” Sisas enaig sihifena.

*Enawasim nog puguagim, gwenaig eso God wanagag gamba fef*

26 Sisas ming mom enaig sihifeni, “God wanagagimba enaig eseg, el nog betewa aitiag akak.

27 Mungwal sinainim enag gifugum osunam bwihiafugum yika ana nog apekugogum numbigim fuk legim enam enag el enag mas olningigmo, ahnaig asegin ena apekuguk.

28 Bete ehehe gafungafegim eso nog apekugog, yuwanawo figeg pugug, gohogum musog pugug, gwesim hiligim fug pugug.

29 Enaig esegim fug enag mayi numbigmba, eso el enag enam ati olningig lifug ati ambig, enag eso naifna fa lef lifug pwatigim.”

*Mastet nog wasim Sisas sihini, God wanagagim enag nalog enaig puguf*

*Matyu 13:31-32, Luk 13:18-19*

30 Sisas enaig sahinena, “Ahnaig sefa big fif God wanagagimba? Ahnaig big esinim ogofuf enawasimba? Elimba enaig eseg.

31 El eseli mastet nog fanam betewa fatina, enaig mastet nogmba hwatambof kug lofug.

32 Enamba pugunam numbinam mingnagim flafna aitif. Kagagmba naligehe aitiagef, twafig saigonam auguiafuf, gag gamba nimbagif. Mastet nog wasimba enaig ogofufeni. Hwaonamba God enaig wanagafef etinyagsa elim wambubunam, enam enaig lahla wanagafef.”

33 Sisas elim enag ena mo sihini. Enagsa enawasim Sisas enaig sihifena. Ehefena nihiyinai elni pluningugug esel pugug enaihwa enam Sisas ihinugefena.

34 Enaig esenam enawasim mo mungo mungwal elim sihini, afa ehewaimu ehfena nihiyinaim mungo wangagfena, eso mog mo wo sihinifini.

*Sisas fufwei mi bu mi kweniba eso eheningi ahtigeafona*

*Matyu 8:23-27, Luk 8:22-25*

35 Enanam sinainim Sisas sihini ehfena nihiyinaim, “Nawo wahegimeg bugam minggam ehgam ahum.”

36 Enag enagsa elim enam Sisasna ehfena nihiyinaim wasanim ahuna. Sisas enag gwena botwa agafenamba, ehfena nihiyinai enag gwesim ahunam saigona botgam. Ehefena nihiyinai enag botum ogohuna enag. Mingnag bot gamba mungwali ahuaminifena.

37 Yikagnam gweyi fufwei nalog puguna buum gamba pupukuafukona botum heogwafatifefana. Botwa bu figfukonam ona nawo mengigwa pugum.

38 Sisaswo botna masigim gifini pilowa ehfena musogumwo fakanam. Enag ehfena nihiyinai enag Sisasim osoni, “Sisifunug el, muhwa gweliehe bigim awaiofe! Mas na kam afafenigmo?”

39 Enag Sisas bwihianam, fufweim nunumuafana, afa buum gamba sihinamba. “Huguafona!” Eso fufwei wahana, bu yuhwa gifini.

40 Eso Sisas elim enam sahini. “Amang figim na embefig? Mas na Godna tifutukumbi olningigmo, Godmba yuhwa

wafef nem kwaganigim, afa mas na olningugigmo God nem nangwagihiagewogumba enamba.”

<sup>41</sup> Sisasna nihiyinai enag amtakwal embefini, enag esinim eh efena olyi sihiagafafena, “Elmbi elimba amanwo? Enag fufwei i bu i mba ehena mom higi pahalukahug!”

## 5

*Sisas elni nihiyinaim Satanna nihiyinai amtakwaligim hugufoitifena*

*Matyu 8:28-34, Luk 8:26-39*

<sup>1</sup> Sisas eh efena wanagag el ahuna apekugona minggam egam wahegimeg Galili buwa provins Gerasawa.

<sup>2</sup> Enanam enag yawehe Sisas botum wahiana betegam penamba. Enag el mungo hun megam (elim kumogofofna enagnai) pugunam bona Sisas nangum. Elmbi enamba Satanna nihiyinai amtakwalig ehena nihiyi gofena.

<sup>3</sup> Elim hun megam kumogofofna enanayi el enag fa-wofegofena. Enag ehim enag aman wena gamba ahnaig kikefehmo? Afa senna gamba, ahnaig kikefihmo?

<sup>4</sup> Gwenaig ehe gwesifinim ningagim mongugum senna kikeagifinim wahiyi finimba enag esefenam kukofenam tatuafena. Afa tifutuk el gimba ehim enag ahnaig kikehe-lafehmo! Awai!

<sup>5</sup> Osunam sinainim enag gwesefenam langwakafena hun megam elim kumogofohogwa aikiawa gamba sufgwafefena. Enaig esefena hlehlewofukofenam amtakwale wune fefena. Afa enaig esefena eh efena eligim hunwa gamba hegohwati-afena.

<sup>6</sup> Enag wahegwa gohonam Sisas nangonam enag enaig esena kikigni bonam Sisasna muhwa penam mogukug kwakwagenam Sisasna nohmbofugum hlehlewofukonamba ehena wuneg enag numbiagena.

<sup>7-8</sup> Sisas Satanna nihiyinai amtakwaligim enam sihina, “Elim enam wahianam pugumbo!” Sisas enag enaig si-hifena. Enag Satanna nihiyinai amtakwalig enag Sisasim sihina, “Sisas, Godna leg, enag Godmba sisiyia newog feg. Amang na kam fenagim?” God bigim nangwagawo enag ka nem tifutigim sahanig, na kam mungwal amtakwal sungofef!”

<sup>9</sup> Enag Sisas sahana. “Neana wunehalamba amanwo?” Sa-tanna nihiyinai amtakwalig enag pisenam Sisasim sihina, “Kamba enagsa, enag kana wunehalamba Ami”

<sup>10</sup> Enag enaig Sisasim sahini fini, “Na kam ohuna bete-naimba ningitigif!”

<sup>11</sup> Tata ksa aikieg wesig muhwa ahagag gegfofena.



12 Satanna nihiyinai amtakwalig enag tifutinim Sisasim sahini, “Kam tatana nihigim ningitigi, kawo so ahunam saigona.”

13 Enag Sisas sawiyifeni mahni. Satanna nihiyinai amtakwalig enag elim enam wahiyinim tatana nihigim ahunam saigona. Ena tata enag kikigni apeigonam aikieg pwapok amtakwaligam apeigonam ahuna. Mungwal tatamba enamba enaig esena wahegateg 2,000. Enag wahegimeg buwa apeigonam pigina.

14 Tatam nangwagofohog el enag embem ahuna sihiagonugehuna kimbis wanai elim. Afa mingnag el aso lalanaim gamba, mungwal el enag kimbis wanai, asonai, ambogonam enag nanguni amang eseli ese pugug enam enag.

15 Sisas nayi ahunam apekugonam eso elim enam nanguni autinam enag eseli Satanna nihiyinai amtakwalig ehena nihiyi gofofena enam. Enag el enag yawamba ati lofug aitiagenam agafena olningugug yuhwa fenam eso agafena. Elim enam nangunim eso embefini.

16 Enag el enag enam nangunim eso ahuna sihiagahufena amang eseli elni nihiyi pugug afa tatana nihiyi pugunug enam.

17 El enag tifutinim Sisasim sihini enag elni kimbisim wahianim asika.

18 Enanam enag Sisas mayi yikanam botwa asahofenamba, eso el eseli Sisas Satanna nihiyinai amtakwaligim hugufatina enag Sisasim sahana, “Kam wanigiahu!”

19 Enag eso Sisas pisenam enaig sihina, “Nimbefena kimbisim piske yikanam, eso sihinugei amang eseli nem Ainiyag esenag enam enag, mungwal amang eseli God nem afafenagim nem kwegofog enam.” Elim enam Sisas enaig sihifen.

20 El enag eso yikanam ena mo sihiagena Dekapolis muhwa kimbis enag ningagagim pugufeogona 10 ena provinswa. Enag mungwal 10 kimbis enag mungwa wuhegalamba Dekapolis. Enanayi sihinugena amang eseli Sisas ehim esenagena enam. Mungwal el enag eso higinim olug wahegasaina.

*Angwafig Sisasna lofugum tuhuna enag Sisas lahlafefatina; afa Jairusni leg nainim gamba ilafaitina*

*Matyu 9:18-26, Luk 8:40-46*

21 Sisas botwa pisenam yikana minggam wahigeg bugam enag elksa mungwal enag ambogonam Sisasnayi nuwagena wahigeg bu muhwa.

22 El mungo wunehalamba Jairus Sisasim nangumbonam. El enag nuwagig lalam Ainiyag fenam. Bonam enag Sisasim

nangonam Sisasna mongug muhwa penam mogukug kwakwagena.

<sup>23</sup> Sisasim tifutinam sahana, “Kana luwal nainim muhwa wahagim ofe. Mayi na bonam tuhuimba eso ma wanganefenam; wangneg gohwi.”

<sup>24</sup> Enag Sisas ahkana.

Elksa pahalug ahunam kigfagena.

<sup>25</sup> Angwafig mungo gofena lalawa fawo feakanam mingugiyi gohona yiamba enaig 12 fena.

<sup>26</sup> Dokta ksa ona nawo numwehenagifum enag ase ase fefininim wahiyini mas wesinggiwo wangenefenam. Gwesim gweyi numbiakafena mungwal mani enag augiagena tatuna.

<sup>27</sup> Enag angwafig enag Sisasna mom higinam, enag boknam el numb eseli ahuafena enanayi puguna.

<sup>28</sup> Enaig olningugena, “Ka Sisasna lofugum tuhuimba, emba sa kam wangenefei.”

<sup>29</sup> Enag esena Sisasna masigim bonam Sisasna lofugu tuhuna. Enaig mayi esenamba enag yikagna lalawfawog enag awaiena enag ati olningenamba eso lalawafawog enag gweyi awaiena.

<sup>30</sup> Angwafig enag enaig esenamba, enag Sisas ati anuwanafena mayi tifutuk enag ehena nihiyinai penakanamba. Enag eso wahigifenam elksam enam nangwagenam, eso sahini, “Aman kana lofugumba tuhuk?”

<sup>31</sup> Ehefena nihiyinai enag enaig osoni, “Ati na nangog, el wahegageg neana nihiyi muhwa. Amang fegim na sahig aman eseli nem tuhuk enamba?”

<sup>32</sup> Enag Sisas mahiyim fahegenugegofena ona nawo wufuam aman eseg enam.

<sup>33</sup> Enag angwafig enag ati olningena amang eseli pugug enam enag. Enag embefenam kiafigigi gayifena, enag bonam penam Sisasna mongug muhwa mogukug kwakwagena, eso amang eseli ehim puguna enam enag sihiagenam augena.

<sup>34</sup> Enaig mayi esenamba eso Sisas sihina, “Kana mulwal ati na kam olningenag. Kamba kifutuk feg nem kwaganyegim enag ati nem yuhwa feg. Yikanam afwahalana wangeneg agafum. Neana gihmba gweliehe mungwal awaieg.” Sisas enaig sihifena.

<sup>35</sup> Sisas mahiyim mo sihiage gofenamba mingnag el Jairusna lalanai ambogom. Enaig osogona, “Neana luwal nainimba ati wahag. Amang fegim na mungwelnimba anuana olmbi esefuku wanimbugumba?” El enag Jairusim enaig osoni.

<sup>36</sup> Sisas mas enam higinimo, enag Sisas Jairusim sihina, “Nofeka embefem, emba ka nem kwegofuf, numwehenam olningugifum.”

<sup>37</sup> Enag Sisas mungwal elim enam kweni, “Nogofei na kam pahalug ambogom.” Esonim, eso eh efena nihiyinaim mungo, Pita, Jems, Jemsni sumineg Jon enam sambaga mungom mungo wankana.

<sup>38</sup> Enag ahunam apekugona Jairusni lalawa Sisas nang-wagenamba angogon ksa wahegagenam eh efum amtakwal ehewehegehu fenamba wewatuawofena.

<sup>39</sup> Sisas sahokanam sahini, “Amang figim na enaig angwe-niasaga, amang figim na wewatuawo? Ena luwalmba enamba mas wahagmo, elimba nonhi gi.” Sisas enaig sihifeni.

<sup>40</sup> El enag hekembegegwa titigegoni. Enag Sisas ambagam ningitiginam eso luwalna awag, afagim afa eh efena nihiyinaim sambaga mungom enam mungo pasna saho wan kana ena kugam luwal eseli gifini esim.

<sup>41</sup> Eso Sisas luwalim enag ningawa kikehalanam Hibruni moana sihina. “Tabita kumi!” Ena momba enaig feg, “Luwal naini, ka nem osonag, bwihia!”

<sup>42</sup> Enag yikagna luwal naini enag bwihianam yikana. Eh efena yiamba 12 fena enaig. Enag el enag enam nangunim enag amtakwal olug wahegasaina.

<sup>43</sup> Afa Sisas tifutuk mo sihini, “Nofeka ena mo sihim, negel nofeka amanim mungo sihinim ena mom enam.” Sisas ononi, “Wohof luwal nainim enam fai.” Sisas enaig sihifeni.

## 6

*Sisas eh efena kimbige wanai el Sisasim mas fatini*

*Matyu 13:53-58, Luk 4:16-30*

<sup>1</sup> Sisas ena kimbige wahianam piskanam eh efena kimbige yikana. Enag eh efena nihiyinai enag pahalug ahuna.

<sup>2</sup> Sabat osunam enag yikana nuwagig lalagam. Godna mom elim sihinigim. Enagsa el ehena mom higinim, enag olug wahegeasainam enag enaig osogona. “Elmbi elimba ahanagna mo fak? Enaig nalg olningugug elimba ahnaig olningugug? Enag enaig esegim, nalg ahnaig ahnaig gafun-gafag. Mas big autinamba enaigmba nangunimo. Ahanagna tifutuk enaigmba pugunug?”

<sup>3</sup> Elmbi elimba lala nimbaogog el sini? Mariana leg? Jems Josep Judas Saimon enag elni eteg sini ehe? Ehena muluwalningag gamba ohwi big mungwal auguia?” Enag ehel enag esinim, Sisasim mas fatini.

<sup>4</sup> Enag Sisas sihini, “Aman profet eseli, mungwal el ming-nag kimbis wanai enag emba profetna mo wa higif. Afa ehafena kimbis wanai afa ehafena nilite afa lalanai ehafena mungo wo mas fatinif.” Sisas enaig sihafeni.

<sup>5</sup> Enaig fenamba enag amang tifutuk gafungag enag ena kimbis wa mba mas esei. Enag esenam mungo mungog elim ehe tutohilinam lahlahafihafena.

<sup>6</sup> Enag Sisas olningugena. “Ahnaig asegmba enag, mas numwehegim kam yinim olninginimo, enag kam ogogum, ahnaig asegim Sisas kam kwaganihmo?” Sisas enaig olningugini. Eso Sisas yikanam langwakafena mungwal kimbis eseli enanayi Godna mom sihinugakafena.

*Sisas ehafena nihiyinaim 12 fenam, enam ningitigina mom ogohuagim*

*Matyu 10:5-15, Luk 9:1-6*

<sup>7</sup> Enag ehafena nihiyinaim 12 fenam enam wunonim, enag enaig esena ningitigi fena sambagahka sambagahka fini.

<sup>8</sup> Enag tifutuk faini. Satanna nihiyinaim amtakwaligim ningitigifigim enam. Enaig osoni, “Nogofeka gawig wambukahum, afa mungo wambuk ahwi, nogofeka bret wambwi afa mani wolagim afa mani ga, enag nogofeka wambukahum.

<sup>9</sup> Su mungo aitiaogwi. Nogofeka ninegna siot sambaga wambtim, mungo mungog wambwi.

<sup>10</sup> Nahunam kimbisgwa mba apekugonam mayi nem amanba ehafena lala gamba wankaimba eso gweyi mungo wa ahunam auguiafi.

<sup>11</sup> Nahunam kimbisgwa apekugonam el enag nem awamogonug hwanigba, negelni mom higigonug hwanigmba, emba so ena kimbisgim enam hwahiyinim, eso enaig esi mongyinai hunigesige wambihaginim, enagna elim enam ogofugoni el enag amtakwalig esig.” Sisas enaig osoni.

<sup>12</sup> Enag ehafena nihiyinai enag ahunam enaig mo sihiginini. “Negel olug wahigifi, ahnaig ahnaig amtakwalig enag hwati.”

<sup>13</sup> Enag enagsa Satanna nihiyinai amtakwaligim enam hugufuiti fegoni, afa mingnag gihna elim wel buk eligim sugufugonuginim numwehegonugini.

*King Herot enaig olningugena, “Sisasba Jon buwa aitiag el emba”*

*Matyu 14:1-12, Luk 3:19-20, 9:7-9*

<sup>14</sup> Ena mo Sisas, ehafena nihiyinai i esel enaig esini, ena mo enag mungwal kimbis ena kagna, enag eso Herot gamba enam higna. Mingnag elwo enaig osogona, “Jon bu wa aitiag

el wahagim piske bwihag. Enag eso ena tifutukni amang amang gafungag nalig enag esofe mungwal fena.”

<sup>15</sup> Mingnag elwo enaig osogona, “Elaija emba.” (Elaija mba profet autinai), afa mingenag elwo enaig osogona, “Sisas mba ming profet, autinai profet lofug.”

<sup>16</sup> Herot gamba enam hignam, enag eso enaig osona, “Jon bu wa aitiag me? Enag ka enam embefeg. Autinam Jonna wuningligim ka hegefatina. Ena me piske bwihiana?” Herot enaig olningugena, enag Herot enag embefena.

<sup>17-19</sup> Autinam King Herot eh efena suminig Filipni angwafigim fana Filipna nihiyinai. Enag angwafig wunehalamba Herodias. Enag Jon bu wa aitiag el enag Herotum sihinagofena gwesenam, “Mas lahlafegmo nimbeafena suminigna angwagim na fak.” Jon enag Herotum enaig sihifenagofena. Enaig fenamba enag Herodias olug kakagna. Herodias enaig fenamba, enag Herot eh efena soldiam ningitigina Jonum ahu sulufim bogogum kalabusigim ningagag mongugum senna kikenagini wahiyim. Herodias onanawo, “Jonum tigeakam!” Afa Herot enag mas wahianamo.

<sup>20</sup> Herot ati olningena Jon mba lahlag, Godna el. Enaig fenamba, Herot Jonum embefena. Herot Jonum enaig esenam kakagwo fefukufna. Herot onanawo Jonna mom higifum afa enag minggamwo olkinig wahegagena.

<sup>21</sup> Herodiasna olug kakagig nalig enag gwesenam gofena, enag ati yisiginam wufuana Jonum tigegegim Jonum eseli enam enag. Enam ati gishu fwahiyini Herotum afag fukuana enag osuwum, enag osunam wohof enag wan ahagagnam enanam. Mungwal gavman, ami, Ainiyag, Galili nai, enag el enag ambogona wohof ahagagim enam.

<sup>22</sup> Mayi enag el enag ahagafenamba, Herodiasna leg naini enag enanam bonam ilakafena. Enag eso mungwal Ainiyag el eseli enag lahlafini. Enag King Herot luwal nainim enam sahana, “Amangim na membegmba, ka so nem faim. Emba ka newa faif amangim na sahif.

<sup>23</sup> Yinimehe kosok, na sahiimba kana mungwal gawig eseli, enag ka nem olugi towogonam faif.” Herot luwal nainim enam enaig osona.

<sup>24</sup> Enaig fenamba enag luwal enag yikanam afagim sahana, “Amangim ka osonaf, kam fai.” Afag enag osona, “Jon bu wa aitiag elni mesog kam fai, enaig esonai.”

<sup>25</sup> Luwal enag yikagna pisenam Herot nangum yikanam, enaig tifutinam osona, “Jon bu wa aitiag elni mesog pletwa fatinam ka fai.”

<sup>26</sup> Luwal naini enag mayi enaig osonamba, eso King Herot enag afaf nalg newug fenam enag ahnaig asoahmo? Yuwanam luwalim enag ati sihina, el eseli auguiafena enag elni nofwa enag ati higinini.

<sup>27</sup> Enaig fenamba enag Herot soldia mungom ningihiana, yikanam kalabus lalagam sagoham Jonna mesog hegefanam pletwa fatinam ombuna.

<sup>28</sup> Enaig esenam, luwal nainim fainamba, eso luwal naini enag afagim okunam faina. Herodias enag Jonum yusug tigeakana.

<sup>29</sup> Jonna nihiyinai enam higinim enag ambogonam Jonna eligim finim ogohunam kumoahalini. Enaig fenamba enag Herot Sisasna mom higinam, enaig olningena, “Jon bu aitiag el piske bwihag,” enaig fenamba enag Herot embefena.

*Sisas elksam wohof faini*

*Matyu 14:13-21, Luk 9:10-17, Jon 6:1-13*

<sup>30</sup> Sisasna nihiyinai pisenim ambogona. Yuwanam Sisas eseli ningitigina ehefena mo finim elim sihigonug ahufena. Enag pisenim ambogonam Sisasna nihiyi nuwagena sihi-agini amang eseli esini, afa mo ieseli faigona enam.

<sup>31</sup> Enagsa el ambogofenam fagufegofofna, enag Sisas ehefena nihiyinaimi ahanana wohof wa neanemo? Enaig fenamba enag Sisas enaig osoni. “Big mungo nawo ahum el hwanig betegam, eso negel enag ahunam ehe fi.”

<sup>32</sup> Enag bot finim minggam el hwanigam ahuna. Sisas enag ehefena nihiyinaim mungo wankana.

<sup>33</sup> Enaig esini, mungwal nangwaginimba Sisas ehefena nihiyinaim mungo wankafena, ati olningini. Enag mungwal el enag mungwal kimbis wanai enag betemina kikigni ahunam apekugona Sisaswo mahiyim wanfeafenamba afa ehelwo atiahunam gofofna.

<sup>34</sup> Sisas bot wanai penam engigwa pafenam nangwag-namba elksa wahegagenam agafena, enag eso Sisas ol mewa afafeni. Sisas olningena el enag sipsip lofug, tata luwalig lofug el nangwagofohof hwanig, enag Sisas enag elim ol mewa afafeni, enag Sisas gweyi enagsa mo sihinugena enag elim.

<sup>35</sup> Osuwu yika pefenamba, Sisasna nihiyinai enag ambogonam Sisasim osoni, “Osuwu yikagim opemba ohunanayimba el hwanig.

<sup>36</sup> Elim enam ningitigi mahunam wohof manina wambugi mungwal kimbis muhwa eseli enanayi.”

<sup>37</sup> Sisas pisenam sihini, “Negelehe wohofmamba faigo.” Sisasna nihiyinai enag Sisasim sihini, “Na sawiyi fegho kawo ahunam nalg manina 200 kina enana wohof wambugonum

elim enam? Ahanagna wohofum big wambugonuhmo el numbum enam? Awai!”

<sup>38</sup> Sisas sahini, “Negelni bretmba ahanansi? Ahunam nangu.” Ahunam fahegenim enag osogona, “Kagelnimba afa pugufeg enansi bret, afa sawugwo sambaga.”

<sup>39-40</sup> Sisas ehefena nihiyinaiim sihini, “Sihigon eso ma auguiagai ahiyogugu ahiyogugu ma fahwi pos wankenegwa eyi.” Sisas enaig osoni eso mingnagwo numwehenam enagsa 100 auguiafena, afa mingnagwo hofawum 50 numwhehfenam auguiafena.

<sup>41</sup> Eso Sisas afapugufeg 5 bret enag wambna, afa sawug sambaga enag wambtina esenam, eso ofgam nunofenam Godum lahlag moaogona. Bret kukosungofenam ehefena nihiyinaim faini enag ehel enag elim enam mumankegoni. Sawug sambagam gamba eso gwenaig esenam eso mumankegoni.

<sup>42</sup> El enag ahaganam yuhwa gohna.

<sup>43</sup> Ehefena nihiyinai enag pisenim wohof ogug enag wambuginim 12 fenam enansi sompyi aitiafolini.

<sup>44</sup> Enag el eseli wohof ahagana enamba 5,000 el.

*Sisas ogfuni ehmba yuhwa feg bu sisiyi langwakagim  
Matyu 14:22-33, Jon 6:16-21*

<sup>45</sup> Sisas ohefena nihiyinaim yikagna ningitigina botwa fukwalagonam gof ati wahegimeg bugam egam ahuafum, Betsaidagam. Sisas ehefwo ona nawo elksam enam ningitigi aminifenam.

<sup>46</sup> Enag elim ningitigi-aminifenam wahianam eso eh-fumwo aikiagam fukokana Godum sihinagim.

<sup>47</sup> Enanam omuginim botwo wahegimeg buwa olugi gofena mba, afa Sisaswo ehewaimu mungo engigwa gofena.

<sup>48</sup> El botwanai enag onanawo ahuafum afa fufwei nalig bofnam botum kifitifnam kikehlaguafna enag Sisas engig wanai ehefena nihiyinaim enam nangwagnamba nambigni wafihiagi ahufena. Enag leawa kwimbiyim Sisas bu sisiyi langwabonam puguna. Si mahiyim gofenamba muhwa ambafekagim. Enag Sisas bu sisiyi yikana wahegimeg buwa eyi ehefena nihiyinai el nangum ona kawo kanam kwahanigam.

<sup>49</sup> Ehefena nihiyinai enag nanaunimba bu sisiyi langwambofena. Enag enaig olningini ogogum, “Yifaf emba!”

<sup>50</sup> Enag mungwal Sisasim enam nangunim enag amtakwal euwatogonam embefagini. Enag eso Sisas yikagna sihini, “Olug tifuti! Kamblehe ombo. Nogofeka embefim.”

<sup>51</sup> Enag botgam yikanam fukonam wanagafenamba eso fufwei enag gweyi awaiena. Enag ehefena nihiyinai enag olug wahegasaina.

<sup>52</sup> Mas numwehenim olninginimo yuwanam Sisas eseli bret kukosungofenam faini. Godna tifutukum ogofuni. Sisas ona so ma olningi ehmba Godna nihiyinai bok. Afa enag Sisasna nihiyinai enag mas olninginimo. Bu sisiyi eseli Sisas yikafena. Enam gamba ehefena nihiyinai enag mas ehim olninginimo, Sisasmba Godna nihiyinai bok.

*Sisas gihna elksam lahlafe-nugena Genesaret wanaim  
Matyu 14:34-36*

<sup>53</sup> Enag ahunam wahegimeg buum tigeugunim ahunam minggam egam apekugona, Genesaret kimbigam. Enag botum enanayi kiki wahiyinim.

<sup>54</sup> Afa botum enag wahiyinim apeigomba. El enagna enag ati olningini elimba Sisas emba.

<sup>55</sup> Enaig fenamba enag el mungwal kimbig muhwanai enag yikagna ahuaminifena. Enag eso mungwal enag higifinim Sisas mayi ahananayi gofenamba, so elim gihnam enag wambufinim esim wambuk ahuafena. Enag higifinim Sisas mayi ahananayi gofenamba, enag eso elim enag kug noholugum wambufinim Sisas nangum wambuk ahuafena.

<sup>56</sup> Mungwali kimbig wesig i naligyinai gamba, Sisas mayi yikafenamba mungwal el eseli enag elim gihnam wambufinim Sisas nangum. Wambug ahuafena ogohufenam ena kimbigwa Sisas eseli aga enanayi olugyi sungo gofena, enag tifutifinim Sisasim sahinifini, ogona Sisas ma sawiyifei, eso ma gihna el enag Sisasna lofugum tuhufi. Enag el enag mayi aman Sisasna lofugum tuhufenamba gih enag wangenefena.

## 7

*Godna moamba ufuana mom flafatig  
Matyu 15:1-9*

<sup>1</sup> Mingnag Farisi el afa mingnag Mosesna mom anuana fig el Jerusalem wanai enag ambogonam Sisas nayi nuwagena.

<sup>2</sup> Enag ehel enag nangwaginimba Sisasna nihiyinai mas ningagagim buwa sugifinimo, yusug ahagafena. Farisi el enag enaig esehufena, ufuana mom pahalug ahuafena, enag amangal enam pahalug ahug hwanigmba, enag osogonfini, “Negelmbi Godna nofwa amtakwalig fesaig.”

<sup>3</sup> Farisi afa mungwa mingnag Juda el enag ufuana mom pahalug ahuafena. Ningagagim ufuana moaihwa buwa gigiafewogug hwanigmba emba wohof enag mas ahagai.

<sup>4</sup> Maket wanai ambogogum, buwa susug hwanigmba, emba mas ahagai. Amang amang autinam ufu esehufena



enam enag gwesifinim pahagahuafena, enaig mungwal ahnaig ahnaig enag. Kap, plet, sospen, nonigi kuk, enaig gamba gigiafegifini.

<sup>5</sup> Enaig fenamba enag Farisi anuana el enag Sisasim sahini, “Ahnaig asegmaba enag neana nihiyinaimba mas enamba pahalug ahuahmo mas ufuana moaihwa ningagagim buwa sugihmo, yusug ahagahu?” Sisasim enaig sahnafini.

<sup>6</sup> Enag Sisas sihini, “Autinam profet Aisaia, enag profet el enag Godna mo higinim eso elim sihini enag Godna mom ginofenam yinim osona negelmbi moakwal luwal. Aisaia enaig ginofena;

Enag enangelmbi kana wunehalam mengigna bihig gufyigim ofukwalagof afa enag elni olugmbi kana wahewa go.

<sup>7</sup> El enag elni mom mungo sihifinim osogwahufuf, ‘Ohuna momba Godna mo.’ Enaig wa osogwahufuf. Enaig fenamba enag kana wunehalam mungwelni mengigna bihig gufyinim ofukwalagof. Ais 29:13

Aisaia enaig ginofena.

<sup>8</sup> Negelmbi ati Godna moamba wahiyig. Yawomba elni mom mungo na gwesigim kikegeligof.” Sisas enaig sihifeni.

<sup>9</sup> Sisas ming mo sihini, “Negelmbi anuana Godna mo flaguflag el, nimbefna ufuana mo mungo na pahlug ahua.

<sup>10</sup> Moses enaig osoni, ‘Nemba awagafagna olningugug fanam eso pahlugwi afa aman awagafagim amtakwalig mo waginimbi enamba eso tigeigi!’ Moses enaig osoni.

<sup>11</sup> Enag negel enaig osogoafena, aman maninamba eso awagafagim kwagani, enag awagafagim enaig osoni ‘Ena manimba afa ka fakanag Godum faigim mas ka nem faiyi.’

<sup>12</sup> Afa enaig sihimba fenam, afa awagafagim kwaganig hwanigmba, emba enaig olningugef, elimba yuhwahofeg, kawo awagafagim kwaganigimwo wahiam. Negel enaig olningugifini.

<sup>13</sup> Enaig fenamba enana ufuana mo eseli na fini enam ena na pahalug ahua. Negelmbi mingnag elim amtakwalig pahlug ahugim ofugon. Enag elimba na sihigoni Godna moamba amtakwalig yusug feg! Enam enag nimbehe sihigonufini, afa mingnag amang amang amtakwaligim enaig enag enam gamba nesifini.” Sisas enaig sihifeni.

*Amangsul elimbi amtakwal fafefaf*

*Matyu 15:10-20*

<sup>14</sup> Sisas elim pisenam wunonim, enag sihini, “Negel mungwal enag kana mom higinim, eso olningugi.

<sup>15</sup> Amang eseli elni nihiyi ambagam goh, enamba sahok-agim, emba mas elim enam amtakwalei. Awai! Amang

eseli meaga goh, enag elmbi gwena mungwehe pugugum amtakwal fafefaf.

<sup>16</sup> (Enag amangal angnamba eso mo enag ma higuginim numwehe olningugi.)”

<sup>17</sup> Enag elim enam wasanam, lalagam yikana. Ehefena nihiyina enag sahini, “Enawasimba mog momba enam elimba ahnaig wo?”

<sup>18</sup> Enag Sisas sihini, “Negel gimba olningig hwanig ho? Mas na olningimo. Mungwal wohof eseli ambagam go, ena yikagim sawagmba mas elmbi amtakwalefai. Emba nihiyi yika sahonam, afa elim enag mas amtakwalefai.

<sup>19</sup> Ahnaig asegmba? Enaig wohof mba mas yikanam olugimba sahoi? Awai! Elimba ehnog megam mungo pekagim, eso wambuk ahugum ata lalagam tatugog.” Sisas enaig sihifeni. Enag ena momba Sisas ogofuni mungwal wohof eseli enag elimba lahlag, mas kwegigmo.

<sup>20</sup> Sisas enaig osoni, “Amang eseli meaga go, enagehe pugugum elmbi amtakwalfafefaf.

<sup>21</sup> Ahnaig ahnaig amtakwaleg eseli elni olyi go, enagehe pugugum fambof amtakwalig olningugug enaig, agataikug, okwef, elim tigezag,

<sup>22</sup> angwafig hugwiapahugug mingnag elni gawigim membenig ona, ‘Ka wambum,’ ahnaig ahnaig amtakwalig enaig moakwaleg, amtakwalig gwenaigim mungo gweseahu, mas ahwanifi, olug amtakwalig, elim mo kiaspasig, kigambalig enag mwetetig el enaig mba.

<sup>23</sup> Mungwal amtakwalig olningugugmba enaig elni nihiyi go, enagehe pugumbogum elimbi amtakwal fafefaf.”

*Finisia wanai angwafig olningna, “Sisasmba yuhwa wafef kam kwegfwagim”*

*Matyu 15:21-28*

<sup>24</sup> Sisas bwihiana ena kimbisim wahianam Tair provin-sigam yikana, yikanam lalagam sahokana onam, “Ma sa kam anuwanafinif ogofei ati bok ohwi aga!” Afa enag el enag ati higini Sisasmba ati bok. Enag ena mom enag ahnaig kumoahalafehmo? Awai!

<sup>25</sup> Angwafig mungo enag enam higina Sisasmba ati bok aga. Enag angwafigni luwal nainim ena Satanna nihiyina amtakwalig ehena nihiyi gofena. Enag angwafig enag enaig fenamba yikagnam bonam penam mogukug kwakwagena Sisasna mongug muhwa.

<sup>26</sup> Angwafigmbi enamba Juda angomba awai, elimba mingnag elyinai, Finisia Provins Siria kantri yinai. Enag angwafig enag Sisasim tifutinam sahana, “Kana luwal nainim Satanna nihiyina amtakwaligim hugufatina.”

27 Enag Sisas ati olningna Israel elmbi mingnag elim ati enaig suwigifini mawang lofug. Enag Sisas angwafigim enam sihina, “Yuwanawo nawo wohofmba luwalim faigom. Amtakwaleg big luwalna wohof wambugum mawankim tatugonugmbi.” Sisas enaig sihina.

28 Enag eso angwafig enag piskenam Sisasim sihina, “Ainiyag, yinimehe nembe osog. Enag mawank sime sin-gagim auguahba, mayi luwalna wohofmba apeigogmba, enag mawang wambhaga fafif.”

29 Enag Sisas piskenam angwafigim sihina, “Neana moamba lahlag olningugug, piskenam lalagam yika, Sa-tanna nihiyinai amtakwalig mba neana luwalim ati wahi-akag.”

30 Enag angwafig enag piskenam lalagam yikana nang-onamba luwal enag kukwa gifini enag Satanna nihiyinai amtakwalig enag ati wahiakana.

*Sisas numwehenagena el mungom angug nihilinam afa mo kakamo nisiekfena enam*

31 Sisas bwihianam piskenam Tairim wahianam yikana Saidonwa olugyi puguna. Gwesim hilikanam olugyi pu-guna ningagagim pugufewogug 10 kimbis enag enaig sefagim Dekapolis yikanam puguna wahegimeg buwa Galiliyi.

32 Eyi el mungom ombugona angug nihiliagim kakamo nisiakafena enam ombugona Sisasim tifutinim sahini ona, “Tuhu elim enam!”

33 Sisas elim enam sulufanam wanikina elksamwo gweyi wasanam ehéfum mungo ahkanam ahgofenamba. Eso Sisas elim enag angamegam ningagana tuhunam, eso memb kusenam, afa enag elni melegim tuhuna.

34 Sisas enag esenam eso ofgam nunofehiagena tifutinam ehéfona, eso elim enag Sisas sihina, “Efata!” Ena momba enaig eseg, “Nembe pigina!”

35 Yikagnam angug higna, amang eseli melegim kaguona, enag awaienamba mo yuhwa wagna.

36 Enag Sisas tifutinam osoni, “Nogofeika amanim mungom sihinim ohunam enag!” Enaig esenam eso osoni, “Nogofeika sihigonugum!” Enag el enag ahunam gwesim tifutinim sihiagehufena ena mom enag.

37 Enag eso mungwal el enag ena mom higinim eso olug wahegasaina. El enag enaig sihiagini, “Amang amang eseli eseageg enag ena yuhwa newugehe feg? Angug nihiliag mo hegig! Mengig kapenifegmo wagig.” Enaig sihiagahufena.

## 8

*Sisas wohof faini el enagsam 4,000*

*Matyu 15:32-39*

<sup>1</sup> Enanam enag elksa piskenam nuwagena enag el enag wohof hwanig. Enag Sisas ehafena nihiyinaim wunoni, “Ambogo,” enag osoni,

<sup>2</sup> “El enag sambaga mungo osunam big mungwal ohunanayi wanagagim auguiagim enag wohof awaienig. Enaig fenamba ena ka afafenig.

<sup>3</sup> Biniwa auguiagim enaig ka ehafena kimbigam ningiti-giagmba emba nof pagiasainam minawa apeigof. Ming-nagwo kimbig waheg wanai ambogog.” Sisas enaig osoni.

<sup>4</sup> Ehafena nihiyinai piskenim osoni, “Ohuna bete mba el hwanig, ahanagna big bret mba finim, eso big faigof enagsa elmbi enamba?”

<sup>5</sup> Sisas piskenam sahini, “Negelni bretmba ahanansi?” Enag osogona, “Elngegwa gohog.”

<sup>6</sup> Enag Sisas mungwal elim enam sihini, “Betewa apeigonam oguwo.” Enag elengegwo gohog bret wampnam, Godum lahlag moaogonam bret enag kukosungofenam, eso ehafena nihiyinaim enam fainim, ogum, “Elksam enam mimangegon.” Ehafena nihiyinai enag enaig esini, bret enag wampnim mimangegonugini.

<sup>7</sup> Afa sawugwo wesig sambagag ahfena. Sisas Godum enag lahlag moaogonam, eso ehafena nihiyinaim enam sihini, “Ena gamba mumankegom.”

<sup>8-9</sup> Enag eso el enag ahganam yuhwafesaina, elksa eseli ahgana enag enaihwa fena 4,000. Ehafena nihiyinai enag wohof ogug nuwaguginim elengegwa gohona enansi sompyi folini. Sisas mungwal elim enag ningitiginam,

<sup>10</sup> eso ehewo yikagna yikanam botwa wan fukonam, ehafena nihiyinaim mungwal, eso wankana provins Dalmanutagamwo.

*Farisi el Sisasim sahini tifutuk gafunga feaugugum*

*Matyu 16:1-4*

<sup>11</sup> Farisi el enag enaig ambogonam Sisasim flafafena gofofena. Enaig ogona, nawo Sisasim gihinim, Sisasim sahini, ona, Ma tifutuk gafungag ena fei, enag enamba el bihigmba ahnaig esihmo? Afa ogona nawo nangum God Sisasim lahlafezagime, awaime.

<sup>12</sup> Sisas olug kinig fenam enag tifutinam ehafefonam, enaig sahinena, “Amang figim elmbi ohunanamba ogona, nawo tifutuk gafungagim ba nangum? Yinimehe ka nem osonug. Mas ka tifutuk gafungagmba ohunanamba ka fei. Awai newug!”

13 Enag elim enam wasanam piskenam yikana botwa ming ehmbegam wahegimeg bugam.

*Enawasim bret pupkuogum enam Sisas farisi el afa Herotna nihem osona*

*Matyu 16:5-12*

14 Ehefena nihiyinai enag ol etetini mas bret wambukam-bogonamo bretmba mungo botwamba gifini.

15 Sisas ati olningena Farisi Herotna amtakwalig olningugugum enam. Amang eseli bret pupkuok enaig lofug fig. Afa amanim enag elni amtakwalig olningugug ena tuhuimba enag gwenai, tata nihig gamba enaig eseg, amta wesig gwenagehe nongigim, eso mungwal nongig awaieg. Elni olug enag enaig feg.

16 Ehefena nihiyinai enag Sisasna ehenum mo mas olningimo, enag ehenum sihiag ahufena, "Big elmbi bret hwanig ename Sisasba osog."

17 Sisas ati olningena ehelni mom enag, enag osonim sahini, "Amang figim nosogog, 'Kagelmbi bret hwanig?' Mas na olningugigmo? Negelni olnigugug mba mas yuhwafegmo?"

18 Nofna na figim mas nangogmo. Afa angna, na figim mas na higigmo? Mas na nolningigmo bret wasim eso ka sihinig enamba.

19 Autinam bret afawa gohona ena elksam 5,000 ka faini, enag osohwi ati ahaganam yuhwa fesaina. Afa ahanansi sompni bret ogugmba fena?" Ehefena nihiyinai wahigifinim osoni, "12 fenam, enansi sompni."

20 Sisas piske sahini, "Enag elengegwa gohona enansi bret ka faini enagsa elim 4,000 enamba. Ahanansi sompni bret ogugmba fena?" Ehefena nihiyinai wahigifinim osoni, "7 ena elengegwa gohona."

21 Enag Sisas enaig sahinena, "Enam enag mas na olningugigmo? Autinam bret ka faigona, afa enag yawangamba wohof ena ka yuhwafef."

*Sisas el mungom nofselenam numwehenagena Betsaidawa*

22 Sisas wankanam wanpuguna Betsaidawa mingnag el el mungom nofselenam Sisas nangum wanibogona. El enag Sisasim tifutinim sihini, "Elim ohunam ningagana tuhu!"

23 Enag eso Sisas enaig esena, el nofselenam enam ningagana kikehalanam, kimbis wana opugunam wahikinam eso memb nofwa fugenam, afa ningagagna tuhuna, esenam eso Sisas elim enag sahana, "Atiaho na amang amangimba enamba nangwagig? Awaime?"

24 El enag fahegagenam enaig osona, “Mingnag elim enag ati ka nangwagegmba li lofug enaig aisagafesaig.”

25 Sisas piskenam ningagana nofwa tuhunamba afa eso el enag numwehena nangoghiagena. Nofug enag yuhwafenam mungwal amang amangim nohmbesena.

26 Sisas elim enam ehefena lalagam piske ningihianam, eso enaig osona, “Nofeka yuwanam ohuna kimbigham piske yikanam sahom!”

*Pita Sisasim seafana, “Nemba Kraiss, gwenaig autinam God nem Gishu Fwahiana”*

*Matyu 16:13-20, Luk 9:18-21*

27 Sisas ehefena nihiyinaim wambwiahianam wankanam minawa wanpuguafenamba Sisaria Filipai muhwa. Eso Sisas ehefena nihiyinaim sahini, “Elmbi kamba amanaimwo sefig?”

28 Enag Sisasim osoni, “Mingnag elwo enaig sefa nem fig, Jon Bu Aitiag El. Afa mingnag elwo enai sefa nem fig, Profet autinai, Elaija, afa mingnag elwo enai sefa nem fig, Mingnag profet el.”

29 Enag Sisas ehefena nihiyinaim sahini, “Afa Negelmbi ahnaig sefa nakamfig?” Enag Pita wahigifenam sihina, “Nemba Kraiss.\* Enag Israel el enag Kraissim nisanahufena. Nembehe ati pugugum enaig gafungag enag na ofe.” Pita enaig sihifena.

30 Enag ehefena nihiyinaim tifutinam osoni, “Nogofeka amanaim sihinim kamba Kraiss.”

*Sisas osoni, “Kamba emba wahanam piskenam bwihiaf”*

*Matyu 16:21-28, Luk 9:22-27*

31 Sisas enag enaig esenam eso ehefena nihiyinaim enag sisifunugena, “Kamba Enag El God Ningihiana Of Wanai. Emba kamba tawetik nalog wafaf. Enag el Ainiyag, mungwal pris eseli Godna lalanai afa anuana el Godna mo fig enag, enag emba wa el enag kam mas fatinim afa kam tigegef. Sambaga mungo osuwo mayi kaimba eso ka wa piskenam bwihiaf.”

32 Sisas ena mom enag numwehe sihinugena. Enag Pita Sisasim wanikinam nunumuafana.

33 Sisas wahigifenam ehefena nihiyinaim enag nangwagihienam, Pitam nunumuafana, “Satan, kana masigim yika. Godna olningugugumba mas na olningugigmo. Awai! Nemba elni olningugugum mungo olningig!”

\* **8:29:** Wunehramba “Kraiss” enag enaig eseg” elim kwaganegim God nangum wan bogum.” Enamba enaig eseg autinam God ehim gishu fwahiana emba wa ningihiaimba pembonam ohuna betewa enaig gafungafef, Pita enaig orningena-genam, enag wunehramba “Kraissim” sefina.

<sup>34</sup> Enag Sisas mungwal elksam enam wunoni, mungwal eh efena nihiyinai gamba nohologum, enag osoni, “Aman olningenam kam pahlug ombofimba, emba so ma eh efena olningugugum wahianam, yuwanamwo kam olningenag ena mayi feimba kam membeneg ma sisiyigam fukonam, so ma afa kaga tigege enag fai kamble osohwi fag enaig, mafanam so ma kam pahlumboi. Enag aga kaga tigege mba enaig eseg amang amang kinig elim enam pugunaf. Mingnag mba kinig fafef, mingnagwo fa pigif. Afa aman kam pahlug ombofimba eso ma ohunaig olningugei, ‘Ahnaig kinig ka nangumboimba, emba mas ka Sisasim wahiai!’ Enaig eso ma esoi.

<sup>35</sup> Afa aman mingnagwo enaig olningugeimba, eh efum ogum, ‘Ka kwisig Sisasim pahluguagim amang amang kinig eh efena aga kaga tigege na ka kwisig,’ aman enaig olningugeimba emba ena lofug enag wahaf eso eh efena sungwagwo tawetik nalig faf. Godna nihiyi wahagwa gwesena hegegwa agafuf. Mingnag elwo amangal enaig olningugeimba, kam olninginim, kana mo lahlagim sihinim, kana gafungag esel esig enam enag wahagmba.

<sup>36</sup> Aman ohuna betenai gawig enag mungwal wambugegmba, enag ena gawigmba kwegofome? Awai! Ohuna betenai gawigmba mas kwegofoi, elimba yusugmba!

<sup>37</sup> Aman amang faif ehim ehena sungwagim sulufagimba hegeg gweseg agagimba? Awai! Amang amang gawignamba mas sulufi.

<sup>38</sup> Ohunanam enag enagsa el auguiahmba Godum hwoyuafatifefig, enaig esigim, kwamblo i angwafig i ahnaig ahnaig amtakwaligim mungo pahlug ahua. Afa aman mungo enag amtakwalig elni olugyi gohogum enag kam enag ahwanifenagmba, afa kana mom gamba ahwanifegmba, emba hwaonam mayi Enag Elim God Ningihiana Of Wanai, mayi enag nalig enag ombofimba, ehengamba elim enam ahwanifenaf. Mayi El Enag Of Wanai nalig enag ombofimba mungwal si amba fekag lofug enaig wa pukof eh efena awagna ambafeka, mungwal wankeneg ensel Godna gafungag of wanai Enag El God Ningihiana Of Wanai enag enselim wan bof. Mayi enaig ombofimba ehengamba elim enam ahwanifenaf.”

## 9

<sup>1</sup> Sisas mingnag mo sihini, “Yinimihe ka nem osonug, mingnag el ohwi gofo enamba mas pigi, emba auguianam nanguf God puguagum eh efena tifutukni afalig fegim enam.”

*Sisasna elig enag wahigifenam nemona fena*

*Matyu 17:1-13, Luk 9:28-36*

<sup>2</sup> Enag ena mayi kanamba afa fasagafinim enuwesowa gohok siyi mayi kanamba eso Sisas Pita, Jems, Jonnum sulu-funam fukuka wankana aikieg kwiegam. Ehel mungo ahunam gofwehenam eso enag nangwagofofenamba Sisasna elig enag wahigifenam nemona fena

<sup>3</sup> ehena lofug gamba enaig esena pukowagenam mungwal businam fatinam busug newugehe fena. Mas aman mungo ohuna betenai lofug enag gigiafegim busug enaig pugufehmo? Awai!

<sup>4</sup> Eso Sisasna nihiyinai sambaga munga enag nangwaginimba Elaijam i Mosesmi sambaga ningigi enag. Sisas ga mo sihiyagofofena.\*

<sup>5</sup> Pita enam nangunam enag Sisasim osona, “Anuana, nawo bigwo gohiyi auguiafum. Emba sa yuhwafei. Nawo sambaga mungo fofug lala nimbagem, mingwo neana, mingwo Mosesna, mingwo Elaijana.” Pita enaig osona.

<sup>6</sup> Ahnaig asegba? Sisasna nihiyinai enag enam embefini, Pitamba mas anuanafegmo, emba ahnaig mo osog?

<sup>7</sup> Leango penam elim enag yisienugena eso mo leango meanai pugunam, enaig osona, “Elimba kana leg, ka olug lahlafenag, ehena mo enag numwehenim higi!”

<sup>8</sup> Yikagnam eh efena nihiyinai nunofehiagini enag mas amanim nangunimo, Sisas mungo gofena.

<sup>9</sup> Enanam enag mugum wahiyinim apekugonam ahuafe-namba, Sisas tifutinam osoni eh efena nihiyinaim enag, “Nogofeka amanim sihinim esel na nangug enam enag. Enag El God Ningihiana Of Wanai enag mayi wahanam, piske bwihiaimba, emba sa na sihigonugi.”

<sup>10</sup> Eh efena nihiyiani enag ehena mom enam pahalug ahua fenamba, enaig esini eh efum mungo olugyi wa sahugehufena, “Amangwo wahagem bwihiaimba?”

<sup>11</sup> Eh efena nihiyinai Sisasim enaig sahinifini, “Ahnaig asegba el Godna mo anuana fig, enag enaig osogona, ‘Elaija mayi boimba, afa eso Kraiwo sum wambof.’ Anuana el enag enaig osogona. Ahnaig asegba, enagna osog?” Sisasna nihiyinai enag enaig sahinifini Sisasim.

<sup>12</sup> Sisas wahigifenam osoni, “Elimba yinimehe el mungo Elaija lofug yuwanamba pugunam wambof elni olugum enag numwehenugeimba God nangum ambogogum. Ahnaig, asegba? Autinam el enag Godna mom ginofinim enaig

\* **9:4:** Mosesmba autinai Godna mo fanam Israelim ogofunugena ok ma enaig paharuk ahufi. Elaija gamba gwenaik fena God na mom fanam elim sihinugekafena autinam.



osogona, 'Enag El Of Wanai God Ningihiaimba enag wa tawetik nalog faf, afa el kwisinim mas fatinif.' ” Sisas enaig sihifeni.

<sup>13</sup> Sisas Jon, buwa aitiag el, enam olningenam, enag enaig osoni, “Enag yawomba ka nem osonug, Elaija lofug eseli enag ati pugug, afa amang amangim mingnag eseli membini enag ena ati esini elim enam gwenai autinam profet eseli ginofini, ena yuhwa gwesif.”

*Sisas luwal fangonam mungo numwehenagena Satanna nihiyinai amtakwalig ehena nihiyi gofena enam*

*Matyu 17:14-21, Luk 9:37-43*

<sup>14</sup> Sisas sambaga mungom ehafena nihiyinaim enam wankanam wan pugunam nangwagnamba ehafena nihiyinai mingnag eseli ehelni nihiyi elksa wahegagena augiafena. Enag el enag elwo anuana el Godna mom fig el Sisasna nihiyinai ga fuflafegegofofena.

<sup>15</sup> Enag mungwal el enag nangunimba Sisas bwafena enag kukugiafakafinim eso osogona, “Sisamba atiombo.” Enag eso el enag gwesim kikigni ahunam Sisas nangum, eso enaig osogona, “Atiaho nambok?”

<sup>16</sup> Sisas ehafena nihiyinaim enam sahini, “Amang mo enag el gimba na fuflafegegofona?”

<sup>17</sup> Enag mungo el elksa eseli ena mewa gofena, enag Sisasim osona, “Anuana, kana luwal fangonam Satanna nihiyinai amtakwalig ehena nihiyi go mengig kapinifegim, mo wagi hwanig, enag ka ne nangum ombug.

<sup>18</sup> Enaig esefugum amansiniwo tifutifugum kikehalafugum kiafigigninifugum betewa fatia, memp meng megam puguafug, afa goimo nunuwafug, elig enag lilhifefugum fatia, ena ka neana nihiyinaim sahinig enam enag hugufatini, enag ahnaig asihmo?”

<sup>19</sup> Sisas enaig sihifeni, “Negel, Israel, mas na olningigmo Godmba emba nem kwaganif, negelmbi nimbehe kwisig God nangum ambogogumba, sahinigim, pahalu ahuagimba. Ahanansiyigim ka nem wanagafuf? Ahanansiyigim ka negelni kinig fanif? Luwalim enam ka nangum ombugo.”

<sup>20</sup> Eso luwal fangonam enam Sisas nangum ombugona. Satanna nihiyinai amtakwalig enag Sisasim nangonam, eso yikagnamehe luwalim enag fuluwali fatinamba luwal enag penam betewa wafuakihla fekafenamba memb busug meng megam pugunam wahegagena.

<sup>21</sup> Sisas luwalna awagim enam sahana, “Ahananam enaigmba puguna?” Awag enag osona, “Yuwanam, wesi-gyiehe esena.

<sup>22</sup> Autinai gwenaiḡ ehe eḡefuḡufena, enaḡ Satanna nihiyinaḡ amtakwalig enaḡ suwiwa buwa gamba fa taiku feḡuku, enaḡ eḡefuku, oḡum, ‘Nawo tigenam ma wahai!’ Enaḡ ka nem tifutigim sahanagim, na yuhwafegmba, sa na kam afafenim kam kwagani!” Luwalna awaḡ enaḡ Sisasiḡ enaḡ sahanafena.

<sup>23</sup> Sisas enaḡ osona, “Hei, nembehe na enaḡ olninge-nagmba, God ehe yinewuḡ feḡ amang amang enaḡ God ona, ‘Emba kesef’ enaḡ Godmba yinimehe wa eḡef. Aman Godum enam olninge-nagmba Godmba emba wa yuhwafef, enamba God wa kwegofuf. Amang amang kifutuk naligmbi God mungo ehe wa eḡef.”

<sup>24</sup> Yikagnam luwalna awaḡ enaḡ osona, “Enaḡmba ati ka olningim, afa kana olningimba tumek. Kam kwegofu! Mas ka mungwal olninguḡuḡum yuhwa feḡmo!”

<sup>25</sup> Sisas nangwagenamba elksa yikagna muhwa nuwagenaḡ wahegagena, enaḡ fenamba enaḡ, Sisas Satanna nihiyinaḡ amtakwaligim enam nunumuafana, “Nemle Satanna nihiyinaḡ mengig nihifenag angugum nihiliag, ka nem osonag, luwalna nihiyinaḡ enaḡ puḡumbo! Nofeika piḡske ka sahom!”

<sup>26</sup> Satanna nihiyinaḡ amtakwalig naḡ hlehlefukonam, luwalim enaḡ fuluwalifatinam, ehena nihiyinaḡ enaḡ puḡumbona. Luwal fangonam enaḡ nangunimba lihifefatinam wahag loḡuḡ enaḡ fena. Mungwal el eseli enaḡ enaḡ osogona, “Ati wahag!”

<sup>27</sup> Enaḡ Sisas enaḡ esena, luwalim ningagana kikehalanam ḡifiohlunamba, eso sukli bwihiaḡofena.

<sup>28</sup> Eso Sisas lalagam sahowankana eheḡena nihiyinaḡ mungo, enaḡ eheḡena nihiyinaḡ enaḡ mungwal saḡini, “Ahnaḡ aseḡmba enaḡ kaḡelmbi Satanna nihiyinaḡ amtakwalig enaḡ ahnaḡ huḡufati feḡonuhmo?”

<sup>29</sup> Enaḡ Sisas osoni, “Amangmba mas enaḡ amtakwaligimba huḡufatini? Awai! Godum sahanag mungwamba sa huḡufaiti!”

*Sisas piḡkenam osoni, “Kamba wahanam piḡkenam bwihiaḡ”*

*Matyu 17:22-23, Luk 9:43-45*

<sup>30</sup> Sisas eheḡena nihiyinaḡ wankana enaḡ kimbigimwo wahiyinaḡ ahunam oluḡyi Galili provinḡwa apeḡuḡona wanpuḡuna. Sisas onanawo eheḡena nihiyinaḡ ahnaḡ ahnaḡ mom sisifunugem, enaḡ fenamba enaḡ ona, masa bigim mingnaḡ el enaḡ anuwanafegonuf enanayi ka yikagim wanaga enam.

<sup>31</sup> Sisas ehefena nihiyinaim osoni, “Enag El Of Wanai God Ningihiana esel enam mingnag el wa kikehelinim tigekegim elim enam wa faigof. Emba wa el enag tigekekimbi wahanam. Afa sambaga mungo si mayi ahuimba eso wa piskenam bwihiaf.”

<sup>32</sup> Ehefena nihiyinai enag mas ena mom enag olninginimo, enag embefini Sisasim sahinigim.

*Aman Ainiyagmba fef  
Matyu 18:1-5, Luk 9:46-48*

<sup>33</sup> Enag ahunam Kaperneam kimbigwa apekugoenam, lalagam saigonam, eso Sisas ehefena nihiyinaim sahini, “Amang mom minawamba na fuflafege ambogofena?”

<sup>34</sup> Ehefum fuflafege ambogofena, aman Ainiyagmba fef, enaig fenamba enag ehefena nihiyinai enag mas Sisasim osuinimo.

<sup>35</sup> Sisas agafenamba, ehefena nihiyinaim enam wunoni. Mayi ambogonamba, enag osoni, “Aman oi, ‘Kawo Ainiyag fem,’ emba eso ma mungwal elim kukwaganig el fei, enag enaig gafunag elmbi emba sa Ainiyagmba fei.” Sisas enaig sihifeni.

<sup>36</sup> Enag enaig esena, luwal wesigim kikehlanam ombunam olugyi ehefena nihiyinaim elni muhuwa wasonam, eso luwalim enam ehefena nihiniyi fa sambagahla fefanam eso ehefena nihiyinaim enag osoni,

<sup>37</sup> “Aman kam pahlukuagmba afa enag luwal ohunaigimba wunonim kwaganimba, elimba kamehe lahlafezag. Aman kam lahlafezagmba elimba amang kam mungo lahlafezagmo, elimba aman esel kam ningihianamba ka bok, enam gamba lahlafezag.” Sisas enaig osoni.

*Aman bigelim waginig hwanigmba, elimba bigelni hiheg  
Luk 9:49-50*

<sup>38</sup> Jon Sisasim sihina, “Anuana, ka nangugmbi el mungo Sattana nihiyinai amtakwaligim neana tifutukni ningitigifeka, enag ehmba mas big mungwalyi gowahnefimo. Enaig fenamba enag elim enam ka kwenig.”

<sup>39</sup> Sisas osoni, “Negel nogafeika kwenim. Aman tifutuk gafungag kana tifutukni fegmba, emba mas kam yikagna ahnaig ahnaig amtakwaligim kam osoni.

<sup>40</sup> Aman bigelim waginig hwanigmba elimba bigelni hiheg.

<sup>41</sup> Yinimehe ka nem osonug. Amangal nem enaig olningugonimbi. ‘Elmbi elimba Kraisim pahalukahua, enag enam ka kwaganim,’ enag enaig nem olningugonimbi afa nem buga faiyimbi, emba elim enam ka lahlafehiagef.”

*Elni olningugugum enag amangwo amtakwalesungofef  
Matyu 18:6-9, Luk 17:1-2*

<sup>42</sup> Sisas ming mo sihini, “Luwal wesig mungo osohwi ohunaig kam ati olningenagmba, emba luwalim enam aman wahigifenam okuf, aman enaigmba osofefimba enaigmba sa yuhwafeite amangal hun nalg ma finim enag elni wun- ingliyi kikinim eso ma bu nofugwa fati eso ma pekanam wahai.

<sup>43</sup> Enaig neana ningagag enag esenam, kam olningenagim pahalukuagimba, mayi amtakwalmba fefeimba, eso hege- fati. Enaig esei mungwa ningaganamba, emba sa na Godna muhwa hegeg agag enag fanam agafi. Masa na wa ningagag sambagana fenam afa na wa amtakwaligam kaf suwi mas fuhului esim wa.

<sup>44</sup> Ena kukwamba elni ahnaig ahnaig tawetik enag gwese- nam gofuf, ena kukwamba suwi enag mas fuhului.

<sup>45</sup> Enaig neana mongug enag esenam, kam olningenagim pahlukuagimba, mayi amtakwalmba fefeimba, eso hegefati. Enaig esei mungwa mongugnimba, emba sa na Godna muhwa hegeg agag enag enaig esenam fanam agafi. Masa na wa mongug sambagana fenam afa na wa amtakwaligam wa kaf suwi mas fuhului esim wa.

<sup>46</sup> Ena kukwamba elni ahnaig ahnaig tawetik enag gwese- nam gofuf ena kukwamba enag suwi enag mas fuhului.

<sup>47</sup> Enaig neana nofug enag esenam, kam olningenagim pahalukuagimba, mayi amtakwalmba fefeimba, eso nofug enag mingaganai nofugwo fusufati. Enaig esei mungwa nofnamba, emba sa na Godna muhwa hegeg agag enag enaig esenam fanam gofi. Masa na wa nofug sambagana fenam afa na wa amtakwaligam wa kaf suwi mas fuhului esim wa.

<sup>48</sup> Ena kukwamba elni ahnaig ahnaig tawetik gwesenam gofuf ena kukwamba ena suwi emba mas fuhului.

<sup>49</sup> “Suwi enag eso wa mungwal el ningum bonuf. Suwi enag enaig eseg sol lofugmba.†

<sup>50</sup> “Solmba lahlagehe, enag sol embeg enag awaiemba, eso aman piskena enaig embeg enag esehmo? Solmba enaig eseg sisim numwehiageg. Negel gimba enaig esi, sol lofugmba nimbefena olugyi numwehiagimbi enag elim olyi lahlafehiagi, emba sa na auguiafi.”

---

† 9:49: Autinam Israel el enag enaig esifini. Sis tigifinim Godum faiyifini solna sisiagifinim. Sol enag sisim numwehiagegmba enag God enam lahlafenak. Enag nihigim God mas nenamo afa el enaig Godum faryina. Enag suwiemba enaig eseg ahnaig ahnaig kinig el ningum boimba enag kinig suwi rofukmba enag elim numwehianugei, enag el enag Godna nofwa lahlafek.

## 10

*Sisas osoni angwafigim ningitigimba mas yuhwafegmo  
Matyu 19:1-12, Luk 16:18*

<sup>1</sup> Sisas egam wahianam yikana provins Judiagam yikana gwesim bu Jordangam eso bu enag minggam yikana. Elksa ambogona nuwagena Sisasna nihiyi. Enag Sisas, ehe eso esekafena, enaig esena, Godna mom sisifunugena.

<sup>2</sup> Mingnag Farisi el ambogona, ona, “Nawo Sisasim gi-hinim.” El enag enaig sahinifini, “Enaig aman angwafigim ningihiagmba, elimba yuhwahofeg? Autinam God Mosesim mo faina, enamba?”

<sup>3</sup> Sisas pisenam sahini, “Ahnaig mo Mosesmba nem faini yuwanamba?”

<sup>4</sup> Farisi enag wahigifinim Sisasim osoni, “Mosesmba kagelni ufuamba, enaig osoni, ‘Aman angwafigmbi oningihi-afimba, eso ma enaig ginofenam fainam, ka nem ningihiag, eso ma ningihiai,’ Moses enaig osoni.”

<sup>5</sup> Sisas pisenam sihini, “Negelni ufuamba olug liputig yafuflag el, enaig fenamba enag Moses ena mom negelni ufum faini, yawo gamba negel gimba enaig esig.

<sup>6</sup> Yuwana newogmba God mungwal gawig enag gafungafe genam, afa kwambolomi angwafigmi God gafungafewog-ona.

<sup>7</sup> Enaig fenamba kwambolo enag eso ma awagafagim wahianam eso angwafig i mungo olug ahfanam, eso ahagam-bahlagofi.

<sup>8</sup> Yawamba enaig eseg, ohunanam enag sambaga mas ahagahmo, yawamba ati mungo feg.

<sup>9</sup> Amang ese God numusuhulug enag ena nofeika wo kougum.”

<sup>10</sup> Pisenam lalagam ahunam saigonam eso ehefena nihiy-inai enag Sisasim enam enag sahini.

<sup>11</sup> Sisas osoni. “Enag aman mungo ehefena angwafigim ningihianam afa mingim fagmba, elimba enaig eseg, ehefena angwagim enag amtakwalefagim, afa angwafig wambungum amtakwalesungofeg.

<sup>12</sup> Afa enaig angwafig ehefena ligagim wahiagem, ming awag wa kagmba, ehengamba gwenaig eseg, afa awagwa-gagim enam amtakwalesungofeg.” Sisas ehefena nihiyinaim enaig sihifeni.

*Sisas Godum sahana luwalim lahlafenugegim  
Matyu 19:13-15, Luk 18:15-17*

<sup>13</sup> Enag el mingnag luwal hutiatanigim Sisas nangum wan ambogona. El enag sawiyifini Sisasim ogum, “Ma luwalim

enag ningagana tutohilihiagei.” Enag eh efena nihiyinai enag elim enag nunumuhiagini.

<sup>14</sup> Sisas eh efena nihiyinaim enag nangwagenam, enag nunumuhiagena. Sisas osoni, “Negel nogofeika kwegonum! Hwahiyi! Luwal ma ka nangum ambogoi, Godmba luwal ohunaik lofugumba sa wanagafi.

<sup>15</sup> Elmbi enaig esimbi God ehim enam ma afalig feni. Luwalmba eh efena awagim numwehe olningenif, awagna mom fa higif. Mungwal el enag enaig ma Godum esini. Yinim newugehe ka nem osonug, aman el luwal lofug enaig esei hwanigmba, elimba ahnaig asenam, God afalig elim wanagagim esel esim enag ahnaig sahokahmo! Awai newog!”

<sup>16</sup> Enag Sisas luwal mungogum ningagana tutohilihiagenam, Godum sahanam luwalim lahlafenugena.

*El gawig numbiyinai*

*Matyu 19:16-30, Luk 18:18-30*

<sup>17</sup> Sisas bwihianam yikafenamba, el mungo kikigni bona Sisas nangum, mogukug kwakwagenam Sisasim sahana, “Nemba anuana lahlag, ahnaig kasenam eso ka hegegmba gwesenam gofuf?”

<sup>18</sup> Sisas sihina, “Amang fegim na kam lahlag moaogonag? God mungwehe lahlagmba, mingmba aman fe hwanig? Awai!

<sup>19</sup> Autinam God Mosesim mo faina, ogufunugum lahlafehugum amang amang mo enag. Ati na ena mom enag anuanafeg. Mingnag momba enaig feg, ‘Nofeika anim tige kam. Nofeika angwafig wambungum amtakwalesungofem. Nofeika okwefem. Nofeika mingnag elim moakwelenim. Nofeika waskwesenam ahnaig ahnaig esenam wambum. Awagafagna mom higigonufi.’ Enaig mo God Mosesim faina.” Ena mom enag Sisas elim sihina.

<sup>20</sup> El enag Sisasim sihina. “Yuwanam ka luwal fefenamba ena mom enag ka pahalukuna, afa bogum yawangamba ka gwesehe feka.”

<sup>21</sup> Sisas nangonam elim enam olug lahlafe na, enag Sisas osona, “Nemba mungom ehe na tumek. Yikanam nimbefena mungwal gawig enag ningitigife, el ma wambwi, enanam mani enag wambnam eso amangal esel wohof, lofug, amang amang enam enaig hwanig feg, enaig elim, mumankeni. Enaig na eseimba emba sa na ofwa yika pugunam enagsa gawig lahlag na wambwi. Gawigim enaig esenam, eso, bonam kam pahalumbwi.” Sisas enaig sihifena.

<sup>22</sup> Enag el enag ena mom higinam nohmbosug wahigifenam afafenam nemonafena afa olug kinig fenam ena kana.

Ahnaig asegmba? Enag el enag gawig numbiyinai fena, enag esena.\*

<sup>23</sup> Sisas eh efena nihiyinaim enag fahegenugenam, enaig sihifeni, “El gawig numbiyinaimba ahnaig ahu saigoahmo God wanagag esel esimba.”

<sup>24</sup> Ehefena nihiyinai ena mom higinim enag olug wahegesainam enaig sihiagahufena, Sisas eh efena nihiyinaim ming mo sihini, “Kana luwal, aman God wanagagamba esimba sawagimba, enag ahnaig sahokafef?”

<sup>25</sup> Kamelmba sis nalg bulmakau nalg lofug, enag yikagim nel nasig megam enag ahnaig sahokafehmo? Awai! Afa aman el gawig numbiyinai gamba gwenaig eseg. God wanagagamba ahnaig sahokafehmo?” Sisas enawasim enaig sihifeni.

<sup>26</sup> Ehefena nihiyinai enag olug wahegasainam eh efum sihiagini, “Enaig esegmba aman hegeg gohogmba fanam gwesenam gofuf?”

<sup>27</sup> Sisas, nofna nangwagofenamba, enag osoni, “Elmbi ahnaig asihmo? Awai! God mungwamba sa elim enag numwehenugenam eso ahunam saigo. Amang amang God esegim esel, enag emba wa yuhwa gweyi esef.” Sisas enaig sihifeni.

<sup>28</sup> Pita Sisasim osona, “Higi, kagelmbi mungwal gawig enag ati ka hwatigim, enag ka nem pahalug ahua.”

<sup>29</sup> Sisas osona, “Yinim newug ehe, ka nem osonug, aman kam olningenam, eso yikanam Godna mom lahlag sihiagekafi, afa eh efena lalam wahiyai, etegim, suminigim, muluwali hwati, awagafagim hwati, luwal, asom hwati

<sup>30</sup> aman enaig hwatiegmba emba sa enagsa 100 wambwi, ohuna betenai etiniagsa 100 lala, nilite, muluwali, afag, luwal, aso afa emba wa kinig gimba wambof. Enengim ohuna betem wahanam, eso hegeg gohogum enam fanam eso gwese gofi.

<sup>31</sup> Afa enagsa el esel yawo ohunanam gosugmbi enamba enengimba wa sum fesaif. Afa enagsa el yawo ohunanam sum fesaig enag ehe enengimba wa gosuf.”

*Sisas osona sambaga mungogum, “Emba ka wahanam, piskanam bwihiaf”*

*Matyu 20:17-19, Luk 18:31-34*

<sup>32</sup> Ena minam ahuafenamba Jerusalemgam Sisas gosna. Sisasna nihiyiani enag olnigninim oluwahegasaina ogogum, “Ahnaig Sisasimba pugunaf?” Mingnag el gimba Sisasim pahalug ahuafena. Enag ehel gamba embefini. Sisas

\* **10:22:** El gawik numbiyinaimba eh efena gawikim mungo orning kafena, afa Godumwo oru etetinag enag Godna wanagagwamba ahnaig sahokafehmo?

ehefena nihiyinaim 12 fena enam mungo sulufunam. Enaig sihinugena amang ehim wa pugunaf.

<sup>33</sup> Sisas osoni, “Higi, yawomba Jerusalem gam big fukwalgogum ahufe. Enag El God Ningihiana Of Wanai, elim enamo a el mungo pris elmi anuana elmi wa faiyif. Ena pris i anuana el i sihiaginim mungwa mo finim afa so enaig osogof, ‘Eso ma tige kinim ma wahai!’ Mingnag elim wa faigof elimba Israel wanai el mo.

<sup>34</sup> El enag enaig esinif, kiapase finim, ahnaig ahnaig esefif, memp fuginif, wena tiginim, afa tige kif. Enaig esef, sambaga mungo siyi osuwu i, mayi yikaimba, eso enagel piskanam bwihiaf.” Sisas enam sihinugena.

*Jems i Jon i ona, “Nawo Ainiyag ahfem”*

*Matyu 20:20-28*

<sup>35</sup> Jems i Jon i, Sebedini le ningigig, sambaga ningigi enag Sisas nangum ahmbonam ahsahana, “Anuana kohogum kawo nem amang mungom ahsahanam enam enag kam eseni.”

<sup>36</sup> Sisas sahini, “Amangim na sawie ahfeg nohogum, ‘Kam eseni?’”

<sup>37</sup> Enag sambaga ningigi enag ahsihina, “Enagimwo wangenegenam enag namba afalig fegmba nimbefena elim enag na wanagafuf, enag ka enaig sawie ahfeg, kohogum kawo amanwo neana nihigam agai amanwo neana saha gam agai.” Enaig sahnahfena.

<sup>38</sup> Enag Sisas osoni, “Neningigi enag mas anuana ahfegmo amangim esel na ahsahig enamba. Na yuhwa ahfeime? Kinig nalig esel, kamble fagim. Feg enaigmba na yuhwa ahfaime? Blufle nalig lofug enaig bogum nem yisiyi fa kaugoimba. Kamble fagim esel enaigmba. Enaigmba na yuhwa ahfaime!” Sisas enaig sahinigena.

<sup>39</sup> Sambaga ningiginenag osohona, “Emba ka yuhwa ahfef.”

Sisas sambaga ningigim enam sihini, “Yiniho, enag kinigmbi emba na wa ahfafwa, afa mingnag kinig nalig blufle lofug enaig ne wa yisiaogof.

<sup>40</sup> Afa enag aman saha gam agafim nihigim agagim enag, kamba mas gishu fwahiai, elimba God mungwamba sa enaigmba gishu fwahiai. Autinam God ehe elim enag ati gisfugum hwatigig enanayi ahagagimba.

<sup>41</sup> Mingnag Sisasna nihiyinai enag 10 enam, enag enam higinim enag Jemsmi Jonmi wagugoni.

<sup>42</sup> Enag Sisas wunoni, “Ambogonam kana nihiyi nuwag,” enag osoni, “Nolningig mingnag elni nangwag gohogmba,



ehfamba enaig esehu, ehefena nihiyinaim tifutigim nangwagihagewo. Amang amanagim enam og, 'Kam mayi osoimba, eso kam kwegfwi.' Enam og enag ehena mom enag mungwal pahlug ahuafeana. El enag ehena gafungag figim, afa mungwal pahalug ahug.

<sup>43</sup> Enaig el esel esig, afa negelmbi nogofeka pahago ahum enaigim enag. Negeliyinai aman enaig oliegmba, 'Kawo nangwagohog el fim,' aman enaig oliegmba, emba eso ma gafungag luwal fei, afa mungwal elim kwaganyegim yuhwafei.

<sup>44</sup> Aman oimba, kawo sisigam Ainiyag fem, emba eso ma gafungag luwal fei, mungwal el esel enagna singagfeni, mungwal elim enag kukwaganig fei.

<sup>45</sup> Ahnaig asegmba, enag ka osog? Enag El God Ningihiana Of Wanai ehe gamba enaimba ohuna betegam bogum ehena gafungag mas figmo el ehim mas kwegofugmo. Awai! Ehe bogum elim gafungafegim kwaganyegim. Ehe bogum elim wahanigim, afa elksam piskegim wambugum ahnaig ahnaig amtakwalig el esel esehufena enagnai!" Sisas enaig sihifena.

*Sisas nofselenam elim numwehenagena*

*Matyu 20:29-34, Luk 18:35-43*

<sup>46</sup> Ambogonam apekugonam Jerikowa, enengim Jerikomwo wahiyinim ahuna, Sisas ehefena nihiyinaim wankana, afa enagsa el, ena gamba mungwal ahuna. Bartimeus Timeusna leg, enag mina meigim agafena. Ehmba nofselena enag elim manim wunoniaofena.

<sup>47</sup> Enag higinam Sisas Nasaret wanai ombo, enag gweyi hognam amtakwal wuneona, "Sisas Devitni leg, nemble kam afafena."

<sup>48</sup> Elksa nunumufini, "Kawug kapinife." Afa enag el enag hognam amtakwal wune nalg fena, "Devitni leg, nemble kam afafena."

<sup>49</sup> Enag Sisas yikanam muhwa gohnam, eso Sisas osoni, "Wuni, ma boi!" Mingnag el elim nofselenam enam wunoni, "Olug lahlafenam! Bwihia! Sisas ati nem wunonag."

<sup>50</sup> Lofug foholanam agafena, enag lofug hugufatinam yikagna bwihianam, Sisas nangum yikana.

<sup>51</sup> Sisas enag elim enam sahana, "Amangim na sawiyifeg, nogum?" Nofselena el enag Sisasim osona, "Kogum kawo nunof fehiagem!"

<sup>52</sup> Sisas sihina, "Yisehe yika, ati na olningig emba God ne wa kwegofuf, enag nofug enag pisenam yuhwafena." Enag yikagnam nunofehiagenam, eso Sisasim minagam pahalukuna.

# 11

*Sisas afalig el lofug yikanam Jerusalem kimbiam sa-  
hokana*

*Matyu 21:1-11, Luk 19:28-40, Jon 12:12-19*

<sup>1</sup> Sisas elim wankanam Mug Olivyi wanpuguna. Mug Olivmbi kimbiam Betfage afa Betani mugwa gofena. Ena kimbiam sambaga enag Jerusalem kimbiam nalgim muhwa ahgifini. Sisas ehefena nihinam sambaga ningigim ningitiginam,

<sup>2</sup> eso enaig osoni, “Ne ningigi okwena kimbiam ahka muhwa esel gi esim. Ne ningigi ahkanam enag kimbiam ahsahon, eso yikagnamehe na wa ahnangof donki luwalig mungo el wena kikigim wahiyig. Ena donkiim mas aman mungo enanayi agagim okugmo. Donki enag pitigifanam ahombu.

<sup>3</sup> Mingnag elmbi mayi nem enaig sahigonigmbi ogoi, ‘Amang fegim enaigmba nesahofe?’ Eso piske enaig sihi-ahfeni, ‘Ainiyag ogum kawo enanayi gafungafenam, eso piskanam yikagna ningihiam.’” Sisas enaig sihifeni.

<sup>4</sup> Enag sambaga ningigi enag ahyikanam ahnangonamba donki luwaligim enam wena kikinim wahiyini ambagam minawa ahnangonamba lala mengig muhwa, enag sambaga ningigi enag we ahpiginam ahwanigina ahfana.

<sup>5</sup> Mingnag el muhwa gofwehiafena enag sambaga ningigim sahigoni, “Ne ningigi amang fegim enana donki luwaligmba elimba ahopitigifa?”

<sup>6</sup> Enag sambaga ningigi enag Sisas esel esona gwenaig sihiafena. Enag eso el nag wahiyini sambaga ningigim enam ogona ma donkiim enam ahpitigifenam ahokwi.

<sup>7</sup> Enag sambaga ningigi enag donki luwaligim enag Sisas nangum ahpitigifanam ahombuna. Sambaga ningigi enag lofug donkiim masigim ahnufohlanamba eso Sisaswo enanayi fukonam agafena.

<sup>8</sup> Elksa lofug munawa nufohla hwatini. Mingnag elwo asogam ahunam li kagag higfeginim wambuk ambogonam minawa sungwa hwatini.

<sup>9</sup> Afa mingnag elwo gofahuafena, mingnag elwo sum ambagwafena, enawo wunena ambogwafena; Godum lahlag moaogunim. God elim enag ningihianamba, ena bona. God eso ma elim enag lahlafenagei.

<sup>10</sup> Autinam kagelni ufu Devit, Afalig Israel elim wanagafena. Enaig lofug yawamba ati piskegim ombo, God enam eso ma lahlafenagei. Bigel enag nawo Godna wunehalam sisiyigam newug gufiyininim ofukwalgonam enam lahlag moaogonim.

Enag el enag enaig wunewat ofwafina.

11 Sisas yikanam Jerusalemoa pugunam Godna lala nalogim yikana sahonam mungwal ena lala mewa eyi fahegagena wahianam. Osuwu yikanam pefenamba, enaig fenamba enag ehefena nihiyinaim mungwal pasnam 12 enam, enam mungwal Betani kimbigam wankana.

*Sisas osona li fig (enag li hwatamof lofug) mas fugmba lei Matyu 21:18-19*

12 Siyini, Betaniim wahiyinim Jerusalemgam ahuafenamba Sisasim bini wahana.

13 Enag Sisas li figim nangonamba wahegwa gofenamba, figeyimewofena. Enag yikanam muhwa pugunam eso yisiagiagena, onam “Atiame fug lege?” Enag nangonamba figeg mungo wahegegena. Ahanaig asegmba? Enanamba fug legnamo?

14 Sisas lim enag osona, “Mas na fugmba lei enengim gamba! Awai newug!” Ehefena nihiyinai el enag enam higinini.

*Gawig wambuguk el Godna lala nalogim nimbag betewa sungogofofena enag Sisas elim enam ningitigifena Matyu 21:12-17, Luk 19:45-48, Jon 2:13-22*

15 El enag ahunam Jerusalemoa apekugonam. Eso Sisaswo yikanam Godna lala nalogim sahokana. Israel el enag enaig esifini, olyini kawo so mani afa twafig afa sis Godum faiyim. Mingnag el sisim twafigim Godna lala nalogim nimbag betewa wambuk ambogofenam sungu finim afa enanam mani wambugegofena. Sisas enag elim enam ningitigifena. Kukofenam fatina simewa eseli enag el mani sungufinim mani wahigififinim mumankegegofofena. Sisas sime enam kukofenam aitini mingnag elwo twafigim manina wambugegofofena, enag ehelini eyi auguiag (sia) enam Sisas kukofe aitinaim.

16 Enag kweni, “Nogofeka amang amang Godna lala nalogim osum wambusaigom.

17 Autinam enag God ehefena mom faini, ena mom el ginofini, enaig osoni, ‘Kana lalamba el eso ma enaig sefafi, Godum Sihinig Lala. Enag lalamba el mungwal esel gohnefe enag elni lala.’ Enaig autinam God osoni. Afa enag negel enag enaig esigim, enag yawamba enaig feg, okwef elni lala lofug!” Sisas elim enam enaig osoni.

18 Enginag ainiyag pris el afa anuana el enag ena mom higinim, enag. Eli enag enaig olningugini, “Ahnaig big asinim eso Sisasimba big tige kif?” Pris i anuana el i enag Sisasim embefini. Ahnaig asegmba? El mungwal enag Sisasna mom higinim, enag olug wahegesaina. 19 Si mayi

kigfiafenamba eso. Sisas ehefena nihiyinaim enag wahkana Jerusalemwo wahiyinim.

*Godum yininewug olningenam enaig sahanagmba, emba God wa faif*

*Matyu 21:20-22*

20 Sini leawa kwimbiyim ahunam li figim enam nango-nimba ati ehesafena, figeg ehesafenam mungwal puhwag nuhulugum ehesafena.

21 Pita piskenam olningugenam, enaig osona, “Anuana, nango, li fig enam nosona, ‘Mas na fug lei enengim gamba.’ Enaig fenamba enag ati ehesafegim wagag!”

22 Sisas wahigifenam elim enam osoni, “Negel gimba Godum olninginimbi Godmba emba yuhwa fef amang amangim enam.

23 Aman mungo sambaga olug hwanig, mungo olugnifenam, enaig olningugeimba Godmba emba wa yuhwafef. Enaig olningugeimba, emba amangimehe esel sahig enag emba wa pugunuf. Enag ohuna mugum enag osonaimba, ‘Nemba fgafu kanam wahegimeg bu solna gi enanayi yikanam pe.’ Enaig osoimba, emba wa esef.

24 Enaig fenamba enag yawo ka nem osonug, enag na Godumba sihinagim ahsahanafimba enaig olningenam, amangim eseli na ahsahini enag figim, enaig leseimbi, emba na wambuf.

25 “Enag mayi na gohonam Godum sihinagofimba, na enaigim olningimba, aman nem amang amang amtakwalig esenag, enam enag etetinam wahiai. Nogofeika mungwal ahnaig ahnaig amtakwalig enag mingnag el nem esegonum, nogofeika enam kikehelim! Eteti wahiyi! Esmba na fimbi, neana awag ofwa aga, enag nem ahnaig ahnaig amtakwalegim wambihigeni, mas piskenam enam enag olningi.

26 Enaig na mingnag elni ahnaig ahnaig amtakwalig na etetigim wahiai hwanigmba, emba God neana ahnaig ahnaig amtakwaligim mas eteti wahiai.” Sisas enaig osoni.

*El Sisasim sahini, “Aman nem osonag, ‘Ena gafungag ena fe,’ aman nem enaigimba osonag?”*

*Matyu 21:23-27, Luk 20:1-8*

27 Piskenam ahunam Jerusalemoa apekugonam. Enag Sisas Godna lala naligyi tempelyi sahonam langwagofena. El Enginag ainiyag pris el afa Ainiyag sisiyi fesaig el, enag el Sisasim nangum ambogona.

28 Enag Sisasim enaig sahinifini, “Aman nem osonag, ‘Ena gafungag ena fe,’ aman nem enaigimba osonag?”

29 Sisas mungwag sihini, “Amang mungom ka nem sahinim, na kam mungwag enam sihinigmbi, emba sa ka nem sihini aman esel kam osonag, ‘Ena gafungag ena fe enam,’ mungwal gafungag esel ka feg.

30 Aman Jonumba osona. Elim buwa aitiagimba? Ena mo enag ofwanai boname? Elyinai boname? Kam sihini.” Sisas enaig sahinigena.

31 Enag el ehefem sihiagegofofena, “Amangim big osogof? Big enaigmba osogoimba, ‘Ofwanai bok,’ emba Sisas bigim sahinif, ‘Ahaig asegmba enam mas na olug wahigifigim Jonna mom pahalug ahugmo?’

32 Afa enaigmba big osogoimba, ‘Elyinai bok,’ emba el bigim nunumuhiagif.” Ahaig asegmba? Enag el enag Godna lalanaim mingnag elim embefegoni. Mungwal el enag olningini Jonmba profet, Jonmba Godna mengig wanai mo fag el.

33 Ainiyag el enag enaig fenamba enag, Sisasim wahigifinim osoni, “Kagelmbi anuanamo.” Enaig fenamba enag Sisas osoni “Enag ka gamba mas ka nem sihini aman esel kam osonag, ‘Ena gafungag ena fe enam.’ ”

## 12

*Mo enawasim el amtakwalig wain lifug asowa fahegewogum*

*Matyu 21:33-46, Luk 20:9-19*

1 Sisas enawasim sihini enaig osona, “El mungo wain lifug aso fegim bwag aitag. Mime kunim hun tifutukni numwehiaginim enanayi wain fug aitinim mongni wainfug fapaugofigim enaig esigim bug puguagim. Enag sime lala kwina nimbanam el enanayi fahegegohogum ma sa wa okwefna el ambogonam wain fug wambuf. El enag mingnag elim wasanam enag asom fahegegofohogum, afa mingnag lifugwo ena gafungag wanai enam wambugum, afa mingnag lifugwo asoana awagim faifini. Asoana awag wahegam kafenamba.

2 Mayi lifug enag asonai enag ambiafenamba, eso asoana awag gafungag el mungom ningihiafena enag asogam, enaig sawiyifefenam ma mingnag wohof yika wambwi enag asonai.

3 Enag el asowa fahegeg gofohog enag enaig esifini. Elim enag nangufinim, mayi bwafenamba, sulufifinim tigifinim, yusug piskifinim ningihiyifini.

4 Asoana awag enag pisenam ming elim ningihiana, enam gamba mesowa topinim amtakwal tigifini, amtakwalefifi.

<sup>5</sup> Asoana awag ming elim ningihiafena, enam tige kifini. Enag enagsa el gafungafigim ningitigifena enag asogam. El enag enaig esinim, mingnag elimwo behtanigim kugwag aitifinimbi ahkitigiaogona, mingnag elimwo melni kugwag-sungofini.

<sup>6</sup> Enag mungo gofena, elimba ehafena leg mungo enam olug lahlafena. Awag enaig sihifeni, 'Elimba kana luwal, gafungag el enag kana luwalim anghiginim lahlafinif.' Enag sumiyim enag ehafena legim ningihiana.

<sup>7</sup> Enag el eseli enag asowa gafungafegofofena enag ehafum oligi sihiagahufena, 'Elimba asoana awagna leg, emba awag-imoa wahaimba mungwal gawig ena wa wambuf. Hegefi! Nawo tige kim, nawo tige kinim, eso ehena asom fim!'

<sup>8</sup> Enaig fenamba enag tige kinim eligimwo aso leng meigim finim fatini.

<sup>9</sup> "Enag wain asoana awagmba ahnaig asef? Emba bonam, el eseli asowa gafungafegofofena, enamba kugwag sungo fenam eso mingnag elimoa asowamba enamba faif.

<sup>10</sup> Mas na ginofum enag fahegagininimo God autinam osona, enamba?

'Mingnag el lala nimbim,  
gungwekigim mungom nangufinim kwisifini,  
Afa gungwe kik enag yawamba wofugukum pugug.

<sup>11</sup> Ainiyag enag enaig esegim pugug;  
enag ka nangugmbi lahlag newug feg.' " *Sam 118:22,23*  
Sisas enag ehafum ena wasim osoni.

<sup>12</sup> Ainiyag el enag enam higinim ati olningini Sisas enawasim ehelim osonug olningini "Kagelmbi amtakwalig enawasim enaig fenamba," enag el enag ogona, "Nawo Sisasim kikehilinim ogohum," afa enag embefini. Enagsa mingnag el esel Sisasim pahalug ahuafena, enag elim enag embefegoni, enag Ainiyag el enag Sisasim wahiyini ahuna.

*El Sisasim sahini, "Rom wanai elim takis faimbi, yuh-waime? Awaime?"*

*Matyu 22:15-22, Luk 20:20-26*

<sup>13</sup> Mingnag el Farisi elim afa Herotna nihiyinai elim enam nigitigini Sisas nangum.

<sup>14</sup> Ona, "Nawo Sisasim amang amangim sahinim. Ogona mayi Sisas amtakwal sihifeimba, neso sulufinim kotinim." El eso tatam aula fakahilinif, enaig lofug ogona, "Nawo eso Sisasim esinim." Israel el Rom wanai gavman elim takis mani faigim, enag nunumugonam kwisini. Enag Farisi el afa Herotna nihiyinai el enag ambogonam Sisasim sahini, "Anuana, ati ka olningig, namba yinim osfawof, namba mas embefini ahnaig ahnaig esel nem olninginim enam. Aman

esel Ainiyag feg enam enag nemba mas ahnaig mo faiyinam. Afa aman esel hofanam feg enamwo mas na ming mo faiyi. Awai! Nemba yinim fa sihif God esel membeg enam mungo. Enag nimbe kam sihin, Romoanai el elim nangwagawo, wunehalamba, Sisa, enamba ka manimba faiyime? Awaime? Enaigmba ka esimbi ka yuhwa feime? Awaime? Enag kawo mani enag faime? Awaime?” Sisasim enaig, sahinifini. Ainiyag el enag enaig olningugini, “Sisas mayi enaig sihifenimbi, takis mani Sisam fai, eso mungwal Israel el Sisasim nunumufif. Afa enaig mo sihinimbi, ‘Nogofeka takis mani Sisam faim,’ eso gavman el Sisasim waginif.”

<sup>15</sup> Sisas ati olningini enagel enag ogona, “Nawo Sisasim gihinim.” Enag Sisas wahigifenam, osoni, “Amang figim nogogum na kam gihinim? Mani busug kam ombugona, kawo nangom.”

<sup>16</sup> Enag el mani mungo ombugona, enag Sisas sahini, “Nohmbusugi wunehalag mba amana?” El enag osoni, “El Ainiyag esel Romoa nangwagawo, wunehalamba Sisa, enagna nohmbusug.”

<sup>17</sup> Enaig fenamba, enag Sisas osoni, “Amang Romoa nangwagohog elnimba, emba eso enam faiyi; afa amang Godnamba eso Godum faiyi.” El enag ena mom higinim olug wahegasaina.

*El Sisasim sahini, “Elim wahagim piske bwihagim?”*

*Matyu 22:23-33, Luk 20:27-40*

<sup>18</sup> Mingnag el Sadyusi el Sisas nangum ambogona. Sadyusi el enag enaig osogwafena, “Elimbi wahagim, mas piskenam bwihiai.” El enag ambogonam, Sisasim sahinim,

<sup>19</sup> “Anuana, Moses ena mom autinam ginofena, amanim luwal hwanig wahaimba, afa ehena angwag agafuf, emba so ehafena suminig enag ena angwafigim enag ma fafim. Luwal mayi feimba eso ena luwalwo eteg esel luwal hwanig wahag ehagna kukwa gohof.

<sup>20</sup> Autinam elengegwa gohona, enansini nilitena gofwehena enag eteg angwafig fanam, afa luwal hwanig wahana.

<sup>21</sup> Etegitim engeg enag angwafigim fanam, afa luwal hwanig wahana. Bwali enag fagim gwenag angwafigim fanam, afa ehe gamba luwal hwanig wahana.

<sup>22</sup> Afa figinyeg, afa, enuweso, afa elngeg ena suminimbugug enag finim enag angwafigim mungom enag luwal hwanig fesainam pigina, afa angwafigim gimba sumiyim wahana.

<sup>23</sup> Enag hwaonam, melig pigyeg ena wa bigiagafef, enag hwaonam enag angwafigimbi amana angwag fef? Ati na

olningig elengegwa gohona enag el enag angwafig mungom fini.” Sadyusi Sisasim enag enaig sahinifini.

24 Sisas osoni, “Negelmbi mas na anuana figmo Godna mom autinam el ginofini enam. Enag mas na anuana figmo Godna tifutukum gimba. Enaig fenambe, enag negel enag mwetetiagig, mas na yuhwa figmo?”

25 Enanam melig pigyeg piskenam bigiagofefimba, enanamaba mas angwafigmbi wambwi. Ensel, Godna gafungag wanai, ofwanai, angwafigmbi mas wambwi, enag enaig el gimba wa esif.

26 “Yawo enag nawo olningugim el wahagim piskegim bwihigim enam autinam Moses ena mom enag ginofena li suwila lagofenamba. God ena suwi mewa sahogohonam Mosesim sihinagena. Ena mo enag mas na fahegigmo? Abraham, Aisak, Jekop enam autinam pigig, enag God Mosesim enaig sihifena, ‘Kamba Abrahamna God, Aisakna God, Jekopna God.’ God Mosesim enaig mo sihina. Afa God ati olningina ehelni sungwagmba mahiyim augwia.

27 Godmba melig ese pigig enag elni Godmo. Awai! Elimba enag elni God ehe aman esel hegeg gohogum esel, enag elni God. Negelni moamba amtakwal newug feg!”

*Autinam God Mosesim mo faina, amang mo sisiyianza feg?*

*Matyu 22:34-40, Luk 10:25-28*

28 Anuana el mungo bona Sisas nangum, ena hegenamba mo fuflafegegofofena. Enag higinamba Sisas mo wahigifenam yuhwa sihini. Enaig fenamba, enag el Sisasim sahana, “Godna moamba ahanag sisiyianza feg?”

29 Sisas wahigifenam elim enag osona, “Mo sisiyi fegmba ohunag, ‘Negel Israel! Negel higi! Ainiyag God mungwehe mungo Ainiyag bigelni fenig.

30 Nimbefum! Ainiyag enag, nimbefena Godum enam ninewug olug lahlafena. Nimbefena olug, sungwag, tifutuk, enag mungwal Godum ma lahlafini.’

31 Enam engeg mom mba enaig eseg, ‘Nimbefum esel na lahlafenagmba, enaig eso mingnag elim gimba enaig olug lahlafenai aman esel neana muhwa aga enam.’ Ming mo mba mas ena mo sambagam enag flafatigmo.” Sisas anuana elim enag enaig osona.

32 Enag anuana el enag Sisasim sihina, “Anuana, namba yuhwaho osog. Elimba yuhwahofeg, esel nosog God mungwehe Ainiyag feg, ming Godmba mas fegmo, gweli mungwehe.

33 El ena Godum ma olulahlafini, olug, sungwag, tifutuk enag mungwal enag Godum ma olug lahlafini. Ehefum esel



lahlafenagmba enaig eso ma minbnag elim gimba esei aman ehena muhwa aga enam gamba ma olug lahlafeinai. Sis afa amang amang enagel Godum fa faiyif, enaig pahaluhahuagim afa amang amang Godum faiyigim enam flafatig.” Anuana el enag enaig sihi Sisasim fena.

<sup>34</sup> Sisas enam hegnam, enag olningig anuana el ati olningig ena mo lahlag nininewug sihig. Enag Sisas sihina, “Nembe gweli ati na bogum Godna muhwa puguagim ofe. God afalig esel enam wahegwa na gohmo.” Enag mungwal el esel enag embefinim Sisasim ming mom sahingim.

*Sisas elim sahini autinam God elim Gishu Fwahagim  
Matyu 22:41-46, Luk 20:41-44*

<sup>35</sup> Sisas Godna lala naligyi tempilwa gofenamba elim mo sihinugenam, enaig osoni, “Ahnaig asegmba enag anuana el enag enaig osogog. ‘enag Kraismim enam ogogum Devitni leg?’ Ahnaig asegmba enag enaigmba osogog?”

<sup>36</sup> Godna sungwag Devitim ogofunagenamba, enag Devit autinam enaig osona,

‘God Ainiyag enag kana Ainiyag sihina,  
Nembele kana nihigim ningagim agai.

Nihigim augwiagmba enaig eseg  
aman esel sisiyifeg enag fawof.

Enengimba amangal esel nem ona kawo amtakwalefim  
enag elim enag ka neana mong singag wasanif.’ *Sam 110:1*  
Devit Godna mo enaig osoni.

<sup>37</sup> “Devit ehehmba, ‘Ainiyag’ moaogona, enag Kraismba Devitni leg ena ming momba enaig eseg Devitim gamba Ainiyag fenag.” Sisas enaig osoni. Enag elksa sifakalni Sisasna mom higinim.

*Sisas sihini, “Anuana el amtakwalig ahuagim, enam negel gimba nunofifum”*

*Matyu 23:1-36, Luk 11:37-54, 20:45-47*

<sup>38</sup> Sisas mo ogfunugum enaig osoni, “Anuana el enag mingnag enaig esehu, enam negel gimba nunofifum anuana elim eseli enam. Anuana el enag enaig amtakwaligim membig, lofug kwieg aitiagigim, eso aisagafesai. Lofug kwiegmba autinam enag anuana el mungo aitikigwafena. El enag enaig olyifini ogona, ‘Eso el kam ma lahlafeponi.’ Enag eso ambogofenam ambagam nuwagifinam sahoafena kimbigwa gamba.

<sup>39</sup> Israelna nuwagig lalawa enag el enag kuk lahlagim mungo lahlafini ogonam, ‘Nawo ahufenam ambagwa elni nohmbosogam auguiafum. El ma bigim nangwagi.’ El enag

ogona, 'Nawo wohof nalig ahagagwa gamba ahufenam, kuk lahlagwa mungo auguiafum.'

<sup>40</sup> Mingnag angwafig esel ligambugugum, mayi pigiafenamba angwafig mungo mayi auguiafenamba, anuana el enag ahufena angwafigni lala enag wambugifini. El enag Godum enaig moakwalnifinim sahinifini kwina gwesim ogohu asagafena. Hwaonam, God fahegagofefimba enanam enag enaig el kinig tawetik nalig newugehe wa wambuf." Sisas enaig mo osoni.

*Angwafig esig Godum mani faina*

*Luk 21:1-4*

<sup>41</sup> Sisas mani keg muhwa agafena Godna lala naligyi. Enag elim nangwagawofena mani aitiagofofena enam. El mani numbiyinai el enag mani nalig aitini.

<sup>42</sup> Angwafig esig mani hwanig bonam mani ongug wesig sambaga fatiaogona.

<sup>43</sup> Sisas ehafena nihiyinaim wunoni, "Ambogo, yinewugehe ka nem osonug, angwafig esig esel mani hwanig fegim afa mani nalig fatig. Mingnag elim enam flafugum aitig.

<sup>44</sup> Enag el mungwal eseli enag mani numbni fesaig mingnag hofanam mungo wambuk ambogogum aitig. Afa angwafig esig enag esel, ehewo awai newug fena, mungwal mani gweliehe fatig, wohof gamba amangna wambuhmo?" Sisas enaig mo osoni.

## 13

*Sisas osoni, "Godna lala naligmbi emba el wa bumbuge sungo fji."*

*Matyu 24:1-2, Luk 21:5-6*

<sup>1</sup> Sisas Godna lala naligim enam wahianam puguna yikana, ehafena nihiyinai mungo Sisasim sihina, "Anuana, nango, hun lahlag naligni Godna lala nimbini, afa lala enag nalig lahlag newug ehe!"

<sup>2</sup> Sisas wahigifena enaig osona, "Ena lala naligim enag atiaho na nangog? Emba hun mungo mas mung hun sisiyi gifi. Awai! Emba wa mungwal tutosungofinim tatugof."

*Sisas osoni, "Enagsa kinigmbi emba wa puguf."*

*Matyu 24:3-14, Luk 21:7-19*

<sup>3</sup> Sisas Mug Olifyi agafenamba nanguwufena Godna lala naligim. Pita, Jems, Jon, Andru, enag el mungo Sisas nangum ambogona,

<sup>4</sup> sahini, “Yawo eso na sihig, enamba amansi puguf? Amang ahanaigwo mayi puguimba, eso enam ka nangum so olningim enamba ati muhwa puguagimofe?”

<sup>5</sup> Sisas osoni, “Negel numwehinim nunofifum aman mungo wa nem moakwalenim wankaf.

<sup>6</sup> Elksa emba wa ambogonam kana wunehalam sefinim, enaig osogof, Kikehe Kraiss, God, kam ninghiyiana. Enaigwa osogonam, eso wa enaig wa esif. Elksam mwakwalegonim wanahuf.

<sup>7</sup> “Enaig enengim na hegimbi fak ahagfi afa fakmo bonam puguafi wahegwanai, enamba emba wa puguf, mungwal bete i, of i awaiegimba emba wa mahiyi fefuf. Enam na higinim negel nogofeika oluwahigesaim.

<sup>8</sup> Ming betenai elwo ming betenaim fegonfuf, ming king ehafena nihiyinaim pasifenam mingnag king wan go enam fegonfuf. Minggamwo kugwa puguafuf, minggamwo bini nalig puguafuf. Enamba enaig tawetik angwafig luwal muhwa fukuagim eso esfafef enaig wa puguf.

<sup>9</sup> “Negel enag numwehenim nunofifum. Emba wa el nem wanahuf kaunsulna nihigim nahunam enam sihiagigim. Emba wa negelim nuwagig lalawa enanayi kugwag aitifif. Negel kam pahalug ahuafimba gwena mungwehe nem, wan ahunam gavman, kingni nohmboosugwa wan apekugonam wagonuf, eso negel enag Godna mo wankeneg mo sihigoni.

<sup>10</sup> Mungwal el mungwal betewa mungwal esel enanayi Godna mo wangenag enag mayi kaimba eso bite i ofmba enamba awaief.

<sup>11</sup> Enengim mayi el nem wanahufefimba kotimegonugum, nogofei, ‘Ka olug wahigegim, ahnaig big osogof?’ Awai! Mungwal mo God ne faimbi, eso na sihif. Ena mo enag nim-befningalni moamomba! Awai! Emba Godna Sungwagna mo.

<sup>12</sup> Mingnag elwo ehafena niliteninga elim faigof, ogofei, ‘Ma tigekei.’ Mingnag el humoanwo luwalim elim faigof, ‘Ma tigekei.’ Luwal gamba wa awagafagim wagugonim elim faigof, ‘Ma kugwag sungofi.

<sup>13</sup> Afa negel enag kam pahalug ahuafimba enag mungwal el eseli enag nem olug kakagegonuf. Amangal tifutinim kam gwesinim pahalug ambogofefimba emba ahuanam mayi bite i of i awaiofefimba, enag God wa elim enag kwaganam wan bonam, eso hegeg gwesenam wan agafuf.” Sisas enaig sihifeni

*Amang amtakwalig newugehe wa puguf  
Matyu 24:15-28, Luk 21:20-24*

14 “Enag enag el amtakwalig newug enagwa amang amtakwalig gafungafinim ena wo ombugunam osaigonam washuf, Godna lala naligyi. God newugum esel amang sisim, twafigim el fa faiyif ena kukwa el amtakwalig enag moakwalig Godum ombugonam ena fohluf. Aman ena mo enag fagehagmba eso ma numwehenam olningugei. Autinam God ena mo profet el Danielim sihina, enag ena mo Daniel ginofena. Enanam enag amangal Judiawa oguwa enag, so ma mugam yikagna fukwalgonam ahwi.

15 Aman lala sime mugyi gofimba, nofeka lala megam sahonam amang amang gawig ena fam.

16 Aman asowa gohogmba, nofeka lalagam yikanam lofugnga enaig fam.

17 Enag angwafig afnialigni gamba, elsimbam, angwafig luwal hwutiatanig mahiyim tut yuwig ahufena enag gamba elsimbam.

18 Negel enag Godum sahini amang enag eso masa ninegnam enana puguf!

19 Yuwana newug God mungwal gawig esegenam enanayi kinig puguna, enag enanam pugugum bogum yawo ohunanayi feg mingnag kinig mungog gamba ati yawo enag feg, enag enengimba nalig kinig newug ehe wa puguf autinai kinigim wa flafatif. Afa hwaonamba enaig kinig enawa mas piskenam pugwi.

20 Autinam newug God eso gishu fwahiana enanam enag amtakwalignam tumefatiagim, afa kwina kafimba mungwal el enawa awaiete. Enag asegmba God olningini mingnag elim esel autinam gisfuna hwatina ehe nangum ambogogum enaig fenamba.

21 “Enanam enag aman mungo wa nem osonuf, ‘Nangu! Kraisba esel go! Nangu! Egam ese go!’ Ena mom enag nogofei ka olningim!

22 Afa mingnag elwo wa enaig moakwalif, ‘Kamba Krais,’ afa mingnag el amtakwalig wa apekugonam ogofei, ‘Kamba profet Godna mom ka wambuk ombugog.’ Enag el enag ogogum ‘Kagelim enam God gisfugum hwatig’, enam ogogum ‘Nawo wan ahum.’ Enag enaig wa esif, tifutuk gafungag wa apekugof, apekugof ahnaig ahnaig ehfamba nemona, autinamba mas enaigimba big nangunimo,

23 Amang esel mahiyim puguahwanig feg, enag hwaonamba wa puguf. Enam ka nem osonug. Enaig fegmba enag negel enag numwehenim nunofifum.” Sisas enaig sihifeni.

*Hwaonamba el osoh God of wanai ninghiana piskembof  
Matyu 24:29-31, Luk 21:25-28*

24 “Enag kinig nalig mayi awaieimba,

eso osuwu pugog hwanig wa feg, afa waswa pugog hwanig wa fei,

<sup>25</sup> bagnofut ofwanai fugahianam apeigof. Mungwal tifutuk ofwanaim, enag autinai tifutuk kikehelagu osuwi, was, bagnofut enag eh efena kukwa autinam gofofena, enag emba wa kiafigif. *Ais 13:10, 34:4*

<sup>26</sup> “Enanam enawa Enag El Of Wanai God Ningihiana enawa leangowa pembof, mungwal tifutukni, afa afwambusug nalg newugni feimba, eso el nanguf.

<sup>27</sup> Autinam, God elim eh efum gisfu hwatina. Enanam ombofimba, eso wa enaig esef. God eh efena ensel gafungag of wanaim ningitigif elim ehe esel gisfugu hwatig, enam nuwagug ahugum. Emba wa mungwal bete esel enagna wambugenam afa of i bete i mwetetenaig wanai gamba mungwaliyi wambuf.”

*Li fig ogofug Sisas muhwa piskegim bogum  
Matyu 24:32-35, Luk 21:29-33*

<sup>28</sup> “Li fig enag emba nem amangim ogofunuf? Enag li fig enag mulug figeg apekugofehba emba ati na nolningig osuwu nalg muhwa opuguhmba enag esfafef, enag eso ati big olningig ningi sisig esoh enaig esfafef bu puguagim mayi meini ofehba, eso sisesungofafef.

<sup>29</sup> Gwenaig ehe na nanguf amangim esel ka nem osonug, enamba, elim na wa nangwimbi wa puguf, enag emba na wa olningif, El Enag God Ningihiana Of Wanai enag go ambagam mengig muhwa.

<sup>30</sup> Ninimehe ka nem osonug, enanam elim enag pigest hwanig fe fimba, eso enanam mungwal amang amang enawa puguf.

<sup>31</sup> Of i, bete i, gamba emba wa awaief, afa kana moamba mas awaiei.”

*Mas aman mungo olningigmo amansini ehe wa bof, osuiname, sinainime  
Matyu 24:36-44*

<sup>32</sup> “Aman mungo olningig hwanig amansini ehe wa bof osuiname, sinainime. Godna gafungagwanai ofwanai gamba mas anuanafigmo, Godna leg gamba mas anuanafegmo. Awag ehe mungo ati anuanafeg enam enag.

<sup>33</sup> Negel numwehinim nunofifum, mas na olningigmo amansihe enag enawa pugu osuiname, sinainime.

<sup>34</sup> Elimba enaig eseg, aman mungo eh efena lalam wahi-agim. Enag eh efena gafungag wanaim elim osonug, ‘Kana gafungagmi, gawigmi fahegegofofum.’ Enaig osonugum mungo mungogum gisfua hwatig gafungagim

enam. Mengigwa nunofegohog elim, enam osonag, 'Numwehenam mengigim fa nangofegofum,' El Enag enaig osonag.

<sup>35</sup> Enag negel gimba gwenaiḡ numwehinim nunofifum, amansihe lalana awag wa bof osuwipeḡnam boime, si olugyi gohognam boime, leawa kwimbiyim boime, leawam boime mas na olningigmo.

<sup>36</sup> Enaig bogmba yawo yikagnam ehe wa puguf, enag wa nem nangoimba, na non gifuf.

<sup>37</sup> Enaig fegmba enag ka nem osonug, enaig fenamba enag ka mungwal elim osonug, 'Numwehinim nunofifum!' " Sisas enaig osoni.

## 14

*El sisiyi fesaina enag sihiaghufena Sisasim tigeḡigim*

*Matyu 26:1-5, Luk 22:1-2, Jon 11:45-53*

<sup>1</sup> Sambaga osuwu mahiyi gohmba olningigim Pasovami afa bret pupkuog hwanig ahagagim osuwu nuguagim, enanam enag muwagigim, Enginag ainiyag pris i, anuana el i, yisigiagini, "Ahnaig big asinim so Sisasimba big kikeheli sulufinim tigeḡif?"

<sup>2</sup> Enaig mas big lahlagnam Pasovanamba enanamba mas big esi. El masa wa el bagagif."

*Angwafig Sisasim wel fungug lahlagna musagam sugfuna*

*Matyu 26:6-13, Jon 12:1-8*

<sup>3</sup> Sisas Betaniyi agafena Saimonna lalawa enag el autinam ehehna fena. Enanam enag kukwa aganam wohof onefenamba, angwafig bonam sahona hun keg botol wel fungug lahlagna mengigwa puguag ombuna. Ena wel nog weg wesig bugba fungugni lahlag, enag wunehalamba nalt. Mani naligni fana. Botol enag pugugenam afa wel enag Sisasim mesowa sugfuna.

<sup>4</sup> Mingnag el auguiafena enag olugakagni. Ehefum olugyi sihiage gofofena, "Amang fegim ena welmba yusugmba fatig.

<sup>5</sup> Enaig big mani figbi mani nalign big wafiti. Big enaig wa 300 kina fiti, eso big elim amang hwanigim enam faigoite." El enag angwafigim nunumufini.

<sup>6</sup> Sisas osoni, "Wahiya! Amang figim, na enag angwafigim kinigbi faiyig? Elimba yuhwahe kam esenag.

<sup>7</sup> Autinai ehe el amang hwanig auguia. Amansi na sawiyi fegim kwaganiegimba, eso kwagan. Enag kamba, ohiyiaga heḡeg gwesegim awohmo.

<sup>8</sup> Amang angwafig enag esegmba yuhwaho eseg. Elimba wel lahlag kam eligim sugfunag, kam numwehenageg ku-moagaligim gwenaig esifnimbi enag kam wahagim ma sa yikagna nongif.

<sup>9</sup> Yinim newug ehe ka nem osonug. Mungwal bete esel enanayi Godna mo lahlagwa sihiahufuf, enam gamba angwafig esel eseg enamo a sihif, feimba olninguguf.” Sisas enaig sihifena.

*Judas sisiyifesaig el enam sihini, “Ka nem Sisasim faif.”*

*Matyu 26:14-16, Luk 22:3-6*

<sup>10</sup> Enanam enag 12 fenam Sisasna nihiyihai, enag elyinai, mungo Judas Iskariot, enag yikanam enginag ainiyag prisim ona nawo Sisasim faim.

<sup>11</sup> Enginag ainiyag pris enag ena mom higinim enag sifakalni. Enag osoni, “Emba ka nem mani faiyif.” Enag Judas enag mina yisigiagena ogum ahana minawawo amansini pris elim enag Sisasimba ka faiyif?

*Sisas Pasova ehafena nihiyinain wan nena*

*Matyu 26:17-25, Luk 22:7-14,21-23, Jon 13:21-30*

<sup>12</sup> Israel el enag mungwaliyi yiawa osum elengegiwa gohog osuwum gishu fwahiyinim. Enag wikwo angig fegim yikagim elngegwa pugug enag mungwal osuinamba bret pupkuog hwanig ahgahufena. Angig enag osuwu enag puguna, enanam enag sipsip luwalig fa kugwagif Pasovawamba. Ehafena nihiyinai enag Sisasim sahini, “Na sawiyifeg ahananayi kahunam Pasovamba numwehiagimbi, eso pasova enag na nef?”\*

<sup>13</sup> Sisas sambaga ningigim sihinim, eso ningitigina, “Ne ningigi ahkanam ahsahon kimbis naligyi. El mungowo bu sompni ombofuf enag nem wa minawa wa bof. Eso ne ningigi enag eso elim enag ahpahalukui.

<sup>14</sup> Mayi yikanam ahna lala mungowa sahoimba eso ne ningigi enag lalana awagim enam enaig sihiahfenai, Anuana osog, ‘Kana kukmba ahananayi go? Kawo Pasova enanayi kikefena nihiyinain wan nem.’

<sup>15</sup> Emba wa nem ogofunuf kuk nalig sisiyigam go ati numwehiagigim wahiyig. Ne ningigi wohof enanayi

\* **14:12:** Pasovamba mom autinai bukwa go, buk Kisim Bek Sapta 12. Autinam Israel el Isipyi gofofena. Enag Isip el amtakwalehiage gofofena. Enag God kwagana piskegim Israel ehafena nugam ahuagim. Godna gafungag wanai ofwanai, ensel, sinainim penam bona mungwagim Isipni luwaligim eteningagim mungo kugwag sungofena, enaig esena Israelni luwalimwo kukwagane kafena. Eherni luwaligimwo mas piginamo. Enag yawomba Israel el enag mungwar yiawa nuwagifum enam enag orningigim.

numwehiage ahfe. Enag ehafena nihiyinaim sambaga ningigim ena ningitiginamba, ahkana.”

16 Sambaga ningigi enag ahkanam kimbigwa ahpuguna, enaig sambaga ningigi enag ahwufuana gwenai esu Sisas osoni enaig. Enag sambaga ningigi Pasova numwehiagah-fena.

17 Osuwupegnam Sisas ehafena nihiyinaim mungwaliyi wanbona.

18 Enanam enag ogunam ahgafenamba Sisas osoni, “Yinewug ehe ka nem osonug. Negelyinai mungo kam elim faiyif enag kam tigeigim, el mungo osohwi kamble i ahneawo enag.”

19 Ehafena nihiyinai enag olug wahegasainam, enaig esini, ehafum mungo mungog enag sahugini, “Kamble me?”

20 Sisas osoni, “12 feg enanayi el enag yawo mungwa sompyinai ka lifug bug bretna figihiane ahofe.

21 Elimba yiniho, autinam God osonamba, enag el ginofini, ‘Emba wa Enag El God Ningihiana Of Wanai enam wahaf.’ Afa aman Elim Enam God Ningihiana enam elim mingnag elim faiyimbi, emba kinig nalig ehnangum wa bof. Ma ehafena afag eseite, elim enam fukuag wahiaite, emba sa yuhwafeite.”

*Sisas bret i wainbug i ehafena nihiyinaim faini*  
*Matyu 26:26-30, Luk 22:15-20, 1 Korin 11:23-25*

22 Enanam mahiyim ahgafafenamba Sisas bret fanam, Godum lahlag moaogonam eso kukwasungofenam ehafena nihiyinaim faini. Enag osoni, “Fi, ohwimba kikefumehe ka nem afai.”

23 Enag wain bug kapna fanam Godum lahlag moaogonam, ehafena nihiyinaim enag faini. Enag ena mungwal enag ahgana.

24 Enag osoni, “Ohwimba kana taf, elimba enaig esena, taf kifutugum ehe ogfuni, amangim God eseli autinaim sihina yinewug ehe ena wa puguf. Enag tafmba ka sugfunuf elksam kwaganigim God nangum ambogogum.

25 Yinimewug ehe ka nem osonug, mas ka piskenam ena wain bugmba nei yikanam mulug wainbug ka nef Godna wanagagwa.” Sisas enaig osoni.

26 Enaig esinim, sangig mungo ogonam eso mug Olif gimwo fukwalogonam ahuna.

*Sisas osona, “Pita wa osof, ‘Mas kamba Sisasimba anua-nafenamo’ ”*

*Matyu 26:31-35, Luk 22:31-34, Jon 13:36-38*



27 Sisas enaig osoni, “Negel mungwal ena na wa esif, embem wa nahunam, kam wahiyinim. Autinam God enaig osona, enag, el ginofini;

Mayi ka sipsipum nangwagohogum elim enam mayi ka tige kaimba, eso sipsip enag wa gweyi ahkitigiaogof.

*Sek 13:7*

Enaig autinaim ginof enag osona.

28 Afa ka wahambwihianam Galiligim ka kaf, negelni gof.” Sisas enaig esoni.

29 Pita Sisasim osona, “Mingnag elmbi sa nem wahiyi, kamba mas ne wahiai!”

30 Sisas Pitam sihina, “Yinenewug ka nem osonag, yawo ohuna sinainim sambaga mungogum wa na osof, ‘Mas ka Sisasimba anuanafenagmo,’ enaig na osoimba, eso kakaruk awag sambagagim wa moasiawogof.”

31 Afa Pita tifutiagenam osona, “Enaig ka nemble i ahwahagimba, emba kesef, mas ka enaigmba osoi!” Mingnag Sisasna nihiyinai gamba gwenag osogona.

*Sisas Godum sihina Getsemani asowa  
Matyu 26:36-46, Luk 22:39-46*

32 Sisas eh efena nihiyinaim egam wankanam wan puguna Getsemanigam, enag eh efena nihiyinaim osoni, “Ohiyi auguafimba, kawo Godum sahnam.”

33 Enag Pita, Jems, Jonnam ena mungo sulufunam wankana. Enag Sisasim oluginig fena,

34 enag eh efena nihiyinaim enag osoni, “Enag olkinig kam ofe enag ohuna kinig naligni gweliehe kam awaha. Ohunanayi auguafimba nunofifum.”

35 Enaig osonim, afa wesig hilikanam eh efum kanam betewa penam, eso Godum sahana, enaig na yuhwafegmba, ogum ena kinig ohunanam ma kam wahia.

36 Godum enaig sahnafena, “Humoan, kana awag, namba yuhwafef mungwal amang esel enag, ka sawiyifeg emba tawetik i, kinig i enag kana nihiyinai hikifati. Enag kana sawiegim nofeka pahalukum! Awai! Nimbefena sawiegim enam pahalukui.” Sisas Godum enaig sahanafena.

37 Enag piske kanam nangwagenamba eh efena nihiyinai enag non asagafena. Enag Pitam osona, “Saimon, nonho na gi? Mas na wesinggiwo nofkike auguiamo?”

38 Negel enag nunofifimbi Godum sahinifi, enaig wa nem amang gihnigim wa bonam puguf. Negelni sungwagwo ogum nawo yuhwa fefum, afa elig ehe kifutieg hwanig feg.”

39 Piskanam eh efena nihiyinaim wasanam yikana Godum piskanam sahanagim, yuwanam eso sahana enaig sahana piskefena.

40 Afa piskanam bonam ehefena nihiyinaim nangwage-namba non asagafena ehelnim nofug kinignewug fesaina. Enag mas olningingimo ahnaig Sisasim asihinif enam?

41 Bowalyi enag piskembonam, enag osoni, “Mahiyimho na ehe kukule asaga? Gweli! Ati meini ofe. Nunofi! Yawomba Enag El God Ningihiana Of Wanai, enag el enag elim wa faiyif. El ahnaig ahnaig amtakwalig esehugum enam wa faiyif.

42 Bigiagafe. Nawo ahum, Nangu! Ati ombo el enag kam mingnag elim faiyigimbi eso kam tige kif, enag ati ombo.”

*Judas Sisasim elim faiyini ma tige ki*

*Matyu 26:47-56, Luk 22:47-53, Jon 18:3-12*

43 Sisas ehefena nihiyinaim mahiyim sihinugego fenamba, eso yikagnam Judas puguna enag el 12 fenam enagna mungo enag. El kisa numb mungwaliyi enag gweyi ambogona, piso i, aga i wambuginim. Enginag ainiyag pris el, anuana el, ainiyag el, enag el elksam enam ningiyiginimba enag ambogona.

44 El enag Sisasim faiyigim elel, enag enaig esena, yuwanam ati enaig osoni, “Elim ena ka afwaf fatimba, elimba Sisas eso negel enag gwenamho kikehelinim, numwehenim nangwagufi.”

45 Enanam enag Judas pugunam Sisasim osona, “Anuana,” esonam eso afwafe fatina.

46 Enaig fenamba enag el enag Sisasim numwehinim ningagawa kikehelini eso nangwahufena.

47 Mungo gofena muhwa enag piso ehefena angagwanai sugufanam eso el mungom angalog hugufatina. Elmbi elimba prisni misog elni gafungag wanaim.

48 Sisas el esel ambogonam kikehilini enam osoni, “Piso i, afa aga i na wambugigim wambuk ambogog kam sulufigim okwef luwalim lofug enaig.

49 Mungwaliyi osuwi enag ka Godna lala naligyi big mungwaliyi auguiafenam agofwehefenam ogogum afa ka nem sihinugekafena. Amang fegim enanamba na kam kikeheli hwanigba wahiyini? Afa amang amang mo enag God autinam esogba emba wa puguf.”

50 Ehefena nihiyinai mungwal el enag Sisasim wahiyinim embem ahuna.

*Kwambolo mungo embem kana*

51 Kwambolo mungo Sisasim pahalu bwafena. Lofug busug mungo kigeugonam enag, mingnag el elim enam kikehelini.

52 Afa enag enaig esena, lofugwo hugufatinam nihig bihig embem yikana.

*El Sisasim enginag ainiyag prisnai yi kotimini*

*Matyu 26:57-68, Luk 22:54-55,63-71, Jon 18:13-14,19-24*

<sup>53</sup> Enag Sisasim wanigiahuna prisni misog elni lalagam. Ena lala wa enginag ainiyag pris, el sisiyi fesaig enag el, mo anuana el, el enag ambogonam nuwagena.

<sup>54</sup> Enanam enag Pita Sisasna sum yikafena sumifena wahegwehe. Ena yikanam sahonam bwag megam prisni misog elni lala muhwa. Enanayi mungwal ami el gi gofwehena. Ami el enag lalam nunofegofohog el. Enag Pita gamba yikanam sahona ena suwa nolokewofena.

<sup>55</sup> Enginag ainiyag pris el i mungwal el sisiyifesaig i, enag el mo yisigiagini amang esel Sisas eseg. Enam ogona, “Nawo wufuwini eso Sisasim tige kim.” Enag mas ahnaig mom wufuinimo.

<sup>56</sup> Elksa Sisasim moakwelini, enag elni mo enag mungwa lofugmo. Awai! Nemona fesaina.

<sup>57</sup> Mingnag el gofwehenam Sisasim enaig moakwelini,

<sup>58</sup> “Enaig ka higini, Sisas ogum, ‘Godna lala nalig enag ka tufatinam enag sambaga mungo osuwunam ka piske nimbanam augif. Elimba ningagana nimbahmo.’ ”

<sup>59</sup> Enag ena mo gamba mas mungwa lofug fegmo. Elimba ehfamba mingnag mingnag nemona fesaina.

<sup>60</sup> Prisni misog el enag olugyi gohonam, eso Sisasim sahana, “Na wahigifegim mo sihiagimba na kwisikho ena mo esel nem enaig osonug enamba?”

<sup>61</sup> Enag Sisaswo mengig kapinifenam gofena, mas amang mo wahigifenam osonimo.

Prisni misog el enag piskanam Sisasim sahana, “Bwata namba Kraisni, eso autinam God osona, ‘Emba ka ningihiaf elim kwaganegim ka nangum asambogogum.’ Enag Godum enag mungwal el lahlag moaogonuf. Namba Kraisme? Awaime?” Prisni misog el enag Sisasim enaig sahanafena.

<sup>62</sup> Sisas osona, “Kamba. Emba na wa nanguf El Enag God Ningihiana Of Wanai enag Godna nihigimoa ka agafuf. Godmba tifutuk newug feg. Emba leango i wa piske ahbof ofwanai!”

<sup>63</sup> Prisni misog el enag ehfena lofug plefu wahianam enag mingnag elim sahini, “Amang figim big mingnag elimbi wunogonug ma mo ambogonam sihi?”

<sup>64</sup> Sisasna amtakwalig mo ati na higig, osog, ‘Kamba God lofug.’ Negelmbi ahnaig olnignig amang ahnaig big esini?” Mungwaliyi el enag mungwa mo fini, “Sisas amtakwaleg. Ma Wahai!”

<sup>65</sup> Yikanam mingnag el gweyi Sisasim memp kusini. Lofugna nofugum yisiyini wahiyini, eso tigi eso enaig

osogona, “Nemba profet lofe. Nemba wahigifenam sihi, aman nem tikgeg?” Ami el sulufinim asangigim pepedefini.

*Pita osona, kamba mas Sisasimba anuanafenagmo!*

*Matyu 26:69-75, Luk 22:56-62, Jon 18:15-18,25-27*

<sup>66</sup> Pita ambagam betewa ambwagwa lala mengig muhuwa gofna. Angwafig, prisni misog elni gafungag wanai, bonam.

<sup>67</sup> Enag nangonamba Pita suwa nologewofena, enag angwafig enag numwehenam nangonam enag osona, “Ne gamba Sisas Nasaret wanai nahkafena.”

<sup>68</sup> Enaig Pita osona, “Awai! Mas kamba anuanafenagmo! Ahnaig mo elimba nosog?” Pita bwag mengig muhwagam kana. Enanam enag kakaruk awag moasiyina.

<sup>69</sup> Enag gafungag wanai angwafig enag piskanam nangonam, mingnag elim muhwanaim sihini, “Elimba mungo ehelyinai ehe.”

<sup>70</sup> Enag Pita piskanam osona, “Awai!”

Wesig gohonam, el Pitana muhwa gofofena, enag piskanam osoni, “Amang fegim enaigmba nosog, ‘Kamba enag elmo!’ Neana wuneg Galilinai elni mo lofug. Ne gamba Galilinai na bok!”

<sup>71</sup> Pita tifutiagena, “Yininewug ehe ka osog. Ka sawiyifeg ka yinim osogmba eso God ma kam kinig faiyi. Mas ka anuanafegmo elim esel na osogog enamba!”

<sup>72</sup> Enag yikagnam kakaruk awag piskanam moasiyina. Pita olningnam oiskanam ena mo Sisas eso sihina enam, “Sambaga mungogum na osof, ‘Mas ka Sisasimba anuanafenagmo!’ Enaig wa na osoimba eso kakaruk awag wa moasiyif sambagagim.” Enag Pita fisi pena eso ufwena.

## 15

*El Sisasim wanigiahuna Pailat nangum*

*Matyu 27:1-2,11-14, Luk 23:1-5, Jon 18:28-38*

<sup>1</sup> Leawa kwumbiyim enginig ainiyag pris el, el sisiyifesaig el, el mo anuwana el, Israel kot el anuwana sisiyifesaig el enag el nuwagena. Ona nawo olninguginim gisfu wahiyim ahnaig big asif. Enag el Sisasim wena kikinim eso Pailat nangum ogohuna. Pailatmba kiap lofug Jerusalemoa kimbis nalis agafena.

<sup>2</sup> Pailat Sisasim sahana, “Nemba Judana kingme? Awaime?” Sisas wahigifenam osona, “Nembe esel ati na gweli osog.”

<sup>3</sup> Enginig ainiyag pris enag Sisasim mo ksa sihinageni, ohunaig osogona, “Ahnaig ahnaig amtakwalig enag na esena!”

4 Enag Pailat piskenam Sisasim sahana, “Ati na hegig esel nem sihinig ahnaig ahnaig amtakwalig mo esel enam. Masho na wahigife sihimo?”

5 Enag Sisas mas amang mo ga sihinamo. Enaig fenamba, enag Pailat enag olug wahigena.

*Pailat Sisasim el amtakwaligim faiyini ogma, “Tigeki!”  
Matyu 27:15-26, Luk 23:13-25, Jon 18:38–19:16*

6-7 Enanam enag el mungo kalabusyi gofena wuneha-lagmba Barabas. Mingnag elngi eseli gafman elngi bagagini. Enag elim enag mingnag elimwo ati kugwagsungofini melni. Mungwal yiawa Pasovanam\* enag Pailat enag el mungom kalabusyinaim pitigiafatiafena amanim mungwal el enag mayi membifinimbi, eso Pailat enag elim enam pitigifati-fena kalabus lalanai.

8 Enanam enag el ambogona Pailatim sahini gwenai esesei.

9 Pailat elim sahini, “Na sawiyifigmbi kawo Judana kingim wahiam ma pugugai?”

10 Pailat ati olningni enginag ainiyag prisna olningugugum. El Sisasna mom higifini, afa prisni momwo kwisifini, enag pris enag olug kakagini, enaig fenamba enag, pris Sisasim Pailatim faiyini.

11 Pris el Ainiyag enag mungwal elim enag sihigoni, ma Pailatim osoni, “Barabasim pitigifati!”

12 Pailat piskenam elim enag sahini, “Na sawiyifigbi ahnaig ka esef elim eseli na sefig, ‘Juda elni king?’ ”

13 El hogonam wune ogona, “Aga kaga tipegwa kukufinim tigeki!”

14 Pailat sahini, “Amang fegmba? Amang ahnaig ahnaig amtakwalig asegmba?” Enag hogna newug amtakwale wune nalogona, “Aga kaga tipegwa kukufinim tigeki!”

15 Pailat enag ona “Kawo elksam enam sawiyi fenim eso ma kam lahlafini.” Enag Pailat Barabasim pitigifatina ma pugugai. Eso Pailat Sisasim ami elim faiyini, ona, “Ma we kigna ma tiginim eso aga kaga tipegwa kukufinim tigeki.”

*Ami el Sisasim mo kiapasefina  
Matyu 27:27-31, Jon 19:2-3*

16 Enag ami el Sisasim wanigiahunam saigona bwag megam gafmanna lala muhwagam. Ami elim enag mingnag ami el wunogoni, “Mungwal, ambogo!”

17 Lofug tafkleg kwinam king oso fa fatif, enaig lofug enag ami el Sisasim fatini. Ami el enag we nasna kugunim Sisasim

\* 15:6-7: Pasovamba piskifinim orningifini autinam God Israelim kwagana enam.

musowa kikini, busung lofug enaig king elmbi busung lahlag aitiag fafif enag busung lahlag hun mugna.

<sup>18</sup> Enag mayi ami el enag Sisasim busung lofug fatinim afa busung nasna musowa kikini esinim eso Sisasim mo kiapasefni. Ami el enag moakwalinim Sisasim king lofug lahlag moaogoni, “Ka sawiyifig nembe gwesenam gofum Juda elni king lahlag!”

<sup>19</sup> Ami el enag Sisasim musowa agana tiginim. Afa memp kusufni. Ami el enag Sisasnayi moakwelinim mongukug kwakwaginim sifakaleni.

<sup>20</sup> Sisasim mo kiapasefinim wahiyinim, afa lofug tafkleg kwieg enag hugufinim afa piskenim eh efena lofug enag finim fatini.

*Ami el Sisasim wanigiahunam afa li kaga tige gwa kukufinaginim eso kahalini*

*Matyu 27:32-44, Luk 23:26-43, Jon 19:17-27*

<sup>21</sup> Minawa ahuanam nangunimbi el mungo bwafena wunehalamba Saimon. Saimon eh efena kimbis wesig Sairinim wahianam pugunim nalig kimbisam akafena. Ami el enag enaig esinifini, Saimonum ogogum, “Sisasna aga kaga tige gwa enag faku.” Enaig fenamba enag Saimon fakuna. Saimonmba, enag Aleksander i Rufusni awag.

<sup>22</sup> Ami el enag Sisasim sulufinim kimbisimwo wahiyinim ming betegam ogohuna, ena bete enag wunehalamba Golgota. Enag ena wunehalamba enaig eseg, Musog Kig Bihig Bete. Aman ahnaig ahnaig amtakwalig esegmba enagnaginim ena betewamba elim kugwagsungo fegofogog. Enaig fenamba enag el enag ena betem enaig sefifini, Golgota.

<sup>23</sup> Mingnag el wain bug i mir bug marasin i eh uwahinaginim Sisasim faini. Mir bugmba marasin eseli enaig feg, tawetik wesigim kwegfowag afa ena bug enag Sisas mas nenamo.

<sup>24</sup> Ami el enag aga kaga tige gwa Sisasim nelni kukufeginim. Mungwal eso ami el enag hun hutiatanaigwa eh efngelni wunehalag ginofeginim, eso enaig esini sompyi aitinim eso glenglefini, eso hun mungo amana wunehalana mayi pefenamba, eso enag el enag Sisasna lofug fafena. Gwenaig esinim Sisasna lofug enag mungo mungog enaig wambinim augini.

<sup>25</sup> Osuwu fukumbonam olugyi pugunamba (9 klok) enaig nam ami el enag Sisasim aga kagag tige gwa kukufini.

<sup>26</sup> Enanam enag el enaig ginofifini elim ogofugunugum amang figim tige kig. Sisasimwo enaig ginofini:

Judana king.

Osogonam eso ginof enag aga kaga tige gwa kahalini.

27 Afa Sisasna muhwawo ming aga kaga tige-gwa el elim sambaga kugwagsungo ahfefnam afa okwefna ahwambna, ena sambagam enag mingimwo nihigim kahilini, afa mingimwo saha-gam kahilini, aga kaga tige-gwa eyi.

28 Autinam Baibel osona, enag yawo ati pugug, Baibel enaig osona, “Enag ehim gamba enaig osoni ogonam el amtakwalig ga enaig.”

29 El enag ambogonam fahufegofofenamba Sisasim kias-pase mo sihinahufna. El enag angmow waginim enaig osogona, “Hegefe, ena na osona ‘Emba ka Godna lala nalig bumbuge sungofenam, pisenam sambaga mungo osuwu-nam nimbaf.’

30 Enag nimbefum nembe kwegfo, nembe aga kaga tige-gim wahianam, pe!” Sisasim enaig osoni.

31 Mungwal enginag ainiyag pris el afa anuwana el gimba Sisasim enaig mo kiapasefina. El enag ehifum olugyi sihia-gahufena, “Mingnag elim mungo kwaganig, afa ehifumwo ahnaig ase-gim kwegfofehmo?

32 Kraisa enag, Israelna king, ehe ma aga kaga tige-gim wahianam pei, nawo oso nangum. Nawo enam nangunim, emba sa big olningi emba Kraisho.” Enag el enaig sihi-agahufena. Afa sambaga ningigim esel katigini enag ehe gamba ati amtakwal mingig Sisasim sihinag ahfena.

### *Sisasim ati wahag*

*Matyu 27:45-56, Luk 23:44-49, Jon 19:28-30*

33 Osuwu muso suflulugnam si mungwal bitem enam kigfihienam osuwum mayi hikifwafenamba yika fenam eso 3 klok pugug.

34 Osuwu hikifugwa gifinimba eso Sisas tifutinam wunona, “Eloi, Eloi, lama sabaktani?” Ena mo enag bigmba wahigi-figim enaig osogof, “Kana God, Kana God, Amang fegim na kam wahiag?”

35 Mingnag el muhwa gofwehiafena, enag enam higinim enag osogona, “Higi! Elaijam wunego.”

36 El mungo kikigini kanam lifug bug nongug ninim embeg efiyimbuna wagi kikegunim fifukwalaogonam Sisasim nihini ona, “ma nei.” El enag osona, “Awum, nawo nunofegofofum Elaija wa bonam pitigiafaime? Awaime?”

37 Sisas tifutinam hogna wunonam, eso gweyi wahana.

38 Enanam enag lofug nalig kinigni kwieg Godna lala naligyi enag eso sisiyi kukweogonam pekanam simewa pugunamba sambaga lofug ahfena.†

39 Kepten, el mungo ami elim sisiyi fenig, enag muhwa gofenamba Sisasna wahagim nangwagofena. Enag osona, “Yini newugehe, elmbi elimbi Godna leg!”

40 Mingnag angwafig gimba wahigwa gofopenamba wag nunofegofofena. Mingwo Maria Makdala kimbigwa wanai, afa ming Mariawo Jems i Josep i afag (enag Jemsba sumiyinai ming Jems,) afa ming angwafigwo Salome, afa mingnag angwafig gimba apeyena.

41 Yuwanam Sisas Provins Galiligim langwa kanamba enanam enag angwafig enag pahalug ahuafenamba Sisasim gafungagim kwegfuni. Mingnag angwafig ksa Sisasim pahalukahuna Jerusalem gam, ena gamba enanayi gofopenamba nunofegofofena.

*El Sisasim hun megam oseigonam fakini*

*Matyu 27:57-61, Luk 23:50-55, Jon 19:38-42*

42-43 Osuwu yikanam pefenamba, Josep kimbig Ari-mateanai bonam puguna. Josepmba kot anuana el esel enag elyinai mungo. Mungwal kot el olningni Josepmba nininewug el lahlag. Ehe gamba Godna wanagagim nisana-wofena. Enag sinimba Sabat osuwu wa puguf, enag yawanamba amang amang numwehiagigim sinigim. Israelna moamba enaig feg ming osunam gamba autinam Sabat elim wahagmba mas li kaga tige gwamba Sabatnamba luwafi. Sabatnamba mungwal Israel el enag ming osuwu pegam autinam Sabatnamba gafungagmba enag wahiyifini yikafenam Sabat osuwupegwa puguafena. Enanam enag Josep mas embefenamo Josep enag yikanam Pailatna nihiyi pugunam eso Pailatim enaig sahana fena, “Kawo Sisasim pitigifakunam hun megam osaigonam fakim.”

44 Pailat kukugi fakanam osona, “Kamba kogum ahanana wahahmo?” Pailat el ami elni keptenim wunena, “Sisasimba atiaho wahag?” Kepten enag osona, “Ei, ati wahag.”

45 Pailat enag hignam eso osona Josep ma Sisasna eligim pitigifakwi.

46 Josep lofug busug lahlag manina fanam eso Sisasim pitigifanam opina, lofug busugni enana saganam, eso hun mimewa kumoahilini. Hun mimemba enamba autinam

† 15:38: Rofuk enag Godna lala narikiyi enag enaig feg, mungwar elim enag minam kaguonuk, mas ahunam saigo i ena mengigam enag. Pris eser sisiyi feg ena mungwamba sa kanam esimba sahoi. Enag esimba mayi ka saho kmba emba enaig eseg Godna nohmbo sgam yika puguk. Enamba eso Hibru 6:19,20 nangoi.



Josep eh efena gafungag wanai el kunim wahiyini, ena hun megam Sisasna eligim faknim. Eso hun amta nalig yitiwiti fefug ambogwanam eso hun mengigim kaguwunim wahiyini.

<sup>47</sup> Maria, Makdala kimbis wanai afa ming Maria, Josepna afag, enag sambaga ningigi enag nunof ahfegofena enag ati ahnangona Sisasim esel fakini ena kugum enag.

## 16

### *Sisas piske behiana*

*Matyu 28:1-8, Luk 24:1-12, Jon 20:1-10*

<sup>1</sup> Sabat osuwu mayi kanam awaienamba, enag Maria Makdalanai, afa ming Maria Jemsna afag, afa ming angwafig Salome, enag angwafig enag wel fungugni lahlag ena manina wambuginim. Onanawa ambogonam Sisasna eligim susulenagim.

<sup>2</sup> Sabat osuwunam enag siini leawo kwimbiyim enag angwafig enag bigigafenam hun megim nangugum ahuna.

<sup>3</sup> Angwafig enag eh efum sihiagahufena, “Aman bigim waganam hun mengigwa kagwog gi, enamba yitifatif?” (Hun enag amta nalig fena.)

<sup>4</sup> Eso angwafig enag nunofnimba hun mengigwa kaguonim wahiyini, enag mas gifinimo! Awai! Ati yitifatina!

<sup>5</sup> Angwafig enag saigonam hun megam esim ahuna. Nangunimba kwambolo mungo nihigim agafena lofug busug kwieg fatinam. Enag eso angwafig enag kukugiafakafini.

<sup>6</sup> Enag kwambolo enag enaig sihifeni, “Negel nogofeika olug wahigim. Ati ka olningig negelmbi Sisas Nasaret wanaim nangugum nambogog, Sisasim osohwi aga kaga tipegwa kukufini enam. Emba ati piske bwihag, ohunanayimba mas gihmo. Ohuna kugum enam nangu, ohiyi fakini, enag mas gihmo.

<sup>7</sup> Negel enag ahunam eh efena nihiyinaim sihigoni, afa Pitam gamba enaig sihifini, Sisasmba neningalni gof ati wa kaf Galiligim. Emba na wa Galiliyi nanguf. Osohwi ati Sisas nem autinam osoni,” kwambolo enag angwafigim enaig sihifeni.

<sup>8</sup> Angwafig enag hun menai apekugonam embem yikagna ahuna. Enag eso kiafigig wahegasainam afa olug wahegasaina. Mas amang mo amanim sihinimo. Ahnaig asegmaba? Angwafig enag embefini. (Ming el ohuna mo ginofenam augena buk Mak eseli enam enag.)

*Maria Makdala yinai Sisasim nangona*

*Matyu 28:9-10, Jon 20:11-18*

9 Leawa kwimbiyim Sabat osunam sini enag Sisas piske bwihiana. Enag Maria Makdalanai enagna nofwa yuwanamba puguna. Enag angwafig enag autinam Satanna nihiyinai amtakwalig elngegwa gohona enam Sisas hugufu aitina.

10-11 Enag el Sisas wan gohonifefena enag el enag Sisasim olninginim wewufewofena. Maria yikanam enam enag sihini, “Sisasmba nofkike eliehe aga, ati ka nangog!” Ehel enag ena mom enam hignim, afa mas olninginimo.

*Sisasna nihiyinai sambaga Sisasim ahnangona minawa  
Luk 24:13-35*

12 Enanam sambaga ningigi Sisasna nihiyinai kimbignaligim ahwahianam eso ahkana. Sisas pugunam wambna aman lofug enaig.

13 Sambaga ningigi enag pisenam ahkanam mingnag elim Sisasna nihiyinaim ahsihini. Afa enag sambaga ningigina mom enam ati higinim, afa olningi hwanig.

*Sisas ehefena nihiyinaim ehefena gafungagim mumankeni  
Matyu 28:16-20, Luk 24:36-49, Jon 20:19-23*

14 Afa enengem ehefena nihiyinai el oguafenamba ahagafafenamba, enag Sisas pugunam wambnam, eso ehefena nihiyinaim enag wagini. Ehel enag mas olninginimo, enagenagim ehelni olug enag mweteti hun lofug. El esel sihigoni Sisasmba ati piskegam bwihiaig, ena mom enag olningi hwanig. Enaig fenamba enag Sisas wagini.

15 Eso Sisas sihini, “Negel ahunam, Godna mo lahlag mungwal betewa el eseli gohka, enag mungwal elim enag enanayi sihigonugahu.

16 Aman olug wahigifenam Godum pahalukwi afa el buwa fati emba sa God sulufanam afa ehefena muhwa hegeg gohogum enam faiyi. Afa aman enaig olug wahigife hwanigmba, emba Godum mas pahalukwi, ahnaig ahnaig amtakwalig ehena nihiyi gwesegim go, enaigmba, eso wa tawetik nalig faf.

17 Aman olningenam oi Godna moamba yinimehe, enaig esenam, Godum sahanaimba, emba sa God tifutuk gafungag ogofunai enaig gafungag enag el bihigmba mas ehe gafungafei, God enag enaig gafungafegim, og eso mingnag el enag olningi Godna moamba yiniho feg. El esel olningig enam kwaganegim eso Satanna nihiyinai amtakwaligim hugufuhianugeg enag nemona mog sihigoni enam enag autinamba mas higifinimo.

18 Enaig sombine ga kikehelinim ningagana afa amang amang wahembug lofug ga enag ahagaimba, emba mas

amtakwale sungofei. Emba wa gihna elim ningagana tuh-wimba, emba el ena wangnefef.”

*God Sisasim ofgam sulufakuna*

*Luk 24:50-53, Aposel 1:9-11*

<sup>19</sup>Sisas Ainiyag enag mo sihinugenam, mayi wahianamba, eso God sulufanam ofgam wanikina, enag Sisas Godna nihigim aga.

<sup>20</sup>Sisasna nihiyinai enag ahuaminifegim Godna mo mungwal bete esel enanayi sihiagahug. Ainiyag kwaganig elbi ahnaig ahnaig kifutuk enag ogogfufenig elbi enaigba ahnaig gafungafihmo? Enaig gafungafigmbi emba enaig eseg elim ogfunug Godna moamba yiniho.

## **Luk** **Suialag Mo Luk Ginofena** **Hwa buk enaig esog**

Afa hwa suialag mo Luk enaig ginofena Sisas eba Godna Gisfu Fwahag El feg asa blonam Israelna el mi afa mungwali mingnag el mi pese lambife. Afa Sisas maia gafuga esegim ofefnaba ehe enaig esona og Godna Sungwabug Kam ihlafenag eba asa ka elim gawig fwainigim Godna suialag mom sihinifi. (Luk 4:18) Luk eba enaig sihifena Sisas eba kinigni elim kwaganfe afa enaig el sa Sisas enaig eseageg enam nangunim asa sifakalife. Afa maia Maria Sisasim foklanaba asa el enam sifakalini. (Luk 1:42-48, 2:10) Afa bukna mo fwahag mo enaig esog Sisas maia bitem fwahanam heven gam fukwakofenaba asa el fwina sifakalini. (Luk 24:25) Afa mingnag moba eba Buk Luk la mungu afohie. Enaig mo feg eba oflanai el i sipsip nangwaghiawagig el i afa mingba maia Sisas kwablog ofefnaba Jerusalem gam ikana afa mingba Samaria nai el lasug mo afa mingba luwal alagim lasukag lasug mo.

Luk enag kaksag mo sihiagena betenna hihem afa mingba Godna Sungwabugni gafugagim afa mingba God oagna elni amtakwalig nihim hugflaitini afa mingba mangwal sa angwafig esini.

Hwa buk laba mas Lukna mo awaieg mo. Amo, eba maisim Aposel buk la gafa ginofena. Hwa bukba enaig sihifeg maia Sisas hevengam fukukanaba asa mangwal kanog fwatieg el esini.

### *Hwa moba Luk Tiofilusim ginofena*

<sup>1</sup> Kana nilite Tiofilus, kog autunam kaksag el gafa ena moba ginofini mangwal sa kangelnai yi olyi puguna.

<sup>2</sup> Afa ena moba patalfunaba ati mingnag el heafna nofna nanguni. Ilawana enaigba pugunaba eba el ati nanguni afa enaig elbi ofenaiba Godna mo gafugafeg el. Asa ena moba kam fiagog.

<sup>3</sup> Afa na sa ka ena moba kog ka kagafa nem ginofe fai. Afa ati ka ena enaigim fahigenagegim afa ka mogim yisigigim afa ka anwenafeg. Asa hwa moba nufuna mo ka nem ginofenag na sa ka nem faig.

<sup>4</sup> Afa ka enaigba esegba eba asa ne ena mom suwiginam asa ne numwehe anwenafe asa ati nem ogfunagig eba nufunam ehe.\*

*Jon gohugim oflanai el Sekaraiam sihinagena*

<sup>5</sup> Afa enanam maia Herot Judiana misog el gofnaba afa enanai yi pris mungu gofena. Ehena unehlagba Sekaraia. Eba Abiya wangofnaba ehganai eheba fena. Afa ehena angwagba eba Aron wangofnaba ehganai eheba fena. Ehena unehlagba Elisabet.

<sup>6</sup> Afa eheningi mas mangwal haig haig safena mo eba heafna Godna nofla suialag ahgofenaba afa eba heafna Godna nihe mom mi afa membug mi mungu ahpatal ahfe-fkufena.

<sup>7</sup> Afa eheningi luwal fwainig ati watiau ahfena.

<sup>8</sup> Afa mungunagim Sekaraiana ehganai el mungu eba pris Godna kwania lala la enag gafugafe gofena.

<sup>9</sup> Enaig gafugagba eba mungu pris Godna kwania lala sefufenam sanda suwi la tulufuiafena. Afa sa mungunagim Sekaraiam sihini og sama enaig gafugafei.

<sup>10</sup> Afa maia ehe lala megam sefukanamba asa kaksag el afwambala afohiafenaba asa Godim betenini.

<sup>11</sup> Afa sa Ainiyagna oflanai el blonam Sekaraiana nof la puguna. Afa sa ehe nihiginai ningagam sanda sime la gofena.

<sup>12</sup> Afa Sekaraia ehem nangunam sineminefenam afa em-befena.

<sup>13</sup> Afa sa oflanai el ehem enaig sihifena og, "Sekaraia, nofe ne embefe. God ati neana sahigimba higig. Eba neana angwag Elisabetba fangonai luwal wanigafe asa ne Jonim unehla.

<sup>14</sup> Eba sa ma neana olug suialafenam afa ne sifakalefe afa eba kaksag el sifakalife maia enanam luwal gohiba.

<sup>15</sup> Enaba haig, eba Ainiyag ehem nangunam og sonag elni unehlag eba kwaniafefe. Eba mas mileaklana bu ne. Afa maisim afagna atag la gifinibi eba Godna Sungwabug ehem ihlafengefe.

<sup>16</sup> Eba ehe kaksag elim Israel la naim esenibi asa heafgelni Ainiyag Godna gum waike afufe.

<sup>17</sup> Afa eba Elaijana nihe mi afa wasneig mi lamboagegim asa Ainiyagim gosenafe afa sa afahumonigni luwalignam esenibi asa mungu olug pugunifie. Afa el sa mom flafug enam ehengelni onigigim numwehenugeba sa ma suialag onigig flinim afa sa ma afsug el feasai. Afa eba elim

\* **1:4:** Luk sambaga buk Godna buk la go. Eba Luk i afa Kanog Fwatieg elni gafugag.

numwehenugeba asa el Ainiyag blogim numweheaginim gofufe.”

<sup>18</sup> Afa Sekaraia oflanai elim enaig sihifena og, “Haisegba asa ka ena moba anwenafefe neana moba nufunam feg? Eba ati kam watiaueg afa kana angwafig gafa gwenai eseg.”

<sup>19</sup> Afa oflanai el wahigi enaig esona og, “Eba kable Gabriel, na kaba Godna nofbusugam fagohfe na sa God ehe kam ningihiagba na ka blog nem sihinagim afa hwa mo suialag ka nem ublu faig.

<sup>20</sup> Afa sa ne higim afa ne kana mo onigig fwainigba eba glau neana mo lagigba awai ofe, ne mas mo lagi eba ikan ikan maia enenam mangwal sa mungwali pugufe. Kana hwa moba eba nufunam pugufe enenam sa God wefug fwahag.”

<sup>21</sup> Afa el Sekaraiam nengena flafnaba fwinam onigwagia flafna og, mangwal maia fegba nasa maisim Godna lala seifo ga.

<sup>22</sup> Afa sa nengigim pugu afwambagam blonam afa ehe mas ehengelim mo lagini mo. Asa ehengel anwenafinim og, sonaba mangwalim haigim ehe nangug Godna lala megam. Afa ehe ningana mungu ogfunigena afa mengigna sihiagegba awai, ehena mengig ati pwakafena.

<sup>23</sup> Afa Sekaraiana gafuga feawagigba ati awaienaba asa ehe pese heafna kembang gam ikana.

<sup>24</sup> Afa sa sumi yi ehena angwag Elisabet afnialigni fena eba ehe meagam sefo gohun ikan afala pugufeg wasifenaba afa sa Elisabet enaig esona

<sup>25</sup> og, “Sawou autunam ka afnialigni fwainig fenaba asa kam Ainiyag aflafenagim hwa afwanefimba tigefta fakanag.”

### *Oflanai el Mariam Sisasim wanigiagim sihina*

<sup>26</sup> Afa maia enwesog la pugufeg wasifenaba Elisabet ati afnialigni fenaba asa God oflanai elim Gabrielim Nasaret kembang gam ningihiana eba Galili provins gam.

<sup>27</sup> Afa ehe ikanam angwafig angwaming gim puguna enag angwafigbi ati Josepim faigim eso fwahini ena elbi King Devit gofenaba ehganafena. Afa enag angwafig angwamingna unehlagba Maria. Ehe mas saglag i mungwa kife la ahgini mo eba suialag angwafig fena.

<sup>28</sup> Afa Gabriel oflanai el enag angwafig enaig esona og, “Angwafig niasabam, Ainiyag ati ne i ahgo asa ma nem fwinam suiala feafilai.”

<sup>29</sup> Afa Maria ena mo higinam olug fingifenam afa onigigna og, sonaba haig mo he!

<sup>30</sup> Afa oflanai el ehem sihina og, “Maria, nofe ne embefe, eba God ati nem fwinam olug suiala fenag.

31 Sa hig, eba ne afnialigni fenam afa ne fangonai luwal wanigafe, asa ne Sisasim unehla.

32 Eba saglag el gofe afa sa enaig seflifife og eba Godna leg wasneig nemug. Eba God ehem gafa misog el lasu ofe ehena simbianiga king Devit lofefe.

33 Eba Jekopna simbianigagna misog el wahkig gofife, ehena misog el gafugag mas awaie nai.”

34 Afa Maria oflanai elim enaig sahna fena og, “Enaigba sa haig pugufefe? Kaba mas alagana feg mo.”

35 Afa oflanai el ehem pese waike sihina og, “Heafa Godna Sungwabug ehe nem blonafe asa Godna wasneig nem ihlafenagba asa ne ena luwalba nengigim wanigafe. Enaba Godna suialag afsug el asa ehem enaig seflifife og Godna Leg.

36 Sa hig, neana mangaug Elisabet ati watiaueg enaig afnialigni fegba eba fangonai luwal wanigafe. Afa ilawana enaig esogona og eba mas luwalba flai. Afa glawanaba ati afnialigni feg afa ehena enwesog la gohug was ati afunag.

37 Eba God ehe mungwali mangwalba eseagefe.”

38 Afa Maria esona og, “Sa hig, kaba Ainiyagna gafugag angwafig asa ati ne esog sa ma gwenaig ese.” Afa sa oflanai el ehem fwaha ikana.

### *Maria ika Elisabetim nanguna*

39 Afa sa gwenenam Maria ikagna distrik Juidiana kembang mugam kukana.

40 Afa ikanam Sekaraiana lala megam seifo ikanam Elisabetim suialag ona.

41 Afa Elisabet Mariana mengig higinam afa sa luwal ehena atag lanai bigmug fiagifni. Afa Godna Sungwabug ati Elisabetim ihlafenagenaba.

42 Afa ehe fwina enaig esona og, “God ati nem suialag nemug esenagim afa ne mingnag angwafigim gosenig. Afa sona luwal sa neana atag la gibi ehe gafa God suialag nemug ehem faife.

43 Kaba amban afa kana Ainiyagna afag ka nangum blog?

44 Sa hig, maia ena mo neana blog kana angug la pegba asa luwal kana atag lanai sifakalegim afa fapisofeaka.

45 Sa ne onigim Ainiyagba nem enaig esenafe sa ati nem sihinag eba se nufunam sifakale.”

### *Mariana mwanafi*

46 Maria enaig esona og;

Kana olug Ainiyagna unehlagim fingi ofe;

47 Afa kana sungwabug Godim sifakalenag ehe kam kweagfug afa kam esenagba ka suialag nemug goh.

48 Kaba ehena gafugag angwafig esug feg afa ehe eba mas kam etetig mo; afa sa ilawo afa nengigim gafa mungwali el enaig esogofe og, God kwania sifakaleg ehem faig.

49 Afa sa wasneig God kam enaig esenagba asa kam suialag pugunag. Asa ma ehena unehlag gwese afsug gofi.

50 Afa el sa ehem ahnai skaufinig enag ehengelim aflafenig. Eba gwenaign esenfie ilawa gafa wahkig gwese gofife.

51 Ehena ninga wasneig gafugafeg, afa el enaig onigig ka kike gosig el feasaig, asa heafgelni unehlam fingifig lambfuia minefig enaig elbi eba ehe amtakwalig aitime.

52 Afa eba misog elim pigalampife afa unehlag fwainig elim mo fingi lamb fukufe.

53 Afa elim bini pigig eba ehengelim suiala gawig lamboaihi asa ehafba ihla feasaife afa sa gawig kaksagna el feasaig eba mas fai asa ningitigiba esug afufe.

54 Afa autunam bigelni simbianigam God mo sihi fwahani asa ehe heafna gafugag elim Israel lanaim kwaganig.

55 Afa ehe maisim onigig gofena enag ogna Abrahamim aflafenam asa ma enag gwese simbianigam gohon fi.

56 Maria Elisabet i hawagin ikan sambaga mungu was fenaba asa heafna kembang gam pese ikana.

### *Elisabet Jonim wanigana*

57 Afa maia enag osuna pugunaba Elisabet fangonai luwal wanigana.

58 Afa sa heafna hihe i afa mungwa kembang lanai i ena mom higinim og Ainiyag ehem fwina aflafenag afa sa ehengel sifakalini.

59 Afa maia gug yi gohug osuna pugunaba asa ehengel ambe ona luwalna nihim kofuni enaigba esenibi eba Ju heafgelni nihe enaig fena. Ehengel ona alagna unehlagim Sekaraiam unehli.

60 Afa luwalna afag esona og, “Mangofi, nawo Jonim unehli.”

61 Afa ehengel ehem sihini og, “Nengelinai enaig unehlagba goh mo.”

62 Afa ehengel ninga bulni ogfuiagim afu alagim sahani og, “Ambanim ne luwalba ounehla?”

63 Afa sihini og osum mangwal flibiba kasa enanai yi ginofe afa sa ehe enaig ginofena og, “Ehena unehlagba Jon.” Afa sa ehengel fwina onigwagia flafna.

64 Afa sa Sekaraia pese ikagna mo lagwagenam asa Godna unehlagim fingife fukuna.

65 Afa heafna kembang la nai mungwali enaigim nangunim embefeagini afa ena mo mungwali Judiana mug kembang la sa gohkafna enam ikaminefeni.



<sup>66</sup> Afa mungwali el ena mom higwagim afa enaig sihi-agini og, “Sona luwalba sa sumi yi ba haig el fefe?” Ati anwenafini Ainiyagna wasneigbi ehe ahgoffe.

*Sekaraiana mo*

<sup>67</sup> Afa enag luwalna alagim Sekaraiam Godna Sungwabug ati ehem ihlafenagenaba asa enaig mo sihina og;

<sup>68</sup> Nawo Godna unehlagim fingifi Israelna Ainiyagim ehe blog bigim heafna elim kwaganigim afa bigim pese lambig.

<sup>69</sup> Afa wasneig el mungu God Gisfu fwahag asa ehe bigim pese lambfie. Afa sonag elbi eba ehe Devitna simbianiga. Devitba Godna gafugag el.

<sup>70</sup> Asa ati autunam Godna mo fli sihiafule elni mengig la ena moba sihi fwahana.

<sup>71</sup> Ena moba enaig esona og God bigim kwaganig asa angoluweg el i afa fagiule el i ona bigim haig haig esegon asa ehengel mas bigim enaig esegoni.

<sup>72</sup> Autunam God mo bigelni simbianigam sihi fwahani. Afa enaig esoni og ka nem aflafenig afa kikeafna wasneig mo ka mas onigig etetini.

<sup>73</sup> Afa ehe bigelni simbianigam Abrahamim enag nufuna mo sihi fwahanaba. Afa sa glawa gafa ogna bigim gwenag esen.

<sup>74</sup> Afa ogna bigim angoluwegna ninganai moehnam og sa ma heafna gafugagim kehli afa mas big embefi.

<sup>75</sup> Afa big wahkig nofkikena afoamine fifibi afa sa big suialag nihe la afa afsug nihe la Godna nofla eseafufum.

<sup>76</sup> Afa ne kana luwal, afa nengigimba nem enaig sefla fife og sonag elbi eba mo fla sihiaule el God sisia nemug feg. Eba ne Ainiyagim gosenam ehena minam tohlagefe.

<sup>77</sup> Afa sa enagba elim ogfufenugeiba sa ma anwenafi ehena kwania aflafeg God sawifegim amtakwalig nihem elni huguflaitinim asa pese lambife.

<sup>78</sup> Afa bigelni Godna aflafenag nengigim nengigim fiahka. Afa enag elbi God Gisfu fwahag elbi eba ofenaiba leana osu bugug lofug.

<sup>79</sup> Eba ehe oflanai pe blonam afa el sa sikulufeg la auguia eba ati muhla pigiegim ofesai asa enam ombusug faifi. Eba ehe enag olug enesieg mina gam ogfunfie.

<sup>80</sup> Afa ena luwalba sumi pugu kwaniafenam afa heafna sungwabug gafa pugu wasneife afa sa ehe pugunam bite behig gam ikafe afa sa nengigim mo Israel elim ambala pugunife.

## 2

*Maria Sisasim wanigana**Matyu 1:18-25*

<sup>1</sup> Enenam maia Romna misog el Ogastas unehlag osugonfinibi ehe nihe mo mungwali elim kagahlani.

<sup>2</sup> Enaba ilawana. Misog el Kwirinius Siria provins la gofnaba enenam unehlagba suguni.

<sup>3</sup> Asa mungwali hana hana kembangim fwatiaginim pese heafgelni kembang gam fafufena og sa ma misog el ehengelninehlag suguni.

<sup>4</sup> Afa Josepba King Devit gofenaba ehgenafena asa Nasaret Galilim fwahanam Judiagam Devitna kembang gam Betlehem gam ikana.

<sup>5</sup> Afa nasa Maria i ahkana. Enag angwafigbi autunam ehem esu fwahini. Misog el oga eheningina unehlag buk la fakan. Enenam Maria ati afnialinifena.

<sup>6</sup> Afa gwenanai yi maisim Betlehem la hawag fenaba luwal gohugim ati meifena.

<sup>7</sup> Nasa fangonai luwalim fuklana eba angwam luwal afa ehem bulmakauna fane ahgag bokis la fakanam lofugna fwahla fwahana. Enaigba esenaba eba mungwali lala el ati ihlafeagena.

*Oflanai el afuna sipsip nangwaghiawagig elim mo sihigoni*

<sup>8</sup> Afa ena kembang lanai sipsip nangwaghiawagig el afu kembang ehbegam sinaini sipsipim nangwaghiage afufna.

<sup>9</sup> Afa Ainiyagna oflanai el blona ehem puguni. Afa Ainiyagna kwania ombusugni ehe ehengelim molu kugofakaniba afa ehengel fwina embefeagini.

<sup>10</sup> Afa sa oflanai el ehengelim enaig esoni og, “Nofe ne embefi. Sa higim ka nem suialag mo ublung. Ena moba mungwali el sa fwina sifakalife.

<sup>11</sup> Afa hwag osuna Devitna kembang la angwafig mungu luwal fuklag afa ena luwalba mungwali nem pese lambfe. Eba Ainiyag ehe fegim afa el God Gisfu Fwahiag Elim pese hefum lambigim.

<sup>12</sup> Afa sa ne enaig nangufife asa ne anwenafi eba kana mo nufunam feg. Ne nanguiba luwalim lofugna kekenaginim bulmakauni fane ahgag bokis la fati fwahife.”

<sup>13</sup> Afa maia oflanai el enaig mo sihi fwahanaba afa sa gwei ikagnam kaksag oflanai el oflanai apaiye ambenam wanig afohiafna oga Godna unehlagim figifi. Afa sa ehengel enaig esogona og,

<sup>14</sup> God sisinai nemugna unehlagim fingifi. Asa ma bitenai el Godna membug la olug enesieg la gohkai.

*Sipsip nangwaghiawagule Sisasim afu nanguni*

15 Afa maia oflanai el ofgam afunaba afa sipsip nangwaghiawagig el hefum sihiawaginim og, “Is ai nawo afu nangui mangwal ehe Betlehem la pugug. Ainiyag sa bigim ena mo sihinig.”

16 Afa asa ehengel ikagna afuna. Afu nangwagnibi Maria i Josep i hawagfnaba afa luwal mo bulmakauni fane ahgag bokis la pegifni.

17 Afa nangu fwahinim asa moamo sihigoni oflanai el sa luwal mom sihini enam.

18 Afa mungwali el ena mom higwaginim fwinam onigwagialafna. Sipsip nangwaghiawagig el sa esinibi enam.

19 Afa Maria ena mo mungwali flanam onigig gofna.

20 Afa sipsip nangwaghiawagig el pese afunam Godna unehlagim fingifni. Ehengel Godim sifakalini asa ehe enam mo higini afa nanguni afa oflanai el sa sihinibi enaig ena puguna.

*Sisasna unehlagim unehlini*

21 Maia gug yi gohug osuna ika awaienaba afag wanigina asa luwalna nihim mo kufunim afa sa Sisasim unehlini enaigba esenibi eba Ju heafgelni nihe enaig feg. Enag unehlagba maisim afagna atag la feafnaba oflanai el ati unehla fwahana.

*Simeon i Ana i Sisasim Godna kwania lala la ahnanguna*

22 Enaigba pugunaba eba Josep i Maria i ikan Jerusalem la Godna kwania lala pugunam asa ona Ju elni nihem ahpatalku asa afsug ahfefe. Afa luwalim ahwaniblunam asa ona Godim sis tuhulu ahfai.

23 Enaigba sahfenaba eba autunam God enaig nihem fakani. Ena nihe enaig esona og, “Fangonai luwalim sa afag lasflam wanigag eba sa ma enaig esogoi hwaba Godna.”

24 Afa sa eheningi gafa gwenaig sahfena afa sambaga twafig Godim tuhulu ona ahfai. Enaba Ainiyagna nihe mo ati enaig sihifena og sa ma gamp sambaga me awai was sambaga me sa ma enag tuhulu fai.

25 Afa enanai yiba Simeon gafena. Enag Jerusalemlanai elbi eba suialag el fenam Godim lotu fenakafnaba afa ehe maisim nengeakafna el sa God Gisfu Fwahag Elim og sa ma Israel elim esenibi sa ma olug enesieg la augui. Afa Godna Sungwabug Simeon nai yi gofenaba.

26 Afa Godna Sungwabug ehem enaig sihifena og, neba mas ikagnaba lahai eba el sa God elim lambigim Gisfu fwahag enam nangufe.

27 Asa Godna Sungwabug ehem olugim fingifenaba afa sa Godna kwania lala gam ika seifo gafnaba. Asa Sisasna alag

i afag i Sisasim ahwanigina ahseaifona enaigba sahfenaba eba ati nihe mo la enaig mo gifini.

<sup>28</sup> Afa sa Simeon eheningi muhla pugunam luwalim foaklanam Godna unehlagim fingifukuna og;

<sup>29</sup> Ainiyag autunam ne kam sihi fwahanaba enaba nufunam pugug. Ilawo kaba neana gafugag el sa ma kam olug enesieg yi lahai.

<sup>30</sup> Ati ka kikeafna nofna nangug mangwal sa ne esegba enaba kangelim lambig.

<sup>31</sup> Enaba ne numehiageg ambala fwahag.

<sup>32</sup> Afa enaba afwambagam elim ombusug faig sa ma anwenafi neana sawiegim asa ma Israelna elim unehlagingifini.

<sup>33</sup> Siasna alag i afag i Simeonna mom ahigina maia enaig sihifeagofe fenaba afa sa eheningi fwina onigwag ahfegofena.

<sup>34</sup> Afa Simeon og God nem suialafenifie afa sa Mariam sihina og, “Sa hig, sana luwalba God Gisfu fwahag asa kaksag Israel elim kwaganife afa eba kaksag elim mingnagim mo amtakwalig aitime. Afa maia enaig el Godna onigigim ogfuiba asa kaksag el ehem moalampinagife.

<sup>35</sup> Maia enaig esibi asa ehengelni meaganai onigig ambala puguamine fenugefe. Afa enaig olug kinieg ofenaiba pina neana olugim pifife.”

<sup>36</sup> Afa mo fla sihiaule angwafig ehena unehlag Ana enanai yi gofena. Afa ehena alagna unehlagba Fanuel afa Fanuelba Aser gofnaba ehgenai fena. Afa Anaba ati watiauena. Ehena alagag la ganaba ehe krismasba elegeg la gohug enaig fena.

<sup>37</sup> Asa gwenai yia la ehena alagagim maia lahanaba asa ehe fwaimu eseakafna. Anaba eba 84 krismas enaig fena. Afa Ana mas Godna kwania lalam fwaha ikana mo eba eheba gwese Godna unehlagim fingi fegufna. Afa ehe fane fwaiyunam afa sinaini i osuna i wahkig Godna kwania lala beten la fawofe gofna.

<sup>38</sup> Afa sa enenam ehe blonam luwalna muhla pugunam asa Godna unehlagim fingi fukunam. Afa mungwali elim nenge afo God Jerusalem elim lambife asa enam luwalna mom sihina.

### *Josep pese Nasaret ikana*

<sup>39</sup> Ehengel enaig gafugag eseaginibi eba Ainiyagna nihe mo ati enaig sihi fe fwahana. Afa sa Josep i Maria i Galili la ika ahpugunam asa heafna kembang Nasaret gam mo pese ahkana.

40 Afa luwalba enaba ati kwania feagenam afa wasneina afa anwenag suialag kaksag lamboagena afa Godna membug ehem gohna.

*Sisas kwamblog ofenaba Godna kwania lala gam ikana*

41 Afa mungwali krismas sa ikafnaba Sisasna alag i afag i Jersusalem gam Pasova buyis la fakafe ahfegofena eba autunam sa God Israelim eseniba asa suialag augufena nasa enag osunam onigifini.

42 Sisas 12 pela krismas fenaba asa Jerusalem gamba wani fafufeafufna.

43 Afa maia enag buyis awai enaba asa Josep i Maria i pese heafna kembig gam ahakofna. Afa Sisasba kwablog ofefnaba enaig Jerusalem kembig gafnaba alag i afag i lasu ahkana mas ehem anwena ahfena mo.

44 Afa eheningi enaig onigig ahfena og eba mingnag elim atiba patalkig, eheningi ati ahka mungu osuna ahfena. Afa eheningi Sisasna hihem fasahtigi ahfenam.

45 Afa mas ahnanguna mo asa pese Jerusalem gam ahyisgi ahkana.

46 Eheningi ahyisge gohun ikan sambaga mungu osuna fena. Ahyisge gohun ahnangunaba Godna kwania lala seifo gafna ehe anwena elni mom mi afa misog elni mom mi higwagenam asa fasahtigife hiageaufna.

47 Afa mungwali el ehena mom higinim afa sineminefini ehena anwenagim asa mo mungwag waikke sahini ena gafa gwenaign esini.

48 Afa alag i afag i blo ahnangunam olug fwinam fingi ahfenam afa afag esona og, "Luwal mangigim ne enaigba eseg. Eba ne ka mi nimbeafna alag mi olug kinig ne kam faigbi ka nem ahyisge ahblog."

49 Afa ehe wahigi sihini og, "Neaho kam ahyisge gohug? Enaigba mas ne anwena ahfeg mo, kaba atiasi kikeafna apina lala ga?"

50 Afa eheningi mas ena mogim anwena ahfena mo.

51 Afa sa Sisas pese patal kana Nasaret kembig gam afu enanai yi apukenam asa ehe wahkig eheningina mungwali mom patalfukuni. Afa ehena afag mo mungwali enaig mom olug onigig la flanam keahlana.

52 Afa Sisas pugu saglag fenam heafna anwenag pugu fwinam suiala feagena. Afa sa God ehem fwina membena-gena afa el gafa gwenaign esini.

### 3

*Jon bula laitiag el mo sihiagena  
Matyu 3:1-12, Mak 1:2-8, Jon 1:19-28*

<sup>1</sup> Afa maia 15 yia fenaba Taiberius Rom elni misog el fena. Afa Pontius Pailat eba distrik Judia gavmanna gosig el fena. Enenaba Herot distrik Galilim nangwaghiage gofna afa ehena sumineg Filip mo distrik Ituria mi afa Trakonitis mi enam nangwagehiagena afa Lisantias mo distrik Abilenem nangwagehiagena.

<sup>2</sup> Afa Anas i Kaiafas i eba prisni misog el ahgofena. Enenaba Sekaraiana leg Jon bite behig la gafna. Afa God Jonim mo faina.

<sup>3</sup> Afa sa ma mungwali elim Jordan bu blug muhla gohka enam sihinwageakai afa enaig esona og, “Sa ma olug waikefinim, bu la apaiyeiba afa sa ma God ehengelni antakwalig nihem huguflaitini.”

<sup>4</sup> Afa enaigba pugunaba eba ati mo fla sihiaule el Aisaiana mo buk la gofena. Ena mo enaig esona og; El mungu bite behig la mo sihiakafe afa ehe enaig esofe og, ‘Ainiyagna mina ombusiaganim numwehiagi.’

<sup>5</sup> Afa mungwali mog tutohiageakaiba sa ma tafafiakai sa ma kombugu fegim fuku gwenaig eseg. Afa mina kiapesezim sa ma misosuf gi afa mina mas suialafeg mo sa ma numwehiafli.

<sup>6</sup> Afa bitenai el mungwali sa ma Godna gafugagim nangunim asa ehe bigim lambigim eseg. Ais 40:3-5

<sup>7</sup> Afa asa kaksag el Jon nangum flaubluna bula apaiyegim afa Jon enaig sihifeni og, “Nengel giheana luwalig, God sa ma nem susug fai afa amban nem sihinigbi sa ne embemba afufe?”

<sup>8</sup> Afa atiaba ne nufunam olug waikefigbi eba sa ma nimbeafgelni nihem ogfui eba ati ne nufunam olug waikefig. Nofeka nimbefum esogo, ‘Abraham eba kangelni simbianiga.’ Ka nem sihinig eba God ehe hwa funim eseiba asa Abrahamna simbianiga apuke afohiefe.

<sup>9</sup> Afa mal ati li mog la gi afa mungwali li sa suialag fug leg fwainigba, eba malna higfihinim suwi la laitife.”

<sup>10</sup> Afa el Jonna mom higinim afa esogona og, “Haig sa ka esife?”

<sup>11</sup> Afa ehe wahigi sihini og, “El sa sambaga lofugna fefe asa ma ming mo amban sa lofug fwainig feg sa ma enam fai. Afa amban sa fane fwainig feg ena gafa sa ma gwenaig esenai.”

<sup>12</sup> Afa mingnag kig lambiule el ambe bula apaiyofefnaba Jonim sahani og, “Tisa, haig sa ka esife?”

<sup>13</sup> Afa ehe wahigi sihini og, “Kig sa ne lambigbi asa ne gavmanna moaihla lambifum nofene gwesim hilifi.”

<sup>14</sup> Afa ami gafa ambe ehem sahani og, “Ka gafa haig sa ka esife?”

Afa ehe sihini og, “Nofeka mingnag elim amtakwal hi-  
aginim kig lambigoni, afa sa nofeka mingnagim muni gofe-  
gon sa ne nimbeafna kigim oniginim asa ne gwenai gihla  
eseafufum.”

<sup>15</sup> Afa el enaigim nangunim olug fingi feskofenam afa  
enaig onigini og eba hwa Jon me awai God Gisfu Fwahag el  
me.

<sup>16</sup> Afa Jon pese wahigi sihini og, “Kaba buna nem esenig,  
afa el sa sumi yi oblo ena elbi eba wasneigni feg ehena was-  
neig kana wasneigim kwegfug gwesim ikag, kaba mangwal  
suialag el mo na ka ehena mong lofug weba pigina. Eba ehe  
nem Godna Sungwabugni afa suwina asa nem bula laitife.

<sup>17</sup> Eba ehe savol ningana flanam asa blofe afa ehe blonam  
fungisge mo wit yi nai lambuhiagenam asa wit mo lambi-  
nam heafna wit lala skofe afa fungisge mo lambinam suwi  
wahkig lagig yi wehlafe.”

<sup>18</sup> Jon maia ena mo sihinaba afa ena mo elni olugim fwaki  
lasana. Ehe elim Godna suialag mo sihinwageg gafugafena.

### *Herot Jonim kalabus i fatina*

<sup>19</sup> Afa maia Herot heafna suminegna angwagim Herodi-  
asim fapugufe nagohun asa flana afa haig haig nihem gafa  
gwenai geseagena nasa Jon ehem fenagena.

<sup>20</sup> Afa sa ena nangum Herot Jonim kalabus lala fla fati  
fwahana.

### *Jon Sisasim bula fatina*

#### *Matyu 3:13-17, Mak 1:9-11*

<sup>21</sup> Afa Jon maisim kalabus seg fwainig fiafnaba afa mung-  
wali el bula apaiyena afa Sisas gafa gwenai gesena bula  
pena. Afa bula penam pugu betene gofenaba afa sa of  
bafona.

<sup>22</sup> Afa maia of bafo gofnaba Godna Sungwabug gamp  
lofug Sisas nangum pe blonam afa higfufnaba Godna mengig  
heven la enaig lagofna og, “Ne kana leg, ka nem fwina  
membenag, afa kana olug nem suialafenag.”

### *Sisasna simbianiga unehlag*

#### *Matyu 1:1-17*

<sup>23</sup> Afa sa Sisas gafugafena enag ehena krismasba 30 enaig  
la fena. Afa el enaig onigini og eba Josepna leg,  
afa Josepba Helina leg,

<sup>24</sup> afa Heliba Matatna leg,

afa Matatba Livaina leg, afa Livaiba Melkini leg,

afa Melkibi Janaina leg, afa Janaiba Josepna leg,

<sup>25</sup> afa Josepba Matatiasna leg, afa Matatiasba Amosna leg,

afa Amosba Nahumni leg, afa Nahumbi Eslina leg,

afa Esliba Nagaini leg,

26 afa Nagaibi Matna leg,  
 afa Matba Matatiasna leg, afa Matatiasba Semenna leg,  
 afa Semenba Josekna leg, afa Josekba Jodana leg,  
 27 afa Jodaba Joananna leg, afa Joananba Resana leg,  
 afa Resaba Serubabelna leg, afa Serubabelba Sealtielna  
 leg,  
 afa Sealtielba Nerina leg,  
 28 afa Neribi Melkini leg,  
 afa Melkibi Adini leg, afa Adibi Kosamna leg,  
 afa Kosamba Elmadamna leg, afa Elmadamba Erni leg,  
 29 afa Erbi Josuana leg, afa Josuaba Elieserna leg,  
 afa Elieserba Jorimna leg, afa Jorimba Matatna leg,  
 afa Matatba Livaina leg,  
 30 afa Livaiba Simeonna leg,  
 afa Simeonba Judana leg, afa Judaba Josepna leg,  
 afa Josepba Jonamna leg, afa Jonamba Eliakimni leg,  
 31 afa Eliakimbi Meleana leg, afa Meleaba Menana leg,  
 afa Menaba Matatana leg, afa Matataba Natanna leg,  
 afa Natanba Devitna leg,  
 32 afa Devitba Jesini leg,  
 afa Jesibi Obetna leg, afa Obetba Boasna leg,  
 afa Boasba Salmonna leg, afa Salmonba Nasonna leg,  
 33 afa Nasonba Aminadapna leg, afa Aminadapba Atminna  
 leg,  
 afa Atminba Arnina leg, afa Arniba Hesronna leg,  
 afa Hesronba Peresna leg, afa Peresba Judana leg,  
 34 afa Judaba Jekopna leg, afa Jekopba Aisakna leg,  
 afa Aisakba Abrahamna leg, afa Abrahamba Terana leg,  
 afa Teraba Nahorna leg,  
 35 afa Nahorba Serukna leg,  
 afa Serukba Reuni leg, afa Reubi Pelekna leg,  
 afa Pelekba Eberna leg, afa  
 Eberba Selana leg,  
 36 afa Selaba Kainanna leg, afa Kainanba Arpaksatna leg,  
 afa Arpaksatba Siemna leg, afa Siemba Noana leg,  
 afa Noaba Lamekna leg,  
 37 afa Lamekba Metuselana leg,  
 afa Metuselaba Enokna leg, afa Enokba Jaretna leg,  
 afa Jaretba Mahalalelna leg, afa Mahalalelba Kenanna leg,  
 38 afa Kenanba Enosna leg, afa Enosba Setna leg,  
 afa Setba Adamna leg, afa Adamba Godna leg.

## 4

*Satan Sisasim yuhna*  
*Matyu 4:1-11, Mak 1:12-13*



<sup>1</sup> Afa maia Godna Sungwabug Sisasim ihlafenagenaba asa Sisas Jordan bum fwahanam asa el fwainig gam ikana. Eba Godna Sungwabug ehe wanikina.

<sup>2</sup> Afa Sisas enanai yi ika ganaba eba fane neg fwainig ikan 40 osuna fena afa maia enaig osuna awaienaba ehem bini fwina lahana afa sa Satan ehem yuhna.

<sup>3</sup> Afa ehe Sisasim enaig esona og, “Afa ne Godna leg fegba sane hwa funim esoiba sa ma amba lofei.”

<sup>4</sup> Afa Sisas esona og, “Godna moba enaig esog, Afa faneba mungu mas elim nofkenagag fai.”

<sup>5</sup> Afa maia Sisas enaig sihifenaba afa sa Satan ehem su-lufanam mug gam fuku wanikina ena mugba mungwanam fena. Enanai yi ehe mungwali bite i afa suialag gawig i enam ikagna ogfunagena.

<sup>6</sup> Afa sa Sisasim sihina og, “Ma ne kam mong kokini kwakwagemam kana unehlagim fingifeiba, eba ka sa nem bite i gawig i mungwali faiba sa ne enam mungwali nangwaghagefe, enaba kana feg. Afa ambanim ka membenagba eba ka sa ehem faife.

<sup>7</sup> Ma ne kam mong kokini kwakwagena enaig eseiba eba ka sa nem fai.”

<sup>8</sup> Afa Sisas wahigi sihina og, “Godna mo ati enaig sihifeg, Sa ne Godim ahnai skau fena eba naho neana Ainiyag asa ne ehem mungu lotu fena!”

<sup>9</sup> Afa ena mug ahfwahanam pe Jerusalem gam ahkanam enanai yi Godna kwania lala wofugug sisi yi nemug la Sisasim lasunam afa sihina og, “Ne Godna leg fegba asa ne puso pekai.

<sup>10</sup> Eba ati Godna mo sihig;  
Eba heafna oflanai elim sihinibi asa ambe nem ningana kehli apaiyeufufe.

<sup>11</sup> Afa fun sig mas nem mong yi pifi eba ehe ati nem numwehefu.”

*Sam 91:11,12*

<sup>12</sup> Afa Sisas wahigi sihina og, “Godna mo enaig sihifeg, Nofene Godna wasneigim yuhna nembiafna Ainiyagimba.”

<sup>13</sup> Afa Satan Sisasim haig haigim yuhnagegim fwaha ik-agim mwakwalig nengego.

*Sisas Galili yi gafugafena*

*Matyu 4:12-17, Mak 1:14-15*

<sup>14</sup> Afa Sisas pese distrik Galili gam Godna Sungwabugni wasneig yi ikana. Afa sa Sisasna mom mungwali kembig sihiageafuna.

<sup>15</sup> Afa ehe Ju elni laskuhlag lala ika seifufnam asa mungwali elim enanai yi ogfufenugeafnaba asa mungwali el ehem suialagoni.

*Nasaret nai el Sisasim mas fatini*  
*Matyu 13:53-58, Mak 6:1-6*

<sup>16</sup> Afa Sisas Nasaret kembang gam ika puguna. Afa Nasaretba enaba ehe enanai yi muhna fena. Afa maia laskuhlag osuna pugunaba Sisas ika ehengelni laskuhlag lala seifo gofnaba. Afa ehe buhia gohnam asa ogna Godna mom suwigim.

<sup>17</sup> Afa sa mo fla sihiaule Asaiana ginof flinim ehem fainiba asa bafonam suwigina. Ena moba enaig esona og;

<sup>18</sup> Ainiyagna Sungwabug kam blonag, afa wegig fwahagba asa ka ehena suialag mo esug elim fla blunig. Enag ehe kam ningihiagba na koka kalabusinai elim mo sihinibi asa ma enanai yi fwahinim apuke esug afui. Afa koka ikanam nof tetini elim sihigonibi asa ma nofug bahia skofei ehe kam ningihiagba enag ka blo koka elni kinigim flafatini.

<sup>19</sup> Ehe kam ningihiag kam og asa ma enaig sihifei og, Ainiyagna osuna ati pugug, og na heafna elim esinibi asa ma suialag augufei. *Ais 61:1,2*

<sup>20</sup> Sisas Godna moamo suwigi pe fwahanam pese buk mo pwakafenam elim fainim asa ehe mo ika peganam afa mungwali el laskuhlag lalanai Sisasim mungu nofna nangu flafna.

<sup>21</sup> Afa Sisas enaig sihifeni og, “Sona mo Godna buk la nai sa ne ati higig, glauwaba eba nufunam pugug.”

<sup>22</sup> Afa ehengel ehem suialagonim afa fwinam onigwagea flafna asa ehe suialag mo sihinibi enam afa ehengel esogona og, “Ati big anwenafig sona elbi Josepna leg ehe, haisegba sa enaig moba ihla sihig?”

<sup>23</sup> Afa Sisas ehengelim enaig sihifeni og, “Atiaho ne sona moba flig asa ne kam sehifie ena mo enaig esog, ‘Dokta sa ma heafna eligim eseiba sa ma suialafei.’ Afa ne esogog, ati kam moaba higig mangwal sa ne Kaperneam la ne eseg. Afa glawo hwa nai yi gafa ne gwenaig esig.”

<sup>24</sup> Afa Sisas sihini og, “Nufunam ka nem sihinig, Godna mo fla sihiaule elni kembang lanai ehengel mas ehena mom higig.

<sup>25</sup> Afa ka nem nufuna mo sihinig, ilawana sa Elaija gofnaba enenaba osu kig gohna ikan ikan sambaga mungu yia fena afa ika enwesog la gohug was fena. Osuba gohnaba asa ehengelni mungwali bite bini kwania puguni afa enenaba Israel lanai angwafig kaksag ehengelni aligabugug ati pigie skofenaba.

26 Asa God mango Elaijaba Israel angwafigim ningihinig mo eba heafa Sarefatim Saidon kembang muhla naim ningihianig. Afa ehe angoluwag angwafigim aligag ati lahanag enam ningihianag.

27 Afa enena Elaija gofnaba enenaba Israel el kaksag enehna feasaina afa mas ambanim mo ena gihba wangene fena mo awai afa eba Naman ehe afwambanai el Sirianai mungu he enaigba fena.”

28 Afa lasukuhlag lalanai el mungwali yi ena mom higinim afa fwina olug kakage skofena.

29 Afa sa Sisasim kembang ehbegam fli ningihini. Ehengelni kembangba mug la gifni afa sa ehem mugam wanig afuna oyna plau fati.

30 Afa sa ehe ehengelim olyinai fwatinam pugu ika kana.

*Sisas mwaifig simbagahlag elim suialafe fatina*

*Mak 1:21-28*

31 Sisas Kaperneam gam pekanam distrik Galili la gafna. Enanai yi laskuhlag gohug osuna wahkig feafufna enaba seflig de Sabat afa sa Sisas enanai elim ogfufenugena.

32 Afa ehengel ehena mom higinim olug fingife skofena ofenaiba saglag anwenag el ogfufenig.

33 Afa enanai el mungu blo laskuhlag lala gafna ena elbi mwaifig amtakwalig simbagahlaule enag fwina enaig esona og,

34 “Hei, Sisas Nasaret lanai ne blog haig kam ona esen? Enaigba kam si noka amtanafe klaiti? Ati ka anwenafig neba afsug el Godna ne blog.”

35 Afa Sisas ehem fenamine fenam afa esona og, “Mwalfwai lifefunam sana elim fwahanam ika.” Asa mwaifig amtakwalig elni nihinai hugofu akofenaba el mo bite la elni usmuiaq la pena afa mas elbi enaba amtakwaligna mo.

36 Afa mungwali el enam nangunim embefeaginim afa hefum sihiagini og, “Hai, sonaba haig mo maia ofenaiba anwena el wasneig nifeg nasa mwaifig amtakwaligim esonagba afa sa elni nihinai hugofug ikag.”

37 Afa sa ehengel mo mungwali kembang sihiageafuna Sisas sa elim esenaba enam.

*Sisas Pitana kowagim wagene fefatina*

*Matyu 8:14-15, Mak 1:29-31*

38 Afa Sisas ena laskuhlag lala mo fwahanam pugu ikanam Saimonna lala seifu kana. Afa ena lalaba Saimonna kowag gihna gifni ehena elig fwina nolugeagenaba asa ehengel Sisasim sihini og sa ma ehem kweagfui.

39 Afa sa Sisas ika ehem muhla kuhlanam asa gihim wasneig mona esonaba afa sa gih angwafigni nihinai hugofu kanaba asa enag angwafigbi ikagna buhiana ika fane ehengelim tulfuni.

*Sisas kaksag elim gihnam wagene fetifena*

*Matyu 8:16-17, Mak 1:32-34*

40 Afa maia osu penaba enaigna el heafgelni hihem gihna wanambena Sisas nangum. Afa sa Sisas mungu mungugim ningana tuhunwagenaba asa mungwali ehengelim gih wagine feasaina.

41 Afa Sisas mingnag elim mwaifig simbagahlaulem gwe-naig esenibi asa mwaifig ehengelim nihinai hugofuhia afuaminefeni afa mwaifig elni nihinai hugofuhia afuamine ofefnaba ehengel enaig esogona og, “Ne Godna Leg!” Afa Sisas ninimuhiagenam afa kweni og, nofeka moaba lagim afa ehengel ati anwenafini sona elbi God Gisfu Fwahag el.

*Sisas ika mingnag kembang mo sihinuwageakana*

*Mak 1:35-39*

42 Sisas leana gubi yi ena kembang fwahanam el fwainig gam ikana. Afa el yisigiafunam nangunim kwini og, ese masa ehengelim lasani ikafe.

43 Afa Sisas enaig sihifeni og, “Kaba kawo Godnabog meg mom mingnag kembang la gafa sihiage. God kam ningihiagba enag ka blog koka enaig gafugafe.”

44 Afa Sisas distrik Judiam ikanam laskuhlag lala seifo mo sihiwagena.

## 5

*Sisas Pitam sawag lambig mom sihina*

*Matyu 4:18-22, Mak 1:16-20*

1 Afa maia Sisas ika Genesaret bu blug yi gofnaba afa kaksag el ehem nangum ambe ona Godna mom higim afa sa ambenam ehem muhla waki fakanam kikigenagini.

2 Afa Sisas sambaganigi botim bu blug yi nangwagnaba el sawagim kikiageafuhun fwahinim fufwalam bu la gigeage afufna.

3 Afa sa Sisas ika fuku Saimonna bot la peganam Saimonim sihina og, aublo seifu peganam botim susum plau plau fefkuiba sa ma hwa nai yi weti fwaha ikai. Afa Sisas bot la gafnaba elim ogfuwagemam.

4 Afa sa Saimonim sihina og, “Gwesim ma bot mo ikai asa ne i nimbiafna hihe i fufwala mo ahfatinam sawag ahlambigim.”

<sup>5</sup> Afa Saimon esona og, “Ainiyag ati kaba sinaini yisigea-fuhug ehegepusig si huguka skofig mas ka sawagba fufwalanaba lambig mo, eba ati ne esog eba ka esife.”

<sup>6</sup> Asa gwenai esini maia fufwala fatinibi sawag fufwala mengig la puguna ona fufwala kwagfo.

<sup>7</sup> Asa eheningi ming el sambagam ningafuei ahfeni og sa ma kam kwaganig. Asa eheningi ming bot ahblunam ahkwaganaba asa sawag mo fufwalana flinim asa sambaga bot la kokofeawagniba memtog la puguiag ahfen. Afa sambaga bot enag kinig oagna bu megam pe ahka.

<sup>8</sup> Afa sa Saimon Pita Sisasna kig muhla kwakwage penam og, “Ainiyag ika kaba mangwal suialag el mo, kaba el amtakwalig.”

<sup>9</sup> Enaigba esonaba eba mungwali sawag sa lambini enam nangunam sineminefena afa ehena hihe gafa gwenai esini.

<sup>10</sup> Afa Saimonna hihe Jems i Jon i Sebedini legningig gafa gwenai ahfena. Afa Sisas Saimonim sihina og, “Nofe ne embefe, gla ne sawag lambig afa nengigim ne gwenai esefe elim gafa ne kam nangum wanblofe.”

<sup>11</sup> Afa sa ehengel afu bot mo folfunim afa heafgelni mungwali gawig mo fwatinim afa sa Sisasim patalfuna.

*Sisas elim enehnam wangene fefatini*

*Matyu 8:1-4, Mak 1:40-45*

<sup>12</sup> Afa ehe ika mungu kembang la gafnaba afa el mungu enanai yi enehna blo Sisasim nangunam asa mong kokini kwakwagenam nofbosug mo bite gam fiahsah penam Sisasim enaig sihifena og, “Ainiyag atiaba ne membegba eba sa ne kam suiala fefati.”

<sup>13</sup> Afa Sisas ningana tuhugufnaba esona, “Ei, ka membeg, nem sa ma suialafei.” Maia Sisas enaig esonaba asa enag enehba gwei ikagna awaienaba asa elbi enaba suialafena.

<sup>14</sup> Afa sa Sisas ehem wasneig mo faina og, “Nofe ne ena moba elim sihin, magofi eba esug ikanam prisim nim-beafena eligim ogfunim afa sa Godim sis tuhlu fai enaigba ati autunam Mosesna mo sihi fwahana asa ma el anwenafi ena gih ati suialafeg.”

<sup>15</sup> Afa sa Sisas elim ese fatinaba ena mo gwesim mungwanam el kembang ikaminefenaba asa higinim ambefena afa ambe mo higifni afa gihnam wangene feitifeafna.

<sup>16</sup> Enaig eseitife fwahanam afa sa elim mo lasanfna betenegim el fwainigam ikafnam beteneafna.

*Sisas elim ninga mog lihliga wangene fefatina*

*Matyu 9:1-8, Mak 2:1-12*

17 Afa enenam Sisas elim mo sihinwageafnaba afa elim gihnam wangene feitifeafna. Enag elbi Farisi el i afa nihe mo anwenag el i enag Jerusalem kembig afa distrik Galili kembig afa Judia enanai ambe minefe gohkafnaba. Asa Godna wasneig Sisas i ahgohfnaba asa gih elim wangene feitifena.

18 Afa mingnag el ming elim ninga mog lihlignam isgof bog la fli ubina ogra Sisas nangum lala megam saiye ufu.

19 Afa maia el mungwali kimihli fakanaba gihwaginim. Asa lala wofusgim fukwali ufunam enanai yi lala wofusim tofunim afa sa elim mo isgof bogna weana kihlinim asa Sisas gofnaba ena mina fatini.

20 Afa Sisas ehengelni olug onigigim anwenafenim asa enaig esona og, “Hihe, ati ka neana amtakwalig niheaba flafatinag.”

21 Afa nihe mo anwena el i afa Farisi el i ena mom higinim fwina lagni og, “Sona elbi ogra Godna kufeg la gohnam asa enaig esefim. Afa mas el behigba enaigba esi eba heafa Godna gafugag mungu he.”

22 Afa Sisas ehengelni onigigim anwenafenim wahigi enaig sihifeni og, “Nengel ne haig haig onigig nafeasaieg?”

23 Afa ka enaig sihifeba, ‘ati ka neana amtakwalig moba flafatinag’, asa mas ne enam anwenafe nufuna me awai awai me. Afa ka enaig sihifeba, ‘buihia kife flanam ika’, asa ne enam ati anwenafe nufuna feg me awai awai me.

24 Afa kog sa ne anwenafi kaba Nufunam El wasneig hwa bite la ihlafeg amtakwalig nihem flafatiagimba.” Afa Sisas ninga mong lihlig elim nofna nangunam enaig esona og, “Ka nem sihinag buihia nimbeafna kife flanam lala gam ika!”

25 Asa ena elbi ikagna buihianam mungwali elni nofla asa Godna unehlagim fingi fukunam sa heafna lala ga mo ikana.

26 Afa mungwali el Godna kwania wasneigim nangunim afa embefeaginim asa Godna unehlagim fingi finim afa sa enaig esogona og, “Ilawaho enaigba puguba big nangug.”

### *Sisas Livaim suluafana*

#### *Matyu 9:9-13, Mak 2:13-17*

27 Afa sa sumi yi Sisas ikan nangunaba el kig lambiule seifo kig lambig lala gafna. Ehena unehlagba Livai. Sisas ehem unenam og, “Aublo kam patal blu.”

28 Afa sa Livai heafna mungwali gawig mo fwatiagenam asa pugu Sisasim patalfukuna.

29 Afa Livai ikanam Sisasim heafna lala buyisenaba. Asa kig lambiule el i afa mingnag amtakwalig el i fini enag mungwali ahgaflafnaba.

30 Afa Farisi el i afa nihemo anwena el i enag fwinam lagnim Sisasna patalfuiag elim sihinigoni og, “Mangigim ne kig lambiule el mi afa amtakwalig el miba wanahgag?”

31 Afa Sisas wahigi sihini og, “El sa gih fwainig feg eba mas ika doktaba nangui, afa el sa gihna feg ena mungu he eba sa ika doktaba nangui.

32 Afa gwenai ehe ka gafa ka mango blog suialag elim mungu sulfuah mo, amo eba kog kawo amtakwalig elim gafa sulfu.”

*Sisas fane kwegig mo sihina*

*Matyu 9:14-17, Mak 2:18-22*

33 Afa el Sisasim enaig sahna fini og, “Afa Jonna patalfuiag el wahkig enaig esig, fane mo kwegwagigim asa beten mo fig. Afa Farisini patalfuiag el gafa gwenai esig. Afa neana patalfuiag el mo eba fane i bu i ahgagig.”

34 Afa sa Sisas sihini og, “Eba el sa enaig sifafefe angwafigbi flagim asa buyis segim afa heafna hihem wanahgagim. Asa enenamba ehengelim mas fane kweni.

35 Afa maia angoluweg el ambe angwafig flag elim wani-giafugba asa ehena hihe fane kwegig.”

36 Afa Sisas lasug mo enaig sihifena og, “Eba fiteg lofug enaba ati kofo gohugba mas el enaba glaunai lofugim koflanam asa kofwagim kagunam asa kweli. Enaigba eseiba eba glaunaim amtakwalefe. Mango mungwa lofug mo.

37 Afa mas el glaunai wain bugba flanam autunai meme lofug laba sugfoi eba enag meme lofug kofunam\* asa wain bug bite la sugfofe ena meme lofugba eba amtakwalefe.

38 Afa el sa ma enaig ese ena wain bug glaunai sa ma flanam glaunai meme lofug la sugfui.

39 Afa el sa autunai wain bug negim afa glaunai wain bug mo oksigim afa og autunai wain bugba suialafeg.”

## 6

*Sisas laskuhlag osuna gafugafegim sihina*

*Matyu 12:1-8, Mak 2:23-28*

1 Afa enenam maia laskuhlag osuna pugunaba, Sisas heafna patalfuiag elim wanka wit aso la wanseifo wanikafn-aba. Afa ehena patalfuiag el mo wit fug pwtatinim ningana sunpaniagim maia alifieg mo hugfuhia afunaba asa ah-gana.

2 Afa Farisi el enam nangunim afa esogona og, “Sonaigba mas suialafeg mo enaig osunaba mas esi. Eba Mosesna nihe

\* 5:37: Meme lofug eba ehengelni sob lofug. Autunai meme lofug eba fofegim asa pleg.

mo enaig esog nofeka enaig osunaba gafugafi. Haig esegba sa ne enaigba esig?”

<sup>3</sup> Afa Sisas wahigi enaig sihifeni og, “Masi ne Devitna moaba suwigi mo? Devit sa enaig esena, enenam ehem afa heafna hihe fena asa ehengelim bini pigina.

<sup>4</sup> Afa sa Devit ika Godna lala seifonam amba Godim mwalo fakini enag fla nenam heafna hihem fainibi asa ehengel ahgana. Afa mas sona lalanaiba muni elbi ahgai eba heafa pris mungu he sa ena lalanaiba ahgai.”

<sup>5</sup> Afa Sisas sumi yi mo ehengelim sihini og, “Kaba Nufunam El laskuhlag osunaba alag feg.”

*Laskuhlag osuna Sisas elim ninga lihliga wangene fe-fatina*

*Matyu 12:9-14, Mak 3:1-6*

<sup>6</sup> Afa maia ming laskuhlag osuna pugunaba Sisas ika laskuhlag lala seifonam elim mo sihiwagena. Enanai yiba afa el nihiginai ninga lihliga gafna.

<sup>7</sup> Afa nihe mo anwena el i afa Farisi el i enanai yi auguiafnaba Sisasim nofna nangu flafena og ma atiaba ena elim enaig osuna suialafe afatifiba awai awai me afa og nasa ehena minam fahigenaginim asa ehem sehini.

<sup>8</sup> Afa Sisas ati ehengelni onigigim anwenafenim afa sa ninga lihliga elim sihina og, “Sa buihiana hwa nai yi olyi blo gohum.” Afa sa enag el buhianam gohna.

<sup>9</sup> Afa Sisas sihini og, “Ka nem ahsahigi bigelni nihe moba haig feg, enaig osunaba sa big suiala nihe fig me awai big amtakwalig nihe fig me? Afa enaigba big elim kwaganig me, awai big amtanafegonig me?”

<sup>10</sup> Afa Sisas mungwali elim nofna fahigiagenam ninga lihlig elim sihina og, “Nimbeafna ninga fla susnifeafo.” Afa sa enag el maia gwenaig esenaba asa ehena ninga pese suialafena.

<sup>11</sup> Afa nihe mo anwena el i afa Farisi el i fwina olug kakageaginim hefum sihiagini og, “Haig sa big Sisasimba esinife?”

*Sisas heafna patalfuiag elim kanog fwatina*

*Matyu 10:1-4, Mak 3:13-19*

<sup>12</sup> Afa sa Sisas enenam betenegim mugam fukukana enanai yi Godim sinaini beteneawan ikan ikan si ambafena.

<sup>13</sup> Afa maia osu ati opugufenaba enaigna oga heafna patalfuiag elim awamoni maia ambenaba asa 12 pela el mo kwefi fwatinam asa ehengelim Aposel unehlag fwatina.

<sup>14</sup> Afa enag 12 pela elni unehlagba eba Saimon ming unehlag Pita, afa ehena sumineg Andru afa Jems, afa Jon, Filip, Bartolomyu,



15 afa Matyu, Tomas, Jems Alfiusna leg, afa Saimon seflig Selot,

16 afa Judas Jemsna leg, afa ming Judas Iskariotna leg sona elbi angoluweg elim mwauni.

17 Afa Sisas mugim wanfwahanam bite tafagam pe wankana. Afa enanai yiba kaksag el laskuhlana distrik Judia kembang lanai afa Jerusalem lanai afa gwenanai bu blug yi nai kembang Tair i afa Saidon i enag ambe gohkafna.

18 Onga Sisasna mo higifibi afa ehem og ma kam gihnam suiala feitifei asa Sisas mwaifig simbahlaulem elim suiala feitifena.

19 Afa mungwali el enaig esini onga Sisasna eligim ningana tuhufibi asa ma ehena wasneig pugunam mungwali gihim plau fatini.

*Sisas esog el wag fwainig sa ma sifakali*

*Matyu 5:1-12*

20 Sisas patalfuiag elim nofna fahigihiagenam enaig si-hifeni og;

Ambangel asa enaig onigife, kaba suialag el mo God sa kam kweagfui, afa enag el sa ma sifakalifi afa sa ma Godna bog megba saiyefoi.

21 Afa nengel sa ilawo nem bini pigi sa ne sifakali eba ne ihlafifie. Afa nengel sa ne wewatini auguia eba se sifakali nengigimba eba ne titigena auguiafufe.

22 Afa nengel sa ne Nufunam El patalfuiaba eba ming el nem olug kakagegonife afa nem amtakwalig mo faigonam, afa nem mas fatigonife afa nem sihigonfie og sona el eba amtakwalig, ma nem enaigba esegonibi eba se sifakali.

23 Afa ma atiaba amtakwalig nihena nem esofegonfibi eba sa ne sifakalinim afa fwinam afigigi. Sa hig, kwania mungwag nem faifi eba heven la nem nengeniawo. Afa autunam ehengelni simbianiga Godna mo fli sihigulem elim gwenag esegoni.

24 Afa nengel wag nubni el, niasabanig, eba ati ne bitenai mungwag flig afa mas ne mingba fli.

25 Afa el sa ne fane ahgagigbi nem ihla feskofeg, niasabam, enaba numwehifibi nengigimba bini nem pigife. Afa el sa ne titigena auguia, niasabanig nengigimba eba ne wewatini auguiafufe.

26 Afa niasabanig mungwali el sa nengelni unehlam fin-gifegonig eba sa numwehifibi autunam ehengelni simbianiga enaig niheba fini mwakwal mo fli sihiafule elim gwenagba esegoni.

*Angoluwagim membegonig nihe**Matyu 5:38-48*

<sup>27</sup> Afa Sisas enaig esona og, “Sa hig, sa ne enaig esi, angoluwag elim membegonim afa el nem olug kakagenug asa ehem suiala fehiagi.

<sup>28</sup> Afa sa mingnag el enaig esogofe og, God sa ma nem nugwakale klaiti afa neau sa ne ehem suialag mo fai. Afa amban nem sa amtakwalig hiagig asa ne Godim betenenibi sa ma God ehengelim aflafenim afa olug enesieg fai.

<sup>29</sup> Afa amban sa nem angmug la poufe afa sa ne ming angmug nehna afa amban sa neana nihinai lofug huguaflanafe eba sa ne ming lofug gafa fwahana.

<sup>30</sup> Afa el sa mungwali nem sahigonife og kam osum mangwal fai afa sa ne faim. Afa sa amban neana mangwal flanafe nofene sihina og sa ma kana pese fai.

<sup>31</sup> Afa haig haig nihe sa ne membig ne og sa ma kam esegoni, eba sa ne mingnag elim gwenaig esegon.

<sup>32</sup> Afa el nem membegonigba afa ne enaig elim mungu membegonig, enag niheba eba esug feg. Afa amtakwalig nihenai el gafa og el kam membegonig ka ehem gwenaig esegonig.

<sup>33</sup> Afa el nem suialafe hiagigbi afa ne enaig elim mungu suialafe hiagig, enag niheba eba esug feg. Afa amtakwalig nihenai el gafa gwenaig nihe fig.

<sup>34</sup> Afa elim sa ne esmunagim faigogba afa ne og sa ma kam mungwag faigoi, enag niheba eba esug feg. Afa amtakwalig nihenai el gafa gwenaig minafig. Ehengel enaig esig og sa ma kam mungwag faigoi.

<sup>35</sup> Afa ka nem sihinig sa ne angoluwag elim membegonim afa suialafe hiagi. Afa enaig elim esmunagim faigonam afa nofene enam mungwag nem faigogim onigim. Afa ne enaig esigba, eba kwania mungwag nem faifi, afa eba ne Godna luwalig feasaife. Afa Godba, el sa ehem mas fatinag ena mi afa amtakwalig nihenai el mi enam gafa suialafenig.

<sup>36</sup> Afa sa ne elim aflafegon hosa ati nengelni alag heven lanai gwenaig eseg elim aflafenig.”

*Nofe ka elni nihem fahigefli**Matyu 7:1-5*

<sup>37</sup> Afa Sisas enaig sihifeni og, “Nofe ne elni nihem fahigenaginim afa sa elim amtakwalig mo faigo, mangofi, masa God nem mungwag gwenaig esenfe. Afa nofe ne elni nihem pigaupui eba God nem gwenaig esenafe. Afa sa ne elni amtakwaligim esug fwahaiba eba God nem gwenaig esenafe.

<sup>38</sup> Afa sa ne elim mangwal gawig faigoiba sa ma God nem gwenaig eseni. Eba numwehe suialag kwefihiagenam asa

neana wula la memtola pugunam bite la kokofehia pekam minefefe. Afa elim sa ne enaig ihla faigog eba God nem gwenai ihla faife.”

<sup>39</sup> Afa Sisas enaig lasug mo sihini og, “Atiaho sa nof tetini elbi ming nof tetini elim minaba faogfunafe, amo, eba awai eba naba ahkanam mungwali bu me la ahpefe.

<sup>40</sup> Afa skulinai luwal mas tisa lofba fei eba numweheg skuligim asa tisa lofba feg.

<sup>41</sup> “Haisegba sa ne og ka nilitena nof lanai fungsige flafatina afa nimbeafena nof lanai sumul mo mas ne onigig mo.

<sup>42</sup> Mangigim sa ne enaig esog, nilite ka neana nof lanai fungsige flafati, afa ne mas sumul nimbeafna nof lanai nangug mo. Ne sonaig elbi eba ne mwakwalule el. Afa ne ilawana mo nimbeafna nof lanai sumul flafatinam ma neana nofug suialafeba asa ne nengigim nimbeafna nilitena nof lanai weti fungsige mo flafatina.”

*Li fug amtakwalig afa suialag li fug*

*Matyu 7:16-20, 12:33-35*

<sup>43</sup> Afa Sisas enaig esona og, “Li figetini mas fug amtakwalig lugui, afa li fealameg mas fug suialag lugui.

<sup>44</sup> Afa ilawanaba el li fugim nangugim anwenafig feg suialag me awai amtakwalig me. Afa el mas yifu fug pwatigimba usieg minaba afui afa mas baf fug pwatigimba kwalamp minaba afui.

<sup>45</sup> Afa suialag el suialag onigigna fegim asa suiala nihe feageg. Afa amtakwalig el amtakwalig onigigna fegim asa amtakwalig nihe feageg. Afa haig onigig sa goh enag ehe ambala mo sihig.”

*Sambaganigi lala nimblagna mo*

*Matyu 7:24-27*

<sup>46</sup> Afa Sisas enaig sihifeni og, “Mangigim ne kam enaig seflaba fig og, Ainiyag, Ainiyag afa eba atiaho sa ne kana moaba patalfug?

<sup>47</sup> Afa amban sa ne ka nanguba blonam kana mo higinam afa sa patalkufe eba enaig elbi el sa lala nimblagim enaig sifafefe.

<sup>48</sup> Bume mungwanam kwagegim asa sumul mo lambig aitigim fun mo sumul megam laitia fukuag mengig la fwa-hagim afa simen mo enena wahag titig fwahag afa maia bifwatbi sahigba mas ena lalaba toafui eba ati wasneig goh. Enaba eba el ehe wasneig lala nimblag fwahag.

<sup>49</sup> Afa sa amban kana mo mas higigim patalkug mo enaig elbi lalaba onimblaba eba mas bumeba mungwanam koi afa mas sumulbi fun laitnam titi asa eba ena lalaba mas

wasneig gofi. Afa maia bifwatbi sahigba eba sona lalaba ati tofu bambuhia pegi.”

## 7

*Sisas amini misog elni gafugag elim wangene fefatina  
Matyu 8:5-13*

<sup>1</sup> Sisas elim mo sihi fwahanim asa ika Kaperneam kembig gam seifu ikana.

<sup>2</sup> Afa enanai yiba amini misog el heafna gafugag elim gihna faka auguiafna. Eheba 100 amiim nangwaghiageule. Enag fwina heafna gafugag elim membena. Enag gafugag elbi ati lahagim meiyefefna.

<sup>3</sup> Afa amini misog el higinaba og Sisas ati blog enanai yi ga asa Ju elni misog elim ningitigina og ma afu Sisasim sihinibi sa ma blo ehena gafugag elim wangene fefati.

<sup>4</sup> Afa sa ehengel afu Sisasnai apukenam Sisasim wasneig mona sihini og, “Hai, sona elbi suialag el ehem sa kweagfu.

<sup>5</sup> Eba ehe bigim Ju elim membenigim afa laskuhlag lala kangelni nimblanig.”

<sup>6</sup> Afa sa Sisas wankana muhla wan opugufnaba afa amini misog el heafna hihem sihiwagenam ningitigina og, ma afu gwesim Sisasim sihini ehengel afu enaig esogona og, “Saglag luwal, mangigim ne ehegepuseg blo og, kaba mangwal suialag el mo na ne kana lala gamba blo.

<sup>7</sup> Afa og, kaba mangwal suialag el mo na ka blo nem sihina esug mo behig sihiba sa ma kana gafugag elbi wangene fei.

<sup>8</sup> Ka enaig sihifeg kaga ka sa misog elim ahnai skaufen. Ka gafa ati soldiaba feg enag kam ahnai skaufinigi. Afa sa ka ming elim sihinafe aublo eba ehe blofe. Afa ka kikeafna gafugag elim sihinafe hwam gafugafe eba ehe ika esefe.”

<sup>9</sup> Sisas ena mom higinam ehena olug fingi fena afa el asa ehem patalfuna enam sihini og, “Ka nem nufunam sihinig mas ka ambanim Israel lanai elimba olug onigi kwania feg enaig elbi nanguna mo.”

<sup>10</sup> Afa el sa amini misog el ningitigina enag pese lala gam afuafnaba nanguni gih elbi enaba ati pugu suialafena.

*Sisas Nain kembig lanaim kwablog elim ilafo fatina*

<sup>11</sup> Afa managig fwainig Sisas Nain kembig gam ikafnaba afa sa patalfuiag el apaiyena afa mingnag kaksag el apaiyena enag Sisas wan ikana.

<sup>12</sup> Afa wan ikana kembig bogna mengig muhla wan-puguafnaba afa el ehgam elim lahagim fliubiegohna enag apukefeagini. Afa kaksag el afagim wanig ambena, ehena

alagagba ati lahana afa enag lahag elbi eba gwenag mungu fena.

<sup>13</sup> Afa sa Ainiyag enag angwafigim nangunam fwinam aflafenam afa enaig sihifena og, “Nofeka ufwe.”

<sup>14</sup> Afa sa Sisas ika muhla gohnam asa lahag elim gig simem ningana tuhuna maia el gwese ufuhiefnaba. Afa sa Sisas enaig esona og, “Luwal kwablog ka nem osihina, sa buihia.”

<sup>15</sup> Maia enaig esonaba asa enag elbi buhianam mo lagwangenaba afa sa Sisas pese afag nangum ningihiana.

<sup>16</sup> Afa mungwali el Godna wasneigim nangunim embefini. Afa sa Godna unehlagim fingi finim afa enaig esogona og, “Godna mo fla sihiaule el kwania bigim olyi pugunig afa God ati blog heafna elim kwaganigim.”

<sup>17</sup> Afa sa mungwali el distrik Judia ahkawag minefenam ena mom sihiageafuna. Sisas sa lahag elim ese fatina enam mom.

*Jon bula latiag el heafna elim Sisas nangum ningitigina  
Matyu 11:2-19*

<sup>18</sup> Jonna patalfuiag el Jonim sihinagini, Sisas sa mungwali eseagenaba enam.

<sup>19</sup> Afa Jon heafna patalfuiag elim sambaganigim awamonim asa oagna Sisas nangum ningitigi eheningi sa ma ika ahpukenam Sisasim ahsihinai og, “Neaho sa Jon sihi fwahanaba naho ne blo awai naiba ming el me kangelbi nengenafu?”

<sup>20</sup> Afa ika ahpugunam asa enaig esohona og, “Eba Jon bula laitiag el kam ningitigiba na ka ahblog ehe nem sahna og, neaho sa God nem ningihiagim sihi fwahanam ena me awai ming el me?”

<sup>21</sup> Afa sa enenam Sisas kaksag elim haig haig gihnam suiala feitifeafna afa sanel amtakwalig elni nihinai lambiningitigi feafna, afa kaksag el nofug hafinigna nofug bahia skofena.

<sup>22</sup> Afa Sisas wahigi sambaganigi elim enaig sihifeni og, “Se pese ahkanam Jonim ahsihina mangwal sa ne mungwali ahnangug afa ahigig, afa nofug hafinig el bahia skofeg afa el mong lilig fegna buhiakag afa enehna wagene fiahsaig afa ang tetini ati mo higig afa melig pigieg el puguiagafeg, afa gawig fwainig el Godna suialag mo higig.

<sup>23</sup> Afa el sa kam oniginig ehengelni olug onigiba eba wasneig afohiefufe. Enaig elbi sa ma sifakali.”

<sup>24</sup> Afa maia sambaganigi pese Jon nangu ahkanaba afa sa Sisas elim sihini ehe Jonim enaig esona og, “Autunam ne bite behig la afunam asa ne Jonna mo higin. Ne haig elim nanguni? El enaig pos lofug efef petla fakafefugu, enaigim ne nanguni me? Amo, Jonba mango enaig mo.

25 Mangwalfigim ne membig afu nangug? Ne membig nangug el suialag nemug lofug gu me? Jonba mango enaig mo. Eba el suialag lofugnaba lala suialag la ga.

26 Haisegba ne afug? Ne Godna mo fla sihiaule elim ne nangug me? Ei, Jonba enaig el. Ka nem nufuna mo sihinig hwa elbi mingnagim mo fli sihifule elim gosenig.

27 Enag elbi autunam Godna Buk ati sihi fwahana enaba God esog;

Sahig, kana mo flaukwiag elim ka ningihiaiba. Afa sa ehe Godna Gisfu Fwahag elim gosenim asa mina numwehiage kafe asa ma el ehem olug onigini.” *Mal*

3:1

28 Afa Sisas esona, “Ka nem nufuna mo sihinig Jon bula laitiag el mungwali elim autunaim pugu gosenig. Afa ambangel sa wetiklug saiyege Godna bog megam enaba Jonim gosinig.”

29 Afa kig lambiule el i afa gwenanai amtakwalig el i ena mo higinim afa sa ehengel og Godna mina eba ihlafeg. Afa ehengel ati Jonna ninga la bu la apaiyeg.

30 Afa Farisi el i afa nihemo anwena el i Jonna ninga la bula apaiyegim mas esig mo. Asa ehengel oksig Godna sawiegim patalfuigim.

31 Afa Sisas esona og, “Afa ka glauwaba elni niheba ugu opugun fibi eba sa ka haig lasug mo sihife? Eba haig el maia?

32 Afa ofenaiba luwal fane sugwafog la auguiaba afa gosis seaflahba mingnag luwalim unegonigim afa enaig esogona og, ‘Kagelbi fuf i anba i guwagihbi afa nengel mas ahfei afa kangel wewatoahba afa nengel mas wegoi.’

33 Afa glaunai el enaig luwal lofug enaig esig, Jonba mas wain bug i afa fane i neagena mo eba oga Godna unehlagim fingi fe afa el esogona og ‘Sanel amtakwalig ehem seifo gohna!’

34 Afa maia ka Nufuna El blogba afa ka bu i fane i wanegba afa ne enaig esogog, ‘Sa nangu enag elbi bu i fane i ati fwinam waneg. Afa ehe kig lambiule el mi afa ming amtakwalig el mi wana.’

35 Afa elni nihe Godna onigigim patalkuba eba ambala pugufe enaig niheba eba ihlafeg.”

*Amtakwalig angwafig Sisasna mungum sanda bugna suflana*

36 Afa Farisi el mungu Sisasim unenam oga fane ahga afa sa Sisas ehem ningi ikanam asa fane ehena lala ahga flafnaba.

37 Afa mina angwafig ena kembangafna ehe Sisas enag lala gam higinam asa sanda fun botolna flanam asa ubluna.

38 Afa ehe Sisasim nobna patalkuiafnaba afa ehena nob mo Sisasna mong yi apaiyenaba asa ehe heafna lapogni titehiagenam afa sa Sisasna mogum kehlanam kikige flana afa sa sanda bug mo mongim susulenagena.

39 Afa Farisi el sa Sisas i hawagfna enag ehem nangunam enaig oniginagenam og, “Afa sona elbi atiaba mo flaule el nemug fegba eba sa angwafigni nihem anwenafei asa ehem ningana tuhunaba enam. Afa sonag angwafigbi eba amtakwalig nihe feageaka.”

40 Sisas ati ehena onigigim anwenafenam afa esona og, “Saimon, ka membeg saka nem mo sihina.” Afa Saimon esona og, “Ei, tisa sese.”

41 Afa sa Sisas ehem enaig esona og, “Sambaganigi el kig elni ahlambana ena mo sihina og, ming elbi 100 kig enaig flana afa ming elbi eba 10 kig mungu flana.

42 Afa eheningi mas mungwag ahfaina mo afa enag el sa kig faig eheningim sihini og, mangofi ka gwesim fwahag. Afa sa ne onigig amban maia ehemba fwina membenag?”

43 Afa Saimon wahigi Sisasim sihina og, “Eba amban sa numwehenag.” Afa Sisas esona, “Ei neana onigig ihlafeg.”

44 Afa Sisas wahigi angwafigim nangunam Saimonim sihina og, “Sa hwag angwafigim nangu. Ka neana lala gamba blonaba mas ne ka bu faina mo mungum sugimba. Afa sonag angwafigbi eba heafna nobna kana mungum suflagim afa lapogni mo nobim kana munginai titeageg.

45 Afa mas ne kam kikige flana mo ka blog ma glawo pugugba hwag angwafig kana mungim kikigeaflag.

46 Afa mas ne kam wel bug na misogim susulenagena mo. Afa hwa angwafigbi eba sanda bug fla blugim enena kana mungum susulenageg.

47 Afa ka nem sihinag, sa nangu sona angwafigbi kam fwina membenag enaba ofug God ati ehena kaksag nihe amtakwaligba flafatinag. Asa big anwenafi afa amban sa amtakwalig nihe weti esegba asa God flafatinag enag elbi ehena membegba eba weti feg.”

48 Afa sa Sisas angwafigim enaig sihifena og, “Ati ka neana amtakwalig niheba flafatinag.”

49 Afa el enanai yi mungwali wahe auguiafnaba fane ahgag sime la, ena mom higinim hefum sihiaginim afa og, “Sona elbi amban maia nasa amtakwalig nihem lambaitifeg?”

50 Afa sa Sisas enag angwafigim enaig sihifena og, “Nim-beafna olug onigig ati suialafeg afa glawaba eba ati ne God i ahfeg neana olug sama aflahlana gofi.”

## 8

*Afa mingnag angwafig Sisasim patalfuna*

<sup>1</sup> Afa Sisas managig fwainig elni kembang la fapugufe akafnaba elim Godna bog meg mom sihinwagiakafna. Afa heafna 12 pela patalfuiag elim mungwal wangoh minefeafna.

<sup>2</sup> Afa mingnag angwafig gafa Sisasim patalfuna. Enag angwafigbi autunam sa Sisas ehengelni nihinai sanel amtakwaligim lambi ningitigifeni afa gihim wangenefeni. Enag ehe esini, ehengelni unehlagba Maria Makdala kembang lanai. Eheba autunam Sisas elegeg la gohug sanel amtakwalig ehena nihinai lambi ningitigina.

<sup>3</sup> Afa mingba Joana fena afa Susana fena, afa mingnag angwafig apaiyena enag Sisasim patalfuna. Afa Joanaba Kusana angwag, enag elbi Herotna lalam gose fahigeule fena. Afa sonag el angwafigbi heafgelni gawigba Sisas mi afa patalfuiag el mi kwagani.

*Sisas el kon gug aso la laitiageg lasug mo sihina*

*Matyu 13:1-9, Mak 4:1-9*

<sup>4</sup> Afa mungwali kembang el ambe minefenam Sisasnai yi laskuhlagenaba asa Sisas lasug mo sihini og,

<sup>5</sup> “El enaig eseg kon gug aso la laitiageg afa maia laitiageg kagba afa mingnag mo mina la apaiyeg. Afa sa el mungni pigafugba afa sa twafig mo ambe apaiyegim lambigafig.

<sup>6</sup> Afa mingnag mo fungsisigig yi apaiyegim ikagna puguiageg. Eba bite mas bitegwelna feg mo. Afa maia osu pugu laugogba asa aftukuhla skofegim afa sa melig mungwali pigiageg.

<sup>7</sup> Afa mingnag mo usieg weg amtakwalig la apaiyegba afa sa usieg nahlum wahe puguiagegim asa ehem sagfla fakag.

<sup>8</sup> Afa mingnag mo suialag bite la apaiyegim fug leg skofeg. Enaig 100 fug leg skofeg. Sisas enag lasug mo sihi fwahanam afa sa esona og, amban anginaba eba sa ne higi.”

*Haisenba sa Sisas lasug moba sihina*

*Matyu 13:10-17, Mak 4:10-12*

<sup>9</sup> Afa patalfuiag el ambe Sisasim sihini og, “Sa ne kam lasug mog mom sihin.”

<sup>10</sup> Afa ehe wahigi sihini og, “God enaig membeg nengel sa ne anwenafi enag Godna bog meg nihe mas autunam ambala puguna mo. Afa ka mingnag elim lasug mo sihig;

Asa ehengel yisigig yisigig afa mas nanguig mo afa hig higig afa mas anwenafig mo.”

*Ais 6:9*

*Sisas kon gug laitiageg mog mo sihina*

*Matyu 13:18-23, Mak 4:13-20*



11 Afa Sisas enaig esona og, “Hwa lasug mog moba enaig eseg, kon gugba eba Godna mom ogfug.

12 Ambangel sa Godna mo higigim afa mas patalfug mo enaba naho ofenaiba kon gug lofug mina la apaiyeg. Afa God maia ena mo elni olug yi laitinugeba afa el amtakwalig Satan blogim ena moba lambinig afa Satan enaig onigig fe og, masa Godim olug oniginibi afa God ehem lambfe.

13 Afa kon gug sa fungsigig yi apaiyeg eba enaig eseg el Godna mo higigim ikagna sifakale flag. Afa sa kon bagag mas numwehe pekag mo eba gohugum afa amtakwaligim awaieg. Eba enaig eseg eba el Godim oniginagim afa maia mingnag el ehem kinig i afa ninimu mo i faigbi eba ehena olug onigig tigeftu pefe enaba onigig wetitifeg.

14 Afa kon gug usieg weg la apaiyeg eba enaig eseg el Godna mo higigim afa heafna gagim onigigim. Afa ehe fwina kigim onigkahba og na haig haig gawigim upuguiage. Afa na sa enaig onigig blogim ehem kike fakagba mas fug lugwe.

15 Afa kon gug sa suialag bite la apaiyeg eba enaig eseg el sa Godna mom higigim afa heafgelni suialag olug onigig la fwinam kehligim asa patalfug eba naho sa ehengelni nihe pugu suialag feg.”

*El mas wiba meagamba kumohli*

*Mak 4:21-25*

16 Afa Sisas enaig esona og, “El mas wiba gaflanam sime skaubi kumohlai eba awai. Eba heafa gaflagim sime sisi yi folfugba asa el enam nangugim afa sa ambeg lala megamba saiweg.

17 Afa haig haig gawig sa saiweg meagam gohka eba ambala puguia minefefe. Afa enag meagam kumo fwahag enaba eba ambala puguiba asa mungwalig el enam anwena fife.

18 “Afa mo sa ne higi ena mo numwehifibi afa ambangel sa anwenafi eba God ehengelim gwesim hilifenifie, afa ambangel sa anwena awaienig afa ehe enaig onigifig kati weti anwenafig eba God enaig onigigim ehengelni flafatinifie.”

*Amban maia afag alag afa niliteba Sisasna feg*

*Matyu 12:46-50, Mak 3:31-35*

19 Afa ming nanam Sisasna afag i nilite i ogna ambe Sisasim nangui afa kaksag el laskuhlagena Sisasim kagui fakinibi.

20 Afa sa mingnag ambe Sisasim sihini og, “Neana afag i nilite i ambeg ehbegam afohieba ogna nem nangui.”

21 Afa Sisas wahigi pese enaig sihifeni og, “El sa Godna mom higigim patalfug eba naho kana afag i nilite i ba feg.”

*Sisas bifwatim kwena*

*Matyu 8:23-27, Mak 4:35-41*

<sup>22</sup> Afa ming nanam Sisas heafna patalfuiag elim bot la wan ogofnaba og, “Na kwegam malgim afu” asa afuna.

<sup>23</sup> Afa bot lambi lambkuafnaba Sisasba ati nongini afa afuan bu usmuiag la apukeafnaba afa sa bifwat kwania sahblona botim waike waike feflafnaba afa bu bot megam figfna. Eba gwena awaie skofegim ofena.

<sup>24</sup> Afa sa patalfuiag el Sisasim ilafunim sihini og, “Saglag luwal saglag luwal! Glawo bigim goho ati awai ofe.” Afa sa Sisas buihianam bifwatim kwenaba afa sa bifwat gweyi tigeafuna. Afa bu laikwaieg awaiena.

<sup>25</sup> Afa sa Sisas ehengelim enaig saheni og, “Haisegba sa ne enaig embebeba nafig enaigba nengelni olug onigigba weti feg.”

Afa ehengel Sisasna wasneigim nanguni embefeagini. Afa fwinam onigwagi flafnaba afa hefum sihiagini og, “Sona elbi eba amban maia nasa bu mi bifwat mi kwenigbi asa ahtigeafog.”

*Sisas elni nihinai sanel amtakwalig flafatina*

*Matyu 8:28-34, Mak 5:1-20*

<sup>26</sup> Sisas heafna patalfuiag elim Gerasa kembang ika wan puguna. Ena kembang Galili buum tigeawagigim ika gifni.

<sup>27</sup> Afa Sisas wan ikan bot mo folfu wan gofnaba afa el mungu ena kembang lanai blo ehem puguni. Ena elbi sanel amtakwalig esenaginibi asa heafna nihi lofug hugfuoitifeagenam ika bitekife la gikiafna.

<sup>28</sup> Afa sa Sisasim nangu eyionam blo Sisasna mong muhla penam fwinam enaig esona og, “Sisas ne wasneig Godna leg, ne haig kam esofena? Mas esi ne kam nofeka amtakwalig klati?”

<sup>29</sup> Afa maia enaig esonaba asa Sisas sanelim fenugena og, “Sa ma elim fwahinim afui.” Afa sona elbi el wahkig numwehefufna maia wasneig wena kikenagi fakifnibi afa eba sanel amtakwalig esenag gifinibi asa we mo kukoiti fefnam asa pugu bite behigam ikafna.

<sup>30</sup> Afa sa Sisas ehem sahna og, “Neana unehlagba amban?” Afa og, “Kaba ami.” Ena mogba eba enaig eseg ehena nihi yi kaksag sanel amtakwalig saiye gohna.

<sup>31</sup> Afa enag sanel amtakwalig Sisasim embefini asa fwina esoflini og, “Nofe ne kam susug kembang megam ningitigi.”

<sup>32</sup> Afa kaksag tata okwe yi mug la ahgagi afo. Afa sanel amtakwalig enaig sihifini og, “Eba sa ne kam tatagam ningitigi.” Asa Sisas gwenaig esena.

33 Afa ehengel elni nihi nai apukenam asa afu tatana nihi yi seifoalafenaba afa sa tata fapisofe fwaligona bu la apaiye mungwali pigi kumohlana.

34 Afa tatam nangwaghiagig el enam nangunim kembang gam embem afunam enanai yi ena mo sihiageafuna.

35 Afa mungwali el ambe Sisas nai yi apukenam ena elim nangunibi ati suiala fenam lofug laitiagenam Sisasna mong muhla gafnaba mo wangeneg lagwageaufna. Ehengel enam nangunim embefeagini.

36 Afa el enaigim nangunim mo sihiageafuna Sisas sa elim suiala fefatina. Ilawana sa sanel amtakwalig ehena nihi megam saiyeenam esenagini ena elbi ati pugu suialafena.

37 Afa mungwali el Gerasa distriki nai Sisasna wasneigim oniginim embefeaginim. Sisasim wasneig mo sihini og, "Hwa bite fwahanam pese ika." Asa Sisas ehengelim fwatinam ika bot la fukunam pese ikana.

38 Afa Sisas akofenaba el sa Sisas suiala fefatina enag Sisasim sahna og, "Sa big ahkai." Afa Sisas ehem onigihiafna enaig esona og,

39 "Pese nimbeafna kembang gam ikanam sa ne ena mo sihinuwage God sa nem kweagfug ena mom." Asa gwenai esena.

*Sisas luwalim lahagim ilafo fatina*

*Matyu 9:18-26, Mak 5:21-43*

40 Sisas pese bu pahlag ehgam mangig ikafnaba. Afa mungwali el ehe nangum sifakaligna ambe gohna. Enaigba esinibi eba sa ehem nengenaflan.

41 Afa laskuhlag lala nai misog el blona, ehena unehlagba Jairus. Enag blo Sisasna mong muhla, mong kokni kwakwage penam Sisasim wasneig mona sahna og sa ma ehena lala gam ikai.

42 Afa ena elbi luwal naini mungu fena, afa ena luwalna krismasba 12 enaig fena. Enag ati lahagim meiofefna.

Afa kaksag elim Sisas wan ikafnaba, minaba kagwo fakana.

43 Afa angwafig mungu enanai fena. Enag angwafigbi wahigehlana afa wahkig sefkufna. Enaig esenaba 12 pela krismas ena. Afa ehena mungwali kig doktam faifinibi afa mas amban ena gihimba nugwe flakana mo, awai.

44 Afa enag angwafigbi Sisasna masigim blonam lofug angsa boagim tuhna. Maia enaig esenaba ehena wahigehlag gweyi awaiena.

45 Afa Sisas enaig sahna og, "Amban kam ninganaba otuhug?" Afa mungwali el esogona og, "Siseme, siseme" afa

Pita esona og, “Saglag luwal, eba mungwali el nem mug yi pugunag!”

<sup>46</sup> Afa Sisas esona og, “Eba maia kam ningana tuhugba, afa kana wasneig gweyi hugofug kag eba kati anwenafeg el kam tuhug.”

<sup>47</sup> Afa enag angwafig ati anwenafena ehe ambala olyi gofna asa kiafigig ehem ofefnaba asa mungwalig elni nofla blonam mong kokni kwakwagena nof bosug mo bite gam Sisasna kig muhla fisihli penam asa esona og mangwal ehe esegba asa kana gihimba ikagna awaieg.

<sup>48</sup> Afa Sisas ehem sihina og, “Angwafig, ati ne kam olug oniginaba nem peseg suiala feg asa ma neana olug enesieg gofi.”

<sup>49</sup> Afa Sisas maisim sihiagofnaba afa Jairusna gafugag el blona Jairusim sihina og, “Ati neana legba lahag, nofe ne saglag elimbi kinig fai.”

<sup>50</sup> Afa Sisas ena mo higinam afa sa Jairusim sihina og, “Nofene kinigfe sa ne kam olug onigina eba sona luwalba neana suiala fefe.”

<sup>51</sup> Afa sa Sisas enag misog elni lala gam ikana. Afa ika lala apukenam afa lala megam oseifofnaba kaksag elim mo afwambala lasanam asa Pita na, Jon na, Jems na afa alag i afag i ahfena enag lala megamba saiye afuna.

<sup>52</sup> Afa el ena lala nai luwalim aflafnim wewatinaufna afa Sisas sihini og, “Nofeka wewatona eba mas lahag mo eba esug ehe nongi.”

<sup>53</sup> Afa el ena mo higinim afa titige watona og, eba ati nufuna lahafeg.

<sup>54</sup> Afa sa Sisas luwalna ningam kehlanam asa enaig esona og, “Luwal buihia.”

<sup>55</sup> Afa sa luwalna sungwag pese blo sigeagenam asa buihiana. Afa sa Sisas esoni og fane ehem fai.

<sup>56</sup> Afa sa alag i afag i olug mungu ahwagofenaba Sisas sihini og, “Hwaig sa pugugba nofeka elim ahsihin, magofi.”

## 9

*Sisas 12 pela patalfuiag elim gafugag faini  
Matyu 10:5-15, Mak 6:7-13*

<sup>1</sup> Sisas patalfuiag elim awamonim wasneig faini og, sa ma sanel amtakwalig mi afa gih el mi suiala fetififi.

<sup>2</sup> Afa oagna ningitigiba sama afu Godna bog meg mo sihifi afa gih elim suiala fetififi.

<sup>3</sup> Afa enaig sihifeni og, “Ne afu ofefiba nofeka nimbeafgelni gawig lambug afu, moni i, mingnag nihinai lofug i, fane i, wula i, afa agat enena mina ikag enaig lambfu.

<sup>4</sup> Afa ne ha kembang laba apukenam asa ne mungu lala afu auguiafim maia manageiba asa ne ena kembang mo fwahinim afa sa ne ming kembang mo afu.

<sup>5</sup> Afa maia ena kembang lanaiba nem sulfug fwainigba asa ne ena kembangba fwahi afu ofefiba sa ne bite moginai mo titeagenim fwatinim asa ne afu goh. Asa ma enam anwenafi eba ehengel amtanafig.”

<sup>6</sup> Afa sa patalfuiag el gwenaig esini mungwali kembang afoaminefifnibi Godna mo sihifinim afa gih elim suiala feitififni.

*Herot oagna anwenafe Sisas eba amban maia  
Matyu 14:1-2, Mak 6:14-16*

<sup>7</sup> Afa maia Sisas enaig gafuga feagenaba Herot gavmanna misog el ena mom higinam fwina onigwaginam. Afa mingnag og, Jon bula laitiag el bite kifenai peseg buhiag.

<sup>8</sup> Afa mingnag og, Elaija peseg pugug. Afa mingnag og, mo fli sihiafule el enana mungu autunai peseg bite kifenai buhiag.

<sup>9</sup> Afa Herot misog el enaig esona og, “Jonba ati kana gafugag el kasuni hegeflakana afa sona elbi amban maia, afa ka higigba ehena gafugagba eba numwenafeg”. Afa sa ehe oagna Sisasim nangu.

*Sisas 5,000 elim fane faini  
Matyu 14:13-21, Mak 6:30-44, Jon 6:1-13*

<sup>10</sup> Afa patalfuiag el pese ambe Sisas nai yi apukenam asa sihinagini gafuga sa afu feagini enam. Afa Sisas mingnag elim mo fwatinam heafna patalfuiag mo sulfu Betsaida kembang wan ikana.

<sup>11</sup> Afa maia Sisas wan ikanaba afa mungwali el ehem sum patalfuna apukenaba Sisas ehengelim sifakalenim asa Godna bog meg mo sihinuwagenam afa gih elim suiala feitifena.

<sup>12</sup> Afa maia osu pegim ofefnaba Sisasna patalfuiag el ambe ehem sihini og, “Osuba ati ope gwese hwaina elim ningitigi mine feiba sama afu heafnai yi aska minefenam aso nai fane yisgiawagi, hwa nai yiba bite behig la big auguia.”

<sup>13</sup> Afa Sisas esona og, “Amo, nengel ehe sa ne faneba faigo.”

Afa ehengel enaig esogona og, “Kangelbi kaksag faneba awai eba afala pugufeg amba feg afa sambaganigi sawag fog feg. Afa neafa kam og afunam mungwali elim fane lambigon.”

<sup>14</sup> Afa eba 5,000 el enaig fena afa angwafig i luwal i mas enaba suwigigni mo.

Afa Sisas patalfuiag elim sihini og, “Afu sihigonibi sa ma 50, 50 enaig augu feakai.”

<sup>15</sup> Afa sa patalfuiag el gwenaig sihi fegoniginibi asa gwe-naig augu feakana.

<sup>16</sup> Afa sa Sisas afa la pugu feg amba lambina afa sam-baganini sawag fog lambtina asa of gam ninof fegofnaba afa sa Godim suialag onam asa amba kukosko fena afa sawag fog titosko fena asa patalfuiag elim fainibi afa sa mimagegonigni.

<sup>17</sup> Afa sa ehengel ahgawagin maia ihla feskofenaba ena mo 12 pela sob yi sobyifeagini.

*Sisasba amban*

*Matyu 16:13-19, Mak 8:27-29*

<sup>18</sup> Afa mungunagim Sisas beten ofefnaba afa sa heafna patalfuiag el ambenaba afa Sisas sahini og, “Afa elbi haig esogog, ka mo amban maia?”

<sup>19</sup> Afa ehengel wahigi sihini og, “Eba mingnag enaig esogog og, Jon bu la laitiag el, afa mingnag og, Elaija, afa mingnag og, mo fla sihiafule el autunai bite kifenai peseg pugug.”

<sup>20</sup> Afa Sisas ehengelim sahtigina og, “Nimbeafba haig onigig nafig.” Afa Pita wahigi sihina og, “Ne Kraist God Gisfu Fwahag El.”

*Sisas heafna laha buihiagna mo sihina*

*Matyu 16:20-28, Mak 8:30-9:1*

<sup>21</sup> Afa Sisas heafna patalfuiag elim wasneig mo faini og, nofene enaig mo amban elim sihini.

<sup>22</sup> Afa enaig esona og, “Kaba Nufunam El kwania kinig flafe. Afa sa misog el i saglag pris i afa nihemo anwena el i kam mas fatinim asa tigifatibi afa sa ka sambaga mungu osuna pese buihiafe.”

<sup>23</sup> Afa Sisas enaig sihifeni og, “Afa amban kana patalfuiag elbi ofefiba eba ehe mas hefum onigi asa ma ehe wahkig li katigeg la lahagim numwehenam asa ma kam sum patal blui.

<sup>24</sup> Afa amban sa onigig, heafna nofkikena gag kwania fenag asa oagna heafum gwese gufum eba enaig el mas nufunam nofkikena gagba flai. Afa amban kam patalfu oblofiba asa ma heafna nofkikena gagba fwahaiba eba asa ehe wahkig nofkikena gag flafe.

<sup>25</sup> Eba mas suialafeg mo afa el mungwali bitenai gawigim lambigba asa hefum awaiefe. Afa mungwali gawig mas sonaig elim nofkikena gagba fai.

<sup>26</sup> Afa amban sa kam i afa kana mo mi afwanefefe afa enena maia eba Nufunam El heafna kwania ombusugni wasneigni blonam asa ehe gafa sonaig elim afwanefenafe.

Enag ombusug i wasneigba eba mungwalofug Alagna afa of la nai elni.

<sup>27</sup> Ka nem nufunam sihinig mingnag el ilawo sa ne afohie eba mas nem pigi eba ne Godna bog megba nangufie.”

*Sisasna elig alganam puguna*

*Matyu 17:1-13, Mak 9:2-13*

<sup>28</sup> Afa maia gug yi gohug osuna enaig la ofefnaba Sisas Pitana Jonna afa Jemsna mug gam fuku wan ikana oagna enanai yi betene.

<sup>29</sup> Ehe ika beten naufnaba afa ehena nofbosugba algana fena afa ehena fatiag lofugba fwinam busug nemwag fena.

<sup>30</sup> Afa ikagna Moses i Elaija i ahpugunam Sisasim ahwani ahlagofna.

<sup>31</sup> Afa eheningiba Godna kwania ombusugugni ahblona ahsihiagofna Sisas sa mangwal Jerusalem la fenam asa lahagfe afa ehena lahagba Godna mom ambala upugufe.

<sup>32</sup> Afa sambaga mungu elbi noftuta feasainaba non askana. Askan buguiagafe Sisasna ombusugugim nanguni maia Moses i Elaija i ehem ahwani gofna.

<sup>33</sup> Afa maia eheningi Sisasim ahfwahia ahagofnaba. Pita enaig esona og, “Tisa nawo hwa nai yi auguiafim suialag kagel sa sambaga mungu sangwali lala nimblagi, nem Mosesim afa Elaijam.” (Pita enaig sihiba fenaba eba ehena mo mas mog fena mo.)

<sup>34</sup> Afa maia Pita ena mo sihiagofnaba asa leango ombusug pe blonam sagfla skofenaba ehengel embefeagini.

<sup>35</sup> Afa ena leango laba mo God lagofna og, “Sona el kana Leg kana gafugagim gafugafegim ka wegig fwahag. Asa ne ehena mo higim.”

<sup>36</sup> Afa maia mo lagig awaienaba nangunibi Sisas mungu gofna afa patalfuiag el mas ena mo sihiagini mo asa nanguni enam.

*Sisas luwalim nilag esefkufna enam suiala fefatina*

*Matyu 17:14-21, Mak 9:14-29*

<sup>37</sup> Afa Sisas ming osuna ena mug mo fwahinim apaiye ambegohna. Asa ehe wan blonaba afa kaksag el ehem mina la ulambini.

<sup>38</sup> Afa enanai yi, el mungu Sisasim unenam og, “Saglag el ka nem asahna sa ne kana luwalim nangu kana munguhe feg.

<sup>39</sup> Wahkig nilag ehem simbigahla esefku kiafigig fefigim afa memp mimeuweti fefig afa unena gohminefefig. Afa sa ehem fwina nugwakaleaflag afa mas ehem ikagna fwahai.

<sup>40</sup> Afa ka neana patalfuiag elim sihinigbi ehengel afu esinigbi mas suiala feg mo.”

<sup>41</sup> Afa Sisas wahigi enaig sihifena og, “Hanansi nagim maia ka nem wan gafiba asa ka nengelni kinigbi fla gofife. Afa ne mas onigig mo nengelni olug onigig i afa nihe i mas ihlafeg mo. Sa osum luwalim wani blu.”

<sup>42</sup> Afa maia ena luwal blona Sisasna muhla pugunaba asa nilag luwalim ese fatinaba bite la penam kiafigig laitiagifnibi asa Sisas nilagim fenagenam luwal mo suiala fefatinam pese alagim nangum ningihiana.

<sup>43</sup> Afa mungwali el Godna kwania wasneigim nangunim sineminefiageni.

*Sisas lahagna mom pese sihina*

*Matyu 17:22-23, Mak 9:30-32*

Afa enam fwinam onigwageafufna Sisas sa enaig eseagenaba enam afa Sisas heafna patalfuiag elim sihini og,

<sup>44</sup> “Sa hwa mo numwehe higim, eba Nufuna Elim ufunam mingnag elni ningana fwahife.”

<sup>45</sup> Afa God ena mom meagam kumohla gufna asa patalfuiag el enanam mas numwehi enag mog mom anwenafini mo afa ehengel Sisasim sahnigim embefini.

*Amban sa gosefe*

*Matyu 18:1-5, Mak 9:33-37*

<sup>46</sup> Afa ming enanam patalfuiag el hefum flafihiagini og, amban sa gosefe.

<sup>47</sup> Sisas ati ehengelni onigigim anwenafeni asa ehe luwalim sulufu blu olyi wani gofenaba.

<sup>48</sup> Afa sa patalfuiag elim enaig sihifeni og, “Amban sa ne kam oniginam hwa luwalim kweagfuiba eba naho kam ninimwehiaflag eba apiim gafa gwenaig esenag ehe sa kam ningihiag. Eba el wetiaklug unehlag fwainig nengelnai olyi go enaba naho goseg elbi ofe.”

*El sa nem hihefenig*

*Mak 9:38-40*

<sup>49</sup> Jon Sisasim sihina og, “Saglag luwal, ka nangugbi el mungu neana unehlag la sanelim ningitigi feageg. Afa eba mas bigim patag kana mo enag ka kwinig.”

<sup>50</sup> Afa Sisas ehengelim sihini og, “Nofene kwini eba mango angoluweg mo eba nengelni hihe.”

*Samaria nai el mas Sisasim sawiyifini mo*

<sup>51</sup> Afa God Sisasim heven gam wanikiagim ati meyiofefnaba afa sa Sisas wasneig onigig kehlanam oagna sa Jerusalem gam mo ika.

<sup>52</sup> Afa sa ehe elim gof ningitigina og ma afu Samaria kembig ninimweheagifi.



53 Afa ena kembang lanai mas Sisasim sawiyifi heafgelni lala gam wanigafuna mo. Afa ati anwenafini og eba Sisasba Jerusalem gam ikafe.

54 Afa sambaganigi patalfuiag el Jems i Jon i Samariana nihem ahnangwagnam Sisasim ahsahna og, “Ainiyag ne haig onigig feg ne membegba ka sa unibi sa ma suwi heven lanai pe blo sona elim laskofei.”

55 Afa Sisas wahigi sambaganigi elim fenugena.

56 Afa sa enanai mo fwahinim ming kembang gam afuna.

*Sisas el ehem patalfuiagna mo sihina*

*Matyu 8:19-22*

57 Afa Sisas mingnagim wankafnaba afa el mungu enaig esona og, “Mungwali kembang sa ne kafiba ka nem patalfefkufufe.”

58 Afa Sisas ehem enaig sihifena og, “Sangwalinai malang ati bite kogim ena megam gi afa twafigni gag ati feg afa kaba Nufuna El eba ehena kug gigbi awai.”

59 Afa Sisas ming elim sihina og, “Aublo kam patalku.” Afa enag el enaig esona og, “Ainiyag, kam ilawo fwahaiba kawo ika kikeafna alagim kumohlanam.”

60 Afa Sisas ehem sihina og, “Mangofi, kam patalku. Eba ambangel sati pigig enag el ehe sa ma melig pigieg elimbi faki. Afa neba eba sa ne Godna bog meg mom ika sihi.”

61 Afa mingnag el gwenag esona og, “Eba ka nem patalfukufe afa ilawaba ka kikeafna afahumonigim bwataonim ka sa blo.”

62 Afa Sisas ehem sihina og, “El sa enaig eseg tataba opifba mas nofbosug mo masigim ninofeg gofiba asa pifi eba tatam faugufefe afa enaig elbi eba mas ihlafe Godna bog meg moba gafugafei.”

## 10

*Sisas 72 elim gafugag la ningitigi mineafena*

1 Afa Sisas 72 elim wegi fwatinam gafuga la ningitigi minefena, ehe sambaga sambaga feitifena og sa ma mungwali kembang gof afoamine fifibi ogna sa ehe mo sum ika.

2 Afa ehe enaig esona og, “Asonai fane kaksag ati ambiakag afa mas kaksag el feg mo enag fane lambwagigimba sa ne asona alagim betenninibi sa ma gafugag elim ningitigiba ma afunam ehena ena fane agogulinagi.

3 Afu! Sa hig, ka nem tata luwalig lofug sangwal malangna olyi onigitigi.

4 Afa ne afufefiba nofene nimbeafgelni kig i mong lofug i afa gawigiba lambug afu afa nofeka elim mina la ulambinim bwata gonim.

<sup>5</sup> Afa maia ne afu ha lalaba asaiyegofiba sa ne enaig esogo, hwa lala nai el sa olug enesieгна auguiafim.

<sup>6</sup> Afa ma atiaba amban el ena lala nai olug enesieгна gafiba eba nengelni suialag mo ehenai gofufe. Afa enaig el gag fwainigba eba ena mo suialagba pese blo nimbeafgel nai yi gofufe.

<sup>7</sup> Afa sa ne gwena lala mungu auguiafim nofene mungwali lala afwaminefi, fane sati nem lambwaigog sa ne gwenanai ahgaflafim afa enag el gafuga feageba asa ma enanam sa ma mungwag fai.

<sup>8</sup> Afa maia ne afu ha kembang laba apukeba ma atiaba nem sulufu heafgelni lala gam wan afu ofefiba eba sa ne fane mo lambug afu sa nem lambwaigog.

<sup>9</sup> Afa sa ne ena kembang la nai elim gihnam suiala feitifnim afa sa ne mo enaig sihifi og, Godna bog meg ati blo muhla nem ofen.

<sup>10</sup> Afa ne hag kembang laba apukefe afa el sa nem wan afu lala saiweg fwainig fefe eba sa ne gweyi afoahiefiba asa ne enaig esogo,

<sup>11</sup> ‘Ma mong yi nai bite mo go hwa nai yi afgwafi eba amtana minafig afa sa ne numwehe onigim Godna bog meg ati blog muhla feg.’

<sup>12</sup> Ka nem sihinig God elim kwefihiagegim ati enag osuba wegfu fwahiag. Enag elni kinig sa opugun eba gwesim hilifeg Sodomnai elni kinigim kwefugkag.”

### *Niasambanig*

#### *Matyu 11:20-24*

<sup>13</sup> Sisas enaig esog, “Korasin lanai el i Betsaida lanai el i niasambanig, afa mangigim ne enaigba ne esig. Afa maia Tair lanai el i Saidon lanai el i ma nanguiteba enag kigmogim. Sa ati ne nanguni asa autunam heafgelni amtakwaligim afwahifnibi afa sa kokohiag lofug laitiagini afa simof susleagini enaba heafgelni kusugogim ogfuni.

<sup>14</sup> Afa nengegim God kwefihiageg osuna mungwag faigim. God Tair lanai mi Saidon lanai me gwenaig amtakwalig mungwag faifi. Afa nengelimbi eba nem numwehe faifi.

<sup>15</sup> “Afa Kaperneam lanai el ne onigig noka suialag el hevengam afufe, eba awai, eba God nem suwi lagig kembang gam labi klaitife.

<sup>16</sup> “Afa Sisas patalfuiag elim enaig sihifeni og, amban sa nengelni mo higife eba ati kana mo higig afa amban sa nengelni mo oksu fwaha kafe eba ati kana mo oksu fwahag ikag afa amban enaigba esefe eba ati Godim mas fatinag ehe sa kam ningihiag.”

### *72 el pese ambena*

<sup>17</sup> Afa Sisas sa 72 elim ningitigina enag pese ambe apukegohna, afa ehe sifakalifinibi enaig esogona og, “Ainiyag, ka neana unehlagim sefligbi sanel amtakwalig ena mo higigim apuke embem ahkawag minefeg.”

<sup>18</sup> Afa Sisas enaig sihifeni, og, “Ka nangugba Satan of lanai opefenaba afwe lofug fliakafeg.

<sup>19</sup> Sa hig, ati ka nem wasneigbi faig eba ne sobine afa gongigna nihiafuiafiba. Afa eba ne ming Satanna mungwali wasneigim ne filafefatife. Afa mas nem mangwal ambanim fei.

<sup>20</sup> Nofeka enaig sifakali sanel ati kagelni mo higig onigim embem afug. Amo, eba Godim ehe sa ne sifakalini eba ati ehe nengelni unehlag heven la nofkikena gag buk la fakanig.”

### *Sisas Godim suialag onam sifakalena*

*Matyu 11:25-27, 13:16-17*

<sup>21</sup> Afa enenam Godna Sungwabug Sisasim sifakalig fainaba Sisas enaig esona, og, “Api ne heven lanai afa bitenai Ainiyag, ka nem suialag onag afa ne hwaig anwenagba anwena elbi ne sisagenigim afa ne etetig elim mo ambala upugunig. Api ne enaigba esegba eba ne nibeafna membugum patalfefku.”

<sup>22</sup> Afa Sisas enaig esona og, “Kikeafna Alag mungwali gawig kana ninga la fwahag afa mas amban kana Alagba anwenafenag mo eba kike mungu fegim afa amban sa ka kikeafna Alagim ogfunig ena mungu he ehem anwenafinig.”

<sup>23</sup> Afa patalfuiag el mungu auguiafnaba Sisas wahigi nanguagnam asa enaig esoni, og, “El sa mangwalim nanguig eba nengel sati ne fanangufie eba sa ma sifakali.

<sup>24</sup> Afa ka nem osihin autunam mo fli sihiafule el i afa misog el i oagna hwaigim nangui afa mas nanguig mo afa oagna hwaig mo higim afa mas higig mo.”

### *Sisas Samarianai elni mo sihini*

<sup>25</sup> Afa nihemo anwena el mungu oagna Sisasim yuhna ehe enaig sahna og, “Tisa sa ka haig esenam sa ka nofkikena wahkig gagba flafe?”

<sup>26</sup> Afa Sisas wahigi ehem sihina og, “Ne ati anwenafeg nihim, ne haig onigig feg?”

<sup>27</sup> Afa nihemo anwena el enaig esona og, “Sa ne Godim fwina membena. Afa nimbiafna olugni, onigigna sungwabugni afa wasneigni asa ne Godim membena afa sa ne nibeafna hihem fwina mebena asa nibefum enaig safafefe.”

<sup>28</sup> Sisas ehem sihina og, “Ei, enaig ho ati ne ihla sihig enaigba ne eseiba eba ne nofkikenaba flafe.”

29 Afa anwena el enaig onigig fena og, eba Sisasim og masa enaig onigig fefe og sona elbi mas patalkug mo. Afa sa Sisasim enaig esona, og, “Afa kana hihe amban maia?”

30 Afa Sisas lasug mo enaig sihifena og, “El mungu Jerusalemim fwahanam Jerikogam pe la kafna afa raskol el ati ambe mina puguag la afohieafna, enag apuke ehena gawig mwehnaginim afatigi kaminefi fati afunaba ati la-hagim meini ofefna.

31 “Afa enenam pris mungu blo nanguafnaba ehmbeg mina kwegfu ikana.

32 Afa lotunai gafugag el mungu gwenaig esena blo nangunam ehmbeg mina kwegfu ikana.

33 Afa Samarianai eba afwambanai el sum blonam asa nanguna maia mina la gifnibi afa sa aflafena.

34 Afa sa ika fahigenagenam asa marasin bugna malu gokigim sugfunagenam kikenagena, enaig donki la lasunam asa luwal nena lalagam wanikina.

35 Enanai yi wanigiau maia managenaba asa lalana mogim silva kig fainam og, ‘Asa numwehe sani gafim, afa sa nofeka ming sisiyi pahla eba se gafiba ka pese blonam kasa nem fai.’

36 Afa Sisas anwena elim sahna og, sambaga mungu el sa amban maia raskol tigifatig elimbi kweagfuna. Afa amban maia ehena hiheaba feg?”

37 Afa ehe esona og, “Eba el sa fwinam aflafenam afa kweagfuna.” Afa Sisas ehem sihina og, “Ei, sa ne gwenaig ne gafa ese.”

### *Sisas ika Marta Mariana lala seaifona*

38 Sisas patalfuiag elim wan ikana kembang la wan seifu pugunaba afa Marta blonam Sisasim sulufnanam heafna lalagam wanikina.

39 Afa Marta ati heafna sumineg fena ehena unehlagba Maria enag blo Sisasim muhla kuguhlanam Sisasna mo hignaufna.

40 Afa Martaba gafugagim fwinam onigina ehe fwaimu fane kukumwei yegohun ehem oksinaba asa ika Sisasim sihina og, “Ainiyag, sa ne kam kusguna sa ne kikeafna suminegim sihinaiba sa ma blo kam kweagfoi ka kike fwaimu gafuga fego.”

41 Afa Ainiyag ehem esona og, “O Marta, ne fwinam gawigim onigigi.

42 Afa sa ne mangwalim mungu onigigi, afa Maria sa aflahba eba suialag nemugfeg mas big ehena enaigim fli fatini”.

# 11

## *Beteneg nihe*

*Matyu 6:9-15, 7:7-11*

<sup>1</sup> Afa maia Sisas betene gafnaba, afa sa patalfuiag el mungu Sisasim enaig sahnafena og, “Ainiyag, sa kam betenegim ofgunim Jon sati autunam esena heafna patalfuiag elim ofguni.”

<sup>2</sup> Afa Sisas enaig sihifeni og, “Sa ne enaig beteni og; Api el sa ma neana unehlagim fingifi afa neana bog meg sa ma bloi.

<sup>3</sup> Afa sa ne kam fane mungu mungu osuna faibi sa ma gwese gofi.

<sup>4</sup> Afa ne kagelni amtakwalig nihem esmunagim pigihianugeg fatinig. Afa ka gwenaig esig el kagelim amtakwalig hiagibi asa kagel gwenaig esegonig ehengelni amtakwaligim pigi fatigonig ne kam fwatife, ma kam yuh-nagba pugunibi sa ne kam amtakwalig lanai lambim.”

<sup>5</sup> Afa Sisas enaig sihifeni og, “Amban sa heafna hihefeg enag sinaini blogim heafna hihem esonag og, ‘O, hihe ka membeg kam sambaga mungu amba faim.

<sup>6</sup> Afa ehe ikagim heafna ming hihem sihinag, og, kana hihe minagwi blowag sinaini kana lala puguba afa kam fane awaienag ka mas faig mo.’

<sup>7</sup> “Afa eheba lala megam gibi enaig esog, og, ‘Nofe ka kam ilafofeafila ati ka mengigba kikisegim ka wangi. Ka mas buihianam nem gawigba fai.’

<sup>8</sup> Ka nem sihinig lalana mog hihem sa gawig faig fwainig awaiefe eba ehe maisim sahna go maia feg ehem oksiba asa buihiagim mungwali gawig ehem lambwaig.

<sup>9</sup> “Afa sa ne gwenaig esi ma ne Godim sahnibi sa ma nem mangwalba fai afa ne yisgibi eba ne nangufie afa ne mengigimba faheugufibi eba nem mengig piginife.

<sup>10</sup> Afa mungwali el sa mangwalimba Godimba sahnigbi eba flife. Afa ambangel enam fwinamba oyisgibi eba sa nangufi afa amban mengigim faheugufeflibi eba piginugefe.

<sup>11</sup> “Afa sa nengelni luwal amban heafna alagim sahnafe og, kam sawag embinegu fai, afa sa wahigife gihe sobine faig, amo.

<sup>12</sup> Afa luwal alagim sahnafe kam amb suwig fai afa sa wahigifegim gaigo faig, amo ena gafa awai.

<sup>13</sup> Afa nengel luwalna humoanig eba amtakwalig el afa sa ne luwalim suiala fehiagig sa ne anwenafi nengelni alag hevenla ga eba nem sifakalenim afa ambangel sa ehem sahnig enam heafna Sungwabug faife.”

*El esogog Sisasba sanelni misog el*

*Matyu 12:22-30, Mak 3:20-27*

<sup>14</sup> Sisas mengim hafinig elim suiala fefatina, ena elbi sanel esenagini. Afa maia el mo lagwagenaba asa mungwali el enam nangunim sineminefini.

<sup>15</sup> Afa mingnag el enaig esogona og, “Sona elbi eba Belsebulni kigmog la gafuga feaka.” Belsebul eba Satan sanelni misog el.

<sup>16</sup> Afa mingnag el ogra Sisasim yuhni asa ehengel ehem sihini og, “Sa kigmog ogfu enaigba ne esegba eba naho ogfug ne Godna gafugagba feageaka.”

<sup>17</sup> Afa Sisas ati ehengelni onigigim anwena fenim afa enaig esona og. “Eba enaig eseg, sa ambangel kantri kwefihiagim asa hufum hagfe eba ena kantri amtakwalefe. Afa mungu nilitena sa hefum hagfe eba gwenai gese amtakwalefe.

<sup>18</sup> Afa Satan heafna gafugag elim amtakwale klaitiba asa hefum pwatihigife, afa pwatihiginim afa sa mangwal sa Satan nangwagihigi ageg eba enag tigeufufe. Afa sa ne esog, kam og, Belsebulni kigmog la sanel amtakwaligim ningitigi feaka.

<sup>19</sup> Afa nufunamba asa amban sa nengelni elbi kigmoagba faife asa sanelimbi ningitigi feaka? Asa nibeafna elim ogfunfe, nengelni onigig amtanafeg.

<sup>20</sup> Afa atiaba God kigmog faigba amba sa ena kigmogna ka sanel amtakwaligim ningitigi feakagba eba sa ne anwenafi, eba Godna bog meg ati pugug.

<sup>21</sup> “Afa sa wasneig el mungu fangoba lambigim heafna lalam kokoago afa sa ehena lalanai gawigba suiala gohna.

<sup>22</sup> Afa eba ming el fwina wasneig elbi ehe bagagafenam asa ehem filafe fatinam afa sa fango mo mwehenam afa ehena mungwali gawig mo ukwefenam mingnag elim mimagenfie.

<sup>23</sup> “Afa amban sa kablei ahgohug fwainigba eba kam angoluweg el fenag afa amban sa elim lambigim kam kwegfwag fwainigba eba elim patageule el.”

*Sanel pese blog*

*Matyu 12:43-45*

<sup>24</sup> Afa Sisas enaig esona “Sanel elim fwahagim ikagim bu fwainig bite eyi gagim yisgig, afa mas uflag mo. Asa ehe enaig esog og, ka pese kikeafna lalagam ika.

<sup>25</sup> Afa sa ikag ena lalam nangugba esug go afa ati ombusi-agigim afa numwehiagig fwahig.

<sup>26</sup> Afa sa ehe pese ikagim elegeg la gohug sanel fwina amtakwaligim sulufugim asa wanblog saiyeg afohie, asa elbi enaba fwina nemug amtakwalegeg, afa ilawana mo gweyiagig fena.”

*Mangig el sa ma sifakali*

<sup>27</sup> Afa maia mungwali el laskuhla gofnaba asa Sisas enanai mo sihina afa angwafig mungu enanai enaig esona og, “Angwafig sa nem wanigagim afa nem tut faig enaba sa sifakalei.”

<sup>28</sup> Afa Sisas enaig esona og, “Amo, sa big enaig esogo, el sa Godna mo higigim patalfug enaig elbi eba sa ma sifakali.”

*Sisas ogna Jonana wasneigim mungu ogfun*

*Matyu 12:38-42, Mak 8:12*

<sup>29</sup> Afa kaksag el ambenaba afa sa Sisas enaig esona og el enenamba amtakwalig augiafnaba og kawo wasneigim nangu afa enaba ogfug ka Godna gafugag ka eseg. Afa mas enag ogfuiagimba nanguig mo eba awai eba Jonana wasneigim mungu nangufe.

<sup>30</sup> Afa autunam Godna mo flaule el Jona Niniva nai el amtakwaligim asa Nufunam el gwenaig nengelim esenfie.

<sup>31</sup> Afa enenam God sa elim kwefihianugefe afa membina kwin buhianam asa nengelim setigifie. Afa ena kwinbi eba heafna kembang fwaha blonam Soloman na suialag mo asa higife.\*

<sup>32</sup> Afa enenam God elim kwefihianugefe afa sa Niniva la nai el bugia gafenam asa nengelim setigifie. Afa ehengel Jonana mo higinim asa heafgelni amtakwalig nihe masigim fatini, ka nem sihinig amban el mungu sa wanai yi go, asa enag Jonamba gosenag.

*Eligni ombusug*

*Matyu 5:15, 6:22-23*

<sup>33</sup> Sisas enaig esona og, “Mas ambanba wiba gaflanam meagamba kumohlai, eba awai, eba wiba gaflagim ambala uguhba eba ena lalanaim elim ombusug faig.

<sup>34</sup> Afa nofugba eligni ombusug neana nofug suiala gohugba eba neana elig mungwali ombusig. Afa neana nofug amtakwaligba eba neana elig sikulufeg.

<sup>35</sup> Afa sa numwehifibi ese neana ombusug sa seifo neana nihi go masa fwinam sikulufeagefe.

<sup>36</sup> Afa eba neana elig sa mungwali ombusi go enag sikulufeg mas neanai yi gofi enag sa ma mungwali ombusi gofi ofenaiba lam laugugo.”

*Sisas farisi elmi nihemo anwena el mi fenugena*

*Matyu 23:1-36, Mak 12:38-40, Luk 20:45-47*

\* **11:31:** Ena moba 1 Kin 10:10 la go. Afa ka nem sihinig amban el mungu sa wanai yi go enag Solomoniba gosenag.

<sup>37</sup> Afa maia Sisas mo sihi fwahanaba afa sa Farisi el mungu blo ehem awamonam og na fane ahga afa sa Sisas ehengelni lala ika seifo sime la pegana.

<sup>38</sup> Afa maia Sisas fane bula ningam suwageg fwainig onefnaba afa ena Farisi el enam nangunam fwinam onigwageaufna.

<sup>39</sup> Afa Sisas ati ehena onigigim anwenafenam asa enaig esona og, “Nengel Farisi el ne kap afa pletba afwambagim mungu gigiafeagig afa meagam nengelni onigigba eba ugwefi afa haig haig nihei memtola pugu go.

<sup>40</sup> Afa ne mo etetig el! Mas ne numweheg anwenafig mo eba God gafugafefug afa sa ehe meagam gafa gwenai esefug.

<sup>41</sup> Afa mangwal sa plet la afogoa enag sa ne elim faigo asa ehengelim enaig tumenig afa ne enaigba esibi eba nengelni mungwali gawig afsug pugu go hwagefe.

<sup>42</sup> “Afa Farisi el niasabanig eba nem amtakwalig pugunfie ne enaig esig, yasmuel unehlagba mint, dil, kumin enag ne lambigim afa ne 10 pela hap sugwafugim afa mungwehigenai mo Godim faig afa ne suialag nihe God sa membeg enam ne fwahig. Sa ne enam fwina wasneyi ma sa ne mingnag nihim gafa fwahife.

<sup>43</sup> “Afa Farisi el niasabanig nem amtakwalig pugunfie. Ne enaig esig ogka laskuhla fohug lala gosi suialag sime la augu. Afa ne enaig membig nog sa ma kam unegoni og, saglag el.

<sup>44</sup> “Afa niasabanig ne bite kife lofug. Sisiyiamo el nangugbi suialag go afa el ena mina gam afugim afa mas anwenafig mo skau mo bitemegamba eba kigi lofugi ati nogi go.”

<sup>45</sup> Afa nihe mo anwena el mungu ena mom higinam Sisasim sihina og, “Ogfuiag el ne enaig mo Farisiim esonibi eba kagelim gafa ne kam mungwali moalabenig.”

<sup>46</sup> Afa Sisas anwena elim enaig esoni og, “Niasabanig eba amtakwalig nem pugunfie ne elim kinig kike faigog, afa ena kinigbi el kahlig, afa nibeah mo mas ne weti ningana sehlig mo.

<sup>47</sup> “Afa niasabanig nengelni simbianiga Godna mo fli sihiafule elim kwaskofigim afa ne bite kife mo fwinam suialafeagig.

<sup>48</sup> Afa enaigba eba ne elim ogfugonig, eba enaba ne mungu onigig flig nengelni simbianiga sa autunam esini.

<sup>49</sup> Afa Godna suialag onigig enaig esog, og eba ka mo fli sihiafule elni afa wefug fwatieg elni ningitigiba asa afu amtakwalig el nai apukeiba afa sa mingnag mo patagiemine fenigim asa kwaskofife afa mingnag i mo esug kwaskofig fwatieg.



<sup>50</sup> Afa sa ena kinigbi gwesego ilawana sa God mungwal gawig eseage fwahanaba enanai pugugim blog glawaga go. Enaig mungwali nihe God glawanga elim mungwag faig.

<sup>51</sup> Afa mo flisihiafule elim sa kwaskofigbi ena niheba Abel naiyi pugugim blog Sekaraia nai pugug. Afa Sekaraiaba tigi fatinibi eba Godim sis tuhlu faig sime i afa Godna kwania lala i ena olyi tigi fatini. Ei ka nem sihinig, ena susug amtakwaligba eba nem mungwali elim mungwag faigimbi ilawaga pugunfe.

<sup>52</sup> “Afa nihemo anwenag el niasabanig, ne Godim anwenafenag minam kwegonig afa nibeah mo mas ne ena minagamba afu saiye anwenafi afa ne ehengelim kwegonig.”

<sup>53</sup> Afa maia Sisas ena lalam fwahia akofenaba afa Farisni el i afa nihemo anwenag el i olug kakagenaginim afa sa haig haig sahih apuke fenagini.

<sup>54</sup> Afa ehe mwakwalini Sisasim og maia haig mo sihiba og nasa ehem kotimini.

## 12

### *Farisini mwakwal mom numwehigibi*

#### *Matyu 10:26-27*

<sup>1</sup> Afa kaksag el fwinam laskuhlag enam mina kagfu fakanaba enanam Sisas patalfuiag elim enaig sihifeni og, “Farisini yistim numwehifibi, enaba ka nem sihinigbi eba ehengelni mwakwal mo amtakwalig.

<sup>2</sup> Afa mangwal sa mungwali meagam ilawo sisagego eba nengigim ambala pugufe. Afa sisag moba eba mungwali el anwenafife.

<sup>3</sup> Afa ilawo sa ne mungwali mo muhefuna ne sihih afa nengigimba eba el ambala higife. Afa mungwali mo sa ne ilawo muhefuna lala megam sihih, afa nengigimba eba el ambala ambwaitina sihife.”

### *Nofe ne embefe*

#### *Matyu 10:28-31*

<sup>4</sup> Afa Sisas enaig esoni og, “Kana hihe nofeka embefi amban sa nem og, ka tikefati enag elbi mas neana sungwabugimba tikefati, eba awai.

<sup>5</sup> Ka nem ambala osihin, sa ne Godim embefini, eba ehe nem eligni sungwabugni suwi lagig kembig gam lambi aitime ka nem nufuna mo sihinig sa ne Godim mungu embefini.

<sup>6</sup> Afa sa ne afala pugufeg twafig weti kigna lambig ese masa mungu pefe eba God mas enaigimba eteti.

<sup>7</sup> Afa eba God ati nengelni lapogim suwigig fwatig, afa ati nem anwenafenig afa namba gwesim twafigim, hili fegonig Godna onigigimba asa nofe ne embefi.”

<sup>8</sup> Afa Sisas enaig esog og, “Afa amban el sa enaig esofe og kaba Sisasna el, eba afa kaba Nufunam El gafa Godna oflanai elim sihinfe og, hwaba kana el.

<sup>9</sup> Afa amban el sa mingnag elni nofla kam mas fatinafe eba ka gafa Godna oflanai elim sihinfe hwag elbi ka mas ehem anwenafenag mo.

<sup>10</sup> Afa amban el sa amtakwalig mo Nufunam Elim esenafe eba God ma ena amtakwaligba flafatife. Afa asa amban Godna sungwabugim amtakwalig mo esenaiba eba glau afa nengigim God ena amtakwaligimba mas flafatinai.

<sup>11</sup> “Afa maia nem wanafu gavmanna nofla afa lotuinai saglag elni nof la lambi aitibi nofeka enaig onigwagim afa haig mo sa big sihife.

<sup>12</sup> Afa eba gwenenam nem Godna sungwabug nengelim ogfunibi asa ne moaba sihigonfe.”

### *Moni lasug mo*

<sup>13</sup> Afa el mungu blo Sisasim enaig sihifena og, “Ogfuiag el kana alag ati lahagba gawig mo sko fwaha kag ka membeg ne kana etegim sihinaiba sa ma gawig mangetigi kam fai.”

<sup>14</sup> Afa Sisas ehem wahigi sahna og, “Amban sa kam enaig kwefihiagegimba wefug fwahag og sa ma nenigina gawig mangetigini amo eba awai?”

<sup>15</sup> Afa Sisas enaig sihifeni og, “Numwehifibi masa ne haig haig gawigim, enaba ne enaig nubinifefe, afa mas nem enaig gawig nof kikenag fai.”

<sup>16</sup> Afa Sisas enaig lasug mo sihina og “Kig elni asonai gawig kaksag pugug gug lugwageg.

<sup>17</sup> Afa enag el enaig onigifena og, haig sa ka esefe, ena asonai faneba sa ka mangwal lala skofe ka lala awai.

<sup>18</sup> “Naiba kawo enaig ese, ka fane lala wetianig bubugeiti feakanam afa ka sa kwania lala nimblagenam enanai asonai fanei witi sko.

<sup>19</sup> Ei kasa kikeahba enaig eso, kaba fwinam enaig eseageg, ka kaksag gawig suialag eseagegba eba gwese wahkig kaksag yia la gofiba afa sa ka hekuleaufiba fane mo agogulinam neaufiba sifakalefe.

<sup>20</sup> “Afa God ehem enaig esona og, ‘Ne moetetig el ilawo nem hwa sinaini lahaiba afa sa neana mungwali gawigba amban flafe?’ ”

<sup>21</sup> Sisas enaig esona og, “Sonaig el sa kaksag bitenai gawig agogulig enaba afunam Godna nofbosug la esug el amtakwalig afohiefufe.”

*Nofe ne fwina onigwagi*

*Matyu 6:25-34*

22 Afa Sisas heafna patalfuiag elim sihini og, “Ka nem enaig sihiofen sa ne lasug mom onig. Nofe ne nimbeafgelni nofkikenam fwina onigwaginim afa ne enaig esegofe nog mangwal sa big ahgafe? Afa nofe ka nimbeafna nihim oniginim afa enaig esogo mangwal lofug sa big fatife?”

23 Afa ena nofkikena eba fanem flafug afa elig lofugim flafug.

24 Afa ati ne twafigim nangwagig mas faneba yihi afa mas agogulinim fane lalaba sugui, eba God ehe faneba faig, afa nimba ati ne twafigim flafug!

25 Afa amban sa nengelnai onigwagegim asa heafna nofkikenaba hilifeg fwahag, amo eba awai.

26 Afa mas ne ena wetiaklugba esei, haig esegba sa ne fwinam mingimba onigig.

27 “Ati ne li sisigimba nangug haig sa pugug afa ehe mas wasneig gafugafei afa lofugba kweli. Afa ka nem sihinig autunam misog el Solomanna mungwali wag suiala skofenaba mas suialag li sisig lofena mo.

28 Afa ilawo sa hwa pos gohka afa siniba higfihinim suwi la lambi aitife, enaig posba God ehe wagwageg fwahag, afa sa nengel weti onigig feg asa ne numwehe onigim neaga Godba nem wag faife.

29 Afa nofe ka kaksag onigwaginim afa esogo mangwal fane afa bu big ahgafe.

30 Afa afwambanai elbi enaigim fwina onigwagigim afa sa fwinam yisgeafo, afa nengelni alag ati anwenafeg asa ne enaig flife.

31 Afa ne enaig esofifibi eba sa Godna bog meg gose fwinam onigibi eba sa nem enag gawig gafa nem faifi.”

*Suialag gawig agogulig nihe*

*Matyu 6:19-21*

32 Afa Sisas enaig esona og, “Nengel kana mungu sambagag sipsip nofe ne embefi eba nengelni alag nem gaunamug minaba ogfunfie eba ehe nengelni misog el fenam asa ne heafna bog megam saiyefe.

33 Afa sa ne elim fwahiagonibi sa ma nengelni mungwali gawig lambibi asa ne kig fli sa ne ena kig mo el sa gawig tumenig sa ne kigba enam faigo. Afa sa ne suialag gawig hevenlanai agoguli. Hevenlaba eba mas susmofe i afa mas ugwef el ugwef i afa mas awaie i.

34 Afa enanai yi sa neana gawig go enaba neana onigig gafa eba gwese enanai yi gofife.”

*Suialag gafugag el ati ninmwehiagig go*

*Matyu 24:42-44*

35 Afa Sisas enaig esona og, “Sa ne gafugag lofug laitia-genim afa lam gawagi sa ne ninmwehiaginim gofum.

36 Afa sa ne enaig esi ofenaiba saglag el angwafig flag buyisegim oblohba ne enam ninmwehiagigim negeafo. Ma atiaba blo mengigim tigegeba eba ikagna mengig pitigiefu-nife.

37 Afa sa ena elbi blo gafugag elim nanguagfe sa ehengel non askag fwainig fife eba sa ma sifakalife. Ka nem nufunam sihinig, ena saglag luwal ehe gafugag lofug laitagegnam asa sihinfe og, apaiye sime la augu, asa ehe blonam faneba mimagenfe.

38 Afa sa saglag luwal mongkok luputiegna me awai ambagna me blo gafuga elim nanguagfe sa ehengel non askag fwainigfife eba sa ma sifakali.

39 Atiaho ne enam anwenafig, el sa lalana mog feg enag sa ati anwenafefe eba ansi sa sinaini ukwef elbi blofe asa ehe numwehego afa mas fwahai eba og masa ukwef el lalagam feifu blofe.

40 Afa neaga sa ne numweheage gofim Nufunam El sa enag osuna oblofiba ne etetiegafife.”

*Gafugag el suialag afa gafugag el amtakwalig  
Matyu 24:45-51*

41 Afa Pita Sisasim sahna og, “Ainiyag ena lasug moaba fig kagelim mungu me awai mungwali el nahlu me?”

42 Afa Sisas esona og, “Amban sa gafugag el sa suialag onigig fegim asa heafna gafugagim numweheageg enaig elbi eba naho misog el ehem wefug fwahag og sa ma ehena gafugag elim nangwaghiagnam afa sa fane mimageni.

43 Afa enenam sa misog el pese blonam asa ehem nangufe maia gafugafegofiba afa enaig elbi sa ma sifakalei.

44 Afa ka nem nufuna mo sihinig afa enag gafugag elbi eba misog el ehem wefug fwahag og sa ma mungwali gawigim nangwaghiagei.

45 Afa enag gafugag el enaig ming onigig fenaba ehe enaig esona misog el eba maisim fe afa asa ehe pugugim mingnag gafugag elim saglagim afa angwafigim kwagaitifiahka afa wain bug negim fwina toififeageg.

46 Afa enag osuna ehe etetife maia heafna misog el pese blo pugufe afa enag misog el ehem nugwakale flanam afwambanai el naiyi wahe fwahafe.

47 “Afa gafugag elbi ati ehe misog elni sawiegiba an-wena fenam afa ehe mas ninumweheagenam mo misog elni sawiegim patalku mo eba misog el blonam ehem fwina-mimagenefefe.

48 Afa amban gafugag el sa misog elni sawiegim etetig eba moalagig susug flafe, afa ambangel el sa ne kaksag gawig lambwagig afa ne ming pasnim asa ne pese suku afa sa el kaksag gawig mungu elni ninga la sukufe eba enag el sa ma mingnag pasnam asa ma pese ehengelim lambwai yi.”

*Sisas blog elim olyi magetigife*

*Matyu 10:34-36*

49 Afa Sisas enaig esona og, “Ka blogim suwi bite la fati fwahag, afa ka sawyifeg ena suwi ati pahlag.

50 Afa maia ka lahafe eba enaig ofenaiba ka alganam bula pe flag sufe, enag kam olug fwina kinig enaig gafugag sa ma gohun ikan enenam awaie.

51 Afa masa ne enaig onigig fife kam og eba blog hwa bite la fag hagigim tigevlakafe. Amo, eba ka blo elim olyi magetigife.

52 Afa nengigba eba afala pugufeg mungu lalanai el hefum bambuhiagi kamine fenam asa hefum tigeifeagife. Afa sambaga mungu afohienam asa sambaga elim fegonfe afa sambaga el ahgoznam sambaga mungu elim ahfenfe.

53 Afa alag goznam heafna fangonai luwalim fenagefi afa fangonai luwal goznam heafna alagim fenagefi afa afag goznam heafna naini luwalim fenagefi afa naini luwal goznam heafna afagim fenagefi, afa kowag goznam heafna kowagim fenagefi afa kowag wahgife mungwag heafna kowagim fenagefi.”

*El mas mangwal puguiagim anwenafig mo*

*Matyu 16:2-3*

54 Afa Sisas kaksag elim enaig sihifeni og, “Afa sa ne ofim osu pegam nangug maia nugwagofeba ne enaig esogog bu fegim asa bufeg.

55 Afa ne nanguig wasneig efef osu peg ehbeg lanai blog. Afa ne esog osu klaig alaugu asa gwenag eseg.

56 Afa ne sambaga mengigna el ne enaig esig bitenai gawig mi afa oflanai mi ne fwina kwefihianagig afa ne mas numweheg anwenafig mo mangwal sa glawo pugug.”

*Angoluwag el i mo numwehe sihiagafe*

*Matyu 5:25-26*

57 Sisas enaig esona og, “Afa haig segba sa ne mas numweheg onigig mo sa ne numwehe kwefihiagi haig nihe sa ihlaba feg.

58 Afa el sa nem oyna kotimena enaba sa ne mina la ahkafiba sa ne sihiagafe. Masa nem flanam jasna ninga la fwahaiba afa jas nem flanam plismanna ninga la fwahaiba asa nem flanam kalabus lala fatife.

<sup>59</sup> Afa ka nem nufunam sihinig, eba ne kalabus lala gweyi gafiba asa ne kigna mungwali baimefe.”

## 13

### *El olug waikefeg fwainig eba ehem awaiefe*

<sup>1</sup> Afa maia Sisas mo sihiage fwahanaba afa el mingnag Galilina mom sihinagini, og Pailat heafna amiim sihinigbi ehengel elim kwasko fifug, maia Godim sis tuhlu faigim ofibi afa elni taf pefug Godim faigim ofibi afa elni taf pefug Godim sis tuhlu faig taf la pahlafig.

<sup>2</sup> Afa Sisas enaig sihifeni og, “Atiaho sa ne onigig, enag Galili elbi amtakwalig gafugag kaksag feagigbi asa enag amtakwalig ehengelim pugunig? Afa mingnag Galili el eba suialag afa sa mas enaig amtakwalig ehengelim puguni mo?”

<sup>3</sup> Amo eba awai ka nem nufunam sihinig, eba ne olug waikefig fwainigba eba nem amtakwalig gwenai mungwali pugunfe.

<sup>4</sup> Afa autunam Siloamna kembang kwieg lala tofupe 18 yi gohug elim pigasko fenaba asa pigina sa ne enam onig amtakwalig sa figbi, enaba ne og el sa Jerusalem la auguia enam filafig me?

<sup>5</sup> Amo ena gafa awai, ka nem nufunam sihinig eba sa ne olug waikefig fwainig fife eba nem amtakwalig gwenai mungwali pugunfe.”

### *Fik li fug mas lei ena lasug mo*

<sup>6</sup> Afa Sisas enaig lasug mo sihina og, “El mungu fik li heafna aso la gahag fwahag, afa nengigimba eba ehe pese blonam asa fik li fugim oyisigifiba afa mas fugim nangui.

<sup>7</sup> Afa sa ehe heafna gafugag elim enaig esona og, ‘Sa hig, sona fik libi sambaga mungu yia la gohug, afa mas fug leg mo ka fahigeagegba mas ka fugim nangug mo eba sa ne higeflaiti ehe munim suialag bite la go.’

<sup>8</sup> Afa gafugag el wahigi ehem sihina og, ‘Saglag luwal sa magofi ma mungu yia la gofiba kawo mogim bite tutohiagenam afa bulmakauni ata sukonage.’”

<sup>9</sup> Ma atiaba nengigim fug olefiba eba suialag, afa awaiba fegba eba sa higeflaiti.

### *Laskuhlag osuna Sisas angwafigim suialafe fatina*

<sup>10</sup> Afa Sisas laskuhlag osuna laskuhlag lala mo sihinwagena.

<sup>11</sup> Afa enanaiba angwafig mungu gihna fena eba sanel amtakwalig saiye esenagini ena gihba wahkig gwese gofna, yiaba 18 ena enaig fena, enag ehena kigibugbi ati fiahsafena haig seg buihiah mo.

12 Afa Sisas ehem unenam afa enaig esona og, ‘Angwafig ati ka neana gihba huguflatinag.’

13 Afa sa Sisas angwafigim ningana tuhnaba asa kigibugbi buihia susni feafona. Afa sa ehe Godna unehlagim figi fukuna.

14 Afa laskuhla gohug lalanai gosig el Sisasim olug kakage-nam ehe mungwali elim enaig esona og, ‘Gihna sa ne og el sa ma kam suiala fefati eba enwesog la gohug gafugag osuna ehe sa ne blo. Afa nofe kawo elbi gihim suialafe fatiagimba laskuhlag osunaba blo sahna, magofi.’

15 Afa Sisas wahigi ehem enaig sihifena og, “Ne sambaga mengigna el, afa nengelni mo i nihe i mas mungwalofug ah-feg mo, eba ne laskuhlag osunaba bulmakau lalagam afugim bulmakauni donkinam pigihiagonigim bu lambwaigogim wanafug.

16 Afa hwag angwafig sa eba Abrahamna luwalig mungu he feg enag Satan ehem kehlaguiag 18 yia enaig la enaigim pigi fatinag afa ne kam og masa ne laskuhlag osunaba esefe?’

17 Afa maia Sisas enaig sihifenaba, afa ehena angoluwag el ehem fwina afwanefesko fena. Afa mungwali el afigigini maia enaig suiala pugunaba.

*Mastet li fug lasug mo*

*Matyu 13:31-32, Mak 4:30-32*

18 Afa Sisas enaig esona, og, “Godna bog meg sa haig seg, ka enaig lasug mo osihi.

19 Eba weti klug mastet lifug lofug afa maia el aso la kumohlagba asa fugogim kwania feagegba afa asa twafig ambegim enanai yi gag nimblagig.’

*Yist lasug mo*

*Matyu 13:33*

20 Afa Sisas ming lasug mo sihini og, “Godna bog meg sa haig eseg. Haig lasug mo sa ka sihig?’

21 Afa eba yist lofug, angwafig mungu yist weti flagim plaua kwania la wahegba asa plaua pupkuia fugog.”

*Sa ne mina weti megam saiye*

*Matyu 7:13-14, 7:21-23*

22 Sisas Jerusalem minagam ikafnaba elim taun lanai elim afa kembang lanaim mo ogfufehiagena.

23 Afa el mungu Sisasim enaig sahnafe na og, ‘Sa God ba mungu mungu elbi pese lambi me?’

24 Afa Sisas wahigi enaig sihifeni og, “Sa ne fwina wasneyi afu mengig weti megam saiye. Afa ka nem sihinig, eba kaksag el ona ena minaba saiye afa mas enaig esi.

25 Afa maia nengigim lalana mog mengig kikiseba eba ne ambenam afwambala afohiefiba afa ne enaig esogofe ne og, 'Ei saglag luwal kam mengig piginim.' Afa nem wahigi enaig esonfe og, 'Ka mas nem anwena fenig mo ne hanai blog.'

26 Afa ne enaig esogofe 'Kaba ati big fane ahgafena afa ne olyi gohugim kam ogfunigeg.'

27 Afa eba nem enaig sihifenfe, 'Ka mas nem anwena fenig mo ne hanai el, ne amtakwalig el gwesim afu.'

28 Afa ne nanguibi Abraham, Aisak, Jekop afa mungwali Godna mo fli sihiafule el enag Godna bog megamba saiye afohiefife. Afa negelbi nem lambi klaitibi ne afwamba la afohiefiba afa ne wewatini nibeafgelni gog kike sko fefe.

29 Afa el osu puguiag lanai, osu peg lanai, afa ehmbeg la nai afa ohgo nai ehnge nai asa ambenam Godna bog megam saiynam fane ahgaflatife.

30 Is, sa hig, enenam mingnag el sa ilawo sum ambe eba afu gosife. Afa mingnag sa gosig afuia eba ambenam sum afohiefife."

*Sisas Jerusalem lanai elim aflafena  
Matyu 23:37-39*

31 Afa gwenenam Farisi el ambe Sisasim sihini og, "Ne hwa kembang fwahanam ming kembang gam ika Herot nem ona tigeftati."

32 Afa Sisas sihini og, "Herotba ifauwi lofug afunam sa ne ehem enaig sihifini. Is sa hig, gla i, sini i ka sanel amtakwaligim ningitigifei afa gih elim suiala feitifei, afa maia sambaga mungu osu feiba eba kasa kikeafna gafugagba awaie fati.

33 Afa ilawo, sini, esnag ka gwesim ikafufe profetba mas algana kembang laba gafiba enanaiba tigeftati eba heafna Jerusalem laba sa tigeftati."

34 Sisas enaig esona og, "O Jerusalem lanai luwal ne Godna mo sihiafule elim kwaskofig. Afa el God nem ningitiginigbi afa ne funna kwaskofig, afa wahkig goka elim lamblu kikeafnai yi lambugufim, ofe naiba kakaruk afag heafna luwaligim lamblu anglag meg gam kumo lambgu afa mas ne enaig membig mo.

35 Is sa hig. Ilawoba nengelni kembang amtakwalenam esug gofufe. Afa ka nem nufuna sihiopen ne mas kam nangui ne auguan sa ne esogofe. Sonag elbi God ehe numwehenageg Ainiyagna unehlag la ningihiag. Sa ma God ehem suialafiah flai."

## 14

*Sisas kwakug elim suiala fefatina*



<sup>1</sup> Afa maia laskuhlag osuna pugunaba Sisas ika Farisini goseg elni lala fane ahgaflafnaba afa ehengel Sisasim nangulafna.

<sup>2</sup> Afa kwakug el blonam Sisasim nanguna.

<sup>3</sup> Afa sa Sisas enaig elim nangunam afa sa anwenag el mi Farisi el mi enaig saheni og, “Bigelni nihemo sa haig esog sa big gih elim bi laskuhlag osunaba suiala fifati me awai, awai me?”

<sup>4</sup> Afa ehengel mwalfwai auguafena mas mo haig esogona mo, asa Sisas ena elim suiala fefatinaba asa pugu ikana.

<sup>5</sup> Afa sa Sisas enaig sihifeni og, “Eba sa nengelnai sa ne laskuhlag osunaba luwalim o bulmakaubi bumelaba pe nilagofiba sa ne nangu fwahai me awai ne ikagna fwakla fati me?”

<sup>6</sup> Afa ehengel mas mo mungwag wahigi Sisasim fatini mo.

*Sisas esog el sa ma hefum ahnai skaufei*

<sup>7</sup> Afa Sisas elim fane ahga flag la nangwagna, ehengel ona ehe suialag sime la gosi augu, afa sa Sisas lasug mo enaig sihifeni.

<sup>8</sup> Og, “Afa sa el mungu nem angwafig fla buyis la unetigife nofe ne afu suialag sime la gosi augu eba atiame ming elim gisfu fwahanag ehe kwania unehlana fegim afa gwesim nem hilifenig.

<sup>9</sup> Afa enag el maia nengigim bloiba afa sa buyis el nem unenam afa nem enaig sihifenafe, og, sona elim siaba sa fwahana maia enaig esoiba afa sa nem afwanefefe afa sa ne ikanam masgim amtakwalig sime la pegafe.

<sup>10</sup> Afa sa buyis el blo nem fane negimba unenafe eba sa ne ikanam masgim pega, ma ne enaig eseiba, eba sa sonag el nem unenam enaig esonage og hihe se blo hwa gosig siala pega. Ma nem enaig esenaiba eba el sa ne fane ahgafla ne ehengelni nofug la unehlag kwania flafe.

<sup>11</sup> Afa el sa heafna unehlagim figifukufe eba God ehena unehlagim pigaupife, afa el sa heafna unehlagim pigaupig eba God ehena unehlagim figifukufe.”

<sup>12</sup> Afa Sisas buyis alag elim enaig sihifena og, “Ne buyisba ofefiba nofe ka hihem, nilitem, hamagaum, afa gau ninganam enam mugom esen. Asa ehengel sa nem mungwag buyis la uninim gwenagim nem esinife.

<sup>13</sup> Magofi, afa ne buyisba ofefiba eba sa ne gawig fwainig elim uneni, mong kukwaligni ninga waikefonam afa nofug hafinignam.

<sup>14</sup> Afa enaig elbi mas nem mungwag enaig esini, eba sa ne sifakale nengigimba God nem mungwa faife maia bite kifenai suialag el pese bugiaga ofefiba.”

*Buyis kwania lasug mo  
Matyu 22:1-10*

15 Afa el mungu Sisas fane waneaufna enag ena mo higinam Sisasim enaig sihi fena og, “El sa Godna bog megam saiyefego buyis ne eba sa ma sifakali.”

16 Afa Sisas ehem enaig sihifena og, “El mungu ena buyis kwania ofeba enag kaksag elim unetigig.

17 Afa ehe sufu fwahagim asa heafna gafugag elim ningihiana afa sa gafugag el ikagim enaig eso og, a ‘Au ambe mungwali fane ati kukumeig gohug.’

18 Afa mungwali el wahigi ehem enaig sihi fini og kam oksig, afa ming el og, ‘Kaba bite ka kigna baimeg fwahag enag ka nanguagim ako, niasabam.’

19 Afa ming el og, ‘Kaba bulmakau baimeg enag ka yuwigim ako niasabam.’

20 Afa ming el og, ‘Kaba ilawo ka angwafig flag na haiseg ka blo mo niasabam.’

21 Afa sa gafugag el ena mo lambinam pese uku misog elim sihina afa misog el ena mom hignam abofeahlana afa sa pese gafugag elim enaig sihifena og, ‘Ikagna ika mungwali mina weitianig sa taun mina ahkawag minefe sa ne ena mina ikafiba afa sa ne el elig amtakwalignam sulfuiaka, nofug hafinigna afa mong waikefonam sa kana lala megam wan sefu ambe.’

22 Afa sa gafugag el gwenaiig eseg, ehe blonam misog elim, enaig sihifena og, ‘Sa ne esogba ati ka gwenaiig eseg afa mas lala megim ihla gohwageg mo.’

23 Afa saglag el pese gafugag elim sihina og, ‘Taun mo fwanam sa ne minahug mina aso bog mina ika nangwagnam asa ne wasneig mo faim sa ma kana lala ihla gohwagei.

24 Afa ka nem osihin, mungwali el sa ka gofgam unenig eba mas kana fane weiti ahgai.’ ”

*El Sisasim patalkuiagim sa ma numwehe  
Matyu 10:37-38*

25 Sisas nubwel elim wan ikafnaba wahigi enaig sihifeni og.

26 “Eba ambanba ne kam patalfu oblofiba sa ne kam fwina membena. Afa nimbiafna humoan, afahumoan, angwafig, luwal, nilite, muwal afa nimbeafna nofkenagag sa ne ena mo sumi yi memben, Afa amban enaig eseg fwainigba eba enaig elbi mas kana patalfuiag elbi fei.

27 Afa amban sa hefum lahagim ninumwehiageg fwainig kam patalfu oblofimba, enaig elbi mas kana patalkuiag elbi fei.

<sup>28</sup> Afa sa amban nengelnai ona lala nimbla enaig elbi sa atiaho gagim numweheg oniguageg og, lalaba enaba kigba ihla fei me awai, awai me?

<sup>29</sup> Afa mas ilawana enaig oniguagba fei, eba gweyi ikagna sumul ugwatigig afa mas ena lalaba awigi, afa sa el enam nanguigim ehem moalabinig.

<sup>30</sup> Afa sa ehengel enaig esogog og, sonag elbi lalaba esegim mas auwigig mo.

<sup>31</sup> Afa misog el ona ming misog el i fagna ahufila enag gahba onigwageg ehena amibi 10 tausen ami feg afa ming misog elni amibi eba 20 tausen enaig ami feg enag ehe ona anwenafenam asa fagna ahufila atiaba ehem filafe fati me awai, awai me?

<sup>32</sup> Afa sa ehe enaig onigigfefe, og, mas ihlafei eba maia fagiule membiyi fifibi asa elim ningitigife og sa ma mo flifunam sihibi sama fagna havigim awaie.

<sup>33</sup> Afa enaig feg sa nengelnai amban heafna mungwali gawigim masgim fatiag fwainig fefe eba mas kana patalfuiag elbi gofi.”

*Sisas sol lasug mo sihina*

*Matyu 5:13, Mak 9:50*

<sup>34</sup> Afa Sisas enaig esona og, “Solba suialag ehe, afa sa solna mileaklag awaiefe eba sa big haig esibi sa ma pese mileakla fei?

<sup>35</sup> Afa enaig solba mas fanem esenaiba mas suiala fei. Eba fwinam amtakwaleagegba el esugum fatig. El anganaba sa ne ena mom higim.”

## 15

*Sipsip lasug mo*

*Matyu 18:12-14*

<sup>1</sup> Afa moni lambig el i afa haig haig nihenai el i ambe muhla afohiafnaba Sisasna mo higfana.

<sup>2</sup> Afa Farisi el i nihemo anwenag el i olug kakageaginim og, “Mangigim Sisasba ehengelimbi hihe fenigim afa faneba wan one.”

<sup>3</sup> Afa maia enaig esinibi asa Sisas lasug mo sihina.

<sup>4</sup> Og, “Eba el nengelnai 100 sipsip feg afa maia mungu mo awaiegba afa sa 99 mungu afohieba faneba afu ahgaga afo. Afa enag el mas fwahai eba maisim yisgegohug asa uflag.

<sup>5</sup> Afa uflagim asa fwaklag ohumbug la kufehlag ubluiahba ehe mo sifakale blo. <sup>6</sup> Afa maia lalagam ublugim asa heafna hihem afa mungu kembang lanaim unetigigim og, ‘Au ambe nawo sifakali kana sipsip mungu awaiena ati ka peseg uflagim sulfla ublug.’

<sup>7</sup> Sisas enaig esona. Ka nem nufunam osihin haig sifakal sa hevenlaba pugufe eba maia mungu el amtakwalig nihe nai olug waikefeg eba kwania feg, afa enaig sifakalba 99 elbi gwenai suialag afohie eba gweyiagig feg. Afa el sa amtakwalig nihenai sa olug waike ofe enaba naho ehem fwinam sifakalinig.”

*Kig awaieg lasug mo*

<sup>8</sup> Afa Sisas enaig sihifena og, “Angwafig mungu ningam pugufewagig kig enaig feg afa mungu awaieg lala la afa sa ehe wi gaflagim pupohiageakahba maisim yisgiego, feg feg uflagim.

<sup>9</sup> Asa heafna hihem afa mungu kembig lanaim unetigigim og, ‘Ei au ambe nawo sifakali kig mungu kana awaiena ka yisgiegohug ati ka peseg flag’ ”

<sup>10</sup> Afa Sisas enaig esona og, “Ka nem ihla mohe sihinig. Enaig sifakalba eba gwenai Godna oflanai el gafa esig maia ambanba olug waike feg Ainiyagna mina gamba puguba.”

*Alag afa luwal sambaganigi lasug mo*

<sup>11</sup> Afa Sisas pese enaig sihigena og, “El sambaganigi luwal feg.

<sup>12</sup> Afa sa sumineg enaig esona og, ‘Api ka onigig, kam gwese mungwali gawig mangetiginuge, fi kam fai afa kikeafna etegim fai, kamba glawu sa faim’, asa alag gwenai eseni.

<sup>13</sup> Afa managig fwainig suminegba heafna mungwali gawig elim mimagen kafnaba enanam kig mo lambnam afa sa eheahba membi kembig gam ikana, ika enanai esegofnaba heafna kigba mungwali taitufe awaie fatina.

<sup>14</sup> Afa maia kig awaienaba, afa sa bini kwania ena kembig pugunaba ehem bini fwinam lahanaba asa pugu elim gafugagim sahinwagea kafna.

<sup>15</sup> Sahinwageakan el mungu tatam wangafna enag fla tata gafugag la ningihiana og, ma tatam nangwaghige gofi.

<sup>16</sup> Afa eheba tatam fane fainim maia ahgageafufnaba afa tatam nagwagwan maia ehem bini lahanaba asa ogra tatana fane lambenefena afa mas amban fane faina mo.

<sup>17</sup> Afa sa gan gweyi oniginam esona og, ‘Afa kana Apina gafugag elni mungwaliba eba faneba numbwelihe gohun, afa ka hwa nai yi gahba kam bini fwinam lahageg.

<sup>18</sup> Magofi kawu Api nangum pese ika, ka ikanam ka sa Apiim enaig sihifena Api, ati ka nem mi God mi amtakwalig nihe ka nem fenig.

<sup>19</sup> Afa kaba mango suialag el mo na ne kam kana luwal moalonai, se kam esug fwahaiba ka sa neana gafugag el lofe.’

<sup>20</sup> “Asa gwenaig esena buhianam Alag nangum ikana, afa maia membiyi feafnaba, Alag nangunam afa fwina sifakalinam asa kikini ikan heafna legim ningana pugufenam asag tita feaflana.

<sup>21</sup> Afa leg enaig esona og, ‘Api, kaba ati ka nem mi God mi amtakwalig nihe ka nem fenig. Kaba mango suialag el mo na ne kam, kana luwal moalona.’

<sup>22</sup> Afa sa alag heafna gafugag elim unenim enaig sihifeni og, ‘Ikagna afu kwieg lofug kikeafna flibi fatini afa kil weiti ningabuli yi fatini afa mog lofug mong yi fatini.

<sup>23</sup> Afa afunam bulmakau lambag sulufli wanig ambenam sa tigi, nawo ahganam sa sifakali.

<sup>24</sup> Afa enaba eba hwa luwal kana ati awaiena afa glawaba ati pese blog nofkikena gohug. Afa mas awaieg mo.’ Afa sa kwania fane ahgamine fenam asa sifakalini.

<sup>25</sup> “Afa enenamba eba ehena etegba aso la gan sa blona afa blo muhla pugunaba heafgelni lala muhla afa sa buyisna aune higna.

<sup>26</sup> Afa sa gafugag elim unena, ma blonaba asa sahnagena, og, ‘Sonaba mangwal ofi?’

<sup>27</sup> Afa gafugag el ehem sihina, og, ‘Eba neana sumineg ati pese blo pugugba enaig neana alag bulmakau lambag tigege. Enaba alag legim nangugim sifakaleg, luwal mas awaiena mo afa eba ati pese blo pugug.’

<sup>28</sup> Afa eteg ena mo higinam olug kakageagena mas lalagam sawiyife ikana mo asa alag pugu afwabagam blona moai nugwefenagena, og, ma eiyi ehena olug tikaiyi.

<sup>29</sup> Afa eheba wahigi alagim enaig sihifena, og, ‘Haig eseg? Sa kaba kaksag yialaba ka neana gafugagim ehegepuseakag, ka ofe naiba esug gafugag el lofeg, afa ka mas neana mom flafoi, afa ne mas kam ahnana mo meme luwalig faina mo afa mas ka kikeafna hihem enaig sifakal ka wan feg mo, eba awai.

<sup>30</sup> Afa sona luwal kikeafna sumineg sa eba mungwali gawig neana ukug haig haig la taitufeg fwahagim asa pese glawa mo blogba ne ehem sifakalenagim afa ne bulmakau lambag tigege.’

<sup>31</sup> Afa alag ehem enaig sihifena og, ‘Luwal wahkig ati big hawagig mungwali gawig sa kana feg eba neana.

<sup>32</sup> Afa glawaba nawo sifakali sa ma bigna olug suiala fei neana sumineg ati ika awaiena afa glawaba pese blog nofkikena gohug, afa big ehem suluoflig.’ ”

<sup>1</sup> Afa Sisas heafna patalfuiag elim enaig sihifeni og, “Saglag el heafa ati fahigeawagig el fena, afa enag mingnag el ambenam ehena saglag elim sihini og sonag fahigeawagig elbi neana gawig esug awaieg fatig.

<sup>2</sup> Afa asa saglag el fahigeawagig elim unenam ma blonaba asa sihina, og, ‘Ka neana hwaig nihe mo higig? Sa ne ikanam kana mungwali gawig sa ne lambwagena sa ne enam sihiage. Afa mas ne enaig gafugaba pese fei.’

<sup>3</sup> Afa sa fahigeawagig el hefum enaig esona og, ‘Afa sa ka haig esefe? Afa kam saglag el ona fahigeawagig gafuga lanaim ningihia, afa ka mas wasneig mo namo ka sa amban elniba ika bite tutohiawagig gafugaba fegofi, afa ka elni kig muni flagim kam afwanefeg.

<sup>4</sup> Afa glawu ka onigig, ka mangwal fegimba, maia kam saglag elbi enaig gafuga lanaiba ningihiaiba sa ma el kam kwefui.’

<sup>5</sup> Afa sa mungu mungu elim unenugenaba asa ambena, ehengel sa saglag elni gawig esug lambwagini, afa mungu el blo gof pugunaba, asa fahigeawagig el ehem sahna, og, ‘Ne hanansi kana saglag elni gawigba esugba flana.’

<sup>6</sup> Afa wahigi ehem sihina, og, ‘Pepa enaig sihifeg 100 wel dramna’ afa fahigeawagig el ehem sihina og, ‘Afa sa ne susulenam ikagna 50 dram ginofe.’

<sup>7</sup> Afa ming el sum blo pugunaba afa fahigeawagig el ehem sahna og, ‘Neana esug flag gawigba hanansi’, afa sihina og, ‘Pepa enaig sihifeg 100 wit bekna,’ afa fahigeawagig el ehem sihina og, ‘Afa sa enag pepa nem fainiba afa ne 80 bek ginofena.’

<sup>8</sup> Afa sa sumi yi saglag el ati ehena enaigim anwenafenam og, ‘Sonag elbi suialag elhu fegim afa eba heafna onigigim goseg ukug.’ Afa bitenai nihenai elni onigig eba ombusuginai elni onigigim gwesim hilifegonig bitenai gafuga figibi.”

<sup>9</sup> Afa Sisas sihini og, “Afa ne bitenai gawigim kehli gafuga feafuhba nog sa ma kam el muhla fegoni, afa sona gawigba eba maia autunai la awaieba asa God nem sulufunim afu lala wahkig gohug la suialag auguiafufe.

<sup>10</sup> Afa maia amban mungu mungu gawigimba numwehige akafife eba kaksag gawigim gafa gwenaig eseg. Afa sa amban mas weitim nihem ihlafei eba kwania nihem gafa gwenaig eseg.

<sup>11</sup> Afa eba ne hwa bitenai gawigim ninumwehig fwainigba eba amban sa nem heven lanai mangwal suialagba faibi sa ne ninumwehige?

<sup>12</sup> Afa eba ne mingnag elni gawigim ninumwehig fwainig fife, eba amban sa neana gawigba nem faifie?

13 “Afa mas amban sambaga misog elni gafugaba fei eba amban misog el sa ehem suiala feaflag, eba naho ehena mo higigim patalkug, afa amban misog el sa mas ehem suiala feaflai eba ehena mo mas hignam patalkui, afa eba ambani mo ahnai skau fenaiba afa ambani mo mas fatinafe, afa nofe ne God mi bitenai gawig mi wahi.”

*Sisas nihe mo mi Godna bog meg mo mi sihina*

14 Afa Farisi elbi fwina kigim onigafu, afa ehengel ena mungwali mo higinim, maia Sisas sihiagenaba afa sa Sisasim moalabini.

15 Afa Sisas enaig sihifeni og, “Nengel ne enaig onigig nog elni nof la kikeahba suialag nihe feafu. Afa eba God ati neana olug onigigimba anwenafenig, afa enaba ne onigig eba suialag, afa Godna noflaba eba amtakwalig.

16 “Afa nihe mo i mo fla sihiafule elni mo i gwese gohug ikag Jon pugu gohug, afa enanaiba Godna bog meg suialag mo mungwali kembang opugu ka afa sa mungwali el fwina wasneigim gafuga fig ona afu Godna bog megam saiye gohum.

17 Afa of i bite i eba ika awaiefe afa wetiklug ginofba Godna nihe moba mas awaie eba gwese gofufe.

18 “Sisas enaig esona og, amban sa heafna angwafigim fwaiyunam afa ming angwafig flafe, enaig elbi eba aga taitug el. Afa amban sa angwafigim fwaiyu fatife afa sa ming el flafe ehe gafa aga taitufeg el.”

*Gawig elna i Lasarusna i mom*

19 “Afa autunam el mungu gawig numbni fena eheba suialag lofug yimieg laitiagefnam afa fane suialag neageagna.

20 Afa ehena lala mengig muhlaba eba el kukwalig enehna gafna ehena unehlagba Lasarus,

21 ehe enaig onigina og ma gawig numbni elni fane ogug sime skau apaiyefiba ona sa lambinefefim afa sa malang ambefnam ehena nehugugim libeahga fifni.

22 Afa sa gof maia ehem lahanaba, Godna oflanai el ambe wanigafunaba asa ika Abraham mi hawagfnaba afa sumi yi gawig numbni elim lahanaba asa fakini.

23 Afa sa ehe ika susug kembang pugunam asa onigwageufna afa sa gweyi sisigam ninofenaba Abraham mi Lasarusi membiyi hawagfna.

24 Afa sa enaig unefena og, ‘Api Abraham kam aflafenam asa Lasarusim ningihiaba sa ma kam bu ningabulni figihiana ublu mileg la fakanaiba sa ma kam luputie. Ka seifug suwi ihmol megam goba afa kam susufiageg.’

25 Afa Abraham ehem sihina og, ‘Luwal sa ne onigim, afa ne nofkikenaba gofnaba mungwali gawig ne nimbefum mungu ne onigina afa Lasarusba eba amtakwalig mungwali ehem pugunagena. Enag glawaba blog hwa kembang la suialag ga, afa neba susug amtakwalig ne afa.

26 Afa mingba enaig eseg, God bigim bite olyi kowagig fakanig afa nengel ne mas kagel nangum peifuafufi ambei afa kagel ka mas peifuafufi negel nangum gafa afui.’

27 Afa gawig numbni el enaig esona og, ‘Api ka nem enaig sahna ofena sa ne Lasarusim ningihiaba sa me kikeafna Alagna lalagam ikai.

28 Afa kana niliteaba afala pugufeg Lasarus sa ma ika wasneig mo faibi asa ma amtakwalig nihem fwahinim olug waikefi masa ambe hwa kembang la susug flife.’

29 Afa Abraham esona og, ‘Mosesna mo i afa mo fliule elni mo i sa ma numwehe angug labuihaginim hwa moba highi.’

30 Afa gawig numbni el esona og, ‘Api Abraham sonaigba haig esi mo eba amban sati lahad enag ehe sa ma pese bitekifelanai puguna ika sihinibi asa ma olug waikefi.’

31 Afa Abraham ehem enaig sihifena og, ‘Afa sa Mosesna mo i afa mo fliule elni mo i higig fwanigba fife eba melig lahad el gafa ika sihinibi mas olug waikefi.’ ”

## 17

*Afa sa ne nufweh mom fwaha ika*

*Matyu 18:6-7, 18:21-22, Mak 9:42*

1 Afa Sisas patalfuiag elim enaig sihifeni og, “Haig haig nihe amtakwalig pugunam elim esenagba sa el enanaig amtakwalig eseagig, afa sonag el sa ne ming elim esenagba asa enaig la peg eba niasabam.

2 Afa atiaba el luwalim enaig nihem ogfunagba afa sa luwal enaig la pefe eba se fun kwaniaana weana kikenagim asa bugam fatibi sa ma lahai, sonaigba eba suialafeg. Masa enaig fwina amtakwalig eseagefe.

3 Afa nimbefu mo numwehigibi.

Afa neana nilite sa amtakwalig nihefefe eba sa ne niheangu, afa atiaba olug waike ofefife eba sa ne mwanugwefena.

4 Afa sa nem elegeg la gohug amtakwalig nihe mungu osuna esenafnam afa blofnam nem sihinagofufe og ka nem amtanafenag se mwanugwefenafim.”

*Sisas olug onigigna mom sihina*

5 Afa patalfuiag el Ainiyagim enaig sihifini, og, “Sa ne kagelni olug onigigim esenibi sa ma gwesim ikafi.”



<sup>6</sup> Afa Ainiyag ehem enaig esoni, og, “Magofi, ma atiaba nengelni olug onigig weiti fegba eba ofenaiba ambwe sisig lofug. Eba sa ne ihlafifi, sa ne liim sihini og susum fagafu ika solwarala pegofum afa sa libi nengelni mo hignam asa gwenai g eseg.”

*Sisas gafugag elni nihe mo sihina*

<sup>7</sup> Sisas mo gwesim hili enaig sihifena, og, “Ma atiaba neana gafugag el fegba sa ma ika bite toafoi me awaie sipsipim nangwaghiage me sa ma enaig ese. Afa maia sonag gafugag elbi pese lalagamba oblofiba sa ne ehem enaig sihifene enaig og, ‘Au ikagna blo ganam fane ne. Sa ne enaigba esoi? Eba awai.’

<sup>8</sup> Afa eba sa ne enaig sihifena, og, ‘Ne kana fane numwehi-aginim afa sa ne kam flaubluna, ka ma kawu gof fane i bu i neageba asa neawu sum neage.’

<sup>9</sup> Afa sa gafugag elbi sonaig gafugaba feageiba sa saglag elbi ehembra suialag onai? Ena gafa awai.

<sup>10</sup> Afa nengel gafa gwenai, atiaba ne mungwali gawig esig awigibi, God sa nem sihinig, sa ne enaig esog kaba gafugag el ehe hwaig sa ka esigbi eba kangelni gafugag munguhe.”

*Sisas ningam pugufewagig eneh elim suialafe aitina*

<sup>11</sup> Sisas Jerusalem minam patalfukuna, distrik Samaria gini afa Galili gini ena olyi ikana.

<sup>12</sup> Afa ika mungu kembang la pugunaba, afa ningam pugu fewagig el enehna ambe mina la uflin.

<sup>13</sup> Afa ambe membi yi afohieafnaba fwinam enaig esogona og, “Sisas saglag luwal sa ne kam aflafen.”

<sup>14</sup> Sisas nangwagnam enaig sihifeni, og, “Afunam pris elim nehegoni eba ati neana elig suialafeasaig sa ma enam anwenafi. Asa afuna afa afuafnaba ehengelni elig ati suiala feskofena.”

<sup>15</sup> Afa ehangelinai mungu heafna eligim nanguna ma suiala fenaba asa waikefe pese ikafnaba Godna unehlagim figi fukuna.

<sup>16</sup> Afa ehe ikan Sisasim muhla fenam asa mongkokini kwakwagena nofbosug mo bite la fisihli pena Sisasna kimugola. Afa sa Sisasim suialag ona. Enag elbi Samaritanai.

<sup>17</sup> Afa Sisas enag elim nangunam afa esona, og, “10 pela el ati suialafeg afa mingnag 9 la gohug elbi hanai yi afohie.

<sup>18</sup> Afa mas amban el pese blog Godna unehlagim figi ofe mo? Afa hwag el mungu eba heafa afwamba nai el enag mungu eseg?”

<sup>19</sup> Afa Sisas ehem sihina, og, “Se buihia ika. Eba neana olug kam oniginag nem esenagba nem suialafeg.”

*Nufuna Elbi eba pese blofe*  
*Matyu 24:23-28,37-41*

<sup>20</sup> Afa Farisi el Sisasim enaig sahnafini og, “Ansi sa Godna bog megba blofe?” Afa Sisas waikefe enaig sihifeni, og, “Afa maia Godna bog megba blogba afa mas mangwalba ogfuiba elbi mas nofnaba nangug mo?”

<sup>21</sup> Afa mas enaigba esogoi, og, sa nangu hwa nai yi goh me awai okwe nanai yi me, sa hig Godna bog megba ati neana olug yi wagi goh fakanig.”

<sup>22</sup> Afa Sisas heafna patalfuiag elim enaig esoni, og, “Sumi yi maia enaig opugufiba nog ka Nufuna El heafna osuna blo puguiba ne enam mas nangufie.

<sup>23</sup> Afa sa nem sihigonfie, og, Nufuna Elbi okwesimhe amo hwa nai yi afa nofe ka patagafu.

<sup>24</sup> Afa ati ne afwe anwenafig afwe ofim mungwali molu kugofakagba asa of ombusig fakag. Afa maia heafna osuna oblofiba asa gwenaign eseiba sa el nangufie.

<sup>25</sup> Afa ilawo hwa nanam el maia ehem mas fatinibi afa sa kaksag susug flafe.

<sup>26</sup> Afa glawana sa Noana el esini haig haig nihefeagini, glawaga eba gwenaign esifie maia Nufuna El heafna osuna oblofiba.

<sup>27</sup> Afa glawana sa Noa wanafnaba enenaba ehengel enaig esini fane i bu i ahgafena afa angwafig lambwagifni, gwenaign gafugag la afohieafnaba Noa ehe mo sip megam wan seaifonaba asa sona elim mo bu pugu mungwali sagfla kumohlana.

<sup>28</sup> Afa mingnag elim gafa gwenaign eseni eba Lot gofnaba enenam, aso gafugafea gifini afa angwafig lambwagifini afa gawig gafugafifni afa bu ahgagifni afa lala nimblagifni enaig nihe la gofna.

<sup>29</sup> Afa Lot Sodom kembang fwaha ikafnaba afa gwenenam suwi oflanai pena, elim mungwali la kumohlana.

<sup>30</sup> Afa eba gwenaign mungwalofug pugufe maia Nufuna El pese blo ambala opugu fiba.

<sup>31</sup> “Afa enag osuna el sa lala gofife mas heafna gawig lambigimba ikai, afa el sa aso la gofife eba mas lalagamba pese ikai.

<sup>32</sup> Afa sa ne Lotna angwagim onigim mangwal maia fena.

<sup>33</sup> Afa amban sa nibeafna nofkikena gagim ne nibefum kehla guhmine fefufe eba neana nofkikena gag awaiefefe. Afa amban sa heafna nofkikena gag esug fwahafe. Eba ehena nofkikena gag gwese suialag gofufe.

<sup>34</sup> Afa ka nem osihin Nufuna El sa blofe. Eba el sa sambagana mungu kife la ahgi eba God ambani mo suluaflaiba afa ambani mo fwahafe.

<sup>35</sup> Afa angwafig sambaga amba na ahsine gofufe eba God mugom suluafilaiba afa ming mo fwahafe.

<sup>36</sup> (Afa sambaganigi el aso la nog yihiwag ahfe gofufe eba God mungum suluia flaiba afa ming mo fwahafe.)”

<sup>37</sup> Afa patalfuiag el ena mo hignim Sisasim sahani, og, “Ainiyag hanai yi?” Afa Sisas enaig sihifeni, og, “Hanai yi suwieg ne nangug asa ne anwenafig eba suwi eyi lagi.”

## 18

### *Jas nai i angwafig nai i lasug mo*

<sup>1</sup> Sisas ming lasug mo patalfuiag elim sihinim afa betenegim ogfuni og sa ma wahkig beteneafufi masa esi yisgosife.

<sup>2</sup> Afa enaig sihifeni og “Afa Jas kembang la gafna ehe mas Godim onigina mo afa elim gafa mas fwina onigini mo.

<sup>3</sup> Afa sa angwafig mungu ena kembang la fena ehena alagagba ati lahana enag blofnam Jas elim sihinafna og sa ma kam kweagfui, ehe enaig esona og, ‘El kam amtanafeflig sa ne kam kot la kweagfu.’

<sup>4</sup> Afa Jas ilawana mo mas ehem kweagfuna mo afa sumi yi ehe enaig onigina og ka mas Godim oniginai afa elim gafa ka mas onigini.

<sup>5</sup> Afa enag angwafig kam wahkig kinig fafaiefgu. Naiba ka kweagfu, kam ehena mo higohugim yiskoseg, masa wahkig fablofe gofife.”

<sup>6</sup> Afa Sisas ming mo gwesim hilifena enaig sihifeni, og “Sa hwa mo higim amtakwalig Jas elni mom.

<sup>7</sup> Atiaho ne onigig? God ona heafna elim kwagani me? Enag ehengel wahkig osuna afa sinaini maisim Godim sahnafufba afa God mas yiskosei.

<sup>8</sup> Afa ka nem sihinig eba ehe ikagnam kwaganfe. Afa sa ma Nufuna El blonam nangwagi, bitenai el atiame olug onigig nafig me awai awai me?”

### *Sambaganigi el Godim beten ahfenag lasug mo*

<sup>9</sup> Afa mingnag el onigig og eba suialag elba afa mingba mas suialafeg mo afa Sisas enaig lasug mo sihina, og, enaig el feg,

<sup>10</sup> “Sambaganigi el ona Godna kwania lala beten ahfe. Elbi naba Farisi el i afa kig lambiule el i.

<sup>11</sup> Afa Farisi el gofnaba hefum beten ena, og ‘God ka nem suialag onag kaba mangwal mingnag el lofug mo. Mingnag elbi haig haig el ehe ugwefifug afa angwafigim alagag lanaim aga taitufegonaifu. Afa kaba mangwal sonaig el kig lambiule el lofug mo, kaba enaigba awai.

12 Afa mungwali wik saikaba ka sambaga osunam sufu fwahagim afa ka fane kwegigi. Afa ka mangwalba flagim afa ka mimageg nem mungwa ehengenai faig.’

13 Afa kig lambiule el mo membi yi gofnaba, ehe mas sisigam ninofena mo eba awai. Eba ehe ango mo wahginam enaig esona, og ‘God, kaba mangwal suialag el mo, kaba nufwehni amtakwalig el, sa ne kam aflafena.’ ”

14 Sisas sihini, og, “Ka nem osihin kig lambiule elbi pese heafna lalagamba ikanaba eba Godna nofla suialag el fena. Afa ming elbi eba awai, eba enaig eseg, ambangel sa heafgelni unehlagim fingifig eba God ehengelni unehlagim pigapufenfe. Afa ambangel sa heafgelni unehlagim pigiupi-gog eba God ehengelni unehlagim figifugunfie.”

*Sisas esona og luwal sa ma ka nangum ambei  
Matyu 19:13-15, Mak 10:13-16*

15 Afa sa afahumonig luwal weitianigim Sisas nangum wanabena, fig ninganai luwal. Afa ehe apaiye afuiag luwal enaigim wanabena og sa ma Sisas ningabulni tutuhenugei. Afa patalfuiag el nangwagnim ehengelim fegonigini.

16 Afa Sisas luwalim uneni maia ambe muhla ehem finibi afa sa waikefe patalfuiag elim enaig sihifeni og, “Nofe ne luwalimba kwagon ma ka nangum ambei afa Godna bog megba eba enaig elni.

17 Afa ka nem nufunam sihinig afa amban el sa luwalna onigig lofeg fwainig eba mas Godna bog megamba seaifui.”

*Saglag el gau numbni Sisasim sahnagena  
Matyu 19:16-30, Mak 10:17-31*

18 Afa saglag el Sisasim enaig sahnafena og, “Suialag ofguiag el haig sa ka esenam asa ka wahkig nofkikena gagba flafe?”

19 Afa Sisas ehem enaig sihifena, og, “Mangigim ne kam suialag onag, eba God mungu he suialagba feg.

20 Afa atiaho ne nihe moba anwenageg, og saglag sa angwafig nifig nofe ka aga taitufi afa elim kwagaitifi afa ugwefi afa elim mwakwalinim kotimini. Afa sa ne alag afagim ahnai skau fegonim afa ehengelni mom patalfugoni.”

21 Afa saglag el enaig esona, og “Ati ka weiti la ena nihe moba patalfu blog, ka blog saglag la pugug.”

22 Afa Sisas ena mo hignam afa ehem enaig sihifena, og, “Niasabam mangwal suwal sa nem awaienag, sa ne nibeafna mungwali gawig mingnag elim mimagenige asa ne kig flanam sa ne gawig fwainig elim ena kig mo faim ne enaigba eseiba eba ne hevenlanai suialag gawig flafe, asa kam patalfublu.”

23 Afa saglag el enaig mom hignam ehem olug kiniagena enaba ehe sa gawig numbni fena.

24 Afa Sisas ehena olug kinigim nangunam afa enaig esona, og, “Ambangel sa gawig numbni feasaig enaba Godna bog megam saiyeigim ehem ehegepuseg feasaife.

25 Afa kamelba tata lofug ona lofug kwelig nilni megam seaifu eba ehegepuseg. Afa gawig numbni el, Godna bog megam ona seaifu eba ehe fwinam gehig.”

26 Afa el ena mo hignim enaig esogona, og, “Afa ma atiaba enaig esegba, afa sa amban ihlafenam asa nofkikena wahkig gagba flafe?”

27 Afa Sisas sihini og, “Elbi haig esi mo, God eheba sa enaigba esei.”

28 Afa Pita enaig esona, og, “Sa hig kagelbi ka kikeafna kembig i gawig i ka fwatigim ka nem patalfubieg.”

29 Afa Sisas esoni, og, “Ka nem nufunam osihin ambangel sa Godna bog megim onigig eba naho heafgelni gawig i angwafig i luwal i afahumonig i afa nilite i enam fwatiagigim ambeg.

30 Afa maia hwa bite la maisim gofiba God kaksag gawig faife ena gawig eba gwesim goflanaim kwefugkag afa maia sumi yi enaig puguiba asa el nofkikena wahki gag fife.”

*Sisas hefum laha buihiagim sihina*

*Matyu 20:17-19, Mak 10:32-34*

31 Afa Sisas 12 pela patalfuiag elim sulafunam afa sa enaig sihifeni, og, “Sa hig, glawo big Jerusalemgam afuofe. Afa enaba autunam Godna mo fli sihiafule el ati mungwali moba ginofi fwahini, og hwaig sa Nufunam Elim pugunafe, asa nufunam gwenaig pugu ofena.

32 Afa eba ehem angoluweg elni ningala fwahibi asa ehem moalapinaginim afa mep kusufinife.

33 Afa nasigna wena fliakilenaginim asa tigi fatife, afa eba maia sambaga mungu osuna feiba asa pese buihiafe.”

34 Afa God ena mom meagam kumohla gufna asa patalfuiag el enanam mas numwehi enag mog mom anwenafini mo.

*Sisas nofug hafinig elim suialafe fatina*

*Matyu 20:29-34, Mak 10:46-52*

35 Sisas ika Jeriko kembig la opugufuaba, afa nofug hafinigna el mina ehbeg la gafnaba elim lofug kamini afa kig kamini fenigeaufna.

36 Afa higinaba kaksag el moauf watini flaubluafna afa sa mingnag elim sahini, og sanaba mangwal ofi?

37 Afa ehem sihini, og, “Sisas Nasaret la nai oblo”

38 Afa sa Sisasim unena, og, “Sisas, ne Devitna simbianiga kam sa aflafena.”

39 Afa mingnag el gosi ambe afuafnaba ehem fenagini og is mwalfwai gafim afa eheba fwinam amboitina unenam afa enaig esona, og, “Devitna simbianiga kam sa aflafena.”

40 Afa Sisas gofnaba elim sihini og osum wanigambe, afa maia nofug hafinigna el ika muhla pugunaba afa sa Sisas ehem enaig sahnafena.

41 “Afa haig sa ne kam og kam sena.” Afa esona, og, “Ainiyag, ka enaig onigig kana nofug ma bahiai.”

42 Afa Sisas ehem sihina, og, “Neana nofugba eba enaba suialafefe. Afa nibeafna olug onigig nem esenaiba asa nem suialafefe.”

43 Afa sa ehena nofug gweyi ikagna bahianaba afa sa Sisasim patalfukunam Godna unehlagim figifukuna, afa mungwali el enam nangunim ehengel gafa Godna unehlagim figifini.

## 19

### *Sisas Sakiasna lalagam ikana*

1 Afa Sisas ika Jeriko kembang pugunam ikafnaba ona Jerusalem kembang gam ika.

2 Afa el mungu ena kembang la gafna ehena unehlagba Sakias eba kig lambigule elni misog el afa ehe kaksag kigna fena.

3 Afa enag ona Sisasim nangu, og, haig el maia, afa maia kaksag el Sisasim kagfunibi gihwagegohun haiseg nangwag mo. Eba teimona el fena.

4 Afa sa gof ikanam fik liyi fukonam gafna oagna Sisasim nangu, ati anwenafena, og Sisasba hwa mina blofe.

5 Afa Sisas ika enanai yi pugunam asa liim fahigeagena maia Sakias gafnaba sa Sakiasim enaig esona og, “Sakias, au ikagna peblo glaba ka neana lalagam ahkagim.”

6 Afa ehe ikagna penam. Afa sa ehena olug afgigeafnaba asa Sisasim sulufana lalagam ahkana.

7 Afa mungwali el nangwagnim heafgelni olug yi enaig esogona, og, “Ei, sonaba amtakwalig elni lala ika ga.”

8 Afa ahka lala hawagfnaba asa Sakias buhianam enaig esona, og, “Ainiyag sa hig, ming gehnai ka elim gawig fwainigim mimagenifie. Afa gawig sa ka ukwefen kafna eba ka pese sambaga sambaga fenfe.”

9 Afa Sisas ehem enaig sihifena og, “Ilawo God ati hwa lalanaiba mungwali elim lambig. Sona el gafa eba Abrahamna luwalig.

10 Nufuna Elbi eba el sa awaie saieg enam yisigin blog ona pese lambim.”

*Gafugag el kig lambig lasug mo  
Matyu 25:14-30*

11 Afa maia Sisas mo sihiagofnaba el ena mo higafufna, afa sa Sisas lasug mo enaig sihifeni, og, eba ati Jerusalemgam ika puguagim muhla fena. Ehengel onigini og, eba Godna bog meg ambala ikagna pugufe.

12 Afa Sisas enaig esona, og, “Saglag el sa ona membia kembangam ika eba enanai yi sa el ehem misog el fwahife. Afa nengigimba eba pese blonam asa heafna kembangim nangwaghiagefe.

13 Afa maia akofiba eba heafna gafugag elim ningam pugufewagig enaig elim unetiginam asa kig mimagenim afa sa enaig esonfe, og, ‘Ena kig ne lambinim asa ne gawig enena gafugafeagi maia ikan enanai yi feiba ka sa pese blo.’

14 Afa heafna kembang lanai ehem olug fwina kagagenagini. Afa maia ikanaba afa sa mingnag el ningitigini, og ma afu mo sihi, saglag el sa ikag ena kembang asa enaig sihifife og, ‘Kam oksig masa sonag el kagelni misog el fefe.’

15 “Afa maia misog elim fwahiniba asa pese blona ehe blonam enaig esona, og gafugag elim unegon autunam sa ka kig faini enag koka anwenafe hanansi kig mungu mugog el mungwali kikig.

16 Afa mungu el gose blonam enaig sihifena og, ‘Saglag luwal, neana kig sa ka flag enena gafugafegba ka 10 kig gwesim hilig flag.’

17 Afa misog el ehem enaig esona og, ‘Ne suialag gafugag el ne suialag gafugafeg. Ne weitiaklugim ninumwehea flagba pugu kwaniafeg ka nem fwahaiba sa ne ningam pugufewagig kembangim nangwaghiage.’

18 Afa angigieg gafugag el blona enaig esona og, ‘Saglag luwal, neana kig sa ka flag enena gafugafegba ka afala pugufeg kig gwesim hilig flag.’

19 Afa sa misog el ehem sihina, og ‘Ka nem fwahaiba sa ne afala pugufeg kembangim nangwaghiage.’

20 Afa ming gafugag el blonam enaig esona og, ‘Saglag luwal, neana kig sa ka flag enaba hoka ka lofugna kikegim faka fwahag.

21 Naigba ka esegba eba ka nem enaig anwenafenag ne wasneig mo sihiaule el nafeg. Afa maia mingnag elbi mangwalba fakigbi afa ne faflafe. Afa maia mingnag el fane ihwagigbi afa ena gafa ne faflfe. Enag sa ka embefeg.’

22 Afa misog el ehem enaig sihifena, og, ‘Ne gafugag el amtakwalig nibeafna moala ka nem kotim enafe. Ati

anwenafeg kaba wasneig mo sihiaule el afa kaba ambangel sa mangwal sukug enag ka lambig, afa ambangel sa asona fane ihwagig enag ka lambig.

<sup>23</sup> Afa ne enaig esete sa ne kana kigba benk la fakate. Koka pese blonam asa ming moni nahlum gwesim hilifeg fla?"

<sup>24</sup> Afa el muhla afohiafnaba asa enaig esona og, 'Nengel sa ne ehena kig lambig sa ne faim el sa 10 kig feg.'

<sup>25</sup> Afa enaig esogona, og, 'Saglag luwal sonag elbi ati 10 kig feg.'

<sup>26</sup> Afa esona og, 'Ka nem osihin mungwali el sa mangwalna feasaieg eba ka mingnag pasinfe afa ambangel mangwal lambig fwainig awaieg afa weiti kiki lamfu eba ka mwehla fatinafe.

<sup>27</sup> Afa sonag angoluweg el sa kana afohie ehe mas ka misog el gofugum membig mo enam lambinim wanambanam kana nofla kwagilaite.' "

<sup>28</sup> Afa Sisas enaig lasug mo sihi fwahanam asa ehe mo Jerusalemam ikana.

*Sisas ika Jerusalemba misog el lofe seaifona*

*Matyu 21:1-11, Mak 11:1-11, Jon 12:12-19*

<sup>29</sup> Afa Sisas ika Betfage afa Betani kembig oliv mug muhla ofenaba. Afa sambaganigi patalfuiag elim ningitigina.

<sup>30</sup> Afa onigitigifnaba enaig sihifeni, og, "Afa ne ena kembig ika ahpugunam afa ne ahnanguiba donki lambag weana kikeagig fwahig mas amban enanai yi pegana mo asa ne wemo ahpigina sa ne osum ahwaniblu.

<sup>31</sup> Afa ma atiaba nem ambanba sahtigiba 'Mango ahfe?' Sa ne enaig sohona, og, 'Ainiyag oka enena gafugafe.'

<sup>32</sup> Sisas enaig sihifenugenam asa ningitigina afa ika ahnangunaba gwenaig eseagena mo sa sihinwagenaba.

<sup>33</sup> Asa wemo donkina nihinai ahopigifnaba afa sa donkina alag ehem sahtigina og "Mangigim ne donkina nihinaiba weaba ahpigig."

<sup>34</sup> Afa ehenigi ehem ahsihina og "Ainiyag enena gafuga ofe."

<sup>35</sup> Afa sa ehenigi lofug mo heafgina ahug funam donkina kigibugi yi ahskonam asa ahwani bluna Sisasim og ma enanai yi fuku gai.

<sup>36</sup> Asa fuku ganam ikana, afa maia akofenaba el heafgelni nihi lofug hugfuhiahlaginim mina la skoafuna.

<sup>37</sup> Afa ma blo oliv mug mina la pugunam enam fwahia pe akofenaba afa sa kaksag patalfuiag el sifakaligna ambeafnaba Godna unehlagim figifini enaigba esinibi eba mungwali wasneigim sa nanguni.

<sup>38</sup> Afa ehengel enaig esogona og;



God sa ma sonag misog elbi suiala feafilai, Godna unehlagim sisigam nemug figifi. *Sam 118:26*

Afa heven la nai el sa ma safakali.

<sup>39</sup> Afa mingnagba Farisi el enanaiyi saiye afohiafna ena mungwali afunam Sisasim enaig esuni, og, "Tisa, sa ne kwenim sa ma sonaig esigim fwahi."

<sup>40</sup> Afa Sisas wahgi enaig sihifeni, og, "Afa eba mwalfwaibi afohiefiba, afa sa sona funba Godna unehlagimba figifi."

<sup>41</sup> Afa Sisas blo Jerusalem muhla pugunam ena kembangim nangunam ufwena.

<sup>42</sup> Afa ehe og, "O Jerusalemnai el niasabanig ka membig gla ne anwenafi mangwal sa ma nem suialafeni, eba meagam goh.

<sup>43</sup> Afa nengigimba neana angoluweg el ambenam nem wagigonam minam kagwakafe.

<sup>44</sup> God sa nem oblon eba ne mas anwenafig mo asa angoluweg nem ambe nugwakale klaitife afa kembang la nai luwalim gafa gwenaig esegonfi. Afa mas mangwalim ga mo fwahi."

*Sisas Godna kwania lala gam ikana*

*Matyu 21:12-17, Mak 11:15-19, Jon 2:13-22*

<sup>45</sup> Afa Sisas Godna Kwania lala sefukanam gawig gafugag elim ningitigifena.

<sup>46</sup> Afa ehengelim enaig esoni og, "Godna mom enaig esog og, 'Kana lala eba Godim beten nenag lala afa ne enaig esigbi ofenaiba ukwefelni laskuhlag lala.'"

<sup>47</sup> Afa mungwali osuna enanai yi Sisas elim ogfu fenugena. Afa sa saglag pris i, nihemo anwena el i, afa saglag el i enag one ehem tigifati.

<sup>48</sup> Afa mungwali ehena mom fwina membeni nasa sonag elni minam kikisegoni asa mas Sisasim tigifatini mo.

## 20

*El Sisasna wasneig mogim sahini*

*Matyu 21:23-27, Mak 11:27-33*

<sup>1</sup> Afa enanam Sisas Godna kwania lala la elim ogfufenugenam afa Godna suialag mo sihini. Afa saglag pris i, nihe mo anwena el i, afa saglag el i enag ambe oagna ehem nangui.

<sup>2</sup> Afa ehengel Sisasim sahini og, "Hanai ne wasneigbi flag afa amban nem faig?"

<sup>3</sup> Afa Sisas wahigi sihini og, "Sa ka nem sahin sa ne kam sihini.

<sup>4</sup> Amban maia Jonimba bula laitiag gafugaba wasneigbi faina eba God me awai el me?"

<sup>5</sup> Afa ehengel afunam hefum sihiagini og, “Haig mo sa big sihifi. Afa eba big enaig sihifibi God ehem wasneig faig. Eba bigim enaig sihinfenfi og Haig segba sa ne mas Jonna moba higigim patalfug mo.

<sup>6</sup> Afa eba big enaig sihifibi eba el ehe ehem wasneig faig. Eba el bigim funna nugwakale klaitifi ehengel enaig onigig finim og eba Jon Godna mo fla sihiaule el God ehem ninghiag.”

<sup>7</sup> Afa sa ehengel pese Sisas nangum afunam enaig sihifini og, “Kangel ka mas anwenafig mo.”

<sup>8</sup> Afa Sisas ehengelim sihini og, “Kanga ka mas nem sihini amban sa kam wasneig faig.”

*Aso nangwag hiawagig elni lasug mo  
Matyu 21:33-46, Mak 12:1-12*

<sup>9</sup> Afa Sisas mungwali elim enag lasug mo sihini og, “El aso gafugafegim afa ehe mo membi kembang gam akofenaba heafna aso mo nangwaghiawagig elni ningala fwahanaba og sa ma asom ninumwehe fugufi.

<sup>10</sup> Afa ika enanai yi gan maia asonai fane fug lugonaba asa heafna gafugag elim ningitigina og sa ma afu ehena asonai fane lambi. Afa nangwaghiawagig el enag elim tikaminefenam pese esug ningihiana.

<sup>11</sup> Afa maia pese ika esug pugunaba afa asona mog ming gafugag elim ningihianaba afa ehem gafa gwenaig esena tikamine fenam amtakwalig mo sihinagenam pese esug ningihiana.

<sup>12</sup> Afa maia ika esug pugunaba afa ehe ming gafugag elim ningihianaba afa ehem gafa gwenaig esena tige nugwakale flanam afwambagam flafatina.

<sup>13</sup> Afa sa asona mog enaig esona og, ‘Haig ka esefe. Naiba ka kikeafna luwalim ningihia, ka ehem fwina membenag. Eba ehena mo higi me.’

<sup>14</sup> Afa maia nangwaghiawagig el legim nangunim hefum sihiawagini og, ‘Sona asona mogna luwal oblo. Na tigifatinim asa big aso mo fli.’

<sup>15</sup> Asa ehem fli aso afwambagam ningihini asa tigi fatini.” Sisas sihi fwahanam afa ming mo sihini og, “Asona mog ehengelim sa haig esenifi?

<sup>16</sup> Afa eba blonam sonag elim kwagi klaitinam asa aso mo mingnag elim faifi.” Afa maia mungwali el ena mom higinim enaig esogona og, “Masa enaig pugufe.”

<sup>17</sup> Afa Sisas nangwaginam asa enaig saheni og, “Afa haig mog mo maia Godna molaba goh. Afa enaba enaig esog;

Ena sumulba lala nimblawagig el esugum fli fatig eba naho  
 God esenagba asa sumulbi gohug. *Sam 118:22*

18 “Afa amban enag aga laba peba asa ehem tigia fwatife.  
 Afa aga ambanim penam ehem piga fakafe.”

19 Afa nihemo anwena el i, afa saglag pris i ati anwenafini  
 enag lasug moba ehengelni amtakwalig onigig upuguni. Asa  
 oyna Sisasim kehli afa ehengel mungwali elim embefegoni.

*Mango sa big misog el mi God mi faigofe*  
*Matyu 22:15-22, Mak 12:13-17*

20 Afa sa ehem numwehenaginim asa elim ningitigini og  
 sa ma Sisasim mwakwalinibi asa ehem moalambini sa ma  
 gavman na ningala fwahi.

21 Afa sonag el Sisasim sahini og, “Ogfuiag el, kagel ati ka  
 anwenafig neana moba nufunam afa ena nufunam moba ati  
 ne elim Godna mina ogfu fenigeg, afa ne mas onigi ne gauna  
 haig haig elim gafa sihinag feg.

22 Sa kam sihin, bigna nihe mo atiaho enaig sihifeg sa big  
 kigba Romna misog elbi fai me awai awai me?”

23 Afa Sisas ehengelni mwakwal onigigim anwenafenim  
 afa esona og,

24 “Sa kam kig ogfuni. Amban na nofbosug i unehlag i asa  
 enanai yi go?”

25 Afa esogona, “Sisar Romna misog el.” Asa Sisas sihini og,  
 “Afa Sisarnaba asa Sisarim fai afa Godnaba asa Godim fai.”

26 Afa ehengel mas ehem enaig klimoan mo mungwali  
 elnai yi fini mo. Eba ehengel sineminefinim mwalfwai  
 auguiafna.

*Sisas sihini el melig buguagafeg mom*  
*Matyu 22:23-33, Mak 12:18-27*

27 Afa mingnag sadyusi el Sisasim nangugum ambena.  
 Sadyusi el enaig onigini og melig pigieg elbi mas buguagafei.  
 Afa Sisasim sahini og,

28 “Ogfuiag el, Moses enaig sihifena, afa el luwal fwainig  
 lahaba heafna sumineg sa ma ehena esig angwafigbi flai  
 asa ma luwal etegna sigagla unehlifi.

29 Afa autunam elegeg la gohug nilete ka afwaihiafena.  
 Eteg angwafig flana maia lahanaba luwal fwainig. Asa esig  
 angwafig agafena.

30 Afa ehem angigieg flana afa ehem gafa luwal fwainig  
 lahana.

31 Afa olyi nai flana gwenai esena ehem gafa lahana. Asa  
 gwenai pigi feakan ikan sumineg ne mog la puguna.

32 Afa sumi yi enag angwafigim gafa lahana.

33 Afa autunai la maia enanam melig pigieg buguagafeiba asa ehe ambanna angwag fefe afa mungwa niletana enag angwafig mungu flini?”

34 Afa Sisas enaig sihifini og, “Afa glaunai el sa ne angwafig lambig.

35 Afa saglag i angwafig i melig pigieg buguiagafegim eba ihla fifi afa sumi yi sa feg enenaba mas angwafig lambi.

36 Afa eba ehengel Godna oflanai el lofifi mas pese pigi. God ehengelim ilafo laitiba asa ehengel Godna luwalig feskofefe.

37 Afa Moses gafa gwenaig ogfufeg God melig pigieg elim ilafo laitigba asa ahnabugo li suwi lagigna mo Moses enaig sihifeg og, Ainiyagba eba Abraham, Aisak, afa Jekop na God.

38 Afa enaba ogfug eba ehe mango melig pigieg elni God mo, eba heafa nofkena elni God. Afa sa ehengel ehena nofla ati nofkena gag feasaieg.”

39 Afa mingnag nihemo anwena el og, “Ogfuiag el neana mo sihiagba eba suiala feg.”

40 Afa enenam mungwali el ehem ming mo sahinigim oksini.

*Sisas sahini El God Gisfu Fwahagim amban maia  
Matyu 22:41-46, Mak 12:35-37*

41 Afa Sisas sahini og, “Haig segba el enaig esogog El God Gisfu Fwahag eba Devitna simbianiga?

42 Afa Godna buk la Devit ehe enaig esog;  
God Ainiyag Kana Ainiyagim sihinag sa kana nihiginai ninga  
la pegafim

43 ikan ikan ka sa kike neana fagiule elim tigfeskonam asa ka nem faife.

44 Afa Devit ehem seaflana, Ainiyag. Haisegba enag ehe Devitna simbianigaba feg?”

*Numwehifibi nihemo anwena elni nihem  
Matyu 23:1-36, Mak 12:38-40, Luk 11:37-54*

45 Afa el Sisasna mo higafufna maia patalfuiag elim osihifinibi og,

46 “Sa ne numwehifibi nihe mo anwena elni enaigim. Ehengel enaig membig oyna heafna beten lofug wagwaginim asa afu. Afa ehengel fwina membig og sa ma kam enaig suwigi saglag el. Afa bu yis la ehe oyna misog el lofug augu afa laskuhlag lala ehe oyna sime suialag la gose augu.

47 Afa ehengel bontag angwafigim mwakwale gonigim afa ehengelni lala lambigonig. Afa enaig esigim afa ehengel mwakwalig kwinam beteniaska. Afa enanam God kwefihiage ofefiba asa enaig elim kwania susug faifi.”

## 21

*Bontag angwafig Godim weti kig faina*

*Mak 12:41-44*

<sup>1</sup> Afa Sisas nangwahiage nangunaba kaksag kigna el Godim kig faini.

<sup>2</sup> Afa nangunanaba bontag angwafig gafa eba sambaga kig weti klug Godim faina.

<sup>3</sup> Afa Sisas enaig esona og, “Ka nem nufunam sihinig sonag angwafigbi eba kig fwainig, afa enaigba fainaba eba ehe numwehe gwesim mingnag elim hili fenig.

<sup>4</sup> Afa mingnag elbi eba kigna feasaina afa ehengel hefum mo lambugafufnaba afa Godim mo mungkwehegenai wetia klug faini. Afa sonag angwafigbi eba kig fwainig fena afa eba wetiaklug kig mungu fanena maugum ugufna enag gwesim Godim mungwali faiena.”

<sup>5</sup> Afa patalfuiag el mingnag enaig onigig fini og, Godna kwania lalaba eba suialafegim afa fun i wag i fwainam suialafiageg. Afa Sisas enaig sihifena og,

<sup>6</sup> “Glau ne mungwali enag fun lalam ne nangug, eba mas gofi. Nengigimba angoluweg ambefe funim titoitife afa sa mungwali bite la apaiyefe afa mas mungu gofi.”

*Haig haig kinig pugufe*

*Matyu 24:3-14, Mak 13:3-13*

<sup>7</sup> Afa ehengel sahini og, “Ogfuiag el, ansi sa enaigba pugufe? Afa sa mangwal puguiba asa ka enam nangufi afa enaigba kam ogfunig eba amtakwalig osuna puguiagim ati muhla ofe.”

<sup>8</sup> Afa Sisas sihini og, “Numwehifibi masa el nem mwakwale gonife. Afa kaksag el ambenam kana unehlag la mwakwale afwaihenam esogofe, kike Kraist God kam kanog fwahag afa gwesim ming mo enaig sihi fife og enag osuna ati meyi ofe. Nofe ne ehengelim patag afu.

<sup>9</sup> Afa enenam ne higibi mingnag kantri hefum hagkafufe afa nofe ne embefi. Sonaigba eba gof opugu afa awaieg osunaba eba maisim sumi yi fe.”

<sup>10</sup> Afa ehe gwesim ming mo sihina og, “Afa kantri hefum hagkafufe afa misog el hefum hagkafufe.

<sup>11</sup> Afa haig haig bite eba asag i kwania bini i, afa kinig i puguiagefe afa mangwal amtakwalig bite la puguiafi afa of la puguiafi.

<sup>12</sup> Afa enaig pugua fwainig maisim fefiba el nem lambinim kinig faigofe. Afa ne kana el afwaihiefiba eba lotuni misog el nem kwefihian nugenam asa kalabus lala lambi

laitife. Afa nem Gavman i misog elni ningala fwatibi asa ne ehengelni nofla afohiefufe.

<sup>13</sup> Enaba enenai yi sa ne ehengelim Godna mo sihigon.

<sup>14</sup> Afa sa ne numwehe onigim nofe ne fwinam onig-waganim enaig esogo mangwal mo sa ka sihigonfe.

<sup>15</sup> Afa eba kike nem kwaganam afa nengelni mengig laba kike sihife afa ka nem suialag onigig faiba afa sa angoluweg mas ena mom flafui.

<sup>16</sup> Afa nembiafgelni afahumonig, nilete, mungwa usmuna, afa hihe enag nem angoluwegna ninga la fwatibi asa ming-nag nem kwaskofife.

<sup>17</sup> Afa ne kana el afwaihiefiba asa mungwali el nem olug kakagegonife.

<sup>18</sup> Afa mas nengelni lapug mungu amtakwale.

<sup>19</sup> Afa atiaba ne wasneigbi eba ne nofkikena afohiefufe.”

### *Jerusalembe amtakwalefe*

*Matyu 24:15-21, Mak 13:14-19*

<sup>20</sup> Afa Sisas sihini og, “Afa maia angoluweg el ambe Jerusalemim mugi yi pugu fakafiba sa ne nangufe eba sa ne anwenafi enaba ati amtakwaligim ofe.

<sup>21</sup> Afa maia enenam ofefiba asa Judia nai el ikagna mug gam embem ikafe. Afa kembig la nai el kembigim ikagna fwahinim afuna afa sangwali nai el nofene kembig gam afu.

<sup>22</sup> Afa enaig osuna God ehengelim amtakwalig susug afai. Afa enaigba esegba eba Godna nufunam mo ati enaig sihifeg.

<sup>23</sup> Enanam amtakwalegefefe angwafig afnialigni afa angwafig weti luwalna. Afa eba fwina amtakwalig hwa bite la pugufe afa enenam God sonag elim olug kakagenugefe.

<sup>24</sup> Afa mingnag elimbi angoluweg el kwaskofife afa ming-nagim mungwali kembig kalabus lala lambi aitiafufe. Afa afwambinai el Jerusalemim numwehefufufe. Afa gwenai esifi ikan heafgelni enag osuna awaiefefe.”

### *Nufunam el blofe*

*Matyu 24:29-31, Mak 13:24-27*

<sup>25</sup> Afa Sisas sihini og, “Afa maia enenam enaig ofefiba asa mangwal haig haig puguiagefe asa osu i, was i, afa bagnafut i enanaiyi eseagefe. Afa bitenai el mungwal enam oniginim afa sa olug wahige skofefe afa maia bu kwania mwagim higinim asa nangufi maia bu kwania mimewe blo humu ofiba asa embefeagifi.

<sup>26</sup> Asa el fwinam embefeagifi maia sumi yi mungwali bitem enaig puguiagofefiba asa mangwal oflanai heafgelni kifeg fwatiagi ahkawag minefefe.

<sup>27</sup> Afa enanam ehengel Nufunam Elim nanguiba sisi yi leango la kwania wasneigni afa kwania ombusugni wahe blofe.

<sup>28</sup> Afa maia enanam enaig ofefiba afa sa ne olug fwina wasneiye skofe eba God nem lambigim muhla ofe.”

*Fik li lasug mo*

*Matyu 24:32-35, Mak 13:28-31*

<sup>29</sup> Afa Sisas ena lasug mo sihini og, “Sa ne fik li afa ming li nangwaganim asa ne onigim.

<sup>30</sup> Afa maia li figeg yiminig pugufe asa ne anwenefi eba suialagnam meyiofe.

<sup>31</sup> Gwenaig esefe maia ne nanguibi asa mungwali puguiagefe sa ne anwenafi eba Godna bog meg muhla blo meyi ofe.

<sup>32</sup> “Ka nem nufunam sihinig afa enag el maisi afofiba asa mungwali enaig puguiagefe.

<sup>33</sup> Of i bite i mungwali awaieba afa kana moamo wahkig gwese gofufe.”

*Nengel ati numwehifim*

<sup>34</sup> Afa Sisas enaig sihifeni og, “Nengel sa ne numwehifim. Nofene buyisifi afa uflogna bu ahgagifi afa fwinam onig-wageafufum. Masa enag osuna ikagna nem pugunifie. Afa ne mas numwehiagim mo.

<sup>35</sup> Afa enag osuna mungwali bitenai elim ikagna pugunfi ofenaiba sis bume la apaiyofe.

<sup>36</sup> Asa ne numwehi afohiafiba sa ne Godim wahkig sahna fufum sa ma God nem wasneig faibi sa ne enaigim kwegfu afu, eba ne Nufunam Elim nangunim afa ne mas ehem afwane fini.”

<sup>37</sup> Afa mungwali osuna Sisas Godna Kwania lala la elim ogfufenugena afa osu pegnam ehe afwamba gam pugu ika oliv mug la sinaini gofena.

<sup>38</sup> Afa mungwali el oagna leana gubi Godna kwania lala gam ambenam Sisasna mo higim.

## 22

*Judas ona Sisasim elni ningala fwaha*

*Matyu 26:1-5,14-16, Mak 14:1-2,10-11, Jon 11:45-53*

<sup>1</sup> Afa enanam Ju elni pasova buyis meyiofe fenaba sona buyisba seflig bret yist fwainig buyis.

<sup>2</sup> Afa sa saglag pris i afa nihe mo anwena el i oagna Sisasim tigi fati afa sa ehengel mungwali elim embefegoni.

<sup>3</sup> Afa enanam Sisasna patalfuiag el mungu ehena unehlagba Judas Iskariot, Satan ehena nihi, sefuna.

<sup>4</sup> Asa Judas saglag pris mi afa Godna Kwania lala anwasag el mi ika nangwagenam og, haig sa ka esenam Sisasim nengelni ninga la fwaha fe.

<sup>5</sup> Afa enag el sifakalinim asa ehem enaig esoni og, “Eba ne enaig eseba eba ka nem kig faifi.”

<sup>6</sup> Afa Judas ehengelni mom sawifenim afa mina yisiginam afa maia kaksag el awaienaba asa ehe Sisasim ehengelni ninga la fwahafe.

*Pasova bu yi numwehiagini*

*Matyu 26:17-25, Mak 14:12-21, Jon 13:21-30*

<sup>7</sup> Afa enanam Bret yist Fwainig buyis ati puguna. Enag osuna el sipsip luwalig kwaginim asa Pasova buyis la ahgagini.

<sup>8</sup> Afa Sisas Pitami Jon mi sihinugenam asa ningitiginam og, “Sa ne ahkanam bibeafgelni fanem ninumwehiagafeba afa sa big ena Pasova buyis ahga.”

<sup>9</sup> Eheningi ehem ahsihina og, “Hanai yi ka numwehiagafe?”

<sup>10</sup> Afa Sisas sihini og, “Sa hig, afa ne ahkanam kembang la ahsefunam afa sa ne elim ahufrafe maia bu ubluiofiba sa ne ahpatalfuku ma lala la osefufiba sa ne sefuahka.

<sup>11</sup> Afa lalana mogim ahsihina og, ‘Ogfuiag el enaig saheg og, hag mengig megam sa ka kikeafna patalfuiag elim wanefe.’

<sup>12</sup> Afa eba enag el nem ogfunifi eba kwania mengig sisi gam go. Ena mengigba ati ninumwehiage go enanai yi sa ne faneba numwehiage ahfe.”

<sup>13</sup> Afa patalfuiag el sa enaigim ahnanguna maia Sisas ena mo fainibi afa sa enag faneba numwehiage ahfena.

*Sisas Ainiyagna fane ogfuni*

*Matyu 26:26-30, Mak 14:22-26, 1 Korin 11:23-25*

<sup>14</sup> Afa kwekwe watini Sisas 12 pela patalfuiag elim sime la wan pegnam fane wanena.

<sup>15</sup> Afa ehe enaig esona og, “Ka fwina membeg ena Pasova buyis nengelim koka nem wane afa sa ma kam sumi yi susugba pugunai.

<sup>16</sup> Ka nem sihinig ka mas pese ena buyisba ne eba ikan ikan maia Godna bog meg ena buyis mog nemug faiba asa ambala upugufe.”

<sup>17</sup> Afa sa Sisas bu kapna flanam Godim suialag onam asa enaig esona og, “Hwa bu flinim asa nimbefum mimangi.

<sup>18</sup> Ka nem sihinig ka mas ena wain bug pese nei eba ikan ikan asa Godna bog meg eba pugunam blofe.”

<sup>19</sup> Afa sa amba flanam Godim suialag onam asa kukosko fenam mimangeni asa enaig esona og, “Hwaba kana lofug,



ka nem faig koka nem kwaganim, sa ne enaig esi kam wahkig oniginafufim.”

<sup>20</sup> Afa maia ahganaba asa ehe bu kapna flanam gwenai esena ehengelim mimangenim afa sa enaig esona og, “Hwa buba eba kana taf, ka sugfenam asa ka lahafe. Ena tafba ese fwahag eba Godna mulug mo sihi fwahag.

<sup>21</sup> “Sa hig! Nengelnai amban mungu ka wan one ehe kam ikanam elim mwaunfe.

<sup>22</sup> Autunam God sihi fwahana mango mina sa Nufunam Elbi lahafe afa sa sonag el ehem elim mwaunufe eba ni-asabam.”

<sup>23</sup> Afa patalfuiag el hefum sahwagini og, amban bigelnai sa enaigba esefe.

*Amban sa gosig elbi fefe*

<sup>24</sup> Afa patalfuiag el hefum moanagini og amban sa ehengelnai gosig elbi fefe.

<sup>25</sup> Afa Sisas ehengelim sihini og, “Afwambanai elni misog el ehe fwinam wasneiageg elim nangwahiagegba. Afa el ehena unehlagim fingifigim afa seflig og sonaba elni hihe.”

<sup>26</sup> Afa Sisas enaig esona og, “Nofene enaig esi. Amo, eba amban sa nengelinaig gosig el feg eba sa ma sumi nai el lofei. Afa amban sa nengelinaig misog el feg eba sa ma esug gafugag el fei.

<sup>27</sup> Afa amban el sa fane neauwug afa amban el sa fane numwehiageg blug enaba amban sa gosig? Eba el sa fane mungwaug la neau eba naho gosig elbi feg. Afa eba ka olyi fenam asa ka esug gafugag el lofefe.

<sup>28</sup> “Afa maia kam kinigbi pugunagba afa ne mas kam fwahai.

<sup>29</sup> Afa kana alag kam heafna bog meg faig asa kanga gwenai esefe ka nem faifi.

<sup>30</sup> Afa ne ambenam kana bog megam fane i bu i ka nem wanefe. Afa ne misog elni pegag sime la augunam asa ne 12 pela Israel elim nangwahiagifie.”

*Sisas esona Pita kam mas fatinafe*

*Matyu 26:31-35, Mak 14:27-31, Jon 13:36-38*

<sup>31</sup> Afa Sisas Pitam sihina og, “Saimon sa hig, Satan Godim sahnag oga neana olug onigigim yuhna. Asa ofenaiba efef liim fe safla faka ofefla.

<sup>32</sup> Afa ka neana olug onigigim Godim sahnai eba mas neana olug onigigim fwahie. Afa maia ne pese bloiba eba sa ne nimbiafna nilitem ehengelni onigigim fwaki lasanfe.”

<sup>33</sup> Afa Pita higi enaig sihifena og, “Ainiyag, afa ne kalabusiba akofiba big mungwal ahkafe. Afa nem tigi afatifibi eba sa ma kam gafa tigi fati. Ka mas embefei.”

<sup>34</sup> Afa Sisas ehem sihina og, “Pita ka nem sihinag enaba gla sinaini kakaruk mwasiag fwainig fefiba asa ne sambaga mungu nagim esofe ne kam mas anwenafenag mo.”

<sup>35</sup> Afa Sisas patalfuiag elim enaig saheni feni og, “Afa maia ka nem ningitigiba ne mas kig wula na, wula, afa mong lofug enaig ne lambug afufe mo. Afa mango maia nem tumenig?” Afa sa ehengel wahigi sihini og, “Amo, eba awai.”

<sup>36</sup> Afa ehe esoni og, “Afa ne enaig fegba sa ne lambig afu. Afa amban ne kasu fwainigba sa ne nimbiafna lofug el fainam asa ne kig enananam flanam afa kasu sa ne lambim.

<sup>37</sup> Afa Godna mo ati sihi fwahana eba nufunam kam enaig pugunafe. Godna mo ati enaig sihifeg og eba el enaig onigigfig og eba ehe el amtakwalig. Ei, eba nufunam kam fenafe.”

<sup>38</sup> Afa patalfuiag el sihini og, “Ainiyag, sa nangu kangelbi sambaga kasu feg!” Ehe og, “Eba magwese.”

*Sisas oliv mug la beten ena*

*Matyu 26:36-46, Mak 14:32-42*

<sup>39</sup> Afa Sisas Jerusalem kembig fwahanam gwenai esegofna oliv mug gam ehem patalfuna.

<sup>40</sup> Afa enanai yi apukenam afa sa enaig esona og, “Sa ne Godim betenini eba neana olug onigig mas tige fupel.”

<sup>41</sup> Afa ehe ehengelim fwatinam gwesim mwakwalig hilife ikanam asa mongkokini kwakwagenam afa sa beten enam og,

<sup>42</sup> “Kanapi ena kapteba sa ne kana ninga la nai mwehlai. Asa nofene kana membug la ese afa eba ka sa nimbiafena membug la ese.”

<sup>43</sup> [Afa oflanai el ehem pugunam afa sa ehem wasneinagena.

<sup>44</sup> Afa kwania kinig ehem gohnagenaba asa ehe fwina beteniafnaba ehenge ehena nihi pugu penafena ofenaiba taf.]

<sup>45</sup> Afa betene fwahanam asa pese patalfuiag elim ningwagna ikana afa ika nangwagenaba ehengelni olug kinig skofenaba asa ehengel non aska fena.

<sup>46</sup> Afa ehe ehengelim enaig esoni og, “Haisegba sa ne non aska? Afa sa bugia gafenam beteni masa neana olug onigig tige fu penfie.”

*El Sisasim ambe kehlini*

*Matyu 26:47-56, Mak 14:43-50, Jon 18:3-11*

<sup>47</sup> Sisas maisi mo sihi gofenaba afa sa kaksag el flaublunam. Afa sa Judas eba patalfuiag el enag ehe gose ika mina ogfunim, afa blo Sisasim muhla fenam ona ehem asanktata fiahfla.

48 Afa Sisas ehem enaig sahna fiahflana og, “Neho nog Ka Nufunam Elim asanktata fiahflanam asa angoluwagna ninga la fwaha?”

49 Afa patalfuiag el ati anwenafini el ogna Sisasim kehli asa sahini og, “Ainiyag ne membegba ka sa kasuni hagim?”

50 Afa sa ehengelnai mungu kasu skoflanam prisni misog elni gafugag elim nihiginai angum higeflaitina.

51 Afa Sisas enaig esona og, “Magwese fwaha!” Afa sa Sisas ehena angugum ningana pese gabahlana.

52 Afa saglag pris i, anwasag el i afa saglag el i ogna ambe Sisasim kehli asa Sisas ehengelim enaig sihi feni og, “Ne enaig onigig Kaba ukwef el ho feg na ne kasu na malu na fla blug kam flig.

53 Afa mungu mungu osuna Ka Godna Kwania lala ikafenam gafenaba afa enanam ne mas kam flini mo. Afa nag ilawaba eba enanam ne kam esofini. Afa enanam si kifiagim filafe fatife.”

*Pita hefum sisagena*

*Matyu 26:57-58,69-75, Mak 14:53-54,66-72, Jon 18:12-18,25-27*

54 Afa sa Sisasim kehlinim misog prisni lala gam waniga-fuiafnaba afa Pita sum kiniafwaha fiahkafna.

55 Afa el lala bog muhla olyi suwi wehlinim enanai yi auguiafnaba Pita gafa ika nanai yi gafena.

56 Afa gafuga angwafig angwaming ehem suwi ombusugi fahigeflam asa enaig esona og, “Sonag elbi eba ati Sisas i safeakfna.”

57 Afa Pita esona og, “Angwafig ka mas ehem anwenafenag mo.”

58 Afa managig fwainig ming el blona fahigeflanam afa gwenaig esona og, “Ne gafa ati ne mungwal safeakafna.” Afa Pita esona og, “Amo, kaba mas ehiba sahfeakafna mo.”

59 Afa mwakwalig afohiafenba afa ming el gwenaig esona og, “Eba nufunam ehe sonag elbi eba Sisas i sahfeakafna enag ehe gafa Galili lanai el.”

60 Afa Pita esona og, “Ka mas anwenafeg mo ena mo sa ne esogba.” Pita enaig sihifegofnaba afa gweyi ikagna kakaruk moasiyinaba.

61 Afa Sisas wahigifenam Pitam nangwagofenaba. Asa Pita pese ena mom oniginam Sisas sa ehem sihina og, “Maia maisim kakaruk moasiag fwainig fefiba ne sambaga mungu nagim esofe ka mas ehem anwenafenag mo.”

62 Afa asa afwambagam pugu ikanam nugwakal ufwe feagena.

*El Sisasim tikaminefinim kotemini*

*Matyu 26:67-68, Mak 14:65*

<sup>63</sup> Afa anwasag el Sisasim kehlinim amtakwalig mo sihinaginim afa tikaminefini.

<sup>64</sup> Afa ehengel Sisasim nofugim lofugna kagfunim asa sahnagini og, “Neaho Godna mo fla sihiaule el sa ne kam sihin amban el nem tigikafu?”

<sup>65</sup> Afa ehengel mingnag kaksag molamp mo faini.

<sup>66</sup> Afa leana gubi yi saglag el i, saglag pris i, afa nihemo anwena el i enag ambe laskuiahlanaba asa Sisasim ehengelni nof la wanig ambena.

<sup>67</sup> Afa sa ehengel Sisasim sihini og, “Sa ne kam sihin neaho Kraist God nem Gisfu Fwahag?” Afa ehe wahigi enaig esona og, “Ka nem sihinibi ne mas kana mo higi.

<sup>68</sup> Afa ka nem sahtigiba afa ne mas kam kwegfug lagini.

<sup>69</sup> Afa glau fenam afa ikan autunai la fefe eba Nufunam El ehe gosig ikanam wasneig God ena muhla pegafufe.”

<sup>70</sup> Afa sa mungwali el ehem sahini og, “Neaho ne Godna leg?” Afa ehe sihini og, “Ei, eba gwenaho, ati ne sihig.”

<sup>71</sup> Afa ehengel esogona og, “Mangofi eba mingnag el ati ehem sehig. Eba ati ka higig eba heafna moala.”

## 23

*Pailat Sisasim sahna*

*Matyu 27:1-2, 27:11-14, Mak 15:1-5, Jon 18:28-38*

<sup>1</sup> Afa sa enag mungwali el Sisasim Pailat nangum wanig afuna, eba Romna misog el.

<sup>2</sup> Afa sa ehengel Sisasim sehini og, “Sonag elbi og na bigelni kantrim filafefati. Ehe elim ogfunig og masa kig Romna misog elim faifi. Afa ehe enaig esog og kaba Kraist kike misog el feg.”

<sup>3</sup> Asa Pailat Sisasim sahna og, “Neaho ne Ju elni misog elbi feg?” Afa Sisas esona og, “Ei, gwenaho ne sihig.”

<sup>4</sup> Afa sa Pailat saglag pris el mi afa mungwali el mi sihini og, “Sonag elbi mas haig eseg mo.”

<sup>5</sup> Afa ehengel fwina olug wasneigni esogona og, “Amo, eba heafna mo Judianai elim olugim fwaki lasaneakag. Enaba Galili la pugugim blog wanai yi pugug.”

*Herot Sisasim sahna*

<sup>6</sup> Afa Pailat ena mo higinam asa sahtigina og, “Sonag elbi eba Galili lanai ho maia?”

<sup>7</sup> Afa ehe enam ati anwenafena afa enaig onigina og, Herotba Galililanai elim nangwaghiageg el feg afa enag glawaba Jerusalem la ga. Asa Sisasim esim ningihiana.

<sup>8</sup> Autunam Herot ati higina Sisas kigmog ogfunaba enam ona nangu asa ehe Sisasim nangunam maia blofenaba asa sifakalena.

<sup>9</sup> Afa sa ehe Sisasim fwina sahnagenaba afa Sisas mwalfwai gofena.

<sup>10</sup> Afa sa saglag pris i nihemo anwena el i bugiaga fenam asa Sisasim fwina sehini.

<sup>11</sup> Asa Herot fena afa heafna soldia apaiyena Sisasim molamp mo fainim nugwakale flini. Afa misog elni lofug ehem fatinim asa Pailat nangum pese ningihini.

<sup>12</sup> Autunam Herotba Pailatna angoluweg el fena afa ilawaba ehe hihe ahfeg.

<sup>13</sup> Afa sa Pailat saglag pris i, saglag el i, afa mungwali el mi unetigina og ma ambe.

<sup>14</sup> Afa ehe ehengelim enaig sihifeni og, “Sa ka sonag elim wangig ambena ofenaiba haig haig el lofeg. Afa ka mungwali elni nof la fahigenagegba mas ka ehena haigim nangug mo.

<sup>15</sup> Afa Herot gafa gwenaig onigig fenam asa pese ningihiana. Sa ne anwenafi hwa elbi mas haig eseg mo asa ka onigihiaaba sa ne tigifati.

<sup>16</sup> Afa sa ka ehem wena fliakilenagenam asa fwaha.”

<sup>17</sup> [Enanam Pasova buyis la ehengel ogma ambanim kalabus elim membini asa Pailat mungu elim fwahafe.]

<sup>18</sup> Afa mungwali el mungwa mengna esogona og, “Sonag el mo tigifatibi afa Barabas mo ningihia.”

<sup>19</sup> (Autunam Barabas eba kembang la maluna penim afa sa elim tigeatina enaig esenaba asa ehem kalabus yi flifatini.)

<sup>20</sup> Afa Pailat ona Sisasim fwaha asa elim enaig pese sihi feni.

<sup>21</sup> Afa mungwali mungwa mengna fwina esog ona og, “Sonag elimbi li katigeg la kukufenagi! Sonag elimbi li katigeg la kukufenagi!”

<sup>22</sup> Afa Pailat pese ehengelim sihini og, “Haiseg! Mango maia fegba. Afa ka mas ehena haigim nangug mo eba ka ehem wena fliakilenagenam asa fwaha fe.”

<sup>23</sup> Afa ehengel fwina mungwa mengna esogo afufna og, “Sa ne Sisasim li katigeg la kukufenagi.” Asa Pailat ena mo higinam.

<sup>24</sup> Afa Pailat gafa mungwa mo sihina sa ma gwenaig esi.

<sup>25</sup> Afa sonag el kalabus lanai eba Barabas autunam ehe maluna kembang la penim afa sa elim tigi fatina afa enag mungwali el ehem membini Pailatim og sama fwahai. Asa Pailat gwenaig esena afa sa Sisasim mo mungwali elni ningala fwahana.

*Sisasim li katigeg la kukufenagini*

*Matyu 27:32-44, Mak 15:21-32, Jon 19:17-27*

<sup>26</sup> Asa Sisasim wanig afuafnaba afa nangunibi Sairini lanai el Saimon ona kembang la ika seaifo enag ehem hehlinim Sisasna li katigeg ehem fli kufehlinibi asa kufehlanam asa Sisasim sum patalkuna.

<sup>27</sup> Asa kaksag el mungwali flaukunaba afa mingnag angwafig mo wewatini Sisasim patalfuiafna.

<sup>28</sup> Afa Sisas wahigifenam ehengelim enaig sihifeni og, “Jerusalem la nai angwafig nofe ne kam wewatina asa ne nimbefa afa luwal fe sa ne gwenaig esi.

<sup>29</sup> Afa sumi yi puguiba el enaig sihifefie og, ‘Afa angwafig alaisu wufeg afa angwafig luwal fwainig afa angwafig luwalim tut faig fwainig eba sa ma sifakali.’

<sup>30</sup> Afa enanam;

El mugim enaig sihifenafe og ‘Kam tufupe sagfla kumwahla’.

*Hos 10:8*

<sup>31</sup> Afa atiaba el kam enaig esigbi maia li figetinim asa ehengel fwina amtakwalig eseagifie maia li fofeba.”

<sup>32</sup> Afa amtakwalig el ahfena afa Sisas fena enam el wanafunam ogna ehem kwaskofi.

<sup>33</sup> Afa ena mug la ogna kwaskofi ena mug seflig misog kig mug. Enanai yi Sisasim olyi kahlini afa sambaganigi el ming ehgam kahlini afa mingim ming ehgam kahlini.

<sup>34</sup> Afa Sisas esona og, “Api, ehengel mas heafgelni amtakwalig nihem anwenafig mo sa ne ehengelni enaigim huguflanim.” Afa el Sisasna lofug huguflinim asa katna gosisini ogma amban sa enana lofug flai.

<sup>35</sup> Afa el nangwafofenaba afa sa Ju elni saglag el Sisasim molamp mo faini enaig esogona og, “Eba ehe sa ming elim fakwaganfe enag sa ma hefum kweagfui. Atiaba God Kraistim Gisfu Fwahag El fegba asa ma gwenaig ese hefum kweagfui.”

<sup>36</sup> Afa anwasag el gafa Sisasim molamp mo fainim asa mileaklana bu nehni.

<sup>37</sup> Afa enaig esogona og, “Atiaba ne Ju elni misog el fegba sa ne nimbefum kweagfu.”

<sup>38</sup> Afa sa li kukweflag la enaig ginofini og:

Sonag elbi eba Ju elni misog el feg.

Asa Sisasna misog sisi yi kukufi fwahini.

<sup>39</sup> Afa mungu el sa Sisas nahlum wahe kagini enag Sisasim molamp mo faina og, “Neba naho Godna Gisfu Fwahag El me awai awai me? Sa ne bibefum kwaganim.”

<sup>40</sup> Afa ming el ehem ninimu flanam enaig esona og, “Atiaho ne Godimba embefenag? Neanga gwenaig susug flag.

41 Afa eba bibeafgina moala big enag susugba ahflag enaba ihlafeg. Afa sonag elbi eba mas haig esena mo.”

42 Afa Sisasim enaig sihifena og, “Sisas ne misog el ofefiba sa ne kam onigina!”

43 Afa Sisas ehem enaig sihifena og, “Ka nem nufunam osihina glauwaba ne kai heven la hawagfife.”

*Sisas lahana*

*Matyu 27:45-56, Mak 15:33-41, Jon 19:28-30*

44 Afa osu misosuf gigni osu meagam seaifunaba mungwali bite si kigi fakana ikan ikan sambaga mungu aua la puguna.

45 Afa gwenanam Godna Kwania lala nai lofug olyi pefunam pekan pitkafena.

46 Afa Sisas ambwaitina esona og, “Api, ka kikeafna sungwabugbi nibeafna ninga la afwaha.” Afa ena mo sihinam asa lahana.

47 Afa anwasagna misog el mungwali enam nangunim Godna unehlag fingi finim og, “Eba nufunam ehe sonag elbi suialag ehe.”

48 Afa el enanai yi afohiafna enag enam nangunim heafna bahaligim tigewagim afa ningam gwana kakuwagim asa afuna.

49 Afa Sisasna hihe i afa mingnag angwafig i enag membiagig afohiafnaba ehe gafa nanguni. Autunam ena angwafigbi Sisasim Galili nai patalfubina.

*Sisasim fun meg la fakini*

*Matyu 27:57-61, Mak 15:42-47, Jon 19:38-42*

50 Afa saglag el mungu ehena unehlagba Josep. Eba Judia nai el ehena kembangba Arimatea. Sonag elbi eba suialag el fena.

51 Afa mingnag saglag el sa Sisasim otigiginibi ehe mas mungwa mo sihini mo eba ehe Godna bog megim nangwagim nenge gofena.

52 Asa ehe Pailatim sahna ogna Sisasna eligim flauku.

53 Afa sa ehe Sisasna eligim li katigeg la nai nibwasala upi fakanam asa lofugna sagfla kikenagenam asa flauku fun meg la fakana. Ena fun megba mulug gofna mas ambanim eyi fakini mo.

54 Afa eba Fraide osupeгна, enanaba el laskuhlag osuna numwehiagini. Afa enaba ati meyoiefna.

55 Afa sa angwafig Sisasim Galili nai patalfubina enag Josepim patalfunam fun meg la nangwafufnaba asa Josep enanai yi fakana.

56 Afa ehengel pese lala gam afunam afa sa pauda i fungunia bu i numwehiagim ogna sa Sisasna lofugim

laitinagi. Afa sa esug auguiag osuna ehengel ena nihe mo patalfunam asa esug auguna.

## 24

*Sisas pese buihiana*

*Matyu 28:1-10, Mak 16:1-8, Jon 20:1-10*

<sup>1</sup> Afa Sande leana gubi enag angwafig fun meg nanguigim afufefnaba asa pauda i fungunia bu i lambug afuna.

<sup>2</sup> Afa afu nangunibi fun mogug fun megim pwaka feg ati bafo gofna.

<sup>3</sup> Asa ehengel saiye afunam mas Sisas Ainiyag na eligim nanguini mo.

<sup>4</sup> Afa sa ehengel afohiafnaba fwina onigwageafufna. Afa sa gweyi yi ikagna el sambaga heafnigina lofug eba fwinam busiag ahfena enag muhla ahgofna.

<sup>5</sup> Afa angwafig nangwaganim embefiagini bite nofeafufna. Afa sa sambaganigi el enaig sihi ahfeni og, "Haisegba sa ne noka nofkikena elbi bite kife la yisigi nangu?"

<sup>6</sup> Eba mas wanai yi ba gah mo. Eba awai. Eba ati pese buihiag. Atiaho ne ehena moba onigig asa ati nem Galili yi sihini.

<sup>7</sup> Ehe enaig esona og, 'Eba Nufunam Elim amtakwalig elni ningala fwahibi asa ehem li katigeg la tigi kahlife afa maia sambaga mungu osuna ika puguiba afa sa ehe pese buihiafe.' "

<sup>8</sup> Afa sa angwafig Sisasna mom pese enam onigini.

<sup>9</sup> Afa sa ehengel enanai fwahinim asa pese afunam 11 pela patalfuiag el mi afa mingnag el mi sihigoni.

<sup>10</sup> Afa enag angwafigbi eba Maria Makdala nai, afa Joana, afa Jemsna afag Maria afa mingnag apaiyena. Enag Kanog Fwatieg elim ena mom sihigoni.

<sup>11</sup> Afa Kanog Fwatieg el enaig onigini og angwafig eheba mwakwalig.

<sup>12</sup> Afa Pita buihia kikini ikan fun meg gim sefu nangu-namba lofug mungu gifini afa elig mo awaiena. Afa sa ehe pese lala gam ikanam fwinam onigwageaufna.

*El Emeus Kembig gam ahakofna*

*Mak 16:12-13*

<sup>13</sup> Afa maia angwafig ambe ena mo sihinibi afa ming el sambaga ati ena mo ahiginam asa enanam Emeus kembig gam ahakofna. Enag kembigba eba mungwanam hilifeg ikag.

<sup>14</sup> Afa eheningi ahkafenaba hefum sihiaga ahfe kafna Sisasim sa esenagini ena mom.



15 Afa maia sihiago ahfekafnaba afa Sisas olyi ehem pugu-nim asa afuiafna.

16 Afa afuiafnaba eheningi mas ehem anwena ahfena mo.

17 Afa sa Sisas eheningim sahtigina og, “Mangwal mo ne sihiag ahfeaka?” Afa eheningi ahkinihlanam nofbusug mo kuko fuiagafenam enaig ahgofna.

18 Afa ming el ehena unehlagba Kliopas enaig esona og, “Afa mungwal el Jerusalem lanai ati enam anwenafig, mangwal sa enanam enanai yi puguiageg. Mas ho ne enam anwenafeg mo?”

19 Afa ehe ehem sahtigina og, “Mangwal maia?” Afa eheningi enaig esohona og, “Ena moba eba mangwal sa Sisasim Nasaret la nai elim sa pugunageg enam. Sonag elbi Godna mo fla sihiaule el feg afa wasneig ogfuiuale feg afa ehe suialag mo sihiaule feg. Afa ehe suialag el Godna nofla feg afa elni nofla feg.

20 Afa misog pris i afa saglag el i ehem angoluweg elni ninga la fwahigbi asa ehem tigungim li yi kahli.

21 Afa kangel ka onigig sonag elbi eba Israel elim lambinam asa kwaganfe. Afa enaigba esegba eba sambaga mungu osuna maia awaiegba asa enaigba pugug.

22 Afa leana gubi kangelnai angwafig afug bite kife la apukegim ena mo fli big sihigbi kangel sineminefeg.

23 Afa mas Sisas na eligim bite kife la nanguini mo. Afa enanai yi of lanai el ehengelim ahsihini mo. Afa enanai yi of lanai el ehengelim ahsihini og Sisasba eba nofkikena goh.

24 Afa mingnag kangel nai ehe gafa afu bite kifem nangug. Enaba angwafig sihinibi asa enaigba esini afa mas ehena eligim nanguni mo.”

25 Afa Sisas eheningim enaig sihifeni og, “Masi ne numwehe ohonigig mo afa mas ne Godna mo fli sihiafule elni mom fwinaam ahkehla ohonigina mo.

26 Eba Godna Gisfu Fwahag El sa ma susug flanam afa nengigim sa ma kwania unehlag flai.”

27 Afa sa Sisas eheningim Godna mungwali mom sihinuwagena. Moses nai yi upugunam afa ikan mungwali Godna mo fli sihiaule elnai yi puguna. Enaba Sisasna mom sihiafufna.

28 Afa afu kembang la apukenam afa sa Sisas ona eheningi lasanam ika.

29 Afa eheningi ehem ahsihina og, “Osu ati pegim ofe sa ne kam wangi.” Asa afu lala meg gam saiye afuna.

30 Afa enanai yi augunam asa fane ona ahga afa sa Sisas amba flanam Godim suialag onam asa kwawagenam asa mange tigni.

31 Afa maia enaig esenaba asa eheningi enam ahnangunam asa anwena ahfena eba Sisas ehe. Afa sa ehe gweyi ikagna awaienaba afa eheningi mas ehem ahnanguna mo.

32 Afa eheningi hefum sihiag ahfenam og, “Afa, big eteti ahfena maia bigim mina la Godna mo bigim sihinuwage blofnaba afa sa bigna olug fwinam fingi fiahwagena.”

33 Afa eheningi gweyi ikagna Jerusalem gam ahkana. Afa enanai yi ika ahnangwagnaba 11 pela patalfuiag el apaiyena afa mingnag hihe apaiyena enag laskuhlagofna.

34 Afa ehengel enaig sihi fegoni og, “Eba nufunam ehe Ainiyag ati pese buhiag. Ehe ati Saimonim pugunag.”

35 Afa eheningi gafa sihiagafena Ainiyag sa mina la pugunim afa lala apukenam maia ehe amba okowag fenaba asa enanai yi anwena ahfena eba Sisas ehe.

*Sisas hefum patalfuiag elim ogfuni*

*Matyu 28:16-20, Mak 16:14-18, Jon 20:19-23*

36 Afa maia lala meg gam auguia sihiage aflanaba Sisas gweyi ikagna pugu olyi gofna. Afa sa sihini og, “Nengelni olug enesieg nem gohonfi.”

37 Afa ehengel sineminefinim embefinim og eba iflaf eba.

38 Afa ehe enaig sihifeni og, “Haisegba sa ne sineminefig? Haisegba sa ne enaig onigifig mangwal sa ne nangugim ne og mas nufunam feg mo?”

39 Afa sa nangu kana ninga mi mong mi sa ne enam anwenafi eba kike ehe. Sa ne kam tuhum kaba iflaf mo. Afa iflaf eba kig fwainig afa nihig fwainig. Afa kaba eba kigna feg afa nihigni feg.”

40 Afa ehe enaig sihifenim afa sa heafna ninga me mong mi ogfuni.

41 Afa ehengel mas enam numwehe anwenafini mo. Afa ehengel olug fingi feskofenam afa sifakalini. Afa Sisas ehengelim sahtigina og, “Atiaho ne faneba fig?”

42 Afa sa sawag ehem fainibi

43 asa flanam ehengelni nofla nena.

44 Afa enaig sihifeni og, “Enaba autunam ati ka nem sihi fwahani kana mom mungwali yi Moses na, Godna mo fla sihiaule el i, Song buk la i ati ginofi fwahini enaba eba sa kam nufunam fenag.”

45 Afa sa ehe ogfufenugenaba asa ehengel Godna mom numwehe anwenafini.

46 Afa sa ehe enaig sihifeni og, “Godna ginof enaig esog Godna Gisfu Fwahag El eba sa ma susug flanam asa ma lahai afa maia sambaga mungu osuna feba asa pese buhiafe.

47 Afa heafna unehlag la mungwali bitenai elim olug waikefe mom sihigo ningia fwiba sa ma God ehengelni

amtakwaligim flafatini. Ena moba sa ma Jerusalem la pugunam sa ma gwese ika minefe.

<sup>48</sup> Afa ati ne enam nangug afa sa ne enaig mom sihiagafu.

<sup>49</sup> Afa kana alag ati sihi fwahag afa eba kike nem enaig faife asa ne gwena kembang la auguiafim ikan sa ne wasneig heven la nai fli.”

*Sisas pese heven gam fukukana*

*Mak 16:19-20, Aposel 1:9-12*

<sup>50</sup> Afa Sisas ehengelim Betani Kembang muhla wankana. Afa heafna ningam fingi fe fuku gufnaba asa enaig esona og God sa ma nem suialafehiage gofi.

<sup>51</sup> Afa ehe enaig ese fwahanim asa God ehem heven gam sulu fla fukuna.

<sup>52</sup> Afa ehengel ehena unehlagim fingi finim asa sifakali finibi Jerusalem gam pese afuna.

<sup>53</sup> Afa enanai yi Godna Kwania lala auguiafenaba afa sa Godim suiala fe flini.

# Jon

## Suialag Mo Jon Ginofena

### Hwa buk enaig esog

Afa Jon enaig esog Sisas ehe el lofug fegim asa pe blog hwa bite la bigim wanga. Jon enaig membeg og el sa ma enaig olug onigigfi Sisas eba Godna Leg feg afa sa ma anwenafi God ehem Gisfu Fwahag elim pese lambigim. Jon ati anwenafeg amban Sisasim olug oniginaba eba enaig el wahkig nofkenagag flafe asa Jon enam ginofeg. (Jon 20:31) Ilawana Jon enaig esona Sisas ehe autunam nemug God i hawagfena. Afa ming mo ehe enaig esog Sisas kigmog ogfuiagena asa big enam anwenafig Sisas eba Godna Gisfu Fwahag El feg. Afa sapta 13 ika 17 la pugug eba enaig sihifeg mangwal sa sinaini puguna eba angoluweg ogra Sisasim kehli. Afa enag sinaini Sisas heafna patalfuaig elim wangafenaba asa ehengelim numwehe ogfufenugena. Afa sumi nai moba Sisasna lahag mo afa pese buihiagim afa heafna patalfuiag el ehem nanguinim asa olug onigini.

#### *Godna Mo pugunam asa el lofena eba Sisas*

<sup>1</sup> Afa autunam nemug hwa bite mas gifni mo afa el mungu fena eba Godna Mo afa ehe God i ahwag fena afa ehe God fena.

<sup>2</sup> Eba nufunam autunam nemug enag Mo ati gofena afa enag Mo eba el God i ahwag fena.

<sup>3</sup> Afa enag Mo eba mog feg asa mungwali pugug afa big nangug afa mingnag meagam gohug. Afa God enag Mona mungwali gafugafiahena.

<sup>4</sup> Afa nufunam nofkenagag enag Mo la go afa enag nofkenagag elim ombusug faig.

<sup>5</sup> Afa enag el eba ombusug sikulufegim higafeg afa sikulufeg mas ombusugim filafe.

#### *God bu la laitig elim ningihiana*

<sup>6</sup> Afa God mungu elim ningihiaig heafna unehlagba Jon.

<sup>7</sup> Afa Jon blogim mungwali elim hwa ombusug mo sihinig asa mungwali heafna mo higigim sama enag mom olug oniginini.

<sup>8</sup> Afa Jon ehe mango enag ombusug mo eba awai afa ehe enag ombusugim elim ogfunig.

<sup>9</sup> Afa enag nufunam ombusug asa hwa bite la pe blog asa mungwali elim ombusug fenife.

10 Afa God mo behig esonaba asa enag Mo mungwali hwa bite la apukeakana. Afa enag Mo hwa bite la ehe puguna afa hwa bitenai el mas anwenafini mo asa mungwali ehe gafugafeg.

11 Afa ehe heafna mungu usumunai elim bloni afa heafna el mas ehem mas suialafe flini mo.

12 Afa ambangel ehem suialafe fligbi asa ehem olug oningigba God enaig elim mina piginig asa God enaig esog ne kana luwalig apukeg.

13 Afa enaig luwal afag mas wanigai afa mango bigelni alag afagna membug la mo eba God ehe feg asa apukeg.

14 Afa enag Mo el lofug blonam bigelim olyi fenife. Afa maia bigim wangafenaba afa big nangug ehe fwina kwania feg. Afa God ehem enaig esenagba kwania feg asa heafna leg mungu feg. Afa ehe ati elim esmunagim kwaganig afa ehe Godna haig haigim mungwali bigim nufunam ogfunig.

15 Afa Jon blogim ehena mo sihiakag. Afa ehe enaig esog "Autunam ka nengelim sihinig ka ma gose ikafiba asa mungu el sum blofe afa ehena unehlag kwania feg afa kaba weti feg asa ka maia meyi fiahfenaba afa ehe ati God i ahwagfena."

16 Afa heafna nihe eba bigim wahkig esmunagim kwaganig gohugim asa bigim suialag lafieg afa ehe bigim gwenai esenigofife.

17 Autunam God heafna nihe mo Mosesim faina asa bigel anwenafig afa ilawo Sisas Krai ogfug Godna nihe enaig esmunagim kwaganig afa nufunam mo bigim pugunig.

18 Afa mas amban el Godim nanguna mo afa heafna leg mungu ehe God fena afa ehe Alag i ahwag fena asa bigim God numwehe ogfunig.

### *Jon bu la laitig elna mo*

#### *Matyu 3:1-12, Mak 1:7-8, Luk 3:15-17*

19 Afa Jerusalemnai Ju elni misog el membeni Jonim sahna asa gafuga elim afa mingnag prisim Jon nangum ningitigina. Afa ehengel ambenam ehem sahni og, "Ne amban maia?"

20 Afa Jon mas mwalfwai gofena mo eba ehe ambala esoni og, "Ka mango Godna Gisfu Fwahag El mo."

21 Afa ehengel ehem pese sahni og, "Ne mango enag el mo afa ne amban maia? Atiaho ne Elaija?" Afa ehe og, "Kaba mango enag el mo." Afa ehengel afofenaba pese sahni og, "Atiaho ne Godna mo fli sihiaule el asa kagel nengia afofena?" Afa ehe sihini og, "Amo kaba awai."

22 Afa ehengel enaig esogona, "Kagelim sihi neba amban maia. Afa maia ne sihiba ka higinim asa pese afunam kiafgelni misog elim sihigoni asa kagelim ningitigi asa sihi nembefum ne amban maia?"

23 Afa Jon sihini og, “Autunam Godna mo fli sihiaule el Aisaia enaig esog;

‘Afa kaba el mungu bite behig la gonam afa fwina esofe og,  
Ainiyagna mina suialafiahi sama bloi.’” *Ais 40:3*

24 Afa mingnag el Jonim nangugim ambena eba farisi el,  
25 afa ehem sahnagim og, “Afa ne mango Godna Gisfu Fwahag El, Elaija, afa Godna mo fli sihiaule el mo asa haig esegba ne elim bu la laitig?”

26 Afa Jon sihig, “Ka bu behig la laitig afa mungu el nengelnai yi olyi asa go afa ehem ne mas anwenafig mo.

27 Afa ehe kana sum asa blofe. Kaba el feg afa eheba fwina suialag nemug asa ka mas ehem muhla fenai afa kweafunam ehena mong lofug huguflanai.”

28 Afa enag el enaig Betani kembig la esena eba Jordan bu ehengam maligim, afa enanai yi Jon laitiagena.

### *Sisas eba Godna sipsip lofeg*

29 Afa ming osuna Sisas Jon nangum blofenaba asa Jon ehem nangonam esona og, “Sa nangu, enag el Godna sipsip luwalig oblo afa ehe bigelni amtakwaligim kufla fatiagim.

30 Enag el ati ka nengelim sihinig. Ehe sum blonam afa ehe gosefe afa ehe fwina kwania feg asa ka maia meyi fiahfenaba afa ehe ati God i ahwafena.

31 Afa gof ka mas ehem anwenafena mo asa ka enaig eseg elim bu la laitinugeg asa God enag elim bigel Israelnaim ambala ogfunife.”

32 Afa Jon ming mo sihina og, “Ka nangug Godna Sungwabug gamb lofug of la nai pe blonam Sisas i ahgofife.

33 Ka gafa ehem mas anwenafenag mo. Afa autunam God kam ningihiana elim bu la laitiagim afa ati kam sihina og, ‘Maia ne nanguiba Sungwabug pe blonam el i ahgofife asa ne anwenafefe eba enag el Godna Sungwabugna bu la laitife.’

34 Afa kike ati nangug asa ka nengelim sihinig enag el eba Godna Leg.”

### *Mingnag el Sisasna patalfuiag el apukena*

35 Afa ming osuna Jon afa heafna sambaganigi patalfuiag el gwenanai yi pese afofena.

36 Afa nanguni maia Sisas ikafenaba afa Jon sihina og, “Nangu enag el Godna sipsip luwalig!”

37 Afa sambaganigi enag mo ahiginam asa Sisas nangum sum ahkana.

38 Afa Sisas waikefe nanguagena sambaganigi sum ahblofena asa sahtigina og, “Mangwalim neningi memb ahfeg?” Eheningi esona og, “Rabai hanai yi ne gafife?” (Enag mo ‘Rabai’ Hibruna mona seflig eba tisa.)

<sup>39</sup> Afa ehe sihini og, “Asa ahblo ahnangu.” Eba osuna asa eheningi ahkanam afa heafna kugagim ogfuni. Afa enanai yi enag osuna Sisasim wani ahwagifena.

<sup>40</sup> Afa enag mungu el eba Andru afa ehe Saimon Pitana sumineg.

<sup>41</sup> Afa Andru Sisasim lasunam afa ikagna eteg nangum ikana asa sihina og, “Kaningi Godna Gisfu Fwahag Elim ahnangu.” (Afa Grikna mo enag elim seflig Kraiss.)

<sup>42</sup> Afa ehe Saimonim Sisas nangum wanibluna. Afa Sisas ehem nangunam esona og, “Neana unehlagba Saimon Jonna leg afa ilawo ka nem glaunai unehlag faife eba Sifas.” (Enag unehlag Grikna mo seflig Pita eba fun.)

*Sisas Filip mi afa Nataniel mi uneni*

<sup>43</sup> Afa ming osuna Sisas oningina og ka Galili gam ikafe. Afa ehe Filipim yisigi nangunam asa esona og, “Sa blo kam patal blu.”

<sup>44</sup> Afa Betsaida eba Filip, Andru afa Pita ehengelni kembig feg.

<sup>45</sup> Afa Filip Natanielim yisigi nangunam sihina og, “Autunam Moses heafna nihe mo mungu suialag elim ginofena afa Godna mo fli sihiaule el ehengel gafa gwenag elim ginofena. Afa kagel enag elim ati nangug eba Sisas Josepna leg ehe Nasaretnai el.”

<sup>46</sup> Afa Nataniel esona og, “Ka oningig enag kembig Nasaret mas mangwal suialag pugui.” Afa Filip esona, “Sa blo nangu.”

<sup>47</sup> Afa Nataniel buihia ikafnaba. Afa Sisas Natanielim nangunam maia blofenaba afa esona og, “Hwa elim sa nangu ehe Israelna nihe suialag patalku feg afa heafna mo i nihe i eba nufunam feg.”

<sup>48</sup> Afa Nataniel ehem sahna og, “Haig anwena ne kam fenag?” Sisas esona og, “Afa Filip mas nem puguna asa ne fik li mog la gafena asa ka nem nanguna.”

<sup>49</sup> Afa Nataniel sineminafenam esona og, “Tisa, neba Godna leg afa ne Israelna misog el.”

<sup>50</sup> Afa Sisas esona og, “Ka nem sihinag ka nem nangug asa ne li mog gafena eba weti feg asa ne kam olug oningina. Asa ne kwania kigmog nangufe.”

<sup>51</sup> Afa ehe ming mo sihina og, “Ka nem nufunam sihinig sa ne nangufi heven la nai mengig pigife asa ka Nufunam Elbi gofiba enaig ging lofug afa Godna oflanai el enag mina apaiye gofenam afa pese kwaliafena.”

## 2

*Sisas heafna kigmog lasflam ogfuni*

<sup>1</sup> Afa sambaga sinaini maia ikanaba Sisas heafna patalfuiag elim Galilina bite la apukena afa Kena kembang la auguna. Enanai yi el mungu angwafig flana asa ehem buyis fini. Afa Sisasna afag ehe gafa enag buyis yi blona.

<sup>2</sup> Afa ehengel Sisasim afa heafna patalfuiag elim esogoni og, “Au ambego kagelni buyis la.” Asa ehengel afuiagohna.

<sup>3</sup> Afa maia ehengelni wainbug awaienaba afa Sisasna afag ehem esona og, “Ehengelni wainbug awai.”

<sup>4</sup> Sisas esog, “Mia, magim ne ehengelni kinig mo ne kam sihinag? Hwaba mango kana was mo asa ka kikefum ambala pugufe afa enag osuba meyi fe.”

<sup>5</sup> Afa heafna afag gafugag elim sihini og, “Heafna mo sa nengel patalfu.”

<sup>6</sup> Afa Ju elni nihe enaig fane ahgagim ofibi asa ninga bu la sugum asa ahgag. Afa enwesog la gohug sob muhla folfu fwai yi eba ninga sug sob. Enag sob eba kwaniagig yi enaig dram lofug.

<sup>7</sup> Afa Sisas gafugag elim sihini og, “Hwa sobni bu hefibi.” Asa enag sob sama memtog la pugui.

<sup>8</sup> Asa ehe ehengelim enaig esoni og, “Sa ne weti hefi buyisna alagim faiba sama ne nangui.” Asa ehengel enaig esini.

<sup>9</sup> Afa bu ati wainbug lofena asa bu yisna alag ne nanguna. Afa ehe mas anwenafena mo hanai ehengel flig. Afa gafugag el enam anwenafini afa mas sihini mo. Afa buyisna alag el angwafig asa flag enam awamonam ahkanam,

<sup>10</sup> asa sihiagena og, “Mungwali el enaig esini suialag wainbug gof mageni asa heafna mangau ningag ahgagim afa sumi ehe mingnag wainbug mageni asa enag mas suialag fena mo asa gof mageni. Asa ne fwina suialag wainbug ne kumuhlagim asa glau ne mangofen.”

<sup>11</sup> Afa enag kigmog Sisas gof ogfuna Kenana kembang la Galili provins ehe enaig esena. Afa enag kigmog heafna patalfuiag el ogfuni heafna wasneig eba fwina kwania feg asa ehengel ehem olug oningini.

<sup>12</sup> Afa Sisas, heafna alag i, sumineg i, afa patalfuiag el enag kembang fwahinim asa Kaperneam la mwakwalig augunam asa afuna.

*Sisas Godna kwania lala elim lambaitifena  
Matyu 21:12-13, Mak 11:15-17, Luk 19:45-46*

<sup>13</sup> Afa Ju elni Pasova buyis muhla ofefenaba asa Sisas Jerusalem gam ikana.

<sup>14</sup> Afa ehe Godna kwania lala sefu ikanam nanguna el enanai yi enaig gafugafini kig lambifini afa kau, sipsip, afa



twafig mageagifini. Afa mingnag el angoluwagna kig flifinim afa heafgelni kig mo ehengelim faigofena.

<sup>15</sup> Afa ehe nangunam maia enaig esinibi asa ehem olug kinig fena afa ehe we flanam sisim enana kuguaitifenam asa sis embem apuke afuiaminefena. Afa kig lambig elni sime waikefe kig nahgum labaitifena.

<sup>16</sup> Afa ehe twafig mage elim lagnana og, “Enag lambinam gwesim wanika. Nofeka kana Apina lalam maket lala lofug enaig esi.”

<sup>17</sup> Afa Sisasna patalfuiag el nangunim asa oningini autunam enag Godna mo ginofini eba enaig esog, “Ka oningig Godna lala sama suialag gofi asa enag oningig kana olug yi suwi lofug lagi. Afa ka oningig gwenam mungu fenag.”

<sup>18</sup> Afa Ju el Sisasim lakinini og, “Ne magim enaig eseg. Enaig asa nimbiafna kigmog kagelim ogfuni asa kagel anwenafi God nem sawi fenag nem og enaig ese asa ne enaig eseg.”

<sup>19</sup> Afa Sisas wahigi sihini og, “Afa nengel hwa kwania lala bubugi aitifigba asa ka sambaga mungu osuna pese nimblafe.”

<sup>20</sup> Afa Ju el sihini og, “Atiaho, ne enaig esefe? Afa 46 yia kagelni saglag el hwa lalaba nimblig. Haiseg sa ne esog sambaga mungu osuna ka pese nimblafe?”

<sup>21</sup> Afa enag kwania lalam Sisas esonaba eba heafna eligim esona.

<sup>22</sup> Asa maia ehe lahanaba afa pese buihiana afa heafna patalfuiag el pese oningini enag mo ehe esona. Asa ehengel olug oningig Godna mo buk la gi afa oningig Sisasna mo eba nufunam.

<sup>23</sup> Afa maia Ju elni Pasova buyis ofefenaba Sisas Jerusalem la gafena. Afa el heafna kigmog nanguni asa kaksag el ehem olug oningig.

<sup>24</sup> Afa Sisas ehengelim anwenafenim asa mas muhlafe ni mo.

<sup>25</sup> Afa ehe hefum ati anwenafeg ehengelni oningigim asa amban el mas ehem sihinai.

### 3

#### *Sisas i Nikodemus i mo sihiag ahfena*

<sup>1</sup> Afa mungu el heafna unehlagba Nikodemus eba Ju elni misog el. Afa ehe mingnag Godna mo anwena elim wangafena afa enaig el seflig farisi el.

<sup>2</sup> Afa sinaini ehe Sisasim nangwagim blonam sihina og, “Saglag, kagel anwenafig ne tisa God ehe nem ningihiag. Afa el Godna feg fwainigba asa ehe mas enaig kigmog ogfuni asa ne eseg.”

<sup>3</sup> Afa Sisas sihina og, “Ka nem nufunam sihinag afa el sa pese ikanam ninganai luwal fe fwainigba asa enag el mas Godna bog megam nangui.”

<sup>4</sup> Afa Nikodemus sahna og, “Haisegba asa watiaug el pese ikanam ninganai luwal fefe. Afa ehe mas afagna wula la sefunam asa pese wanigai. Afa el bigel mas enaig esi.”

<sup>5</sup> Afa Sisas pese sihina og, “Ka nem nufunam sihinag afa el asa buna afa Godna Sungwabugni ninganai luwal feg fwainigba eba ehe mas Godna bog megam sefukai.

<sup>6</sup> Afa luwal alagafagna mungu usumu la afohieg eba alagafagna membug la eseg asa luwalna eligim nofkenagag faig. Afa el Godna mungu usumu la afohieg eba Godna Sungwabug eseg asa elni sungwabugim nofkenagag faig.

<sup>7</sup> Nofeka sineminafe ka nem enaig sihifenag sa ne pese ikanam ninganai luwal fe.

<sup>8</sup> Afa Godna Sungwabug eba efef lofug. Afa efef blogim afa el ehena mina mas anwenafeg mo ehe haig blofeg afa hiag ikafeg. Godna Sungwabug enaig eseg asa elim yimieg nofkenagag faig enaig ninganai luwal lofeg.”

<sup>9</sup> Afa Nikodemus ehe mas anwenafena mo asa sahna og, “Haisegba sama enag enaig eseg?”

<sup>10</sup> Afa Sisas og, “Atiaho ne Israelnai elni tisa haisegba ne kana mo mas anwenafeg mo.

<sup>11</sup> Ka nem nufunam sihinag mangwal asa kagel anwenafeg afa nengelim sihigonug afa mangwal asa kagel nangug nengelim sihig asa nengel kagelni mo mas higigonig mo.

<sup>12</sup> Afa ka nem bitenaina lasug mo sihinigba asa heven la nai gawigim ogfunig asa ne mas ena mo higig mo afa ka nem oflanaina mo sihinaiba, sa ne higi? Amo, eba mas ne enam gafa higi.

<sup>13</sup> Afa mas amban el Godna latuim nangug mo, kike mungu. Kaba Nufunam El afa ka enanai yi fwahanam asa hwa bite la pe blog.

<sup>14</sup> Afa ne anwenafeg autunam Moses mwakwal sombine kapa keгна gafugafena asa aga la kikenam sisi yi fingi fena asa amban gih el enam nangwafenaba gih suialafefena. Afa Nufunam Elim gafa kikenam aga sisi yi fingi fifi.

<sup>15</sup> Asa amban el ehem olug oningigba sama wahkig nofenagag fli.

<sup>16</sup> “Afa God mungwali elim fwina membini asa heafna Leg mungu nemug hwa bite la ninghiana. Asa amban el ehem olug oningig sama wahkig nofkenagag fli afa ehe mas awaiye.

17 Afa God heafna legim ningihiana mango kwefihiagegim afa susug fai enaigim blo mo eba awai God ehem ningihiana sama ehe elim kwagani.

18 Afa amban el legim olug oningig afa enag el kwefihiagegim mas kuskufe. Afa amban el enag Godna legim mungu mas olug oninginag mo eba enaig God ehem ati kwefihiageg.

19 Afa enag mina God elim kwefihiageg afa ombusug ati blog asa mungwali elim ambala ogfunig ehengelni auguiagim. Afa el ehe ombusugim mas membinag mo afa heafgelni nihe amtakwalig patalfug asa ehengel og ka sa sikulufeg la afohiefim.

20 Afa el amtakwaligim esig ehe ombusugim mas membeni asa ombusugim mas muhla feni. Afa ehe enaig esig asa ehengel embefig enag ombusug heafgelni amtakwalig nihe ambala ogfufe.

21 Afa amban el nufunam mo patalku eba ombusug yi go afa ehe mas embefe. Sama enag ombusug heafna gafugagim ambala ogfunai eba Godna membug la ehe enaig eseg.”

### *Jon Sisasna mo ambala sihina*

22 Afa maia enaig esenaba Sisas afa heafna patalfuiag el provins Judia afuna. Enanai yi auguiafenaba asa elim bu la laitigonugini.

23 Afa Jon Aionon kembang la gafna eba Salim muhla go. Enanai yi kaksag buna feg afa el ehem nangugim ambena asa ehe gafa ehengelim bu la laitina.

24 Afa enanam Jon mas kalabus lala gofena mo.

25 Afa mingnag Jonna patalfuiag el Ju elim mo esuni. Afa ehengel Ju elni bula sug nihem sihiageni.

26 Afa ehengel Jonim nangunim asa sihini og, “Tisa, autumn enag mungu elim ne sihina asa Jordan bum magim ne yi ahwagfena. Sa hig, mungwali el enag elim nangum afuiaba asa ehe bu la laitife.”

27 Afa Jon wahigi sihina og, “Mungwali mangwal el asa flag eba God ehem faig.

28 Nengel nimbe ati higig ka nem enaig esoni og, ‘Kaba mango Godna Gisfu Fwahag El mo kaba gof mina esug tola blog.’”

29 Afa Jon enaig lasug mo pese sihina og, “Afa el angwafig flagim ofeba asa heafna hihe buyis numwehiagena. Afa enag hihe mas angwafig flai asa ehe gafugafenagim enag angwafig flag elim ningenago. Afa maia ehe angwafig flag elni mengigim higinam asa sifakalefe. Afa ka ati Sisasna mengigim higinam asa ka gafa gwenais sifakaleg.

30 Afa ka oningig ehe kwaniafeba afa kaba wetifefe.

<sup>31</sup> “Afa el heven lanai blog eba sisi fenig bitenai elim. Afa el bitenai feg ehe bitenai mo sihiagig. Afa el Godna kembang la nai blog ehe mungwalim sisi fenig.

<sup>32</sup> Afa mangwal ehe ati nangug afa higig asa sihinig. Afa el heafna mo higigim asa mas fli.

<sup>33</sup> Afa amban el heafna mo kehlag asa enag ogfunag Godna mo eba nufunam.

<sup>34</sup> Afa enag el God ningihiag eba God ehena Sungwabug ehem mungwali faig asa heafna mo eba Godna mo.

<sup>35</sup> Afa Alag Legim fwina membegim asa mungwali ehena ninga la fwahiag.

<sup>36</sup> Afa amban Legim olug oninginafe ehe ati wahkig nofkenagag flag. Afa amban Legim masig fatig eba mas nofkenagag flai asa Godna ninimu ehenai yi wahkig gofife.”

## 4

### *Sisas Samariana angwafigim mo sihina*

<sup>1</sup> Afa kaksag el Sisasim patalfuna asa bu la laiti fena. Afa mungu mungu Jonim patalfuna afa farisi el enag mo higig.

<sup>2</sup> Afa Sisas ehe mas elim bu la laitina mo eba heafna patalfuiag el elim bu la laitini.

<sup>3</sup> Afa maia Sisas anwenafenaba farisi el enag gafugam mo sihiagini asa ehe Judia provins fwahanam Galili provins pese ikana.

<sup>4</sup> Afa enag mina Galili yi gam ikagba eba Samaria provins la pugunam asa Galili la ika pugug.

<sup>5</sup> Afa ehe Samaria ikafenaba afa Sikar kembang la puguna. Autunam Jekop heafna leg Josep bite faina. Enag kembang hwa bite la muhla feg.

<sup>6</sup> Afa Sisas Jekopna bume la pugunam afa ehena kig ewiauwinasa enanai yi hehefena. Eba osu misosuf gigni.

<sup>7</sup> Afa Samariana angwafig mungu bu efigim blona asa Sisas ehem sahna og, “Kam bu efi fai, kau ne.”

<sup>8</sup> (Afa heafna patalfuiag el kembang gam afuna fane lambigim.)

<sup>9</sup> Afa enag angwafig sineminafena asa ehem sihina og, “Neba Ju el afa ka Samarianai angwafig haisegba ne kam bum sahnag?” (Afa ehe enaig esog asa Ju el mas Samariana enag kaf mungu la ahgai.)

<sup>10</sup> Afa Sisas sihina og, “Ne mas anwenafeg mo mangwal God elim asa esug faig afa kaba amban maia. Afa ne enam anwenafegba afa ne kam bum sahnaiaba asa ka nem nofkenagag bu faife. Enag bu sama wahkig nofkenagag nem fai.”

11 Afa angwafig sihina og, “Saglag, ne sobini mo buba efi yi afa bume eba mungwanam pekag. Hanai yi sa ne enag nofkenagag bu efife?”

12 Kagelni simp Jekop enag bume kukona afa ehe heafna luwaligna afa heafna sisna asa enag bume bu ahgafufena. Ehe enag bume kagelim faig. Atiaho ne oningig ne kwania el asa kagelni simpim Jekop filafeg.”

13 Afa Sisas wahigi sihina og, “Amban ne enag bu negba eba nem pese bu hefefe.

14 Afa amban hwa bu nefe asa ka nem fai eba mas nem pese bu hefei. Afa enag bu el nai yi sefu go enaig bu eba logifife afa mas awaiye eba elim wahkig nofkenagag faife.”

15 Afa angwafig ehem enaig esog, “Saglag, enaig sa kam enag bu fai asa ka mas bu hefei afa pese bloi wanai efi yi.”

16 Afa ehe angwafigim sihina og, “Sa ikanam nimbiafna alagagim wani blu.”

17 Afa angwafig wahigi esona, “Kana alagagba awai.” Sisas sihina og, “Enag moba ne sihigba eba nufunam.

18 Afa ming mo ne sisage afa nufunam nemug autunam ne afala gohug saglag ne lambig afa ilawo sa ne ahwag eba mango neana alagag mo.”

19 Afa ehe Sisasim esona og, “Saglag, ka anwenafeg neba Godna mo fli sihiule el.

20 Kagelni simbianingag enag Samarianai mug gim enaig esog enanai yi kagel sa Godim sahni afa heafna unehlag fingi fi. Afa nengel Ju el enaig esogog kagel Jerusalem la mungu sa enaig esig.”

21 Ehe enaig esog asa Sisas sihina og, “Kana mo higinam sa suialag kehlafe. Autunai la nengel enaig esifi. Ehengel mas enag mug la afa Jerusalem la ambenam asa Apina unehlag fingi fifi.

22 Afa nengel Samaria nai el mas Godim numwehe anwenafig mo asa nengel heafna unehlagim mas suialag fingi fig mo. Afa kagel Ju el Godim suialag anwenafig asa ehem fingi fig. Afa God kagelim Ju elim kano fwatig asa heafna mo ehengelim faig asa enag mina ehe mungwali elim kweafug.

23 Ati meyini ofe afa el mas oningig hanai yi sa Godim fingi fefe afa suialag el ilawo enaig eseg ehe Sungwabug wasneigni afa nufunam nihena Apim fingi fi. Afa God membeg enaig el sama gwenai ehem eseni.

24 God eba suialag sungwabug afa el ogra ehem nufunam ahnai skaufig asa Sungwabug wasneigni afa nufunam oningig Godim fingi fig.”

25 Afa angwafig sihina og, “Ka anwenafeg Godna Gisfu Fwahag El asa blofe (el ehem seflig Kraiss) afa maia ehe bloiba

afa enag el Godna mungwali oningig bigelim sihinig asa ambala ogfunife.”

<sup>26</sup> Afa Sisas sihina og, “Biningi asa sihiag ahfegoba. Eba kike enag el.”

<sup>27</sup> Afa sihiage fegofenaba heafna patalfuiag el ambenam eheningim nangwagini. Afa ehengel oningig Ju elni tisa mas angwafig i mo sihiag ahfei asa ehengel sineminafini. Afa ehengel mas angwafigim sahani mo, “Mango ne membeg?” Afa Sisasim mas sahani mo, “Haisegba ne angwafigim mo sihinag?”

<sup>28</sup> Asa enag angwafig heafna sob fwahanam ikanam kembig la nai elim sihinig og,

<sup>29</sup> “Au ambe elim nangu. Haig haig asa ka eseg enag el ehe kana mo ambala sihig. Atiaho enag el Godna Gisfu Fwahag El maia?”

<sup>30</sup> Asa enag el kembig fwahinim afu Sisasim nanguni.

<sup>31</sup> Afa enanam patalfuiag el Sisasim mengigna esoni og, “Tisa, fane afogwa sa ne.”

<sup>32</sup> Afa ehe ehengelim sihini og, “Kaba kiafna fane ati feg ka ma enag nefe. Afa enag fane nengel mas anwenafig mo.”

<sup>33</sup> Afa patalfuiag el hefum sihiageni og, “Atiame amban el ehem fane flau blu faig me asa ehe mas binilahag mo?”

<sup>34</sup> Afa Sisas esog, “Afa God kam ningihiag asa ka heafna sawiegim patalkug. Kana fane eba enag gafugag esenagim asa heafna gafugam auginefe.

<sup>35</sup> Afa nengelni mo enaig esog, ‘Sambaga sambaga was maia asonai lagnufeba.’ Afa ka nem sihinag Godna aso sa nangu afa enag asonai ati lagnufeg asa lambogefe.”

<sup>36</sup> Afa Sisas lasug mo pese sihina og, “Autunam gafugag el asonai yiwagig afa ilawo mingnag gafugag el ambe asonai lambifi asa ehengel enag gafugag enanam kig lambifi afa enag asonai wahkig gwese afogwafife asa yiwagig el afa lambig el sama eheningi sifakalafei.

<sup>37</sup> Afa kaksag el gwenag mo sihig og, ‘Mungu el asonai yiwageg afa ming el blo lambig.’ Enag mo eba nufunam.

<sup>38</sup> Afa mingnag Godna aso nengel mas yiwagig mo ka nem ningitigiba sa ne asonai lambogi. Mingnag el enag aso kwania gafugafig afa henige feskofeg afa ehengelni gafugag ati nengelim kweafug.”

### *Kaksag Samaria la nai el Sisasim olug onigig*

<sup>39</sup> Afa angwafig kembig la naim sihini og, “Haig haig asa ka eseg enag el ehe kana mo ambala sihig” afa kaksag Samaria la nai el ehena mo higinim asa Sisasim olug oningini.

40 Asa Samaria la nai el ambe ehem mengna sihini og, ne kagelim wanai yi wangagim. Asa ehe sambaga osuna ehengelim wangana.

41 Afa ehe blo sihiagegba afa heafna mo higigim asa kaksag el ehem olug oningig.

42 Afa ehengel angwafigim sihini og, “Autunam ne sihinaba asa neana mo kagel kehli fwiafena afa ilawo kike heafna mengigim higigim asa kagel anwenafig ehe eba enag el ehe mungwali elim kwaganig.”

*Sisas misog elni legim suiala fefatina*

43 Afa Sisas enanai yi sambaga osuna ganam afa fwahanam Galili gam ikana.

44 Afa Sisas hefum enaig esona og, “Godna mo fli sihiule el heafna kembang la nai mas ehem suialafe fli mo.”

45 Afa maia ehe Galili provins pugunaba afa enag kembang la nai el ehem nangunim sifakalini asa maia ehengel Jerusalem la Pasova buyis la afunaba asa ehengel enanai yi heafna mungwali wasneig gafugag nanguni.

46 Afa ehe pese ikanam Kena kembang la pugunam enanai yi ehe asa bum waikafena wain bug lofena. Afa Kaperneam la nai gavmanna misog el Sisas nangum blona. Heafna leg Kaperneam la gihna gifni.

47 Afa ehe higinam Sisas Judia fwahanam pese blog asa Sisasim nangwagim blonam sahna og kana leg lahagim ofe sa ne ikai Kaperneam gam ehem suiala fenagim.

48 Afa Sisas ehem sihina og, “Nengel kam mas nufunam olug oningini mo. Nengel enaig oningifig asa ehe wasneig kigmog kagelim ogfug fwainigba asa kagel ehem mas olug oningini.”

49 Afa gavmanna misog el ehem esona og, “Saglag, auna ikagna ahka kana luwal mas sa lahafe.”

50 Sisas wahigi sihina og, “Seka, neana luwal eba gohugimba.” Afa ehe enag mo higinam asa pese fakafe.

51 Afa meyi minam ikafenaba afa heafna gafugag el ambenam mina la hufininim sihini og, “Neana luwal eba gohugimba mas lahai.”

52 Afa ehe ehengelim sahni og, “Mangigna asa luwalba suialafeg?” Afa ehengel enaig esogona og, “Amu osu misosuf gigni ehem elig liputina.”

53 Afa alag anwenafena amu osu misosuf gigni Sisas kam sihina og “Neana luwal eba gohufe.” Asa ehe heafna mungwali nilitena Sisasim olug oningini.

54 Afa Sisas Judiam fwahanam Galili puguna asa ehe enaig esena hwaba angigieg kigmog ehe ogfuna.

## 5

*Sisas mong lilifeg elim suiala fatina*

<sup>1</sup> Afa ming osuna Ju elni buyis ofefiba asa Sisas Jerusalem gam ikafe.

<sup>2</sup> Afa mengig mungu Jerusalem kembang la go enag mengig eba seflig sipsipna mengig. Enag mengig eba bume bu muhla go. Enag bugig Hibruna mo seflig Betesda afa la gohug afwambag sime enag bum wagifakag.

<sup>3-4</sup> Afa afwambag sime la kaksag gih el enanai yi gofena. Afa enag gih el eba nof etetini afa mong ninga liligna asa auguiafena.\*

<sup>5</sup> Afa mungu el mong lilifegna 38 yia enaig fena.

<sup>6</sup> Afa Sisas ehem nangunam afa anwenafena ehe wahkig gwenai g fena asa ehem sahna og, “Atiaho ne membeg sa ma nem suialafe?”

<sup>7</sup> Afa el sihina og, “Saglag, mas amban kam kweafug mo afa maia bu nekuneku ofeba afa mingnag el goseg afug apaiye go afa kaba awai.”

<sup>8</sup> Afa Sisas ehem esona og, “Sa buhianam kife flanam saika.”

<sup>9</sup> Afa ikagna ehe suialafena afa heafna kife topeske flanam asa ikana. Eba Esug Auguiag Osuna ehem enaig esena.

<sup>10</sup> Asa Ju el enag elim lugini og, “Afa ilawaba Esug Auguiag Osuna nofeka kife flanam asa uku. Afa bigelni nihe mo enaig gafugam kweg.”

<sup>11</sup> Afa el wahigi sihina og, “Hwa el kam suialafenag kam enaig esonag og, ‘Nimbafna kife flanam saika.’ ”

<sup>12</sup> Afa ehengel ehem sahni og, “Amban nem enaig sihifeng-nag?”

<sup>13</sup> Afa enag el mas anwenafeni mo amban ehem suialafenag asa Sisas kaksag el meagam mungwali walagena.

<sup>14</sup> Manige fwainig Sisas ehem Godna Kwania lala la nangonam asa ehem sihina og, “Ei, neana elig ati suialafeg. Sa higi sa ne enaig amtakwalig nihem sa ne fwaha afa ne fwaha fwainigba masa ne fwina susug kwania flafe.”

<sup>15</sup> Afa enag el ikanam asa Ju elim sihini Sisas kana eligim suialafefatig.

<sup>16</sup> Afa Sisas Esug Auguiag Osuna enaig esena asa Ju el ehem kinig faini.

<sup>17</sup> Afa Sisas ehengelim wahigi sihini og, “Kana alag mungwali osuna gafuga fafefe asa ka gafa gwenai g eseg.”

---

\* **5:3-4:** Afa nengiafufena maia bu nekuneku feflaba. Asa el oningig eba ansi mungu Ainiyagna of la nai el bum enaig esefafna afa amban gih el gof ika bu la pefenaba asa hiafna gih suialafefna.



18 Afa Juni misog el Sisasim lagini afa maia enag mo higinibi ehengel Sisasim olug kakagenim og ehem tigibi ma lahai. Afa ehengel og ehe mas Esug Auguiag Osuna nihem patalku mo afa mingam enaig esog God kana alag afa hefum fingi feg og kaba God i mungwalofug.

*Sisas esog kaba Godna leg*

19 Afa Sisas sihina og, “Ka nufunam sihinig, afa Leg mas heafna oningig la enaig esei. Afa Alagna gafugam nangugim afa Leg gwenaiig eseg asa mangwal alag eseg eba Leg gafa enag gafugag eseg.

20 Afa Alag Legim fwina membenag asa ogfunag mungwali mangwal ehe eseg. Glau nengel Godna kigmog ati nangug afa Alag Legim kigmog kwania ogfunagba asa Leg enaig esefe asa nengel sineminafif.

21 Afa Alag enaig fasefe ehe lahag elim fukulag lasug afa wahkig nofkenagag faig. Afa Leg gafa gwenaiig eseg asa heafna membeg ehe ambanim membenag asa nofkenagag faig.

22 Afa Alag ehe mas elim kwefihiage afa kwefihiageg gafugag eba Legna ninga la fwahag.

23 Asa mungwali el sama Legim fingi fi gwenaiig asa Alagim fingi fini. Afa Alag Legim ningihiag asa amban el mas ehem fingi fenag mo eba alagim gwenaiig esenag.

24 “Ka nem nufunam sihinig, amban el kana mo higinim afa Godim olug oninginigbi asa ehe kam ningihiag afa enag el wahkig nofkenagagna feg asa God ehem mas kwefihiagenam susug fai. Afa ehe lahagna mina fwahagim asa nofkenagag mina la go.

25 Ka nem nufunam sihinig, ati muhla feg eba ilawo enag pugufe afa el lahag mina la afo asa Godna Legna mengig higinim asa amban el ehena mengigim ati higinag eba nofkenagag flafe.

26 Afa God elim nofkenagag faig asa ehe nofkenagag mog feg. Afa ehe Legim kigmog faig asa Leg gafa nofkenagag mog feg.

27 Afa Leg eba Nufunam El asa God ehem enaig esona og, sa ne mungwali elim kwefihiagenuge.

28 “Afa enag puguiba asa nofeka kana mo sineminafi. Afa mungwali lahag el biteg kife la afogoku asa Nufunam Elni mengigim higinim,

29 asa heafgelni biteg fe fwahinim apukefe. Afa amban el suialag nihe esena asa buihianam pese nofkenagag flafe. Afa amban amtakwalig nihe esena asa buihianam God ehengelim kufenifi.

*Mingnag mo ogfunag Sisas amban maia*

30 “Kikefum mungu ka mas mangwal enaig esei. God kam sihinag asa ka higigim afa ka kwefihiageg. Ka mas kikeafna sawiegim patalkui eba awai. Afa kam el asa ningihiag ka ehena sawiegim patal fakufe asa kana kwefihiag eba nufunam nemug.

31 “Afa kikeafna mo mungu sihiba kaba amban maia asa enag mo eba mo behig feg.

32 Afa ming el kana mo sihife eba kana mo kweafug. Afa ka anwenafeg heafna mo kam sihinag eba nufunam.

33 Afa nengel elim Jon nangum ningitigina asa afu anwenafi ka amban maia. Afa Jonna mo ambala nufunam sihina.

34 Ka mas oningig elni mo sama kana mo kweafui. Afa ka Jonna mo sihinig asa nengelim kweafug sama nengel amtakwalig mina fwahanam afa suialag mina patalku.

35 Afa Jonna mo lam lofug asa nengelim ombusug faig asa nengel enanam mwakwalig enag ombusugum sifakalig.

36 Afa Alag gafugag kana ninga la fwahanag asa ka enag gafugafe. Asa enag gafugag kana mo kweafug afa ogfug Alag kam ningihiag. Afa Jonna mo eba enaig eseg afa hwa mo eba fwina suialafeg.

37 Afa Alag kam ningihiag afa ehe gafa kana mo kweafug. Afa nengel heafna mengigim mas higi afa heafna eligim mas nangug mo,

38 afa heafna mo mas nengelni oningi la go mo. Asa nengel kam mas olug oningi mo asa ehe kam ningihiag.

39 Afa nengel Godna ginofim ati fahigeflig asa ne enaig esogog afa ka enag mogim anwenafeba ehe kam wahkig nofkenagag faife. Afa enag ginof kam sihinag afa kam ogfunag kike amban maia.

40 Eba sihig ka elim nofkenagag faife asa nengel yiskosig kam patal ambegim.

41 “Afa maia el kam fingi figbi asa ka mas enam fwina oninginai.

42 Afa ka ati anwenafenig nengel mas Godim nufunam membenig mo.

43 Afa ka Alagna unehlag la blog asa nengel kana mo mas kehlig mo afa ming el heafna unehlag la mungu bloiba asa nengel heafna mo kehlifi.

44 Afa nengel laskuhlagim nembefum fingi fig asa enam sifakali. Afa nengel mas oningi God mungu sama kagelni unehlagim fingi feni asa mas kam olug oningini.

45 Nofeka enaig oningifi haig haig amtakwalig nihe sa ne esig asa ka Godna nof la nengelim kufinife eba awai

eba Moses ehe enaig eseg. Nengel oningini Mosesna mo nengelim kweafug asa enag mo nengelim kufinig.

<sup>46</sup> Afa Moses kam ginofenag afa nengel nufunam Mosesna mo patalfuibi asa kana mo gafa nengel patal ambefe. Afa nengel mas enaig esig mo.

<sup>47</sup> Afa Mosesna ginofim nengel mas kehlig mo. Haisegba nengel sa kana mo kehlifi?"

## 6

*Sisas 5,000 elim fane faini*

*Matyu 14:13-21, Mak 6:30-44, Luk 9:10-17*

<sup>1</sup> Afa mingnag osu fwahanam Sisas Galili bu la pugunam asa bot yi ehengam maligim ikana. (Galili bu ming unehlagba Taiberius.)

<sup>2</sup> Afa el heafna kigmogim nanguni maia gih elim suialafetifenaba asa kaksag el ehem patalfuna.

<sup>3</sup> Afa Sisas mogim kukanam afa heafna patalfuiag elim wangafena.

<sup>4</sup> Afa enanam Ju elni Pasova buyis muhla ofefenaba.

<sup>5</sup> Afa Sisas nof fiagena afa nangwagena kaksag el ehem nangugim ambena asa Filipim sahna og, "Hanai sa bigel fane flinim hwag kaksag elim faigoiba sama ahgai?"

<sup>6</sup> Afa ehe enaig esog ka Filipna oningig yuhna maia haig sihi ofefiba. Afa Sisas ati ehe anwenafeg ehe enag fane faife.

<sup>7</sup> Afa Filip ehem wahigi sihina og, "Afa ka gug la gohug was gafugafegba asa kig flag afa enag kigna ka stoa nai aba flig. Afa enaig aba mas ehengelim ihlafenig mo."

<sup>8</sup> Afa ming patalfuiag el Saimon Pitana sumineg Andru kwablog luwalim nangunam asa ehe enaig esog,

<sup>9</sup> "Hwa kwablog luwal afa la gohug aba sagig weti lambina afa sambaga sawag weti lambtigina. Afa enag fane mas kaksag elim ihlafenig mo."

<sup>10</sup> Afa Sisas enaig esona og, "Sihigonibi sama apaiye augui." Enanai yi kaksag pos go asa 5,000 saglag enanai yi apaiye auguna.

<sup>11</sup> Afa Sisas enag aba sagig flanam asa Godim sahna og eba suialag. Afa ehe koskofenam asa el apaiye augug enag elim mangegoni. Afa ehe sawagim gwenaig esena. Afa mungwali ahgagininim ihla feskofena.

<sup>12</sup> Afa maia enog feskofenaba ehe patalfuiag elim sihini og, "Asa afu lamb enag fane el mas ahgag mo masa lambaitifibi awaife."

<sup>13</sup> Afa ehengel angogoli lambinam afa 12 pela sob yi aitini. Afa Sisas afa la gohug aba sagig koskofena afa mungwali ahgagini asa angogoli sob yi aitini afa memto la puguna.

14 Afa el enag kigmog nanguni afa enaig esogona og, “Autunam Moses sihi fwahana og Godna Mo Fli Sihiaule El hwa bite la blofe. Atiaho nufunam enag el asa blona.”

15 Afa Sisas ehengelim ati anwenafeni ehengel ogna Sisasim kehlinim asa bigelni misog el goni. Asa ehe lasanam asa hefum mog gam pese ikana.

*Sisas bu sisi yi blofena*

*Matyu 14:22-33, Mak 6:45-52*

16 Afa osupefenaba afa Sisas mas blona mo. Asa heafna patalfuiag el Galili bu blugim afunam.

17 Afa ehengel bot la augunam asa Kaperneam gam bu kwania mina afuna. Afa siokifi fenaba ehengel meyi bot yi afuiafenaba Sisas mas ehengelim ulambina mo.

18 Asa bifwat blonam afa buum waike waikefena.

19 Afa bot meyi enwesog la gohug kilomita olyi bu la gofena asa ehengel Sisasim nanguni maia bu sisi yi ehengelim nangwagigim blofenaba. Asa ehengel fwina embefini afa kig kilafeskofena.

20 Afa Sisas ehengelim esoni og, “Nofeka embefi eba kikeba.”

21 Asa ehem awamoni afa ehe bot yi kukaganam afa gwenanam enag bot ikagna bu blug yi ika puguna mina la asa ehengel membeni.

*El Sisasim yisigiafufini*

22 Afa Sisas elim fane asa faini enanai yi ehengel askanam leana buihia gafenam afa ehefum sawagini og, “Sisas hanai yi maia?” Afa ehengel anwenafini ehe mas heafna patalfuiag el wankai afa ming bot awai.

23 Afa mingnag Taiberius la nai bot ambenam enanai yi apukena. Afa enanai yi Sisas Godim sahnam og, eba suialag asa fane mungwali elim faini.

24 Afa ehengel anwenafini og Sisas i afa heafna patalfuiag el i wanai yi mas go mo. Asa ehengel bot yi Kaperneam gam afunam Sisasim yisigi afuna.

*Sisas lasug mo sihi kaba aba lofug*

25 Afa ehengel bot la afunam ehengam maligim apukena. Afa Sisasim enanai yi nangunim asa sahini og, “Tisa, wanai yi ansi ne blona?”

26 Afa Sisas wahigi sihini og, “Ka nem nufunam sihinig, ka nengelim aba sagig faini afa ne ahgagim asa ne enam membiligim asa kam ambe yisigig. Afa nengel kana kigmogim mas numwehe anwenafig mo asa ka ofug.

27 Nofeka bite nai fanem fwina oningini eba enag nogife. Afa nengelni oningig sa ne nofkenagag fanem oningini sama

nengelim wahkig nofkenagag fai. Afa God kana Alag kam kanog fwahag asa ka heafna gafugag esenag asa enag fane Nufunam El nengelim faife.”

28 Afa ehengel ehem sahni og, “Mangwal gafugag asa ka Godim esinifi?”

29 Afa Sisas wahigi sihina og, “Enag el asa God ningihiag sa ne ehem olug oningini. Afa enaig eba Godna gafugag.”

30 Afa ehengel enaig esogog, “Mangwal kigmog kagelim ogfunifi asa kagel enam nangunim nem olug oninginifi. Mangwal sa ne esefe?”

31 Afa maia bigelni simbianinga bite behig la auguiafenaba afa aba ahgana eba seflig mana. Afa Godna mo enaig sihifeg, ‘Ehe ehengelim of la nai aba faini asa ahgana.’ ”

32 Afa Sisas sihina og, “Ka nem nufunam sihinig. Enag aba Moses bigelni simbianingam faini eba mango nufunam of la nai aba mo. Afa kana Alag asa nengelim nufunam of la nai aba faig.

33 Afa Godna aba eba enag el asa of la nai pe blog asa bite nai elim nufunam nofkenagag faig.”

34 Afa ehengel sahni og, “Saglag, enaig sa ne kagelim enag aba wahkig mange gonigofim.”

35 Afa Sisas sihina og, “Enag aba ka nengelim sihinig eba kike. Ka elim wahkig nofkenagag faig. Afa amban ne kam nangum bloiba mas pese binilahi. Afa amban ne kam olug oningiba mas pese bu hefei.

36 Afa ka nengelim sihinig nengel kana kigmog ati nangug afa mas ne kam olug oninginig mo.

37 Afa mungwali el kana Alag kam faig afa enag el ka nangum ambegofe. Afa amban enaig esefe asa kam olug oningini ka ehengelim mas lugini eba awai.

38 Afa ka mas kikeafena oningim patalkui. Eba el kam heven la nai ningihiag asa ka blogim heafna sawiegim patalkui.

39 Afa ehe kam ningihiagim og, ‘Ka elim neana ninga la fwatife asa ne ehengelim nangwaghiagofim masa mungu awaife. Afa maia kwefihiageg osuna puguiba asa ne ehengelim biteg fenai ihlaftigi.’

40 Afa mungwali el Godna Leg nangum ambefe afa ehem olug oningini asa kana Alag membeg enag el wahkig nofkenagag flig. Afa kwefihiageg osuna asa ka ehengelim ihlaftiginam nofkenagag faife.”

41 Afa Sisas esona og, “Kaba heven la nai aba.” Asa Ju el enag mo higinim afa hefum memtog mona sihiagini.

42 Afa ehengel enaig esogog, “Ati big anwenafig eba Sisas Josepna leg ehe el feg. Big anwenafig heafna alag mi afag

miba. Haisegba ehe enaig esog ‘Ka heven la nai pe blog?’ Enag mo mas suialafeg mo.”

<sup>43</sup> Afa Sisas sihina og, “Afwai, nofeka nimbefum memtog mona sihiagefufum.

<sup>44</sup> Sa higi, afa el ehe mas kam patal blui eba kana Alag ehem awamonam asa ka nangum wani bluiife. Afa ka kwefihiageg osuna ehem ihlafufe.

<sup>45</sup> Afa amban el kana Alagna mo higinim afa heafna mo kehlig asa enag el ka nangum ambefe. Eba enaig Godna mo fli sihiaule el asa ginofini og, ‘God ehe mungwali elni tisafefe.’

<sup>46</sup> Nofeka nengel oningifi kana mo enaig esog el kana Alagim nangug. Mungu el ehe kana Alagim ati nangug eba enag el God i ahwagfena asa ehem ningihiag.

<sup>47</sup> Ka nem nufunam sihinig amban el kam olug oningig asa enag el wahkig nofkenagag flag.

<sup>48</sup> Kaba enag aba asa elim nufunam nofkenagag faig.

<sup>49</sup> Nengelni simbianinga bite behig la mana ahganam asa mas nofkenagag flini mo afa watiaug feskofenam asa pigina.

<sup>50</sup> Enag aba mango mana lofug mo. Eba heven la nai aba afa el enag ahnagaiba asa ehengelim mas pigi.

<sup>51</sup> Eba kike enag heven la nai aba. Afa el enag aba neba asa ehenai yi wahkig nofkenagag gofife. Enag aba eba kana elig. Afa ka kiafna elig bite nai elim faig asa bite nai el sama nofkenagag fli.”

<sup>52</sup> Afa Ju el hefum mo soagini afa enaig esogona og, “Haisegba sonag el heafna elig bigim faife asa big enag ahgafe?”

<sup>53</sup> Afa Sisas ehengelim sihini og, “Eba nufunam feg afa ne Nufunam Elni elig i afa heafna taf i fli fwainigbi afa nofkenagag mas nengelni go mo.

<sup>54</sup> Afa ne amban kana elig i afa taf i neba asa wahkig nofkenagag ehenai yi gofife. Afa kwefihiageg osuna asa ka ehengelim ihlafo tiginam nofkenagag faife.

<sup>55</sup> Afa kana elig eba nufunam fane afa kana taf eba nufunam bu.

<sup>56</sup> Afa ne amban kana elig i afa taf i neba eba ehe ka i ahfeg afa ka ehe i ahgofife.

<sup>57</sup> Kana Alag nofkenaga afa ehe kam ningihiag asa heafna wasneig kam nofkenagag fai. Asa amban kam ne ba asa kana wasneig ehem nofkenagag faife.

<sup>58</sup> Afa enag aba of la nai blog eba mango mungwa lofug aba mo asa nengelni simbianinga ahgana afa sum yi pigina. Afa amban ne enag aba neba eba ehe wahkig nofkenagag flafe.”

<sup>59</sup> Sisas hwa mo sihini laskuhlag lala Kaperneam la.

*Kaksag el Sisasim patalfuiagim oksig*

<sup>60</sup> Afa kaksag el Sisasim patalfuiaule hwa mo higinim afa esogona og, “Enag mo bigel mas numwehe anwenafi. Amban sa enag moba kehlafe?”

<sup>61</sup> Sisas ehe ati anwenafena mingnag el ehem asa patalfuna hefum memtog mona lagwagini asa ehengelim enaig esoni og, “Atiaho hwa mo nengelim kinig faig?”

<sup>62</sup> Mangwal kinig sa ne flifi afa ne nanguibi Nufunam El of gam pese kwakofiba asa ehe enanai blona.

<sup>63</sup> Godna Sungwabug nufunam nofkenagag elim faig. Afa elni elig mas elim kweafui. Afa mo ka nem sihinag enag mo sama nengelni sungwabugum kweafui afa nufunam nofkenagag nem faifi.

<sup>64</sup> Afa nengel mingnag kana mom mas onigini.” (Afa ilawanam Sisas ati anwenafeg amban mas ehem oniginig mo afa amban el asa ehem angoluwagna ninga la fwahafe.)

<sup>65</sup> Afa Sisas pese sihini og, “El mas kam onigig mo enagba mog feg autunam ka nem sihina kana alag elim wasneig faig fwainig ba afa enag el ka nangum mas bloi.”

<sup>66</sup> Afa kaksag el Sisasim patalfuna afa enag mo higinim asa Sisasim fwahinim mas pese patalfuna mo.

<sup>67</sup> Afa Sisas heafna 12 pela patalfuiag elim sahana og, “Nengel gafa ne kam fwai yi me?”

<sup>68</sup> Afa Saimon Pita enaig sihifena og, “Ainiyag amban nangum ka sa afunam asa patalfufe. Neana mo mungu bigelim wahkig nofkenagag faig.

<sup>69</sup> Afa kagel olug onigig afa anwenafig neba afsug kabag el God nem ningihiag.”

<sup>70</sup> Afa Sisas sihina og, “Ka kike nengelim 12 pela elim kanognig afa el mungu nengel nai yi asa go eba Satanna gafuga esefe.”

<sup>71</sup> Enag mo eba Judasim sihinag. Ehe Saimon Iskariotna leg. Afa eheba Sisasna patalfuiag el fena asa Sisasim angoluwag elni ninga la fwahafe.

## 7

*Sisas afa heafna sumineg*

<sup>1</sup> Afa Sisas esenam asa Galili gam wagiakafena. Afa Ju elni misog el ogna Sisasim tigi asa ehe Judia gam ikagim oksina.

<sup>2</sup> Afa Ju elni kogma lala buyis muhla ofefenaba,

<sup>3</sup> asa Sisasna nilite ehem sihina og, “Sa ne hwa kembang fwahanam Judia gam ikai asa neana patalfuiag el sa ma neana kigmogim nangui.

<sup>4</sup> Afa el hefum ambala ogfuba enag el mas heafna gafugag meagam kumhlai. Sa ne enag eseba sa ma mungwali el nem anwenafeni.”

<sup>5</sup> Afa heafna nilite enaig esoni asa ehengel gafa mas Sisasim olug onigini mo.

<sup>6</sup> Afa Sisas ehengelim sihina og, “Kana was meyi fe afa nengel nimbafgelni membug la sa afuiago.

<sup>7</sup> Afa bite nai el nengelim mas lagini goni, afa kaba ehengelni amtakwaligim sihiageba asa kam olug kakagfini fi.

<sup>8</sup> Kaba mas glaba ikai kana was meyi fe afa nengel buyis gim sa afuiago.”

<sup>9</sup> Afa Sisas enaig sihifenam afa hefum mo Galili la gafna.

*Sisas buyis nangwagim sum ikana*

<sup>10</sup> Afa Sisasna nilite gof afunaba afa ehe gafa sum fakafe. Afa ehe mas ambala puguna mo afa ehe elni megam seaifu fiakafena.

<sup>11</sup> Afa Ju elni misog el buyis la ehem yisgiafofena og ka ehem nangu asa sahini og, “Sonag el hana yi maia?”

<sup>12</sup> Afa mungwali el hefum behe mona Sisasna mom sihiagini. Mingnag el esogona, “Eheba suialag el.” Mingnag el esogona, “Amo, ehe mungwali elim mwakwalenigule.”

<sup>13</sup> Afa mungwali el Ju elni misog elim embefini asa sagmonam hefum behe mona enaig sihifini.

<sup>14</sup> Afa buyis ati olyi ofefnaba asa Sisas Godna kwania lala ikanam elim mo sihinug fafefe.

<sup>15</sup> Afa Ju elni misog el Sisasna mo higinim sineminefinim afa hefum esogona og, “Hanai sonag elbi kwania onigiba flana ehe mas skul yi ikana mo?”

<sup>16</sup> Afa Sisas sihina og, “Enag mo ka nem sihinig mango kiafena mo mo, eba awai. El kam ningihiag eba ehena mo ka nem sihinig.

<sup>17</sup> Afa amban membeg Godna sawiegim patalkuia gofiba afa enag el eba anwenafefe mo sa ka sihig Godna me awai kiafna me.

<sup>18</sup> Afa amban el heafna onigig la sihiageg oga hefum fingifeg. Afa el ming elni unehlagim fingifegba asa ehem ningihiag afa heafna moba eba nufunam afa enag el mas mwakwale.

<sup>19</sup> Afa nengel ati anwenafini Moses Godna nihe mo nem faini afa nengel mas enag nihem patalfuna mo. Mangigim ne kam ona tigi?”

<sup>20</sup> Afa el esogona og, “Sanel amtakwalig ne nai yi go asa ne onigig etet el lofeg asa ne enaig sihifeg. Amban el ona nem tigi?”



<sup>21</sup> Afa Sisas sihina og, “Ka mungu kigmog Auguiag Osuna esebe afa ne iskofakifi.

<sup>22</sup> Afa nengel enaig esig Auguiag Osuna ne fangonai luwalna elig lofug koflig asa ne Mosesna nihe mo patalfug. (Afa Moses mas gof enaig esena mo afa nengelni simbianinga autunam enaig esini.)

<sup>23</sup> Afa Auguiag Osuna ne enaig esigbi luwalna lofug weti koflifatig ne og kagel mas Mosesna nihe mo filafati mo. Haigseg ba ne kam laginig maia gih elim ati ka suialafatig Auguiag Osuna.

<sup>24</sup> Nofeka nofugna behig kwefihiage afa ne nufunam mogim nangonam sa ne kwefihiage.”

*El enaig esogona atiaho Sisas Godna Gisfu Fwahag El me*

<sup>25</sup> Afa mingnag Jerusalem la nai el hefum enaig esogona og, “Atiaho enag el maia asa misog el ona tigi?

<sup>26</sup> Sa nangu, Sisas ambala moaba sihiago fenaba afa mas amban ehem haig esoni mo. Atiaho misog el onigig ehe Godna Gisfu Fwahag el me?

<sup>27</sup> Afa maia Godna Gisfu Fwahag el bloi ba bigel mas heafna kembig anwenafi afa bigel ati anwenafig Sisas hanai maia blog.”

<sup>28</sup> Afa Sisas Godna kwania lala gafenaba afa fwina sihinugena og, “Ei, ne kam anwenafinifi eba kana kembig gafa ne ati anwenafig. Afa ka mango kikeafna wasneigni blo mo, awai. Afa el nufunam onigigna feg asa ehe kam ningihiag. Afa ne mas ehem anwenafinig mo.

<sup>29</sup> Afa ka ehem ati anwenafenag afa ka ehe i awagigim enag kam ningihiag asa ka blog.”

<sup>30</sup> Afa Sisas enaig esonaba asa el ona ehem ningana kehli afa ehem tigid was meyi fiahfenaba asa mas amban enaig esena mo.

<sup>31</sup> Afa kaksag el Sisasim olug onigig flinim enaig esogona og, “Afa hwa el asa kaksag kigmog ogfug eba Godna Gisfu Fwahag el gwenai e sefe.”

*Misog el anwasag elim ningitigini*

<sup>32</sup> Afa farisi el enag sagmona mo higinim asa ehengel i afa misog pris i anwasag elim ningitigini afu Sisasim kehli.

<sup>33</sup> Afa Sisas sihina og, “Ka nengelim mwakwalig wan-ganam afa ka elim nangwagim ikafe asa kam ningihiag.

<sup>34</sup> Afa ne kam yisgifi afa mas ne kam nangui asa kembig ka ga ne mas bloi.”

<sup>35</sup> Afa Ju elni misog el hefum sihiagini og, “Ehe asim ikafe asa ehem mas big nangui? Atiaho enaig ese me? Afa ehe afwambanai elni kembig gam ikanam asa ehengelim mo sihinugefe afa enanai yi Ju el auguia.

36 Ehe enaig esog 'Ne kam yisigifi afa mas ne kam nangui' afa ming mo esoni 'Kembig asa ka ga ne mas bloi.' Afa enag mo ka mas anwenafig mo ehe mangwalim esog?"

*Bu nofkenagag feg*

37 Afa buyis osu buswagin meyi ofefenaba eba kwania osuna fena. Afa enag osuna Sisas buhianam fwina esona og, "Amban el ne bu hef fegba sa ne ka nangum blonam bu ne.

38 Afa Godna mo enaig esog afa amban kam olug oniginafe afa nofkenagag bu ehe nai yi logofife enaig fun bu lofug."

39 Afa hwa mo enaig esog Godna Sungwabug enaig esefe amban asa Sisasim olug onigina asa ikanam ehe hwagfife. Afa enanam Sisas mas pese heven gam kukana mo afa kwania unehlag flagim asa enanam God heafna Sungwabug elim mas faini mo.

*Afa el hefum mungu mungu kokohiagin afwiaminefena*

40 Afa mingnag el hwa mo higinim esogona og, "Sonag el eba nufunam Godna mo fli sihiaule el!"

41 Afa mingnag el sihini og, "Eheba Godna Gisfu Fwahag el!" Afa mingnag el enaig esog, "Amo, Godna Gisfu Fwahag el mas Galili nai bloi.

42 Afa Godna mo enaig esog Godna Gisfu Fwahag el eba Devitna simbianinga afa ehe Betlehem la afag wanigefe Devitna kembig la."

43 Asa el Sisasim sambaga onigig flinim asa hefum mungu mungu kokohiaginim asa afwiaminefena.

44 Afa mingnag el ona Sisasim kalabusimini afa mas amban el ehem kehlini mo.

*Ju elni misog el mas Sisasim olug onigini mo*

45 Afa anwasag el gwenag pese ambena. Afa misog pris i afa farisi el i ehengelim sahtigini og, "Haisegba ne ehem mas wanig ambeg mo?"

46 Afa anwasag el wahigi sihini og, "Afa heafna mo al-ganam feg mas bigel i amban enaig feg mo."

47 Afa farisi el ehengelim lagigoni og, "Atiaho ehe nengelim gafa mwakwal fafenife asa ne ehem patalfug?"

48 Afa ne ati anwenafini kagel farisi el afa misog el heafna mom mas higinig mo. Kagel Mosesna nihe mo patalfug.

49 Afa enag kaksag el Mosesna nihe mo mas anwenafini mo asa ehe mungwali elim mwakwalini. Eba God ehengelim amtakwale klaitife."

50 Afa mungu farisi el Nikodimus ehe autunam Sisasim ati nanguna asa mingnagim esoni og,

<sup>51</sup> “Bigel nofeka ehem munum sehini afa bigelni nihe mo enaig eseg ilawo bigel sa elni mom higinim asa anwenafi ehe ati mangwal eseg me.”

<sup>52</sup> Afa ehengel Nikodimusim laginini og, “Atiaho ne gafa Galili nai el? Sa ne pese ikanam Godna mo ugwe fahigiafla asa ne anwenafe Godna mo fli sihiaule el mas Galili nai bloi.”

<sup>53</sup> Afa ehengel enaig esinim afa lala gam afuaminefena.

## 8

### *Angwafig aga fatiaule*

<sup>1</sup> Afa Sisas Oliv mug gam kukana.

<sup>2</sup> Afa leana gubi Godna kwania lala gam ehe pese ikana. Afa kaksag el ehem muhla laskuhlagunam asa ehe peganam mo sihinugiaufna.

<sup>3</sup> Afa nihe mo anwena el i afa farisi el i angwafig aga fatiaulem wani ambenam asa ehem enaig esini mungwali elni nof la blu gona lasunim.

<sup>4</sup> Afa ehengel Sisasim sihini og, “Hwa angwafig kagel ati kike nangug ehe ming saglagim patalkug.

<sup>5</sup> Afa Mosesna nihe mo bigim wasneig mo faig. Sa big enaig angwafigim funna tawagi sa ma lahai. Afa ne haig esofe? Asa bigel mango fifi?”

<sup>6</sup> Afa ehengel Sisasim ona yuhni asa enaig mo ehem sihinim asa ehem kufini. Afa Sisas peskafenam ningana bite la ginofena.

<sup>7</sup> Maia ehengel ehem sahnafufnaba ehe buihianam ehengelim sihini og, “Amban nengeli nai mas mangwal amtakwalig eseg mo asa enag el sa ma funna gof tigidati.”

<sup>8</sup> Afa Sisas pese peskafenam ningana bite la ginofena.

<sup>9</sup> Maia ehengel hwa mo higinim asa mungu mungu Sisasim fwahinim afuaminefena. Saglagig enag mo gof afuna afa luwal kwablog sum fafufena. Afa maia ehengel mo enaig esinibi afa enag angwafig Sisas i ahgofena.

<sup>10</sup> Afa ehe buihianam angwafigim sahana og, “Ei, hanai yi elbi afohie? Atiaho mungu elbi go asa nem kufenafe?”

<sup>11</sup> Afa ehe wahigi sihina og, “Saglag, mungwali el awai.” Afa Sisas esona og, “Ka gafa nem mas kufenai. Seka, nofeka amtakwaligim pese enaig ese.”

### *Sisas elim ombusug faig*

<sup>12</sup> Afa Sisas mungwali elim pese sihina og, “Ka kike enag ombusug hwa bite la feg. Amban el kam patal oblofiba enag ombusug nanguiba asa enag ehem nofkenagag faife afa ehe mas sikulufeg la wagigofi.”

13 Afa farisi el ehem sihini og, “Ne nimbefum sihiageg afa nimbafena onigig la mungu sa ne sihig. Neana mo mungu mas kagelim ogfunig mo eba nufunam me awai awai me?”

14 Afa Sisas sihina og, “Ka anwenafeg kike hanai blog afa asim ka ikafe asa ka kikefim sihiageba enag mo eba nufunam nemug. Afa nengel enam mas anwenafig mo.

15 Afa nengel nimbeafgelni onigig la elim kwefihiagig. Afa ka mas elim kwefihiagei.

16 Afa ka elim enaigba esofenifiba afa kana kwefihiageg eba nufunam feg asa mango kable mungu eseg mo. Afa alag kam ningihiag asa ehe ka i hawag.

17 Afa nengelni nihe mo enaig esog afa maia sambaganigi el mungu mo ahsihiba eba nufunam.

18 Afa ka kikefim sihiageg afa alag kam ningihiag ehe gafa kana mom ati sihig.”

19 Afa ehengel Sisasim sahini og, “Neana alag hanai yi maia?” Afa Sisas wahigi sihina og, “Ne kam mas anwenafinig mo, eba kana alagim gafa ne mas anwenafig mo. Afa ne kam ati anwenafinibi eba kana alagim gafa ne anwenafinig.”

20 Afa Sisas enaig esona Godna kwania lala meg la afa enag lala meg asa kig lambigim Godim fakig fwaihiag. Afa el mas ehem kehlinim tigrini mo asa enag osuna ehem enaig esigim mahim fiahfena.

### *Sisas sihig ehe heaven la nai el*

21 Afa Sisas ehengelim pese sihina og, “Ka ikafe afa ne kam yisiginim mas ne kam nangui. Afa ne haig haig fiahkan asa maia ne lahaiba nengelni amtakwalig nengelni gofufe. Afa ka ikafe asa ne enanai yi mas ne bloi.”

22 Afa Ju elni misog el hefum sihiagini og, “Haig esegba ehe enaig sihifeg ka ikafe asa ne enanai yi mas ne bloi? Atiaho ehe hefum tige fati me?”

23 Afa Sisas sihina og, “Ka sisi yi nai el afa nengel skaugu nai el feg. Nengelni niheba bite nai feg afa kana nihe mango bite nai mo.

24 Asa ka nem enaig sihifenig afa maia ne lahaiba nengelni amtakwalig nengelni gofufe. Ka nem ati sihinig kaba amban maia afa ne enam olug onigig fwainigbi eba enag nengelim nufunam esenife.”

25 Afa ehengel sahini og, “Kagelim sihini ne amban maia?” Afa ehe sihini og, “Enag mo ka nem gof sihini eba gwenai mo ka nem sihinife.

26 Ka mo nup feg asa nengelim kufunigim. Afa el kam ningihiag eheba nufunam feg. Mangwal mo ehe sihig asa ka higigim enag mo mungu ka hwa bite nai elim sihinigofufe.”

27 Afa ehe alagna mo sihinugena afa ehengel enag mo mas anwenafini mo.

28 Asa Sisas enaig sihifeni og, “Maia nengel Nufunam elim li katigeg la fingi fi kahlibi afa enanam ne anwenafifi ka kike amban maia asa ka nem ati sihinig. Afa enanam ne anwenafini ka mas kikeafna onigig patalkui. Alag kam asa sihinag enag mo mungu asa ka sihig.

29 Afa ehe kam ningihiag asa ehe ka i ahwag. Mangwal sa ka anwenafeg asa ehem sifakal faig enag mungu ka enaig eseg asa ehe kam mas fwai ikai.”

30 Afa kaksag el enag mo higinim asa Sisasim olug onigini.

*Abrahamna nufunam simbianga amban maia*

31 Afa Ju el Sisasim olug onigig fini asa Sisas ehengelim enaig sihifeni og, “Nengel kana mo higinim patalfuiba asa nengel kana patalfuig el nufunam fig.

32 Afa enaig esigbi ne nufunam mo anwenafifi afa mangwal nengelim kikeg asa enag nufunam mo nengelim esug pigi fwatifi.”

33 Afa ehengel sihini og, “Bigel Abrahamna simbianga afa mingnag el bigim mas kikegoni. Haig esegba ne esog nengelim esug pigi fwatifi?”

34 Afa Sisas sihini og, “Eba nufunam feg amban el amtakwalig nihe eseg asa amtakwalig nihe ehem kikenagim afa enam ahnai skaug fenag.

35 Afa esug gafugag el misog elim ahnai skaug fenag afa ehe mas misog elim wahkig wanga fi. Afa luwalig humonigim wahkig wanga.

36 Asa Godna leg nengelim esug pigi fwatifeba asa nengelim nufunam nemug fwatife.

37 Ka anwenafeg nengel Abrahamna simbianga afa nengel kana mo mas flig mo asa nengel oga kam tigi.

38 Afa kana Alag kam mangwal ogfunag asa enag ka nem sihinig. Afa mangwal nengelni alag nem ogfunig asa nengel enaig esig.”

39 Afa ehengel enaig esogona og, “Kagelni simp eba Abraham.” Afa Sisas esona og, “Nengel Abrahamna simbianga nufunam fegba asa nengel gafa heafna nihem gwenag esi.

40 Afa God kam sihinag asa ka higigim enag nufunam mo ka nengelim sihinugegofife afa nengel oga kam tigi. Abraham mas enaig esena mo.

41 Afa nengel gwenag esig asa nengelni alag esena.” Afa ehengel enaig esogona og, “Kagel mango mina luwal mo. God ehe kagelni Alag.”

42 Afa Sisas ehengelim sihini og, “Afa God nengelni alag nufunam fefe nengel kam membenife asa ka ehem fwa-hagim enag ka blog. Ka mas kikeafna onigig la bloi ehe kam ningihiag.

43 Haisegba nengel kana mo mas anwenafinig mo? Eba enaig nengel kana mo fligim mas membigo mo.

44 Satan eba nengelni alag asa ne membigo heafna gafugam esig. Afa autunam nemug ehe elim tigeule afa mungwali nufunam mo ehe mas fatig afa nufunam mo ehenai yi mas go mo. Afa Satan mwakwal el asa mwakwal elni alag feg. Afa maia ehe mwakwal mo sihigba ehe sifakaleg asa enag nihe ehem mog feg.

45 Afa nengel kana mom mas onigig mo asa kana mo eba nufunam feg.

46 Afa mas amban el kana amtakwaligim ambala pugu sihi. Afa ka nem nufunam sihinig haisegba kana mo nengel mas onigig mo?

47 Afa amban Godna el fefe enag el Godna mo higife. Afa nengel mas Godna el fig mo asa enag mo nengel mas membigo mo.”

### *Sisas hefum sihina*

48 Afa ehengel Sisasim sihini og, “Kagelni moba nufunam feg asa kagel enaig esogog neba amtakwalig Samaria nai el afa sanel amtakwalig neanai yi go.”

49 Afa Sisas wahigi sihini og, “Ka sanel awai. Ka kikeafna alagim fingi feg afa nengel kam pigapego.

50 Ka mas kiafna unehlagim fingi fei. Afa God kana unehlagim fingi fena afa ehe mungwali elim kwefihiageg.

51 Eba nufunam feg amban sa kana mo kehlag enag el mas lahai.”

52 Afa Ju elni misog el enaig esogona og, “Glau kagel ati anwenafig sanel neanai yi go! Autunam Abraham lahana afa Godna mo fli sihiaule el gwenag esini afa ne enaig sihifeg el kana mo kehlife ehe mas lahai.

53 Bigelni simp Abraham ati lahana haisegba ne onigig ne ehem filafeg? Godna mo fli sihiaule el gafa pigina. Ne onigig ne haig el maia asa ne enaig sihiageg?”

54 Afa Sisas sihini og, “Ka kiafna unehlagim fingi fegba afa enag gafugag mas fug lugui. Afa enag el nengel enaig esogog ehe kagelni God eheba kana alag asa kana unehlagim fingi fena.

55 Afa nengel mas ehem anwenafinig mo afa ka ehem anwenafenag. Afa ka enaig sihifegba eba ka mas ehem anwenafenag mo afa enag mo ka mwakwaleg asa ka nengel

lofeg mwakwalule. Afa ka ehem ati anwenafenag afa ka ehena mo patalfakufe.

<sup>56</sup> Autunam nengelni simbianga Abraham kam anwenafena og ka blofe asa ehe sifakalena. Afa enag ehe nangunam asa fwina sifakalena.”

<sup>57</sup> Afa ehengel Sisasim sihini og, “Abraham autunai fena afa ne mango watiaug mo. Atiaho ne ehem nanguna?”

<sup>58</sup> Afa Sisas sihina og, “Eba nufunam feg afa Abraham mahim fiahfenaba ka ati gohna.”

<sup>59</sup> Afa ehengel ehena mo higinim asa fun flinim ogha ehem wagi. Afa Sisas meagam gofenam asa Godna kwania lala fwahana.

## 9

### *Sisas nof tet elim ugwe fatina*

<sup>1</sup> Afa Sisas ikanam nof tet elim nanguna. Enag el afag nof tetni gwenai gwanigana.

<sup>2</sup> Afa patalfuiag el sahini og, “Tisa, amban maia amtakwalig eseg asa hwa el nof tetni gohug? Eba ehe me awai alag afag esini me?”

<sup>3</sup> Afa Sisas wahigi sihina og, “Amo, eba mango enaig mo. Eba hwaig sama Godna wasneig enag el nai yi mingnag elim ogfuniba sama nangui.

<sup>4</sup> Glauba suialag osuna asa big Godna gafugam esi asa ehe kam ningihiag. Afa sikulufeg blofe asa el mas gafugafi.

<sup>5</sup> Afa maia ka hwa bite la gofiba kike bite nai elim ombusug fenig.”

<sup>6</sup> Ehe enaig esonam afa bitem mepna kusufenam maia auwiauwinaba asa flanam nof tetni nof la gabahlana.

<sup>7</sup> Afa enaig esenam esona og, “Bu la sugim ika Siloam bume bu gam.” (afa enag unehlag Siloam eba ningihiag) Asa enag el ikanam bu la sunam nofug baihiana afa ehe pese kembang blona.

<sup>8</sup> Kembang la nai el afa mingnag el gafa ehem ati nanguni ehe asa gaba elim kigim fasahniofe. Afa ehengel enaig esogona, “Autunam nof tetni el kigim fasahniofe atiaho enag el maia?”

<sup>9</sup> Mingnag el enaig esogona, “Ei ena ho.” Afa mingnag enaig esogona, “Amo, ehe ming el afa nofbosug eba mungwalofug.” Afa enag el ehe gofenaba enaig esona og, “Eba kike!”

<sup>10</sup> Afa ehengel ehem sahni og, “Haig ne esegba asa neana nofug baihiag?”

<sup>11</sup> Afa ehe enaig sihifena og, “Afa el asa seflig Sisas ehe bite auwiauwigim asa kana nof la gabahlagim kam sihinag ika bu

la su. Afa ka bu la sugim asa gwenana kana nofug baihiag afa ka numbusiageg.”

<sup>12</sup> Afa ehengel sahani og, “Enag el hanai yi maia?” Ehe esona, “Ka mas anwenafeg mo.”

*Farisi el ogka anwenafi haisegba elni nofug baihiag*

<sup>13</sup> Afa kembang la nai el enam nangunim asa enag el nofug baihiana asa ehem farisi el nangum wani afuna.

<sup>14</sup> Afa Ju elni Auguiag Osuna Sisasa auwiauwig bite flanam afa nof tet elim ugwe fatina.

<sup>15</sup> Afa farisi el gafa ehem sahani og haisegba neana nofug baihiag? Afa ehe ehengelim sihini og, “Ehe auwiauwig bitena kana nofugim gabahlagim kam esonag sa bu la su asa ka numbusiageg.”

<sup>16</sup> Afa mingnag farisi el esogona og, “Enag el enaig eseg ehe mango Godna el mo asa ehe bigelni Auguiag Osuna nihe mas patalkug mo. Afa mingnag sihini og, “Afa amtakwalig el mas enaig kigmog esei. Asa hefum mungu mungu afuaminefena.

<sup>17</sup> Afa farisi el elim pese sahani og, “Neana nofugim asa suialafatig afa neba onigig enag el amban maia?” Afa ehe wahigi sihina og, “Ehe eba Godna mo fla sihiaule el.”

<sup>18</sup> Eba nufunam autunam enag el nof tetni fena afa enag Ju elni misog el ena mo higigim oksini. Asa enag elni alagafagim awamogonibi sa ahblon.

<sup>19</sup> Afa ehengel sambaganingim sahtigini og, “Atiaho hwa neningina leg? Eba nufunam maia ehe nof tetni gohna? Haisegba ilawanba ehe numbusiageg?”

<sup>20</sup> Afa humonig esogona og, “Ei, kaningi ati anwenahfeg eba kaningina leg afa ehe nof tetni gohna.

<sup>21</sup> Afa kaningi mas anwenahfeg mo amban ehem suialafatig afa mangwal ehem esenagba asa ehe numbusiageg. Ehe mango luwal mo, hefum sahnibi sama nengelim sihinuge.”

<sup>22</sup> Afa Ju elni misog el enaig sihifig afa amban enaig sihifefe og Sisasa eba Godna Gisfu Fwahag el afa enag elim eba laskuhlag lala kwegonufe asa afwambanai el afohiafe. Afa alag i afag i enag mom embe ahfenam asa enaig sihi ahfena og kaningi mas anwenahfeg mo.

<sup>23</sup> Asa eheningi ming mo esona og, “Ehe mango luwal mo, hefum sahani.”

<sup>24</sup> Afa el nofug asa ugwenana farisi el enag elim pese awamonim ehem enaig sihifini og, “Godna nof la sa ne kagelim nufunam sihini asa kagel anwenafi enag el eba amtakwalig el.”



25 Afa ehe esoni og, “Enag el amtakwalig el me awai awai me afa enag ka mas anwenafeg mo. Autunam ka nof tetni fena afa ilawo ka numbusiageg enaig mungu ka anwenafeg.”

26 Afa ehengel ehem sahani og, “Haig ehe nem esenag? Neana nofug haig baihiafeg?”

27 Afa ehe sihina og, “Kati nengelim sihinig afa ne mas higig mo. Haisegba nengel membig enag mo pese higigim? Atiaho nengel gafa ogka heafna patalfuiag el apuke?”

28 Afa ehengel ehem kosnagini afa sihini og, “Ne enag amtakwalig el patalkug afa kagelbi Mosesna patalfuiag el fig.

29 Kagel anwenafig God ehe Mosesim ati sihina afa kagel mas anwenafig mo enag el hanai maia blog?”

30 Afa ehe sihina og, “Enag algamam feg nengel nufunam anwena el enam ne mas anwenafig mo. Ehe kana nofugim suiala fenag asa nengel mas anwenafig mo ehe hanai maia blog.”

31 Bigel anwenafig God amtakwalig elni mo mas higinai. Afa el Godim ahnai skaufenag afa heafna mo patalkug asa God enag elni mo eba higinag.

32 Afa ilawo el mungu mingnag elni nofug suiala fetifena afa autunam nemug enaig mo el mas higini mo.

33 Afa enag el Godna el feg fwainigba asa ehe mas haig ese asa heafna wasneig eba awai.”

34 Afa ehengel olug kakagininim esogona og, “Maia ne gohn-aba ne amtakwalig el fena asa glawa gafa ne gwenaig go. Ne fwina amtakwalig el haisegba ne og kagelim sihinuge.” Asa ehengel ehem fena minefinim asa ningihinim afa ehem laskuhlag lalam kweni.

*Amban el mas Sisasim olug oniginag fwainig eba nof tet el lofig*

35 Afa Sisas higina maia enag elim enaig esofini finibi asa blonam ehem nangunam esona og, “Atiaho ne Nufunam Elim olug oniginag?”

36 Afa ehe esona og, “Kam sihina ehe amban maia asa ka ehem olug onigina.”

37 Afa Sisas ehem sihina og, “Ne ehem ati nangug eba ehe ilawo ne nai yi asa ahlagu.”

38 Afa enag el mongkokini kwakwagenam enaig esona og, “Ainyiag, ka nem olug onigina.”

39 Afa Sisas sihina og, “Ka hwa bite la blog asa el kwefihia-genam. Afa nof tet el numbusiagefe afa el nof suialagna eba nof tet el lofefe.”

40 Afa mingnag farisi el ehe yi mungwal hafufenaba ena mo higinim sahani og, “Atiaho kagel gafa nof tetni el?”

<sup>41</sup> Afa Sisas sihina og, “Afa ne enaig sihifeba kagel nof tetni el asa nengelnai yi amtakwalig mas go mo. Afa ne enaig esog, kagel mango nof tetni mo asa nengelni amtakwalig nengelnai yi nago.”

## 10

### *Sisas eba sipsipni nangwaghiawageg el lofeg*

<sup>1</sup> Afa Sisas sipsipni lasug mo sihina og, “Eba nufunam feg, afa sipsip bog megam seaifu afohie afa amtakwalig el mas mengigna sefu bloi. Enaig el eba ukwef el ehe asa bogim tofug seaifug asa ukwefig.

<sup>2</sup> Afa kike enaig sipsipni suialag nangwaghiawageg el afa ka enaig fasefe mungosni mengig gam asa sefu blog.

<sup>3</sup> Afa el asa mengig la anwasa fego afa kam mengig piginag asa ka sipsipni unehlagim suwigigba afa kana sipsip kana mengigim ati higig asa afwambagam wankag.

<sup>4</sup> Afwambagam wanpugugum afa kana sipsip unem ati anwenafig afa maia ka goseg ikaba asa sipsip kam sum patalfuiag fug.

<sup>5</sup> Afa enag sipsip ming elni unem higigim afa mas ehem patalfui. Eba ehena mengigim mas anwenafinig mo asa ehem lasu afuiaminafeg.”

<sup>6</sup> Afa Sisas enag lasug mo sihini asa farisi el mas anwenafig mo.

<sup>7</sup> Asa Sisas pese sihini og, “Eba nufunam feg kike eba sipsipni bog mengig lofeg.

<sup>8</sup> Afa mungwali el asa lasflam ambegog enag el eba ukwef el asa sipsip ehena mo mas higini.

<sup>9</sup> Kike mengig feg afa amban ne ka nangum sefu bloiba eba ne suiala gafefe. Asa ne sefufenam afa afwambagam pugufenam asa ne suialag bite la wagiafufife

<sup>10</sup> Afa ukwef elni onigig eba enaig ehe blonam asa sipsipim ukwefenam afa tigenam afa mingnagim mo amtakwalig klaitikafe. Afa ka blogba sama kana sipsip nofkenagag flifi asa enag nofkenagag ehengelnai yi kwania feni.

<sup>11</sup> “Ka kike sipsipni suialag anwasag el. Afa ka enaig esefe kiafna eligim fwaiyebe asa ka sipsipim kwaganife.

<sup>12</sup> Afa anwasag el eba sipsipni alag afa gafugag el eba esug nangwahiagego mango ehena mo. Afa maia sangwal malang oblofiba afa ehe nangugim asa sipsipim embem lasan ikag. Asa malang blonam sipsipim tigebe asa embem afuiaminefefe.

<sup>13</sup> Afa enag el eba esug gafugag el afa ehe mas sipsipim onigini asa ehe embem ikag.

14 Ka kike sipsipni suialag anwasag el. Kiafna sipsipim ka ati anwenafenig afa kiafna sipsip kam ati anwenafinig.

15 Eba gwenaign eseg Alag kam anwenafenag afa ka ehem anwenafenag. Afa ka kiafna eligim fwaiyeba asa ka sipsipim kwaganife.

16 Afa mingnag sipsip eba kana afa ehengel mas hwa bog megam afohie mo. Afa ehengel gafa sama kana mo higinim afa kam patalubigoiba afa ka lambinam mungu bog megam lasanife. Afa mungu anwasag el asa mungwali sipsipim nangwahiage lambfie gofife.

17 “Afa kana lahagna mona ka mas enam kwenai asa Alag kam fwina membenag. Afa ka kiafna nofkena fwaiyeba asa ka pese flafe.

18 Mas amban el kana lahagna mina wefug fwaiye eba kiafna onigig la asa ka kiafna eligim fwaiyefe. Afa kaba wasneigni feg kiafna eligim fwaiyenam afa ka wasneigni feg asa enag nofkenagag pese flafe. Afa kana Alag hwa wasneig mo kam faig asa ka enaig esefe.”

19 Afa Ju el enag mo higinim asa hefum mungu mungu fiahgini.

20 Afa kaksag el enaig esogona og, “Enag el eba sanel amtakwaligna afa ehe motet el lofeg. Haisegba ne ehena mo higini?”

21 Afa mingnag enaig esogona og, “Amo, enaig el eba mas enaig sihife. Afa sanel mas noftet elim ugwe fati.”

### *Sisas enaig esog ka God i mungwalofug*

22 Afa ming Ju elni buyis puguna. Afa enag buyis seflig Godna kwania lala buyis. Enanam eba bu was afa nineгна.

23 Afa Sisas Godna kwania lala gam ikanam afa wa-giakafenaba enanai yi seflig Solomonna afwambag sime.

24 Afa Ju el ehem muhla ambe apukenam afa esogona og, “Afa mungwanam nembefum ne sisageg kagel oksig enam nengiafogum. Sa ne kagelim ambala sihini atiaho ne Godna Gisfu Fwahag el me awai awai me?”

25 Afa Sisas wahigi sihina og, “Ka nem ati sihinig afa nengel mas higig mo. Afa kana alagna wasneigni ka kigmog esena afa enag gafugag nengelim ofgunig ka amban maia.

26 Afa nengel enam mas olug onigini mo. Afa ena enaig esigbi asa nengel mango kana sipsip mo.

27 Afa ka ati kiafna sipsipim anwenafenig afa ehengel kana mengigim higinim asa kam patalfug.

28 Afa ka ehengelim wahkig nofkenagag faibi afa mas ambanim awaiye. Afa mas amban el kana ninganai blo ukwefe kike mungu ati feg.

<sup>29</sup> Afa kana alag ehengelim kana ninga la fwahag. Afa ehe mungwali elim gosenig asa mas amban el heafna ninga nai ehengelim ukwefe lambi.

<sup>30</sup> Afa ka i alag i kaningi mungu ahfeg.”

<sup>31</sup> Afa Ju el pese gwenaiḡ esini fun flini oḡna Sisasiḡ funna tawagi,

<sup>32</sup> Afa Sisasiḡ ehengelim sihini oḡ, “Ka nengelim kaksag kigmog ogfunig asa Alag eseg. Afa mangwal suialag ka esegba asa ne oḡ kam oḡna tigifati?”

<sup>33</sup> Afa Ju el wahigi sihini oḡ, “Kagel mango neana gafugam enam esoni mo. Afa neana mo ne Godim moalamp onag asa kagel oḡna nem tigi. Afa ne el nemug feg asa ne onigig oḡ kaba God.”

<sup>34</sup> Afa Sisasiḡ esona oḡ, “Nengelni nihe mo la God elim enaiḡ sihifena oḡ, ‘Nengel god lofig.’

<sup>35</sup> Afa autunam God heafna nihe mo elim faini afa ehe enag elim seaflag eba god. Afa big anwenafig Godna mo eba nufunam wahkig gwenaiḡ gofife.

<sup>36</sup> Afa God elim enaiḡ sihfeniba asa kam haig esonafe? Afa Alag kam wegnageḡ fwahagim asa kam hwa bite gam ningihiag. Haisigbi ne esogog ka Godim molamp onag maia ka enaiḡ sihifegba kaba Godna leg?”

<sup>37</sup> Afa ka kikeafna gafugag ese fwainigba nofeka kana mo higini.

<sup>38</sup> Afa ka alagna gafugag ati ka esenag. Afa nengel kana mo higigim oksi ofnifibi, afa kana kigmogim sa ne nangunim oniginim asa enag ne anwenafi Alag ka i hawag afa ka alag i hawag kaningi eba mungu ahfeg.

<sup>39</sup> Afa ehengel oḡna pese ehem kehli afa Sisasiḡ lasan ikana.

<sup>40</sup> Afa Sisasiḡ pese Jordan bu gam ehengam maligim ikanam afohiefena. Enanai yi autunam Jon elim bu la laitina.

<sup>41</sup> Afa kaksag el ehem nangum ambena afa esogona oḡ, “Jon mas mangwal kigmog ogfug mo afa mungwali mo Jon asa Sisasiḡ sihinag eba nufuna feg.”

<sup>42</sup> Afa enanai yi kaksag el Sisasiḡ olug onigini.

## 11

### *Lasarus ati lahag*

<sup>1</sup> Afa Betani nai el gihena heafna unehlagba Lasarus. Afa heafna muwalningi Maria i afa Marta i gafa gwenaiḡ kembang la nai.

<sup>2</sup> (Afa Maria eba enag angwafig Sisasiḡ sanda bug sufuna afa heafna lapo ni ehena mongim titenagena. Heafna nisag Lasarus gihena.)

<sup>3</sup> Afa muwalningi Sisas nangum mo ahningihiana og, “Ainiyag neana hihe gihnagi.”

<sup>4</sup> Afa maia Sisas enag mo higinam afa ehe enaig sihifeni og, “Hwa gih asa ehem flag eba mas lahai. Enaig pugugba sama el Godna unehlagim fingifini afa Godna legim gwenai g esinifi.”

<sup>5</sup> Afa Sisas Martam, Mariam, afa Lasarusim asa ehengelim membeni.

<sup>6</sup> Afa maia Sisas ehenigina mom higinam afa ehe mas ikagna ikana mo. Ehe gwenanai yi gafena sambaga osuna.

<sup>7</sup> Afa maia sambaga osuna fenaba ehe patalfuiag elim enaig esoni og, “Ause big Judia gam pese afuiagim.”

<sup>8</sup> Afa patalfuiag el esogona og, “Tisa, mas manigeg mo enanai yi Ju el ogra nem funna tigi. Haisegba ne og ka pese susum ika?”

<sup>9</sup> Afa Sisas sihina og, “Ombusug eba osuna feg. Afa el osuna ikagba ehe mas mong kiakipe asa osu bitem ombusug faig.

<sup>10</sup> Afa el sinaini ikagba eba ombusug awai asa ehem mwelkiakipefe.”

<sup>11</sup> Afa Sisas enaig sihifenam afa ming mo sihina og, “Lasarus bigelni hihe eba ehe nongi afa ka ehem ilafefe.”

<sup>12</sup> Afa patalfuiag el esogona og, “Ainiyag, afa ehem gih behig fenam asa gifife eba suialafefe.”

<sup>13</sup> Afa Sisas Lasarusna lahagna mo sihinaba afa patalfuiag el enaig onigifini ehe esug nongi.

<sup>14</sup> Asa Sisas ehengelim ambala sihini og, “Lasarusba ati laha g.

<sup>15</sup> Afa maia laha gba ka mas enanai yi gafena mo afa ka nengelim sifakalinig asa ne kam olug onigini. Ause, nawo afu ehem nangu.”

<sup>16</sup> Afa Tomas (heafna ming unehlag eba Didimus) mingnag patalfuiag elim sihini og, “Bigel ehem mungwal patalfunam afa ehe alahafife eba bigel gafa pigiahiafe.”

### *Sisas laha g elim ilafotigife*

<sup>17</sup> Afunam Lasarusna kembang la apukenam. Afa kembang la nai el ati Lasarusim fun megam afu fakini afa sambaga sambaga osuna enaig ati fena.

<sup>18</sup> Afa Betani eba muhla Jerusalem la go.

<sup>19</sup> Asa kaksag Ju el ambenam Marta mi Maria mi kusugonim maia eheningina nisagim lahanibi.

<sup>20</sup> Afa maia Marta anwenafenaba Sisas muhla blofena asa ikanam Sisasim uflana. Afa Mariaba lala gafena.

<sup>21</sup> Afa Marta Sisasim sihina og, “Ainiyag, ne wanai yi gafiteba kana nisag mas lahaite.

22 Afa ka ati anwenafeg glauwa gaba ne mangwalim sahnaiba Godim eba nem faife.”

23 Afa Sisas ehem sihina og, “Neana nisag eba nofkenagag pese flagim.”

24 Afa Marta esona og, “Ka anwenafeg maia God elim kwefihiagofefiba enanam asa ehe pese buihiafe.”

25 Afa Sisas ehem esona og, “Kike enaig esefe, lahad elim ilafotiginam afa wahkig nofkenagag faife. Afa amban el kam olug oniginag asa lahad eba nofkenagag flafe.

26 Afa amban el nofkena afohie asa kam olug oniginag eba mas lahai. Atiaho ne enag mo olug oniginag?”

27 Afa ehe wahigi sihina og, “Ei Ainiyag, ka enag olug oniginag neba Godna leg afa Godna Gisfu Fwahag el asa God autunam ati sihi fwahana og ka nem bite gam ningihiafe.”

### *Sisas heagafa ufwena*

28 Afa ehe enaig sihifenam lala gam pese ikanam afa Mariam sagmonam sihina og, “Tisa ati blog afa ehe nem awamona.”

29 Afa maia Maria ena mo higinam asa buihianam ehe nangum ikagna ikana.

30 (Sisas mas kembang la puguna mo ehe gwenanai yi gofena asa Marta uflaguna.)

31 Afa Ju el Mariam kusugunim afa lala auguiafena. Afa maia Maria buihianam kikini akofenaba asa ehengel ehem nangunim patalfuna. Afa ehengel onigini og ehe bite kife la ufwegim ako.

32 Afa Maria Sisasim pugunam afa ehena mong yi kwakwage peganam afa enaig esona og, “Ainiyag, ne wanai yi gafiteba kana nisag mas lahaite.”

33 Afa maia Sisas nangwagenaba Maria afa Ju el wewat fwahafenaba asa ehe kusugufenim afa ehena olug mas fwina suialafena mo.

34 Afa ehe ehengelim sahani og, “Hanai yi ne fakig?” Afa ehengel wahigi sihini og, “Ainiyag sa blo nangu.”

35 Afa Sisas nob pe afenaba.

36 Afa Ju el enam nangunim esogona og, “Niasabam, enag el heafna nihem fwina membenag.”

37 Afa mingnag ehengelnai enaig esogona og, “Ehe enag el nof etetni elim nofug ati ugwe fatina afa ehe hwam gafa enaig esete Lasarus mas lahaite.”

### *Lasarus pese buihiana*

38 Afa Sisasna olug pese buihianam afa biteg kife gam ikana. Eba fun meg afa fun lolugni mengigim kagfuni.

39 Afa Sisas esoni og, “Funim sa bigifla fati.” Afa lahad elni muwalig, Marta esona og, “Hei Ainiyag, eba amtakwalig

nufug puguiagim ehe ati biteg kife la sambaga sambaga osuna feg.”

40 Afa Sisas sihina og, “Ka nem ati sihinag afa ne kam olug oniginaiba eba ne Godna wasneig nangufe.”

41 Afa ehengel funim bigifli fatini. Afa Sisas ofim sisi nofenam esona og, “Api ka nem suialag onag asa ne kana mo fahiginafe.

42 Ka ati anwenafeg ne kana mo fahiginafe afa ka hwa mo enaig sihifenife asa el hosa muhla afohie sama higinim afa anwenafi ne kam ningihiag.”

43 Enaig sihi fwahanam afa ehe fwina unena, “Lasarus pugu blo.”

44 Afa enag lahad el pugu blona afa heafna mongningam lofugna kikenagini afa mingnag lofug ehena nofbosugim kagfuni. Afa Sisas esona og, “Lofug piginagibi sama ikai.”

*Misog el mina tolagini Sisasim tigiim*

45 Afa kaksag Ju el Maria nangum ambenam afa enag kigmog nanguni asa Sisasim olug onigini.

46 Afa mingnag el farisi elim nangugim afunam afa enag mo sihigonugini asa Sisas esena.

47 Farisi el i afa saglag pris i misog elni nof la laskuhlanam enaig esogona og, “Haig sa big esifi? Enag el kaksag haig haig kigmog ogfuiageg.

48 Afa big ehem esug nangu fwaihibi afa ehe mingnag kigmog enaig eseiba asa mungwali el ehem olug oniginife. Afa mungwali el ehem enaig esinibi asa Romna misog el ambe nangunim asa Godna kwania lalam afa bigelni elim gafa amtakwalig klaitifi.”

49 Afa mungu el ehengelnai heafna unehlag Kaiafas enanam prisni misog el enaig esona og, “Nengelni onigig weti feg.

50 Sa hig, afa enag mungu el lahaiba eba suialafeg asa mungwali el mas awaiye.”

51 Afa Kaiafas hwa mo enaig sihifena afa enag mo eba mango heafna onigig la enaig sihifiah mo. Enanam ehe prisni misog el fena asa enag mo sihina enaig Godna mo fli sihiaule el lofug fena. Hwa mo enaig sihifeg Sisasna lahad Ju elim kwaganigim.

52 Eba mango Ju elim mungu kwagani mo afa Godna el asa mungwali goka afa ehena lahad ehengelim ulambinim asa Godna mungu el fifi.

53 Afa gwenanam enag mo higinim afa mina yisgiagini Sisasim tigiim.

<sup>54</sup> Asa Sisas mas Ju elni nofla ambala ikana mo. Sisas afa heafna patalfuiag el bite behig gam muhla afuna. Ehengel Efraim kembig auguiafena.

<sup>55</sup> Afa Pasova buyis meyini ofefenaba asa kaksag el kembig fwahinim Jerusalem gam afunam afa Mosesna nihem esinim asa buyisim numwehiagini.

<sup>56</sup> Afa el Sisasim yisginim maia awaiyenaba asa Godna kwania lala laskuhlanam hefum sawagini og, “Ne haig onigig fig ehe buyis la bloi me?”

<sup>57</sup> Afa saglag pris i afa farisi el i wasneig mo faig gona og, afa ne amban Sisasim nangwagba sa kagelim sihigonibi asa kagel afu ehem kehli.

## 12

*Maria sanda bug Sisasna mong yi sufuna*

*Matyu 26:6-13, Mak 14:3-9*

<sup>1</sup> Afa Pasova buyis meyi ofe eba enwesog la gohug osuna enanam pugufe. Afa Sisas Betani la puguna. Eba Lasarusna kembig asa enanai yi ehem lahanaba asa Sisas ehem ilafona.

<sup>2</sup> Afa Sisasim fane numwehiagini. Marta fane magegia-gena afa mingnag el i afa Sisas i sime la auguiafena afa Lasarus gafa mungwali auguiafena.

<sup>3</sup> Afa Maria sanda botolna kwania buihia flanam Sisasna mong yi sufunam heafna laponi titenagena. Asa suialag fungug lala la puguna. Hwa sanda eba kaksag kigna feg.

<sup>4</sup> Afa Judas Iskariot Sisasna patalfuiag el fena ehe mas sifakalena mo maia Maria enaig esenaba. Judas eba enag el asa Sisasim angoluweg elni ninga la fwahafe.

<sup>5</sup> Afa ehe ninimuna og, “Enag sanda bugba elim faigote sama 300 kigna flite asa big enag kigna gawig fwainig elim kwaganite.”

<sup>6</sup> Ehe mango gawig fwainig elim onigini enag sihifiah mo. Eba ehe ukwef el. Afa ehe ehengelni kig fakehlafe asa ehe mingnag mo lambig meagam kumug enag hefum kweafug.

<sup>7</sup> Afa Sisas esona og, “Afwai, nofeka ehem kwena. Hwa sanda bug ehe faka fwahanaba asa kana eligim numwehenageg biteg kife la fakigim.

<sup>8</sup> El gawig fwainig nengel nai yi wahkig afofife afa ka mas nengelim wahkig wangafi.”

<sup>9</sup> Afa Sisas Betani la gafena afa kaksag Ju el enam higinim asa afu Sisasim nanguni. Afa ogna Lasarusim gafa nangu asa lahaqba Sisas ehem ilafona.

<sup>10</sup> Asa saglag pris mo sihiagini ogna Lasarusim gafa tigi.

<sup>11</sup> Asa ehena yi kaksag Ju el ehengelni misog elim fwatigim asa Sisasim olug onigini.



*Sisas misog el lofug Jerusalem gam ikana*

*Matyu 21:1-11, Mak 11:1-11, Luk 19:28-40*

<sup>12</sup> Afa ming osuna kaksag el buyis nangugim ambegona afa higinim og Sisas hwa mina Jerusalem gam blo ikafe.

<sup>13</sup> Asa ehengel komb figeg totoaginim afunam ehem uflinim asa enaig esogona og;

Godna unehlag kwania feg. Enag el God asa ningihiag sama God ehem suialafia flai. God sama Ju elni misog elim suialafia flai.

<sup>14</sup> Afa Sisas donki flanam afa kuka ganam asa ikana. Afa maia ehe enaig esenaba asa Godna mo nufunam pugug. Autunam Godna mo ati enaig ginofi fwahini;

<sup>15</sup> Jerusalem la nai el, sa hig. Nofeka embefig, sa nangu, nengelni misog el donki la sisi oblo. *Sek 9:9*

<sup>16</sup> Afa enanam heafna patalfuiag el enag mo mas onigini mo. Afa autunai la Sisas lahanam afa buhianam alag nangum pese kukafe asa enanam ehengel enag mo anwenafifi eba Sisasim sunig afa ehem kwefunim enaig esini.

<sup>17</sup> Afa el Sisasim nanguni maia Lasarusim ilafonaba biteg fenai asa enag mo sihiageafuna.

<sup>18</sup> Afa kaksag el enag kigmog mo higinim asa ambenam Sisasim mina la uflini.

<sup>19</sup> Afa farisi el hefum sihiageni og, “Bigel mas ehem kwenig mo. Sa nangu, kaksag el bigim fwatigim ehem patalfug!”

*Afwambanai el ogra Sisas nangu*

<sup>20</sup> Afa mingnag Grik el Jerusalem gam afuna. Ehengelbi afwambanai el ogra buyis ambenam asa Godna unehlagim fingi fini.

<sup>21</sup> Afa ehengel ambenam Filipim sahani og, “Saglag kagel ogra Sisasim nangu.” Afa Filipna Kembig Betsaida Galili la nai.

<sup>22</sup> Afa Filip Andrum sihinagim ikana asa eheningi Sisasim ahsihina.

<sup>23</sup> Afa Sisas esona og, “Glauwaba asa God elim ogfunife Nufunam el eba kwania feg.

<sup>24</sup> Kike enaig kon fug lofug fe, kon gug enaig eseg afa ne mungu esug ningana flagiafiba eba gwenag mungu fifife. Afa enag ne bite megam kumhlaiba asa noginam asa nog pugufe enag mungu lig yi kaksag gug fefe.

<sup>25</sup> Afa amban el hefim fwina onigkafife enag el eba awaiye fe. Afa amban el mas bitenaim fwina membeg mo afa heafna nofkenagag oksig asa enag el wahkig nofkenagagim numwehiageg.

<sup>26</sup> Afa amban ne kana gafugag esenag ehe sama kana onigigim patalblui. Asa ka hanai yi feg eba kana gafugag el

gafa gwenanai yi fifife. Afa amban el kana gafugag eseg asa kana alag ehem suialag onafe.”

*Sisas heafna lahagna mo sihina*

<sup>27</sup> “Afa kana lahag muhla ofe asa kana olug kinig feg. Haig sihi ka fefe. Hwa kinig eba mog feg na ka blog. Asa masa ka enaig esofe, ‘O Api hwa kinig masa ne kana ninga la fwahafe.’

<sup>28</sup> Afa ka enaig esofe, ‘O Api, sa ne nimbiafna unehlagim fingi fe!’ ” Afa God of la lagofena og, “Ka ati kiafna unehlagim fingi feg afa ka gwenai pesese.”

<sup>29</sup> Afa kaksag el afofenaba enag mengigim higini. Afa mingnag el enaig esogona og, “Eba hug moasig!” Afa mingnag el enaig esogona og, “Amo, eba of la nai el ehem sihinago!”

<sup>30</sup> Afa Sisas ehengelim sihini og, “Enag mo mango kam kwefwag mo eba nengelim kwaganigim.

<sup>31</sup> Afa enanam God bitenai elim kwefihiagefe asa ehe bitenai misog elim filafatife.

<sup>32</sup> Afa maia el kam sisi kahlibi afa ka mungwali elim lambiba asa kam ambe muhlafinife.”

<sup>33</sup> Afa Sisas enag mo enaig sihifeni eba ogfug heafna lahag enaig esefe.

<sup>34</sup> Afa ehengel esogona og, “Godna buk enaig sihifeg Godna Gisfu Fwahag El wahkig gafife. Haisegba sa ne enaig sihifeg Nufunam Elim sisi yi kahlife? Kagelim sihini Nufunam El amban maia?”

<sup>35</sup> Afa Sisas sihina og, “Ombusug nengel nai yi mas wahkig gofi maia enag ombusug gofiba sa ne ati ika masa nem sikulufenafe. Asa el sinaini fakafe ehe mas anwenafe ehe asim ako.

<sup>36</sup> Afa ka enag ombusug nem faig. Afa maia ka nengel nai yi gofiba sa ne kam olug onigini asa nengel enaig fi asa el ombusugni fakafe.” Afa Sisas enag mo sihi fwahanam asa lasanam ikana afa mas ambala gofena mo.

*Ju el Sisasim mas olug onigigi mo*

<sup>37</sup> Afa Ju el kaksag kigmog nanguni asa Sisas esena asa ehengel ehem mas olug onigini mo.

<sup>38</sup> Afa ehengel enaig esini asa Aisaiana mo nufunam puguna. Ehe Godna mo fla sihiaule el afa autunam ehe enaig esona og;

O Ainiyag, ne ati nimbiafena kigmog ogfug asa kagel neana mo sihigonugbi afa ehengel mas higig mo. *Ais 53:1*

<sup>39</sup> Afa ehengel mas Sisasim olug onigini mo asa Aisaia ming mo pese sihini og;

<sup>40</sup> God ehengelni nofugim kagfonig asa ehe mas nofhiagini mo afa onigigim kikisenig asa mas numwehe anwefafi. Afa God enaig esog afa ka enaig ese fwainigba eba ehengel kam pese oniginife asa ka ehengelim ugwetifefe. *Ais 6:10*

<sup>41</sup> Autunam God Aisaiam itila ogfuna asa Sisasna wasneigim nanguna asa enag mo ehem sihinag.

<sup>42</sup> Afa farisi el enaig sihifini amban ne Sisasim olug oniginafe asa nofeka laskuhlag lala gam ambe go. Afa kaksag Ju elni saglag el Sisasim olug onigini. Afa farisi elim embefegoni asa enag mo mas ambala sihiagini mo.

<sup>43</sup> Afa ehengel fwina membig el sama ehengelim suialag goni afa Godim mas enaig onigifini mo.

### *Sisasna mo elim kwefihiagefe*

<sup>44</sup> Afa Sisas ambala sihina og, “Amban ne kam olug oniginag afa el kam asa ningihiag ehem gafa olug oniginafe.

<sup>45</sup> Afa amban ne kam nangufe afa el kam asa ningihiag ehem gafa nangufe.

<sup>46</sup> Afa ka hwa bite la blog afa ka elim ombusug faig asa mungwali el kam olug oniginife ehengel mas sikulufeg la afohiefi.

<sup>47</sup> Afa amban ne kana mo higinam afa mas patalkui afa kike ehem mas kufeni. Afa ka mango bite nai elim kufenigim blah mo afa ka elim lambigim ka blog.

<sup>48</sup> Afa amban ne kam mas fatinag afa kana mo mas kehlag mo afa maia kwefihiageg osuna hwa mo ka sihinag eba ehem kufenafe.

<sup>49</sup> Afa kana hwa mo enaig esefe asa ka mas kiafna onigig la enaig sihife. Alag kam ningihiag afa ehe kam wasneig mo faig asa ka gwenag mo flagim sa ka sihiageg.

<sup>50</sup> Afa ka anwenafeg heafna mo elim wahkig nofkenagag mina ogfunig. Asa mo ka sihig eba Alag kam faig naka sihig.”

## 13

### *Sisas heafna patalfuiag elni mongim buna gigiafenugena*

<sup>1</sup> Afa enanam Pasova buyis meyini ofefenaba. Afa Sisas anwenafena ehe bite fwahiagim ati muhla ofe asa Alag nangum pese ikafe. Afa ehe heafna elim wahkig membenig fafefe asa hwa bite la feg asa ehena membug gwesim mungwal faifeni.

<sup>2</sup> Afa Satan ati Judas Iskariotim amtakwalig onigig faina asa ehe Sisas angoluweg elni ninga la fwahafe. Enag Judas eba Saimonna leg. Afa Sisas heafna patalfuiag el mungwali augunam fane ahgafenaba.

<sup>3</sup> Afa Sisas anwenafeg Alag ehem mungwali wasneig ati faig asa mungwali ehem ahnai skaufenig. Afa ehe anwenafeg ehe Godim fwahia blog afa pese ikafe.

<sup>4</sup> Asa Sisas buhianam nineg lofug huguflanam afa taul agagig la kiaguna.

<sup>5</sup> Afa ehe bu sob yi sufunam afa sa heafna patalfuiag elni mongim gigiafenugena afa taul huguflanam asa enana titenugena.

<sup>6</sup> Afa ehe ogra Saimon Pitam enaig esena. Afa Pita enaig esona og, “Ainiyag, atiaho sa ne kana mongim gafa buna gigiafenai?”

<sup>7</sup> Afa Sisas wahig sihina og, “Mangwal ka eseg ne enag mas ilawo anwenafeg mo afa autunai la ne enam anwenafefe.”

<sup>8</sup> Afa Pita ehem sihina og, “Amo, nofeka kana mongim gigiafena.” Afa Sisas wahig sihina og, “Afa ka nem enaig esenag fwainigba eba ne mas kana patalfuiag el fenai.”

<sup>9</sup> Afa Pita esona og, “Ainiyag, afa enaig nufunafefe afa kam oksig mong behig gigiafegimba ka membeg sa ne kana eligim mungwali sufla.”

<sup>10</sup> Afa Sisas esona og, “Afa amban ne bu la sufe asa ehena eligbi ambug gofufe. Afa kembang la pugunam asa mong behig gigiafena. Afa nengelbi mungwali ambug afohie asa mungu el nengel nai mas enaig goh mo.”

<sup>11</sup> (Sisas ati anwenafeg amban el afa ehem angoluweg elni ninga la fwahafe asa ehe enaig esog, “Nengelbi mungwali ambug afohie asa mungu el nengel nai mas enaig goh mo.”)

<sup>12</sup> Afa Sisas ehengelni mong gigiafe fwahinim afa lofug pese fatinam afa sime gam ikanam asa ehengelim sahtigini og, “Atiaho ne hwam anwenafig sa ka nem esenig?”

<sup>13</sup> Afa ne kam enaig sefli fig Tisa afa Ainiyag eba ne suiala sihifeg asa kike enag elbi feg.

<sup>14</sup> Sa nangu! Kaba Tisa afa Ainiyag ka nengelni mongim buna gigiafenugeg asa ka esug gafugag elni gafugam esenig. Afa ne gafa nimbiafgelni nai elni mongim sa ne gigiafe gonugibi enaig eba suialafeg.

<sup>15</sup> Afa kati nem minaba ogfunig asa ka nem esenig sa ne mingnag elim enaig esegoni.

<sup>16</sup> Eba nufunam feg. Afa gafugag el mas gose eba misog el gose fakafe. Afa el asa mo flablug enag el mas gosei eba el asa ehem ningihiag enag el gose fakafe.

<sup>17</sup> Glauwaba ne enag nufunam mo anwenafig afa ne enam patalkuiba asa ne sifakali.

<sup>18</sup> “Kana mo mango nengelim mungwali esoni mo. Ka nengelim awamonigim asa ka nengelim ati anwenafenig ne

haig el maia. Afa Godna mo enaig sihifeg ‘Enag el ka fane mungwawli ahneule ehe kam amtakwalinagim.’

<sup>19</sup> Ka nengelim hwa mo osihini afa maia enagba puguiba nengel kam olug onigifie kike i afa kiafna mo i wahkig ka ahgoffe.

<sup>20</sup> Eba nufunam feg. Ka elim ningitigi afa amban ehenge- lim awamogonibi eba kam gafa gwenaig esenig. Afa amban kam awamonaiba eba kana elim gafa gwenaig esigonug asa ka ningitigig.”

*Sisas esona og el kam angoluwagna ninga la fakafe*

*Matyu 26:20-25, Mak 14:17-21, Luk 22:21-23*

<sup>21</sup> Afa enag mo sihi fwahanam afa ehem olug kinig fenam asa ambala sihina og, “Eba nufunam feg nengelnai mungu kam angoluwagna ninga la fwahafe.”

<sup>22</sup> Afa patalfuiag el hefum fanangu feaginim afa etetiagini og ehe amban elim esonag.

<sup>23</sup> Afa patalfuiag el mungu Sisas asa ehem fwina membe- nag enag el Sisas i muhla ahwag fena.

<sup>24</sup> Asa Pita ehem mingigna sehneina og, “Sahna ehe am- banim esonag?”

<sup>25</sup> Asa enag el Sisasna elig nai yi muhla gafena afa enag sahna og, “Ainiyag, eba amban maia?”

<sup>26</sup> Afa Sisas wahigig sihina og, “Ka amba fane bug la fatinam elim faiba eba enag el kam esenafe.” Asa ehe amba bu la fatinam Judasim faina. Judas eba Saimon Iskariotna leg.

<sup>27</sup> Afa enanam Judas amba flanam afa ikagna Satan ehem simbagahlana. Afa Sisas ehem sihina og, “Afa ne mangwal enaig esofefiba sa ne ikagna ese.”

<sup>28</sup> Afa mingnag patalfuiag el auguiafena afa enag mo mas anwenafini mo haisegba Sisas ehem enaig sihifena.

<sup>29</sup> Afa Judas ehe kigim kehlag asa mingnag patalfuiag el enaig onigifini og Sisas ehem ningihiag ma ka buyisna fane lambi. Afa mingnag enaig onigifini og Sisas ehem ningihiag sama gawig fwainig elim kwagani.

<sup>30</sup> Afa Judas amba flanam asa ikagna afwambagam pugu kana. Eba sinaini ehe enaigba esena.

*Sisas glaunai nihe mo faini*

<sup>31</sup> Afa Judas maia ikanaba Sisas sihini og, “Ilawo God Nufunam elni wasneig ambala ogfufe afa Godna wasneig Nufunam el nai yi ambala pugufe.

<sup>32</sup> Kaba Nufunam el afa Godna wasneig ka nai yi ambala ogfuiba asa nangufi asa God ehe kana wasneig elim ogfunife. Ilawo God enaig esefe.

<sup>33</sup> Kana luwal, ka mwakwalig ganam afa ikafe. Afa nengel kam ogna yisigi afa ne kam mas nangui. Afa Ju elim hwa mo ka sihinig nengelim gafa gwenaig mo ka nem esonig, 'Asim asa ka ako nengel mas ambe.'

<sup>34</sup> Afa ka nengelim glaunai nihe mo faig. Eba enaig esog sa ne nimbeafgeli nai fwina membiagi. Asa ka nem fwina membenig sa nengel gafa gwenaig esi nimbeafgel naim sa ne membiagi.

<sup>35</sup> Afa ne enaig esegba mingnagim membegonife asa mungwali el anwenafifi ne kana patalfuiag el."

*Sisas esona og Pita esofe ka mas ehem anwenafenag mo Matyu 26:31-35, Mak 14:27-31, Luk 22:31-34*

<sup>36</sup> Afa Saimon Pita sahna og, "Ainiyag, asim ne ako?" Afa Sisas sihina og, "Asim sa ka ako ilawo ne kam mas patalblui afa sumi yi ne kam patalkufe."

<sup>37</sup> Afa Pita sahna og, "Ainiyag, haisegba ka mas nem gla patalkui? Asa el biningim sofegonifibi ka mas lahagim embefe!"

<sup>38</sup> Afa Sisas sihina og, "Atiaho ne enaig nufunam esefe? Afa kana kugum flanam asa lahafe? Eba nufunam feg afa kakaruk mosigim meyifefiba afa ne sambaga mungunagim ne enaig esofe ka mas ehem anwenafenag mo."

## 14

*God nangum ikagba Sisas ehe minaba feg*

<sup>1</sup> Afa Sisas patalfuiag elim enaig esoni og, "Masa nengel fwina kusgufifi afa olug kinig feskofifi. Sa ne Godim olug onigini afa kam gafa gwenaig esini.

<sup>2</sup> Afa kana Alagna lalaba kaksag skag gohka. Enaig nufunam fwainigba ka mas nem enaig esoni. Asa ka nengelni skag numwehiage gim ka ako.

<sup>3</sup> Afa ka nengelni skag numwehiagenam asa ka pese blonam nengelim lambinam asa big mungwali enanai yi afu augufe.

<sup>4</sup> Afa hwa mina ne anwenafig mo ka asim ako"

<sup>5</sup> Afa Tomas ehem sahna og, "Ainiyag, kagel mas anwenafig mo asim ne ako! Haig ka esigbi asa ka ena minam afuiagimba anwenafifi?"

<sup>6</sup> Afa Sisas wahigi sihina og, "Afa el membeg nufunam mo anwenafigim afa nofkenagag fligim eba kike ena minaba feg. Afa Alag nangum afuiagba mas ming minaba goh mo, eba awai, kike mungu feg.

<sup>7</sup> Afa ne kam numwehe anwenafigi eba kana Alagim gafa ne ehem anwenafifi. Glanuwo ne ehem anwenafigi afa ne ati nangug.”

<sup>8</sup> Afa Filip sihina og, “Ainiyag, nimbiafena Alagim kam ogfunibi asa ka enam nangufi eba kagelni sahihigi ati ihlafeg.”

<sup>9</sup> Afa Sisas esona og, “O Filip, big wahkig ahwagiahkaba. Afa haisegba ne kam mas anwenafinag mo? Afa amban ne kam nangug eba ehe ati Alagim nangug. Afa haisegba ne kam esonag, ‘Kam Alagim ogfuni?’

<sup>10</sup> Afa Alag ka i ahgohug afa ka Alag i ahgohug; afa ne enam mas onigig mo? Afa mo ka nem sihinig eba mango kana mu mo eba kiafna Alag ka i ahgoba enag ehe heafna gafugafeg.

<sup>11</sup> Sa ne kana mom onigim asa ka nem sihinig ka Alag i ahgohug afa Alag ka i ahgohug. Afa awaiegba sa ne kana kigmogim pese onigim asa ne kam olug onigini.

<sup>12</sup> Ka nem nufunam sihinig amban el kam olug oniginafe eba ehe gafa gwenai kigmog esefe asa ka eseg. Afa enaig elni gafugag kana gafugagim goseg asa kaba Alag nangum ako.

<sup>13</sup> Afa mangwalim ne kana unehlag la sahiba eba ka esefe asa ka Leg Alagna unehlagim fingifefe.

<sup>14</sup> Afa mungwali mangwalim gafa ne kana unehlag la sahiba eba ka esefe.

<sup>15</sup> Afa ne kam fwina membenagba eba sa ne kana mom ugwe patalkufei.”

*Sisas sihi fwahag og ka Godna Sungwabug ninghianife*

<sup>16</sup> “Afa ka Alagim sahnam asa ehe nengelim ming Kwefwag el ninghianife eba nengelim simbigahlanam wahkig wangofife.

<sup>17</sup> Enag Kwefwag el eba Godna Sungwabug asa Godna nufunam mo ambala nem pugunife. Afa bitenai el ehem mas nanguni afa anwenafini mo asa ehem mas sugufini mo. Afa ne ehem ati anwenafini asa ehe nengelim wangofna afa nengel i sefugofna.

<sup>18</sup> “Afa ka nem mas fwati ofenaiba bontag luwal lofug. Afa ka nem pese blonam nangwag fe.

<sup>19</sup> Afa mungwanam feg fwainig bitenai el mas kam nangui afa ne kam nangufi. Ka nofkenafeg asa nengel gafa nofkena augufi.

<sup>20</sup> Afa enag osuna puguiba ne anwenafife ka kiafena Alag i ahgo afa ne ka i ahgo afa ka ne i ahgo gwenai.

<sup>21</sup> Afa amban el kana nihe mo kehlanam patalbluiba eba enaig el kam fwina membenag. Afa sonaig el kam enaig esenaiba afa kana Alag ehem membenafe afa ka gafa gwenai esenam asa ka kefum ehem ambala pugunafe.”

<sup>22</sup> Afa ming Judas (ehe mango Judas Iskariot mo) ehe enaig esona og, “Ainiyag, haisegba ne ona nimbefum kam ogfuni afa ne mas nimbefum mingnagim mungwali ogfunig mo.”

<sup>23</sup> Afa Sisas wahigi sihini og, “Amban kam membenafe eba kana mo higigim patalblug. Afa kana Alag ehem membenag asa kaningi ahblonam enag el i ahgofife.

<sup>24</sup> Afa amban mas kam membenai eba kana mo ehe mas patalblui. Ena mo ne higig eba mango kana onigig la blo mo awai, Alag kam ningihiag afa enag heafna mo.

<sup>25</sup> “Afa enanam ka nem wangofenaba ka nem hwa mungwali mo sihinig.

<sup>26</sup> Afa Alag kana unehlag la Kwefwag el ningihiafe. Enaba Godna Sungwabug afa ehe nengelim mungwali ogfunim afa ehe nengelni onigigim fokla lasaniba asa ne enam pese onigifi mo sa ka nem sihini.

<sup>27</sup> “Ati muhla ofe ka nem lasanife afa kaba olug enesiegna feg enag enesieg ka nem faifi. Bitenai elbi mas nem enaig olug enesiegba fai, eba awai. Asa nofeka fwina oniginim afa embe olug fli.

<sup>28</sup> Afa ne kana mo ati higini ka enaig esona kog ka nem lasan ikanam afa ka nem pese blo pugunife. Afa Alag kam gosenag. Afa ne kam membeniba sa ne sifakali ka Alag nangum kako.

<sup>29</sup> Hosa ka nem ilawo osihini eba autunai la sa pugufe. Maia enag puguiba sa ne enam onigifi asa ne anwenafifi kana moba nufunam feg.

<sup>30</sup> Afa Satan bitenai misog el ati oblo asa ka haiseg nem fwina sihin goh mo. Afa heafna wasneig mas kam ihlafenag mo.

<sup>31</sup> Afa bitenai el sa ma anwenafi ka Alagim membenag. Ehe kam esonagba na ka ehena gafugag mungwali esenag. Au ambe nawo afu.”

## 15

### *Sisasba wena afalig feg*

<sup>1</sup> Afa Sisas enaig esog, “Kaba nufunam we afalig afa kana Alagba asona mogba feg.

<sup>2</sup> Afa mungwali iklig asa ka nai yi afo afa mas fug lugug mo afa ehe higfeitifefe afa mingnag iklig asa fug lugug ehe enaba ombusugnugegba sa ma kaksag fug lugwage.

<sup>3</sup> Afa kana mo ati ka nem faig eba enag mo nengelim ombusunugegba asa ne afsug afohie.

<sup>4</sup> Sa ne ka i ahgohi afa ka gafa ne i ahgohfife. Afa iklig afalig i kufeg fwainigba eba mas fug lugui. Eba mungwalofug



gwenaiƒ feƒ afa ne ka i ahgohug fwainigba eba ne nai yi fug mas lugui.

<sup>5</sup> “Afa kaba we afaliƒ feƒ afa nengelbi ikliƒ feƒ. Afa el ka i ahgohug afa ka ehe i ahgohug asa ehe kaksag fug lugufe. Afa ne ka i ahgohug fwainigba eba mas ne mangwalim gafa esei.

<sup>6</sup> Afa amban el ka i ahgohug fwainigba ehe enaiƒ li ikliƒ lofeƒ asa higfei susugbi asa fofeƒ. Afa enagba lambigim suwi la wehliƒ.

<sup>7</sup> Afa ne ka i ahgohfiƒa afa kana mo gafa ne nai yi ati goh asa ne nimbiafena membug la Alagim sahnaba afa ehe nem enaiƒ esenafe.

<sup>8</sup> Afa maia ne kaksag fug lugugba asa enaba ofug ne kana patalfuiag el feƒba asa kana Alag unehlag kwania flag.

<sup>9</sup> Alag kam fwina membenag afa ka gafa nengelim gwenaiƒ eseniƒ. Sa ne wahkiƒ kana membug la afohieƒim.

<sup>10</sup> Afa ne kana mo patalfuiƒa asa ne kana membug la afohieƒim. Eba gwenaiƒ ka gafa kiafena Alagna mo patalkug asa ka heafna membug la ka goh.

<sup>11</sup> “Afa ka nem hwaiƒ sihiofeni kana sifakal sa ma nengel nai yi pahlaiba afa enag sifakal nengel nai yi gofiƒa eba nem ihlafeniƒe.

<sup>12</sup> Afa kana nihe mo hwaiƒ esog afa ka nem membeniƒ asa nengel gafa mingnagim gwenaiƒ esegoni.

<sup>13</sup> Kwania membug eba enaiƒ feƒ el sa ma heafna nofkike-nag fwahanam asa heafna hihem kweagfug.

<sup>14</sup> Afa ne kana mom patalfuiƒa eba ne kana hihe feƒ.

<sup>15</sup> Afa Sisas esog, Ka mas nengelim esug gafugag el oni eba misog el mangwalim onigigba afa heafna esug gafugag el mas enam anwenafi. Afa ka nengelim esoniƒ neba kana hihe feƒ asa mungwali mangwal Alag kam ofgunag eba enag ka ati nengelim ofguniƒ.

<sup>16</sup> Afa ne mas kam kanogni mo, amo ka ati nengelim kanog fwatina asa ne afu gafugafiƒi sa ma enag fug lugui. Afa enag fug sa ma wahkiƒ gofi. Asa mangwalim kana unehlag la Alagim sahnibi eba ehe enag nem faifi.

<sup>17</sup> Afa kana nihe mo enaiƒ esog sa ne enaiƒ esi, ‘Sa ne nimbefum fwina membeagi.’”

*Bitenai el patalfuiag elim olug kakagfegoniƒi*

<sup>18</sup> Afa Sisas esog, “Afa bitenai el nengelim olug kakagfegoniƒi sa ne pese onigi ehengel ati gof kam enaiƒ esini.

<sup>19</sup> Afa ne bitenai feƒba eba bitenai el nem membegoniƒi, amo ka nem ati kanog fwatig asa ne bitenai nihe fwahia afa ne enaiƒ esibi asa bitenai el nem olug kakagfegoniƒi.

<sup>20</sup> Sa ne pese onigifi mo sa ka nengelim sihinig, ‘Afa esug gafugag el mas misog elim goseni.’ Afa ehengel kam

amtakwal fefflibi eba nengelim gafa gwenai gesezonifi. Afa ehengel kana mom higigbi eba nengelni mom gafa gwenai gesifi.

<sup>21</sup> Afa ne kana el fegba asa ehengel nem enai gesezonife. Afa Alag kam ninihiagba na ka blog afa ehengel ehem mas anwenafig mo.

<sup>22</sup> Afa ka blo ehengelim mo sihinig fwainigfeffiteba ehengelni nufweh mas goh mo. Afa glawo ehengel mas enai gesogoi kagel mas anwenafig mo mangwal ka esig eba amtakwalig.

<sup>23</sup> Afa amban el kam olug kakaginibi asa ehe gafa kana Alagim gwenai esinig.

<sup>24</sup> Afa ka ehengel nai yi olyi kigmog ogfug afa mas amban el enag enai gesena mo. Afa ehengel kam mas olug onigigim asa ehengelni nufweh eba gwese goh. Afa glawo kigmog ati nangugim afa ehengel ka mi kana Alag mi olug kam kakage gonig.

<sup>25</sup> Afa autunam ehengelni nihe mo enai gesog;  
Ehengel kam munum olug kakagini. *Sam 35:19, 69:4*

“Afa glawo enag mo nufunam pugug.

<sup>26</sup> “Afa ka Godna Sungwabug nengelim ningihianife. Afa ehe Alag i ahwag asa blonam nengelim kwaganife afa heafna mo eba nufunam. Afa heafna mo eba kana mom sihinafe.

<sup>27</sup> Afa mulug yi nengel ka nai yi afohiafena asa ne gafa mingnag elim kana mom sihigonifi.”

## 16

<sup>1</sup> “Afa ka nengelim enag mo sihinig asa nengelni olug onigig nofeka amosna pese afu.

<sup>2</sup> Afa ehengel nengelim laskuhlag lala afwambala lambaitife. Afa sumi yi enag osuna puguiba el asa nengelim kwagihig ehengel enai gonigifi og ka Godim kweagfug.

<sup>3</sup> Afa ehengel Alag mi ka mi mas anwenafegonig mo asa ehengel enai gesifi.

<sup>4</sup> Afa ka nengelim enai gesezonifi mo sihinig asa enai ginig osuna opugufiba sa ne pese onigifi asa ka nem numwehiawagig mo sihinig. Afa lasflam yi ka ne i ahgofena asa ka mas nengelim enag mo sihini mo.”

### *Godna Sungwabugna gafugag*

<sup>5</sup> “Afa glawo ka Alag nangum ako afa ne mas kam sahnag mo, ‘Ne asim ako?’

<sup>6</sup> Afa glawo ka nem hwa mo sihinig asa enag nengelni olug ginig feskofeg.

<sup>7</sup> Afa ka nem nufunam mo sihinig afa ka nengelim fwaha ikaiba enagba nengelim suialafenig. Afa ka ika fwainigba

Godna Sungwabug nengelim mas bloni. Afa ka ikagba eba ka ehem ningihiafe nengel nangum.

<sup>8</sup> Afa maia ehe bloiba ehe bitenai elim amtakwalig nihe afa suialag nihe afa kwefihiag nihe enag sihinugefe.

<sup>9</sup> Afa el kam mas olug onigini asa ehe ehengelni amtakwalig nihem ogfunife.

<sup>10</sup> Afa ka Alag nangum ikafe afa nengel mas kam nangui asa ehe suialag nihe sihinugefe.

<sup>11</sup> Afa God bitenai elni misog elim, Satanim, ati kwefihiageg asa Godna Sungwabug elim kwefihiag nihe sihinugefwahag.

<sup>12</sup> “Afa ka membeg kaksag mo nem fai afa ne mas enam ihlafig mo.

<sup>13</sup> Afa Sungwabug ehe Godna nufunam mo kehlag afa maia ehe bloiba ehe nengelim mungwali nufunam mo ogfunugefe. Afa ehe mas heafna onigig la nengelim sihini amo, afa mangwal ehe higig eba enam sihife. Afa mangwal sumi yi sa pugufe ehe enam nengelim sihinife.

<sup>14</sup> Afa ehe kana mo flanam afa nem sihinife asa ehe kana unehlagim fingi fefe.

<sup>15</sup> Afa mungwali gawig Alagna feg eba kana. Asa ka ati sihig Sungwabug kana mo flanam nem sihinife.”

*Glawo ne olug kinig afa autunai la ne sifakalifi*

<sup>16</sup> Afa Sisas enaig esog, “Mwakwalig afa ne kam mas nangui asa manigeg fwainig ne kam pese nangufi.”

<sup>17</sup> Afa mingnag patalfuiag el hefim sihiageni og, “Mangigim bigim enaig esonug, ‘Mwakwalig afa ne kam mas nangui asa manigeg fwainig ne kam pese nangufi’ afa mingam ehe enaig esog ‘Ka Alag nangum ako asa enaig pugufe.’

<sup>18</sup> Enag mo ‘Mwakwalig’ eba mangwalim esog afa enag ehena mo bigel mas anwenafig mo.”

<sup>19</sup> Afa Sisas anwenafeg ehengel enam mo onigiafufnaba ona ehem sahani asa ehe sihini og, “Ka esog ‘Mwakwalig afa ne kam mas nangui asa manigeg fwainig ne kam pese nangufi.’ Atiasi enam ne nimbefum sihiageafu?”

<sup>20</sup> Afa ka nem nufunam sihinig afa ne wewatinim nob mela auguiafiba afa bitenai el eheba sifakalifi. Afa ne olug kinig feskofeg afa nengelni kinig eba waikefe sifakaleg pugufe.

<sup>21</sup> Sa hig, maia luwal gohugum ofeba eba angwafig susug mu gof flagim. Afa maia luwal mo gohugba asa angwafig mas pese susugum onigi eba ehe sifakaleg luwal ati gohug.

<sup>22</sup> Nengel gafa gwenag esifi, glawana mo ne olug kinig flinim afa ka nem nangwagiba eba ne sifakalifi. Enag sifakal mas amban nengelni nihinai huguflaiti.”

*Ne sahiba eba ne flafe*

<sup>23</sup> “Afa enag osuna puguiba eba ne mas kam mangwalim sahini. Ka nem nufunam sihinig mangwalim ne kana unehlag la sahiba asa kana Alag nem faife.

<sup>24</sup> Afa glawa gafa nengel kana unehlag la mas mangwalim sahig mo. Sese ne sahiba ne flafe asa nengelni sifakaleg ihlafefe.”

*Sisas bitenai nihem filafefe*

<sup>25</sup> Afa Sisas enaig esog, “Ka nem ati lasug mo sihini afa enag osuna puguiba ka mas nem lasug mo sihini asa ka ambala kiafna Alagna mom nem sihinifi.

<sup>26</sup> Afa maia enag osuna puguiba ne Alagim kana unehlag la sahnaiba, ka mas enaig esog enanam ka nem kwefunam ehem sahani, amo,

<sup>27</sup> Ka mas nengelim enaig esini eba kiafna Alag ehe nengelim fwina membenig. Afa ne kam fwina membeni afa ne onigig God kam ningihiag naka blog asa ehe nengelim membenig.

<sup>28</sup> Eba nufunam feg ka kiafna Alagim fwahagim naka hwa bite la blog afa glawo ka hwa bite fwahanam asa ka pese Alag nangum ikafe.”

<sup>29</sup> Afa patalfuiag el enaig esogona og, “Ei, glawo ne ambala sihig afa ne mas lasug mo sihig mo.

<sup>30</sup> Afa glawo kagel anwenafig ne mungwali ati anwenafeg mangofi kagel yiskosig nem ming sahnigim asa kagel ati olug onigig ne Godna blog.”

<sup>31</sup> Afa Sisas esoni, “Atiaho ne enam olug onigig?”

<sup>32</sup> Higim, enag osu ati muhla ofe amo eba ati pugug asa ne mungwali kam fwahanim afuiaminefefe nimbiafgelni mungu mungu kembig gam asa ka kefwaimu gofufe. Afa ka mas kefwaimu nemug gofi eba kiafna Alag i ka ahgofufe.

<sup>33</sup> Afa ka nem enag sihinig asa ka nai yi afofum eba sa ne olug enesiegna afofufe. Afa hwa bitelaba kinig nengelim pugunife asa nofeka embefi eba kati bitenai nihe filafatig.”

**17***Sisas hefum afa patalfuiag elim beten nena*

<sup>1</sup> Afa Sisas ena mo sihi fwahanim afa ofim nangunam sa enaig esona og, “Api, kam lahag was ati pugug sa ne nimbeafna Legim fingi fe asa ma nimbeafna Leg nem fingi fei.

<sup>2</sup> Ne kam kanog og sa ma elni misog el fei asa amban el kana ninga la lasanig eba ka ehengelim nufunam nofkenagag faifi.

<sup>3</sup> Afa nufunam nofkenagag eba enaig eseg asa ehengel nem ati anwenafig ne nufunam God mungu feg afa ka Sisas Kraiss ne kam ningihiag.

<sup>4</sup> Afa ena gafugag ne kam faina eba ati ka augig asa ka enaig fegba ka neana unehlagim hwa bite la fingi feg.

<sup>5</sup> O Api, afa bite mahim fiahfenaba afa big ahwagfenaba enanam kana unehlag eba kwania fena. Afa glawo ka membeg nimbeafna nof la enag kwania unehlag ne kam pese fai.

<sup>6</sup> “Afa enag bitenai el ne kam faina ka ehengelim sihinig afa nem ati anwenafig. Ehengelbi neana fena afa ne kana ninga la fwatig afa ehengel neana mo higigim patalfug.

<sup>7</sup> Afa mungwali kike mungu fegba ehengel ati anwenafig enag ne kam faig eba neana blog.

<sup>8</sup> Afa mungwali mo ne kam faig enag ka ehengelim faig asa ati flig. Afa ehengel anwenafig enag mo eba nufunam afa olug onigig ne kam ningihiagba na ka nem fwahigim ka blog.

<sup>9</sup> “Ka mas bitenai elim betenenig mo amo el asa ne kana ninga la fwatig eba neana feg na ka ehengelim betenenig.

<sup>10</sup> Mungwali el kana feg eba neana afa neana asa feg eba kana. Afa enag el ofug kana unehlag eba kwania feg.

<sup>11</sup> Afa glawo ka hwa bite fwahanam nem nangwagim blofe afa ehengel sa bite la auguia. O Api, neba afsug nemug afa nimbeafna wasneig unehlag sa ne kam faig ena unehlag la sa ne ehengelim nangwaghiage fegofum sa ma ehengel mungu afofi asa big mungu nemug ahfeg.

<sup>12</sup> Afa maia ka ehengelim wangohfnaba ka ehengelim kagfufehiage gofna enag neana wasneigni ne kam fainaba asa ka enaig esena. Mungwali suialagofena mas amban awaiena mo afa el mungu awaiena. Autunam neana mo enaig sihi fefwahana enag el mungu awaiefe afa enaba nufunam pugufe.

<sup>13</sup> Afa ati muhla ofe ka neanangum blofe afa ka bite la gohba hwa mo ka esona asa kana sifakal sa ma ehengel nai yi ihlafeni.

<sup>14</sup> Afa ka neana mo ehengelim faig enag fligim asa mas enaig bitenai el apukeg mo asa ka gafa mango bitenai el mo. Asa bitenai el ehengelim olug kakag fegonug.

<sup>15</sup> Ka mas nem esonai enag elim lambiba sa ma hwa bite la fwahi amo, ka nem enaig sahna fenag sa ne kagfufe hiage gofiba eba Satan mas ehengelim amtakwale klaiti.

<sup>16</sup> Afa ka mango bitenai el feg mo asa ehengel gafa gwenag.

<sup>17</sup> Afa neana mo eba nufunam nemug feg. Ka membeg hwa nufunam mo sa ma ehengelni onigig la gohfi asa neana el nemug apukufe.

<sup>18</sup> Afa ne kam bite gam ningihiag afa ka gafa ehengelim hwa bite la ningitigife.

<sup>19</sup> Ka kefum nem mungwali faig asa ehengel gafa gwenaig neana nemug fig.

<sup>20</sup> “Ka mango enag patalfuiag el mungu beteneni mo amo afa mungwali el asa patalfuiag elni mo higigim afa kam olug oniginig na ka ehengelim gafa ka betenenig.

<sup>21</sup> Afa ehengel sa ma mungu afohiefi asa big ahsafeg ne ka i ahgohug afa ka ne i ahgohug. Sa ma ehengel eba biningi nai yi afofi afa mungwali bitenai el sa ma onigi ne kam ningihiag na ka blog.

<sup>22</sup> Afa ne kam kwania unehlag faig afa ka ehengelim enaig unehlag faig asa ma ehengel mungu afohiefi asa big mungu ahfeg.

<sup>23</sup> Ka ehengelim wangohug afa ne ka i ahgohug sa ma ehengel mungu nemug fi. Asa bitenai el anwenafi ne kam ningihiagim afa ne kam fwina membenag afa ehengelim gafa ne gwenaig esenig.

<sup>24</sup> “Afa hwa bite puguia fwainig fiahfenaba ne kam fwina membenam asa ne kwania unehlag kam faina. O Api, ka membeg mungwali el ne kam faig ma ka nai yi ohi afofiba sa ma kana wasneig nangui.

<sup>25</sup> Api ne suialag nemug feg, afa bitenai el mas nem anwenafenig mo. Afa ka nem ati anwenafeg afa el ne kam faina ehengel ati anwenafig ne kam ningihiag na ka blog.

<sup>26</sup> Ka ehengelim neana unehlag ogfunig afa nem ati ambala anwenafenig afa ka gwenaig siakafiba afa membug sa ne kam fenag sa ma ehengel nai yi gofi. Afa kike gafa ehengel nai yi gofife.”

## 18

*Judas Sisasim angoluwag elni ninga la fwahana  
Matyu 26:47-56, Mak 14:43-50, Luk 22:47-53*

<sup>1</sup> Afa Sisas betene fwahanam heafna patalfuiag elim wankana bu wetim pe pafekolina, ena bu seflig Kidron. Afa ena maligim aso ati gi asa ehe enam mina saiye funa.

<sup>2</sup> Afa Judas eba mauule el anwenafena Sisas esim wanfaka fafegofe.

<sup>3</sup> Asa saglag pris afa farisi el Godna kwania lala anwasag el mi afa mingnag ami mi ningitigi. Afa ehengel wina maluna lambinim asa Judas esim wankana.

<sup>4</sup> Afa Sisas ati anwenafena mungwali enag ehem pugu-nafe. Asa ehe hilife ika gonam ehengel nai yi asa ehengelim sahtigina og, “Nengel ambanim ne yisigi ambeg?”

<sup>5</sup> Afa ehengel wahigi esogona og, “Sisas Nasaret la naim ka yisigi ambeg.” Afa Sisas esog, “Ena ka hwaba feg.” (Mauule el Judas mungwali afofena.)

<sup>6</sup> Afa maia Sisas esonaba og, “Ena ka hwaba feg” afa ehengel amosna afunam bite la apaiyena.

<sup>7</sup> Bugiagafe afohiafenaba afa Sisas pese sahtigina og, “Nengel ambanim ne yisigi ambeg?” Afa ehengel esogona og, “Sisas Nasaret la naim.”

<sup>8</sup> Afa Sisas sihina og, “Kati nem sihinig na ka hwaba. Afa ne kam kehligim ambegba afa enag patalfuiag el mo fwati sa ma afui.”

<sup>9</sup> Afa ehe hwa mo sihig asa heafna mo eba nufunam pugufe. Eba ehe enaig sihina og, “Mungwali el ne kam faina suialagofena mas amban awaiena mo.”

<sup>10</sup> Afa Saimon Pita pina skoflanam prisni misog elni gafugag elim tigena. Ehe ehena ninginai angugum higiaflaitina. Enag gafugag elni unehlag eba Malkus.

<sup>11</sup> Afa Sisas Pitam wasneig mo sihina og, “Pina pese gauwag la fangu! Ena kinig Api kam faig eba mas ka kwenai.”

### *Sisasim Anas nangum wanigafuna*

<sup>12</sup> Afa Romna ami afa ehengelni misog el afa Ju elni anwasag el Sisasim kehlinim wena kikenagini.

<sup>13</sup> Afa ehengel Sisasim Anas nangum wanigafuna. Afa Anas eba Kaiafasna kowag. Afa ena yiana Kaiafas eba prisni misog el gofena.

<sup>14</sup> Enag Kaiafas Ju misog elim enaig sihifeni og, “Eba suialafeg enag elim mungu tigibi sa ma mungwali el suiala afohie.”

### *Pita hefum sisagena*

*Matyu 26:69-70, Mak 14:66-68, Luk 22:55-57*

<sup>15</sup> Pita i afa mingnag patalfuiag el i sum Sisasim patalfuna. Prisni misog el enag patalfuiag elim anwenafegoni asa ehe Sisasim misog elni lalana bog megam patalfunam saiye afuna.

<sup>16</sup> Afa Pitam kwenimba asa ehe afwambala mengig muhla gofena. Afa prisni gafugag angwafig mengig la gofena. Afa ming patalfuiag el pese ikana angwafigim sihinam asa Pitam sefu wanikana.

<sup>17</sup> Afa enag angwafig angwaming Pitam sahna og, “Atiasi ne gafa ehena patalfuiag el si me?” Afa ehe esog, “Amo, kaba awai.”

18 Afa nineg feskofenaba asa gafugag el i, anwasag el i suwi wehlinim nahbwag fiahfufnaba afa Pita gafa enanai yi afofenaba sa nahbwage gofena.

*Prisni misog el Sisasim sahnagini*

*Matyu 26:59-66, Mak 14:55-64, Luk 22:66-71*

19 Afa enanam prisni misog el Sisasim heafna patalfuiag el mi afa heafna ogfuiag mo mi enam sahnagini.

20 Afa Sisas wahigi sihina og, “Ka hwa mo mungwali elim ambala sihinig. Godna kwania lala afa Ju elni laskuhlag lala ka enaig eseg. Ka mas meagam gafugafeg mo.

21 Haisegba ne kam sahnageg? Amban el kana mo sa higig ehengel ena mom ati anwenafig. Sa ne ehengelim sahtigi mangwalim sa ka sihina.”

22 Afa maia Sisas esonaba anwasag el mungu Sisasim asank la pounam og, “Ne mangigim prisni misog el enaig sihifeneg?”

23 Afa Sisas ehem sahna og, “Afa kana mo mas suialafeg fwainigba eba sa ne ena mo ambala elim sihini hosa afohie. Afa kana mo ugwe ika fegba haisegba ne kam tigege?”

24 Afa we Sisasna ninga la gwese gofenaba afa Anas ehem prisni misog el Kaiafas nangum ningihiana.

*Pita hefum pese sisagena*

*Matyu 26:71-75, Mak 14:69-72, Luk 22:58-62*

25 Afa Pita mahim nahbwage gofenaba afa el ehem sahni og, “Atiasi ne gafa ehena patalfuiag el si me?” Afa ehe esog, “Amo, kaba awai.”

26 Afa prisni misog elni gafugag el mungu enanai yi gofena. Asa Pita ehena nilitem angugum higiflaitina. Ehe Pitam sihina og, “Atiasi ka nem nangunaba neba ehi aso la ahgofena?”

27 Afa Pita pese sihina og, “Amo, kaba awai.” Afa ikagna kakaruk moasihina.

*Sisas Pailatna nof la gofena*

*Matyu 27:1-2,11-14, Mak 15:1-5, Luk 23:1-5*

28 Afa Sisasim Kaiafasna lala nai sugufinim asa Romna misog elni lala gam wanigafuna. Eba leana gubi fena asa Ju el ena lala mas saiye. Afa ehe membig Pasova buyis ahgagim afa Ju elni nihe mo enaig esog Ju el nofeka afwambanai elni lalam saiye.

29 Asa Pailat afwambagam ehengelim nangum ikanam sahtigina og, “Mangwal ehe nem fenigbi na ne ehem sehiginig?”

30 Afa ehengel enaig sihifeni og, “Afa ehe haig haig eseg fwainigba ka mas ehem neana nangum wanig ambe.”



<sup>31</sup> Afa Pailat sihini og, “Nimbe pese wanigafunam asa nimbiafgelni nihe mona kwefihianagi.” Afa Ju el ehem pese sihini og, “Nengelni Romna nihe mo enaig sihifeg kagel mas elim kwefihianaginim tigifati.”

<sup>32</sup> Afa hwa enaig pugugba eba Sisas ati esona asa enag nufunam puguna. Enag mo ehe sihig ehe li katigeg la lahafe.

<sup>33</sup> Afa Pailat pese sefu ikanam Sisasim awamonam asa ehem sahna og, “Atiaho neba Ju elni misog el?”

<sup>34</sup> Afa Sisas esona og, “Enag sahig eba nimbeafna onigig la me awai amban el nem enaig sihifenagba na ne enaig sahig feg?”

<sup>35</sup> Afa Pailat sihina og, “Ka mango Ju el mo! Eba nimbeafna el i afa saglag pris i ehengel nem ka nangum wanigambe. Eba haig ne esenaba?”

<sup>36</sup> Afa Sisas enaig esog, “Ei kaba misog el feg afa ka mas bitenai elni misog el lofeg mo. Afa ka bitenai misog el lofeteba eba kana gafugag el ambe kam kwefutim angoluwig gim fegoniti asa mas ka Ju elni ninga la gofite. Afa mungwali el ka nangwaghiageg ehengel mas bitenai nihem onigi.”

<sup>37</sup> Afa Pailat ehem sahna, “Ei, neba misog el ehe?” Afa Sisas sihina og, “Ei, neana mo eba nufunam kaba misog el feg. Ka hwa bitegam ka blogum asa ka enag gafugafegim eba nufunam mo sihiagim asa mia kam wanigag. Afa amban el asa nufunam mo mungu patalkug enag el kana mo higig.”

<sup>38</sup> Afa Pailat sahna og, “Nufunam mo eba mangwal maia?” Afa ehe pese afwambagam pugunam Ju elim nangwag ikanam esona og, “Ka nangug enag el mas mangwal feg mo asa ka enaig eso ehem tigi ma lahai.

<sup>39</sup> Afa mungu mungu Pasova buyis ofibi nengel kam fasahinifi afa enanam ka kalabus el mungu nengelni ka fafwatife. Afa enag Pasova buyis opuguhba nengel membig ka sonag ‘Ju elni misog el’ nengel nai yi fwaha?”

<sup>40</sup> Afa ehengel ehem fwina esogona og, “Amo, sonag el eba awai, sa ne Barabasim fwaha.” (Afa eba ugwefula afa elim tigifatiule el.)

## 19

<sup>1</sup> Afa Pailat amiim esonibi sa ne Sisas kehlinim fliflifefli.

<sup>2</sup> Afa ami enaig esini afa we nasigna lambinim molukugunim Sisasna misog la hogolini afa tafnaig lofug ehem fatini. Afa enag misog elni mwakwalig wag ehem enaig esenagini.

<sup>3</sup> Afa ehengel ehem muhla apukenam afa mwakwalini ehem esogona og, “Sa nangu, neba Ju elni misog el.” Asa ehem pupufenagini.

<sup>4</sup> Afa Pailat pese afwambagam pugunam Ju elim sihini og, “Sa hig, ka ehem fahigenagegba ehe mas mangwal feg mo. Na ka pugu nengel nangum waniblug asa ne nangui.”

<sup>5</sup> Afa enag we nasig nai yi afa lofug tafnaig yi gwese Sisasna elig i afohiafenaba asa ehe afwambagam pugu blona. Afa Pailat ehengelim sihini og, “Na hwa elbi, sa nangu.”

<sup>6</sup> Afa maia saglag pris i anwasag el i ehem nangunim asa fwina esogona og, “Tigi, tigi ehem tiginim li katigeg la fli kahli.” Afa Pailat esoni og, “Nimbe membigbi sa ne wanigafunam li katigeg la sa ma lahai. Afa kike fahigenagegba afa ka onigig ehe mas mangwal feg mo.”

<sup>7</sup> Afa Ju el enaig esogona og, “Ehe enaig sihifeg kaba Godna leg afa kagelni nihe mo enaig gifig el enaig esogba sa ma lahai.”

<sup>8</sup> Afa Pailat ene mo higinam asa ehe fwina embefena.

<sup>9</sup> Afa ehe pese lalagam sefukanam Sisasim sahna, “Ne hanai blog?” Afa Sisas mas ehem mo kwegfulagna mo.

<sup>10</sup> Afa Pailat ehem sihina og, “Haiseg ne mas kam mo kwegfulagnag mo? Sa hig, ka enaig wasneigni feg eba ka nem fwahai afa ka nem li katigeg la kahli.”

<sup>11</sup> Afa Sisas ehem sihina og, “Afa God nem wasneig faig fwainig fegba asa mas ne kam pigaupi asa el kam neana ninga la fwahig enag elni amtakwalig eba neanam gosinag.”

<sup>12</sup> Afa Pailat ena mom higinam afa mina yisigiafena Sisasim fwahiagim. Afa Ju el fwina esogona og, “Afa ne sonag el fwahiaiba asa ikafe eba ne mango misog el Sisarna hihe mo. Amban el sa esog kaba misog el feg enag el eba Sisarna angoluwag.”

<sup>13</sup> Afa Pailat ena mom higinam asa Sisasim afwambagam wanikinam kwefihiageg kife la pegana. Afa enag lala meg eba fun simena. (Afa Hibru mona seflig Gabata.)

<sup>14</sup> Afa sini Pasova buyis pugufe afa osu misosufgigim mahim fiahfenaba. Afa Pailat Ju elim esoni og, “Nangui nengelni misog el.”

<sup>15</sup> Afa ehengel fwina esogona og, “Tigi, tigi, ehem tigifati li katigeg la kahli!” Afa Pailat sahtigina og, “Ne membig ka nengelni misog elim li katigeg la fli kahlibi sa ma lahai?” Afa saglag pris enaig kwegfulagni og, “Sisar mungu kagelni misog el feg mingnag misog el eba awai.”

<sup>16</sup> Afa Pailat Sisasim ehengelni ninga la fwahaniba asa ehe li katigeg la fli kahlini. Asa ami ehem kehlinim.

*Sisasim li katigeg la kahlini*

*Matyu 27:32-44, Mak 15:21-32, Luk 23:26-43*

17 Afa ehe heafna li katigeg maia kufehlanamba asa wani-gafuna. Afa mungwali afu ena bite la apukena eba seflig misog kig gig bite. (Afa Hibru mona eba seflig Golgota.)

18 Afa enanai yi ehengel Sisasim afa ming sambaganigi el mi li katigeg la lambi kagini. Afa Sisas olyi luguna afa sambaganigi el mo ehbegam ahlugwagna.

19 Afa Pailat esonibi asa li katigeg la enaig ginofini:  
Sisas Nasaret la nai, Ju elni misog el.

20 Sisasim sa kahlini eba Jerusalem muhla afa enag ginof eba Hibru mona afa Romna mona afa Grikni mona ginofini.

21 Afa Ju elni saglag pris Pailatim lagnana og, “Ne magigim enaig ginofeg ‘Eba Ju elni misog el’ sa ne enaig ginofeite ‘Ehe enaig esog kaba Ju elni misog el’ ”.

22 Afa Pailat sihina og, “Mangofi, mo sa ka ginofeg ati gwenai goh.”

23 Afa ami Sisasim asa li katigeg la kahlinim afa enag sambaga sambaga ami Sisasna lofug flinim afa hefum mimagini. Afa ming nineg lofug flini eba mungu mas ming lofugna pahli kwelini mo.

24 Asa ami hefum enaig esogona og, “Ese big enag lofug koskofifi. Nawo satu enana sa gosisi maia amban aflafiba.” Afa ehengel enaig esigbi afa Godna mo ati gifini enag nufunam puguna. Enag mo enaig esog;

Kana lofug hefum mimagifi afa kana nineg lofug flinim enana satu gosisifi. *Sam 22:18*

Asa ami enaig esini.

25 Afa Sisasna afag, heafna sumineg, afa sambaganigi Maria ahfena, ming eba Klopasna angwag afa ming Maria Makdala lanai afa ambenam Sisasim muhla muhla afohi-afena.

26 Afa Sisas heafna afagim nangunam afa patalfuiag el asa ehe fwina membena nangunam maia muhla gofenaba afa afagim esona og, “Mia sonag el eba neana leg.”

27 Afa ehe enag patalfuiag elim esona og, “Enag angwafig eba neana afag.” Afa enanam patalfuiag el ehem heafna lalagam wanikinam asa enag angwafigim suialafiahflana.

*Sisasna lahag mo*

*Matyu 27:45-56, Mak 15:33-41, Luk 23:44-49*

28 Afa Sisas anwenafeg heafna mungwali gafugag ati augig. Afa ehe membeg Godna mo asagi sa ma enag nufunam pugui asa ehe enaig esog “Ka bu hefeg.”

29 Afa miaklana bu botolna muhla gofena asa ulefle lofug enaig flinim miaklana bu la fighinim aga la pahginim fingi kwalig Sisasna memtog la nehini.

30 Afa Sisas enag bu nenam asa ehe esona og, “Eba gwenaho!” Afa ehena misog hugfu penam afa ehe nufuna lahafena.

*Ami Sisasna emesiegim fagna pifina*

31 Afa enag osuna eba Fraide afa ming osuna eba kwania buyis pugufe. Afa Ju elni saglag oksig enag osuna lahad el li katigeg la lugwagim asa ehengel Pailatim sahni og, “Sa ne mongim tutohianugeba sa ma ikagnaule pigigba asa melig mo li katigeg lanai lamb pei.”

32 Asa ami afunam sambaganigi elni mongim tutohianugini asa Sisasna muhla katigini.

33 Afa ehengel Sisasim ambe nangunibi eba ati lahana asa mas ehena mongim tutohianagini mo.

34 Asa ehemba enaig esini ami mungu emesiegim fagna pifinaba asa taf i bu i sugfuna.

35 (Afa el enam nanguna maia enag pugunaba asa ehe ena mo sihiageg afa heafna mo eba nufunam feg. Afa ehe anwenafeg heafna moba nufunam asa ehe enaig sihifeg sa ma nengel enam olug onigigim kehli.)

36 Afa enag pugugba eba Godna mom ihlafeg. Eba enaig esog, “Mas ehena mungu kigim tofui mo.”

37 Afa ming Godna mo enaig esog, “El sa fagna pifina sa ma ehengel ehem enam nangwafufi.”

*Sisasim bite kife la fakini*

*Matyu 27:57-61, Mak 15:42-47, Luk 23:50-56*

38 Afa Arimatea kembang la nai el Josep blonam Pailatim sahna og, “Ma ka fwahaiba Sisasna eligim ka sa flauku.” Afa Josep eba Sisasim patalkuiaule afa ehe Ju elni saglagim embefenam asa ehe hefum kumwahlana. Afa Pailat ehem sawifenaba asa Josep ika flanam sa flaukuna.

39 Afa Nikodemus i ehe i ahkana. Autunam Nikodemus Sisasim sinaini blo nanguna. Afa ehe 30 kilogram sanda i pauda i lambi lambluna. Enag sanda eba seflig mer afa alos.

40 Afa eheningi Sisasna elig aflaukunam asa sandana paudana wahag ahfenam sa aitinag ahfena afa lofugna sagnag ahfena. Enag gafugag eba Ju elni nihe lahad elim enaig safifi.

41 Sisasim asa tigi kahlini eba aso muhla. Enanai yi glaunai fun meg gofena afa mas enag fun meg la hugum skoafufna mo.

42 Afa enag fun meg muhla gofena afa Ju elni auguiag osuna muhla ofefenaba asa eheningi enanai yi Sisasim ahflauku ahfakana.

## 20

*Biteg kifeg behig gofena*

*Matyu 28:1-8, Mak 16:1-8, Luk 24:1-12*

<sup>1</sup> Afa Sande leana si melam Maria Makdala nai biteg kifeg nangwagim ikana afa ika nangunaba fun asa mengigim kag-funi enag fun mengig lanai hilifu alganam fakini mengigba pigi gofena.

<sup>2</sup> Afa ehe kikini ikana Pita mi afa ming patalfuiag el mi Sisasa ehe ehem membena ehe ika ulambanam sihini og, “El ati Ainiyagna eligbi flifug asa kagel mas anwenafig mo hanai yi ehe ufufakig!”

<sup>3</sup> Asa Pita i afa enag patalfuiag el i biteg kifeg gam ahkana.

<sup>4</sup> Afa eheningi kikini ahkana asa ming el Pitam lasunam gof biteg kifeg gam ika puguna.

<sup>5</sup> Afa ehe mas seaifu kana mo ehe fisahfe penam biteg kifeg gam nofenaba lofug sa enana kikenagi fakini enam mungu afogwafena.

<sup>6</sup> Afa Pita sumi yi blonam biteg kifeg gam seaifu ikanam nangonaba lofug mungu afogwafena.

<sup>7</sup> Afa lofug Sisasa misog kikenagini enag lofug mas mungu la afogwafena mo eba alganam topeskesinim faki fwahini.

<sup>8</sup> Afa enag patalfuiag el sa gof biteg kifeg la ika puguna ehe gafa sa sefu ikana afa ehe nangunam asa olug onigina.

<sup>9</sup> Afa eheningi Godna mom mas enam numwehe anwenafena mo asa enaig sihifeg og Sisasa lahanam pese biteg kifeg lanai buihiafe.

<sup>10</sup> Afa enag sambaga patalfuiag el pese lala gam ahkana.

*Maria Makdala nai Sisasim nanguna*

*Matyu 28:9-10, Mak 16:9-11*

<sup>11</sup> Afa Maria Makdala nai biteg kifeg la afwambala gofenam ufwe gofena asa fisahfe penam nofeagenam,

<sup>12</sup> afa sambaganigi oflanai elim nanguna afa eheningina lofugba busug. Afa autunam enanai yi Sisasim fakini asa eheningi enaig ahsafena ming misog gam gana afa ming mongim gana.

<sup>13</sup> Afa eheningi ehem ahsahna og, “Angwafig, magigim ne ufweg?” Afa ehe esona og, “El kana Ainiyagna eligim flifug asa ka mas anwenafeg mo hanai yi ehem ufu fakig.”

<sup>14</sup> Afa ehe enaig sihife fwahanam asa waikefe Sisasim nanguna ma gofenaba. Afa ehe mas anwenafena mo ehe eba Sisasa, ehe etetina.

<sup>15</sup> Afa Sisasa ehem sahna og, “Angwafig, magigim ne ufweg? Ambanim ne yisige blog?”

Afa Maria onigig enag el ehe asona mog asa enaig sihifena og, “Saglag, neaho Sisasna eligim wanaiba flaukug sa ka sihina hanai yi ne ehem fakag asa ka ika flanam uku.”

<sup>16</sup> Afa Sisas ehem sihina og, “Maria.”

Asa ehe waikefe Sisasim nofbosug nehina afa Hibru mona sihig, “Rabonai.” (Enag mog mo eba tisa.)

<sup>17</sup> Afa Sisas ehem sihina og, “Ka mas Alagim pese nangugim ikag mo asa nofene kam kehla. Amo, eba sa ne kana nilitem ika sihini og, “Ka kiafena Alag nangum pese ako ehe nengelni Alag eba kana God afa nengelni God.”

<sup>18</sup> Asa Maria Makdala nai higinam ikana patalfuiag elim sihini og, “Kati Ainiyagim nangug” afa mungwali mo sa ehe ehem sihina enag ehe sihiagena.

### *Sisas heafna patalfuiag elim puguni*

*Matyu 28:16-20, Mak 16:14-18, Luk 24:36-49*

<sup>19</sup> Afa Sande osupeгна patalfuiag el lala laskuhla gofena. Afa ehengel Juni misog elim embefegoni asa mengig kikisinim auguiafna. Afa Sisas ehengel nai yi olyi pugunam enaig esoni og, “Nengelni olug sa ma enesiegna gofi.”

<sup>20</sup> Afa ehe enaig esonam asa heafna ninga i afa heafna emesieg ehengelim ogfuni. Afa patalfuiag el Ainiyagim nangunim asa ehengel fwina sifakalini.

<sup>21</sup> Afa Sisas pese sihina og, “Nengelni olug sa ma enesieg gofi. Alag kam ningihiag asa ka gafa nengelim ningitigife.”

<sup>22</sup> Afa ehe enaig esonam asa ehengelim heafna efefug faini afa sihini og, “Nengel sa ma Godna Sungwabug fli.

<sup>23</sup> Afa ne mingnag elni amtakwalig huguflafatinagba asa ehena amtakwalig awaieg. Afa ne ehem esinig fwainigba asa ehena amtakwalig gwese gonfifie.”

### *Tomas Sisasim nanguna*

<sup>24</sup> Afa Sisas heafna patalfuiag elim blona nangwagina afa enanam Tomas mas mungwal auguiafena mo. (Tomasna ming unehlag eba Didimus.)

<sup>25</sup> Asa mingnag patalfuiag el ehem sihini og, “Kagel Ainiyagim ati nangug.” Afa Tomas ehengelim esoni og, “Asa ka heafna ninga la nil gokug nangufe. Asa kiafena ninga bul nil gokug megam hugufenam asa kiafena ninga ehena fag gokug megam emesieg la hugufenai. Afa ka enaig eseg fwainigba ka mas nengelni mo higinini.”

<sup>26</sup> Afa maia elegeg la gohug osuna awai enaba afa mungwali patalfuiag el lala megam auguiafena Tomas mungwali. Afa mengig ati kikisini afa Sisas olyi puguni afa esoni og, “Nengelni olug sa ma enesiegfe.”

<sup>27</sup> Afa ehe Tomasim esona og, “Kana ninga gokug nangunam afa nimbiafena ninga bul wanai yi hugufe. Asa nimbiafena ninga kana hagemagig megam hugufe. Masa neanai yi sambaga onigig gofufe enaig mo fwahanam asa ne kam olug onigina.”

<sup>28</sup> Afa Tomas ehem sihina og, “Neba kana Ainiyag afa kana God.”

<sup>29</sup> Afa Sisas ehem sihina og, “Ne kam nangugim asa ne kam olug oniginag. Afa mingnag el kam mas nangu mo asa ehengel kam olug oniginig ehengel sa ma sifakali.”

<sup>30</sup> Afa Sisas kaksag kigmog heafna patalfuiag elni nof la ogfuna afa enag mo mas hwa buk la afwaiye mo.

<sup>31</sup> Afa ka hwa mo ginofeg asa ne anwenafenim Sisas eba Godna Gisfu Fwahag El ehe Godna leg. Afa ehe enam olug onigini asa heafna unehlag la sa ma ne nufunam nofkenagag flifi.

## 21

### *Mingnag patalfuiag el Sisasim bu blug yi nanguni*

<sup>1</sup> Afa sumi yi Sisas Taiberius bu la heafna patalfuiag elim pese puguni. Eba enaig pugufena.

<sup>2</sup> Saimon Pita afa Tomas (heafna ming unehlag eba Didimus) afa Nataniel ehe Kena lanai kembang eba Galili provins lanai afa Sebedina sambaganigi luwal afa sambaganigi ming patalfuiag el mungwal auguiafena.

<sup>3</sup> Afa Saimon Pita ehengelim enaig esoni og, “Ka sawag lagum ako.” Afa ehengel ehem esoni og, “Bigel mungwal afuiagim.” Asa afu bot la augunam afuna afa ena sinaini mas sawag mungwa gafa flini mo.

<sup>4</sup> Afa leana gubi osu puguiagim ofefenaba Sisas bu blug yi gofena. Afa patalfuiag el mas anwenafini mo enag el eba Sisas.

<sup>5</sup> Afa ehe ehengelim sahtigina og, “Oi nilite, atiaho ne sawagba lambig?” Afa ehengel wahigi sihini, “Amo, awai, kagel mas mungwag gafa flig mo.”

<sup>6</sup> Afa ehe ehengelim sihini, “Sa nimbiafgelni fufwala flinim nihiginai ehagam fati eba ne sawag lambifi.” Asa ehengel enaig esinibi asa sawag fufwalam memtog la puguiagenaba asa ehengel fufwalam fligim kinig usniafufna.

<sup>7</sup> Afa enag patalfuiag el Sisas ehem membena, ehe Pitam sihina og, “Eba Ainiyag ehe.” Afa Pita ena mo higinam ikagna nineg lofug mo pese flafatinam oga Sisas nangum ika asa ehe bu la penam bu sus fakafe.

<sup>8</sup> Afa mingnag patalfuiag el bot la sumi yi ambena afa fufwala mo sawag nel lambilafuna ehgig gam. Eba bu blug yi muhla enaig 100 mita asa ehengel enaig esini.

<sup>9</sup> Afa ehengel ambe maligim apukenam nangunibi sawagna ambana suwi la afogafena.

<sup>10</sup> Afa Sisas ehengelim sihina og, “Sawag sa ne glawo lambig osum mingnag mo lambi.”

<sup>11</sup> Saimon Pita bot la pese fukunam asa fufwala mo maligim suflaukuna. Afa fufwala megamba 153 kwania sawag mungwali fena. Eba kaksag sawag fenam afa fufwalaba mas kwafona mo.

<sup>12</sup> Afa Sisas ehengelim sihina og, “Au ambe ahga.” Ehengel ati anwenafini eba Ainiyag asa ehem mas amban sahna mo og, “Neba amban maia?”

<sup>13</sup> Asa Sisas ika amba flanam asa ehengelim mimageni afa sawag gafa gwenaig eseni.

<sup>14</sup> Afa Sisas biteg kifeg la nai pese buhianam afa hefum uku patalfuiag elim ogfunibi enag eba sambaga mungu nangim esena.

### *Sisas Pitam mo faina*

<sup>15</sup> Afa ehengel fane ahgagi fwahinim asa Sisas Saimon Pitam enaig esona og, “Saimon Jonna leg, atiaho neana olug ka nai yi lugwa awai me ne mingnagim gosenig?”

Afa Pita wahigi esog, “Ei Ainiyag, ne ati anwenafeg ka nem membenag.”

Afa Sisas sihina og, “Kana sipsip luwaligim sa ne fane yuwig gofum.”

<sup>16</sup> Afa Sisas pese sahna og, “Saimon Jonna leg, atiaho neana olug ka nai yi lugwa?” Afa Pita wahigi esog, “Ei Ainiyag, ne ati anwenafeg ka nem membenag.”

Afa Sisas sihina og, “Kana sipsipim sa ne nangwagihige gofum.”

<sup>17</sup> Afa Sisas pese sahna og, “Saimon Jonna leg, atiaho ne kam membenag?”

Asa Pita olug kinig fena maia Sisas sambaga mungu nagim ehem enaig sahna fenaba og, “Atiaho ne kam membenag?” Afa Pita wahigi esog, “Ainiyag, ne mungwali ati anwenafeg. Ne ati anwenafeg ka nem membenag.”

Afa Sisas sihina og, “Kana sipsip sa ne fane yuwig gofum.

<sup>18</sup> Afa ka nem nufunam sihinag glawana ne kwablog fiahfenaba ne numwehiage fenam nimbeafna membug la ikafena. Afa maia ne watiugba ne nimbeafna ninga aitiageba asa el neana ningam wena kikenaginim asa nem wanigafufe afa ne mas membeg mo esim ikagim.”



19 Sisas enaig sihifena eba enag mo ogfug Pita sa haig lahafe eba ehe Godim finig fefe. Afa ehe Pitam sihina og, “Sa ne kam patalku!”

*Sisas afa mingnag patalfuiag el*

20 Afa Pita waikafenam sum nanguna enag patalfuiag el Sisasa eba ehem membenag. Eba sum patag la bluna. Afa tunam enag patalfuiag el buyis ahgafenaba eba ehe Sisasim muhla fenam sahna og, “Ainiyag, amban sa nem angoluweg elni ninga la fwahafe?”

21 Pita eba ehem nangunam afa Sisasim sahna og, “Hwa elbi sa haig esefe?”

22 Afa Sisasa eba ehem sihina og, “Ka membeg sonag el sa ma nofkenagag gafiba sa ka pese blofe. Eba mango neana mo mo. Afa neawo sa ne kam patalblu.”

23 Afa Sisasa el ena mo higinim eba hefum sihiageni og sonag patalfuiag el mas lahai. Afa Sisasa mas enaig sihifena mo. Afa eba hwaig sihifena og, “Ka membeg sonag el sa ma nofkenagag gafiba sa ka pese blofe. Eba mango neana mo mo.”

*Hwa mo Jon sa ginofena eba nufunam feg*

24 Sonag patalfuiag el eba kike. Afa ka ena mom sihigim eba ka ginofeg. Afa mungwali anwenafeg ena mo eba nufunam feg. 25 Afa Sisasa kaksag mingnag gafugag fiahgena. Afa el mungwali enag mom buk la ginofegbi afa mungwali bite sigag mas gohug mo enag buk enanai yi skugum. Gwenaho.

## **Aposel El Gafugag Esini**

### **Hwa buk enaig esog**

Ilawana mo Luk buk Luk ginofenam afa hwa buk Lukna ginof gwesim sihiakag. Hwa ginofba enaig esog Godna Sungwabug kanog fwatieg elim mina ogfunibi sa ma suialag mo sihiawagiafwi afa Jerusalem la afa Judia kembang afa Samaria kembang afa mungwali bite sa ma ihla gohwagei. (Aposel 1:8) Hwa buk enaig esog goflanai Kristen el eba Ju el puguiagegim asa mingnag kembang gam mo ikaminefeg. Afa kwania mo eba Godna Sungwabugni gafugag eseg ena mo. Ehe pe blo kanog fwatieg elim kigmognugenaba asa kaksag el Godna suialag mom numwehe patalfugim afa mingnag el gafa Sisasim olug oniginig. Hwa bukba kaksag kanog fwatieg elim sihig. Afa kaksag mo eba Pita nai yi Pol nai yi mom mi afa gafugag mi. Pita eba ati Sisas i mungwal ahwagiakafena afa Pol eba awai ehe mas enaig esena mo. Ilawana Pol eba Sisasna elim kwaskofiahkafna. Afa Sisas hefum Polim ogfuna asa Pol olug waikefenam asa ehe Godna suialag gafugag el puguna.

1-2 O Tiofilus, ka nem hwa ginof ningihinag hwa buk laba gof ka enaig mo ginofena. Sisas ilawana ehe mungwali mangwal elim ogfufenig feaka ikag lahad la pugugba God suluflag hevengam wanikig. Afa ika heafna patalfuiag elim pugunigim asa gafugag elim mo sihiafugum wegig fwatigba Godna Sungwabugni kigmog la ena mo sihinibi og, sa ma heafna gafugafeagi.

3 Afa Sisas ilawana mo susug flagim afa lahad, afa sumi yi mo nofkenagag flagim ika gafugag elim puguni. Sa ma enam anwenafi. Afa pese buhianam 40 osuna gafugag elim wananamba asa nanguni. Afa Godna bog meg mo sihinugena.

4 Enanam maisim wanafenaba enaig sihifeni og, “Nofeka Jerusalemba fwahi asa nengiaflam mangwalim Api sa sihi fwahag nem esug faigim ilawana sa ati ka nem enam sihini.

5 Jon elim bula laitina afa ilawaba mas maisifei eba ne Godna Sungwabugni bula apaiyefe.”

6 Afa enanam patalfuiag el laskuhlanam afa ehem sahini og, “Ainiyag enaiba ilawo gohnanam eseiba asa Israel ma pese pugu kigmoiba asa bigel misog el nangwaghiagefe?”

7 Afa ehe pese sihini og, “Api sa enag osuna wegfu fwatig, eba mas ne enam anwenafi eba ehe heafa enaigimba nangwaghiageg.

<sup>8</sup> Afa ma nengigim Godna Sungwabug pe blonam nengelim gohoni bi asa ne kigmog flinim asa ne kana moaba Jerusalem la sihinim afa gwesim Judana mungwali bite afa distrik Samaria afa mungwali bite sa ma ihla gohwagei.”

*Sisas heven gam fukukag*

<sup>9</sup> Sisas ena mo sihi fwahanam maia nangwaskafenaba asa ehe mo fuku leango megam seaifonaba afa mas nanguni mo.

<sup>10</sup> Afa maia fukukanaba afa ehengel maisim of gam nunof fiaskafnaba afa gwenanam ikagna sambaganigi oflanai el ahwangofena afa eheningina lofugba fwina busbusiagena.

<sup>11</sup> Afa sambaganigi el enaig sihi ahfeni og, “Ne Galili nai el mangigim munim ne of gamba nunof fiaska ena Sisasba eba God ehe suialaflag enag nem lasanig of gam fukukag eba gwenai pesese blofe asa ilawo ne nangugbi of gam fukukag.”

*Mungu elim wegfu fwahini og, ma Judasna sigagla gohnam gafugafei*

<sup>12</sup> Afa patalfuiag el Oliv mug fwahinim Jerusalem gam afuna. Jerusalemba Oliv mug muhla gifini.

<sup>13</sup> Afa enanai yi afu apukenam asa lalagam mo fukwali afuna. Enaba fukwali afunaba eba Pita, Jon, Jems, Andru, Filip, Tomas, Bartolomyu, Matyu, Jems eba Alfiusna leg, Saimon eba Selot ehgenai el afa Judas eba Jemsna leg.

<sup>14</sup> Mungwali enag laskuhlafenam asa mungu onigig flinim sa betenneafufena. Afa angwafig apaiyegona afa Maria Sisasna afag fena afa Sisasna nilite apaiyegona enag mungwali laskuhlafenam asa esifini.

<sup>15</sup> Afa enanam sa el Sisasim oniginibi eba ehegelni nambaba 120 enaig fena. Afa Pita olyi gohnam mo enaig sihi feni og,

<sup>16</sup> “Ei, nilite autunam Godna sungwabug Devitim esenamba asa Devit mo sihina afa ena moba Godna buk la goh. Judasim sihinig og, sona elbi mauule el asa Sisasim angoluwagni ninga la fwahag asa enag ilawaba pugugba eba Devit ati sihi fwahana.

<sup>17</sup> Afa ilawana Judasba kagel yi gofnaba afa ehe mungwalofug gafugag kafini.”

<sup>18</sup> Judas amtakwalig esenam asa kig flanam afa enana bitem baimena afa sa negigim hefum mo ena bite la misogna penam afa atag pukonam asa lahana.

<sup>19</sup> Asa sumi yi Jerusalem la nai el mungwali enam anwefafini. Afa ena biteba heafgelni mona seflig Akeldama eba enaig esogog taf bite.

<sup>20</sup> Afa Pita pesese sihina og, “Hwa moba ati mwanafi buk la gofena, enaig ginofini og;

Heafna lala sama esug gofi. Ese amban enanai yi gafife. *Sam 69:25*

Afa ming ginof ena buklaba enaig esog;

Sama ming el ehena kug la gohnam gafugafei. *Sam 109:8*

<sup>21</sup> “Afa nawu ambanim mungu wegi fwahi amban sa wahkig bigel nena gofena maia Sisas Ainiyag bigim wan-gofenaba.

<sup>22</sup> Sonaig elbi ati gofena maia Jon bula latiag el mo sihiakag ikag maia God Sisasim suluafلاغba asa bigim lasanig sisi gam fukukag. Asa big enaig elim wegi fwahibi eba ati mungwali haig haigim lambusiageg sama bigim pahlanim Sisasna pese buihiag mom sihi.”

<sup>23</sup> Maia Pita enaig sihifenaba, asa sambaganigi elim wegi fwatigini eba Josepmi Matias mi. Afa Josep ming unehlag seflinibi eba Barsabas afa Jastus.

<sup>24</sup> Afa ehengel enaig betenini og, “Ainiyag, ati ne mungwali elni olnigigim anwenafenig sa ne kam ogfuni hwa sambaganigi elbi ambanim sa ne wegi fwahag.

<sup>25</sup> Asa ma kanog fwahag el pugunam Judasna kifegla blo gohi Judas ati fwahagim afa ehe awaieg kembig gam ikag.”

<sup>26</sup> Afa sa fun klaitini, ogma atiaba ambana fun opugufiba eba enaho Godna mo sihiakaule elbi ogoh. Asa Matiasna fun puguna afa sa Matiasim fwahini asa 11 pela Aposelim pahlani.

## 2

### *Godna Sungwabug peblona*

<sup>1</sup> Afa maia Pentikos buyis pugunaba enanam Ainiyagna el mungu lala laskuhla gofena.

<sup>2</sup> Afa sa aune gweyi ikagna puguna heven la gohnam afa blona el laskuhlag lalam puguagena. Ofenaiba bifwat oblo.

<sup>3</sup> Afa nangunibi ofenaiba suwi mileg blo kokohiagim afu elni nihiba lasai.

<sup>4</sup> Afa mungwali elim Godna Sungwabug blo ihla fenugenaba asa haig haig mona lagwagini. Eba Sungwabug ehe esenigba enag sa haig haig moba lagwagini.

<sup>5</sup> Afa mingnag Ju el Godim lotu finig afa mungwali bite sa gohkafena enag ambe Jerusalem la gofena.

<sup>6</sup> Maia enag aune pugunaba asa kaksag el ambe laskuhanam mom higwagafufna maia Ainiyagna el enaig es-offinibi asa sineminefini maia mungu mungug el ehengelni mona lagwag ofinibi.

<sup>7</sup> Enag Ju el fwina sineminefini afa esogona og, “Kati anwenfig sonag elbi eba Galili la nai,

<sup>8</sup> haisegba asa big mungu mungu higigbi bigelni mona mog?

<sup>9</sup> Asa bigel Partiana kembang la nai afa Midia nai afa Elam la nai afa bigel mingnag distrik Mesopotemia la auguia enag feg afa distrik Judia nai afa Provins Kapadosia la nai afa Provins Pontus la nai afa Esia nai afa.

<sup>10</sup> distik Frigia nai afa Pamfilia nai afa Isip nai el afa distik Libia nai Sairini muhla nai afa bigel Rom la nai ambe ohi gohka.

<sup>11</sup> Afa Ju afa minginag el Ju elni lotu nai afa Krit afa distrik Arabia nai bigel big mungwali ena mo biafgelni mungu mungu mona higig sonag elbi sihigbi eba Godna kigmogna gafugafig.”

<sup>12</sup> Afa mungwali olug fingi feskofenam onigwage aflafna. Afa hefum sihiagini og, “Sonaig pugugba ilawaba enaba mangwal maia?”

<sup>13</sup> Afa mingnag mo enaig mo sihini og, “Ei, eba uflogna bu ahgagim enag eba mo etetiag ofi.”

#### *Pita mo sihina*

<sup>14</sup> Asa Pita 11 pela patalfuiag elim wan gohnam afa sa fwina unetigina og, “Nengel Judia nai afa mungwali el ambeg Jerusalem gohka sa kana mom higafufum asa ena mog sa ilawo mangwalba ne nangug ka nem ambala osihin.

<sup>15</sup> Ne enaig onigig, ne og sona elbi mo etetiag ofi. Amo eba awai, eba ilawo leanahe.

<sup>16</sup> Afa ilawo enaigba pugug enaba autunam Joel Godna mo fla sihiaule el enaig sihi fwahana og;

<sup>17</sup> God ati sihig awaiyeg osuna maia meiyef ofefiba eba ka kikeafna sungwabugim mungwali elim ningihianife afa sa nengelni fangonai luwal i afa nainai luwal i kana mo fli sihiáfufe afa kwablog el itila lofug haig haigim lambusiagifufe, afa watiawug el itila panangiagifi.

<sup>18</sup> Afa enanam ka kikeafna sungwabug kikeafna gafugag saglag afa angwafigim ka faife asa kikeafna mo fli sihiáfufe.

<sup>19</sup> Eba ka eseba asa ofla haig haig puguafi afa bite la gafa puguafi eba taf i suwi i afa suwieg i enaig puguagefe.

<sup>20</sup> Afa osu kifiakofla fegifi afa was pugu tafnaiyi asa negigim Ainiyagna osuna mo pugufe enag osunam Ainiyag heafna kigmog i afa ombusug i ogfufe.

<sup>21</sup> Afa enanam mungwali ambangel sa Ainiyagim uninife og, ma kam kwagani, afa sa ehe lambife asa ehengel wangineg augufefe.

*Jol 2:28-32*

“Enaba Joel Godna mo fla elni mo sihi fwahag.

22 Ne Israel el numwehe kana mo higinini ka nem osihin Sisas Nasaret la nai el, nembe ne anwenafini God ati ehena ninga la wasneigbi nem ogfunig. God ehem enaig esenagba nem og sama anwenafi heafa ehehe ena elbi ningihiagba asa blog.

23 Afa sona elbi God nengelni ninga la fwahag afa autunam ati oniginam ena moba kikise fwahana enaig esegim. Afa amtakwalig afwambanai el i nengel i ne li katigeg la kokufenagigbi asa lahad.

24 God mas ena susugba gwesim fwahana mo, eba God sona elbi bite kifenai ihlafatig mas ehem gwesim lahad mo.

25 Afa autunam Devit gafa enaig sihifena og; Ka Ainiyagim nangug kam blog wahkig muhla fenag asa ka mas mangwalimba embefenai.

26 Enaig fenaba enag sa kana olug suialag nemug go asa ka sifakal mo eseg, afa ka nengego eligim suialagim asa God membeg kam esenagim.

27 Eba mas ne kam elim pigieg kembig la fwahai, afa neana suialag gafugag elbi sa ne mas ehem fwahaiba asa mas bitelaba nogi.

28 Ati ne kam ogfunag nofkikena flag minagagba sa ne ka i ahgofiba ka sa fwina sifakale. *Sam 16:8-11*

“Ena moba Devit sihi fwahag.

29 Ei nilite, ka nem biafgelni simbianigam osihin, Devit ati lahad afa fakini afa ehena bitekife eba gweseg bigelnai yi olyi ilawaga go.

30 Afa Devit eba Godna mo fla sihiule el feg ehe ati anwenafeg God nufuna mo sihig og, nengigim ka neana mungu luwalim esenaba asa ehe nimbe lofug misog el gofe.

31 Enaig esena Devit gof ati anwenafena asa enaig sihifena og God Kraisim lahad la nai ihlalo lasufe asa ehe mas bitekife la gwesim nogig mo.

32 Afa sonag el Sisas eba God ati ehem bitekifenai ihlafatigba asa ehe nofkikenaga. Afa enam ati ka nofna nangug.

33 Afa Sisas ati sisi yi fukokag Godna nihiginai ninga la ga. Autunam Alag ehem sihi fwahana heafna Sungwabug pe blofe. Afa ehe ati enam ningihiagba asa ilawaba ne enam nangug afa higig.

34 Devitba mas Sisas sa esena hevengam fukokana enaig esena mo. Afa Devit enaig esona, og; God ati kana Ainiyagim enaig sihifena, og, ne kana nihiginai ninga la gafife.

35 Eba ihlafefe ka angoluweg elim neana ninga la fwatiba sa ma nem ahnai skaufini. *Sam 110:1*

36 “Asa Israel nai el mungwali ne numwehe nam anwenafi Sisasba nengel tigigim li katigeg la kahligbi God ati ehem gisfu fwahana og sa ma Ainiyag fenam asa elim lambi.”

37 Afa maia mungwali el ena mom higinibi asa enag mo ehengelni olugim fingi feskofena asa ehengel Pita mi afa mingnag kanog fwatieg el mi sahigoni og, “Nilite, haig sa ka esifi?”

38 Afa sa Pita sihini og, “Nengel sa mungu mungu mungwali olug waikefinim Sisas Kraisna unehlag la bu la apaiyeba sa ma God nengelni amtakwalig nihem fla fatini ma ne enaig esibi eba God nem heafna Sungwabug faifi.

39 God ati autunam sihi fwahana Sungwabug nem faigimbi, afa nengelni luwal i afa membinai el i gwenai esenife. Afa God bigelni Ainiyag mungwali elim ehe awamonigim gafa ati sihi fwahana.”

40 Afa Pita mingnag kaksag mo sihinugenam afa wasneig mo faini og, “Numwehifibi masa nem amtakwalig el nahgum awaiefe.”

41 Pita mo sihinaba asa kaksag el olug oniginim asa bula mo apaiyena afa mingnag ambe pahsihanaba ehengelni nambaba 3,000 enaig fena.

### *Mungwali mungwa onigig sihini*

42 Ehengel kanog fwatieg elni mom ati ugwe higinibi asa hefum fakwegfu feagini afa ambe mungu la laskuhlanam fane ahgafna afa betennifini.

43 Afa God kanog fwatieg elni ninga la haig haig kigmog esenibi asa mungwali enam nangunim afa sineminefeagini.

44 Afa mungwali el Sisasim olug oniginim mungwa mo hefum sihiaginim afa heafgelni mangwal mangwal eba mungwali ehengelni fena.

45 Afa ehengel heafgelni bite i gawig i elim fwahiagonifinibi asa enanam kig flifnim asa heafgelnaim elim gawig awaiyegim mimagegonfini.

46 Afa mungwali osuna Godna kwania lala laskuhlafenam afa mungu mungu lala laskuhlafenam fane ahagageafufna afa ehengel suialafaginim sifakaligna auguna.

47 Afa wahkig Godna unehlagim fingifini asa el ehengelim olug suialag gohnigbi. Asa Ainiyag mungwali osuna mingnagim lambfenaba asa ehengel Sisasim oniginig gwesim nup el fiagena.

## 3

### *El mungu mong amtakwalna suialafena*

<sup>1</sup> Mungu osuna Pita i Jon i beten ahfegim osu efilagna Godna kwania lala ahkana.

<sup>2</sup> Afa enanaba mingnag el mong kukwaligni atiubiafena wahkig gwenaign esefufna, ubifnam Godna kwania lala mengig muhla lasu fwahifini enag mengigba enaig sefli fini og, suialag mengig afa enag elbi maia el afu ena mengig la saiyeafnaba moni kamini feni aufna. Afa ehena mongug sa kukwalignaba eba afag wetila gwenaign wanigana.

<sup>3</sup> Afa enag elbi maia Pita i Jon i ahkana mengig la hopugufnaba asa nangwagnam kaminini og kam mangwal ahfai.

<sup>4</sup> Afa Pita i Jon i fwina ahnangwagohun afa Pita enaig esona og, “Osum kam nangwag.”

<sup>5</sup> Afa sa nangwagaufena, ehe enaig onigina og, eba kam mangwal ahfaife.

<sup>6</sup> Afa sa Pita enaig sihi fena og, “Kaningi kigba awai afa mangwal sa ka ahfeg eba ka nem ahfaigim. Sisnas Nasaret la nai elni unehlagla nem kog sa buhianam ika.”

<sup>7</sup> Afa sa ehena nihiginai ningam kehlanam fukla lasunaba asa buhia gohna ehena mong kukwalig gweyi ikagna wasneina.

<sup>8</sup> Afa ehe psokufe gohnam asa Pita mi Jon mi Godna Kwania lala gam patal ika seaifuna. Afa ehe seaifunam fapsok feakafnaba sa Godna unehlagim figifena.

<sup>9</sup> Asa mungwali el nangunim maia ikafenaba afa Godna unehlagim figi fukwiafnaba.

<sup>10</sup> Afa sa anwenafinim eso gona og, “Ai, sona elbi wahkig Godna Kwania lala ‘Suialag mengigla’ sefuag la fawofegofnaba kig kamini fafegofe.” Afa nangunim maia suialafenaba asa ehengelni olug figi feskofena.

### *Pita Godna kwania lala mo sihina*

<sup>11</sup> El ena mom higni maia enaig pugunaba asa sineminefinim kikini ambegohna enag elim nangugim. Afa ambe nanguinibi ehe ati Pita mi Joni mi ketiginam gofna. Enam pugunamba eba Godna Kwania lala, afwambag sime la enaba seflig og, Solomonna afwambag sime.

<sup>12</sup> Pita nangwaghiagenam enaig sihifeni og, “Nengel Israel el haig esegba sa ne sineminefig maia enaig pugugba, haig esegba sa ne kam fwina nangwagsiga masa ne enaig onigigfife eba kaningina wasneig me amo kaningi afsug kabag el me asa sonagba esahfeg. Amo eba awai.

<sup>13</sup> Eba Abraham Aisak Jekopna God afa ehe bigelni simbianigana God. Afa ehe heafna gafugag elim Sisasim kwania unehlag faig. Afa enag elim ho ne angoluwagna ninga la fwahini. Afa maia Pailat og, na fwaha afa nengel ne ehem masig fatinim afa ne esogona, ne og Pailat nofene esug fwaha.



14 Afa ehe afsug kabag el fegim afa suialag nihe mungwali feakafna. Afa ne ehem masig fatinim asa ne esogna og Pailat ambanim sa fwahafe enaig el eba kwaskog elim sa fwaha.

15 Afa elbi eba nofkikenagag minam pigieg eba enag elim ne tigifatigbi asa God ehem pese bitekifenai ihlafotig. Enam ka nofna ahnangugim nasa ka ena mo ahsihig.

16 Ka Sisasna unehlagim olug honiginaba asa sonag el mong kokwaligniba sa ugweg. Afa sonag glau sa ne nangug eba sa ne anwenafi eba Sisasna kigmogla eseg. Afa kaningi Sisasim olug honiginaba asa nengelni nof la sonag elbi ati ugweg.

17 “Nilite nufunam ati ka anwenafeg nengel i afa nim-beafigelni misog el i mas ne numwehe anwenafini mo nasa ne Sisasim enaig nihe fenagini.

18 Afa autunam God mo fla sihiafule el nai yi megig la sihi fwahana og, eba heafna Gisfu fwahag el susug flafe. Nasa ilawaba ne enaig esefligbi. Asa enag esegba Godna mom ati nufunam pugug.

19 Asa nimbeafgelni amtakwalig nihe mo masig fatinim afa waikefinim Godim oniginibi asa ma God nengelni amtakwalig nihe mo fla fatini.

20 Afa atiaba ne enaig esigbi asa ne Ainiyag nai yi ambe muhla afohianam eba sa na wangine augufi. Sisas eba Godna Gisfu fwahag el afa God ehem ati kanog fwahana afa ehem sa ningihiaiba sa ma ehe blonam nengel nenam gofufe.

21 Afa enag ilawaba heven la gahba nengego enag osuna God sa eso fwahag maia eseiba, asa mungwali gawig suialag pese pugu gohfe. Autunam ati ehe Godna mo fli sihiafule elni mengig la sihi fwahana ehe enaig gafugafegim.

22 Autunam nengelni saglag el Moses enaig esona og, ‘God nengelni Ainiyag, eba God ehe nengel nai yi mungu el wegfu fwahafe asa pugu mo fli sihiafule el lofefe kike lofug. Asa ne ehena mungwali mom higinim patalfufe.

23 Afa amban sonag elni mom higi fwainigba eba God ehem kwagi klaitifeba asa ehe mas Israel nenam agfofi.’

24 “Autunai Godna mo fli sihiafule el Godna mo ati sihiafufna Samuel nai yi pugunam ikan mungwali sumi nai Godna mo fli sihiafule el nai yi pugug, ena mo sihinibi ilawo sati pugug.

25 God Abrahamim enaig sihifena og, ‘Neana simbianigag nai yi pugunam eba mungwali bitenai elim suialag fenugefe.’ Afa nengelbi Godna mo fli sihiafug simbianigag luwalig asa mangwalim sa sihi fwahig eba enam ne flifie.

<sup>26</sup> Asa God heafna gafugag elim nem gof ninghianig ogma nem kwaganiba asa nengel mungwali amtakwalig nihem fwatibi asa enaba nem suialafenig.”

## 4

### *Pita mi Jon mi kotimegoni*

<sup>1</sup> Enanam Pita i Jon i maisim mo elim ahsihiagofnaba afa Pris el i afa Sadyusi el i afa Godna kwania lala nai polisni misog el i ambe apukena.

<sup>2</sup> Afa apukenam eheningina mo higafofna. Eheningi ena mo ahsihina og, “Sisas ati lahagim pese buihiag asa el gafa gwenai esifi.” Afa ehegel higinim mas ena mom membini mo.

<sup>3</sup> Asa sikuliofafenaba enaignam ketiginim kalabus lala fwatiginibi ikana lianafena.

<sup>4</sup> Afa kaksag el ena mom higinim olug onigig la kehlinim patalfuna. Asa enaig esinibi eba 5,000 la gohna.

<sup>5</sup> Afa liana apukenam Ju misog el i, saglag el i afa nihe mo ogfuiag el i Jerusalem gam laskuhlana.

<sup>6</sup> Anas eba pris misog el blona afa Kaiafas na, Jon na, Aleksander na afa mingag mungwa usumuna apaiyena.

<sup>7</sup> Asa Pita mi Jon mi wanambe olyi lasanim sa sahigoni og, “Haisegba sa ne elimbi wangene feiti ahfeg? Mango kigmogna afa amban na unehlag la ne sa ahfeg?”

<sup>8</sup> Afa Godna Sungwabug Pitam ati ihlafenagenaba asa mo sihina og, “Saglag el i afa elni misog el i sahig.

<sup>9</sup> Ilawo ne kam sahigoni mangwal suialag sa ka sahfig. Ati amban ne membig anwena ofifibi asa sona el mong kukwalni suialafegba eba haiseg,

<sup>10</sup> Nengel i afa mungwali Israel lanai el i sa anwenafi. Eba Sisas Nasaret lanai elni unehlag i afa heafna kigmog i sona elbi ati wangenefego. Eba Krai Godna Gisfu Fwahag Elim ne tigifatigba afa God ehem pese bite kife ihlafo fatig.

<sup>11</sup> Autunam Godna ginof Sisasim sihi fwahana, enaig esona og;

Sona sumulba nengel lala nimblawagig el esugum fli fatig,  
 eba naho God esenagba asa sumulba gohug. *Sam*  
*118:22*

<sup>12</sup> God mas ming elim wefug fwahag mo elim pese lambigim, eba awai. Sisas mungu he bigna minaba go asa big Godna el afwahieg.”

<sup>13</sup> Pita i Jon i fwina wasnei ahgofenaba asa saglag el nangwaginim sineminefini og, “Hai, sona elbi esug el ahfena afa eheningi mas skul yi ahkana mo.” Afa ehegel anwenafini, ati eheningi Sisas nai yi ahogofena.

14 Afa nangunibi el mong kokwaligni ati wangenefena afa sa Pita mi Jon mi wangofena asa ehegel mwalfwai afohiafna.

15 Asa saglag el eheningim sihigoni og, “Afwambala ma puguia ahogofiba”. Asa hefum mo sihiawagini.

16 Afa esogona, “Haig sa big esogonifi? Mungwali Jerusalem lanai el ati anwenafig eheningi fwina wasneig gafuga ahfeg asa big mas sihi hwaba mas pugu mo.

17 Afa mas sa ena mom minganag kembang sihiageafufe. Nawo wasneig mo sihigon ma enaig esahfe, ese, Sisas na unehlagim elim mo ahsihinfe.”

18 Afa sa awamogonim afa kwegoni ne mas elim ahsihinim afa hogfuni ena unehlagimba.

19 Afa sa Pita i Jon i wahigi ahsihini og, “Neafa nimbe kwefihiagi mango maia Godna nof la suialafeg, ka nengelni mo ahpatalku me awai Godna mo ahpatalku me.

20 Afa mas ka mwalfwai ahogofi. Asa ati ka ahnangug afa ahigig eba ka ahsihiagofufe.”

21 Afa misog el sambaganigim fwina wasneig mo pese sihigonim asa lasani apuke afuna. Haisegon mo eba mungwali el mas misog el i mungu onigig flini mo. Afa God elim mong amtakwaligna wangenefe fatinaba asa mungwali el Godna unehlagim fingi fini.

22 Enag elbi wangenefenaba eba 40 yia fegim sa gwese hilifeg.

### *Godna el betennini*

23 Enanam Pita mi Jon mi lasanibi asa heafa pese hefulual nangum ahkana. Asa ahsihina mangwal sa saglag pris i afa saglag el i eheningim esogoni.

24 Afa higinim asa mungu onigig flinim sa Godim sahini og, “Ainiyag, nembe ne of i, bite i, bu i afa mungwali gawig gohka enaig ne gafugafeg. Afa ati ne anwenafeg ena mo misog el kagelim faig.

25 Enaig eseg ena mo Godna Sungwabug kagelni simbianiga Devitim faina. Devit neana gafugag el autunam sihi fwahag;

Haisegba asa afwambanai elbi kakageafu, afa hefum augugum laskuhlanam asa mina tohlagi onawo Godim pigau apaiye, afa enaig mas puguna mo.

26 Afa bite nai misog el fag la numwehiagofi. Afa saglag el laskuhlagim ogna Ainiyag mi afa God Gisfu Fwahag El mi asa hagim.

*Sam 2:1,2*

27 “Asa gwenai esefe Herot i Pontius Pailat ambenam ena kembang la afwambanai el nai yi i, Israel el nai yi i laskuhlanam asa mina tohlaginim asa neana gafugag elim

Sisasim pigau apaiyefe. Sona elbi nembe ati wefug fwahana asa elim pese lambfe.

<sup>28</sup> Afa ehegel laskuhlagim enaig seagofibi eba ati autunam ne sihi fwahana sa pugufe. Asa gwenaig esig nimbiafna sawieg mi afa wasneig mi patalfug.

<sup>29</sup> Asa Ainiyag sahig ehegel kam fegonigig. Sa kam ilawa mo wasneinibi asa kigmonim neana mo sihiáfufe.

<sup>30</sup> Afa sa nimbiafna wasneig yi ningitigiba sa ma gih elim suialafetififi afa haig haig kigmog ogfuiagi, nimbiafna Sisas afsug gafugag elni unehlag la.”

<sup>31</sup> Maia enai betenni fwahinibi asa asag gwena lala pугuna. Gwena elim mungwali Godna Sungwabug simbi-giahlanibi asa mas mo sihigim embefini mo eba sihiageafuna.

### *Mungwali el mungwamo sihi*

<sup>32</sup> Mungwali el laskuhlagim Sisasim olug onigi eba mungwamo sihini. Mas amban mungu hefum enaig esoi hwaba kana munguhe eba awai, heafna gawigba eba mungwali elni feni.

<sup>33</sup> Afa kanog fwatieg el Ainiyag Sisasna laha buihiag mo sihinibi eba kwania wasneig ni sihini. Afa God elim suialag auguiag faig.

<sup>34</sup> Afa amban mas gawig fwainig gohna mo, afa amban bite i lala i fegba ehe minganag elim faigbi asa enanam kig flag. Afa ehena kigba flagim asa ublugim

<sup>35</sup> kanog fwatieg elni ninga la fakag afa sa ehegel fligim, minganag elim sa gawig fwainig enam mimange gonigig.

<sup>36</sup> Afa gwenaig Josep esena. Livai eba heafna simbianiga afa ehe Saiprus lanai el. Kanog fwatieg el ehem seflini, Barnabas. Ena unehlag mogba eba 'kwefuag el'.

<sup>37</sup> Afa ehe elim heafna bite faig afa nana kig flagim asa ublugim kanog fwatieg elni ninga la fakag.

## 5

### *Ananaias i Safaira i ona Godim ahyuhna*

<sup>1</sup> Afa el unehlagba Ananaias afa heafna angwagba Safaira asa ehe heafningina ming ehegenai bite mingnag elim faini asa enanam kig flana.

<sup>2</sup> Asa mingnag kig mo hefum sugonam afa mingnag mo kanog fwatieg elim faini. Afa angwag enam ati anwenafena.

<sup>3</sup> Asa Pita ehem sihina og, “Ananaias, mangigim ne Satanim patalku afa ne Godna Sungwabugim mo ne mwakwalenag afa mingnag kig mo ne sugo fwahag.

<sup>4</sup> Afa ena bite eba neana asa enana sa ne kig flag, kigba eba neana. Afa mangigim ne amtakwalig niheba eseg? Enaig sa ne eseg eba elim ne mwakwalen mo eba Godim ne esenag.”

<sup>5</sup> Afa Ananias enag mo higinam asa laha pena afa mingnag ena mom higinim asa fwina embefini.

<sup>6</sup> Afa kwamblog el ambe saiyenam meligim saginim asa kufehlinim ufu fakini.

<sup>7</sup> Afa sambaga mungu aua enaig fenaba asa angwag mas anwenafena mo sa saiye fu blona.

<sup>8</sup> Afa Pita ehem sahana og, “Kam sihina, kigba guhwaho asa nimbeafna bite enanam sa ne ahflag?” Afa angwafig enaig esona og, “Nufunam gwenaho.”

<sup>9</sup> Pita ehem esona, “Nenigi nimbefna alagag i mangigim ne Ainiyagim ahyuhnag afa el sa neana alagagim sa fakig eba ati ambe mengig la afohie ona nem gafa flifuago.”

<sup>10</sup> Afa ikana enag angwafig Pitana mong yi laha pena. Afa kwamblog el saiye ambenam sa nanguni maia laha gifnibi asa fli apukenam afunam alagagna yi muhla fakini.

<sup>11</sup> Afa mungwali sios la nai el afa mungwali minginag el enam mo higinim fwina embefini.

### *Haig haig kigmog puguna*

<sup>12</sup> Afa kanog fwatieg el haig haig kaksag kigmog olyi el nai yi eseagini. Mungwali Ainiyagna el Solomonna afwambag sime la laskuhla gofena.

<sup>13</sup> Afa el embefinim asa mas ambena laskuhlana mo. Afa mungwali el ehegelim og eba suialag el fig.

<sup>14</sup> Afa mingnag saglag i angwafig i Ainiyagim sa olug onigini eba nubiagena. Asa enag el ambenam ehegel nenam pasihiana.

<sup>15</sup> Asa el gih elim haig haig sime la lambinam afa sa mina la lasani. Afa ehengel og maia Pita oblofiba sa ma ehena sungwag ika gih elim puguaifufeniba sa ma suialafi.

<sup>16</sup> Afa kaksag el muhla kembang la nai Jerusalem gam ambena. Asa gih el mi afa mwaifig simbagahlag el mi asa wanambenaba asa enag mungwali el suialag feskofena.

### *Kanog fwatieg elim kalabus yi lambi laitini afa sa oflanai el mengig pigina*

<sup>17</sup> Afa misog pris i afa heafna hihe i eba Sadyusi el kanog fwatieg elim ambofe ahlagoni.

<sup>18</sup> Asa apukenam kanog fwatieg elim kikegonigim lambfu asa kalabus yi lasani mungwali amtakwalig el nahgum.

<sup>19</sup> Afa sinaini Ainiyagna oflanai el blonam mengig pigina asa afwambagam wankanam afa esonag.

20 “Afunam Godna kwania lala la afohienam asa mungwali elim sihigoni enag mulug nofkenagag mom.”

21 Afa kanog fwatieg el enag mo higinim asa liana gubi Godna kwania lala gam afuna. Asa elim ena nai yi mo sihigoni.

Afa misog pris afa heafna hihe ambegonam asa kaunsel mi afa Juni saglag el mi unegoni asa ambegona laskuhlana. Afa ningitigini kalabus lala gam ogma afunam kanog fwatieg elim kalabus lala nai wanambegoi.

22 Asa polis kalabus lala gam afuna afa mas kanog fwatieg elim nangwagini mo. Afa pese afunam esogona og.

23 “Maia kangel afu kalabus lala apukegba, mengigba kikise gofena afa anwasag el ati mengig la afofna. Maia kangel mengig pigi nangugbi mas amban ena nai yi gafna mo.”

24 Afa saglag pris i afa Godna kwania lala nai anwasag elni misog el i enag mo higinim afa fwinam onigwagini, afa esogona, mangwal sa pugufe?

25 Afa el mungu pugunam afa sihini og, “Sa hig, enag el sa ne kalabus lala laitig ehengel ati Godna kwania lala la afoba elim mo osihigon.”

26 Afa sa anwasag elni misog el i afa heafna el i ehengelim afu lambinim afa mas wasneigni esegoni mo. Afa embefinim esogona og masa bigim el fun na wagihigifi.

*Kanog fwatieg el mas kauselinim sihinigim embefini mo*

27 Afa polis kanog fwatieg elim wanambenam kaunsilna nof la lasani. Afa misog pris sihigoni og,

28 “Ka nem wasneigni esogonug nofene hwana unehlaglaba mo sihi, mangigim ne enaigba esig! Ne ati nimbiafna mo mungwali Jerusalem la sihig afa ne membig og kangel naho Sisasimba esug tigifatig asa ne kagelim afwanfi faig.”

29 Pita i afa mingnag kanog fwatieg el i wahigi esogona og, “Kagel sa ka Godna mom mungu patalfu masa nengelni mo kagelim kwenig feg asa ka mas Godna mom patalfui!

30 Nengel ati Sisasim li yi kokufinagigim afa ehem tigi kahligbi asa lahag, afa God bigelni simbiangana ehe ati pese ihlafogba asa buihiag.

31 God ati wanikigim afa heafna nihigenai ninga la lasu fwahag. Afa God ehem enaig esenagba asa ehe saglag luwal fegim afa ehe elim pese lambig el feg. Eba enaig eseg asa ma Israel el olug waikefibi asa ehe ehengelni amtakwaligim huguflaitinife.

32 Afa kagel enam nangug God ehe eseg afa kagel sa ena mom sihig. Afa Godna Sungwabug gafa gwenai eseg.

Afa ambangel sa Godna mom patalfug asa God heafna Sungwabug ehengelim faig.”

<sup>33</sup> Afa kaunsil enag mo higinim afa olug kakag feskofenam afa ona kanog fwatieg elim kwagi klaiti.

<sup>34</sup> Afa mungu kaunsil buihiagohnam eba Farisi el feg heafna unehlagba Gamaliel. Eba nihe mo anwena el fena afa mungwali el heafna unehlagimba fingi fini. Afa ehe elim sihini og kanog fwatieg elim afwambagam mwakwalig wanafu.

<sup>35</sup> Maia afwambagam afunamba asa Gamaliel minginag kaunsilim sihini og, “Nengel Israel el afa ne mangwalba esofegonifibi asa numwehe oniginim.

<sup>36</sup> Nengel anwenafig autunam Teudas pugu gohnam esona og, kaba suialag nemug el feg afa 400 el ehem patalfuna. Afa maia ehem tigi lahaqba afa el ehem patalfug asa embem afuiaminafeg. Asa heafna gafugagba awaiena.

<sup>37</sup> Afa enanam Judas Galili la nai el pugunam enag osunaba gavman elni unehlag lamblofna. Ehe elni onigigim fuku lasanig. Afa maia ehem gafa lahaqba asa el ehem patalfuna enag embem afuiaminefena.

<sup>38</sup> Afa enaig esegba naka nengelim osihini, nofeka haig esegon. Nangwag fwati ma auguiafi. Afa atiaba enag gafugag sa elni onigig la pugug eba awaiyefe. <sup>39</sup> Afa atiaba enag gafugag Godna blofe eba nengel mas kwegoni eba masa nimbefum God i ahu flafe.”

Asa kaunsil Gamalielna onigigim patalfuna.

<sup>40</sup> Afa kaunsil kanog fwatieg elim unegonim ma ambenaba asa heafgelni gafugag elim mo sihini asa ne ehengelim kwagatife. Afa wasneig mo sihigoni og nofene Sisasna unehlag laba moba sihiafu asa fwatinim afuna.

<sup>41</sup> Afa kanog fwatieg el kausilim fwahinim afufefnamba Godim sifakalini asa God ehengelim onigini ehengel eba ma enaig esife asa ehengelim fwatigba asa ehengel Sisasna unehlag la afwanfeg fli.

<sup>42</sup> Afa mungwali osuna Godna kwania lala la afa elni lala afugum asa elim ogfugonig afa enag gafugagba mas awai eba wahkig sihiafufufe Sisasna moba. Ehengel enaig sihifini og Sisas eba enag el ati God sihi fwahana asa ningihiaiba asa blonam bigim pese lambife.

## 6

### *7 pela el wegoni asa kanog fwatieg el kwagani*

<sup>1</sup> Afa gwenanam patalfuag el nup apukena. Afa patalfuiag el sa Grikna mengna lagig enag afonam ninimugona

minginag patalfuiag elim asa Hibru mengna lagig afa esogona og, “Nengel Hibru el nimbeafgelni elim kwagani asa fanem awaienig afa nengel mas kangelni Grik elni bontag angwafigim kwagani asa alagag ati pigig.”

<sup>2</sup> Afa enag esenaba 12 pela kanog fwatieg elim unegonim mungwali patalfuiag el ambena afa sihigoni og, “Afa kangel fane mimagegonug asa enag kagemim Godna mo sihiagim kopahlanife enaig eba mas suialafeg mo.

<sup>3</sup> Nilite sa ne enaig esi, nengel asa 7 pela elim yisigi olyi nengel nai yi sa afo. Asa ehengel eba suialag el afa Godna Sungwabugni ihlfigim afa suialag onigignafig. Asa big enag elim faigo sama enag gafugagim nangwaghiagi.

<sup>4</sup> Kangel ehe ka enaig gafugafife wahkig betennifinim afa Godna mo sihiafufe.”

<sup>5</sup> Afa mungwali el ena mom membig. Afa Stivenim wegig fwahini ehe fwinam olug onigig el fena afa Godna Sungwabug ehem ihlfenagena. Afa minginag elim wegig fatini eba Filip afa Prokorus afa Nikanor afa Timon afa Pamenas afa Nikolas. Nikolas ehe Antiok el. Autunam ehe afwambanai el fena asa blonam Ju el nai yi sefu gohna.

<sup>6</sup> Afa sa kanog fwatieg elni nof la wanambenaba asa kanog fwatieg el ehengelim ninga misog la fakagonim afa sa betennegoni.

<sup>7</sup> Asa Godna mo ikaminefenaba afa Jerusalem la nai patalfug el gwesim nupiagena. Afa kaksag pris olug waikfehinim patalfuna.

### *Ju el Stivenim kotimini*

<sup>8</sup> Afa God Stivenim kweafunam afa wasneig fainaba. Asa Stiven haig haig wasneig kigmog elim ogfunigena.

<sup>9</sup> Afa minginag el bugiagafenam Stivenim mo fafaiye flini. Enag elbi mungu Ju elni lotu la nai. Enag lotu seflig ‘esug elni’. Afa enag el eba Sairini nai afa Aleksandria nai afa provins Silisia nai afa Esia nai. Enag ambe minafenam asa Stiven i mo flafehiagini.

<sup>10</sup> Afa Godna Sungwabug Stivenim suialag onigig fainaba asa el mas ehem mo filafini mo.

<sup>11</sup> Afa ehengel minginag elim sisag mona esogoni og, “Sa ne mwakwal mo sihi ka higig Stiven amtakwalig mo Moses mi afa God mi faig”.

<sup>12</sup> Afa enaig mo el mi afa saglag el mi afa nihe anwena el mi olugim fingi feskofenaba. Asa Stivenim kehlinim kaunsil nangum wanigambena.

<sup>13</sup> Afa minginag elim wanambenam asa ehengelim mwakwal mo faigona afa enaig esogona og, “Sonag el eba wahkig Godna kwania lala mi afa heafna nihe mi moalamp fafenife.



<sup>14</sup> Afa ka higig ehe enaig sihifeg og, Sisas Nasaret nai Godna kwania lalam bubugenam afa nihem waikedefe asa autunam Moses bigim faini.”

<sup>15</sup> Afa mungwali kaunsil sa Stivenim nofna feflini afa nangunibi heafna nofbosugba laugwafna ofenaiba of la nai elni nofbosug mungwalofug enaig fena.

## 7

### *Stiven mo sihina*

<sup>1</sup> Afa prisni misog el Stivenim sahana og, “Hwa moba nufunam ho?”

<sup>2</sup> Stiven esona og, “Nilite afa humoani nengel sa kana mom higim. Autunam bigelni simbianiga Abraham maia Haran la ika fwainig fiahfenaba, afa God heven lanai ehem Mesopotemia la pugunam

<sup>3</sup> afa ehem esona og, ‘Nimbiafena humoanig, hihe afa kembang mo fwahanam asa ika eba ka nem bite ogfunafe.’

<sup>4</sup> Asa ehe heafna Kaldia kembang fwahanam asa ikanam Haran la gafena. Maia heafna alagim lahanaba God ehem ningihiana. Asa ikana ena bite la gana asa nengel ena nai yi auguia.

<sup>5</sup> God mas bite wetiti Abrahamim fainam mo. Afa God ehem esona og ka ehem fai asa enagba heafna afa heafna simbianigagim. Enanam God ehem enaig esona Abrahamba luwal fwainig fiakafenaba.

<sup>6</sup> God Abrahamim enaig sihifena og, ‘Neana simbianigaba afunam angoluweg elni bite la auguiafiba afa sa ehengelim 400 yia la amtakwal hiagibi asa ehengel ehengelni esug gafugag el feasaife.

<sup>7</sup> Afa enaig elbi eba ka kike susug mungweg faife afa bitena luwalba Isipim fwahinim ambe hwa nai yi kana unehlagim fingi fife.’

<sup>8</sup> Afa God esona og ma Abraham sa ma heafna nihim kokohiage enaba enaig ogfufeg God ati ehi sihiag ahfe ahfwahanaba asa gwenag esena. Abraham, Aisakna alag fenam asa Aisakna nihim kokohiagena maia ika 8 enaig osuna pugunaba asa Abraham enaig esenagena. Afa Aisakba Jekopna alag fena asa Jekopim gwenag esena. Afa Jekop bigelni 12 pela simbianigana alag fena afa ehe ehengelim gwenag esenugena.

<sup>9</sup> “Afa ena simbianigaba heafgelni suminegim Josepim ambobugini amtakwal oniginagim angoluweg el nai yi ningihinibi ikanam angoluweg la esug gafugag el fena afa enag el etegim kig faigonim asa sulufinim Isip gim wanigafuna afa enanai yiba God ehi ahgofna.

10 Afa God ehem kwegfunamba asa heafna kinigim fili-fatina. Afa sa ehena suialag onigig i afa anwenafeg i asa Isipni misog el Fero ehem membenam afa sa ehem fwahanaba asa Isipni saglagluwal fenam afa sa Feronawig i lala i nangwaghiage gofna.

11 Afa autunam Isip bite yi afa Kenan bite yi fane awaienaba enanam bini kwania mungwali elim pugunigenaba afa sa ehengel maia kwania kinig flini afa bigelni simbianigam gafa gwenaign eseni.

12 Afa Jekop ati higina og Isip yi fane eyi go afa sa heafna luwaligim bigelni simbianigam ningitiginaba ehengel afu Isip yi apukenam afa pese ambe apukena.

13 Afa ming enana pese afunaba asa Josep heafna nilitem hefum ambala ogfuni afa sa Isipni misog el gafa ehena nilitem anwenafeni.

14 Afa sa Josep heafna alagim mo ningihianaba og sa ma Jekop Isip gim wanbloi. Mungwali el enanai ambeg eba 75 enaig fena.

15 Afa Jekop Isip yi afu augunam sa lahana afa bigelni simbianiga gafa gwenanai yi pigig.

16 Afa ehengelni elig mo lambfunam Sekem bite la skuni. Ena bitekifegba autunam Abraham Hamorna luwaligna ninga nai baimini fwahana.

17 "Afa autunam God sa Abrahamim sihi fwahana bite faigim ena ati puguiagim meyofoe, afa sa Isip kembang enanai yi bigelni simbianiga kaksag puguiagena.

18 Afa sa enanai yi sumi yi el mungu Isipni misog el fena. Afa ehe Josepim mas anwenafena mo.

19 Afa ehe bigelni simbianigam mwakwale hiagenam afa amtanafe hiagenam afa kukusihiagena ogma ninginai luwalim taitufibi sa ma pigi.

20 Afa enanam Mosesna afag ehem waniginamba afa ena luwal fwina suialafeagena. Afa sambaga mungu was yi afahumonigbi lalaba wanigaflana.

21 Afa sa nengigim mo flinim afwambagam fatiniba afa sa misog elni leg naini ango blo hefum foklaku lahna.

22 Afa Mosesim Isipni mungwali anwenagim ogfufenagenaba afa sa ehena mo lagig suialafena afa gafugag gafa gwenaign fena.

23 "Afa maia Moses 40 yia enaig fenaba afa ehe ona ika heafna hihem nangwagim.

24 Afa ehe ika nangunaba Isip nai luwal Israel luwalim esmunagim otigekafnaba afa sa ehe Israel elim kweagfonam asa Isip nai luwalim tigifatina.

25 Afa ehe enaig onigifena heafna hihe ma anwenafi afa sa God ehem wefug fwahag sa ehengelim kwagan fe. Afa ehengel mas enam onigini mo.

26 Afa ming osuna Moses pese ika nangwagnaba Israel el hefum bagag hofefena afa oga eheningim kwenim og, 'Ei, mangigim na nembefumba bagag hofe, eba ne nilitena ahfeg.'

27 Afa el sa ming elim otigekafna enag el wahigife Mosesim esona og, 'Amban nem sihinagba sa ne kangelni saglag el fegim na kam kwefihiagnug ofe?'

28 Afa neafa kam oga tigifati asa ati ne amu Isip yi nai elim tigifatig?'

29 Afa Moses ena mom higinam ehe embem Midian bite gam ikana. Enanai yi ika ehengel nenam ganam ehe angwafig flanam luwalba sambaga fangonai ahfena.

30 "Afa maia 40 yia ikanaba of lanai el blo Mosesim suwi la puguna. Enaba Sainai mug muhla namba el fwainig la Moses nangunaba suwi weti li figeg la lagegofena.

31 Afa ehe nangunam afa sineminefenam asa blo muhla pugunaba afa enanai yi Ainiyag sihinagofena og,

32 'Kaba neana simbianigana Abraham, Aisak, Jekopna God feg.' Afa Moses embe i kiafigigi fiagenam esim nunofegim oksina.

33 Afa Ainiyag ehem sihina og, 'Hwaba biteba eba afsug feg kable eyi ga afa sa ne nimbafena su mo hugfu sko.

34 Afa ka kikeafna elim nangwagigba kinig flifu afa ka ehengelni wewatin higinig na ka blog koka ehem kwaganiba sa ma kinig mo fwahinim afui. Ka nem onigihaba sa ne Isip gim ika.'

35 "Afa Israel el Mosesim masig fatinim esogona og, 'Amban nem sihinagba sa ne kangelni saglag el fegim na kam kwefihiagnug ofe?' Eba God ehe Mosesim ningihianaba saglag el fenam asa Israel elim lambina eba of lanai el sa weti li figeg la suwi lagegofena enag Mosesna ningam wasneignaba asa enaig gafuga mo fena.

36 Afa Moses Isip yi Godna wasneig ogfunim asa Israel elim Isip yi nai pugu wankana afa ika ming wasneig Ret Si yi ogfuni afa ehe ika 40 yia la el fwainig la wanganam enanai yiba ehe haig haig Godna kigmogim ogfuiagena.

37 Afa Moses eba sonag el Israel elim sihini og, 'Eba Godna mo fli sihiaule elim God nem ningihianife. Eba ehe nengel nai yi olyi gofufe eba kable lofug fefe.'

38 Afa Moses fena Israel el fini el fwainig la auguiafenaba. Afa ehe bigelni simbianiga afa oflanai el Sainai mug la ehem

mo sihina ena nai yi wangafenaba. Afa ehe nofkikenageg mo fainaba asa ena mo bigim faig.

39 “Afa bigelni simbianiga ehena mom mas higini mo asa ehem masig fatinim ona pese Isip gim afu.

40 Afa ehengel Aronim sihini og, ‘Moses bigim Isip yi nai wanblogim fwatig mug gam fukokagba afa mas big ehem ilawaba nangug mo eba mangwal maia fenag.’ Enaiba nawo Aronim sihinibi sa ma bimbeafgelni godim nifiagenam gafuga fiageba sa ma bigim goseni.’

41 Afa sa bulmakau luwaligna sungwagim gafugafenaba asa ehengel heafgelni gawig lambug ambenam bulmakau luwaligna sungwagim lambwainibi eba sonagba ehe ningana esinim fena enam fingi finim sa buyisini.

42 Afa maia ehengel enaig esinibi sa God ehem fwatinaba asa ehengel osuna, wasni, bagnofutnim lotu fegoni. Enaba enaig eseg Godna mo fli sihiule el ati Godna buk la ena mo ginofi fwahini;

Afa nengel Israel ne 40 yia la el fwainig la augunam ne mas kam sis tigi faini mo. Eba awai.

43 Afa ne mwakwal god Molekna sel lala kufihlig ufug afa ne mwakwal god Refana bagnofutna sungwagim ne gwenai esinig afa ne enam ningana esigim afa ne lotu fenigbi eba ka nem ningitigiba afu Babilon apukena gwesim membi yi afunam angoluweg nenam auguiafefe. *Amo 5:25-27*

44 “Afa maia bigelni simbianiga el fwainig la auguiafenaba afa ehe Godna sel lalam kehli uflafena. God ehe Mosesim ena sel lala nimblig mina ogfunaba asa ehengel gwenai esini.

45 Afa sumi yi asa ehengelni luwal ena sel lalam flinim ufunaba afa sa God ehe gosenam angoluweg elim mo lambi ningitigi fiakafnaba afa sa Josua ena sel lalaba fla wan ukuna bite fligim. Enag sel lalaba gwese gofufe ikan Devit nai yi pugufe.

46 Afa God ehe Devitim membenaba asa Devit Godim esona og sa kam fwahaiba ka sa neana lala nimblaiba sa ma Jekopna God enanai yi gafi.

47 Afa ena lalaba Devit mas nimblana mo eba heafna leg Solomon ena lalaba nimblana.

48 “Afa God sisi yi nai nemog feg ehe mas el nimblig lalaba gofi. Afa Godna mo fli sihiaule el enaig sihiba fe fwahana og;

49 God enaig sihifeg hevenba eba ka enanai yi gaba nangwagehiagego afa hwa biteba eba mong eyi ka pafeg uguia. Afa haig lala sa ne kam nimblanafe? Eba mangig la ne nimblah mo. Afa hanai yi sa ka gafe?

50 Afa eba kikehe ka mungwali gawigba gafuga fiageg.” Ais 66:1,2

<sup>51</sup> Afa ena moba Stiven maisim gwese kaunsilim sihin gofna og, “Nengel mo flaflaule. Afa nengelni olug i angug i ofenaiba afwambanai el lofug ne esiafu. Afa ne nimbiafgelni simbianiga lofig ne Godna Sungwabugim kwinig.

<sup>52</sup> Afa nengelni simbianiga mungwali Godna mo fli sihiule elim amtakwali hiagini. Afa enaig el sa sihini og, ‘Godna afsug nemog el blofe’ asa ehengel enaig elim kwaskofig. Afa ilawa gafa ne ehem masig fatinigim afa ne ehem tigifatig.

<sup>53</sup> Afa of lanai el ati nem Godna nihe moba faigbi afa ne enam filafig.”

### *Stivenim fun na tigifatini*

<sup>54</sup> Afa ehengel Stivena mom higinim afa sa olug kakagininim gog moag lagwaginim gwana ningam tigiagini.

<sup>55</sup> Afa Stiven ehe Godna Sungwabugni fenam wasneig gohonam asa sisi gam hevenim nangwagofenaba asa Godna suialag ombusugug gofena enag ombusugug yiba Sisas Godna nihiginai ninga buihia gam gofena.

<sup>56</sup> Afa Stiven sihini og, “Sa hig, ka nangugba heven bafog gohba afa sa Nufunam El Godna nihiginai ninga gam buihia goh.”

<sup>57</sup> Afa ehengel heafgelni angugim ningana kafuti niagininim afa fwina gonkun niagini. Afa ikagna efihia ambenam Stivenim waki fakana.

<sup>58</sup> Afa sa ambe ehem kehlinim hugufliufu kembang la afwambagam fatinim asa fun na wagini. Afa ehe heafgelni kuweg lofug mo hugfu skuniba asa kwamblog el mungu Sol sa ena lofugimba kuklu lambgufena.

<sup>59</sup> Afa maia funna awagfinibi afa sa Stiven enaig esona og, “Ainiyag Sisas nimbe kana sungwabug mo flana.”

<sup>60</sup> Afa ehe mongkokini kwakwagenam fwina enaig esona og, “Ainiyag nofeka mungwagba enaig esen.” Ehe enaig esonam asa hefum mo lahana.

## 8

### *Sol sios elim kinig faini*

<sup>1-2</sup> Sol mungwamo sihini Stivenim tigigim.

Afa Godna suialag el Stivenim fakinim afa fwina we-watinaufena. Enag osuna kwania kinig Jerusalem lanai sios elim puguni. Afa mungwali el mo Judia Samaria kembang gam ahkwag minefenaba. Afa kanog fwatieg el mo gweyi auguiafena.

<sup>3</sup> Afa Sol mo oga sios elim amtakwale fati. Asa ikafenam mungu mungu elni lala sefufenam Godna saglag mi angwafig mi hugfu lambfenam kalabus yi wankafena.

*Filip Samaria kembang mo sihina*

<sup>4</sup> Afa el sa afunam gwesim minganag kembang gam Godna mo sihiageafuna.

<sup>5</sup> Filip Samaria nai kembang gam ikanam Kraisa, Godna Gisfug Fwahag Elni mo sihini.

<sup>6</sup> Afa kaksag el higafufenaba afa onigwage afufena afa ehena wasneigim nanguni.

<sup>7</sup> Afa asa enaig esena sanel moasiagafenam kaksag elni nihinai sufuhia apukeafuna. Afa kaksag el elig lihliga el mi afa mong lihliga el mi wangene fiahsaiana.

<sup>8</sup> Asa enag kembang lanai fwina sifakalini.

<sup>9</sup> Afa Samaria lanai el mungu, Saimon, ehe faisig lambigule afa haig haig kigmog fiahageakafule el feg. Afa mungwali Samaria lanai el nangunim sineminefini. Afa enag ehe heafna unehlam fingi fukuna og, hei kikehe.

<sup>10</sup> Saglag el i afa esug el i ena mo higinim asa esogona og, “Nufunam, sona elbi ena god seflig ‘Eba Kwania Wasneig’ ”.

<sup>11</sup> Afa el haig haig kigmogim wahkig fanangu fiahfohun afa enam sineminefinim asa ehena mo patalfuna.

<sup>12</sup> Afa maia Filip Godna bog meg suialag mo afa Sisas Kraisa unehlag sihinaba asa el higinim afa olug onigigna flinim asa saglag i angwafig i bu la apaiyena.

<sup>13</sup> Saimon gafa Filipna mo olug onigigna flanam asa bula pena. Afa sa ehe Filip nai yi muhla gofenam nangwafena maia Filip haig haig Godna kigmogim ogfuiafenaba asa enam nangunam sineminefena.

<sup>14</sup> Afa kanog fwatieg el Jerusalem la higinim maia Samaria lanai el Godna mo flinibi asa Pita mi Jon mi esim ningitigini.

<sup>15</sup> Afa ika ahpugunam beten ahfina afa ambangel el sa olug onigi sa ma Godna Sungwabug fli.

<sup>16</sup> Haisenaba Godna Sungwabug mas ehelim pe bloni mo. Enag elbi Sisas Ainiyagna unehlag la bula apaiyena.

<sup>17</sup> Asa Pita i Jon i ninga sisi yi misog la askonibi asa ehelim Godna Sungwabug fini.

<sup>18</sup> Afa Saimon nangwagnam maia sambaganigi kanog fwatieg el ninga askonabi asa ehelim Sungwabug flini. Asa Saimon oga kig fainim og,

<sup>19</sup> “Sa ma kam wasneig ahfai ka sa kangafa ambanim ninga fakaiba sa ma Godna Sungwabug flai.”

<sup>20</sup> Afa Pita esona og, “Sa ma nem kig nangum awaiye asa ne onigig ne oka kig fatinam asa Godna mangwal suialag fla.

<sup>21</sup> Enaig olug mas Godna nof la ihlafeg mo asa ne mas kagelni gafuga la seaifui.

<sup>22</sup> Asa ne enaig onigig fwahanam Godim sihinaba asa ma neana enaig onigim fla fatinai.

23 Ka ati anwenafeg neana olug yi eba ambo bughiageg afa nimbiafena amtakwalig nihe nem kehlaugu.”

24 Afa Saimon wahigi sihini og, “Ainiyagim ahsahanaiba sa ma kam aflafenai asa ne kam sihinag enaig mas sa kam pugunafe.”

25 Afa Pita i Jon i Ainiyagna mo afa mangwal God asa esena ena mo ahsihinam asa Jerusalem gam pese ahkana. Afa Samaria kaksag kembang ahkafenaba ena Godna mo ahsihiakana.

### *Filip i Itiopia lanai Misog el i*

26 Afa Ainiyagna oflanai el blo Filipim enaig sihifena og, “Buihianam bite behig mina ika. Ena minaba Jerusalem fwahagim asa Gasa gam ikag.”

27 Asa ehe ikana. Afa ikafenaba Itiopia lanai elim mina la uflana. Enag elbi Itiopia misog angwafig Kandasina gafugag el.\* Ehe ehena kigim nangwaghiage gofena. Enag elbi Jerusalem gam ikanam asa Godim fingi fena.

28 Asa ehe pese akofna heafna kembang gam. Afa ehe hosna masig yi sime la gafenaba Aisaia Godna mo fla sihiaule elni ginof suwigaufna.

29 Afa Godna Sungwabug Filipim enaig sihifena og, “Ika muhla masig yi sime la ikafim.”

30 Asa Filip kikini ika muhla pugunam afa sa higina maia el Aisaiana ginof osuwigfena. Afa Filip sahana og, “Enag ginofba atiaho ne anwenafeg?”

31 Afa el sihina og, “Haig anwena kafefe, mas ka amban ofgunai.” Afa Filipim sihina og, “Au fuko blo na wanai yi hawag.”

32 Enag ginof ehe suwignaba enaig esona og;  
Ehe mengig pwakafenam mwalfwai gofena gwenag sipsip  
lofug maia el wanig afufeba tigingim o lag kufugim ofibi  
ehe mas eyuoiyi.

33 Afa ehem afwanfeg mo fwaini afa mas ehem numwehe kwefihianagini mo. Afa el enag elim tigingba asa lahad asa eheba luwalig fwainig. Ais 53:7,8

34 Afa enag el Filipim sahana og, “Sa kam sihina, Godna mo fla sihiaule el hefum esog me awai ming elim me?”

35 Asa Filip ena mo mog la fla fakanam asa gwesim Sisasna suialag mo sihiakana.

\* **8:27:** Itiopia eba Afrikana kantri. Kandasina eba Itiopianina misog angwafig. Sonag gafugag el eba gavmanna saglagluwal.

36-37 Afa mina la ahkan ika bula pugunam afa ena misog el sihina og, “Buba hogi. Mango kam bu la pegimba kagfugu.”†

38 Afa saglagluwal gafugag elim sihina hosna sime keahla. Maia sime gofenaba afa ahpenam bu gam ahkana asa Filip Itiopia nai misog elim bu la fatina.

39 Afa maia bu lanai pugu ahblonaba asa ikagna Godna Sungwabug Filipim sulufu wanikana, afa sona el mas pese nanguna mo asa ehe mo mina gam ikafenaba sifakalena.

40 Afa ikagna Filip Asdot kembang la gohfena. Afa ikafenaba Sisana suialag mo sihiakan kan Sisaria la puguna.

## 9

### *Sol olug waikafena*

1-2 Enanam Sol lagofena ogna Ainiyagna patalfuiag elim kwaskofe. Onga Damaskus la laskuhlag lala ika ambangel angwafig i saglag i Sisana el fiahsaieg enam sulufenam asa Jerusalem gam wankanam kalabus lala laiti. Afa ehe enaig onigifenam asa misog prisim sahana og ma kam nihe mo pepa faibi ka sa enaig ese.

3 Afa maia Sol Damaskus kembang muhla pugunaba asa ikagna of lanai kwania ombusug blo molukugo fakana.

4 Afa sa ehe bite la pena gifnibi afa higinina mo gweyi ehem sihina og, “Sol, Sol, haisegba nane kam amtakwaleafag?”

5 Sol esona og, “Saglag, neba amban?” Afa esona og, “Kaho Sisana ena elim sa nokawo amtakwaleafla.

6 Sa buhianam ika na ne kembang la puguiba asa ma el nem sihinai mangwal sa ne fefe.”

7 Afa Sol minganagim wanikanam asa ehgel moagim higinim afa mas nanguni mo asa mwalfwai afohiafena.

8 Sol buhianam nofug mo bahianam afa ninof fegim mo sikulufeagena. Asa ningana kehlinim Damaskus gam wanig afuna.

9 Afa sambaga mungu osuna ehe gwenaig gafena asa ehe fane i bu i mas nena mo.

10 Afa Damaskus kembang la patalfuiag el mungu gafena eba Ananias. Afa ehe nangunaba itila lofug Ainiyag unena og, “Ananias”. Asa ehe esona og, “Ainiyag, ho ka ga”.

11 Afa Ainiyag ehem sihina og, “Pugu mina gam Judasna lalam ika ena mina seflig ‘Misosufgoh’. Afa sa sahin el mungu Tarsus lanaim ehena unehlagba Sol. Ehe beteneau.

† 8:36-37: Mingnag anwena el enaig onigig mong mo gohna eba enaig esog, v37 Afa Filip ehem enaig sihfena og, “Atiamba ne fwina olug onigig fegba sa ne bu la pei.” Afa ehe enaig wahigi esona og, “Ei, Kati enaig olug onigifeg Sisana Kraisa eba Godna leg.”



12 Afa Sol nangunaba itila lofug el mungu blona ehena unehlagba Ananaias. Ena elbi maia ningana tuhwiba asa ehe pese ninof fiahgena.”

13 Afa Ananaias sihina og, “Ainiyag, ati ka kaksag mo higwageg sona elbi neana elim Jerusalem kembig haig haig fenugfiahka.

14 Afa ehe nihe mo pepa misog prisni ninganai wanai yi flaublu pugug. Oгна kike lambku ambangel sa neana unehlag fingi fig.”

15 Asa Ainiyag ehem sihina og, “Seka, ati ka kanog fwahag enag elbi kana mo lagig el. Asa ehe kana unehlagim afwambanai elim, misog elim, afa Israel elim ogfunugefe.

16 Eba ka ehem ogfunafe asa mungwali susug flafe maia kana gafugag ofekafiba.”

17 Afa Ananaias ikanam lala sefunam asa ningana Solna misog la fakanam og, “Sol nilite, asa ne mina la oblofnaba Sisas Ainiyag nem puguna. Enag kam ningihiag og sa ma nem nofug wangenefei afa sa Godna Sungwabug nem blo simbigahlai gufi.”

18 Afa ikagna gweyi Solna nofug lanai sawagna kisigig lofug hugofu penaba asa ehe pese ninofihagenam asa bu la pena.

19 Afa sa ehe fane neagen afa ehena lofug pese wasneina. Afa Sol mwakwalig Damaskus la patalfuiag elim wanana.

### *Sol Damaskus Kembig la mo sihina*

20 Gwenana ehe laskuhlag lala ikafnam asa mo sihiafna og, “Sisasba Godna Leg.”

21 Ehegel higinim sineminefinim hefum sihiagafewagfena afa og, “Atiahog, sona Pol seaka asa Jerusalem la elim Sisasna unehlag fingi fig ehe amtanafehiagena? Afa wanai yi blog elim lambigim pese saglag pris nangum lambku.”

22 Afa ehena mo pugu fwina wasneiagena asa Juna elim ogfuni Sisas eba Gisfu Fwahag El God ningihiag elim lambigim. Afa Ju el Damaskus lanai higinim onigwageni asa mas ehem mo haig esuni mo.

23 Afa mwakwal managenaba asa Ju el laskuhlanam oagna mina yisgiagim asa Solim tigifati.

24 Afa wahkig osu i sinaini i kembig mengig la anwasafegofena oagna sa ehem tigi. Asa Sol ena mom higinam ehe mas mengig gam pugu ikana mo.

25 Afa Solna patalfuiag el sinaini ambenam wanigafunam Solim sobi yi fatinim asa kembig bog meg megam wena kehlinim fli afwambagam fatini.

### *Sol Jerusalem gam ikana*

<sup>26</sup> Afa Sol ika Jerusalem pugunam Sisasna patalfuiag elim nangwagnam asa ogna gwenaiḡ gafugafi. Afa ehēgel enaiḡ onigini og ehe Sisasna mwakwal el ofe asa mungwali embe-feagini.

<sup>27</sup> Afa Barnabas kwefugnam asa kanog fwatieḡ el nangum wanikina. Afa sihini sa Sol Ainiyagim mina la nangunaba afa Ainiyag ehem sihina. Afa ehe Damaskus kembig ikanam ehe mas embefena mo Ainiyagna mom wasneig mo sihina.

<sup>28</sup> Asa Sol mungwal auguiafena afa Jerusalem la Ainiyagna mom wasneig mo sihiageakana.

<sup>29</sup> Sol Ju elim Grikna mo sihiagim wan flafihiagena asa ogna Solim tigifati.

<sup>30</sup> Afa nilite maia enam anwenafinim asa Sisaria gam paiye wanigafunam afa ufu Tarsus gam ningihini.

<sup>31</sup> Afa enanam Judia nai, Galili nai, afa Samaria nai sios wangene augufena. Afa Godna Sungwabug siosim kwaganam afa wasneihiagena asa kaksag el pugunam sa Ainiyagim ahnai skaufini.

### *Ainias i Tabita i*

<sup>32</sup> Pita kaksag kembig wagiakan ikana Lida nai Godna elim nangwagena.

<sup>33</sup> Enanai yi elim mungu nanguna eba Ainias. Enag elbi kig lihilifenagena afa 8 pela yia ehe kife la gwese gifini.

<sup>34</sup> Afa Pita sihina og, “Ainias, Sisas Kraiss nem ati wangenefe fatig, sa buihianam kife mwanmwan enam asa flaku.” Asa ikagna Ainias buihiana.

<sup>35</sup> Afa kaksag Lida nai Saron nai el nangunim asa Ainiyagim olug onigig faini.

<sup>36</sup> Afa angwafig mungu Jopa la gofena, heafna unehlagba Tabita. Eba Grikna mo ehem seflig Dorkas. Ehe Sisasna patalfuiag el suialag gafugafefenam afa gawig fwainig elim kwefoafna.

<sup>37</sup> Afa enanam ehem gihenam asa lahana. Afa sa meligim bu la sugfunaginim flifu sisi yi lala megam faki fwahini.

<sup>38</sup> Jopaba Lida muhla. Afa patalfuiag el higinim maia Pita Lida la gafenaba asa sambaganigi ningitigina ehem ahnangunam fwina sohona og, “Hei, sa ikagna blo.”

<sup>39</sup> Asa Pita patag ika pugunam afa sisi yi lala megam fukwali wanigafuna. Afa mungwali esig bontag angwafig buguiagafenam Pitam wakifakanam wewatoni. Afa haig haig lofug sa Dorkas nofkena gafenaba kweluwagefenam mimagen fini enam Pitam ogfuni.

<sup>40</sup> Pita afwambagam ningitiginam asa mongkokini kwakwaganam sa Godim sahana. Ehe waike meligim nangunam

asa sona og, “Tabita sa buihia.” Asa ehena nofug bahia Pitam nangunam buihiana.

<sup>41</sup> Pita ehena ningam kehlanam fokla lasona. Afa Pita Godna el mi afa esig bontag angwafig mi une tiginam ogfunim og Dorkasba ati pese buihiag.

<sup>42</sup> Afa sa ena mo Jopa nai el mungwali higwaginim asa kaksag el Ainiyagim olug onigig faini.

<sup>43</sup> Afa Pita mwakwalig Jopa la Saimonna hawagna. Afa Saimon eba bulmakauna lofug gafugafeule.

## 10

### *Pita i Kornilius i*

<sup>1</sup> Afa Sisaria kembig la mungu afwambanai el Kornilius enaig gafugafeg eba 100 Romna soldia elim nangwaghi-awagig. Ena soldiaba seflig Itali soldia.

<sup>2</sup> Sona afwambanai elbi heafna angwafig ni luwal na Godim ahnai skau wanfegim asa Godna unehlagim fingi wanafeg. Afa kaksag Ju elim gawig fwainigim ehe kwaganig, eba Godim sahanaule.

<sup>3</sup> Mungunagim osu eflagna ehe itila lofug nangunamba asa Godna oflanai el blo ehem sihina og, “Kornilius”.

<sup>4</sup> Afa ehe nangunam embefena og, “Saglag, mango maia?” Afa oflanai el wahigi sihina og, “God ati neana sahanagim higig afa sa ne gawig fwainig elim kwaganig enaba ati anwenafegim asa onigina go.

<sup>5</sup> Asa elim Jopa gam ningitigiba sa afu Saimonim wanig ambe afa ming unehlagba Pita.

<sup>6</sup> Eba ming Saimon ehe bulmakauna lofug gafugafeule el i hawag. Ehena lalaba kwania bu muhla go.”

<sup>7</sup> Afa maia oflanai el ikanaba Kornilius sambaga gafugag el mi afa mungu soldia el fena enam awamoni. Ena soldiaba suialag el Godim ahnai skaufena.

<sup>8</sup> Afa ehelim sihini sa oflanai el ehem haig mo sihina-gena asa Jopa gam ningitigina.

<sup>9</sup> Askanam sa ka osu misosuf gigni Jopa muhla apukegim ofefenaba afa Pita lala sisi gam kukanam betenena.

<sup>10</sup> Maia binilahanaba ehe ogna fane ne afa mahim fane numwehiagifinibi. Enanam itila lofug nanguna.

<sup>11</sup> Afa ehe nangunamba of piginam kwania lofug sambaga sambaga afwagna enaig pe bluna.

<sup>12</sup> Enanai yiba haig haig sis i wutlai i afa twafig i saiye afogoafna.

<sup>13</sup> Afa Pita higinamba God ehem sihinagofna og, “Pita buhianam sisba sonaba sa kwagnefe.”

<sup>14</sup> Afa Pita esona og, “Ainiyag, amo yo ka mas ese. Ka mas ena kwegig sisba neafna mo.”

<sup>15</sup> Afa God ehem pese sihina og, “Mangwal sa God sihig eba suialag asa nofeka enam oniginam kwegim.”

<sup>16</sup> Sambaga mungu nagim gwenag esenam asa lofug pese of gam fukokana.

<sup>17</sup> Afa Pita enam nangunam fwina onigwage aufna. Enam elim Kornilius ningitiginaba asa lalam yisgi afuian mengig la afohiafna.

<sup>18</sup> Ehegel une sahini og, “Saimon afa ming unehlag seflig Pita ohiahogo?”

<sup>19</sup> Pita mahim ena itila lofug nanguna enam onigaufnaba afa Godna Sungwabug ehem sihina og, “Hai sa nangu sambaga mungu el nem yisgi ambe.

<sup>20</sup> Asa peka nangwag, nofeka afuiagim okxi. Eba kikehe ningitigig.”

<sup>21</sup> Asa Pita penam elim esoni og, “Kaho ne kam yisgi ambeg. Haisegba sa ne ambeg?”

<sup>22</sup> Afa ehigel sihini og, “Korniliusba soldiana misog el na kam ningitigi. Eba afsug el Godim ahnai skaufenaule, afa Ju el mungwali ehem mungu suialafe flig. Afa Godna of lanai el pugunam ehem sihinag sa ma nem unenaiba sa ne heafna lala gam blonam asa ma neana mo higi.”

<sup>23</sup> Asa Pita lala megam sulfu wan sefukana wanafna.

Afa askanam pigiafafenam Pita mungwal afufefnamba asa minganag Jopa nai Ainiyagna el mungwali afuna.

<sup>24</sup> Afa ming osuna afu Sisaria kembang apukena. Kornilius Pitam nengiaufnaba asa heafna nilite mi hihe mi une tiginam heafna lala laskuhlana.

<sup>25</sup> Afa maia Pita lala megam osefofnaba asa Kornilius blo muhla pugunam mongkokini kwakwage penam hefum ahnai skaufena.

<sup>26</sup> Afa Pita ehem fukla fukunam esona og, “Buihia, kaga elhe.”

<sup>27</sup> Afa Pita sihiagafeakan lala megam ahsaifunam afa nangwanaba kaksag el laskuhlagofna.

<sup>28</sup> Afa sa mungwali sihini og, “Ne ati anwenafig kagelni Ju elni nihe mo enaig esona, Ju el nofeka afwambanai elni lala afu saiyeponam wahinim augu. Eba God ati kam ogfunag ka mas minganag elim kwenam afa esoi nengel Godna nofla nufweg el.

<sup>29</sup> Maia ne kam awamonagba asa ka mas anksam meg mo. Haisegba sa ne kam awamonag? Ka mas anwenafeg mo.”

<sup>30</sup> Afa Kornilius esona og, “Afa sambaga sambaga osuna awaienaba ka osu efilagna lala la beten neaufnaba afa ikagna el mungu ombusug lofugna blo gofenaba,

<sup>31</sup> afa kam sihina og, ‘Korniliuso, God neana betenim ati higig, afa mangwal sa ne gawig fwainig elim faig ehe mas etetig mo.

<sup>32</sup> Asa elim Jopa gam ningitigiba sa afu Saimonim wanig ambe afa ming unehlagba Pita. Eba ming Saimon ehe bulmakauna lofug gafugafeule el i hawag. Ehena lalaba bu muhla go.’

<sup>33</sup> Asa ikagna ka nem awamona afa kagel sifakalig sa ne blog. Enaig fenaba na saka ilawo Godna nof la laskuhlagim afa Ainiyagna mungwali mo ehe nem faig asa kagel koka higim.”

*Pita Kornilius na lala sihiagofena*

<sup>34</sup> Afa Pita enaig sihifena og, “Ilawo kati anwenafeg eba nufunam nemog, mungwali el Godna nofla mungwalofug fiahsaieg.

<sup>35</sup> Afa ambangel haig haig el Godim ahnai skaufenigim afa suialag nihe patalfug enaig elim God sawiyi fegim lambig.

<sup>36</sup> Ne anwenafig God kagel Ju elim heafna mo gof kam ningihianig. Ena suialag moba enaig sihifeg Sisas Kraisa ehe mungwali elni Ainiyag bigim esenigbi asa big God i mungu onigigna ahfeg.

<sup>37</sup> Afa ne anwenafig mangwal Israel lanai puguna. Ilawana Galili provins la Jon mo sihifenam og ma el onigig waikefenam bu la apaiyefi.

<sup>38</sup> Afa Sisasa Nasaret lanaim God heafna Sungwabug i kigmog i faina. Afa God ehi ahgofena asa ikafenaba suialag gafugafiahkafena afa ambangelim sa Satan amtakwaletifena enam wangene fetifena.

<sup>39</sup> Enaigim na ka nangugim maia Ju elni mungwali kembang afa Jerusalem la enaig esenigbi na sa ka ena mo sihig. Afa enaig elim li katigeg la tigi kahli.

<sup>40</sup> Afa maia sambaga mungu osuna awaienaba God ehem ihlafofatig asa ambala pugugba nangug.

<sup>41</sup> Afa mas mungwali el nanguni mo, eba minganag ambangel sa God wefug fwatig gwenag mungu ehe nangunim sihini. Afa maia buhianaba sa ka fane i bu i mungwali wanig ahagag.

<sup>42</sup> Afa ehe kam esonig sa ena suialag mo elim sihigon enag elbi God ehe wefug fwahag elim kwefihiawagigim melig pigieg mi afa nofkena gag mi.

<sup>43</sup> Mungwali Godna mo fli sihigule el ena moba sihi fwahini ambangel ehem olug onigig finigbi ehena unehlag la God ehagelni amtakwaligim huguflaitinife.”

*Afwambanai el Godna Sungwabug flini*

44 Pita maisi mo sihiagofenaba afa ena el mo higinibi asa Godna Sungwabug pe blo mungwali ehengelim puguni.

45 Afa Kristen Ju el Pitam wanig ambenam nangunimbi afwambanai el sa Godna Sungwabug lambini asa ehegel enam sineminefini.

46 Afa higinibi enag el haig haig mona lagwaginim Godna unehlagim fingi fini. Asa Pita sihina og,

47 “Sa nangu, enag elbi Godna Sungwabug lambigbi eba big gwenai mungwalofug big fig asa amban enag elim bu la apaiyegiba kwenife? Eba mas amban enaig esei.”

48 Asa Pita sihini sona el sa ma Sisasna unehlag la bu laba apaiye. Afa ehegel Pitam sahini og, “Sa kam mwakwalig wananam.”

## 11

*Pita Jerusalem lanai siosim sihini mangwal sa feagena*

1 Kanog fwatieg el i afa Judia nai patalfuiag el i higin, maia afwambanai el Godna mo ati flini.

2 Maia Pita ika Jerusalem gam pugunamba patalfuiag el kokohiawagig nihem patalfuna asa ehem fenagini og,

3 “Enag el mas kokohiawagig nihem patalfug mo afa ne heafgelni lala nef fukog waneg. Nofeka enaig esei.”

4 Asa Pita wahigi sihini mungwali mangwal sa ehem puguna.

5 Afa enaig esona og, “Ka Jopa la gafnamba beteneaufna asa ka mangwalim itila lofug nanguna. Asa ka nangugba ofenai lofug kwania fufugihiag afa ofim mo fwahagim sa pe blog ka nai yi muhla gofena.

6 Afa ka nangunamba haig haig sis i wutlai i afa twafig i saiye afogoafna.

7 Afa ka higinamba God kam sihina og, ‘Pita buihianam sisba sonaba sa kwagnefe.’

8 Afa ka wahigi sihina og, ‘Ainiyag, amo ka mas esei. Ena kwegig sisba mas kana mengig la feg mo.’

9 Afa God kam pese sihina og, ‘Mangwal sa God sihig eba suialag asa nofeka enam oniginam kwegim.’

10 Sambaga mungu nagim gwenai esenam asa lofug pese of gam fukokana.

11 Gwenana sambaga mungu Sisaria lanai elim ka nangum ningitiginimbi asa ambe lala apukena.

12 Afa Godna Sungwabug kam enaig sihifena og, ‘Nofeka afuiagim oksi.’ Afa hwag enwesog la gohug nilite ka wanig augim afa Korniliusna lala wani saiye afug.

13 Ehe kagelim sihini mangwal sa ehem puguna. Eba Godna of lanai el heafna lala la nangunamba afa ehem enaig

sihifena og, 'Asa elim Jopa gam ningitigiba sa afu Saimonim wanig ambe afa ming unehlagba Pita.

<sup>14</sup> Afa ehe nem mo flifu faifi asa God nem gwena lala naim lambfe.'

<sup>15</sup> Afa autunam Godna Sungwabug pe blo bigelim puguni afa enanam ka mo sihi gofenaba gwenaig esena ehegelim gafa puguni.

<sup>16</sup> Afa ka onigig ilawana Ainiyag esona og, 'Jon buna bula elim laitig afa God heafna Sungwabugni bula nengelim laitig.'

<sup>17</sup> Afa maia big Sisas Kraiss Ainiyagim oniginimbi asa God bigim heafna Sungwabug faig. Asa gwenaig afwambanai elim esenigbi sa ambala pugug eba God ehe gafugafeg. Enaig esegba na sa ka mas Godna gafugagim kwei."

<sup>18</sup> Afa ena mo higinim mas Pitam fenagini mo eba Godna unehlagim mungu fingi finim afa esogona og, "Ei eba nufunam, God afwambanai elim gafa minaba ambafenig asa ma ehegel olug waike finim nofkena fli."

#### *Antiok nai sios*

<sup>19</sup> Ilawanam Stivenim maia tigi fatinimbi Ainiyagna el kinig flinim afa ika Fonisia, Saiprus, afa Antiok kembang embem ahkawag minefena. Enanai yi Sisasna mo Ju elim mungu sihigoni.

<sup>20</sup> Afa minganag Saiprus nai afa Sairini nai el Antiok gam afunam afa afwambanai elim gafa Sisas Ainiyag suialag mo sihigoni.

<sup>21</sup> Afa Ainiyagna kigmog ehegelim gohonimbi asa kaksag el olug waikefinim Ainiyagim onigini.

<sup>22</sup> Afa Jerusalem lanai sios ena mom higinim asa Barnabasim Antiok gam ningihini.

<sup>23</sup> Afa ehe pugunam nangwagna maia God ehegelim suialafe hiagenamba asa ehe sifakalena. Ehe suialag onigig faini og ma mungwali Ainiyagim fwina wasnei kehli ufufi.

<sup>24</sup> Eheba suialag el ehena olug onigig fwina wasneina afa Godna Sungwabug ehem ihlafenagena asa kaksag el Ainiyagna el apukena.

<sup>25</sup> Asa Barnabas Tarsus gam Solim nangwagim ikana.

<sup>26</sup> Afa ika pugunam yisginam asa sulfla Antiok gam wani blunam mungwa yia la hawagena. Afa maia sios el laskuhlafenamba asa kaksag elim ogfufenug ahfena. Ilawana nemug ena kembang la Ainiyag elim unehlag flini Kristen.

<sup>27</sup> Enanam minganag Godna mo fli sihiule el Jerusalemim fwahinim afa Antiok gam ambena.

<sup>28</sup> Afa sonag el nai mungu eba Agabus. Ehe Godna Sungwabugni wasnei gohonam asa ena mo sihina og nengigim

kwania bini mungwali bite pugufe. (Enamba maia Klodius Rom lanai misog el gofenamba asa enaig puguna.)

<sup>29</sup> Ainiyagna el ena mo higinim asa ati onigini Judia nai Kristenim gwena ihla kwaganifi.

<sup>30</sup> Gwenaig esini Barnabas mi Sol mi kig faigonam ningitigini asa enag kig uku Juda nai sios saglag elim ahfaina.

## 12

### *Kaksag kinig puguna*

<sup>1</sup> Enanam misog el Herot, siosna elim kinig faini.

<sup>2</sup> Afa ehe gafugag elim ningitigina og ma Jemsim Jonna etegim higeflaki.

<sup>3</sup> Afa enaig esenam Ju elim nangwagena maia sifakalinimbi asa Pitam kehlanam kalabus lala fati fwahana. (Enanam Ju el Bret Yist Fwainig buyis sifini.)

<sup>4</sup> Afa sa Pitam kehlinim kalabus lala fatini. Afa ena lala 16 soldia Pitam nangwafofna. Afa sambaga sambaga afohufna maia afuiafnamba afa mingang sambaga sambaga ambe ehegelni kugla afohiafna. Herot og maia Pasova buyis awaiyeba asa Pitam elni nof la fahigenage.

<sup>5</sup> Afa maia Pita kalabus lala gafenamba afa sios wahkig Godim sahanafna og sa ma God Pitam kweagfwi.

### *Pita kalabus lala fwaha puguna*

<sup>6</sup> Liana maisi feafnamba Herot Pitam fahigenag oga fe. Afa sinaini Pita sambaganigi soldia nai yi olyi gifini. Afa sambaga senna kikenagi faknim asa sambaganigi soldia mengig la kagfo ahgofna.

<sup>7</sup> Afa Ainiyag of lanai el ikagna pugunam ombusug lala megam laugo gofena. Afa sa Pitam epinig la ihlafo fatinamba asa Pita nof tutafe bahianamba afa sa of lanai el sihina og, “Is ikagna buihia.” Asa gweyi sen Pitana ninga nai pitigifu ahpena.

<sup>8</sup> Afa of lanai el ehem sihina og, “Pese lofug i afa mong lofug i laitiage.” Asa Pita gwenaig esenamba of lanai el pese sihina og, “Sa ne laputig lofug fwahalanam kam patal blu.”

<sup>9</sup> Asa Pita ehem patalkuiafnamba mengigim fakwegfu ahfeakana. Ehe nangunamba asa of lanai el esena ehe enaig onigina eba mango nufunam mo. Ehe enaig etitinam og eba ka itilamba nangug.

<sup>10</sup> Afa sambaganigi kwagana ikana afa ika ming mengig lanai kwagana ikana afa ikanam ain mengig la pugunam, afa ena minamba gwesim kembang gam ikafna. Afa ena ain mengigba ehe heafa pitigiafunamba asa pugu afwambagam ahkana. Mina la mwakwalig ahkanam asa of lanai el gweyi ikagna ehem lasu ikana.



<sup>11</sup> Afa sa Pita enam anwenafenam esona og, “Eba nufunam ilawo ka ati anwenafeg eba Ainiyag heafna oflanai elim ningihiagba asa kam Herotna ninga nai afa Ju el amtakwal kam ofinifini sa nanai kam flag.”

<sup>12</sup> Afa maia ehe enam anwenafenam asa Maria Jon Makna afagna lala gam ikana. Afa kaksag el enanai yi laskuhlanam beteneafalna.

<sup>13</sup> Pita ikanam mengig la ningana tige gofena. Afa Roda gafugag angwafig asa ikanam oyna mengig pigi.

<sup>14</sup> Afa ehe ati Pitana mengigim higigna asa sifakalenam ehe mengig pigiegim tetinam asa kikini pese ikanam sihina og, “Pitamba ati mengig la blo go.”

<sup>15</sup> Afa ehem esogona og, “Ne moetetiofe.” Afa ehe fwina wasneinam esona og, “Eba nufunam ehe.” Afa ehe esogona og, “Amo, eba Pitana oflanai el feg.”

<sup>16</sup> Afa Pita maisim gwese mengig la tige gofenaba asa afu mengig pigi nangunim sineminefina.

<sup>17</sup> Afa Pita ningana pagafenim og afwai afwai. Asa heafna mo sa Ainiyag ehem kalabus lala sulufu puguna. Afa ehe sihina og, “Sa afu Jems\* afa minganag nilitem ena mo sihigon.” Asa ma fwahinim asim afui.

<sup>18</sup> Afa liana soldia etetiagenim hefum onigwaginim sa-hawagini og, “Afai, asim maia Pitamba ikag?”

<sup>19</sup> Afa Herotna gafugag el Pitam yisgiafuan mas nanguni mo. Asa Herot Pitam anwasafenafuhug elim fwina fasahitigifenam afa sona og, “Sa kwaskofi!” Afa maia kwaskofinimbi asa Herot Judia fwahanam mwakwalig Sis-aria la gana.

### *Herotim lahana*

<sup>20</sup> Afa Herot Tair nai Saidon nai elim olug kakagen gofena. Asa ehegel onigini ehegelni kembigim mas fane kwagana mo asa laskuhlanam oyna nangui. Ilawana mo Blastusim Herotna misog gafugag elim sihini og ma kam kwagani. Asa afunam Herotim nangunim sahini og ma olug kakagig fwahai.

<sup>21</sup> Afa sa mungu osunam sufina fwahani asa Herot heafgelni misog elni lofug wagwagenam heafgelni misog elni sime la peganam sa ma mo sihinwagena.

<sup>22</sup> Afa mungwali el ambala fwina enaig esogona og, “Enamba mango elni moamo eba heafa god ehe sihiago.”

<sup>23</sup> Afa Herot ena mom sifakalena afa ehe mas Godna unehlagim fingi fena mo. Asa ikagna Ainiyagna of lanai el ehem tigenamba sa gihenam afa petu atagim ahagawaginimbi asa lahana.

\* **12:17:** Afa enanam Herot mas Jemsim higeflakana mo.

<sup>24</sup> Afa Godna mo pugu wasneinam asa fafokaminefna.

<sup>25</sup> Afa Barnabas i Sol i Jerusalem la gafugag awugafenam afa Jon Makim ahsulflanam Antiok kembig gam asa pese afuna.

## 13

### *Godna Sungwabug Barnabas mi Sol mi kanog fwatina*

<sup>1</sup> Afa enanai yi Antiok sios laba Godna mo fli sihiule el i afa ogfuiag el i afohiafna. Ehegelni unehlagba Barnabas, Simeon (heafna ming unehlagba Niger),\* Lusius (eba Sairini nai el), Manain (eba autunam misog el Herot i mungu niliag afena), afa Sol.

<sup>2</sup> Enanam sios el fane fwaiyi gonam Ainiyagim lotu finimbi sa Godna Sungwabug sihini og, “Barnabas mi Sol mi lambtig-inim algana fwatigi ati ka ena gafugag la wefug fwatigig sa ma gafugafe.”

<sup>3</sup> Afa sa fane fwai yi gonam betennini asa ninga eheningi nai yi skunim afa sa ningitigini.

### *Saiprus la hafena*

<sup>4</sup> Afa Godna Sungwabug ningitinimba asa Selusia gam ahkana. Selusia ahpugunam bot la ahgonam asa ailan Saiprus gam ahkana.

<sup>5</sup> Afa Salamis kembig ahpugunam ika Ju na laskuhlag lala ika ahsaifunam Godna mo ahsihina. Jon Mak auguiafena namba eheningim kwaganfna.

<sup>6</sup> Afa ehegel enag ailan la fapuke fiahfuiam ming maligim Pafos kembig apukenam nanaiyi nangunimbi Ju el mungu Bar Sisas heafna unehlag Grikna mona seflig Elimas. Enag elbi agisu ule weni ule afa ehe mwakwal Godna mo fla sihiaule el feg.

<sup>7</sup> Ehe misog elni gafugafegofna. Enag misog elbi Sergius Paulus eba numwehe anwena el, afa ehe oga Godna mo higim asa Barnabas mi Sol mi uneni.

<sup>8</sup> Afa Elimas enag elbi agisu ule el, oga eheningim kwenim og ese misog el masa Sisasim oniginafe.

<sup>9</sup> Afa Godna Sungwabug Solim, afa ming unehlagba Pol, ehem ihlafenagenamba asa ehe Elimasim fwina nofna nangunam sihini og,

<sup>10</sup> “Nemba Satanna leg. Ne suialag nihena angoluweg go. Mungwali haig haig mo mwakwalig neana onigi la kwaniafiahgeg asa ne Ainiyagna mom nugwakale flag.

\* **13:1:** Hwa unehlag ‘Niger’ ehena mog mo eba ‘yimilig’. Mingnag anwena el enaig onigig fig Simeon eba Afrika nai yimilig el feg.

11 Asa ma Ainiyagna ninga nem filafati afa sa nem nofug mwakwalig amtakwalig gohi sa ne mas osuna ombusugum nangui.”

Afa Elimas nangunam ikagna leango sikulufenam pe blo nofugum sagfla fakana asa etetiage akafnamba elim yisi-giakafna og ma kam ningana kehlanam waniki.

12 Afa misog el enam nangunam afa Ainiyagna mo ehem olug fingi fenamba asa olug onigig Ainiyagim faina.

*Barnabas i Pol i Pisidia gam ahkana*

13 Afa Pol fena heafna hihe apaiyenam asa bot flinim Pafos fwahinim Perga kembang Pamfilia provins gam afuna. Afa Jon Mak mo enanai yi lasana pese Jerusalem gam ikana.

14 Afa eheningi Perga ahfwahanam Pisidia distrik Antiok kembang ahpuguna. Afa maia Esug Auguiag Osuna pugunamba asa eheningi ahkanam Ju elni laskuhlag lala ahsaifunam pe hawagna.

15 Afa maia Mosesna mo i Godna mo fli sihiule elni mo i Godna buk la suwigni fwahinimbi, asa saglag el eheningim sahigoni og, “Nilite, atiamba ne mo ahfegba asa ehengelim ahkwaganam sa ahfai.”

16 Afa Pol buhianam ninga fatinim og ma sifeiba asa esoni og,

“Israel nai el i afa afwambanai el i Godim ahnai skaufinim sa kam higini.

17 Autunam Israel na God kangelni simbianigam ati kanog fwatina afa maia Isip yi auguiafnamba God esenimbi pugug kaksag feagen. Afa fwina wasnei gafugag fenam Isip yi nai lambana lambpuguna.

18 Afa Israel maia 40 yia bite behig la Godim gasafinimbi afa God mas fwatina mo.

19 Afa ehe maia elegeg la gohug Kenan la nai kantriim flafonamba asa heafna elim fwahanamba asa ehe bitena mog fiahsaina.

20 Afa enaig esena 450 yia fenamba.

Asa God ehelim nangwaghiageg elim fainimba sa ikan ikan Samuel Godna mo fla sihiaule nai yi puguna.

21 Afa maia ehegel membini misog elim sahinimbi asa God Solim fwahiani. Sol eba Kisna leg afa ehe Benjaminna mungwa simbiangana. Afa ehe 40 yia nangwaghiagen.

22 Afa God Solim mo ninghianam asa Devitim misog el fwahana. God esona og, ‘Devitba Jesina leg ka nangugim afa ka ehem fwina fwefenag. Eba kana olug flafe.’

23 Autunam God ati sihi fwaha ehe og eba Devitna simbianig fenam asa Israel elim lambfe, ena elbi eba Sisas.

24 Sisas maisim gafugafeg fwainig fiahfenamba enanam Jon puguna Israel elim mo fainim og ma olug waikefinim amtakwalig nihem fwahinim asa ma bu la apaiye.

25 Afa Jon gafugafefim awaiegim meyi ofefenamba ehe enaig sihini og, ‘Ne enaig onigini kaba amban? Kaba mango sonag el God sa Wefug Fwahag sa ne nengiafu, ena mo. Nengigim sonag elbi asa kana sum yi blofe. Kaba mango suialag el mo, ka mas ehem kwefunam ehena mong lofug huguiafla nai.’

26 Pol enaig sihifeni og, “Nilite, nengel Abrahamna simbianiga i afa afwambanai el i Godim ahnai skaufini, afa God ogna elim lambim asa ena mo bigim ninghianig.

27 Jerusalem nai el i afa heafgelni misog el i mas anwenafini mo Sisas eba God Gisfu Fwahag el. Afa mungwali Esug Auguiag Osuna ena mom suwigfofnamba, afa ehegel mas numwehi anwenafini mo Godna mo fli sihiaule elni ginofim. Enag ginof nufunam esenamba asa ehegel ogna Sisasim tigifati.

28 Afa mas ehena haig haig nanguni mo afa ehegel Pailatim sahini og ma Sisasim tigi kahli.

29 Sonag elbi ati Baibel sihi fwahana asa ehem enaig esenag gifi sa gwenaig esini li katigeg la nai numbwaslinim bite meg gam fakini.

30 Afa sa God ehem pese ihlafla fatina.

31 Afa kaksag osuna hefum ogfunfina. Afa sa ilawana el Galili fwahifinim Jerusalem gam wanig afuiafenaba asa ilawo nai mo Israel nai elim sihinigena mangwal sa nofna nanguna.

32 Na sa kaningi nem ena suialag mo ka nem ahblunug. Autunam God bigelni simbianigam sihi fwahanimbi asa ena elim ninghiagba bigim lambig.

33 Afa ehe Sisasim ihlafla fatigba asa ena mo nufunam bigel ehegelni luwaligim pugunug. Afa Baibelna mo Buk Song 2 la enaig esog og;

Ilawo kaba neana alag asa neba kana leg.

*Sam 2:17*

34 “Afa minginag moaba God sihig, eba ehem ihlafla fatigba, eba mas ehena elig nogig mo. Ena mo enaig sihi feg og;

Ka Devitim sihi fwahana ka ehem suialag esenag. Enag sihi fwahag eba nufunam feg afa afsug kabag feg. *Ais 55:3*

35 “Afa minginag mo enaig eseg;

Mas ne nimbiafna suialag gafugag elim fwahana mo asa bite meg gam ika nogig mo. *Sam 16:10*

36 “Afa Devit nofkike gafenamba Godna sawiegim patalfe-fkuian maia lahanamba. Afa ma bite la fakinimbi ehe simbianigana kig i waheg nogig.

37 Afa ming elbi enamba God ihlafla fatigba eba mas ehena elig nogig mo.

38-39 Nilite, kog sa ne anwenafi Sisasba ehe mog moaba kagelni feg. Afa amban ehem olug oniginaiba eba God ehena amtakwalig mom fla fatinafe asa ehe Godna nofla afsug kabag pugufe. Afa Mosesna nihe mo mas enaig eseg mo.

40 Afa numwehifibi Godna mo fli sihiaule el sihi fwahigbi masa ne enaig esefie. Enaig esog;

41 Sa nangui, ne amban Godna mo masig fatig, sa ne numwehe onigifibi eba nem pigife. Eba ka mangwalim eseba asa ne sineminefife. Afa maia el ena mog mo ogfugba, ne mas onigi.” *Hab 1:5*

42 Afa Pol i Barnabas i laskuhla lala fwaha hakofnamba afa enanai el esogoni og, “Sa ming Esug Auguiag Osuna pese ahblo gwenai mo ahsihini.”

43 Afa sa ena lala fwahinim apuke afwambagam afuna Ju el i afwambanai el i Pol mi Barnabas mi patagafuna. Sonag afwambanai elbi Ju elni nihem patalfuna. Afa sambaganigi suialag mo ahfaini God ehengelim esmunagim kwaganig. Sa ma enanai yi saiye afohiefi.

44 Afa ming Esug Auguiag Osuna opugufnamba afa mungwali kembig nai el ogra laskuhlanam Ainiyagna mo higim.

45 Afa Ju elni saglag el maia kaksag elim nangwagnim ehengel oksiasaina afa sa Polna mom pagau apaiyenam afa afwanef mo faini.

46 Afa Pol i Barnabas i fwina wasnei ahogonam wahigi ahsihini og, “Eba nufunam ilawana kati nem Ju elim Godna mo ahfainimbi afa nimbe ne oksini afa mas ne nofkikena suialag wahkig gagim onigi mo. Naig fenamba na sa ka nem ahfwatigim afwambanai gam ka hako.

47 Afa Ainiyag kam esonig og; Ka nem ombusug esenibi asa afwambanai el enam nangunim patalfufe asa ena mina God mungwali bite nai elim pese lambfe.” *Ais 49:6*

48 Afa afwambanai ena mom higinim sifakalinim asa Ainiyagna mo fingi fukoalina. Afa ambangelim sa God kanog fwatig nofkikena wahkig gagba enag el Ainiyagim olug onigini.

49 Afa sa Ainiyagna mo ena bite la fafokaminefena.

50 Afa Ju el kembig lanai saglag el mi afa Godim lotu fenag misog angwafig mi ehgelni olugim waike fegonibi asa ehgel mas Pol mi Barnabas mi membegoni mo. Asa ehgel eheningim kinig faigona asa ehem enanai ningitigini.

51 Enaig safena, pugu hakofnamba smof mong yi nai buiambu ahfenam ahkana. Enamba enaig eseg eba mas ena kembigim ahfatigim gwesim Aikoniam kembig ahkana.

<sup>52</sup> Afa Antiok nai patalfuiag elim Godna Sungwabug ihla fiahsainaba asa fwina sifakalini.

## 14

### *Pol i Barnabas i Aikoniam gam ahkana*

<sup>1</sup> Pol i Barnabas i Aikoniam gam ahka ahpugunam Ju elni laskuhlag lala asaifuna gwenai nihe ahfiahfena. Afa maia mo ahsihiafenamba ena mo elni olug fingi waikeskona asa kaksag Ju el i afa afwambanai el i Ainiyagim olug onigini.

<sup>2</sup> Afa minginag Ju oniginigim oksini afa afwambanaim kukusihiageni og ma Kristenim olug kakagegoni.

<sup>3</sup> Afa sambaganigi mwakwalig nanai yi hawagenam Ainiyagna mo gwese ahsihiagofna. Afa eheningi haig haig kigmog siagafenamba enamba Godna kigmogim ogfug afa enag aflafeg mo ahsihinamba eba nufunam.

<sup>4</sup> Afa enanai el bambuhiaginim, minginag Ju elni saglag elim patagafuiafna afa minginag kanog fwatieg el sambagam patagafuiafna.

<sup>5</sup> Afa Ju el i afwambanai el i afa eheningina saglag el i ogna sambaganigi elim amtakwalihiaginim asa fun na kwaskofi.

<sup>6</sup> Afa sambaganigi ena mo ahiginam distrik Likonia gam ahkana, afa enanai yi ahpugunamba eba Listra afa Derbe afa minginag kembig muhla gohkana.

<sup>7</sup> Afa sa enanai yi Godna suialag mo ahsihina.

### *Listra kembig afa Derbe kembig*

<sup>8</sup> Afa Listra kembig laba el mong kukwaligni gafna. Enaig esenamba eba afag gwenai weti la wanigana. Afa saglafenam mas gominefena mo.

<sup>9</sup> Afa enanam maia Pol suialag mo sihiagofnamba enag el ena mo higina ofena. Afa sa Pol ehem fahigenagenam anwenafena ehena olug onigig ati ihlafeg asa God ehem wangenefe fatife.

<sup>10</sup> Asa Pol ehem ambala sihina og, “Buihia gohum!” Asa ehe pusoka gohnam sa ikana.

<sup>11</sup> Afa kaksag el nanguni maia Pol enaig esenamba asa ehengel Likoniana mona ambala esona og, “Sona elbi eba sambaganigi god el lofug bigim pe ahblonig.”

<sup>12</sup> Afa Barnabasimba eba seflini Sus afa Pol eba fwina mo sihiaule ofenaiba god Hermes asa ehem seflini Hermes.

<sup>13</sup> Afa ena lalaba enanai yi el god Susni unehlagim fingi fifini enamba afwambagam kembig la gofna. Susni pris bulmakaum tagni wagwagifinim asa kembig mengig gam lambug ambeafna. Ehe fena afa mungwali el apaiyena ogna kwagi wehlim asa eheningina unehlagim fingi fiawag.

14 Afa maia enaig esinimbi asa Barnabas i Pol i ena mo ahiginam afa sa heafningina nihi lofug koko ahfwatiafenam sa ahpugu olyi kikini ahkafnaba fwina unehona og,

15 “Afa mangigim ne enaigba esig? Kaningiba el big mungwalofug fig. Kaningiba ahblog nem suialag mo ahfaig asa ne mwakwal godim fwahinim asa ne waike God nofkikenagim onigini. Ehe of i bite i bu i mungwali gawig gafugafiageg.

16 Autunam ehe afwambanai elim fwatina asa heafgelni sawiegim patagiafufna.

17 Afa ehe suialag gawig lambwaie gofnaba asa bu fiahfna afa nefgenai sa heafna osuna puguiageafna. Afa sa ehe kaksag fane faifnim afa ehe nengelni olug yi afigig faig. Enamba ogfug ehe nofkikena go.”

18 Afa gwenaig mo ahsihinam afa ehe og ma ehegelni onigig waikefi, ese ehegel masa bulmakau tigi tuhulunim eheningim fingi fiahwagfe.

19 Afa enana Ju el Antiok Aikoniam kembang fwahinim Listra kembang gam ambenam ena kembang lanai elim kukusihiaginimbi, asa Polim fun na waginim og atimba lahag asa ehem flini kembang la afwambagam fatini.

20 Afa maia Kristen el ehem wakinamba asa Pol buihianam sa pese kembang gam sefukana. Afa liana Pol i Barnabas i ena kembang fwahanam Derbe gam ahkana.

### *Barnabas i Pol i pese Antiok Siria gam ahkana*

21 Afa eheningi Derbe la hafinamba suialag mo ahsihinamba enanai el kaksag Ainiyagna fiahsaina. Afa pese Listra afa Aikoniam afa Antiok Pisidia gam ahkana.

22 Afa ahkafnamba kigmog mo patalfuiag elim ahfaifnim og, “Nofeka olug onigim fwahi yi. Ambangel Godna bog meg gam saiwegogimba ofifibi asa ma kaksag kinig flinim asa saiye.”

23 Barnabas i Pol i mungu mungu siosna saglag elim wegihfwati hofefnaba. Asa fane foiyioaklafinim sa betennini og ma God heafna ninga la afohie, eba ehegelni Ainiyag.

24 Afa eheningi Pisidia ahfwahanam Pamfilia gam ika ahpuguna.

25 Afa Perga la Ainiyagna mo ahsihinam afa gwesim Atalia gam ahkana.

26 Afa nanai yi bot la afkonam Antiok gam ahkana enanai yi autunam Kristen eheningim Godna ninga la fwatiginimbi asa God esmunagim kwaganaba asa ena gafugagfeag ahfeakan asa pese ahblona.

<sup>27</sup> Afa ahpugunam enanai yi sios elim ahunetigina og ma ambe laskuhlaiba asa heafningina gafugagim sihinuwag ahfenam og, “God ehe esegim minaba pigiba asa afwambanai elbi Ainiyagim olug onigini.”

<sup>28</sup> Afa sambaganigi enanai yi patalfuiag elim fwina ahwanana.

## 15

### *Sios el Jerusalem la laskuhlana*

<sup>1</sup> Afa mingnag Judia nai el Antiok kembang apukenam Kristenim esogoni og, “Mosesna nihe mo enaig esog sa ne nihim kokohiawagi, asa ne ena moba mas patalfug mo, eba God mas nem lambi.”

<sup>2</sup> Pol i Barnabas i ena mom ahiginam fwina ahlagnaba asa sios el sihiaginim sambaganigi mi afa minginag apaiyename enam fwatini og ma ahfui Jerusalem la siosna saglag el mi afa kanog fwatieg el mi numwehe sihigoni.

<sup>3</sup> Afa sa Antiok sios ehegelim ningitiginimbi asa distrik Fonia gam afa Samaria gam asa sihiageafuna, og ati afwambanai el Godim olug oniginig, afa mungwali Kristen ena mom higinim asa fwina sifakalini.

<sup>4</sup> Afa maia Jerusalem apukenaba sios el i kanog fwatieg el i afa saglag el i ehegelim nangwaginim sifakalini. Asa ehegel sihiwagini mangwal sa mungwali God ehegelni ninga la gafugafeni.

<sup>5</sup> Afa minginag Kristen farisi nihem patalfuiaule buguia-gafenam og, “Afwambanai el gafa sa ma heafna nihim kokohiaginim afa minginag mungwali nihem Mosesna patalfui.”

<sup>6</sup> Asa kanog fwatieg el i afa saglag el i laskuhlanam ena mom kwefuhiageaflafna.

<sup>7</sup> Afa ena mo sihiageaflafnaba asa Pita buhianam sihini og, “Nilite, ati ne anwenafig autunam God kam nengel nai yi olyi kanog fwahag ka afwambanai elim Godna suialag mo faibi sa ma Sisasim olug onigini.

<sup>8</sup> Afa God ati elni olug onigigim anwenafegim afa heafna Sungwabug ehegelim faig asa gwenaig eseg bigelim gafa faig. Enamba bigim ogfunig ati ehegelim gafa lambig.

<sup>9</sup> Afa big Ju el i afa afwambanai el i Godna nof la mungwalofug afa maia ehegel onigigbi asa God ehegelni olug yi nai amtakwalig nihe lambig aitinigbi asa ehegelni olug afsug afohienig.

<sup>10</sup> Big i afa bigelni simbianiga i mas numwehig Mosesna suialag nihem patalfug mo. Eba fwina wasneig. Haisegba sa ne og ka ena kinigbi kikinim Kristenba faigo afa sa ne enaig esegonibi eba God ninimufe.



11 Amo, ati big anwenafig Sisas Ainiyagna aflafeglahe God bigim sulfug na sa big ehem olug oniginig gwenaiḡ seg afwambanai gafa esig.”

12 Afa sa mungwali el sifinam Barnabas nai i Pol nai i mom higwagfofna. Afa eheningi enaiḡ sihi ahfini og God afwambanai elim haig haig kigmog kaningina ninga la esinig.

13 Afa eheningi maia sihi ahfwahanamba asa Jems\* sihini og, “Nilite, sa kam higini.

14 Saimon ati sihi fwahana og God ilawana minginag afwambanai elim lambigim afa heafna el fiahsaiyig.

15 Enamba Godna mo fli sihiule el gwenaiḡ ginofi fwahini og. Godna buk enaiḡ sihifeg;

16 Devitna simbianiga enaiḡ eseg lala lofug bofug pegi afa sa nengigim ka blonam pese nimblaiba.

17 Asa mungwali el Ainiyagim yisigifi eba afwambanai el ati ka kanog fwatig eba kana el.

18 Enamba Ainiyagna mo ati autunam sihi fwahana afa el enam ati anwenafig asa enaiḡ pugufe.” *Amo 9:11,12*

19 Afa Jems gwenaiḡ sihifena og, “Asa ka enaiḡ onigig afwambanai el oḡna Ainiyagim olug onigi, nofeka fwina ehegepusug faigo.

20 Magofi, naiba nawo ginof finim sa big enaiḡ esogo, nofeka fane sanelim faigo ahaga, afa nofeka aga taitufi, afa nofeka sis wena kihlagba ahaga, afa nofeka taf ahaga.

21 Afa ati ne anwenafig mungwali kembig laskuhlag lala Mosesna nihe mo mungwali Esug Auguia Osuna suwigafu, autunam pugugum blog glawanga pugug.”

### *Ginof afwambanai elim fatigoni*

22 Afa kanog fwatieḡ el i saglag i afa mungwali sios el i mungwa mo sihiaginim asa ehengel nai yi minginag el fwatigbi sa ma Pol mi Barnabas mi Antiok kembig gam wanafui. Asa Judas fena afa ming unehlagba Barsabas afa ming Sailas fena. Eheningiba eba siosna misog el ahfena.

23 Ena elbi pas wahe ningihini. Ena ginof enaiḡ esog:

O nilite, Kangel kanog fwatieḡ el i afa saglag el i enag ginofba afwambanai Kristenim fatigonug, nengel Antiok, Siria, afa Silisia lanai ambangel sa eyi go.

24 Kangel enaiḡ higig minginag kangel nai el ambe nem apukegonugum kilimoan mo faigog. Ka mas ehem enaiḡ sihifegonug mo.

\* 15:13: Afa enanam Herot mas Jemsim higeḡlakana mo.

25 Asa ka mungwa mo sihiagigim afa sa minginag elim fwatigbi sa kangelni suialag nilite Pol mi Barnabas mi nengelim ningihia gonug.

26 Enag eheningiba ilawana maia Sisas Krai Ainiyagna gafugag hofefnaba minginag el oga patigi skotigi.

27 Naignegba na sa ka Judas mi Sailas mi ningitigibi sa ma ahblonam ena mo mengig na ahsihi enag ginofba mungwalofug.

28 Godna Sungwabug i kangel i mungwalofug onigig fig mas ka nem kinig skogoniafufi. Afa ka sawiyifig sa ne hwa nihe mom patalfu.

29 Sa nofene fane sanelim faigo ahaga, nofene taf ahaga, afa nofene sis wena kihlagba ahaga, afa nofene aga taitufi. Afa ne enaig esi fwainigba eba ne suialaffi. Gwenaho.

30 Afa sios el enag elim ningitiginimbi asa Antiok kembang gam pas ufuna. Afa apukenam Antiok sios elim unetiginim maia laskuhlanamba asa pas mo faigona.

31 Afa ena ginof suwiginim maia ehem kwaganamba asa sifakalini.

32 Judas i Sailas i eba Godna mo fla sihiaule el ahfena asa eheningi Kristenim fwina sihinug gafenam afa kigmognug ahfenam ena mona ahkwagana.

33-34 Afa eheningi ati numwehe enanai yi hawagna afa sa Kristen esogona og, "Sa ma Godna olug enesieg nem gohoni." Enaig esogonam asa pese heafgina kembang gam ningitigini.

35 Afa Pol i Barnabas i afa minginag el fini Antiok kembang auguafenamba asa Ainiyagna mo ogfufegonfni afa mo sihigonfni.

### *Pol i Barnabas i pwatihag ahfena*

36 Afa maia managenaba Pol Barnabasim sihina og, "Nawo pese nilitem nangwaghiag ahfiah ka mungwali kembang sa big Ainiyagna mo sihinug ahfe blog na ika ahnangwag fig suialag auguia me awai awai me."

37 Afa Barnabas oga Jon Makim ahwaniki.

38 Afa Pol mas enaig onigina mo. Ehe enaig onigina og autunam Jon Makba big ambe Pamfilia la apukenam afa ehe bigim pese lasani ikana. Afa ehe mas gafugagim auwigina mo.

39 Afa hefum flafhiag ahfenam asa ahpwatwagna. Afa Barnabas Makim sulufanahka ahka bot la ahkonam asa Saiprus gam ahkana.

40 Afa Pol Sailasim sulufanahka ona ahka afa sios esogoni og, "Ainiyagna aflafeg sa nem numwehe lambfiahkafi" asa ahkana.

<sup>41</sup> Afa eheningi Siria afa Silisia la enanai yi kaksag kembang fapugu ahfiahkafnaba sios elim kigmognug ahfiahkana.

## 16

### *Pol i Sailas i Timoti ahwanikana*

<sup>1</sup> Pol ikan Derbe yi wanpugunam afa ena kembang fwanam Litra gam ika wanpuguna. Afa enanai yi Timoti Kristen el gafena. Afa heafna afag gafa Kristen afa ehe Ju angwafig afa alagba eba Grik el.

<sup>2</sup> Afa mungwali Litra la nai i Aikoniam la nai i Kristen el enaig esogona og, “Timotiba suialag el.”

<sup>3</sup> Afa Pol ogna Timotim waniki afa mungwali Ju el enanai ati ehe anwenafini Timotina alag eba Grik el asa Pol Timotina nihim kokohianagena. Grik el mas enaig esi afa Pol enaig esenamba, eba mas Ju el Timotim haig esini.

<sup>4</sup> Afa Litra kembang fwahinim asa haig haig kembang fapuke fiahfufnamba asa sios elim sihigonugiafufna. Ena nihe Jerusalem lanai kanog fwatieg el i afa saglag el i ena mo sihini fwahinimbi og sama enam patalfui.

<sup>5</sup> Asa sios elni olug onigig wasnei asainamba afa sa mungwali osuna minginag el ambe fasaiyena.

### *Pol itila lofug nangum*

<sup>6</sup> Pol fena afa minginag apaiyena asa Frigia Galesiana bite gam afuna. Afa Godna Sungwabug ehegelim kweni og masa Esia na provins Godna mo sihife.

<sup>7</sup> Afa afu Misiana bite la apukenam asa gwesim Bitinia bite gam ogna afu afa sa Sisasna Sungwabug ehegelim kweni.

<sup>8</sup> Maia enaig esenamba asa Misia mo fwahinim afa Troas gam paiye afuna.

<sup>9</sup> Afa sinaini Pol itila lofug nangunamba el mungu provins Masedonia nai gofenamba Polim unena gofena og, “Ne Masedonia gam blonam sa kam kwagan.”

<sup>10</sup> Afa Pol enam nangunam asa ikagna kangel numwehi-agofi Masedonia gam afuiagim. Ati ka onigig enamba God kam ogfunug ehe kam ningitigi heafna suialag mo enag elim sihigonugim.

### *Lidiana mo*

<sup>11</sup> Kangel sip yi fukoalinam Troasim fwahinim asa Samotres gam gwesim afuna apukenam afa nanai liana ka fwahinim Neapolis gam afu apukena.

<sup>12</sup> Afa nanai ka ena kembang fwahinim Filipai gam afu apukena. Ena kembang Masedoniana kwania kembang afa Rom el nanai yi auguna. Kangel nanai yi mwakwalig auguna.

13 Afa Esug Auguia Osuna koka esim afu nanai yi augu Godim sihinafuhug kugim nangu. Ka kembang muhla afunam bu blugim apukenam afa angwafig laskuhla gofena asa ka augunam mo sihiagini.

14 Afa mungu angwafig gafa ena mo higinna ehena unehlagba Lidia. Ehe Taiataira nai ango, suialag nemog tafnaig lofug faig asa enanam kig kwania flag. Ehe Godna unehlag fingi fiahfna. Ainiyag ehe ehena olugim numwehenage namba asa Polna mo higinam keahlana.

15 Ehe afa heafna mungu lala nai bu la apaiyena. Enanam kangelim heafna lala gam kam unegoni. Ehe enaig esona og “Ne onigig ka nufunam Ainiyagim oniginagba asa ne kana lala ambe auguiafim.” Ehe kam fwina kukusihiagenamba asa ka afuna.

*Pol i Sailas i kalabus lala sefu hafena*

16 Nanam ka Godim sihinag kugam afuofefnamba ka gafuga angwafig angwamingim uflini. Ena angwafigbi mwaifig simbagahlana esefkufna asa ehe haig haig sumi yi puguiagegim sihiageafena. Ehe enaig gafuga fiahgefenam enanam kig kwania flafnam ena kigba nangwaghiawagig elim faifini.

17 Afa Pol kam wankafnaba ena angwafig sum blonam unetigina og, “Sona elbi eba ehengel God sisinai na gafugag el. Ehe enaig mo sihig God ena mina elim lambigim.”

18 Ehe gwenag sihi wahkig fegofnamba Pol oksinam waikefe mwaifigim sihina og, “Sis Kraisna unehlag la ka nem mo osihina ne hwa angwafig fwahanam ika.” Asa ikagna mwaifig ehem fwahanam ikana.

19 Nangwaghiawagig el nangunim maia heafgelni kig mina awaienimbi asa ehengel Pol mi Sailas mi lambtiginim ambala fwatigini og sama kembang lanai misog el nangwagi.

20 Ehengel lambtiginim misog elni nofla wanafu fwatiginim afa esogona og, “Sona elbi Ju el afa eheningi bigelni kembangim gasafahfeg.

21 Eheningi elim kukusihiagafeg enaig nihe bigel Rom el nofeka enaig esi.”

22 Afa minginag el mungwali lasnam ogna Pol mi Sailas mi patigini. Asa misog el enaig esona og polis ma lofug hugfuoitifegonim asa eheningim fifiletifi.

23 Afa eheningim fwina wena kwaskofinim asa kalabus lala lambtianhini. Afa misog el kalabus lala nangwaghiawagig elim sihina og fwina nangwaghiage afufum.

24 Afa higinam asa lambtinam yiminig mengig gam lambtighianhini. Afa sa eheningina mongugum palangna singihla fwatigini.

25 Afa sinaini mokug luputiegna Pol i Sailas i beten ahfe-nam afa mwanafi Godim ahfatiaufna asa minginag gwena lala nai el higafafena.

26 Afa gwenana ikagna kwania asag ihlafona kalabus lalam fagakuku fiahflana. Afa gwenanam mungwali mengig pigiakanam afa sen kalabus elim kikeg pigia apaiyena.

27 Afa kalabus lala nangwaghiawagig el buhianam afa nangunam maia mengig pigi gohkafnaba ehe enaig onigina og atimba apuke ahkwag minefeg. Asa ehe pina flanam oga hefum higeflaka.

28 Afa Pol unenam og, “Nofeka nimbefum amtakwale fati. Hoka mungwali auguia.”

29 Enag el ming elim unenam og ma wi gafla blui. Afa ehe mo kikini blonam Pol Sailasna nihi penam kiafigig gegifini.

30 Afa sambaganigim lambtiginam afwambagam pugu wankanam sahtigina og, “Saglag, haig sa ka eseba asa God ma kam kwefunam suiala flai.”

31 Afa sambaganigi esohona og, “Sisas Ainiyagim sa ne olug onigina eba sa ma God nem afa mungwali nimbeafna mungwa lala naim lambi.”

32 Asa eheningi Ainiyagna mo enag el mi afa heafna lala nai mi ahsihini.

33 Enanam gwena sinaini ena el kalabus lala nangwaghi-awagig el sambaganigim bu la nehugugim suhiagena afa enanam ehe fena afa heafna mungwa lala nai apaiyena afa asa bu la apaiyena.

34 Afa sa sonag el sambaganigim heafna lala wankanam fane tuhlfunam faini. Afa sa ehe fena afa heafna mungwa lala nai fena Godim oniginim asa fwina sifakalini.

35 Afa liana misog el polisim ningitiginibi asa afu sihini og, “Sona sambaganigi elim ningitigibi sa makai.”

36 Asa kalabus lala nangwaghiawagig el Polim sihina og, “Misog el ati sihig ne i Sailas i se wanai ahfwahanam ahka asa ne olug eneisieg na ahka.”

37 Afa Pol polisim sihini og, “Ka mas mangwal ahfeg mo ehe kam muni mungwali elni nof la kwaskofigim kalabus lala lambtianhig. Kainingi Rom el\* asa enamba amtakwalig afa kam esegonigim enamba meagam kumohlig. Afa ehe enaig membite kam og ma pugu ahkai eba sa ma kam ambe sihigonitem asa kam wanafuite.”

38 Afa polis ena mo misog elim oku sihini og Pol i Sailas i ba Rom el asa ehengel sineminefinim embefini.

\* 16:37: Mingnag Ju el gafa Rom el fini. Romna nihe mo Rom elim nangwaghiag lafina asa soldia gafa sama enam patalfui. Ese Rom elim ikagna kwaskofifi afa lasflam mo kwefihiagegonim sa sumi yi mo kwaskofife.

<sup>39</sup> Asa afunam suialag mo sihigoniginim afa wanapuke afunam og “Ai, sa ne hwana mo ahfwahanam asa ahka.”

<sup>40</sup> Afa sa eheningi kalabus lala ahfwahanam Lidiana lala gam ahkana. Afa ahka Kristen nilitem ahkuklunam mo wasneihiag ahfenam asa ahkana.

## 17

### *Pol i Sailas i Tesalonaika la ika hafena*

<sup>1</sup> Afa eheningi ahka Amfipolis mi afa Apolonia mi mo ahfwahanam Tesalonaika la ika ahpuguna. Enanai yi Ju ni laskuhlag lala gofena.

<sup>2</sup> Afa Pol enaig eseakafena ikafenam laskuhlag lala sefukafenam afa nanai yi sambaga mungu Esug Auguiag Osuna ehe Baibelna mo ogfunigiafna.

<sup>3</sup> Ehe enaig sihifena Godna Gisfu Fwahag el ehe kinig flagim afa sa pese buihiag. Ehe og, “Sona Sisasba ka nem osihin eba Godna Gisfu Fwahag el.”

<sup>4</sup> Minginag Ju el ena mom higinim kehlini. Ena el i afa kaksag Grik Godna unehlagim fingi fiule el i afa minginag misog angwafig i Pol Sailas nai yi wuhlana.

<sup>5</sup> Afa Ju el oksiasaina asa amtakwalig elim sulfuiafuna mungu la lasnam amtakwalig onigig faigona sa ma olug kakageagi lagnim asa mungwali kembig gwenai esini. Ehe ogna Pol mi Sailas mi lambtinim olyi lasan asa kikini afunam Jesonna lala apukenam mengig tofunim saiye yisigini.

<sup>6</sup> Afa mas ulambini mo asa Jeson mi afa mingnag Kristen nilite mi wanagim hugfu wanafuna kembigna misog el nangum asa lagini og, “Sonag elbi mungwali kembig haig haig amtakwalig gafugag eseagahfiakag blog bigelni kembig la ahpugug.

<sup>7</sup> Afa Jesonba eheningina hihe na sa ehena lala hawag. Ehengel Romna misog elni nihe mom mas fatig. Afa ehe enaig esogog ming misog el goh eba seflig unehlagba Sisas.”

<sup>8</sup> Afa misog el i mingwali el i enaig mo higinim asa ehengelni olug wasnei eskofenam hefum gifigakafna.

<sup>9</sup> Afa ehengel ogma Jeson wanag kigna baiminim asa ma enanai fwahi.

### *Pol i Sailas i Beria la ika ahpuguna*

<sup>10</sup> Afa si kifiagna Beria gam Kristen nilite Pol mi Sailas mi ningitigini. Ika ahpugunam Ju elni laskuhlag lala asaifuna.

<sup>11</sup> Beria nai elni nihe fwina suialafena eba mangwal mungwalofug mo Tesalonaika el asa esini. Enag elbi higinim sifakalini afa ehe mungwali osuna Baibelna mom

fahigifinim asa Polna mom kwefihianagini afa nufunam me awai awai me.

<sup>12</sup> Asa kaksag el Ainiyagim onigini. Ju el i afa kaksag Grik el i afa minginag Grik misog angwafig i gwenai g esini.

<sup>13</sup> Enanam Tesalonaika nai Ju el ena mo anwenafini maia Pol Beria la Godna mo sihini gofafenaba asa afu apukenam ehengelni onigigim fingi fegoni ogma Pol mi Sailas mi amtakwalihigi.

<sup>14</sup> Afa sa ikagna Kristen el Polim buum blugim ningihini. Afa Sailas i Timoti mo Beria la hawagfena.

<sup>15</sup> Afa minginag el Pol ika Atens la wanpugunam enanai yi ehem lasunim asa pese Beria gam ambena. Pol ehengelim sihini og sa ma Sailas mi Timoti mi sihigonibi sa ma ikagna Atens gam ahbloi.

### *Pol Atens la gafena*

<sup>16</sup> Afa Pol enanai yi gafenaba Sailas mi Timoti mi nenge niaufena. Afa maia ena kembang haig haig kaksag mwakwal god esiaginimbi enam fahigiagenam olug fingi fena.

<sup>17</sup> Asa ikana laskuhlag lala sefunam Ju el mi afa Grik Godna unehlag fingi fiule el mi sihinigena. Afa minginag osuna laskuhla fohug la gohnam asa enanai elim sihini.

<sup>18</sup> Minginag anwena el Epikurian nai i afa Stoik\* nai i onigigim patag afuiafena enag Pol wanflafihiagena. Minginag hefum sahawagini og, “Sona elbi ehe mimewofe. Haig mo maia osihiba?” Afa minginag enaig esogona og, “Eba ehe ming bite nai godim bigim kukusihiagofe.” Maia enaig esogonaba asa Pol Sisasna mo i afa lahag buihiag mo i faini.

<sup>19</sup> Afa Polim Areopagus laskuhla mug la wanikafunam afa enaig esogona og, “Kangel koka mulug mo higim asa ne minginag elim sihinige blog.

<sup>20</sup> Minginag mo saka higigba eba algana onigig kam fenig asa koka ena mogum numwehe anwenafi.”

<sup>21</sup> (Afa Atens el i afa mingnag kembang la nai el i gafugag mo fwahinim haig haig mulug mo fwina membini higinim afa hefum sihiagini asa ehe enaig esogona.)

<sup>22</sup> Asa Pol buihiagonam saglag elim Areopagus mog la auguiafenaba asa esona og, “Ne Atens el, ati ka nangug nengel noka kaksag haig haig godna unehlagim fingi fi.

<sup>23</sup> Ka gohminefiahba ka fahigiagegba haig haig gawigim ne lotufinig. Ka nangugba mungu godim faig sime la enaig ginof goh. Ena ginof sihi og, ‘Ena godba ka mas anwenafinig

---

\* **17:18:** Afa el Epikurianim patalfug afa mingnag elim seflig Stoik eba ehe anwena el afa ehengel anwena mo mi nufuna mo mi fwina onigiwaginim afa sihiagini.

mo eba ehena sime.’ Ena god ne mas anwenafig mo asa ne ehena unehlagim fingi fig na ka nem ambala upugunig.

<sup>24</sup> God ehe mungwali bite i gawig i eseageg ehe ofna bitenaina Ainiyag feg. Ehe mas el lala nimblagba nanai yi gofi.

<sup>25</sup> Bigel el mas big mangwalimba kwefgufui. Ehe munguhe ihlafiahgeg. Afa eba ehe mungwali elim nofkikenag faig, afa efefug faig, afa mungwali gawig faig.

<sup>26</sup> Ehe mungu elim esenagba asa mungwali el mungwali bite puguiageg. Ehe enag osuna bigelni afahumonim bigim wanaflagim fwahana afa hanai yi bite big auguiagim bigim fwahani.

<sup>27</sup> God enaig esegba og ma el asa ma ehem yisgi afunam afa atiamba ehem ufli me. Afa ehe mas bigim mungu mungu membi yi fenig mo.

<sup>28</sup> Afa ehe nofkikenai i afa wasneig i bigim faigbi asa big gohka. Eba gwenaig eseg autunam nengelni anwena el ati ginofi fwahini og, ‘Ati big gafa heafna luwalig fiahsaieg.’

<sup>29</sup> Asa big Godna luwal fig. Asa nofeka enaig onigig God eba gol, silva, fun lofug asa el heafna onigig la ningana flagim ginof fenageg.

<sup>30</sup> Autunam bigel mas numwehi anwenafini mo asa God mas bigim wasneig kwefihiageni mo. Afa ilawo ehe mungwali bite nai elim wasneig mo faig og sa ma olug waikefinim amtakwalig nihe fwahi.

<sup>31</sup> God ati ena osuna fwahag asa elim kwefihiagefe afa ati elim wefug fwahag asa numwehe fwina kwefihianugefe. Ena elbi ati lahagim pese buihiag enamba ogfug God ehe ehem wefug fwahag.”

<sup>32</sup> Afa maia Pol sihinaba el lahanam buihiag mo asa minginag el ehem titigini. Afa minginag enaig esogona og, “Ka membig koka higim asa ne pese kam gwena mo sihin.”

<sup>33</sup> Maia enaig sihifinimba asa Pol lasanam ikana.

<sup>34</sup> Afa minginag el Polim patalfunam asa Ainiyagim onigini. Afa mungu patalfuiag el eba Dionisius ehe Areopagus nai saglag el. Mingba angwafig unehlagba Damaris fena afa minginag el apaiyena.

## 18

### *Pol Korin kembang mo sihina*

<sup>1</sup> Afa Pol Atens fwahanam Korin gam ikana.

<sup>2</sup> Afa enanai yi ehe Ju el Akwilam uflana. Afa Akwilana mog kembangba Pontus ehe heafna angwag i Prisila managig



fwainig Italim ahfwahanam Korin gam ahkana. Haise-namba, eba Romna misog el Klodius sihini mungwali Ju el sa ma Rom kembig fwahinim afui.

<sup>3</sup> Akwila i Prisila i sel lala kwelwagig el gwenais Polna gafugag lofug. Asa Pol ehem ika nangwagenam mwakwalig augunam asa ena gafugafini.

<sup>4</sup> Mungwali Esug Auguia Osuna Pol Ju elni laskuhlag lala ika sefufenam sihinigeafna afa ehe ogna Ju el mi Grik el mi kukusihianige og ma Ainiyagim onigi.

<sup>5</sup> Afa maia Sailas i Timoti i Masedoniam ahfwahanam ahblonaba Pol heafna gafugag mo fwahanam afa wahkig Ainiyagna mom gafugafegofna. Ehe fwina Ju elim wasneig mo sihini og, “Sisas eba Godna Gisfu Fwahag el elim lambfe.”

<sup>6</sup> Afa Ju el mas ena mom membini mo afa ehengel Polim amtakwalig mo sihinaginiba asa Pol heafna nihinai lofug la nai nufusige buiabufehiagenam afa esona og, “Ka nem nufunam mo sihinigbi afa ne mas fatinig asa God kam mas esonai. Eba ne mungwag nimbeafena susug amtakwalig lambfi. Afa ilawamba eba ka afwambanai elim uku sihinfi.”

<sup>7</sup> Afa Pol Ju elni laskuhlag lala mo fwahanam pugunam ika Titius Jastusna lala gafena. Ena lalaba laskuhlag lala muhla gofena. Ena elbi afwambanai eba Godna unehlag fingi feule.

<sup>8</sup> Afa Krispus eba Ju elni laskuhlag lalana saglag el fena afa ehe fenam heafna mungwa lala nai apaiyena afa Korin nai el kaksag apaiyena enag Godna mo higinim afa olug waikefinim asa bu la apaiyena.

<sup>9</sup> Mungu sinaini Pol itila lofug nanguna. Afa Ainiyag ehem sihina og, “Nofeka embefe. Sa ne fwina sihiakafim. Nofeka mwalfwai gofim.

<sup>10</sup> Eba ka ne i ahgofife. Mas nem amban amtakwale fati eba ati kana kaksag el fiahsaieg ena kembig la.”

<sup>11</sup> Asa Pol enanai yi mungwa yia fena afa haf fena enaig la ganam Godna mom ogfu fenugena.

<sup>12</sup> Enanam maia Galio eba Akaia nai provins misog el fenamba enanam Ju el laskuhanam ogna Polim haig minefengagi afa sa ehem flinim misog el nangum wanigafunam asa ma misog el kwefihianage.

<sup>13</sup> Afa ehengel enaig esogona og, “Sonag elbi elim lambigim kukusihiageg Godim lotu fenigim eba bigelni nihe mo flafog.”

<sup>14</sup> Pol og nawo wahigi sihin afa Galio Ju elim esoni og, “Atiaho nengel Ju sa ne enaig esogog sona elbi ehe fwina amtakwalig eseageg enag kog kawo nengelni mo higinam asa ehem kwefihianage.

15 Afa ne fwinam unehlag mi afa nimbiafgelni nihe mo mi ne seslefofiagig. Enam kam oksig, neafa nimbefum ehe sa ne kwefihiagi.”

16 Afa sa ehe Ju elim enanai ningitigina.

17 Afa ehengel olug kakagini asa Ju elni laskuhlag lala naim saglag elim Sostenisim kehlinim kot lala muhla tigeini. Afa Galio mas enaigim onigina mo.

### *Pol Antiok gam pese ikana*

18 Afa Pol Korin la mwakwaliganam asa Kristenim mo lasanam. Afa sa Akwila mi Prisila mi wanikana bot la wanfokunam asa Siria gam afuna. Pol akofenaba Senkria la samawina eba enaig esenaba eba ogfug ehe ati Godim mo sihi fwahana.

19 Afa afu Efesus la apukenam Pol Prisila mi Akwila mi mo lasanam ehe mo ikana Ju elni laskuhla lala sefunam Ju elim mo wansihiagena.

20 Afa minginag ehem sahanagini og, “Sa ne kam mwakwalig wanai.” Afa ehe og, “Ka mas enaig ese.”

21 Afa alasan fenamba ehe enaig esona og, “Afa God sawiyi fegba eba ka pese blofe.” Afa sa ika bot la mo fukonam Efesus mo fwahanam ikana.

22 Bot la ikan Sisaria la pugunam ika Jerusalemna sios elim ika nangwagena. Ika nangwagenam asa Antiok gam ikana.

23 Pol enanai yi mwakwalig ganam afa fwahanam ika distrik Galesiana kembang mi afa Frigiana kembang mi enanai yi Kristen elim wasneihiagena.

### *Apolos Efesus la mo sihina*

24 Afa enanam Aleksandria lanai Ju el Apolos ehe blo Efesus la gafena. Ehe suialag sihifeafena afa ehe ati Godna bukim numwehe anwenafena.

25 Enaba ati numwehe Ainiyagna minam ogfufenagini nasa afigigenam ena mo sihinaba afa ena mo nufunafena. Afa ehe mas anwenafena mo Sisasna unehlag la bu la apaiyegim eba Jonna bu la apaiyegim mungu anwenafena.

26 Afa ehe ikanam Ju elni laskuhlag lala fwinam sihinaba asa Prisila i Akwila i ahiginam afa ahsulflanam heafningina lala gam ahwanikanam enanai yi numwehe minginag mo Godna minam ogfufenag ahfena.

27 Afa Apolos oga Akaia gam ika afa Efesus nai Kristen oga ehem kwefu. Asa pas ginofinim Akaia Kristenim faigona og sama ehem sulfli. Afa maia Apolos Akaia la pugunam asa Kristenim enanai yi fwina kwagana. Enag elbi God ati aflafenigbi asa ehengel Godim oniginig.

<sup>28</sup> Afa Apolos Ju saglag elim mo soagininim afa ambala fwina ehengelni mom pigalampinam asa ehe Godna bukim ambala ogfuni og, “Sisas eba God Gisfu Fwahag el elim lambigim.”

## 19

### *Pol Efesus la gafena*

<sup>1</sup> Afa maia Apolos Korin la gafenaba Pol maisim mina la wagiéblon asa Efesus la mo puguna. Enanai yi patalfuiag elim nangwagina.

<sup>2</sup> Afa ehengelim sahtigina og, “Maia ne olug oniginiba satiaho ne Godna Sungwabugba lambig?” Afa wahigi sihini og, “Awai, ka mas higini mo Godna Sungwabug gohogba.”

<sup>3</sup> Afa Pol sahtigina og, “Atiaho, eba hag bu la apaiyeg ne flig?” Afa wahigig sihini og, “Jonna bu la apaiyeg ka flig.”

<sup>4</sup> Afa Pol sihina og, “Jonba enaig esena ambangel olug waikéfigbi asa bu la apaiyeafena. Afa ehe elim og sa olug onigini el sa sum oblo eba Sisas.”

<sup>5</sup> Ena mo higinim asa Sisas Ainiyagna unehlag la bu la apaiyena.

<sup>6</sup> Asa Pol ninga ehengelim sisi fakanimba asa Godna Sungwabug ehengelim blo gohonimba asa ehengel haig haig mona fiahgini afa Godna mo fli sihiule lofug fifini.

<sup>7</sup> Enag saglagna nambaba gwesim hili 12 fena muhla fena.

<sup>8</sup> Afa sambaga mungu was yi Pol Ju elni laskuhlag lala fakafegofena mo sihiagim afa ehe soagininim afa fwina sihinigeafna mas embefena mo ehe ogfuni Godna bog meg nufunam feg.

<sup>9</sup> Afa minginag el ena mo higigim angsam minim afa ehe Ainiyagim onigigim oksini afa elni nof la Kristeneg minam molampiagini asa Pol laskuhlag lala fwahanam minginag Kristenim wankana. Afa mungwali osuna asa ikafna Tiranusna anwena lala sefufenam sihiageafena.

<sup>10</sup> Gwenaig esegohum ikan sambaga yia fena. Asa Ju el i Grik el i enanai yi Esia provins la gofena enag Ainiyagna mo higini.

### *Skevana legna mo*

<sup>11</sup> God Polna ninga la haig haig kigmog ogfuiagena.

<sup>12</sup> Afa el hankisip i lofug plefwag i lambfinim ufufenam Polna nihi yi nana tuhfinim asa lambfufenam gih elim lambwai goafenamba asa gih i sanel i fwahia afuiafena.

<sup>13</sup> Afa minginag Ju el afufeanim Ainiyag Sisas unehlag la ogna sanelim ningitigifi. Afa ehengel sanelim enaig esogoni og, “Sisasna unehlagim Pol sihiba enag ka nem sihinigbi sa ika.”

14 Afa Skeva eba Ju el ehe misog pris heafna luwalig enwesog la gohna. Enag el sanelim enaig esegonigini.

15 Afa sanel amtakwalig ehengelim sihini og, “Sisasba kati anwenafeg afa Polba kati anwenafeg afa nengelbi amban-gel?”

16 Afa ena el sanel amtakwalig ehenai yi gohoule puso kugunam fwina kwaskofiahkanaba lofug mo hugfuoiti gifen-  
imbi asa ehengelni nihi buihiamalig fiahsainam asa taf puko peminefena sa lala mo fwahinim emegfoi embem afuna.

17 Afa Efesus lanai Ju el i Grik el i maia ena mo higinim asa fwina embefeagenim sa Sisas Ainiyagna unehlam fwina fingi fini.

18 Afa kaksag el autunam sa haig haig eseagini enag Ainiyagim onigini enag ambe minginagna elni nof la heafgelni haig haig mo sihiagini.

19 Afa kaksag el agisu ule afa weni ule enaig eseagifini ena buk amtakwalig angogulinim asa elni nof la suwi la wehlini. Mungwali ena bukba suwiginimbi eba 50,000 kina enaig fena.

20 Enaig esifinimbi asa Ainiyagna mo wasneinam asa pugu mungwali kembang ikaminefena.

### *Efesus el ninimugona*

21 Afa maia enaig esinimbi asa Pol ogra Masedonia afa Akaia gam pugunam asa Jerusalem gam mo ika. Ehe og, “Ati ka osumba nangug afa ka sa Romim gafa ika nangu.” 22 Afa sa Pol Timoti mi Erastus mi Masedonia gam ningitigina. Eheningi Polim ahkweg fwafena. Afa Pol mo Esia Provins la maisi gafena.

23 Enanam Efesus el hefum fwina flafihiagini afa moanagini Ainiyagna minam.

24 Afa Demetrius Efesus la nai el heafna gafugagba silva fiageule. Afa silva flafenam higfehiagefenam weti klug lotu lala lofug gafugafeafna. Ena lotu lalaba ofenaiba Artemisna kwania lotu lala Efesus la gofena. Artemis eba Efesusna god angwafig. Demetrius fena afa minginag gafugag el apaiyena ena gafugagna kig kwania flifini.

25 Afa heafna gafugag el mi afa minginag gwenag gafugag la nai mi unetiginam ma laskuhlanamba. Ehe enaig esona og, “O nilite, ne ati ne anwenafig big kaksag kig ena gafu-gagna big flig.

26 Afa big higigim nangug Pol sa eseageg. Ehe enaig esog god el ningina gafugafegba eba mango god mo. Eba ehe Efesus la nai el mi afa Esia provins la nai el mi ehengelni onigim gasaf lambfie.

27 Afa gwenaiḡba ikafiba eba el bigna gafugagim moalampbi fi. Afa bigelni kwania god angwafig Artemisna unehlagba amtakwalefe. Afa mungwali el Esia provins nai afa mungwali bite enanai yi go ehena unehlagim sa fingi fig. Enag masa enaig onigifi Artemisba eba wasneig awai afa heafna lotu lala eba esug gofufe.”

28 Afa mungwali ena mom higinim olug kakagiagini afa wasneigni lagini og, “Bigelni Efesusna Artemis eba ehe sisi fenig.”

29 Afa managig fwainig mungwali kembang bugiagafenam. Afa Gaius i Aristarkas i Pol Masedonia nai wanblona, eheningim lambtinim laskuhla fuhug la ikagna wanfunana.

30 Pol oḡna ika el nai yi olyi pugu afa sa patalfuiag el ehem kweni.

31 Afa minginag Esia provins la nai misog el afa Polna hihe gafa, ehem mo ningihini og, “Nofeka enanai yi laskuhlag fuhug laba ika.”

32 Afa el laskuhlanam etetiagenim hefum sawagini. Afa minginag algana onigig flifinim fwina lagfina. Afa minginag gafa gwenaiḡ esiagini. Afa kaksag mas ena mog laskuhlagim anwenafini mo.

33 Afa Ju el Aleksanderim kukusi ningihini oḡma olyi gohnam asa ma mo faiyi. Asa ma ika gohnam ningana kweni afa ehe oḡna mungwali ehengelim enaig sihifeni Pol eba mas mangwal eseg mo.

34 Afa nangunim enag elbi Ju el asa sambaga aua mungwa mengna fwina lagini afa esogona og, “Bigelni Efesusna Artemis eba ehe sisi fenig.”

35 Afa kembang la nai misog el buihianam kwenim asa sihini og, “Efesus luwal sahiḡ, mungwali el bite la gohka enam ati anwenafig bigelni kembang Artemisna lotu lala mi afa heafna uflogfun mi of la nai pena enag big numwehefu.

36 Afa mas amban esoi eba mas nufunafeg mo. Eba awai. Asa ne enesieg augu. Nofeka ikagna haig esego.

37 Ne ati enag elim wanai yi wanambeg afa eheningi mas haig sahfeg mo. Afa mas bigelni god Artemisim moalamp ahfeg mo afa ehena lotu lala mas ukwef ahfeg mo.

38 Afa Demitrius feg afa mungwag gafugag el apaiyeg afa atiamba haig kinig figbi eba ati mina feg sa big fwahibi, sa ma heafa sonag el kotime goni afa kwefihiageg el ati feg.

39 Ati amba ne ming mo fegba sa ne ningenim asa ne nengigim saglag elni nof la sihiageba sa ma enam kwefihianagi.

<sup>40</sup> Afa glau osuna big kaksag el laskuhlagim mo flafihigig enag laskuhlagba mas mog feg mo. Atiamba Romna misog el bigim kotim ofenfibi eba bimbeafgelni moala.

<sup>41</sup> Afa ehe gwenai g esenim asa elim ningitiaminefena.”

## 20

### *Pol Masedonia afa Grik gam pese ikana*

<sup>1</sup> Afa enag flafihigig mo maia weti fenaba asa Pol Kristenim awamonim asa wasneihiagenam og ne yi auguiafufe. Afa sa enana mo fwahanam asa Masedonia gam ikana.

<sup>2</sup> Afa enanai yi kaksag kembang fapugu fiahkafnaba kaksag mo elim wasneihiageikan ika Grik la ika pugunam enanai i sambaga mungu was fatina.

<sup>3</sup> Afa Pol Siria gam bot la ikagim ofefnamba asa higina Ju el mo sihiag offinibi ona ehem tigi asa ehe ming onigig flanam og nasa Masedonia mina gam asa Jerusalem gam pese ika.

<sup>4</sup> Afa Sopater Pirusna leg eba Beria nai el afa Aristarkas i Sekundus i afa sambaganigi Tesalonaika nai afa Gaius Derbe nai fena afa Tikikus i Trofimus i eba Esia nai ahfena afa Timoti fena asa mungwali Pol wanikana.

<sup>5</sup> Afa ehengel gof afunam Troas la kangelim nengegon naflafiba.

<sup>6</sup> Afa buyis Bret Yist Fwainig awaiyeba asa kangel Filipaim fwahinim bot la afufe. Afa maia afa la pugufeg osuna awaiegba asa ka afu Troas la mo apukenam enag elim ulambfi. Enanai yi elegeg la gohug osuna ka fifi.

### *Pol Troas la gafena*

<sup>7</sup> Afa Sande kangel laskuhlanam Ainiyagna fane flini. Afa Pol ogna liana ika afa sa ehe Godna mo sihiagegohun ika mongkuk luputieгна puguna.

<sup>8</sup> Ena lala meg ka laskuhlanamba eba sisi yi gofna afa enanai yiba kaksag lam kagi fwatini.

<sup>9</sup> Afa luwal kwamblog heafna unehlagba Yutikus ena lala meg sigagla gafenamba noftutu fiaufena. Afa maia Pol mo mungwanam sihiagofnaba eba ati nongifini afa ehem sa noninai bite gam tigeфу pekana. Afa apaiyena kehlinimbi ati lahana.

<sup>10</sup> Afa Pol penam ehena nihiginim ningana kikenagenam afa esona og “Nofeka kusguni eba nofkena gi.”

<sup>11</sup> Afa pese sisi yi megig gam fukoli afunam afa Ainiyagna fane flinim afa fane mo ahagagini. Afa mo sihiagiaflan ikan si huguiakanaba Pol lasana ikana.

<sup>12</sup> Afa ena luwal pese buhianamba asa heafna lala gam wanigafuna, afa sa ehengelni olug suiala feskofena.

13 Pol kangelim esoni og, “Ne gof sip yi Asos gam afufe afa kaba bite mina sum blofe. Afa enanai yi sa ka nem blo ulambnam sa big sip yi mungwal afufe.” Asa ka enaig esini.

14 Afa maia ka ehem Asos la uflinim asa ehe sip yi fukonamba sa ka mungwal Mitilini gam afuna.

15 Afa ka sip yi Mitilini fwahinim afa ming osuna ka Kios la apukenam afa ming osuna ka Samos la apukenam afa ming osuna ka Miletus gam apukena.

16 Pol ona Jerusalem gam ikagna ika puguiba sama Pentikos buyis pugui. Afa ehe oniginam masa ka se fwina Esia provins la gafufe asa ka sip yi Efesusim kwegfu afuna.

*Pol Efesus saglag elim og ne eyi auguiafufe*

17 Afa Pol Miletus la gafena Efesusna sios saglag elim mo ningihiana og, “Kam ambe nangu.”

18 Afa maia ambe apukenamba afa esoni og, “Ilawana ka Esia provins la pugunam nem nangwagnam afa blo ilawofeg enamba ati ne anwenafig asa ka haig haig eseagena.

19 Afa Ju el oagna kam haig haig minafenaginim asa tigifati asa enam ka kinig flag. Afa ka kefum ahnai skaufegim asa ka nobna Ainiyagna gafugafeg.

20 Ne ati anwenafig ena mo sa nem kwaganig eba ka mas kehlagufi. Asa ka nem laskuhag fohug la i afa nengelni mungu mungu lala i sihinigafena.

21 Ju el mi afa Grik el mi ka gwenag esonig sa olug waikifinim Godim onigini asa Sisas Ainiyagim olug onigina fufum.

22 Afa ilawo Sungwabug kam kukusenagba ka Jerusalem gam ako afa ka mas anwenafeg mo enanai yi mangwal kam fefe.

23 Afa kati anwenafeg mungwali kembig ka ikafba Godna Sungwabug kam sihina el kam ona kalabus yi fatinim afa haig haig kinig kam pugunafe.

24 Afa ka mas onigig kikefumba afa kaba mungu onigig feg Ainiyag Sisas gafugag kam faig ka sa gafugag ukwian auwigi enaba Godna aflafeg suialag mo ka sihiageg.

25 “Afa ka mungwali kembig wagiakafna Godna bog meg mo nem sihinifini. Ilawo ka nem lasanigba afa ka anwenafeg ne mas kam pese nangui.

26-27 Ka mungwali Godna sawieg mo faig mas ka mungu kumwahlag mo. Asa ka nem nufunam osihin amban mungu awaiegba eba mango kana moala mo.

28 Afa Godna Sungwabug nem siosna misog el kanog fwatig asa nimbefum mi afa mungwali sios el mi numwehifim asa el sipsipim nangwaghiagfafefe asa enaig fi. Enamba ati Ainiyag heafna tafna enag elim mungwali lambig.

<sup>29</sup> Ati ka anwenafeg maia ka nem lasanig ikaiba minginag el ogna ambe nem amtakwalhiagi. Enaig sangwali malang lofug ambe sipsipim kwaskofife.

<sup>30</sup> Afa minginag nengel nai apukenam waikafenam nem mwakwal mo sihigonigba asa ehengel membeg ne ehengelim patagafufe.

<sup>31</sup> Asa enam numwehifibi afa nofeka eteti sambaga mungu ya osuna sinaini wahkig ka nem nobna waihe sihinifini.

<sup>32</sup> “Afa glau ka nem Godna ninga la alasan afa heafna aflafeg mo sama nem kwagani asa nengel suialaflifig afa enaigba God heafna elim enaig esenig.

<sup>33</sup> Ka mas ambana silvam, golim afa lofugum membena mo, eba awai.

<sup>34</sup> Ati ne anwenafig ka mas nem esoni ka kike kiafena ningana gafugafegim kefum feg afa kikeafena mungwa gafuganaim kweafug.

<sup>35</sup> Enaig ka mungwali eseagegba eba ka nem ogfunug sa big minginag auwiauwig elim kwaganim. Afa ka Sisas Ainiyagna mo onigig ehe enaig esog ‘Afa enanam ne flagba eba suialafeg afa enanam ne faigba eba fwina suialag nemog feg.’”

<sup>36</sup> Afa maia Pol mo sihi fwahanam asa ehe ehengel nenam mongkokini kwakwagenim sa betenini.

<sup>37</sup> Afa ehengel mungwali wewatonam afa ehem ningana kikenagim asa esogona niasabam eyi ne ikafife.

<sup>38</sup> Afa ehena mom oniginim asa ehe esona ehengel ehem mas pese nangui afa sa ehengelni olug fwina kinia skofena. Afa sa sip gim wanigafuna.

## 21

### *Pol Jersalem gam ikana*

<sup>1</sup> Afa kangel ehengelim lasanam afa misosuf bot la afuna Kos ailan la apukena. Afa ming osuna ka Rodes la afu apukenam asa Patara kembang la apukena.

<sup>2</sup> Enanai yi ka nanguni sip Fonisia gam ona ika. Afa ka fukolinim asa ka afuna.

<sup>3</sup> Afa ka sip yi afuian ailan Saiprus nangunim afa kwefunim Siria provins gam afuna. Afa Tair kembang la ka apukenam asa enanai yi sipna gawig suguni.

<sup>4</sup> Afa kangel minginag Kristenim ulambinim asa enag el ka mungwali auguna enaig mungwa wik. Afa Godna Sungwabug enag elim onigig faini asa Polim sihini og, “Nofeka Jerusalem gam ika.”

<sup>5</sup> Afa maia sip ena kembang ona fwaha ikaiba asa enag el heafgelni angwafig luwal kembangim fwahinim bu blugim



wanafuna. Enanai yi ka mungwali mongkokini kwakwaginim beten fafife.

<sup>6</sup> Afa kangel esogona “Niasabam eyi auguiafufe.” Afa sa kike mo sip yi fukolinim afa ehengel pese lala gam afuna.

<sup>7</sup> Afa kangel Tairim fwahinim afuian Tolemes apukena. Afa enanam Kristenim ulambinim afa mungwa osuna ka auguna.

<sup>8</sup> Afa liana ka lasanim afunam Sisaria apukena. Enanai yi ka Filipna lala auguiafena. Ehe Godna suialag mo sihiaule. Autunam aposel elegeg el kanog fwatini asa ehengelim kwagani afa Filip ehengel nai.

<sup>9</sup> Heafna sambaga sambaga angwaming angwafig luwal eba Godna mo fli sihiaule el.

<sup>10</sup> Afa kangel mwakwalig augunam afa Agabus eba Godna mo fli sihiaule el ehe Judia nai fwaha blona.

<sup>11</sup> Ehe blonam Polna afiai hugufla hefum mong mi ninga mi enana kikenaginam afa esona og, “Godna Sungwabug enaig sihifeg ‘Jerusalem la nai Ju el ambanim heafna afaini kikenagifi asa gwenaig esefi, afa ehem angoluwagna ninga la fakifi.’”

<sup>12</sup> Afa higinim kangel afa mungwali Polim wasneig mo sihini og, “Nofeka Jerusalem gam ika.”

<sup>13</sup> Afa Pol wahigi sihina og, “Mango fegba afa ne wewatig asa kana olugum kinig feg. Enanam ka Jerusalem la Sisas Ainiyagna gafugafefe afa enanai yi kam kalabus yi fati afa kam tigifati eba kati numwehego. Eba mangwal ka fiah mo.”

<sup>14</sup> Afa ehena onigig wasneigna eba mas onigig waikefena mo. Asa kangel fwahana esoni og, “Sama Ainiyagna sawieg esifi.”

<sup>15</sup> Afa enaig esenim asa kangel numwehiaginim Jerusalem gam afuna.

<sup>16</sup> Afa minginag Sisaria nai patalfuiag el wanafunam, afa Nasonna lala wanambena asa kangel enanai yi auguiafena. Nason eba Saiprus nai el ehe ilawana patalfuiag el fena.

### *Pol Jems nangum ikana*

<sup>17</sup> Afa maia Jerusalem la apukenamba Kristen el kangelim nangwaginim afa sifakalini.

<sup>18</sup> Afa ming osuna Pol afa kangel Jemsim nangugum afuna. Afa enanai yi siosna saglag el laskuhlana.

<sup>19</sup> Afa Pol esonim asa ehengelim sihinigena mungwali suialag gafugag God afwambanai elim esenugeg.

<sup>20</sup> Afa higinim Godna unehlag fingi fini. Afa Polim esuni og, “Nilite, numwehe enag anwenafenam afa kaksag Ju el wasneig Mosesna nihe mom onigig eba Sisasim olug onigig.

21 Afa minginag enaig esogog ne ati sihig Ju elbi afwambanai elim mungwal auguia sa Mosesna nihe mo mas fatig afa ne ehengelim sihinig nofeka nimbiafgelni fangona luwalna lofug weti koflifatini asa bigelni nihem mas patalfug mo.

22 Asa mango big esifi? Afa ehengel higifi ne ati blog.

23 Afa kangel membig sa ne enaig ese.\* Afa enag sambaga sambaga el Godim ati sihi fwahini.

24 Afa kangel membig sa ne sonag elim Godna Kwania lala gam wanafunam afa Juna nihe mom patalfug asa nengel afsug augufi. Afa nimbe enag gafugagim kig faife asa ma enag el heafgelni lapo wigoni. Afa ne enaig esibi mungwali anwenafifi amtakwalig mo nem esinig eba mwakwaleg. Afa nembe nufunam bigelni nihem wahkig patalfu.

25 Afa kangel afwambanai Kristen elim kikeafgelni onigig ginofinim ati ningihigoni. Ka ehengelim enaig esogoni og, 'Sa nofene fane sanelim faigog ahaga, nofene taf ahaga, afa nofene sis wena kihlagba ahaga, afa nofene aga taitufi.' "

26 Afa ming osuna Pol enag sambaga sambaga elim lambtiginam asa enaig nihem patalfuiba sa ma afsug augui. Afa ehe Godna Kwania lala gam ikanam prisim mo sihina ansi ehengel enag nihem auwigig. Afa ansi ambenam ehengel mungu mungu Godim sis tuhlu faife.

### *Polim Godna kwania lala la kehlini*

27 Afa enag elegeg gohug osuna meyim fenaba afa minginag Esia nai Ju el Polim Godna Kwania lala la nanguni. Afa kaksag elim olug fuko lasanim afa Polim ningina kehlini.

28 Ehengel unegoni og, "Israelna luwal kam kwagani. Sonag elbi mungwali kembang elim sihini fiahkag afa enaig esog Israel nai el i, Mosesna nihe mo i, afa hwa Godna Kwania lala eba esug. Afa afwambanai el ese Godna kwania lala gam sefu kafe afa ilawo Pol afwambanai elim Godna kwania lala sefu wanblogum asa enag afsug lalam Godna nof la amtakwale skofig."

29 (Afa minginag el Trofimus mi Pol mi nangwaginimbi kembang la ahkafena. Trofimusba Efesus lanai el. Afa enaig onigini Polba enag afwambanai elim Godna Kwania lala sefug wanikig asa ehengel enaig esogona.)

30 Afa kembang lanai el etetinim asa kikini fambefe-nam Polim kehlanim Godna Kwania lala menai hugufli afwambagam ufunam asa ikagna mengig mo kikisini.

---

\* **21:23:** Kristen saglag el membig Pol enag sambaga sambaga elim Godna kwania lala gam wanblo seaifunam afa kig faig sa ma ehengel Ju elni nihem suialag patalfufe. Enaba ogfug Pol mas Ju elni nihem filafeg mo.

<sup>31</sup> Afa Ju el oagna Polim tigi afa Rom lanai soldiana misog el enaig higina og Jerusalem el hefum fagahag.

<sup>32</sup> Asa ehe heafna soldiam ikagna wanika wan opugu fenamba asa Ju el ehem nangwagnim asa Polim fwahini.

<sup>33</sup> Afa enag misog el ika Pol nai yi muhla pugunam og kehlinim sambaga sen na kikenawaginim afa sa sahini og, “Eba amban afa mango mai fegba?”

<sup>34</sup> Afa minginag el mungu onigig flinim fwina lagini afa minginag mo algana onigig fini asa misog el mas ehengelni mom numwehe anwena fenugena mo. Asa misog el soldiam sihinimbi afa sa ehem soldiana auguiag lala gam wanig afuna.

<sup>35-36</sup> Afa enag kaksag el patag afuiafenamba fwina esogona og, “Sona mo tigi faki.” Afa soldia wanig afu ging muhla wanig apukofe fenamba afa mungwali el oagna tigi fati asa soldia Polim ningana foakli ufuna.

### *Pol mungwag wahigi sihini*

<sup>37</sup> Afa soldia oagna Polim lala megam sefu wanig afufe fenamba Pol misog elim sahana og, “Kogna weti mo sihiagafe.” Asa misog el sahana og, “Ei, namba Grikna mo anwenafe ule ho?”

<sup>38</sup> Afa kawu kog namba Isip yi nai el autunam enag el gavman i бага gafenam 4,000 fagiule elim lambinam bite behig gam embem wanafuna. Eba mango namba enag el mo.”

<sup>39</sup> Afa Pol wahigi sihina og, “Amo, kaba Ju el. Afa kikiafena kembigba Tarsus Silisia nai na provins. Kana kembig kwania unehlag feg asa kam sawiyi fenaiba ka sa mungwali elim mo sihinige.”

<sup>40</sup> Afa maia misog el sawiyi fenamba asa Pol ging yi gohonam ninga na kwenim. Afa maia el sifinamba asa ehegelim Hibru mo na sihini.

## 22

<sup>1</sup> Afa Pol sihini og, “Saglag i nilite i sahig kana mom.”

<sup>2</sup> Afa ehe maia Hibru mo na sihinaba ena mom higinim asa ehengel fwina mwalfwai sifina. Afa Pol maisim sihiagofena.

<sup>3</sup> “Kaba Ju el. Kikeafena kembigba Tarsus Silisia nai na provins. Afa ka blog hwa nai yi muhnafe. Afa Gamaliel kam numwehe bigelni simbianga na nihe mom ogfunagena. Afa Ka Godim fwina membenagim asa ka wasneig gafugafeg ehem patalkuiagim asa ne glau gwenai g esi.

<sup>4</sup> Afa ambangel Kristen na mina afuiagim ka ehengelim haig haig esehiagena. Ka saglag mi angwafig mi lambifenam kalabus yi aitiafnaba asa mingnag pigihiana.

<sup>5</sup> Afa misog pris i mungwali kaunsil i ati anwenafini kana moba nufunafeg. Autunam ehengel kam pas la wasneig mo ginof fainibi asa ka Damaskus nai Ju saglag elim fai, asa koka Damaskus gam ikanam Kristen elim sen na Jerusalem gam kike lamblufe asa ma amtakwalig hiagi.”

*Pol Ainiyag na minagam puguia na mo sihina*

<sup>6</sup> “Afa ka ikan osu misosuf giginu Damaskus la opugufenamba asa ikana heven lanai ombusug kwania kam wagigo fakana.

<sup>7</sup> Asa ka bite la pe gifinimbi afa ka elni mengigim higina kam sihina og, ‘Sol, Sol! Haisenaba sa ne kam amtakwali aflana?’

<sup>8</sup> Ka sahana kog, ‘Ainiyag, ne amban?’ Afa ehe esona og, ‘Kaba Sisnas Nasaret lanai asa ne kam amtakwali aflana.’

<sup>9</sup> Afa el sa ka afuna ati ehe ombusugbi nanguni afa mas ehena mengigim higini mo asa kam sihina gofena.

<sup>10</sup> Afa ka sahana kog, ‘Ainiyag, mango ka fefe?’ Afa Ainiyag esona og, ‘Buihianam ika Damaskus gam sefuka. Afa enanai yi sa nem el sihinafe enag mungwali gafugag God nem fwahanag asa ne esefe.’

<sup>11</sup> Afa enag ombusug kwania nofugum kam tonbusinaba asa kikeafna hihe ambenam kam ninga na kehlinim Damaskus gam wani saiye afuna.

<sup>12</sup> “Afa enanai yi Ananias gafena. Afa enag el Godna nihe mom suialag patalkufe ule afa enanai mungwali Ju el ehem fwina suialafe flini.

<sup>13</sup> Ehe kam nangunam asa ehe blo ka nai yi muhla pugu gofenaba afa sihina og, ‘Kana nilite Sol, sa bahia ninofe.’ Asa ka ikagna ehem nanguna.

<sup>14</sup> Afa Ananias kam sihina og, ‘Bigelni simbianigana God nem fwahanag asa ehena sawiegim anwenafenam afa Sisnas Godna suialag elim nangunam asa heafna mengigim higina.

<sup>15</sup> Afa eba ne ikanam elim Godna haig haig sihinigefe afa sa ne mangwal nanguna afa higina enam ne sihinife.

<sup>16</sup> Asa nofeka awauifi. Buihianam bu la penam Ainiyagim unenaiba asa ma neana nufwehimo gigiafenai.’ ”

*God Polim ningihiana afwambanai el gim*

<sup>17</sup> “Afa ka Jerusalem gam pese blonam afa maia ka Godna kwania lala sefu beten fiaufenaba asa la itila lofug nanguna.

<sup>18</sup> Afa ka nangug Ainiyagim afa ehe kam esona og, ‘Afa kana mo faigbi asa el ena mo mas flig mo eba sa ne ikagna Jerusalem fwahanam ika.’

<sup>19</sup> Afa ka sihina kog, ‘Ainiyag, mungwali anwenafig ambangel sa nem olug oniginig asa ka enag elim mungu mungu

laskuhlag lala nai lambikafena asa kwaskofefena kalabus lala laitiafena.

<sup>20</sup> Afa maia el neana gafugag elim Stivenim tigifatinimbi ka gafa enam sawifena afa ka ehengelni lofug nangwagofena.’

<sup>21</sup> Afa Ainiyag kam enaig sihifena og, ‘Amo se ika, ka nem membi yi afwambanai gam ningihiafe.’ ”

### *Pol eba Rom el*

<sup>22</sup> Afa mungwali el sumi yi mo higinim afa olug kakageagini ming mo higigim oksini. Ehengel fwina laginim esogona og, “Sonag elimbi sa gwesim tigifati. Ese gofufe.”

<sup>23</sup> Afa ehengel laginim afa lofug fuluwal flagifini afa smof ehuwagifinim sisi gam taitufifini.\*

<sup>24</sup> Afa soldiana misog el heafna elim esoni og, “Polim nimbiafgelni lala gam wanig afu. Afa wena fifleflinim asa mog gim sahanagi haisegba Ju el nem fenagig.”

<sup>25</sup> Afa Polna ningam kikenaginim asa ogna fifleflinagi afa Pol soldiam esona og, “Romna nihe mo enaig eseg nofeka Rom elim ahmona tigeke maia mo sihiba. Kaba Rom el.”

<sup>26</sup> Afa enag soldia higinam afa ikanam heafna misog elim nangunam asa sahana og, “Haig ne ehem esenag? Sonag elbi eba Rom el.”

<sup>27</sup> Afa misog el blonam Polim sahanagena og, “Sa kam sihina nemba Rom el ho?” Afa Pol esona og, “Ei kaba enaig el.”

<sup>28</sup> Afa misog el sihina og, “Ati ka kaksag kig Rom gavmanim faig afa sa ka Rom el gohug.” Afa Pol wahigi sihina og, “Afa kana afahumonigbi eba Rom el asa ka gafa ehengel nai.”

<sup>29</sup> Afa soldia ogna ehem tiginim sahanagi afa ena mom higinim asa ikagna fwahi apuke afuna. Afa misog el onigina ehe sa Rom elim sen na kikenuwagiafena asa enam embefena.

### *Pol kaunsil nai yi kotena*

<sup>30</sup> Afa misog el ogna numwehe anwenafe haisegba Ju el Polim fenagig. Asa ming osuna soldia Polim sen mo pitigifihianagibi afa sa misog el kaunsilim saglag pris mi mo sihinibi asa ma ambegohi. Asa Polim wani ambenam ehengel nai yi olyi lasuni.

## 23

<sup>1</sup> Afa Pol kaunselim nofna nangwaghiagenam esona og, “Kana nilite, haig haig sa ka eseagegba Godna nof la asa olug konigig ka mas haig eseg mo ika ilawofeg.”

<sup>2</sup> Afa el Pol nai yi muhla afofenaba misog pris Ananias ehengelim esoni Polna memtogim tigi.

\* **22:23:** Enaba esinibi eba ogfug ehengel ena mom higigim ninimu gona.

<sup>3</sup> Pol Ananiasim sihini og, “God sa ma nem tige. Ne enaig lala lofug afwambaga mo el busug pen na susulenagibi afa nangugbi suialag go afa meagam mo amtakwaliageg. Ne kam nihe mona fwina fahigiaflag afa nembef mo ena nihe mo filafeg asa ne elim esonigbi sa kam tiging.”

<sup>4</sup> Afa el Pol nai yi muhla afohiafenamba ehem sihini og, “Ne Godna misog prisim amtakwalig mo sihinag.”

<sup>5</sup> Pol wahigi sihina og, “Hesio! Nilite, ka mas anwenafeg mo eba ehe misog pris, eba Baibel ati enaig sihifeg ‘Nofeka nimbeafgelni elni misog elim amtakwalig mo sihina.’ ”

<sup>6</sup> Afa Pol nangunam anwenafeni sambaganigi enaig elim afofenamba Sadyusi el i afa Farisi el i asa ehe kaunsilim fwina lagna og, “Nilite, ka gafa ka i afa kana alag i eba Farisi el ka enaig onigig kehlagu el sa lahagim asa pese buihiag. Na sa ka nengelni nof la gohba afa ne kam fahigianagig.”

<sup>7</sup> Afa maia enaig sihifenaba asa Farisi el i afa Sadyusi el i pwatihiaginim hefum moanagini.

<sup>8</sup> Afa Sadyusi el onigigni lahag el mas pese buihiai afa of lanai el i sungwabug i eba awai. Afa Farisi el enam onigini eba nufunam feg.

<sup>9</sup> Afa moanagig pugu kwania fena afa minginag Farisi el eba nihe mo ogfuiag el gohnam fwina wasneig mona sihini og, “Kagel nangugbi sonag el mangwal feg fwainig. Afa enamba nufunam me asa of lanai el afa sungwabug ehem sihi afa sa ma patalkwi.”

<sup>10</sup> Afa haig haig mo pugu kwania feag ofefenamba ogna hefum hag afa soldiana misog el oniginam embefena og masa Polim kufi kufi fenagifibi eba masa lahafe. Asa heafna soldiam esoni og sa afunam olyi nai skuflinim soldiana auguia lala gam wanigafu.

<sup>11</sup> Afa sinaini Ainiyag muhla gofenaba asa Polim esona og, “Sa ne fwina wasnei. Sati ne kana mo Jerusalem la sihig asa ne gwenai Rom la ese.”

### *Ju el mina yisigiagini Polim tigingim*

<sup>12-13</sup> Afa liana 40 Ju el laskuhlana ogna mina yisigiagini Polim tigifatigim. Afa ehe wasneig mo sihini og, mas fane i bu i ba ahagai nawo Polim tigifatinim asa big enamba ahaga.

<sup>14</sup> Afa enaig sihifinim asa saglag el mi afa saglag pris mi sihigonigim afunam og, “Kangel ati ka wasneig sihi fwahig ka mas fane i bu i ba ahagai kawo Polim tigifatinim.

<sup>15</sup> Afa ka enaig membig nengeli kaunsil i sa ne soldiana misog elim sahini, ‘Sama kam Polim ningihiani.’ Sa ne enaig mwakwalinim og, ‘Kagel koka ehena mom numwehe pese higim.’ Asa ka mina la anwasa fiafufum maia oblofiba ka sa ehem tigifati.”

<sup>16</sup> Afa Polna lambig ena mo higinam asa soldia na lala gam ikanam Polim sihina.

<sup>17</sup> Afa Pol soldiam unenam ma blonaba asa sihina og, “Hwa kwablogim sa nimbiafna misog el nangum wanikiba sama misog elim mo fai.”

<sup>18</sup> Asa misog elim nangum wanikinam asa sihina og, “Pol kalabus yi nai el kam unenagba asa ka blogba Pol kam sihinagba asa ka hwa kwablogim neanangum wani blu ona nem mo sihina.”

<sup>19</sup> Asa misog el luwalna ningam kehlanam asa sefu wanikinam afa sa sahana og, “Ne mango mo nog kam sihina?”

<sup>20</sup> Afa Polna lambig wahigi sihina og, “Ju el mungwa mo sihiagigim oyna nem sahini sa ne sini Polim ningihia afa kaunsil mwakwale oyna ehena mom numwehe pese higim.

<sup>21</sup> Nofeka enaig ese eba 40 Ju el wasneig mo sihifig oyna fane i bu i foiyiagi oyna Polim tigifatinim asa pese ahaga. Enag elbi ati mina la meagam anwasa fiafubi asa ne ehengelni mom sawiye fenife.”

<sup>22</sup> Afa misog el enaig sihifena og, “Nofeka ambala sihi ena mo sa ne kam sihinag.” Asa ehem ningihina.

### *Polim Feliks nangum ningihini*

<sup>23</sup> Afa misog el sambaganigi gosig soldiam uneni asa sihina og, “Ahkanam 200 soldia afa 70 el hos la nai afa minginag 200 soldia fagiule el sa lambinam numwehiage fwati. Sa ne sinaini omugni Sisaria gam ahwanka.

<sup>24</sup> Afa Polim gafa ati hos numwehe fwahini. Asa numwehe anwasafefiba asa ne provinsna misog el Feliks nangum wanig afu.”

<sup>25</sup> Afa soldiana misog el pas la enaig ginofena.

<sup>26</sup> Dia Feliks suialag gavmanna misog el. Kaba Klodius Lisias ka nem enag ginofba ningihianag.

<sup>27</sup> Afa Ju el sonag elim kehlinim oyna ehem tigifati. Afa ka ehem anwenafenagim eba Rom el asa ka kikeafna soldiam wankagim ehem kweafug.

<sup>28</sup> Koka anwenafena mango maia fegba asa ehem kufinig asa ka ehem Ju elni kaunsil nangum wanikig.

<sup>29</sup> Ka ehengelni mo higinigbi afa ehengel hefum mo kilimoanagig afa ehe enaig esogog sonag elbi Ju elni nihe mo flafog. Afa ehe mas mangwal feg mo asa gavman ehem muni kalabusinigim afa tigifati.

<sup>30</sup> Afa el kam sihinag mingnag el mina yisigiagofibi oyna ehem tigifatigim na sa ka enag elim neanangum ikagna ningihagim afa ka ehem kufig elim sihinibi asa ma afunam nem heafgelni mo sihini. Gwenaho.

<sup>31</sup> Afa sa soldia gwenaiḡ esini Polim sulufflinim sinaini Antipatris kembig gam wanig afuna.

<sup>32</sup> Afa ming osuna soldia hos la auguia mo gwesim Polim Sisaria gam wanig afunamba afa minginag mo heafgelni lala gam Jerusalem gam pese afuna.

<sup>33</sup> Afa afu Sisaria la apukenam gavmanna misog elim pas fainim afa Polim ehena ninga la fwahini.

<sup>34</sup> Afa sa misog el pas la enag ginofim suwignam asa Polim sahana og, “Nemba hanai provins?” Afa Pol sihina og, “Kaba Silisia nai.”

<sup>35</sup> Afa misog el sihina og, “Afa maia nem kufig el ambe apukeba ka sa neana mo higim.” Afa ehe sihini og, “Polim wanig afunam kwania lala autunam Herot nimblana nanai yi fatinim mengig la mo anwasa fiafufum.”

## 24

### *Ju el Polim sehini*

<sup>1</sup> Afa maia afa la gohug osuna awaienamba, misog pris Ananias, afa mingnag saglag el apaiyena afa Tertulus ehe kot la gohug goseg el enag fena asa Sisaria gam afunam oḡna gavman misog elim Feliksim nangunim asa Polim sehi.

<sup>2</sup> Afa maia Pol sonag elim wangofenamba asa Tertulus Feliksim sihinam asa Polim seahiana. Ehe enaiḡ sihifena og, “O saglag, ne suialag el nemog, neana anwenag ihlafeg asa ne kam suialag numwehiagegba kangelni kembig suialag goheg. Ne suialag onigwagegim kangel Ju elni auguiagim ublu upugug asa ka enam sifakalig.

<sup>3</sup> Afa mungwali el neana gafugagim ati anwenafig eba suialafeg na sa ka neana unehlagim fingi fig.

<sup>4</sup> Afa masa ka nem nengigim esenagofufe afa kog ne sa kana weti mo higim.

<sup>5</sup> Kangel anwenafig sona el eba tutiotig el. Afa mungwali kembig ehe elni onigigim fwaklasan niakaba asa Ju el hefum faghagka. Ehe misog el fenigim asa kukusihiageg sona minaba eba seflig sona elbi eba Nasaret la nai elim patalfug.

<sup>6-7</sup> Afa mingba ehe oḡna Godna kwania lalam amtakwale fati na sa ka ehem kehlig.

<sup>8</sup> Asa neafa nembe ehem sahanage sa ne anwenafena ena mungwali mo sa ka ehem kufinig eba nufunafeg.”

<sup>9</sup> Afa Ju saglag el gafa Tertulusim kwefunim esogona sona moba nufunam ehe.

### *Pol heafna mo mungwag Feliksim faina*

<sup>10</sup> Afa gavmanna misog el Polim ninga fatinafna og sa ma Pol heafna mo mungwag sihi. Asa Pol esona og, “Ati ka



anwenafeg wahkig na enanai Ju elim kwefihiagego eba ka sifakaleg afa ka mungwag nem mo faigim.

<sup>11</sup> Afa ne sahinibi eba sa ne anwenafe, mango autuna mo eba 12 pela osuna maia awaienamba asa ka Jerusalem la ika pugunam koka Godna unehlag fingi fena.

<sup>12</sup> Afa Godna kwania lala la ka mas elim wan moanageg mo sa sona el kam sehig mas enaigim nanguni mo. Afa laskuhlag lala afa hanai yi ka mas elni ninimu onigigim fwakig lasanig mo.

<sup>13</sup> Eba ehe mina yisigigim kam og eba nufunam eseaka enag kam sehig, amo ena moba eba mango nufuna mo.

<sup>14</sup> Ilawo ka nem nufunam mo osihin. Ka kikeafgelni simbiangana Godna unehlagim fingi feg. Afa ka Kristen mina patalkuia. Hwa minaba el sihi eba alganam. Asa mungwali nihe mo i afa mungwali Godna mo fli sihiafule elni mo i nasa ka ena mina patalkuia.

<sup>15</sup> Kana onigig gwenaig ehengel nai yi mungwalofug, autunai la suialag el mi afa amtakwalig el mi asa pigieg sama God ehengelim ihlafolaiti asa kagel enam nengeafo.

<sup>16</sup> Enaig esegba nasa ka God afa elni nof la wasneiaka.

<sup>17</sup> “Ati ka ming kembang minginag yia la gag, enag ka Jerusalem gam pese blog. Afa ka kig lamblunam koka kikeafena elim lambwaiyim amban sa gawig awaienig. Afa ka membeg koka ikanam Godna kwania lala la Godim sis fai.

<sup>18</sup> Ati ka Ju elni nihe patalkug asa ka Godna nof la afsug gohug. Afa ka ika Godna kwania lala seaifogofiba sama enanai yi el kam nangui. Ka mas kaksag el wanblog mo afa mas ka mangwal feg mo.

<sup>19</sup> Afa Ju el minginag Esia provins lanai enanai yi gofena. Atiaba ehengel mo figbi sama ambe neana nof la sama kam sehi.

<sup>20</sup> Afa awaiba fegba, sona el sa afohie sama nem sihini, enanam sa ka kaunsilna nof la go atiaba ka mangwal fegba.

<sup>21</sup> Ka mas haig eseg mo eba nufunam ka enaig mungu mo esog, ‘Ka enaig onigig melig pigieg el pese buguiagafefe nasa ne kam fahigenagig.’ Ka onigig ena mo kaunsilim olug kakag feskofeg.”

<sup>22</sup> Afa Feliks Kristenna mina ati anwenafena afa ehe esoni og, “Maia soldiana misog el Lisias bloiba ka sa ena mo kwefihiage. Se afu.”

<sup>23</sup> Afa ehe soldia sihini Polim kalabus yi fatibi afa nofeka ningana kehli sama heafna hihe numwehe fefugufi.

<sup>24</sup> Afa ming nana Feliks i heafna angwag i ahkana lala meg gam ahpugunam Polim ahunenaba asa Pol blona afa eheningi Polna mo ahigina Pol sa Kraissimas onigina. Feliks na angwagba Drusila eba Ju angwafig.

<sup>25</sup> Afa maia Pol suialag nihe mo mi afa el hefum numwehef gug mo mi afa God elim kwefihiageg mo mi sihiagenaba. Afa Feliks enag mom higinam embefena asa Polim esona og “Magwese, ka ma fian nem awamonaiba sa ne pese blo kam sihina.”

<sup>26</sup> Afa ehe enaig onigina og Pol ehe kam kig laskosim sihi-nago asa soldiam sihinibi sa ehengel Polim wanig ambena asa ehe Pol i wahkig sihiag ahfegofena.

<sup>27</sup> Feliks Polim kalabus yi gwesim fwahana sama Ju el enaigim sifakali. Afa sambaga yia enaig fenaba asa Porsius Festus Feliksna kukum flana.

## 25

### *Festus Polim kwefihiagena*

<sup>1</sup> Festus provins la ika pugunam ehe nanai yi sambaga mungu osuna Sisaria mo fwahanam asa Jerusalem gam ikana.

<sup>2</sup> Ehe ika enanai yi pugunamba saglag pris i afa Ju saglag el i ambe ehem uflinim ona Polim sehinim asa ehe fwina sahini og,

<sup>3</sup> “Kam kwaganam asa Polim Jerusalem gam ningihia.” Festus ehengeln onigigim mas anwenafeni mo eba ehengel oga Polim mina la meagam tigifati.

<sup>4</sup> Festus sihini og, “Pol eyi Sisaria la kalabus yi ga mas ka managei eba ka pese ikafe.

<sup>5</sup> Afa sa minginag goseg elim ningitigibi ka sa wanka sama afu Polim pese sehibi ka sa kwefihianage atiaba haisegba.”

<sup>6</sup> Festus 10 pela osuna enaigna Jerusalem wanganam asa Sisaria gam pe wankanam afa sa ming osuna sihinibi sama Polim wangi ambei oga sa Polna mo kwefihianagi.

<sup>7</sup> Afa maia Pol blo pugunaba asa Ju saglag el Jerusalem la nai ambenam Polim wakifakanam haig haig mo sehini. Afa ehengeln mo mas mog fena mo.

<sup>8</sup> Pol enaig sihifena og, “Ka mas haiseg mo. Afa Ju elni nihe mo mi afa Godna kwana lala mi afa Sisar Romna misog elni mo mi ka mas flafog mo.”

<sup>9</sup> Festus membena ogma Ju el sifakali asa ehe Polim sahana og, “Aseg sa ne Jerusalem gam pese ikai ka sa nem enanai yi sehianagim kwefihianage?”

<sup>10</sup> Afa Pol wahigi sihina og, “Nembe ati anwenafeg ka mas Ju elim mango fenig mo. Hwa Romna kot ati ihlafeg mangofi nofene kam Jerusalem gamba ningihi masa kam Ju el kwefihianagifi.

<sup>11</sup> Afa atiaba haig ka esegba eba sekam tigi ka mas haig esoi. Afa ehengeln mo mwakwalegba eba mas amban kam

ehengelni ninga la fwahai. Ka membeg Romna kwania misog el Sisar ma kam kwefihianage!”

<sup>12</sup> Afa Festus anwena elim sihinagenam afa pese blo Polim sihina og, “Ne membeg Sisar nem kwefihianagegba asa ne ika Sisarim nangu.”

*Festus Polna mo Agripam sihinagena*

<sup>13</sup> Ming osuna misog el Agripa i afa heafna muwalig Bernaisi i Sisaria gam ahblona Festus mulug el i mo sihiagafena.

<sup>14</sup> Afa mwakwalig augunam asa Festus ehem Polna mom sihinagena og, “Autunam Feliks elim kalabus yi fwahana.

<sup>15</sup> Afa maia ka Jerusalem gam ikanaba saglag pris i afa Juni saglag el i ehem amtakwalig mo fafaiye flinim afa kam sahini og kam ogma ehem kufenai.

<sup>16</sup> Afa ka sihig Romna nihe enaig eseg kangel elim kotim finife eba mungwag wahigi gohnam asa amban mo ehem sehianag asa misog el enam kwefihinagefe.

<sup>17</sup> Afa maia ambeba mas ka maisim fegofi eba ka ming osuna ka gagim asa koka kwefihiage asa ka soldiam sihinigbi sa ehem wanig ambeg.

<sup>18</sup> Afa maia wanig ambenaba ka enaig onigig ehengel esofinibi eba mangwal kwania ehe feg afa eba awai.

<sup>19</sup> Eba ehengel heafgelni Godna suialag mina patalfuiag mi afa mungu elim seflig Sisas ehe lahagim pese buihiag ena mom Pol sihigba asa ehengel ena nagum moanagig.

<sup>20</sup> Ka ena mom higigim afa mas ka numweheg ena mogim anwenafeg mo asa ka mas ihlafeg mo enam kwefihiagegim asa ka Polim sahana namba Jerusalem gamba akofiba enanai yi ka sa ena mom kwefihiage.

<sup>21</sup> Afa Pol wasneig sihig ka membeg Romna kwania misog el sa ma kam kwefihianage asa ka soldiam sihini gwese wanig flafiba ka sa kike Sisar nangum ningihia.”

<sup>22</sup> Afa Agripa Festusim sihina og, “Ka kangafa ehena mo higinage.” Afa Festus wahigi sihina og, “Sini, sa ne higim.”

<sup>23</sup> Afa liana Agripa i Bernaisi i wag ati ahfenam asa ahblonam kwania lala ahsaifunam asa pe hawagena. Afa enanai yiba kaksag el laskuhlanaba eba gavmanna misog el i afa kembang la nai na saglag el i gofena. Asa Festus soldiam sihini afu Polim wanig ambe. Maia wanig ambenaba asa

<sup>24</sup> Festus sihini og, “Misog el Agripa afa minginag saglag el i sa ne auguia sa onigig sona elim. Afa Jerusalem nai yi afa hwa nai Sisaria nai yi mungwali Ju el olug kakagigim kam fwina esogona ogma sona elba lahai.

<sup>25</sup> Afa mas ka ehena haigim uflag mo na kog sama lahai. Afa ehe enaig esog Sisar sa kam kwefihianage na ka fwa-hagim asa koka Rom gam ningihia.

<sup>26</sup> Afa ka mas anwenafeg mo haig mo sa ka ginofenam wahe ningihiafe. Nasa ka hwag elim nengelni nof la afa ne Agripa misog el gafa ka nem ogfunig asa ne kam kwefunim haig minafinibi ka sa ginofenam wahe ningihia.

<sup>27</sup> Masa ka kalabus elim Sisar nangum ningihiaiba afa ka heafna haig mom esegim sihia fwainigba.”

## 26

### *Pol heafna mom Agripam sihina*

<sup>1</sup> Afa Agripa Polim sihina og, “Ka nem fwahana ma ne nimbiafena mom sihiageba.” Asa Pol ninga nenugenam asa heafna mo sihiagena.

<sup>2</sup> “Misog el Agripa, autunam Ju el kam sehinig asa glau ka sifakaleg ne kana mom mungwag higinag.

<sup>3</sup> Ne ati Ju elni nihem afa heafgelni ninimu mom anwenafenig asa ka fwina sifakaleg. Ilawo ka nem sahana ugwefafenam asa kana mom higinag.

<sup>4</sup> “Afa Ju el kam anwenafig maia ka weti fiahfenaba afa glauwagaba kam mungwali anwenafinig. Ka kikeafena kembig la yi afa Jerusalem la yi enanai yi ka gafena.

<sup>5</sup> Afa ehengel kam wahkig anwenafini. Afa ehengel membighi sa ma nem enam sihini kaba Farisi el asa ka ehengelni nihem fwina patalku.

<sup>6</sup> Ena moba God kagelni simbianigam sihi fwahana ka onigig eba nufunam asa ne kam kwefihianageg.

<sup>7</sup> Afa Israelna 12 pela lain wahkig Godim fwina gafuga fenagig patalfuiagim afa ehengel oga enam mom God sihi fwahagim sama pugui. Saglag, konigig ena mo God sihi fwahana ati ambala pugug afa Ju saglag el mas enaig onigig fig mo asa ehengel kam sehinig.

<sup>8</sup> Haisegba nengel Ju el enaig onigig fig God mas melig pigiegim fukla lasani?

<sup>9</sup> “Autunam ka gaba enaig onigig fena afa el amban sa Sisas Nasaret naim patalfug asa ehengelni gafugam sa ka pagaupenig.

<sup>10</sup> Afa Jerusalem la ka enaig eseg. Afa saglag pris kam sawifenagba asa ka kaksag Kristen elim lambigim kalabus yi aitiafug. Afa maia ehengel kwefihinage gonigim og sama pigi asa ka mungwa mo sihig.

<sup>11</sup> Afa ka enaig fasefe ka mungu mungu laskuhlag lala wagiakag afa ka Kristen elim susug faini asa ka membeg

ehengel sama Sisasim mas fatinig. Kam fwina olug kaka-gena asa ka afwambanai kembang fakafe asa enanai yi ka Kristenim susug enam faini.”

*Pol heafna olug waikefe mo sihina*

<sup>12</sup> “Afa ka membeg Damaskus la ika ena gafugafe asa saglag Pris sawifegim asa kam ginofegim faig. Nasa ka ikag.

<sup>13</sup> O saglag, afa osu misosuf gigni kai kikeafena hihe i ka afuiagona afa ombusug kwania of la nai puguna asa ka nanguna. Afa enag ombusugba osum flafug asa enag ombusug kangelim olyi fatini.

<sup>14</sup> Afa kangel bite la apaiyenam afa ka higina Hibru mona gweyi kam sihina og, ‘Sol, Sol, haisegba sa ne kana elim susug faig asa enam ka kinig flag, asa ne tata lofeg maia sangana sumul yi kikinagi fwahigbi maia oyna ninimu asa ehefum susug faig.’

<sup>15</sup> Afa ka sahana kog, ‘Saglag neba amban?’ Afa Ainiyag esona og, ‘Kaba el ne kam amtana ofeflafna eba kaho Sisas.

<sup>16</sup> Sa buhianam sa ne kana gafugafe ati ka nem wegfu fwahag. Ka nem pugug asa enaig gafugag nem ogfunag. Sa ne sihiaka ilawo sa ne nangug afa autunai la ka nem ogfunafe.

<sup>17</sup> Afa maia nem nimbiafena el i afa afwambanai el i otigifibi eba ka nem kweafufe. Ka nem afwambanai el yi ka nem ningihiafe.

<sup>18</sup> Asa ne ika ehengelim mina piginibi asa ma sikigiegim fwahinim sa ma ombusugim ambe afa ma Satanna wasneig mo fwahinim afa sa ma Godna wasneig mo fli. Sa ma kam olug oniginiba ka sa ehengelni amtakwalig mo fla fatinim sa ma afunam mungwali Godna afsug kabag el nai yi wahegohi.’

<sup>19</sup> “O misog el Agripa eba enaig esegba sa ka heven la nai itila lofug nanguna enam mas ka flafoi, eba awai.

<sup>20</sup> Afa ka ilawana mo Damaskus la Ainiyagna mo sihigim afa Jerusalem la eseg afa mungwali Judia nai yi afa afwambanai elim gafa ka gwenaig eseg. Ka enaig sihifenig sa ne olug waikefnim asa Godim oniginim asa ne ena nihe ambala ogfu.

<sup>21</sup> Afa ena mog Ju el kam Godna Kwania lala kehligim oyna kam tigifati.

<sup>22</sup> Afa God kam kwegfwa blog glanga pugug naig segba asa ka wanai yi ga ka gwenaig mo misog el mi afa esug el mi ka sihinigo. Kana moba Moses i afa Godna mo fli sihiule el i mungwalofug. Enaig esogona og eba enaig pugufe.

23 Enaig esogona Krai God Gisfu Fwahag el sa kinig flafe asa gose lahana buihiafe sa pugunam enag ombusugugim sihiba asa Ju el mi afa afwambanai el mi kwegan fe.”

24 Afa maia Pol mo sihiagofnaba afa Festus ehena mo toflaiti mungwag sihina asa fwina lagna og, “Pol, ne fwina anwenafegegim afa enag anwenag nem moetetiaflag.”

25 Afa Pol ehem sihina og, “Saglagluwal Festus, kaba mas ka moetetig mo. Eba kana moba nufunam fegim ati mog feg.

26 Afa misog el Agripa enaig momba ne ati anwenafe fwahana. Enaig esegba nasa ka nem ambala osihina. Ati ka anwenafeg mangwal saka sihiba ne ati enam higig afa enaba mas meagam seaifug mo.

27 Afa misog el Agripa ne Godna mo fli sihiafule elni mo ati ne onigig eba nufunam.”

28 Afa Agripa Polim sihina og, “Ne haig onigig, mwakwalig ma ne kam esenaiba sa ka Kristenne.”

29 Afa Pol sihina og, “Ka mas anwenafeg mo maisia me awai gohnana me asa ne Kristen nefe. Afa ka Godim sahanaiba sama mungwali el wanai yi gohka afa ne sa ne ka lofug fi afa ka mas enaig membeg mo ne kalabus el lofu fi.”

30 Afa Agripa buhianaba afa Festus i, Bernaisi i ahfena afa minganag el sa ehengel nena auguiafena gwenai esini buguiaga fenam apuke afuna.

31 Afa afuiafnaba mina la hefum sihiagini og, “Sonag elbi mas mangwal feg mo namo na ehem kalabus ni afa tigifati, amo eba awai.”

32 Afa Agripa Festusim sihina og, “Konigig sabig fwahi makai afa ehe enaig esona kwania misog el Sisar sama kam kwefihianagei, asa naiba sama Rom gam ikai.”

## 27

### *Pol Rom gam ikana*

1 Enag misog el ati mo sihi fwahag kagelim Itali gam bot la ningitigife asa Pol fena afa minganag kalabus el apaiyena Juliusna ninga la fwatina. Julius eba 100 soldiam nangwagiageule. Ehe soldia fenam Sisar nai yi sefu gofena.

2 Afa Adramitium kambig la nai na bot hwanai yi pugugba afa kagel ena bot la fukwaligim afa provins Esiana bupahlag enaig ika ofe. Afa Masedonia nai el Aristarkas ehe Tesalonaika nai luwal na kam patag ikanaba nasa ka mungwali afuna.

3 Afa ming osuna kagel Saidon kembang la apukenaba afa Julius Polim suialafiaflanam asa Polim fwahanaba sama ikanam hihem nangwagiba sa ehem kwegfui.

<sup>4</sup> Afa enag kembang fwaha afuofefnaba afa efef kam blo botim finkfink lambfiegofena asa ka wahigi Saiprus bite ehagam efef fwainig gam ka afuna.

<sup>5</sup> Afa ka misosuf afu Silisia afa Pamfilia muhla apukenam afa sa ka gwesim mo afa Maira la Lisiana provins apukena.

<sup>6</sup> Afa enanai yi soldia misog el Aleksantriana botim nan-gunam ona Itali gam ika. Asa ena bot la kam ika wanfukog.

<sup>7</sup> Afa ka maisim nengigim afuiaskag asa ka Nidus kembang apukeg. Afa efef kam blo plauplau hiageaba nasa ka Salmone mo kwegfugum afa sa ka Krit bite gam wahigi efef fwainig gam afug.

<sup>8</sup> Afa ka ehegepusibi ka bupahlag afuiag enaba seflig bu nofug laikey fwainila apukeg eba Lasea kembang muhla.

<sup>9</sup> Afa ka maisim fiaskafnaba enana Ju elni fane foiyuog enag osuna ika awaieg enanaba bu amtanafiagena afa efef kwania fiagena enaba mango suialagna mo na bot ika. Nasa Pol enaig sihifeni og,

<sup>10</sup> “Sa kam higini, ati ka anwenafeg big afuiba eba big kinig flifi. Bigim mungwali, bot i, gawig i bigim awaiyefe.”

<sup>11</sup> Afa soldia misog el Polna mo mas higina mo, afa botna alag i afa bot flaukuiaule el i oga ahka asa ehe eheningina mo higini.

<sup>12</sup> Afa ehengel onigini og masa bot gohonai yi gofiba ese amtakwalig osuna pugufe. Afa mungwal esogona, “Sana gihafu sa big Finiks yi apukenam enanai yi auguiafiba nengifibi maia amtakwalig osuna ika awaiyeba.” Afa enanai yi Krit ehagam bite suialag la efef fwainig la auguiafna.

### *Bifwat bu la sahana*

<sup>13</sup> Efef weti sahigifinibi asa ehengel onigini ogma bigim enag efef sama bigim bot la lambkuiafi. Asa anka bu la nai fli bot la fatinim asa Krit yi bupahlag afuiafna.

<sup>14</sup> Afa afuiafnaba managig fwainig bifwat kwania gweyi Krit mina sah blona. Ena bifwatibi seflig angmog nai bifwat blona.

<sup>15</sup> Afa bifwat botim plauplau fiaflagba kokawo ufu kam ehegepuse skofegba nasa ka botim fwahigbi sa bifwat kam bot la lambig lambku.

<sup>16</sup> Ka afu weti bite Kauda ehagam apukegba enanai yi bifwat mas fwina sahig mo. Afa kangel auguiag bot weti botim wena kehla ubluiafnaba we ona pigi.

<sup>17</sup> Asa enag el weti botim pitigi flinim kwania bot sisi folfunim asa wena kwania bot nahlum wena wahe kikeawagini og masa bifwatni bot bambuhia kaminefefe nasa enaig esea-wagini. Afa el embefini og masa bot Afrikana bu weg pahlag

ikanam heugonam toafofe asa ehengel sel pitigi flinim anka bu la flifainiba asa efef enegigim botim flaukuigifini.

<sup>18</sup> Afa ming osuna bifwat gwenaiɡ esegofnaba asa el gawig bu la lambaitifini.

<sup>19</sup> Afa manganana gwenaiɡ esenaba afa sa ehengel botna gawig enaba lambaitifinibi eba selna, we i, enaiɡ lam-baitifini.

<sup>20</sup> Afa wahkig of simbiage gwese gofenaba afa mas kangel osu mi bagnofut mi nanguni mo. Bifwat gwenaiɡ esegifinibi ka enaiɡ onigini eba bigim awaiyefe.

<sup>21</sup> Afa wahkig gofenaba fane mas ahagana mo afa Pol buhianam ehengelim sihini og, “Afa ne kana mom patalfuite asa big Krit yi auguiafite eba mas ne enag kinig flite.

<sup>22</sup> Afa sa kana mo hig sa ne fwina wasnei eba mas nem awaiye eba bot mungu he awaiyefe.

<sup>23</sup> Ka Godna gafugag el afa amu sinaini heafna of la nai el blo kam muhla puguna.

<sup>24</sup> Afa ehe kam esonag og, ‘Pol nofeka embefe. Sa ne ika Sisarna nofla gofum. God nem suialafiaflag asa el sana mungwali go mas awaiyeg mo.’

<sup>25</sup> Enaiɡ esegba sa ne nimbefum fwina wasnei kikefba Godim ati ka oniginag asa kam mangwalim ehe sihi fwahanag eba nufunam pugufe.

<sup>26</sup> Afa bifwat botim flanam ukunam bupahlag enanai yi bigim kukufe laitife.”

<sup>27</sup> Afa 14 osuna maia awaiyenaba bifwat kam Mediterenian bu la esim esim lambfieg gohug. Mungkug luputiegna afa bot la nai el onigini og ati big bite muhla ofi.

<sup>28</sup> Afa sa wena bu gihinimba 40 mita enaiɡ fena. Afa mwakwalig gwesim hilifi gihinimbi eba 30 mita enaiɡ fena.

<sup>29</sup> Afa embefini og eba bot masa ika fun la kunam tutoahife afa sa botna masigim anka sambaga sambaga lambinim bu la laitini og sa ma bot wasnei gofi afa ehengel Godim sahnafohun ika sihuguakana.

<sup>30</sup> Afa manganag bot la nai el og nawo botim fwahi afu. Afa ehe mwakwalini og ka anka botna nofbosugam afati afa ehe weti botim wena kihlinim asa flifatiniba asa bot bu la pe gofena.

<sup>31</sup> Afa Pol misog el mi soldia mi sihini og, “Afa sonag bot la nai el bigim wanaflag fwainigba eba bigim awaiyefe.”

<sup>32</sup> Asa soldia weti botna wem kofu fwahanaba asa bot bu sisi wagiakana.

<sup>33</sup> Afa si ambafiafnaba Pol enaiɡ membena og ma mungwali fane ahagai asa ehengelim sihini og, “14 osuna ne



ehegepusia flag ne fwina enam onigifinim asa ne mas ahagana mo.

34 Ilawaba ka nem wasneig mo osihin sa ne fane lambi ahaganam wasnei. Eba mas ne amban mungu awaiye eba mungwal suialag apukefe.”

35 Ena mo sihi fwahanam asa ehe bret flanam Godim suialag onam sa kowagnam nena.

36 Afa ena mo maia olugim fingi feskofenaba asa ehengel gafa fane lambinim ahagana.

37 Afa kangel bot la auguiag elbi eba 276 enaig fena.

38 Afa fane ahagaginim maia ehem ihla fiasainaba asa ena mo lambinim bu la laitinibi asa bot hefuhe fena.

39 Afa maia osu oblofenaba bot la nai el enam bite fahigiaginim afa mas bupahlag bitem anwenafini mo. Afa nangunibi engig ehegam ikagifini asa ehengel ena onigini og sama efef botim bu laikeyeg fwainig mina ukui.

40 Afa sa anka weгим koflinim bu megam fatinim afa sa we pitigi fli fwahinimbi asa aga botim waike waike fefugufnaba afa selim nofbosugam kikiagi fwahini sama efef botim engig la flaukui.

41 Afa engig bu megam kwania fegofnaba asa enanai yi botna gose ikag ika nanai yi kunam wasnei gofnaba afa sumi nai mo bu tutoitifena.

42 Afa soldia enaig oniginam og eba kalabus el masa bu sus afunam mangigi yi apukenam embem afufe. Asa ogra kwaskofi.

43 Afa ehengelni misog el mo ogra Polim kweafu asa ehe kweni og, “Nofeka enaig esi.” Afa ehe enaig esona og, “Amban ne bu susim anwenafegba asa apaiyenam bu sus afuian ehegam mangigi yi apukena.

44 Afa minganag mo bot yi nai kukwehiag la gwese lefiba asa ne afuian mangigi yi apuke.” Asa gwenaig esini mungwali afuna suialag apuke minefena.

## 28

### *Pol Malta la gafena*

1 Afa mangigi yi ka suialag apukenam afa sa kam enanai yi el sihigoni og, “Hwa biteba Malta.”

2 Afa el ena kembang la nai kam suiala fihigini. Afa bu kam feniba nineg kam feskofnaba asa ehengel kam wanafunam suwi wehlagnibi asa ka mungwali nanai yi numbwagini.

3 Afa maia Pol lihi lambi suwi la wehlanaba afa pou nanai yi sefu gofna enag suwiana embem pugunam Polim ninga la tige luguafna.

4 Afa lala nai el nangunim hefum sihiagini og, “Ka onigig sonag elbi eba el amtakwalig ehe elim tigeule. Bu la nai sanel

mas ehem susug faina mo afa glau mangig sanel ati enag susug faigba eba lahafe.”

<sup>5</sup> Afa Pol ningam fufsia fiaflanaba asa sombine suwi gam pitigifu ikana. Afa mas Polim mangwal fena mo.

<sup>6</sup> Afa el onigig og eba ehem ninga nisag me awai ehem ikagna lahai me. Afa nanguafohun mas ehem haig esena mo asa ehengel nai onigini og eba god me.

<sup>7</sup> Afa gwenana muhla nai bitena mog ehena unehlagba Publius ehe saglagluwal fenam Malta ailan elim nangwaghigage gofna. Ehe kagelni hihe lofegim heafna lala gam wankanam sambaga mungu osuna wanana.

<sup>8</sup> Afa ehena alagba nolug gih i embwele taf i feagenaba asa ehe kife la gifini. Afa Pol sefu ika nangunam asa beten ena afa ningana tuhnam afa suialafe fatina.

<sup>9</sup> Afa ehe maia enaig esenaba asa gwenanai el mungwali gihna Pol nangum fambefenaba asa Pol suiala fetifena.

<sup>10</sup> Ehe kam sifakale gonugum afa maia ka bot la afuofefnaba asa ehengel kam haig haig gawig lambwai gonaba asa ka enana afuna.

### *Pol Rom la ika puguna*

<sup>11</sup> Afa ka sambaga mungu was yi Malta bite la ka augugim asa ka ming bot Aleksantria la nai enanai yi afuna. Ena botba sambaganigi ginof ahogofna eba seflig ‘Mungwa wasni luwal god ahgohug’. Eheningina unehlag eba Kastor afa Poluks. Ena botba gofena maia bifwat sah gohug namo awaienaba.

<sup>12</sup> Afa ena kembang fwahinim asa ka Sirakyus kembang apukenam enanai yi ka sambaga mungu osuna auguna.

<sup>13</sup> Afa Sirakyusim ka fwahinim asa ka ming kembang Regium gim apukenam afa ming osuna osupeg ehbegam efef sah blonam asa sambaga osuna kam bot la petla lambkunam Puteoli la lambpuguna.

<sup>14</sup> Afa enanai yi minganag Kristenim ka ulambinibi ehe kam enaig esogoni og, “Sa ne kam mungwa wik yi wanafila.” Afa enanai yi ka elegeg la gohug osuna ka augunam afa ka enanai yi fwahinim ka Romna kwania kembang gam kafuna.

<sup>15</sup> Afa Rom gofenaba enanai Kristen higinim kagelim og ambofe asa Apius maket mina la i afa ming kembang seflig ‘Sambaga mungu askafohug lala enanai yi kam ambe ulambinim. Afa Pol nanguagenam Godim sifakalenam afa ehena olug suialafena.

<sup>16</sup> Afa ka afu Rom nai yi saiyanam afa gavman mas Polim kalabus yi fatini mo eba ehe enaig esogona og, “Pol neafa nimbe fwaim lala gafiba sama soldia nem anwasa fenafofi.”

*Pol Rom la mo sihina*

<sup>17</sup> Afa maia sambaga mungu osuna awaienaba asa Pol Ju saglag elim Rom la nai awamoni. Maia ambena laskuhlanaba asa ehengelim enaig esoni og, “Nilite, ka mas bimbeafgelni elim haisegnig mo afa ka mas bimbeafgelni simbianigana nihem flafog mo afa ehe esug kam Jerusalem la nai fligim afa Romna ninga la kam fwahi.

<sup>18</sup> Afa Rom kam kwefihinagigim afa mas kana mangwalim enanai yi kam lahagim nanguni mo. Afa muhla ati kam fwahigim ofifini,

<sup>19</sup> afa Ju saglag el mas enam membini mo afa sa ka Sisarna gafugag elim sahana kog, ‘Romna kwania misog el Sisar sa ma kam kwefihianagei.’ Afa ka mas kikeafna elim setigi.

<sup>20</sup> Enaig esegba asa ka nem awamonigim koka nem nangunam mo sihin. God sa Ju elim sihi fwahanig ena mo ka onigigim nasa ka kalabus elbi feg.”

<sup>21</sup> Afa ehengel enaig esogona og, “Ka mas Judia nai pas neana mom enanai yi nanguni mo, afa ambangel sa Judia nai ambeg mas nem haig mo sihini mo afa mas nem molamp mo faig mo.

<sup>22</sup> Afa koka neana mo higim mungwali el Kristenim enaig se haig lambfiafu enam mungu ati ka anwenafig.”

<sup>23</sup> Asa ehengel mungu nagim fwahinim oagna Pol nangunambe. Asa enanam kaksag el mungwali ambenaba asa Pol Godna bog meg mo sihiage gofena leana pugunam ikan osupeгна fena. Afa ehe Mosesna nihe mo mi afa Godna mo fli sihiaule elni mo mi numwehe sihinuwagena sa ma enam anwenafi Sisas eba Godna Gisfu Fwahag el.

<sup>24</sup> Afa minganag Pol maia sihinaba ena mo flinim afa minganag mo ena mom mas membini mo.

<sup>25</sup> Afa hefum flafihiage gofifinibi asa Pol ena mo osihifenaba ehengel oagna apuke afuaminefena. Pol enaig esona og, “Godna Sungwabugni mo eba nufunam afa Aisaia Godna mo fli sihiaule el nengelni simbianigam ati sihi fwahani. Ehe enaig esona og;

<sup>26</sup> Afunam asa enag elim sihigonibi, ena elbi higafufenaba afa mas anwenafini mo. Afa nanguafufenaba mas numwehe nanguini mo.

<sup>27</sup> Afa ehengelni misog onigwagig mas ombuseni mo afa ehengelni angug titie skofena afa nofug kohla skofena. Afa ehengel mas enaig eseg mo eba God sihig ehengelni angug ati higig me, afa nofug ati nangug me, afa olug onigig ati anwenafig me. Afa ka nangunam ati waike ambe enaig esigbi eba ka wangeneфе laitife.

*Ais 6:9,10*

<sup>28</sup> “Afa sa ne anwenafi hwa suialag mo God esegba elim lambig afa God ena mo afwambanai elim gafa fai. Ehengel sa ena mo higife.”

<sup>29</sup> Pol ena mo sihi fwahanaba ehengel asa hefum flafihi-aginim asa apuke afuiaminefena.

<sup>30</sup> Pol kigna lalam baimenam asa enanai yi sambaga yia la gana. Afa ambangel maia ambe ehem nangufinibi afa sa ehe sifakale afena.

<sup>31</sup> Afa ehe Godna mom wasnei fenam sihiafena afa el ehem mas kweni mo. Afa ehe elim Godna bog meg mo mi afa Ainiyag Sisas Kraisna mo mi numwehe sihinigeafena.

## Mo Pol Rom la nai Elim Ginofe Faini Hwa buk enaig esog

Pol ogna Rom la nai Kristenim ika nangwag asa ehe hwa buk la ginofena. Afa ehe ehengel nenam mwakwalig augunam asa sumi yi Spen kembang gam ikana. Afa Pol Godna minam ambala sihiageg afa suialag Kristen elni nihem ogfunig. Afa ilawanam ehe Rom nai elim suialag mo sihini afa ehe gwesim ming sihi og, “Amban sa Sisasim olug oniginag ena mina gam mungu big Godna noflaba afsug kabag el fig.” (Rom 1:17) Afa ming gafa enaig esog mungwali el ati amtakwalig nihe esig.

Asa God bigelim aflafenigim asa pese lambig. Afa sapta 5 ika 8 la pugug Pol eba Godna nihe mona mog mom sihig afa Godna Sungwabug Kristen elim gafugag esenig sa enam sihig. Afa sapta 9 ika 11 la pugug Pol enaig esog Kaba Ju el feg afa maia kaksag Ju el Sisasim masig fatinibi. Asa ka enam olug kinig. Afa kaksag afwambanai el Sisasim patalfugba asa ka enam sifakaleg. Afa buk na muhiag mo Pol enaig sihifeg suialag nihe Kristen sa esig asa ma ehengel enam numwehe patalfui.

<sup>1</sup> Kaba Pol Ka Kraisa Sisasna gafugag el afa ehe kam awamonag asa ka kanog fwahag el feg afa kam wefug fwahag asa ka Godna suialag mo sihiawageakag.

<sup>2</sup> Afa autunam God hwag suialag mo ati sihi fwahag afa heafna mo sihiafule el enag mo fli sihinim afa Godna afsug kabag buk la ginofini.

<sup>3</sup> Afa enag mo heafna Legna mo afa enag Leg eba bigelni Ainiyag Sisasa Kraisa. Afa ehe hwaig elni luwal lofug afa ehe Devitna simbianiga fena.

<sup>4</sup> Afa ehe lahanam asa pese buihiana afa enag kwania kigmog eba ogfug ehe Godna Leg afa ehe afsug kabag Alagna nihig. Eheba Sisasa Kraisa bigelni Ainiyag.

<sup>5</sup> Afa heafna unehlag la God kagelim suialag fenig asa kagel kanog fwatig el fig. Asa kagel mungwali afwambanai elim Godna mina ogfugonig asa ma ehengel Godim olug oniginim afa Sisasim patalfui.

<sup>6</sup> Afa nengel gafa enaig el fig asa God nengelim awamonig asa ne Sisasa Kraisa el fig.

<sup>7</sup> Afa nengel Rom la nai el na ka nengelim mungwali ginofenig. God nengelim membenigim afa awamonig asa nengel heafna afsug el fig.

Afa God bigelni Alag afa Ainiyag Sisas Kraiss sa ma nem esug kwagani afa olug enesieg fai.

*Pol Rom kembangim ika nangwagim membeg*

<sup>8</sup> Afa lasflam ka enaig sihifeg mungwali bitenai kembang nengelni olug onigig mo higig asa Sisas Kraissna unehlag la ka kikeafna Godim suialag onag.

<sup>9</sup> Afa ka Godim mungu oniginagim afa ka heafna gafugag eseg asa ka heafna Legna suialag mo sihiawageg. Afa God ati anwenafeg kana mungwali sahig ka nem oniginigim

<sup>10</sup> afa ka Godim sahna. Afa ka Godim enaig sahnafenag afa heafna membug laba ehe mina pigiba ka nem blo nangufe.

<sup>11</sup> Afa ka fwina membeg nengelim blo nangwagim asa ka nem kwaganiba sa nengel Godna Sungwabugni suialag flinim sa ne wasnei yi afofum.

<sup>12</sup> Afa ka enaig esog ka membeg neana olug onigig i afa kana olug onigig i sa bibefum fakwegfufiahgahfe.

<sup>13</sup> O nilite, ka membeg ne anwenafig ka wahkig esogo ka nem nangwagim afa haig haig kam enaig esegim minam kagfunafug. Afa ka oagna nem blo nangwagnam afa nengel nai yi gafugafenam asa fug flafe afa sa ka mingnag afwambanai elim gwenaig eseni.

<sup>14</sup> Afa kana gafugag eba enaig eseg el Grikna nihem patalfug afa sangwali nai el mas enaig esig mo afa anwena el afa etetig el ka sa ehengelim mungwali sihinuge.

<sup>15</sup> Asa ka fwina membeg Godna suialag mo nengel Rom la nai elim gafa sihinigim.

<sup>16</sup> Afa ka mas Kraissna suialag mom sihiagim mas ka afwanfeg mo. Afa Godna kigmog enag suialag mo la go. Afa amban el asa enag mom olug onigig asa God ehengelim mungwali lambig. Afa enag mo gof Ju elim puguni afa sumi yi gafa afwambani elim puguni.

<sup>17</sup> Afa enag mo Godna suialag nihem ambala upugug asa God bigim enaig esenigbi asa big afsug kabag el fig. Afa enag mom olug onigig mina la mungu asa God bigim ena mina lambig. Asa Godna ginof enaig esog, "Afa el Godim olug oniginagba asa ehe Godna nofla afsug el feg afa ehenai yi nofkikena go."

*Afa Godna nofla mungwali el mas suialag afohie mo*

<sup>18</sup> Afa big anwenafig God heven la ga afa ehe heafna ninimu ambala upugug afa ehe mungwali elim amtakwalig esinig asa el amtakwalig esig afa ehem masig fatinig. Afa ehengelni amtakwalig nihe nufunam mo filafatigim afa kumwahlig.

19 Afa mangwal mungwali eba Godim ogfug eba el enam ambala nangug. Afa God ehe enam ehengelim numwehe ambala ogfunig.

20 Afa maia God hwa bite gafugafenaba afa blog ilawo feg afa bigelni nofug mas Godna wahkig kigmog mi afa heafna nihe mi nangug mo. Asa el nangug God mungwali gafugag esena asa mungwali el ehena kigmogim afa nihem anwenafig. Asa ehengel mas enaig esogoi ka mas Godim anwenafena mo asa ka kikeafena sawiegim patalkug.

21 Afa ehengel anwenafig ehe eba God afa ehengel mas enaig esogog mo neba nufunam God asa ehem fingi fini mo afa ehengel mas ehem suialag oniginig. Amo, ehgelni onigig eba mas ihlafeg mo afa ehengelni onigig behig eba sikulufeg.

22 Afa ehengel enaig esogog kagelni anwenag goseg afa eba etetig el fig.

23 Afa wahkig nofkikenagag God go afa ehengel mas ehena unehlagim fingi fi. Afa ehengel enaig esig el afa twafig afa sis afa haig haig wutlai mungwali enag sa pigihiaka asa ehengelni sungwagim mo fingi fig.

24 Asa God ehengelim enaig mungwag esenig, ehe ehengelim fwatigba asa ehengel heafgelni eligni sawiegim patalfug asa amtakwalig esig. Afa ehengel enaig eligni nihe esigim asa afwanefug flig.

25 Afa enaig el Godna nufunam mo fwahigim afa mwakwal mom mo flig. Afa eba nufunam God mungwali gawig eseageg asa big wahkig ehena unehlagim fingi fi afa ehengel mas Godim ahnai skaufig mo eba gawig God sa eseageg ehengel enam fingi figim afa ahnai skaufig. Eba nufunam.

26 Afa ehengel enaig esig asa God enaig mungwag esenig, ehe ehengelim fwatigba asa ehengel heafgelni eligni sawiegim patalfug asa enanai yi afwanefug flig. Afa suialag nihe God membeg el enaig esegim afa ehengelni angwafig gafa waikefigim afa angwafig awau una amtakwalig esig.

27 Afa saglag gafa gwenaig esig. Afa ehengel mas Godna sawiegim patalfui asa angwafigim mo fwahagim afa saglag awau una fig. Afa ehengel heafgelni eligni sawiegim patalfug asa saglag hefum amtakwalig eseagigim afa afwanefug flig asa ehengel susug flig eba ehengelni amtakwalig nihe i mungwalofug feg.

28 Afa ehengel Godim nufunam anwenafenag onigig oksig asa God enaig mungwag esenigbi asa ehengelim fwatigba sa ehengel heafgelni totohiag onigigim patalfug asa mangwal amtakwalig mas esi eba enam esig.

29 Afa haig haig nihe mas suialafeg mo afa amtakwalig nihe ehengel wahkig enam eseafu. Afa ehengel membeg

mingnag elni gawig lambinim afa mingnag elim amtak-waletifi. Afa ehengel mingnag elim ambobug fegonug afa elim tigi fatig afa ninimule afa mwakwaleg afa mingnagim amtakwalig fegonug afa ehengel wahkig enam eseafu. Afa ehengel mo sum fig.

<sup>30</sup> Afa mingnagim sehtigig afa Godim olug kakaginig afa mingnagna unehlagim pigaupig afa tonbusigim og kike goseg afa mulug amtakwalig esegim mina kwefihiageg afa humwanigni mo filafatig.

<sup>31</sup> Afa ehengel mas suialagim anwenafig mo afa heafgelni mo sihiagim mas patalfui. Afa ehengel mingnagim mas membegonim afa aflafegoni.

<sup>32</sup> Afa ehengel ati anwenafig Godna afsug mo enaig esog amban enaig nihem esegba sa ma lahai eba heafna moala. Afa ehengel wahkig enaig esig afa mango enam mungu mo eba amban sa esegba asa ehem gafa sawifeneg.

## 2

### *God mungwali elim kwefihiagefe*

<sup>1</sup> Sa onigim afa sa ne mingnagim kwefihianugefe afa mas ne esoi ka mas haig eseg mo. Afa maia ne mingnagim kwefihianugeba afa ne gwenaigni nihe feg asa ne nimbefum kufeg.

<sup>2</sup> Afa God maia el enaig amtakwalig nihe fig enaig elim kwefihianugegba afa big anwenafig eba sufniag nemug feg.

<sup>3</sup> Afa maia ne mingnagim kwefihianugeba afa ne gwenaigni nihe feg eba haig onigig ne feg? God mas nem gafa kwefihianage me?

<sup>4</sup> Afa God nem suialag esenag afa nem nengigim fenago asa mas nem ikagna susug mungwag fai masa ne enam esegim oksife. Sa ne anwenafe God enaig nem esenagba asa ne olug waikefe.

<sup>5</sup> Afa ne tonbusug el asa ne mas olug waikefei. Asa ne enaig esegba maia Godna olug kakageg osuna puguiba neana susug eba kwania nemug feg. Afa enanam God ogfug heafna kwefihiageg eba sufniag nemug feg.

<sup>6</sup> Afa mangwal el esig eba God ehem gwenaigni mungwag faifi.

<sup>7</sup> Afa mingnag el membeg God ehem fingi finigim afa suialag unehlag i afa nufunam nofkenagag i fli asa ehe suialag nihem wahkig eseafu. Afa God enaig elim wahkig nofkenagag faifi.

<sup>8</sup> Afa mingnag el hefum onigigim afa nufunam mo oksigim asa amtakwalig nihem patalfug. Afa God heafna olug kakageg enaig elim faig.



<sup>9</sup> Afa mungwali el amtakwalig esig eba kinig i afa susug i ehengelim pugunifi. Afa Ju elim lasflam afa afwambanai elim gafa pugunifi.

<sup>10</sup> Afa mungwali el suialag esig eba God enaig elim fingi fenig afa suialag unehlag afa olug enesieg faife. Afa Ju elim lasflam afa afwambanai elim gafa faife.

<sup>11</sup> Afa God mungwali elim mungwalofug la kwefihianugeg.

<sup>12</sup> Afa afwambanai el Mosesna nihe mom flig fwainig afa ehengel sa amtakwalig nihe fig eba ehengelim awaiegim. Afa Ju el ati nihe mom flig afa ehengel sa amtakwalig nihe esig eba nihe mo ehengelim kwefihianugefe.

<sup>13</sup> Afa el nihe mom sa higig enag mas ehem Godna nof la afsug kabag fei. Amo, el sati nihe mom higigim patalfug eba God enaig elim og ne afsug kabag el.

<sup>14</sup> Afa maia afwambanai elni sawieg buihiagba asa mungwalofug esig sa nihe mo esog eba enag ogfug ehengel Mosesna nihe mom fig fwainig afa ati anwenafig suialagim amtakwaligim.

<sup>15</sup> Afa enag ogfug eba nihe mo ehengelni olug yi go. Afa olug yi gafa ehengelim enaig pugufenig enag ogfug eba nufunam asa ansiaba ehengelni onigig hefum sehtigig afa ansiaba onigig og ne suialag eseg.

<sup>16</sup> Afa suialag mo ka sihig eba enaig esog maia God Sisas Kraism sihinaiba sa elim kwefihianugegim asa ehe gafa elni olmegam onigigim kwefihianugefe.

### *Nufunam Ju el ambangel maia?*

<sup>17</sup> Afa nengel Ju el ne enaig esogog, kagelba Ju el afa kagelni onigig Mosesna nihe mo la afohie asa God kagelim membenig.

<sup>18</sup> Afa ne anwenafifi mangwal God asa membeg sa ne esi. Afa nihe mo nengelim ogfunig mangwal suialag sa goseg asa ma ne suialag nihem patalfug.

<sup>19</sup> Afa ne enaig onigig fig nengel Ju sa ma noftet elim kwagani afa nengel ofenai ombusug fig asa elim si megam afohie.

<sup>20</sup> Afa ne enaig esog, el onigig auwiauwigim nengel Ju sa ma ehengelim ogfunugei afa ne kwablog elim numwehenugeg. Afa ne ati enaig onigigfig ne nihe mom anwenafig asa ne mungwali anwenafig afa neana mo ne sihig eba nufunam.

<sup>21</sup> Afa ne mingnag elim ogfunig asa ne mas nimbeafna mo patalkug mo afa ne esog nofeka ukwefi asa nimbe mo ne ukwefeg.

<sup>22</sup> Afa ne elim esonig nofeka aga taitufi asa nimbe mo ne enaig eseg. Afa ne mwakwal Godim oksiageg asa ne ikagim ehengelni lala nai ukwefeg.

<sup>23</sup> Afa ne nimbeafum fingi fig asa Godna nihe mo nem pugunig. Afa ne enag nihe mom filafatig asa afwambanai el enag mom amtakwalig mo sihinig afa ehengel Godna mom oksinig.

<sup>24</sup> Afa Godna ginof enaig esog, “Afa nengel Ju el amtakwalig nihe esig asa afwambanai el Godna unehlagim memp kusufinig.”

<sup>25</sup> Sa ne Ju el nihe mom numwehe patalfufife asa nihig lofug kokohiage nihem ogfug ne Godna suialag Ju el feg. Asa ne nihe mom filafefe eba ogfug nimba gwenaig afwambanai el lofug mas nihig lofug kokohiageg mo.

<sup>26</sup> Afa afwambanai el asa mas nihig lofug kokohiageg mo afa enaig el nihe mom numwehe patalfuiba asa God ehem nangugim onigig asa ofenai el nihig ati kwafog.

<sup>27</sup> Afa enaig el mas nihig lofug kokohiageg mo afa ehe Godna nihe mom patalfugba asa heafna nihe ambala ogfug nengel Ju el mas suialafig mo. Afa ne Mosesna ginof kehlig afa nimbeafgelni nihig lofug kokohiages asa nihe mom filafatig.

<sup>28</sup> Afa el Ju elni nihe eseg afa enag nihe ehem mas enaig esenag mo asa ehe mas nufunam Ju el feg mo. Afa nihig lofug kokohiageg nihe mas elim enaig esenag mo asa ehe Godna el feg.

<sup>29</sup> Amo, Mosesna ginof elim mas enaig esenag mo eba Godna Sungwabug elni olug megam seaifugba ogfug ehe Godna el feg afa enaig el eba nufunam Ju el feg. Afa el mas enaig elim fingi fenai afa God ehem fingi feg.

### 3

<sup>1</sup> Asa ne haig onigifeg? Ne Ju el fefe atiaho eyi mangwal asa suialagba feg? Afa nihig lofug kokohiageg nihe atiaho Ju elim kweagfug me?

<sup>2</sup> Afa lasflam ka enaig esog eba suialag nemug bigel Ju el fig asa God heafna mo Ju elni ninga la fwahana.

<sup>3</sup> Afa mingnag Ju el Godna mom patalfuiag fwainigba asa atiaho God gafa gwenaig faeseife asa heafna mom mas patalkui?

<sup>4</sup> Amo, eba awai. Afa mungwali el asa mwakwalig esig afa God mas enaig esei afa mo asa ehe sihig enam nufunam eseg. Afa Godna ginof enaig esog; Afa neana mo ogfug ne nufunam feg.

Afa maia el nem sehinibi afa ne nufunam mona filaklaitig.

*Sam 51:4*

<sup>5</sup> Afa sa bigelni amtakwalig nihe ambala ogfuiba asa God eba afsug kabag nemug feg. Haig big esogofe? Maia God bigim susug mungwag faifiba eba ehe amtakwalig ho eseg? Amo enag mo eba hwa bitenai amtakwalig onigig.

<sup>6</sup> Afa nofeka enaig onigifi. Afa sa nufunam God amtakwalig eseteba ehe mas mungwali elim numwehe kwefihi-anugei.

<sup>7</sup> Afa mingnag sa enaig esogog, asa kagelni mwakwal nihe ambala ogfug God eba nufunam nemug feg afa enaig heafna unehlagim fingi fegba haisegba God kam og amtakwalig el ne feg.

<sup>8</sup> Asa mingnag el enaig onigig figim esog, sa big amtakwalig esig asa suialag pugufe. Mingnag el kagelim sehini og kagel enaig mo sihig. Afa ehengelni onigig eba amtakwalig asa God ehengelim amtakwalig mungwag faife.

*Mas amban el mungu eba suialafeg mo*

<sup>9</sup> Afa haisegba atiaho bigel Ju el Godna nof la suialag fig afa afwambanai el eba awai. Amo, eba awai. Afa ka ati nem sihianig Ju el afa afwambanai el bigel mungwali amtakwaligim ahnai skaufig.

<sup>10</sup> Afa Godna buk enaig esog;

Mas amban mungu afsug el feg mo. Awai nemug.

<sup>11</sup> Afa mas amban mungu anwenagna feg mo Godim yis-giegim.

<sup>12</sup> Afa mungwali el Godim nangu fwahigim asa esug el feg afa mas amban mungu suialag eseg mo. Awai nemug. *Sam*

*14:1-3*

<sup>13</sup> Afa ehengelni mo lagig algana fegim ofenai melni nifung lofeg.

Afa ehengelni meleg la elim mwakwal fegonug.

Afa ehengelni mo lagig elim tigifatig ofenai pou. *Sam 5:9*

<sup>14</sup> Afa ehengel nai yi haig haig agi mo memtola pugunig. *Sam 10:7*

<sup>15</sup> Afa ehengel ikagna afugum elim kwagiskugum.

<sup>16</sup> Afa ehengel hanai yi gafa afugum gawigim amtakwaletifigim afa elim kinig faigog.

<sup>17</sup> Afa ehengel mingnag el nanam mas aflahlanam augui. *Ais 59:7,8*

<sup>18</sup> Afa ehengel mas Godim ahnai skaufeni. *Sam 36:1*

<sup>19</sup> Afa big anwenafig bigel Ju el nihe mona ahnai skau afohie asa big Ju el enaig esofe ka mas amtakwalig esena mo. Asa God Ju el mi afa afwambanai el mi bigim gwenai kwefihiagefe.

<sup>20</sup> Asa mas amban el nihe mom patalkugum asa Godna nof la afsug afohieg mo. Afa nihe mona gafugag enaig eseg eba elim ambala ogfunag bigel amtakwalig eseg.

*Mango God eseiba asa el afsug afohie*

<sup>21</sup> Afa ilawo God bigim mina ogfunig asa el Godna nof la afsug kabag fig. Afa nihe mo mas ena mina la go mo. Afa Mosesna nihe mo afa Godna mo fli sihiafule el i ena mina mom ati sihi fwahini.

<sup>22</sup> Afa amban el Sisas Kraism olug oniginag afa God ehengelni olug onigigim nangugim asa ehengel Godna nof la afsug kabag fig. Afa mungwali el gwenag mungwalofug fig asa God enaig esenig.

<sup>23</sup> Afa mungwali el amtakwalig esig asa Godna suialag sawiegim big fagufakig.

<sup>24</sup> Afa Sisas Kraism lahanigim afa elim pese lambig asa enag God esmunagim kwaganigim asa el ehena nof la afsug kabag fig.

<sup>25</sup> Afa God heafna Legim ambala faig asa ehe lahagim afa Alagna olugim tigai pifakag. Afa amban el Sisasim olug oniginag asa ehena taf enaig elni amtakwaligim busufla fatigba asa God mas ehengelim olug kakagenig mo. Afa enag ogfug God eba suialag kwefihiageg el feg. Afa autunam God aflahlanam fena asa elni amtakwaligim mas haig eseni.

<sup>26</sup> Afa glauwaba ehe elni amtakwaligim mungwag susug faig asa ogfug ehe suialag kwefihiageg el feg. Afa ehe amtakwaligim mungwag faig afa el Sisasim olug onigigim enaig esenig asa ehengel Godna nof la afsug kabag el fig.

<sup>27</sup> Afa big mas enaig onigi big nihe mom patalkug asa big afsug el fig. Amo, bigelni olug onigig mungu fegba asa big afsug fig. Asa big mangwalna befim mas fingi fi.

<sup>28</sup> Afa ati big enam numwehe anwenafig nihe mom patalfuiag eba mas el Godna nofla afsug fei. Eba heafna olug onigig mungu ehem enaig esegba asa afsug el feg.

<sup>29</sup> Atiahog God eba Ju elni mungu? Amo, ehe afwambanai elni God gafa feg.

<sup>30</sup> Afa God eba mungu feg! Asa ehe Ju elni olug onigig nangugim esog ne afsug el fig. Afa afwambanai elim gafa ehe ehengelni olug onigigim nangwanigim asa gwenag esonig.

<sup>31</sup> Atiaho sa big enaig esogoi Mosesna nihe mo eba esug feg me? Amo eba awai. Olug onigig esegba nihe mo nufunam feg.

## 4

*Abrahamna olug onigig ehem esegba asa ehe afsug feg*

<sup>1</sup> Atiaba enam nufunam feba sa big biafna simp Abrahamim onigini. Mango maia ehe anwenafena?

<sup>2</sup> Atiaba Abraham suialag gafugag fegba asa God ehem og ne afsug el feg eba ehe sa ma elni nof la hefum fingi fei. Afa Godna nof la asa ehe enaig esefe.

<sup>3</sup> Afa Godna mo enaig esog;  
Abraham Godim olug onigina asa God ehem og ne afsug  
kabag el feg. *Stt 15:6*

<sup>4</sup> Afa el sa gafugafegim asa kig flag ehe mas enaig og ka esug flag amo eba heafna ehenge pusnanam flag.

<sup>5</sup> Afa amban el sa olug onigig nai yi mungu feg afa ehe mas gafugagfeg mo eba ehe ati anwenafeg God amtakwalig elim suialafenag asa God enaig elni olug onigigim nangunagim asa og ne afsug el.

<sup>6</sup> Afa Devit gafa gwenaig esog elim God sa esonig ne afsug el afa ehe nihe mo esig fwainig eba enaig el sa ma suialag augufei. Afa Devit enaig esona;

<sup>7</sup> Afa ambangelni amtakwaligim God sa fwahanigim afa gigafenig eba enaig el sa ma suialag augufi.

<sup>8</sup> Afa ambanna amtakwaligim Ainiyag sa mas suwignig mo enaig el eba sa ma suialag augufi. *Sam 32:1,2*

<sup>9</sup> Afa Ju el nihi lofug sa kokohiagig. Atiahog enaig el mungu sonag suialag auguiagba fli me? Amo, sonag suialag auguiag afwambanai el gafa flifi. Eba big Godna mom ati onigig eba enaig esog, "Abraham Godim olug onigina asa God ehem og ne afsug kabag el feg."

<sup>10</sup> Ansi maia God Abrahamim ena moba sihina? Atiaho ehe nihi lofug kwafona? Amo, Abraham nihi lofug kofwag fwainig fiahfenaba asa enanam God ehem sihina og ne afsug el.

<sup>11</sup> Asa sumi yi ehe nihi lofug mo kwafona afa enag eba ofug enanam ehe mas esena mo God ehena olug onigigim mungu nangugum asa og ne afsug el. Afa mungwali el nihi lofug kokohiagig fwainig afa Godim olug oniginigbi asa God ehengelim og na afsug el fig, afa Abraham eba ehengelni simp lofug fenig.

<sup>12</sup> Afa ehe gafa nihi lofug kokohiageg elni simp fenig. Afa ehengel nihi lofug kofwag afa ming gafa ehengelni olug onigig eba bigelni simp Abrahamna minam patalfug. Asa enanam Abraham nihi lofug kofwag feg fwainig gafena.

*Abraham olug onigigba asa Godna sihi fwahag flana*

<sup>13</sup> Afa autunam God Abrahamim enaig esona ne nai yi afa neana simbianigag nupbiagenam asa mungwali bitem ihlafiahgefe. Afa God mas enaig onigig mo Abraham nihe mom patalkug asa ka ehem enag mo sihi fwahag faig. Amo,

Abraham Godim olug onigig fenaba asa God ena nai yi nangunam esog nemba afsug el afa ka nem enag mo sihi fwahag faig.

<sup>14</sup> Afa el fwina onigig asa nihe mo patalkug afa atiaba God enaig elim mo sihi fwahag faigbi asa elni olug onigig eba meg behig afa enag mo sihi fwahag wasneig fwainig feg.

<sup>15</sup> Asa nihe mo ogfug mungwali elbi amtakwalig asa God bigelim olug kakagenugeg. Afa nihe mo higig fwainig feteba eba mas el enam filafiti.

<sup>16</sup> Asa God elni olug onigigim nangugum afa heafna mo sihi fwahag enaig elim faig. Afa Abrahamna simbianigag sa ma ena mom anwenafi eba nufunam feg asa God mungu gafugafegim afa ehengelim esmunagim kwaganig. Afa el sa nihe mom patalfug God eba mango enag elim mungu eseni mo. Amo, el amban Abrahamna olug onigig lofufeg ehe enag mo sihi fwahag faife. Asa Abraham ofenaiba bigelni simbianga fenig.

<sup>17</sup> Afa Godna ginof la God Abrahamim enaig esona, “Ka nem eseg asa haig haig el mungwali bite nai nem sefli kagelni Alag feg.” Afa Godna nof la Abraham ehe bigelni alag feg. Afa Abraham enaig olug onigig feg God sa ma lahag elim ilafoi afa mangwal sa mas gohug mo asa ehe mo behig esog sa apukeg.

<sup>18</sup> Afa God Abrahamim enaig esonag, ne luwal ahfoklafe afa Abraham anwenafena eba mas pugui asa ehe Godna mo sihi fwahagim nufunam olug onigig asa ehe haig haig elni simbianga pugunig. Afa Godna ginof enaig esog, neana simbiangag eba fwina nupbiagefe.

<sup>19</sup> Afa Abraham 100 yia muhla feg afa ehe onigig kana elig mas wasneig mo eba mungwalofug lahag el lofeg afa Sara mas luwal foklai asa heafna olug onigig mas auwiauwig mo eba gwese wasneig go.

<sup>20</sup> Afa ehe Godna mo sihi fwahag flanam afa mas sambaganingi onigig nafena mo. Amo, heafna olug onigig ehem wasneigna afa sa ehe Godim fingi fena.

<sup>21</sup> Afa ehe ati anwenafeg God fwina wasneig nafeg asa mangwal ehe sihi fwahag eba ehe nufunam esefe.

<sup>22</sup> Asa God enaig esog, ehe eba olug onigig el feg asa ehe afsug el feg.

<sup>23</sup> Afa enag moba Godna ginof la go, “ehe afsug el lofeg” eba mas Abrahamim mungu esona mo.

<sup>24</sup> Afa enag mo bigelim gafa fenig asa bigel enaig olug onigig fig God bigelni Ainiyag Sisasim lahag la naim ilafo fatig.

25 Afa bigel amtakwalig el finibi asa ehe Sisasim angoluwag elni ninga la fwahanaba sa lahana. Afa God ehem biteg fenai ihlafatigim nofkenag faig asa big Godna nof la afsug kabag el afohie.

## 5

### *Glauwo big Godna nof la afsug el afohie*

1 Afa bigel Godim olug oniginigbi asa big Godna nof la afsug kabag el fig. Afa bigelni Ainiyag Sisas Kraiss bigim esenigbi asa big God i mungwa ahfeg.

2 Afa bigel Sisasim olug onigig asa bigim lambku Godna esmunagim kwaganig mina fwatig. Afa big ati anwenafig asa big enam nengeafo sumi yi eba big Godna suialag gawig lambifi asa big enam sifakalifi.

3 Afa maia bigim haig haig minafeg pugunibi asa big enam gafa sifakalinife. Asa big anwenafi enam bigim yuhnag asa big numwehe kinig kahli.

4 Afa big enaigba esibi eba bigelni mungwali nihe Godna nofla suialag apukefefe. Afa enaba ogfug suialag gawigim God mo sihi fwahag enaba big lambifi.

5 Afa sa big anwenafi enag mo sihi fwahag eba fug lugug asa God heafna Sungwabug bigim faig afa enag Sungwabug Godna membug bigim ihlafenugeg.

6 Afa maia big wasneig kwefwag bibefim fi fwainig fifinibi asa enanam Kraiss bigim amtakwalig elim lahanig eba suialag osuna God kanog fwahag.

7 Afa big bitenai el mas enaigba esi afsug elimbi lahani. Eba mungu mungug el sa ma enaig onigig fi suialag elim lahanig me.

8 Eba God ogfug ehe bigim fwina membenig afa maia big amtakwalig el afohie fenaba asa Kraiss bigim lahanig.

9 Afa ehena lahag enaig esegba asa big Godna nof la afsug kabag el fig. Afa sa big enam numwehe anwenafi afa ehe nai yi God mas bigim olug kakagenam susug fai.

10 Afa big Godna angoluwag el finibi asa heafna Legna lahagna big God i pese ugweag ahfeg. Afa eba fwina ambala fiahgeg asa Kraiss nofkenagag ati ogfug eba God bigim pese lambife.

11 Eba ena mungwa mo amo big Godim sifakalig esenigbi asa bigelni Ainiyag Sisas Kraiss lahagba asa big God i pese ugweag ahfeg.

*Adam nai yi pigihiag el fig afa Kraiss nai yi nofkenagag el fig*

12 Afa mungu elni nihe la hwa bite la amtakwalig puguiageg afa enag amtakwalig nihe eba lahag upugug. Afa mungwali el amtakwalig esigbi asa mungwali el pigiefug.

13 Afa maia nihe mo gig fwainig fiahfenaba afa enanam amtakwalig hwa bite la ati gofena. Eba God mas el ni mungu mungu amtakwalig suwigi eba nihe mo awaiena.

14 Afa Adam nai yi fenam ikan Moses nai yi pugunaba mungwali el lahagna ahnai skaufini. Afa ehengelni amtakwalig esigbi eba asa Adam esena mas enaig mungwalofug feg mo.

Afa Adam eba Sisasna lasug mo feg asa enag el sum blog.

15 Afa Godna esmunagim kwegfwag i afa Adamna amtakwalig nihe i mas mungwalofug ahfeg mo. Afa mungu el amtakwalig esenaba asa kaksag elim pigig gofena. Afa Godna esmunagim kwegfwag enam gwesim gosenag. Afa mungu el Sisas Kraisa elim esmunagim kwaganigim asa kaksag elim fwina suialafenig.

16 Afa Godna suialag nihe i afa Adamna amtakwalig nihe i ahfegim asa sambaganingi li fug ahpugugim afa alganam ahfeg. Afa Adam amtakwalig mungu esegba asa God ehem kwefihianagenam enaig esog mungwali el eba amtakwalig el fig asa sumi yi God ehengelim mungwag faifi. Afa kaksag amtakwalig nihe puguiagegba asa mungu el lahanigim esmunagim kwaganig asa God enaig esog nengel mungwali afsug el fig.

17 Eba nufunam mungu el amtakwalig esegba asa mungwali el lahagna ahnai skaufini. Afa mungu elni suialag nihe pugugim enam gwesim gosenag. Afa amban el Godna kwania esmunagim kwegfwag flagim asa Godna nof la afsug afohie asa enaig el Kraisa nai yi heafgelni nofkenagagim numwehe lambfiahfu.

18 Eba enaig eseg mungu amtakwalig nihe pugugba asa God mungwali elim sumi yi mungwag faifi. Afa gwenag eseg mungu suialag nihe pugugba asa God heafna elim enaig esonig ne mas haig esig mo afa ehengel nofkenagag flig.

19 Afa mungu el Godna mo flafunaba asa mungwali el amtakwalig el fig. Afa gwenag eseg mungu el Godna mo patalkunaba asa ma mungwali el Godna nof la afsug el fig.

20 Afa nihe mo pugugba asa el enanai yi fwina amtakwalig nihe eseagig. Afa hanai yi sa amtakwalig nihe kwania fego asa Godna esmunagim kwaganig enam fwina gosenag.

21 Afa ilawana amtakwalig nihe wasneinaba asa mungwali el lahagna ahai skaufini. Eba nufunam afa enaig gafa nufunam feg. Afa glau Godna esmunagim kwaganig wasneigo afa bigelni Ainiyag Sisas Kraisa gafugag elim esenigbi asa



Godna el heafna nof la afsug figim asa ehengel wahkig nofkenagag flig.

## 6

*Bigelni autunai sawieg Kraiss i big ahlahawagig afa Kraiss nai yi big nofkenagag go*

<sup>1</sup> Haig onigig big fig? Sa big amtakwalig niheba eseafufi asa God bigim esmunagim kwaganig fwina kwania fiahgei?

<sup>2</sup> Amo, mas big enaigba esi. Afa ati big Kraiss i ahlahag asa big mas amtakwalig nihem ahnai skaufini. Asa nofeka afohienam amtakwalig nihem esiafufum.

<sup>3</sup> Ka onigig ati ne enam anwenafig? Bigelni bu la apaiyeg eba ogfug bigel Sisass Kraiss nai yi afohie asa big ehe i ahlahawagig.

<sup>4</sup> Afa big bu la apaiyegba enaba enaig esig big Kraiss i ahlahawagigba asa bigim biteg kife la kumotigig. Afa Alagna kigmog suialagna Kraissim lahag la nai ilafofatigba asa big gafa mulug nofkenagag mina la afohie.

<sup>5</sup> Atiaba big mungwa Kraiss i siahfeg ahlahawagigba asa big pese ahbuihia asa gwenaig ehe eseg.

<sup>6</sup> Afa big enam anwenafig, bigelni autunai sawieg li katigeg la Kraiss i ahlahawagig. Asa enag autunai sawieg mas wasneig mo asa big mas amtakwalig nihena gafugag el fig mo.

<sup>7</sup> Asa amban el sa lahag enaig el mas amtakwalig nihena wasneigim ahnai skaufeg mo.

<sup>8</sup> Afa big Kraiss i ahlahawagigba afa big enaig olug onigig fig afa eba ati ehe i ahgofufe.

<sup>9</sup> Afa big anwenafig Kraiss lahagim pese buihia afa ehe mas pese lahai asa ehe mas lahagna nihem ahnai skaufeg mo.

<sup>10</sup> Afa Kraiss mungunagim lahagim afa enagba mungwali amtakwalig nihem filafatigba asa gwese wahkig go. Afa heafna nofkenagagba ehe Godim esena go.

<sup>11</sup> Asa ne gwenaig onigig fi ne ati lahag asa ne mas amtakwalig nihem ahnai skaufenai. Eba Sisass Kraiss nai yi ne nofkena goba asa ne Godim esena go.

<sup>12</sup> Afa bigelni elig eba mwakwalig gohug afa ese nengelni elig amtakwalig nihem patalkufe asa ne eligni amtakwalig sawiegim ne eseg.

<sup>13</sup> Afa nofeka nimbeafna elig mungu fwahaiba sa ma ikai amtakwaligim ahnai skaufenai afa amtakwalig nihe esegim. Amo, ne nimbefum sa Godim mungwal faiye ofenai lahag el pese nofkenagag flag. Afa sa ne nimbeafna mungwali elig Godim ahnai skaufenai asa suialag nihe eseg.

14 Afa ese amtakwalig nihe nem gosenafe. Eba mas ne Mosesna nihe mo ahnai skaufenai amo eba ne Godna esmunagim kwaganig la ahnai skaufenafe.

*Bigel suialag nihena esug gafugag el fig*

15 Afa big mas nihe mom ahnaig skaufini eba God bigim esmunagim kwaganig. Haig big fig? Sa big amtakwalig niheba eseafufi me? Amo, big mas enaig esi.

16 Ka onigig ati ne enam anwenafig, afa maia ne enaig esog kaba neana esug gafugag el fefe asa ne enag elni mom patalkug. Afa sa ne amban el ne higinam patalkuiba eba ati ne ehena esug gafugag el feg. Atiaba ne amtakwalig nihena esug gafugag el feg eba ne amtakwalig mina ikafe nem lahag pugunafe. Afa atiaba ne Godim higinam patalkug eba ne afsug nofkenagag flafe.

17 Afa autunam ne amtakwalig nihena esug gafugag el fini. Afa nimbeafna mungwali onigigna nufunam mo nem faigogba afa ne fligim patalfug. Asa big enam Godim suialag oni.

18 Afa God nem amtakwalig nihe nai pigi fwatigba asa ne suialag nihena esug gafugag el fig.

19 Afa neana anwenag weti feg asa enaig mo ka bite nai lasug mo sihig. Eba nufunam autunam ne nimbeafna eligim nufwef nihe la fwahanam afa haig haig amtakwalig nihe la eseakafenaba asa ne ena nai yi esug gafugag el fini. Asa glauwa gafa sa ne gwenaig esi nimbeafna eligim sa suialag nihe la ahnai skaufinim asa afsug kabag afohiefim.

20 Afa maia ne amtakwalig nihena esug gafugag el afohi-afenaba enanam suialag nihe mas nem kehlana mo.

21 Afa autunai nihe asa ne esini eba nem afwanefug faig afa enaba mas ne mango flini mo. Afa enaig nihe eba lahag mina feg.

22 Afa glau God nem amtakwalig nihe nai pigi fwatigba asa ne Godna esug gafugag el fig. Afa enaba ne afsug kabag nofkenagag flig asa ne wahkig nofkenagag mina la afohie.

23 Afa amtakwalig nihe eba mungwag bigim lahag faig. Afa Godna esmunagim bigim kwaganig eba wahkig nofkenagag feg. Enaba bigelni Ainiyag Sisas Krai nai yi go.

## 7

*Angwafig afa heafna alagag lasug mo*

1 Afa nilite, nengel ati ne nihem anwenafig. Sa hig, eba nofkena elim nihe mo kike lambku. Afa melig pigieg elim eba mas kike labgufi.

2 Afa ka nem lasug mo osihin, afa nihe mo enaig esog alagag nofkenagafiba heafna angwag sa ma ehi ahgofi. Afa

maia lahaḡba eba ena nihe mo mas ena angwafigim kehlag mo.

<sup>3</sup> Afa alagag nofkenagofiba asa angwafig ming saglag la ikafe enaig angwafig eba mina angwafig. Afa heafna alagag lahaḡba eba ehe mas nihe mom ahnai skau fenai. Afa ehe ming saglag la ikaḡba ehe mas amtakwalig nihe feg mo.

<sup>4</sup> O nilite, neba gwenaiḡ fig. Afa neagafa Kraisi i ahfegim ahlakawagig asa ne mas nihe mo ahnai skaufenig mo. Afa God Sisasim biteḡ kife nai ilafo lasug asa ne ehena feg asa big Godna suialag gafugagim esigbi asa fug lugug.

<sup>5</sup> Afa maia big eligni amtakwalig sawiegim ahnai skaufeba afa nihe mo bigelni elig nai yi amtakwalig nihem fuḡlakukug asa bigelni gafugag eba lahaḡim upugug.

<sup>6</sup> Afa mangwal sa bigim kike lambugu glau ehe mas bigim enaig esenig mo. Afa big lahaḡ asa mas nihe mo ahnai skaufeg mo. Asa big mas nihe mom Moses ginofegim patalfug mo asa Godna gafugag esigim. Eba autunai mina afa glaunai minaba big fligim asa Godna Sungwabugim patalfug.

*Nihe mona gafugagba afa amtakwalig nihe i*

<sup>7</sup> Atiaho sa big enaig esogoi nihe mo eba amtakwalig nihe me? Amo, big mas enaig esogoi. Afa nihe mo kam ogfunag amtakwalig nihe eba mango maia. Afa nihe mo esog fwainigba nofeka mingnag elni mangwal gawigim membenim eseagi. Afa eba mas ka enam ambala anwenafi enaba eba amtakwalig nihe feg.

<sup>8</sup> Afa ka enag nihe mo onigigim afa ena mina gam amtakwalig nihe kam haig haig onigigim fingi fenagba asa ka elni gawigim membenig. Afa nihe mo fwainigba amtakwalig nihe eba wasneig fwainig.

<sup>9</sup> Afa autunam ka mas nihe mom anwenafena mo asa ka og, kaba suialag nofkenagag el feg. Afa maia nihe mo pugugba asa amtakwalig nihe wasneigni feg.

<sup>10</sup> Afa maia amtakwalig nihe gohugba asa kam lahaḡ. Afa nihe mo membenag nofkenagag faig afa enag nihe mo kam esenagba asa kam lahaḡ pugug.

<sup>11</sup> Afa ka ambala ati anwenafeg Mosesna nihe mo enaig esog nofeka enaig ese afa amtakwalig nihe ena flagim asa enana kam mwakwalenag. Afa enag mina gam amtakwalig nihe kam tigeḡfatig.

<sup>12</sup> Asa nihe mo eba afsug kabag feg afa ehena mo eba afsug kabag feg afa sufniag feg afa suialag feg.

<sup>13</sup> Haigsegba, atiaho enag suialag nihe mo kam tigifatih. Amo, eba awai. Afa amtakwalig nihe enag suialag nihe mo flagim asa enaig eseg. Afa enaba amtakwalig nihem ambala

ogfug. Afa nihe mo amtakwalig nihem esenagba asa enag fwina amtakwaliageg.

*Amtakwalig nihe ka oksigim ka pese eseg*

<sup>14</sup>Ati big anwenafig Godna nihe mo eba Godna Sungwabug yi nai blog. Eba ka bite nai el asa ka amtakwalig nihem ahnai skaufenag.

<sup>15</sup>Afa ka mas enam anwenafeg mo asa ka eseg. Afa mangwal koka ese eba mas ka enam esei. Afa nihe sa ka oksig eba enam ka eseg.

<sup>16</sup>Afa mangwal sa ka oksig asa ka eseg enaba ogfug ka enaig esog nihe mo eba suialag feg.

<sup>17</sup>Asa kike enaig ese mo eba amtakwalig nihe ka nai yi go enag ehe eseg.

<sup>18</sup>Afa ka anwenafig suialag nihe mas kana eligni sawieg la sefu go mo. Afa koka suialag nihe ese eba ka haig ese mo.

<sup>19</sup>Afa suialag nihe koka ese ka mas eseg mo. Afa amtakwalig nihe ka oksig enaba ka eseg.

<sup>20</sup>Afa nihem sa ka oksig asa enam ka eseg afa enaba ogfug eba kike enaig ese mo eba amtakwalig nihe ka nai yi go enag ehe eseg.

<sup>21</sup>Asa ka anwenafeg enaig onigig eba nufunam feg. Afa maia koka suialag nihe ese afa sa amtakwalig nihe muhla go enag kam huguflaukug.

<sup>22</sup>Afa kana olug onigig Godna nihe mom sifakalenag.

<sup>23</sup>Afa ka anwenafeg ming amtakwalig onigig kana elig nai yi go. Afa enag elig yi nai onigig i afa olug yi nai onigig i ahoflago. Afa amtakwalig onigig kana elig yi gafugafego asa enag kam fwina kikegu.

<sup>24</sup>O kasambam, enag eligni sawieg ona kam tigeftati. Afa amban sa enam pigifatife.

<sup>25</sup>Afa ka Godim suialag onag asa bigelni Ainiyag Sisas KraiS nai yi ehe enaig eseg.

Asa ka enaig goheg. Kana onigig Godna nihe mom ahnai skaufegba afa ka patalkug. Afa kana elig amtakwalig nihem ahnai skaufegim afa enam patalkug.

## 8

*Godna Sungwabug bigim kwaganig*

<sup>1</sup>Asa glanuwaba mungwali el KraiS Sisas nai yi afohie eba God ehengelim mas kufeni.

<sup>2</sup>Eba Godna Sungwabugni nihe mo bigim esenigbi asa big KraiS Sisas nai yi gaba afohiegim sa big nufuna nofkenagag flig asa ka mas amtakwalig nihe mi afa laha mi ahnai skau fenag mo.

<sup>3</sup> Afa elni onigig mas wasneig feg mo asa Mosesna nihe mo mas ihlafeg mo amtakwalig nihem fingi fatiagim. Asa God heafna Legim ningihiana. Heafna Legna eligni sawieg eba gwenai amtakwalig elni sawieg lofug fenam afa ehe mas amtakwaligim esena mo. Afa ehe elni amtakwaligim awaie fatiagim eba asa hefum lahana.

<sup>4</sup> Afa God enaig esena asa big eligni sawiegim fwahinim afa Godna Sungwabugim patalfu. Afa suialag nihem asa nihe mo esog sa ne enam esi sa ma enag big nai yi nufunam pugui.

<sup>5</sup> Afa ambangel sa eligni sawiegim patalfug eba heafgelni sawieg onigigim gwese lugwa. Afa ambangel Godna Sungwabugim patalfug eba Sungwabugni sawieg onigigim gwese lugwa.

<sup>6</sup> Asa el autunai eligni sawiegim onigafu asa enaig elim eba lahag pugunfi. Afa el sa heafgelni onigigim Godna Sungwabugim ahnai skaufinig asa enaig elbi nufunam nofkenagag i afa olug enesieg i flafe.

<sup>7</sup> Eba autunai eligni sawieg Godim angoluweg fenag. Afa enag mas Godna nihe mom ahnai skaufeg mo. Afa eba nufunam enag sawieg mas ihlafe ena mom patalkuiagim.

<sup>8</sup> Afa el autunai eligni sawiegim patalkug enag el eba mas Godim sifakalig fai.

<sup>9</sup> Eba nengel mas autunai eligni sawiegim ahnai skaufig mo. Amo, Godna Sungwabug nengel nai yi go asa nengel Sungwabugim ahnai skaufinig. Afa amban el Kraisna Sungwabugni feg fwainigba eba mas Kraisna el feg mo.

<sup>10</sup> Afa amtakwalig nihe goba asa nengelni eligim pigiego. Afa Krais ne nai yi go asa God enaig esog neba afsug el fig asa nengelni sungwabug nofkenag afohie.

<sup>11</sup> Afa God Sisasim biteg kifenai ilafofatigba afa sa Godna Sungwabug nengel nai yi go. Enaba nufunam fegba asa gwenag God enaig esenifie asa sumi yi nengelni elig pigiegim afa sa ehe enag Sungwabugni nengelim pese ilafofatife.

<sup>12</sup> Afa nilite, God bigim awamonigim asa big heafna Sungwabugni sawiegim patalfug. Afa nofeka eligni amtakwalig sawiegim patalfu eba mas big ehena kwegfwag flig mo.

<sup>13</sup> Afa ne enaba patalkuiba eba nem suwia mina gam huguflaku. Afa ne Godna Sungwabugni eliginai amtakwalig nihem tigeftiagba eba ne nufunam nofkenag gofe.

<sup>14</sup> Afa amban el Godna Sungwabug ahnai skaufeg eba Godna luwalig fiahsaieg.

<sup>15</sup> Afa mango ne enaig Sungwabug flig mo asa nem pese esenigbi asa ne esug gafugag el fig afa ne embefig. Amo, ne enag Sungwabug fligbi asa nem esenigbi sa ne luwalig fig asa big Godim esonig, "Api ne kana Alag."

16 Afa Godna Sungwabug i afa bigna sungwabug i sihiag ahfego afa Godna Sungwabug enaig esog eba nufunam big Godna luwalig fig.

17 Afa big Godna luwalig figbi eba heafna suialag gawig sa luwalim fwahanig asa big enag lambifi. Afa mangwal God Kraism sa faig eba big gafa gwenaig flifi. Afa Kraism susug flag asa bigel gafa susug flig asa God Kraism fingi fukug asa bigim gafa fingi fukufe.

*Autunai la God bigim suialafehiagefe*

18 Afa ka enaig onigig feg eba big anwenafig mangwal suialag nemug God sa bigim esenifi. Afa maia ka enag suialagim onigigba asa susug bigim glau gohunig eba kana onigig la wetiti feg.

19 Afa mangwal mungwali God sa eseageg eba enag afigigiafo maia God heafna luwaligim ambala upugunibi.

20 Afa autunam Adam amtakwalig nihe esenaba asa God mungwali bite nai gawigim enaig esonig sonaig gafugagba esug eseafu. Afa bite nai gawig mas enaig esih mo eba Godna sawieg enaig sa pugufe. Asa God afigigego,

21 autunai la bite nai gawig nogiag nihe mi afa fwina nugwakale goka mi pigifwatiba asa eba fwina suialag afohiefe ofenaiba Godna luwalig.

22 Afa big anwenafig mungwali bite nai gawig sa eyiogog ofenaiba angwafig luwalim foklagim onigis ikag glawaga gwesego.

23 Mango enaig mungwa mo afa big gafa gwenaig esig. Afa ati big Godna Sungwabug flig asa big anwenafig sumi yi big ehena mingnag suialag gawig lambifi. Asa big gafa ol megam eyiogogim afa afigigiafo ehe bigelni eligim mulug esinifi afa enag ogfug ehe bontag luwal lofugim lambife.

24 Afa maia God bigim pese lambigba afa big onigigim afa nengeafu asa ehe enag gafugag suialag nemug fiahgefe. Afa maia big mangwal sa enaig fligbi afa big mas pese enam nengeafufi. Afa el sa flag ehe mas enam nengefofi.

25 Afa big ati anwenafig mangwal big mas flig mo asa big enam nengigim nengeafu.

26 Afa ming gafa gwenaig feg maia big wasneig fwainig figbi asa Godna Sungwabug bigim kwaganig. Afa big mas betenna suialag minam anwenafig mo asa Sungwabug ehe Godim sahnag sa ehe bigim kwaganife afa mona mas ihlafeg mo asa ehe ol megam eyiogim Godim sihinag.

27 Afa God elni olugim ati fahigeageg afa ati anwenafeg Sungwabug mangwalim esog asa ehe Godna afsug el gohugum afa Godim wasneig mo sihinag eba Godna sawieg mungwalofug feg.

28 Afa big anwenafig mungwali mangwal pugufeg God enam eseageg asa el ehem membenig ma sa ehengelim suialafeni. God ehengelim awamonug asa ehe heafna sawiegim patalfug.

29 Afa autunam God ati anwenafeg amban el heafna el pugufe afa ehengelim kanog fwatig asa heafna Leg lofug fi asa heafna Leg eba kaksag nilitem eteg finig.

30 Asa ambangelim God ati wefug fwatig afa ehengelim gafa awamonug. Afa ambangelim God enaig esinig eba enag el gafa heafna nof la afsug fenig. Afa ambangelim enaig afohie eba God ehengelim gafa heafna kwania unehlag faig.

*Godna membugim mas mangwal kagfui*

31 Afa sa big sonaigimba haigsi onigifi? Afa God ehe bigim kwaganigba feg asa el mas bigim haise pigi lamb apaiyeg mo.

32 Afa God mas heafna Legim fwina kehlana mo amo eba ehe bigim ningihianigba asa mungwali elim lahanig. Asa ehe bigim mungwali gawigim gafa esug faifi.

33 Afa amban el sa Godna elim kufnig mo? Amo, eba God ehe ehengelim enaig esonig ne afsug el fig.

34 Afa amban el sa enaig esofe eba God sa nem suwi kembang gam ningihiafe? Amo, eba awai. Afa Krai Sis ehe bigim lahanigbi afa mangwal ena mungwa mo eba ehe pese buhiagim nofkenago afa ehe sisi fegim afa God i ahfeg. Asa ehe bigim kwaganigim Godim fwina sahnag.

35 Asa Kraisna onigig bigel nai yi lugwa enam mas mangwal kagfui. Afa big kinig fli me, susug kahli me, afa el bigim haig hiag sehiagi me, afa bini me, kig awai me, mangwal amtakwalig bigim fehiagi me, afa hagfenam asa pigiafena bigim puguni me, afa enaig eba mas Kraisna membugim kagfui.

36 Eba gwenaig Godna ginof esog;  
Afa kagel neana el fig asa el wahkig kam ona kwagaitifi.  
Afa el ona kam enaig esehiagi asa ofenaiba el sipsipim  
kwaskofafifi. *Sam 44:22*

37 Afa el sa bigim fwina membenig ehe bigim kwaganig asa big enag haig haig kinigim ati filafig.

38 Afa ka ati anwenafeg mas mangwal Godna membugim bigim kagfuni. Afa lahaig me afa nofkenagag me afa oflanai el afa sanel afa aisil afa mangwal glaunai afa mangwal sumi nai,

39 afa mangwal sisi yi gohug afa mangwal bite la skau gohug afa mungwali mangwal God eseagegba asa big Ainiyag Sis Krai i ahogo, asa enag mungwali gawig Godna membugim bigim mas kagfuni. Afa Kraisna gafugag bigim enag membug ogfunig.

## 9

*God afa Israel la nai el*

<sup>1</sup> Kaba Kraisna el asa kana mo nufunam feg afa ka mas mwakwale afa Godna Sungwabug gafa kana onigigim sihinag ka mas mwakwale.

<sup>2</sup> Afa ka kikeafgel nai elim fwina kusgunigim afa kana olug gwese fwina kinig gofufe.

<sup>3</sup> Afa koka kikeafna nilitem Israel la nai elni kug la gohonam sa kwagan. Asa God ka kefim amtakwalig la nai fwahag afa ka mas Krais nai yi go mo. Afa enag mas pugui.

<sup>4</sup> Afa ehengel eba Israel la nai el afa God ehengelim enaig onigig fenig kana luwalig asa heafna kwania unehlag ehengelim faig. Afa God mo sihi kike fwahag ehengelim faigim afa nihe mo ehengelni ninga la fwahag. Afa ehengel ati anwenafig Godim fingi fig minam afa Godna sihi fwahagim flig.

<sup>5</sup> Afa ehengelni simbianigagna unehlagba kwania feg afa Krais eba ena simbianigag la nai afa ehe God fegim asa mungwali gawigim sisi yi fenig. Asa el ehem wahkig fingi fufum. Eba nufunam.

<sup>6</sup> Afa ka mas enaig esoi Godna mo sihi fwahag tige fu peg. Amo, eba mungwali Israel la nai el mas enanai saiye Godna el afohie mo.

<sup>7</sup> Afa mungwali Abrahamna simbiangag mas Godna luwalig fig mo. Amo, God enaig Abrahamim esona og, “Neana nufunam simbiangag Aisak nai yi puguiagefe.”

<sup>8</sup> Asa enaig moba ogfug Abrahamna mungwali simbiangag mas Godna luwalig fig mo eba ambangel el Godna mo sihi fwahagna luwalig fig eba naho Abrahamna nufunam simbiangag fig.

<sup>9</sup> Afa Godna mo sihi fwahag eba enaig esog God og, “Ming yia ka pese bloiba afa Sara luwal ati wanigefe.”

<sup>10</sup> Afa mangwal ena mungwa mo Rebekana sambaga luwal ahgofe eba mungu Alagna feg asa eba bigelni simbianga Aisak.

<sup>11-12</sup> Afa afag maisim foklagwagig fwainig fiahfenaba afa ehenigi mas suialag nihe afa amtakwalig nihe ahfe fwainig. God ati kwefihiage fwahana asa ehe ona mungum kanog fwaha asa ehe Rebekam esona, “Eba eteg suminigim ahnai skaufenafe.” Afa ehe enaig esog asa heafna sawieg wasneig gofi afa ehe elni gafugagim mas oniginam enaig ese amo, ehe heafna onigigim mungu patalkuna.

<sup>13</sup> Afa ming ginof enaig esog, “Ka Isoim mo fwahagim afa Jekopim mo ka membenag.”



14 Haig sa big esogofe? Atiaho God mas suialag kwefihiag el feg mo? Amo, eba awai.

15 Asa ehe Mosesim enaig esog;  
Afa ambanim sa koka aflafena eba ka ehem aflafenafe afa  
ambanim koka suialafena eba ka ehem suialafenag.

*Kis 33:19*

16 Asa enaig mas elni onigig mi afa gafugag mi patalkui.  
Afa Godna k wefihiage fwahag eba heafna aflafegim  
patalkug.

17 Afa Godna mo enaig goheg God autunam Isip nai misog  
elim enaig esona, “Afa ka nem misog el fwahagba asa  
mungwali el kana kigmogim nangui afa sa mungwali bite  
nai el kana unehlagim anwenafi.”

18 Asa eba enaig eseg ambanim God ona aflafena eba ehem  
aflafenag afa God ambanim ona angug nihlinage eba ehe  
esenafe.

19 Afa ka enaig onigig feg ne kam ogra enaig sahna fena,  
“Afa atiaba enag nufunam fegba haigsegba God elim esog ne  
amtakwalig nihena feg? Afa amban mas Godna sawiegim  
fingi fati?”

20 Ne mangig el maia? Ne atiaho enaig eseg asa ne Godim  
pese esonag? Afa el sob efigba asa mas enag sob elim esonag  
og, “Haigsegba ne kam hwaieig efeg?”

21 Afa el sob efigim sa ma heafna membugum patalkui.  
Afa ehe mungu liginai sambaga sob efwagigim asa ming eba  
suialag gafugagna maunum afa mingba nahasna maunum.

22 Afa mangwal God eseg eba gwenai. Afa ehe ona  
tonbusug elim olug kakagim asa heafna kigmog ofgun. Afa  
enag elim ehe sa olug kakagenigim afa ehe ehengelim ati  
numwehenuge fwahag amtakwale klaitiag fligim asa God  
ogma enag elim olug waikafenam asa ehe maisim asa mas  
ikagna eseg mo.

23 Afa ehe enaig eseg asa ehe ogra heafna suialag gawigim  
ogfun eba suialag nemug feg afa elim sa ehe aflafenig afa  
enag elim ati numwehenuge fwahag heafna suialag gawig  
la saiey afohiegim.

24 Asa God bigim gafa awamonig afa mingnag el Ju nai fig  
afa mingnag el afwambanai fig enam bigim awamonig asa  
mungwali el ehem fingi fig.

25 Afa Godna mo fla sihiaule el Hoseana buk la God  
gwenai esog og;

Afa el kana fig fwainigba,  
eba ka ehengelim esonife kana el fig.

Afa haig el sa goka sa ka mas membenig mo

ka ehengelim enaig esonife eba kikeafna nemug fig. *Hos*

26 Afa hanai yi sa ka esona ne mas kana el fig mo,  
 afa gwenanai yi ka nengelim esonifi ne God nofkenagagna  
 luwal fig. *Hos 1:10*

27 Afa Aisaia Israel elim oniginim afa enaig esog;  
 Atiaba Israel la nai el enaig pugu ofefiba ofenaiba bu la nai  
 angig sa mas big suwigi eba mingnagim mungu Godba  
 lambfe.

28 Asa Ainiyag ikagna bitenai mungwali elim fwina kwefihi-  
 agefe. *Ais*  
*10:22,23*

29 Afa ming mo autunam Aisaia sa sihina eba gwenaig feg afa  
 ehe og;

Afa atiaba fwina wasneig Ainiyag bigelni mingnag simbian-  
 igam fwati fwainigba eba mas big afohiete. Afa ehe  
 fwatieg fwainigba eba ehe bigim mungwali amtak-  
 wale klaitife asa mungwalofug Sodom mi afa Gomora  
 kembang mi sa eseni. *Ais 1:9*

*Afa Israel el mas Godna suialag mo numwehe flini mo*

30 Haig sa big esogofe? Afa afwambanai el mas enaig  
 onigig fi sa ka Godna nof la afsug el afo. Eba ehengel olug  
 onigigbi asa God ehengelim esenigbi asa ehengel Godna nof  
 la afsug fifi.

31 Afa Israel el enaig onigig fini og ka sa Godna nof la afsug  
 el afo asa ehengel fwina wasnini nihe mo patalfuiagim eba  
 mas enaig el fini mo.

32 Haigsegba asa enaig esini? Enaba enaig eseg Israel el  
 mas olug onigini mo afa ehengelni onigig enaig eseg kawo  
 wasneig gafugafinim asa ka afsug el fi. Afa maia el enaig  
 sihifini og Sisas mungu elim pese lambig asa ehengel enam  
 moanagig afa enag ofenaiba fun ehengelim molkeg fetifeg.

33 Afa Godna ginof enam enaig esog;  
 Sa nangu, ka Saion kembang la fun faka fwahag  
 asa enag elim molkeg fetife gofufiba asa ehengel apaiye fife.  
 Afa ambangel ehem olug oniginibi eba mas afwanfi. *Ais*  
*8:14, 28:16*

## 10

1 Kana nilite, ka Ju elim fwina oniginigim asa ka Godim  
 enaig sahnafeg sa ma ehengelim pese lambi.

2 Afa ka ehengelim ati anwenafenigim na sa ka esog eheng-  
 el fwina membig Godna gafugagim esigimba afa ehengel  
 ena minam mas numwehe anwenafig mo.

3 Afa ehengel mas anwenafig haig mina God elim esegba  
 asa heafna nof la afsug feg. Afa ehengel mas Godna suialag

mina patalfug mo eba ehengel membig afsug figim heafgelni minam patalfug.

<sup>4</sup> Afa Kraisi nihe mona gafugagim tigeftakag asa amban ehem olug oniginig ehengel Godna nof la afsug fig.

<sup>5</sup> Afa Moses enaig ginof feg el membig nihe mo sa ma kam esenibi ka sa Godna nof la afsug finim asa wahkig mungwali nihe mo patalfuafi.

<sup>6</sup> Eba el membig olug onigig sa ma kam esenibi ka sa Godna nof la afsug finim afa heafgelni onigig eba autunai ginofi mungwalof ahfeg ena mo og, “Nofeka nimbefum enaig eso amban sa heven gam fukokanam (asa Kraisiimba wanipe blufe)?

<sup>7</sup> Afa nofeka enaig eso amban sa bite megam pekafe (asa Kraisiimba suguflanam biteg kife nai fuku wani blufe)?”

<sup>8</sup> Afa autunai ginof enaig esog, “Godna mo eba nem muhla fenagim asa neana mengig la gohug afa olug yi gohug.” Afa kagel ena mo sihigonig giáfuba asa ne olug onigigim Godna nof la afsug fi.

<sup>9</sup> Afa atiaba neana mengig la sa ne enaig esofe, “Sisas eba Ainiyag”, afa neana olug enaig onigig feba God ehem lahag la nai ilafofatig asa God nem pese lambife.

<sup>10</sup> Afa olugni sa big Godim olug onigig asa big Godna nof la afsug bi fig. Afa mengigna sa big enag onigigim sihigbi asa God bigim lambig.

<sup>11</sup> Asa Godna ginof enaig esog, “Afa ambangel ehem olug oniginibi eba mas afwanfi.”

<sup>12</sup> Asa Ju el i afa afwambanai el i mas algana fig mo. Afa Ainiyag eba mungu mungwali fenig afa ambangel ehem unenigbi asa ehengelim fwina suialafiahgeg.

<sup>13</sup> Afa amban el Godim Ainiyagna unehlag la unenafe asa ehem flafe. *Jol 2:32*

<sup>14</sup> Afa ehengel Ainiyagim olug onigig fwainigba asa ehengelim kwaganig haig uni ehem fini fi? Afa ehengel mo higig fwainigba haigse sa ehem olug onigini fi? Afa el mas ena mo sihia fwainigba haigse sa ena moba higi fi?

<sup>15</sup> Afa Godna mo sihiaule elim ningitigig fwainigba eba sa moba haig ika minefefe? Afa Godna buk la enaig esog, “Afa enanam el sa Godna suialag mo ubluna eba suialag nemug.”

<sup>16</sup> Afa mingnag el eba ena suialag mom oksini. Afa Aisaia ehe enaig esog, “Ainiyag, el mas kagelni mo flagonig mo.”

<sup>17</sup> Afa olug onigig eba ena mo higig la nai pugug. Afa maia Kraisna mo sihibi asa ma enag mo higi.

<sup>18</sup> Afa ka enaig sahna atiame ehengel ena mo higi fwainig? Amo, eba ati higig afa Godna buk la esog; Afa mo sihiag elni mengig mungwali bite gam ikaminefeg

afa ehengelni mo ikag bite muhiag la pugua minefeg. *Sam*

*19:4*

<sup>19</sup> Afa ka pese sahih atiaho Israel la nai elbi anwenafig? Ei ati anwenafig. Afa glauwana God Mosesim enaig sihifena; Ka sangwal minaim lambinam suialafiaheba asa nengel ehengelim ambobug fegonifi.

Afa ka anwena fwainig el nai yi esenibi asa nengel olug kakage gonifi. *Lo 32:21*

<sup>20</sup> Afa sumi yi Aisaia Godna mom wasneigni enaig esona;

Afa el kam mas yisigi mo asa ehengel ati kam nangug.

Afa el sa kam nanguigim mas sahih mo asa ka ehengelim ambala pugunig. *Ais 65:1*

<sup>21</sup> Afa God Israel la nai elim onigig asa enaig esog;

Afa mo filafigim afa tonbusug el fig asa ka mungwali osuna ka numweheagegim go ehengelim kwaganigim. *Ais 65:2*

## 11

*Afa God mingnag Israel la nai elim kanog fwatig*

<sup>1</sup> Asa ka nem enaig sahfenig, atiame God heafna Ju elim masig fatig me? Amo, eba awai. Afa kaga Ju el, Abrahamna simbianiga feg, afa Benjaminna ehengenai feg.

<sup>2</sup> Afa autunam God enaig esona ehengel kana el fig afa ehe mas masig fatinig mo. Sa ne pese onigim Godna ginof mo enaig eseg Elaija Israel elim sehtiginam asa Godim enaig sihifena og,

<sup>3</sup> “Ainiyag, ehengel neana mo fli sihiafule elim kwaskofinig afa neana sis tuhlug faig sime bamboitifig. Asa ka mungu goba sa ehengel kam ogra tigifati.”

<sup>4</sup> Afa God ehem haig esona? Ehe enaig og, “Ne mas nembe fwai mo fe mo, ka ati feg 7,000 el mas mwakwal God Balim mongkokni kwakwagini mo.”

<sup>5</sup> Afa glauwa gafa gwenaig feg God mungu mungu elim esug kwaganigim afa kanog fwatig asa ehengel heafna el fig.

<sup>6</sup> Sa hig, mango God ehengelni gafugagim onigin mo asa ehe ehengelim kanog fwatig, amo eba ehe ogra esmunagim kwaganim asa eseg. Afa sa ehengelni gafugag hefum kwaganigteba asa Godna esmunagim kwaganig eba esug feg.

<sup>7</sup> Haiseg? Afa Ju el wasneig gafugafig ogra Godna nof la afsug apuke eba ehengel mas enaig fig mo. Afa ehengel nai mingnagim God kanog fwatig asa ehengel afsug el fig. Afa mungwali mingnag Ju el Godna unem patalfuiagim angug nihliagig.

<sup>8</sup> Afa Godna ginof enaig esog;

Afa God ehengelim esenigbi asa ehengelni onigig kinieskofegba asa glawaga ehengelni nofug mas nangui afa angug mas higi. *Lo 29:4, Ais 29:10*

<sup>9</sup> Afa Devit enaig elni mo enaig sihifeg og;

Afa ehengel enaig onigi fig ka suialag el fig. Sa ma ehengelni buyis enaig pugufe tata bume lofug afa auwula lofug asa ehengel enanai yi apaiye afa mungwag susug flifi.

<sup>10</sup> Asa ma ehengelni nofug kulufeskofegba asa ehengel mas nangui afa kinigni wahkig kahligim fifsafeagiaska. *Sam 69:22,23*

### *God afwambanai elim lambig*

<sup>11</sup> Afa ka nem pese enaig sahini fenig atiaho Ju elbi musiapugug fiahgigim asa ati apaiyeg? Amo, eba awai. Afa Ju el Kraiswa mom masig fwatinibi asa God afwambanai elim lambigo. Afa God enaig esegba asa Ju el enaig esogog haigsegba hiau fligba kam mo awaienig.

<sup>12</sup> Afa Ju el enag amtakwalig esig afa enag maia esegba asa Godna suialag gawig mungwali bite nai elim pugunug. Afa Ju el tige fu apaiyeg afa enag maia esegba asa afwambanai el Godna suialag gawigim flig. Afa maia Ju el God nagum pese afugba big anwenafig Godna suialag gawig eba mungwanam kukag.

<sup>13</sup> Afa ne afwambanai el sa hig. Ne anwenafig kaba kanog fwahag el asa God kam afwambanai el nagum ningihiag. Afa ka onigig enag gafugag eba goseg asa ka enam sifakalenag esegim.

<sup>14</sup> Eba ka membeg kiafna mungwa usmunai enag gafugagim nangunim asa ambobug fegonig. Afa enaig minaba ehengel sa ma pese Godim yisgibi asa God mingnagim lambi.

<sup>15</sup> Afa maia God Ju elim fwatigba eba sa bite nai el God i pese ugweag ahfeg. Afa maia God Ju elim pese lambiba eba ofenai melig pigieg el pese nofkenagag flig.

<sup>16</sup> Afa el goflana amba koflag Godim faibi asa mungwali amba gafa eba Godna feg. Afa el li bagag Godim faigbi asa li kagag gafa eba Godna feg.

<sup>17</sup> Afa Israel el ofenaiba aso nai oliv li fig afa afwambanai el ofenaiba sangwali nai oliv li. Afa sa God aso nai oliv li kagag tutogim asa sangwali nai oliv li kagag lambkugum enana sigag la tutufe fwatiba asa ehengel ehena suialag bug flig.

<sup>18</sup> Afa enag aso nai li kagagim God sa tuto fwatigba nofeka enam pigi lambpaigo. Afa nofeka tonbusiagi. Afa ne mas li mogim kwefui eba ena li mog nem kwefug.

<sup>19</sup> Afa ne enaig esoi me, "Afa God ehengelim tutog klaitigba asa kagel ehengelni sigag la afohieg."

20 Afa enaba nufunam. Afa eba ehengel mas olug onigig mo asa God enaig esenig. Afa ne olug onigigbi asa God ati nem tutufe fwatigba asa ne gwese afohie. Asa nofeka tonbusiagi afa sa ne embefi masa God nem gafa enaig esenifi.

21 Afa God Ju elim enaig esinig ofenaiba aso nai oliv li kagagim tuto klaitig. Afa atiaba ehe aso nai li enaig esenigbi afa sa haig sangwali nai oliv liba esenifi? Eba ehe gwenaig esenifi.

22 Afa sa ne enam onigim, Godba enaig feg aflafeg olug feg afa wasneig kwefihiageg el feg. Afa ambangel sa amtakwalig la apaiyeg eba ehengelim wasneigni kwefihianugefe afa nem eba aflafenfie. Atiaba ne heafna esmunagim kwaganig gwese kehla gohugba eba ne suialag gofufe. Afa ne enam masig fatinagba eba God nem gafa tuto klaitig.

23 Afa atiaba tonbusug Ju el onigig waikefigbi eba God wasneig feg asa ehengelim pese lambinam asonai oliv li yi tutu fwatife asa ehe enaig esenifi.

24 Afa ne afwambanai el ne ofenaiba sangwali nai oliv li kagag God nem aso nai oliv li yi tutufe fwatig enaba mango esug puguia mo eba asona alag ehe eseg. Afa Ju el ofenaiba aso nai oliv li kagag fig afa atiaba Ju el olug onigigbi asa eba God fwina sifakalegim ehengelim pese lambi tutufegba asa ehengel enag aso nai oliv li yi pese numwehe tutufifi.

25 Kana nilite masa ne nimbeafgelni onigigim fingi fifi asa ka membeg ne ena mo sa autunam meagam sefu gofena sa ne enam anwenafi. Afa enag mo enaig esog Israel el nai yi mas olug wasneig wahkig gohunfi. Afa afwambanai el ambe saiye ehengelim pahsihanam maia ihlafeiba

26 asa God mungwali Israel la nai elim pese lambigim eba Godna ginof enaig esog og;

Afa enag kwefwag el Saion kembang la nai blonam, afa ehe Jekopna simbianigagna amtakwalig nihem huguflaitinifi.

27 Afa God ehe enaig esog ka ehengel nai yi hwa mo kike sihi fwahanig

asa ka ehengelni amtakwalig nihem huguflaitinife. Ais  
59:20,21, 27:9

28 Afa Ju el Godna suialag mom oksigim asa ehengel Godim angoluweg finig. Afa ehengel enaig esigbi asa nem afwambanai elim kwaganig. Afa ming ehengam eba God ati ehengelim kanog fwatina afa ehengelni simpim mo ati sihi fwahana asa Ju el eba heafna hihe fife.

29 Afa ambanim God ati awamonagim afa heafna kigmog faig asa enaba God mas onigig waikefe.

<sup>30</sup> Afa autunam nengel afwambanai el ne Godna mom filafini. Afa glauwu Ju el maia Godna mom oksigbi asa God nengelim aflafenig.

<sup>31</sup> Afa God nem enaig esinigbi asa glau Ju elim gafa gwenai g pugunig. Afa Ju el Godna mo filafini asa ma God ehengelim aflafeni.

<sup>32</sup> Afa mungwali el mo filafigbi asa ehengel ofenaiba kalabus el fig. Afa God enam esegim asa eba ehe mungwali enaig elim aflafeg ogfunug.

### *Ena mo Godim fingi feg*

<sup>33</sup> Oi, Godna suialag gawig eba fwina suialag nemug feg! Afa heafna suialag anwenag i afa suialag onigig i eba mungwanam fiageg! Afa el mas ehena meaganai onigigim yisiginagig asa ehe mas enam anwenafi God sa nihe eseageg.

<sup>34</sup> Afa God ginof enaig esog; Mas amban Godna onigigim anwenafi. Afa mas amban Godim anwena faig mo. *Ais 40:13*

<sup>35</sup> Afa mas amban Godim mangwal faig mo asa namo ehe pese mungwa fai. *Jop 41:11*

<sup>36</sup> Afa mungwali gawig eba Godnai yi mungu feg afa mungwali gawig ehem ahnai skau finigim asa afohie asa mungwali gawig ehem fingi finig. Asa maia Godna unehlag wahkig sisi gofi. Enaba nufunam.

## 12

### *Sa big bibefum mungwali Godim fai*

<sup>1</sup> O nilite, God bigim aflafenig asa ka nem mengigna sihinig sa ne nimbefum mungwali Godim fai ofenaiba el sa mungwali sis Godim tuhlu fafaife. Afa maia maisim ne nofkena gofiba asa ne amtakwalig fwahanam afa nimbefum mungwali Godim fai afa ena mina gamba God sifakaleg. Afa enaba nufunam mina ne Godim fingi fig.

<sup>2</sup> Afa nofeka ne bitenai nihem ahnai skaufena asa ne Godim fwahana sa ma neana onigigim mulug esenai. Asa ne yuhnagenam afa anwenafe mangwal God sa membeg sa ne ese. Afa heafna sawieg eba suialag feg afa God enam sifakalenag afa afsug feg.

<sup>3</sup> Afa God kam suialafenagba sa ka enag gafugag fegim asa ka nem mungwali sihinig nofeka ne nimbefum enaig onigig fe ka kike sisi go afa ne mas enaig gohba fe. Amo, sa ne nimbeafgelni olug onigigim God sa nem faig enam numwehe kwefihiagi asa ne gwese gwenai onigig la gofim.

4 Afa bigelni elig eba mungu mungu fegim asa haig haig gafugafiagig.

5 Eba mungwalofug feg afa big kaksag el figim eba big Kraisi nai yi figim asa big mungu elig fig. Asa big mungu mungug wahigim mungu feg.

6 Afa God siosim aflafenigim afa heafna sawiegim patalkugim afa bigim haig haig kigmog mimagenig. Afa atiaba el kigmogna Godna onigigim sihiago fefiba asa mangwal olug onigig la God ehem faig sa ma gwena nai yi fei.

7 Afa atiaba enag kigmog nengelni elim kwefwagba asa ne numwehe esi. Afa atiaba enag kigmog nengelni elim ofgunigba asa ne numwehe esi.

8 Afa atiaba enag kigmog nengelni elni onigigim wasneignagba asa ne numwehe esi. Afa atiaba enag kigmog nengelni elim gawig faigbi asa ne numwehe lambwaigo. Afa atiaba enag kigmog nengelni elim gosegonug el figbi asa ne numwehe gafugafi. Afa atiaba enag kigmog nengelni elim aflafenag el figbi asa ne sifakalinim enam esi.

9 Afa nengelni membug sa ma nufunam fei. Afa sa ne amtakwalig nihem nufunam oksinim afa suialag nihem mo fwina kehli.

10 Afa sa ne Kristen nilitem membegoni ofenaiba nengelni mungwa usumuna nefig. Sa ne enaig nihe la gosinim afa nimbefum suialafeagi.

11 Afa masa ne yiskosifi sa ne numweheagenim ehengepusi, afa Godna Sungwabugim fwahibi asa ma nem olugim fingi fingi lamb fiegofiba eba ne Ainiyagim gafuga fini fi.

12 Afa sa ne numwehe anwenafi God nem suiala finifi asa enam sifkalini, afa maia nem kinig pugunibi asa ne wasneinim afohiefiba afa nengeafofum, afa Godim sahna fofum.

13 Afa amban Godna el gawig fwainig feg sa ne enam kwaganim faigo. Afa sa ne afwambanai elim awamogonim nimbeafgelni lala gam wanafu.

14 Afa el sa nem kinig faigogba eba sa ne Godim sahnibi sa ma ehengelim suialafegoni afa nofeka ehengelim agi mo sihigoni.

15 Afa elbi sifakalig sa ne ehengel i mungwali sifakali. Afa el wewatiogba sa ne mungwali gwenaig esi.

16 Afa nimbefum sa ne mungu onigigna afohiefim. Afa mas ne nimbefum fingi fi. Amo, eba sa ne unehlag fwainig el i mungwa si afohiefim. Afa mas ne enaig onigig fi kana anwenag eba kwania feg.



<sup>17</sup> Afa el nem amtakwal hiagibi nofeka mungwag gwenaiḡ esegon. Afa mungwali el sa suialag nihem anwenafi sa ne enaiḡ esi.

<sup>18</sup> Afa mangwal sa ne eseba asa ne mungwali elim suialag wanaugufiḡ sa ne enam esig.

<sup>19</sup> Afa kana hihem, nofeka amtakwalig mungwag faigo afa enaba nengigim God olug kakagfenam asa mungwag ehem faifi. Afa Godna ginof la Ainiyag enaiḡ esog, “Elni amtakwalig nihem kwefihianugeḡ susug mungwa faig eba kike feḡ.”

<sup>20</sup> Afa ming mo enaiḡ esog;

Atiaba angoluwagim bini pigiegba eba sa ne fane faigo afa ehengel buhef figbi eba sa ne bu efiagigo afa ne enaiḡ esigbi eba ehengel afwanfinim asa onigig waikefiḡ.  
*Snd 25:21,22*

<sup>21</sup> Afa masa ese amtakwalig nihe nem pigaupife amo sa ne suialag nihena enaiḡ nihem pigaupi.

## 13

### *Sa big gavmanim ahnai skaufini*

<sup>1</sup> Afa sa mungwali el gavmanim ahnai skaufini afa gavman mas esugba pugui amo eba God ehengelim kigmog faig. Afa ehe mungwali gavmanim esenigba asa afohug.

<sup>2</sup> Asa amban gavmanim filafeg eba ne filafeg mangwal God sa eseg. Afa amban el enaiḡ eseg eba ehe hefum susug hugufla blug.

<sup>3</sup> Afa el suialag nihe eseg mas misog elim embefenai afa amtakwalig el eba naho embefig. Atiaho ne membeg misog elim embefig fwainig? Afa sa ne suialag nihe ese eba sa misog el nem suialag mo faife.

<sup>4</sup> Afa enag el eba Godna gafugag el fig asa nem kwaganigim. Afa ne amtakwalig nihe feba sa ne ehem embefini eba ehe mungwag esig el fig. Afa ehe Godna gafugag el afa maia el amtakwalig esegba asa God enam ninimug eba sa enag misog el ehem susug faig.

<sup>5</sup> Asa ne gavmanim ahnai skaufini. Afa sa ne onigig amtakwalig mungwag flagim afa sa ne olugi nai suialag onigig patalfu.

<sup>6</sup> Afa sa ne enamho onigigim asa ne takis kigba gavmanim fatinig. Afa maia misog el heafgelni gafugag esigbi eba ehengel Godna gafugagim esig.

<sup>7</sup> Afa mangwal gavmanim faigim safeg eba sa ne fai. Afa haig haig takis sa ne fatinigim afa enaiḡ elimba sa ne angug higinam afa suialag onam afa sa ehem esena.

*Elim membenig nihe eba goseg*

<sup>8</sup> Afa masa ne elni esug flagim mungwag faig nihem fwahafe sa ne mungwali mungwag auguinim. Afa mungua mo sa ne kehla eba elim mungwag faig eba nimbeafum membug nihe feg afa enag ese awaiefe. Afa amban mingnag elim sa membenig eba nihe mom nemug patalkug.

<sup>9</sup> Afa nihe mo enaig esog, nofeka aga taitu afa nofeka elim kwagaitifi afa nofeka ukwefi afa nofeka mingnag elni gawigim membegoni. Afa ena nihe mi afa mungwali mingnag nihe mi eba enag mungu nihe la seaifugo eba enaig esog, sa ne mingnag elim membeni eba sa ne nimbefim membafefe.

<sup>10</sup> Afa membug nihe eba mas elim amtanafenai afa maia ne enag nihe esegba eba ne mungwali nihe mo patalkug.

<sup>11</sup> Afa ne anwenafig enag osuna ati meyofofe asa ne enag nihe esi. Afa enag osuna God bigim heafna kembang wankafe eba muhla feg asa glau sa ne nongiginai mo buhianam suialag gafugag esi. Afa maia nengelni olug onigig mulug fenibi enag osuna membi fiahfena afa glau eba ati muhla muhla fe blo.

<sup>12</sup> Afa si ati ohuguka afa osu ati meyofofe puguiagim. Sa big sikulufegna nihe fwahanim afa ombusugni hagnaga wag lambim.

<sup>13</sup> Afa sa big suialag nihem eseafu ofenaiba el ombusugni yisig. Nofeka amtakwalig nihe fwina ufwiafim afa uflogna bugina ahganam afa aga taitu afa moiniaini fiahgi afa ninimule fi afa mingnag elim ambobuge gonim. Nofeka enaig esi.

<sup>14</sup> Sa ne Ainiyag Sisas Kraisna nihem flinim kehli afa nofeka eligni amtakwalig sawiegim angug higinaga.

## 14

*Masa nilitem bigelni nihe la molkeki apaiyefe*

<sup>1</sup> Afa mingnag elni olug onigig mas wasneig mo asa ehengel fane foiyi aklafig. Asa ne enaig elim suialafe hiaginim wanambego. Nofeka enaig esegonim asa ehengelni haig weti onigigim fegonugim.

<sup>2</sup> Afa mingnag elni olug onigig eba wasneig figim asa mas onigi sa ehe haig haig fane ahagagig. Afa mingnag elni olug onigig eba mas wasneig mo asa ehe mas sis ahagai.

<sup>3</sup> Afa el sa haig haig fane ahagagig nofeka sis foiyi aklag elim fegonugi afa sis foiyi aklag el nofeka haig haig fane ahagagig elim kwefihiagonugi asa God ehengelim suialafehiagefe.

<sup>4</sup> Afa ne haig el asa ne mingnag elni gafugag elim kwehianugi. Afa heafgelni misog el mungu ehe ehem enaig

esonifi heafgelni gafugag eba suialag me awai amtakwalig me. Afa ehe suialag gafugag esibi asa Ainiyag ehem esenibi asa ihlafifi.

<sup>5</sup> Afa mingnag el enaig onigig mungu osuna eba mingnag osunam gosenig afa mingnag el enaig onigig fig mungwali osuna eba mungwalofug feg. Afa mungwali el sa heafgelni onigig la enaig esogoi kikeafena onigig eba ihlafeg asa ka enam esefe.

<sup>6</sup> Afa amban el enaig onigig feg mungu osuna eba goseg asa enaig esegba eba Ainiyag enam sifakaleg. Afa amban el haig haig fane sa neg asa enaig esegba eba Ainiyag enam sifakaleg asa ehe Godim suialag onag. Afa amban el sa sis foiyug asa enaig esegba Ainiyag enam sifakaleg asa ehe Godim suialag onag.

<sup>7-8</sup> Afa atiaba big nofkena afohiegba eba mango bimbeafum mo eba big Ainiyagim faig. Afa atiaba bigim lahaigba eba mango bimbeafum mo eba big Ainiyagim faig. Asa atiaba big nofkena fig me awai melig pigieg me eba big Ainiyagna fig.

<sup>9</sup> Asa Krai lahaigim afa pese buihiag asa ma ehe melig pigieg el mi afa nofkena gohug el mi ehe Ainiyag feni.

<sup>10</sup> Afa ne sis foiyug el haigsegba ne nilitem kwefihianageg? Afa ne haig haig fane neg el haigsegba ne nilitem fenageg? Afa ati ne anwenafig autunai la God bigim mungwali kwefihianugefe.

<sup>11</sup> Afa Godna buk la enaig esog;  
Ainiyag enaig sihifeg kaba God wahkig gohug asa kana mo eba nufunam nemug.

Afa mungwali el kam mongkokini kwakwaginim afa mungwali el esogofe ehe nufunam God feg. Ais  
45:23

<sup>12</sup> Asa sumi yi big mungu mungu el heafgelni mungwali nihem esig eba Godna nof la ambala sihiagifi.

<sup>13</sup> Asa big mingnag elim fasehtigig mom mo fwahi. Afa sa big enaig onigig fi masa ka enaig eseba asa kana nilite enanai yi pefe.

<sup>14</sup> Afa Ainiyag Sisas nai yi ka ahnai skaufegim asa ka ati numwehe anwenafeg mangwal fane sa big ahgag eba mas big Godna nof la nufwehig mo. Afa el enaig onigig fefe ka hwa fane negba eba ka Godna nof la amtakwalig nihe feg. Asa ena fanem ehe kwegig.

<sup>15</sup> Afa nilite enaig esogba ena fane eba amtakwalig afa ne enam negba asa nilite enanai yi kinig flag eba ne mas membug nihem patalkug mo. Afa Krai enaig elim lahanig masa ne neba asa ehena olug onigigim amtakwale fatife.

16 Afa mangwal nihe ne onigig eba suialag feg afa sa enag nihe nilitena olug onigigim amtakwaliaflag nofeka ena nihem ese masa el enaig esofe neana nihe eba amtakwalig.

17 Afa mangwal fane i bu i sa big ahagag eba Godna bog meg la esug feg. Afa Godna bog meg eba suialag nihe i afa mingnag el i suialag hawag ahfeg nihe i afa enag sifakaleg eba Godna Sungwabug faig.

18 Afa amban el enaig nihe patalkuiaba asa Kraisna gafugag eseg eba God ehem sifakalenag afa el enaig esogog ne suialag eseg.

19 Asa big fwina enaig nihem wasnei patalfu asa enag esinibi asa el mingnag el i suialag hawag ahfenam afa mingnagim wasneig gonifi.

20 Afa nofeka fanem monaginim asa Godna gafugagim amtakwali fati. Afa mungwali fane eba eseneage afa atiaba ne mangwal negba afa ne anwenafeg enaig esenam asa el ena nai yi peg asa enag nihe eba amtakwalig.

21 Afa suialag nihe eba enaig eseg asa ne sis mi wain bug mi foiyug afa mingnag nihe sa nilitem esenagba asa peg sa ne enam gafa fwaha.

22 Afa haig onigig sa ne feg eba sa ne God i mungu ahfe. Afa mangwal el sa onigig eba suialag asa ehe eseg afa atiaba ehe hefuna enaig mas esoiba ne amtakwalig eseg afa enaig el sa ma sifakale.

23 Afa el fanem sambaga onigig feg eba heafna olug onigig mas anwenafeg mo eba suialag me awai me sis negim asa maia ehe negba God ehem enaig esonag ne amtakwalig eseg. Afa mungwali sonaig sa ne eseageg enaba neana olug onigigim mas patalkug mo eba amtakwalig nihe.

## 15

1 Afa big wasneig olug onigig nafig asa big el wasneig fwainig fig enam kwaganim ehengelni kinigim flagon. Afa big mas bimbeafgelni sawiegim patalfui afa big mas bimbeafgelni sawiegim patalfui afa enam sifakalfenai.

2 Amo, sa bigel mungu mungu mingnag nilitem kwaganig onigina finim asa ehengelni olug onigigim wasneig gonim.

3 Afa Krais mas heafna sawiegim patalkuna mo. Amo, Godna ginof enaig esog;

Afa el amtakwalig mo Godim esonug afa ena mo kam gafa pugunag.

*Sam 69:9*

4 Afa autunai mungwali mo Godna ginof la go eba bigim ogfufenugeg afa enag ginof bigim kinigim kwaganigim asa big wasneig afohie afa onigigim wasneigim asa big suialag sumi yi puguiagim nengeafo.

<sup>5</sup> Afa ka Godim enaig beten enag. Afa God nengelim kinigim kawaganam asa big wasneig afohie afa onigigim wasnei hiagefe afa ka membeg enaig God sa ma nem esenibi sa ne mungwali mungu onigigna ugweg augufenam asa ne Sisas Kraisna nihem patalfu.

<sup>6</sup> Asa nengel mungwali mungwa mengna God bigelni Ainiyag Sisas Kraisna Alagim fingi fi.

*Godna suialag mo Ju el nai yi afwambanai el nai yi fenig*

<sup>7</sup> Afa Krai nem suialafenigim afa awamonig asa ne nimbefgelinaim gwenaig esegon asa enaig nihena el Godim fingi fi.

<sup>8</sup> Afa ka nem enaig esonig God Kraisim ninghiagba asa blogim Ju elim kwaganigim afa ogfug Godna mo eba nufunam feg. Afa God ehengelni simbianigagim mo sihi fwahani asa Krai esegba ena mo nufunam pugug,

<sup>9</sup> afa ming gafa enaig eseg ehe afwambanai elim kwaganigba sa ma ehengel Godna aflafegim anwenafinim asa Godna unehlagim fingi fi. Afa Godna ginof la mungu Ju el enaig esog;

Asa ka afwambanai elni olyi neana unehlagim fingi fefe afa ka neana unehlagim mwanifini fingi fukufe. *Sam 18:49*

<sup>10</sup> Afa ming ginof enaig esog;

Ne afwambanai el sa ne Ju el i sifakal ahfe. *Lo 32:43*

<sup>11</sup> Afa ming mo pese enaig esog;

Ne afwambanai el sa ne Ainiyagna unehlagim fingi fi, afa mungwali el ehena unehlagim sa ne gwenaig esi. *Sam 117:1*

<sup>12</sup> Afa Aisaia gafa gwenaig esog;

Afa mungu el Jesi gohba hengenai blofe

afa ehe afwambanai elni misog el fefe.

Asa ehengel ati anwenafig ehe ehengelim suialafenife asa ehengel enam nengeafu. *Ais 11:10*

<sup>13</sup> Afa God mo sihi fwahana asa sumi yi bigim suialafiagefe. Afa maia ne ehem olug oniginibi ka membeg ehe nengelim esenibi asa ne fwina sifakalinim afa ne olug enesieg fi. Afa Godna Sungwabug nem wasneinigbi sa ne sumi yi nai puguiagim fwina oniginim nengeafufum.

*Pol heafna gafugagim sihiageg*

<sup>14</sup> Afa kana nilite, ka kike ati anwenafeg nengelni suialag nihe eba kwania fig afa nengelni haig haig anwenag ihlafig asa ne nimbefum ogfufehiagi.

<sup>15</sup> Afa hwa ginof la ka nem mingnag wasneig mo ginofenig asa ka og sa ne enam pese onigim. Afa God kam suiala

fiahflagim enaig gafugag kam faigba asa ka nem enaig mo sihinig.

<sup>16</sup> Afa enag gafugag eba ka Sisas Kraisna gafugag el asa ehe kam afwambanai el nangum ningihiag. Afa ka ofenaiba pris asa ka Godna suialag mo sihiageakaule asa ka membeg enag afwambanai elim ka Godim lambwaim. Afa ka membeg God enam sa ma sifakale afa Godna Sungwabug ehengelim esenibi asa ehengel ma afsug kabag fi.

<sup>17</sup> Afa ka Sisas Krais nai yi sefu gohugim asa Godna gafugagim ka esegim ka enam sifakaleg.

<sup>18</sup> Ka haig haig mo sihiagim oksig. Koka mungu mo enaig sihife mangwal sa Krais kana ninga la eseg eba mangwalim sa ka sihigim esegba asa afwambanai el enam nanguigim asa Godim patalfug.

<sup>19</sup> Afa wasneig ogfuiag mi afa kigmog mi afa Godna Sungwabug wasneigim mi ehengel nangug. Afa ka mungwali Kraisna suialag mo sihiageakag Jerusalem la fegim ika ikag Ilirikum kembang yi pugug.

<sup>20</sup> Afa kana sawieg eba enaig eseg koka suialag mo sihin hag kembang la sa mas Kraisim anwenafig mo asa ka mas mingnag elni gafugagim puguafofeni.

<sup>21</sup> Afa Godna ginof enaig esog;  
Afa ahaganai el sa ehena mo flig fwaini fig eba nangufi,  
afa ahaganai el sa higig fwaini fig eba anwenafifi. *Ais 52:15*

*Pol oagna Rom kembang gam ika*

<sup>22</sup> Afa kaksag gafugag kam kagfonageg eba mas ka nem blo nangwagi.

<sup>23</sup> Afa glau hwa nai yi ka gafugag feageg auwigigim afa enaig onigig ati ka fe fwahana koka sa nem blo nangwag.

<sup>24</sup> Afa koka Spen gam ika afa enanam koka nem mwakwalig wanganam asa sifakal nem fen. Afa ka nem wangana fwahanam akofiba sa ne kam kwegfuiba ka sa ika.

<sup>25</sup> Afa glauna mo kawo Jerusalem gam ikanam asa Kristenim enanai yi kwaganim.

<sup>26</sup> Eba Masedonia provins nai sios i afa Akaia provins nai sios i kig angoguligim asa wahig. Afa ehengel enaig sifakalig ona Jerusalem la nai Kristenim gawig fwainigim kwaganim.

<sup>27</sup> Afa eba heafgelni sawieg feg afa enag nihe eba suialag mina afwambanai Kristen el sa ma Ju elim mungwag faigo. Afa mangwal sa Ju el ni olug onigigim kwaganig enag afwambanai elim gafa faigog afa eba suiala feg asa mungwag bitenai gawig Kristen Ju elim faigog.

<sup>28</sup> Afa maia ka Jerusalem ikanam enag kigim numwehe flanam asa ehengelim mungwali fainim enag gafugagim

auwigi. Auwiginam, ka sa Spen gam mo ika afa maia ena mina gam ka blonam asa nem nangwag.

<sup>29</sup> Afa maia ka blo nem nangwagiba eba ka ati anwenafeg Kraiss ka nai yi nem fwina suialafe hiagefe.

<sup>30</sup> O nilite, Sisas Kraiss eba bigelni Ainiyag afa Godna Sungwabug heafna membug bigelim faigbi asa ka nem enaig mo fwinam osihin sa ne ka i mungwali fwinam beteni afa Godim enaig sahini finibi asa ma kam kweagfui.

<sup>31</sup> Afa sa ne enaig beteni Judia nai el mas Godim olug oniginig mo ehengel masa kam tigifi. Afa mingba Jerusalem la nai Kristen asa ka kig fla blunaba asa ehengel sifakali.

<sup>32</sup> Atiaba Godna sawieg enaig fegba kable ka sa blo nem nangwagnam eba ka sifakalenam asa kam pese wasnei fe.

<sup>33</sup> Afa God elim suialag augufeg esenig afa ka membeg enag God sa ma mungwali nem wangofi. Ei eba nufunam feg.

## 16

### *Pol nub elim sifakale mo ninghianig*

<sup>1</sup> Ka membeg sa nengel biafna mulwal Fibim suialafini. Afa ehe Senkria la nai siosna suialag gafugag angwafig feg.

<sup>2</sup> Sa ne Godna el safife asa ne Ainiyagna unehlag la ehem awamoni. Afa ehe mangwal awaiyeba eba sa ne ehem kwegfu eba ehe ati nubwel elim fakwaganegim afa kam gafa kweagfug.

<sup>3</sup> Afa ka Prisila mi afa heafna alagag Akwila mi sifakaleg mo ninghianig. Afa eheningi Kraiss Sisasna gafugagim ka mungwali eseafu.

<sup>4</sup> Afa eheningi kam ahkweafunam asa ona ahlahawag afa sa ka eheningim suialag onig afa mungwali afwambanai sios el gafa eheningim gwenaig esogonug.

<sup>5</sup> Afa sios elim eheningina lala laskuhlag asa ka ehengelim sifakaleg mo ninghianig.

Afa ka kana suialag hihe Epainetusim sifakaleg mo ninghianag. Afa provins Esia la ehe sa gof el olug waikefena afa Sisasim olug onigina.

<sup>6</sup> Afa ka Mariam sifakaleg mo ninghianag. Ehe gafugagim ehenge puseg nengelim kwaganigim.

<sup>7</sup> Afa ka Andronikus mi afa Junias mi sifakaleg mo ninghianig. Afa eheningi gafa Ju el asa kalabus yi kam mungwal afofena. Afa eheningi Godna kanog fwatig el afa mungwali el eheningina suialag gafugagim ati anwenafegonig. Afa maia ka Sisasim olug oniginaba eheningi eba ati gof enaig ahsafena.

<sup>8</sup> Afa ka Ampliatusim sifakaleg mo ningihianag. Afa ehe Sisas nai yi sefug afa kana suialag hihe.

<sup>9</sup> Afa ka Urbanusim sifakaleg mo ningihianag. Ehe Kraisna mungwa gafugag ka ahfeg. Afa ka Stakisim gafa sifakaleg mo ningihianag. Ehe kana suialag hihe.

<sup>10</sup> Afa ka Apelesim sifakaleg mo ningihianag. Afa ehe Kraisna gafugag la kinig flagim afa ati wasneig gohug. Afa Aristobulusna mungwali nilitem asa heafna lala go ka ehengelim sifakaleg mo ningihianig.

<sup>11</sup> Afa ka Herodionim sifakaleg mo ningihianag. Ehe gafa Ju el feg. Afa Narsisusna mungwali nilite sa Sisasim onigig ka ehengelim sifakaleg mo ningihianig.

<sup>12</sup> Ka Tripina mi afa Triposa mi sifakaleg mo ningihianig. Eheningi Ainiyagna gafugag angwafig ahfeg. Afa ka Persisim sifakaleg mo ningihianag. Afa enag angwafig ehe kana hihe fegim afa Ainiyagna nub gafugagim eseageg.

<sup>13</sup> Afa ka Rufusim sifakaleg mo ningihianag. Ehe Ainiyagna gafugagim numwehe eseg. Afa ka heafna afagim sifakaleg mo ningihianag. Ehe kam suiala fiahflag ofenai heafna Legim.

<sup>14</sup> Afa ka Asinkritusim afa Flegonim afa Hermesim afa Patrobasim afa Hermasim afa mungwali Kristen nilitem enanai yi go afa ka ehengelim sifakaleg mo ningihianig.

<sup>15</sup> Afa ka Filologusim afa Juliam afa Nereusim afa heafna mulwaligim afa Olimpasa afa mungwali Kristen elim sa enanai yi go ka ehengelim sifakaleg mo ningihianig.

<sup>16</sup> Afa maia ne nilitem suialag onam asa ehengelim kiki-giafla. Afa mungwali Kraisna sios el nengelim sifakaleg mo ningihiagonug.

<sup>17</sup> Kana nilite sa ne enaig ese. Sa numwehe nof fefiba masa el ambe afa nengelim enaig esinifi asa nengel nai yi mo flafhiaginim kokohiagifi afa elni olug onigigim mas suialag minam patalfui. Afa ehengelni mo mas gwenai Godna mo sa ne ati higig. Sa ne enaig elim masig fatin.

<sup>18</sup> Afa enaig el mas Krais bigelni Ainiyagna nufunam gafugag el fi afa ehengel eba hefum sifakalig onigig mungu fig. Afa ehengel suialag mo sihig afa embena mo faigog asa auwiauwig elim mwakawal gonug.

<sup>19</sup> Afa mungwali el higig ati ne Godna mom numwehe keahlag asa ka nengelim sifakalenig. Afa ka membeg sa ne suialag nihem numwehe oniginim afa amtakwalig nihe mo sa ne ofenai mas anwenafenag mo.

<sup>20</sup> Afa God ehe olug enesiegna mog eba ati meyofo ehe Satanim filafatiagim afa sa ehe nengelim ahnai skaufefe.



Afa ka membeg bigelni Ainiyag Sisas nengelim sa ma esmunagim fakwaganfe gofi.

<sup>21</sup> Afa Timoti kana mungwa gafugag la nai nengelim sifakaleg mo ningihianig. Afa mingnag Ju el Lusius afa Jeson afa Sosipater ehengel gafa gwenaig nengelim esogonug.

<sup>22</sup> Afa kable Tertius ka Polim kwegfugum asa ehena mo ka flagim afa hwa ginof ginofeg. Afa ka gafa Ainiyagna unehlag la ka nem sifakaleg mo ninigihianig.

<sup>23</sup> Afa Gaius ehe kam heafna lala gam awamonag afa sios el heafna lala laskuhlag ehe nem sifakaleg mo ningihianig. Afa Erastus kembigna kig kike lambiguhule el afa kana hihe Kwartus eheningi gafa nengelim sifakaleg mo ahningihianig.

<sup>24</sup> Afa ka membeg bigelni Ainiyag Sisas nengelim sa ma esmunagim fakwaganfe gofi. Eba nufunam nemug.

<sup>25</sup> Afa ka suialag mo sihig eba Sisas Kraisna mo asa enag mo la God nengelni olug onigigim sa ma wasneig fenigbi asa big ehena unehlagim fingi fi. Afa enag mo wahkig autunam meagam sefugofena afa ka enag mo ambala sihigba asa ne wasneig afo.

<sup>26</sup> Afa God wahkig gohug glau ehe enaig esog el sa ma Godna mo fli sihiaule elni ginof anwenafi asa mungwali bite nai el enag mo oniginim afa Godim patalfui.

<sup>27</sup> Afa God ehe eba mungu feg ehe mungu fwina suialag onigig nemugba feg asa big Sisas Kraisna unehlag la ehena unehlagim wahkig fingi fufum. Eba nufunam nemug.

## **Angig Mo Pol Korin la nai Siosim Ginofe Ninghiani Hwa buk enaig esog**

Autunam Pol gofnaba Korin eba Grik elni kwaniam kembang feni. Afa Pol ehe ena kembang la lasflam ika Siasna mom sihini. Afa maia ehe ena kembang fwahanam ming kembang gam gafuga fegim ikanaba afa Korin Kristenim eba kinig puguni. Asa ehe ena mo ginofenam og sa ma heafgelni onigigim numwehiagi. Afa ehe fwinam onigina og ma sa ehengelnin olug onigig tigeufefe afa ma sa ehengelnin suialag nihe amtakwalefe. Afa ehe alagag angwagna mom sihig. Afa ming mo ehe enaig esog haig haig kinig sa pugunig enaba el mas Godna Sungwabugim ahnai skaufnim mo. Afa ming mom sihi haig haig kigmog Godna Sungwabug faigeg asa mungwalim kwaganibi sa ma mungwa mo sihi. Afa Pol enaig esog lahag el eba pese buigiagafefe. Afa Korinna el enam onigwag giaflafena. Afa Sapta 13 eba elim membenag nihem sihig. Pol enaig esog ena nihe eba gof seg.

<sup>1</sup> Afa ka Pol God kam wegfu fwahag asa Godna sawieg la ka Sias Kraisma kanog fwahag el feg. Afa bigelnin nilite Sostenes ka i hawag fena.

<sup>2</sup> Afa Korin la nai Godna sios elim ka hwa mo ginofenig. Afa Sias Kraisma nengelim awamonigim asa ne Godna afsug kabag el fig. Afa gafa mungwali bitenai el amban sa bigelnin Ainiyag Sias Kraisma unehlagim uneni gwenai esoi. Asa Sias eba ehengelnin Ainiyag afa bigelnin gafa feg.

<sup>3</sup> Afa God bigelnin Alag afa Ainiyag Sias Kraisma sa ma nem esug kwagani afa olug enesieg fai.

### *Pol Godim suialag onag*

<sup>4</sup> Afa God Sias Kraisma nai yi nengelim esmunagim kwaganigba asa ka nem oniginigim asa ka Godim wahkig suialag onag.

<sup>5-6</sup> Afa Kraisma mom sa ka nem sihigoni asa ne fligim numwehe patalfug. Afa ne Sias Kraisma i ahgoba asa ne haig haig suialag gawigim ihlafiahgig asa nengelnin mo sihiagim suialafeg afa anwena kwaniam feg.

<sup>7</sup> Asa maia ne bigelnin Ainiyag Sias Kraisma pese blogim nenge afoba afa sa haig haig suialag kigmog Godna Sungwabug nem mimagenig ne mas enam mungum awaiye.

<sup>8</sup> Afa God nem kweafugba asa ne wasneig gohunam ikan mungwali awaiye osuna asa maia bigelni Ainiyag Sisas Kraisna osuna puguiba el nem mas sehi.

<sup>9</sup> Afa God nem awamonigim asa ne heafna Leg bigelni Ainiyag Sisas Krai i hawag fim. Asa eba nufunam mangwalim God sa sihig eba nufunam esefe.

*Siosna el kokohiagigbi asa Pol ehengelim fenig*

<sup>10</sup> O nilite afa bigelni Ainiyag Sisas Kraisna unehlag la ka nem wasneig mo osihin sa ne mungwa mona finim afa nofeka nimbefim kokohiagi. Afa sa ne mungwa onigig fi afa mungwa membug fi.

<sup>11</sup> O nilite, afa Kloena lala nai el kam enaig sihifinig nengel nimbefim moanag fiafu.

<sup>12</sup> Afa nengel nai mingnag enaig esogog ka Polim patalfug afa mingnag og ka Apolosim patalfug afa mingnag og ka Pitam patalfug afa mingnag og ka Kraisim patalfug.

<sup>13</sup> Afa maia ne enaig esigbi eba ofenai ne Kraisim olyi koskofig. Afa ka Pol ka mas nengelim kwaganigim li katigeg la lahana mo. Afa ne mas Polna unehlag la bu la apaiyena mo.

<sup>14</sup> Afa ka Godim suialag onag asa ka mas nengelim bu la aitina mo afa eba Krispus mi afa Gaius mi eheningim mungu ka eseni.

<sup>15</sup> Asa amban mas enaig esoi Pol kam bu la fatigba asa ka ehena el feg.

<sup>16</sup> (Ei ka eteti ofefna, ka ati mingnag elim bu la aitina eba Stefanas mi afa heafna lala nai el mi. Afa ka mingnag elim ati esenig me awai awai me ka enam etetig.)

<sup>17</sup> Eba Krai mas kam ningihiana mo asa elim bu la aitiagim amo eba ka sa Godna suialag mo sihiaka. Afa maia ka enam sihiagba ka mas anwena elni suialag lofug mo sihi masa Kraisna li katigeg la lahagna kigmog fwainig fefe.

*Krais eba Godna kigmog afa suialag anwenag*

<sup>18</sup> Afa el amtakwalig minam sa patalfuia eba ehe onigig Kraisna li katigeg la lahagna mo eba ofenai mo etetig elni mo. Afa amban bigel nai yi el suialag minam patalfuia sa big anwenafig enag mo eba Godna kigmog feg.

<sup>19</sup> Afa God heafna buk la enaig esog og; Afa el sa enaig esogog ka kike suialag onigigna fig eba ka ehengelni onigig amtakwale klaitin fefe.

Afa el sa kwania onigigna fig eba ka ehengelni onigigim kagfonfi. Ais 29:14

<sup>20</sup> Afa anwena elni onigigim haig sa big esogonfi? Afa bukna ginofim anwena elim haig sa big esogonfi? Afa mona flafhiagig el sa filafatigim gohug haig sa big esogonfi?

Ehengelni enag onigig eba hwa bitenai feg. Afa God bitenai suialag anwenagim esegba asa eba ofenai mo etetig elni onigig lofeg.

<sup>21</sup> Afa God enag suialag onigigna feg asa bitenai anwenag mas Godim anwena ogfui. Afa bitenai el Godna suialag mom sa big sihig enam enaig esogog eba mo etetig elni mo. Afa amban enag mom olug oniginagba asa God membeg enaig elim pese lambigim.

<sup>22</sup> Afa Ju el membeg kigmog nanguigim afa Grik el membeg anwena mo higigim.

<sup>23</sup> Afa kagel eba Kraiswa li katigeg la lahagna mo sihiafu. Afa Ju el enag mom higigim og eba metunig afa afwambanai el enag mom esogog eba mo behig.

<sup>24</sup> Afa God Ju el mi afa afwambanai el mi mungwal awamonig asa ehengel enaig esogog Kraiswa gafugag eba Godna kigmog afa heafna suialag anwenag feg.

<sup>25</sup> Afa el enaig esog Godna anwena eba mo behig feg afa ehena mo behig eba elni suialag anwenagim fwina nemug gosenig. Afa el enaig onigig Godna wasneig eba auwiauwig afa ehena auwiauwig eba elni wasneigim fwina gosenig.

<sup>26</sup> Afa hihe, autunam God nengelim amtakwalig mina nai awamoni sa ne pese enam onigig haig el ne gofena? Afa bitenai el nengelim kwefihiageg asa nengel nai yi kaksag el mas anwena el fi. Afa nengel nai yi kaksag el mas kwania unehlagna fig mo afa nengelni humonig gafa mas kwania unehlagna fini mo.

<sup>27</sup> Afa God nengel bitenai elim anwena fwainigim kanog fwatig asa anwena elim afwanfug faigogim. Afa God nengel bitenai elim wasneig fwainigim kanog fwatig asa wasneig elim afwanfug faigogim.

<sup>28</sup> Afa God nengel unehlag fwainig elim wegfu fwatig afa bitenai el og ehe mas suialag feg mo. Afa God enaig eseg asa kwania unehlag elim pigaupiegim.

<sup>29</sup> Asa el Godna nof la ese heafna unehlagim fingi fifi.

<sup>30</sup> Afa God nengelim esenigbi asa ne Sisas Kraisa nai yi afohie. Afa Sisas Kraisa nai yi God enaig eseg heafna suialag anwenag bigim ogfunig afa ehe bigim ehena nof la afsug el fenig, afa ehe bigim ehena nemug el fenig, afa God bigim pese lambigim.

<sup>31</sup> Asa eba Godna mo gwenag esog;  
Amban sa hefum ona fingi fei eba ehe sa ma Ainiyagna  
unehlagim fingi fe. *Jer 9:24*

## 2

*Pol Kraiswa lahagna mom sihiageg*

<sup>1</sup> Kana nilite maia ka nem blo nangwagiba afa ka nem Godna suialag mo sihinugef. Afa ka mas nem haig haig kwania mo sihinuge ofenai anwena el lofei.

<sup>2</sup> Afa enanam big auguiafiba ka enaig onigig feg sa ka kiafna anwena mo fwahanam afa Sisas Kraisna mom mungu sihi asa ehe li katigeg la lahana.

<sup>3</sup> Afa maia ka ne i ahwag fenaba ka wasneig fwainig fena afa ka embefina asa kana sungwabug hugofukana.

<sup>4</sup> Afa maia ka mo sihinam afa Godna suialag mom sihiage gofenaba ka mas anwena elni kwania mo lofug sihinugena mo nem hugfu lambluogim. Amo, ka nengelim Godna Sungwabugni kigmog ogfunig.

<sup>5</sup> Asa nengelni olug onigig mas elni anwenag la lugwa fi amo, eba Godna kigmog la gofife.

### *Godna Sungwabugni suialag anwenag*

<sup>6</sup> Afa ambangel olug onigig wasneini fig asa kagel ehengelim Godna suialag anwenag mo sihigonug. Enag anwenag mo eba mango hwa bitenai i afa bitenai misog elna i mo mo. Afa sumi yi ehengel eba awaiefe.

<sup>7</sup> Afa enag mom sa kagel sihiafu eba Godna suialag anwenag autunam meagam sefu gofena. Afa maia God bite i of i gafugafeg fwainig fiahfenaba ehe ati enaig onigig fwahana afa ehe bigim kwaganigim asa big ehe i ahwagigim afa heafna kwania unehlagim lambigim.

<sup>8</sup> Afa mungwali bitenai misog el mas enag mo anwenafini mo afa ehengel Godna suialag anwena mom anwenafite eba Ainiyag ombusug kwania mas li katigeg la fli kahlite.

<sup>9</sup> Afa Godna buk la ginof enaig esog;  
Mangwalim elni nofug nangwa fwainig  
afa angug higig fwainig afa onigig la pugua fwainig  
eba enaig suialag God ati numwehenuge fwahag amban el  
sa ehenai yi fwina membeg lugwa. *Ais 64:4*

<sup>10</sup> Afa God heafna Sungwabugna kagelim enag anwena mom upugunig. Afa Godna Sungwabug mungwali gawigim fahigeageg asa ehe Godna olug megam onigigim numwehe anwenafeg.

<sup>11</sup> Afa el mas mingnag elni onigigim anwenafei eba ehena sungwabug mungu ehamba anwenafenag. Eba gwenaig eseg el mas Godna onigigim anwenafei eba Godna Sungwabug mungu Godim anwenafenag.

<sup>12</sup> Afa Sungwabugim sa big flig eba mango hwa bitenai mo. Afa Sungwabug God sa ningihiag enag big flig asa big enam anwenafig mungwali suialag gawig eba God bigim esug faig.

<sup>13</sup> Asa kagel mas elni anwenag fligim asa enam sihig mo. Amo, eba Godna Sungwabugni mo kagel fligim sihig asa el Godna Sungwabugni fig kagel ehengelim Sungwabugni mo upugu gonug.

<sup>14</sup> Afa el Godna Sungwabug fwainig eba ehe mas Sungwabugni suialag gawigim flai. Afa enaig el enam etetigim afa enag mo onigig eba mo behig feg. Afa Godna Sungwabug mungu enam elim upugunigim asa ehengel sa mas enam anwenafig mo.

<sup>15</sup> Afa el Godna Sungwabugni fig eba mungwali gawig kwefihiagig afa amban el mas enaig elim kwefihianage.

<sup>16</sup> Afa Godna ginof enaig esog;  
Atiaho amban Ainiyagna onigigim anwenafeg? Afa atiaho  
    amban ehem onigig faig? *Ais 40:13*  
Afa Kraisna onigig bigel nai yi go.

### 3

#### *Korinna sios el kokohiagig asa Pol ehengelim lagnig*

<sup>1</sup> Kana nilite, ka nengel nanam gofiba ka mas nem enaig sihifeni asa ka elim Godna Sungwabugni figim fasihinfe. Afa ka nem enaig sihifenig ofenai ne bitenai el lofug. Afa Kraisna nihe patalfuiagim nengel eba ninginai luwal lofug.

<sup>2</sup> Afa ka mas nem wasneig fane fai afa mo ka nem sihinig eba ofenai luwalim tut faig. Afa autunam ne mas wasneig fane fligim numwehini mo afa glauwaga ne mahim gwenaig fi.

<sup>3</sup> Asa ne mahim bitenai nihem patalfuia. Afa maia ne nimbefum ambobugigim afa mo flafihiagigba asa ne ofenai bitenai el lofug mahim fi asa ne bitenai elni nihem patalfug.

<sup>4</sup> Afa mingnag el enaig esogog, “Ka Polim patalkug” afa mingnag el enaig esogog, “Ka Apolosim patalkug”. Afa enaig nihe sa ne esig eba bitenai elni nihe.

<sup>5</sup> Afa Apolos eba mangig el maia? Afa Pol eba mangig el maia? Kaningi eba gafugag el eba ahfeg. Afa Ainiyag kaningim algana gafugag faig. Asa kaningi gafugag ahfegba sa ne Sisasim olug onigig.

<sup>6</sup> Afa ka li fug kumug afa Apolos enam bu sugfunugeg afa eba God ehe enam esenigbi asa apukeg.

<sup>7</sup> Asa el lifug kumuageg enag el eba esug el feg. Afa el bu sufunugeg enag el gafa eba esug el feg. Afa God esenigbi sa apukeg asa ehe mungu kwania unehlagnaba feg.

<sup>8</sup> Afa el lifug kumuageg afa el bu sufunauggeg eheningina gafugagna mog mungwalofug. Afa haig gafugagim sa ehe haig gafuga eseg eba mungwalofug kig enaig flag.

<sup>9</sup> Afa kainingi Godna gafugag el ahfeg afa nengel eba Godna aso.

Afa ming ehegam gafa nengel eba Godna lala.

<sup>10</sup> Afa God kam esmunagim kweagfugba asa ka gafugag ese ofenai lala nimblag anwena el feg. Afa ka bite tofugum afa sumul aitiageaka fwahagba afa ming el blo ena sisi yi lala nimbla go. Afa nengel mungu mungug sa ne numwehe oniginim afa nimbla.

<sup>11</sup> Afa Sisas Kraiss eba sumul ati ugugo asa el mas ming sumul blukoko fati.

<sup>12</sup> Afa mingnag el oagna lala ena sumul sisi yi nimbla asa ehe gol, silva, afa fun suialag lambigim enana numwehe nimblag. Afa mingnag el kugma, pos, afa kosuf fige asa ena lala nimblag.

<sup>13</sup> Afa maia Kraiss pese bloiba Godna suwi enam ogfufe el haig gafugag eseagig, fi suialag me awai amtakwalig me asa enana ambala apukenfie. Afa suwi eba mungwali elni gafugagim yuhnag feg.

<sup>14</sup> Afa suwi elni gafugagim lag fwainigba asa enag el enag enanam kig flafe.

<sup>15</sup> Afa atiaba elni gafugagim suwilanagba asa enag el mas mangwal flai. Afa God ehem suluiaflag eba ehe ofenai el suwi menai ningai mu pugu blog.

<sup>16</sup> Afa ka onigig ne ati anwenafig nengel eba Godna kwania lala asa Godna Sungwabug nengel nai yi go.

<sup>17</sup> Afa el Godna kwania lalam amtakwalenagba asa God ehem amtakwale fatife. Eba Godna kwania lala afsug kabag feg afa enag lala eba nengel ehe.

<sup>18</sup> Masa ne nembefum mwakwale fe. Afa nengel nai yi amban sa enaig esofe og kaba ati bitenai anwenag flag asa kana anwenag eba fwina goseg. Afa ehe sa enaig onigigim fwahanam asa mo etetig el lofug fei. Eba sa ehe Godna suialag anwena flai.

<sup>19</sup> Afa bitenai anwenag Godna nof la eba ofenai mo etetig elni nihig. Afa Godna ginof enaig esog;

Afa God anwenag elni anwenam flagim asa enana ehengelim  
wegmosu fenig. *Jop 5:13*

<sup>20</sup> Afa ming mo enaig esog;

Afa Ainiyag anwenafeg anwena elni onigig eba onigig behig  
feg. *Sam 94:11*

<sup>21</sup> Asa ambanim ne patalkug nofeka ehena unehlagim fingi fe. Afa God mungwali el afa gawig nem faig asa nengelim kwaganig.

<sup>22</sup> Pol, afa Apolos afa Pita, hwa bite, nofkenag afa lahag, glaunaina afa sumi yi naina afa mungwali gawig eba nengelni.

23 Afa nengel eba Kraisna afa Krais eba Godna.

## 4

### *Kagel Kraisna gafugag el fig*

<sup>1</sup> Afa nengel sa ne enaig onigifi kagel Kraisna gafugag el fig. God kagelim wegfu fwatig afa heafna mo el mas anwenafig mo asa enam ambala sihiafugum.

<sup>2</sup> Afa enaig gafugag el sa ma ogfui ehe eba suialag gafugag eseg asa heafgelni misog el sa ma ehengelim sifakaleni.

<sup>3</sup> Ka mas fwina onigi atiaba ne afa nengelni misog el kana gafugagim kwefihianageg. Afa ka kike mas enam kwefihiagegim ihlafeg mo.

<sup>4</sup> Afa kiafna onigig mas kam kufenag mo. Enaba nufunam asa ka mas esoi ka suialag el ka mas haig eseg mo. Afa Ainiyag mungu ehe kam kwefihianagefe.

<sup>5</sup> Afa God esog fwainig mahim fiahba asa nofeka elim kwefihianage. Afa lasflanam Ainiyag ehe blonam enaig esefe afa gawig glau sa sikulieg meagam afohie afa elni onigig olug menai lambinam ombusug ambala skofe. Afa enanam God mungwali elim kwefihianugenam asa suialag mo sihinifi eba gwenaiig ehengelni suialag gafugag ihla.

### *Sios el ese hefum fingi fifi*

<sup>6</sup> Afa nilite, ena mo ka sihig eba Apolos mi afa kefim mi ena lasug mo ka esog asa nengelim kwaganigim. Afa ka membeg ne kaningim nangwaginim sa ne enag suialag mo patalfu eba enaig esog, afa nofeka bukna ginofim pugu hafunam afa gwesim ika. Asa ne mas tonbusug enaig esei mingnagim mo fingi fegonim afa mingnagim mo pigalampie.

<sup>7</sup> Amban nem esonagba sa ne mingnag elim gosenig? Afa nengelni mungwali gawig eba God nem faig. Afa atiaba ne enam esug flagba haig eseg sa ne nimbefum fingi fig?

<sup>8</sup> Afa atiaho ne mungwali gawig afa kigmog ati lambig? Afa atiaho ne suialag augufe? Afa atiaho ne kagelim gosegonugim asa ne misog el fig? Enag eba mas nufunam feg mo afa ka membeg ne enaig augufegba asa kagel gafa nengel nanam misog el finim sa big augu.

<sup>9</sup> Afa ka onigig God kagelim kanog fwatig elim sum fwatig. Afa kagel eba ambala kwagi klaitig el lofug afohie. Asa mungwali el afa oflanai el gafa kagelim fwinam nangwasiga.

<sup>10</sup> Afa kagel Kraisna gafugag esig asa el kagelim esogonug ne mo etetig el fig. Afa nengel mas kagel lofug fig mo. Ne onigig ka Krais nai yi afuhba asa ka anwena el fig. Afa kagel eba auwiauwig el fig afa nengel eba wasneig el fig. Afa el nengelim mo fingi fegonug afa kagelim mo pigalampuieg.



<sup>11</sup> Afa autunam blo glau gafa feg asa kam bini pigig afa bu hef feskofeg afa kagelim lofug amtakwalenig, afa el kam pupufetifug afa kagel gug auguiag awaienig.

<sup>12</sup> Afa ka gafugafigim kiefgelni ningana henge pusig. Afa maia el kam molamp fegonugbi asa ka Godim sahinig ehengelim suialafenigim. Afa maia el kam kinig faigogba asa ka enag kinig kahlig.

<sup>13</sup> Afa maia el kam pigalampigogba asa ka enesieg mona pese sihigonug. Eba gwenaig glauwaga feg bitenai el kagelim kanog fwatig elim esogonug ne tugofwaglanai fig asa ehengelnai nof la kagel ofenai nahas.

<sup>14</sup> Afa ka mas nem afwanfeug faig mo enaig ginofena mo. Amo, ne kana luwal lofug afa ka nem fwina membegonug asa ka enaig sihifenig sa ne suialag minam anwenafig.

<sup>15</sup> Afa kaksag el ambe sa nengelim kwaganigim Kraisna nihem patalfuiagim afa ehengel mango nengelnai alag mo. Afa ka nengelim Godna suialag mo ati sihini asa Sisas Kraisnai yi ka ofenai nengelnai alag.

<sup>16</sup> Asa ka nem enag wasneig mo faig sa ne ka lofug gwenaig esi.

<sup>17</sup> Asa ka Timotim nem ningihianigim. Afa ehe kana luwal lofug ka ehe fwina membenag afa ehe Ainiyagna suialag gafugag el feg. Afa ehe ma blonam nem sihinifibi asa ne pese onigim nihe sa ka enaig esena Sisas Kraisim patalkuiagim eba mungwalofug mo sa ka mungwali bitenai sios elim sihini.

<sup>18</sup> Afa nengelnai mingnag enaig onigig fig ka mas nem pese blo nangwagi asa ehe tonbusiageg.

<sup>19</sup> Afa atiaba Ainiyag sawifegba eba ka mas mahife ka nem blo ikagna nangwagife. Afa ka blonam sa tonbusug elni mo higwagenam asa ka fahiage fi wasneigni me awai awai me?

<sup>20</sup> Afa mo mas enaig ofug el Godna bog megam sefuagim me. Afa el Godna bog megam sefugohug eba wasneigni feg.

<sup>21</sup> Afa nengel haig membug fig? Ka ninimu olugni nem bloni me awai ka membug olugni afa moamsegna nihena bloi me?

## 5

*Aga taitu nihe Korinna sios la go*

<sup>1</sup> Ka higig el enaig sihiagiafu og aga taitu nihe nengel nai yi go. Afa kati higig el mungu nengel nai yi heafna alagna angwagi ahwag. Afa enag nihe eba fwina amtakwaleg asa afwambanai el mas ese.

<sup>2</sup> Afa ne enaig onigig fig kagel goseg el fig. Mangofi, sa ne ena nihem oksinim afa bite big piagi afa enag el amtakwalig sa eseg eba sa ne nimbeafgeli nai ehem huguflifati.

<sup>3</sup> Afa ka eligni nem membi fenig afa kana onigig nengel nai yi go asa ofenai big mungwal auguia. Asa Ainiyag Sisasna unehlag la enag el sa amtakwalig nihe eseg eba kati ehem kwefihianageg.

<sup>4</sup> Afa maia ne mungwali laskuhlafiba afa kana onigig gafa mungwali nengel nanam laskuhlag afa bigelni Ainiyag Sisasna kigmog enanai yi gohug,

<sup>5</sup> sa ne enag elim Satanna ninga la fwahibi sa ma Satan ehena eligim tigeftati asa amtakwalig nihem fwahanam afa maia Ainiyag pese bloiba asa enanam God ehena sungwabugim mo flanai.

<sup>6</sup> Eba mas suialag feg mo nimbefim fingi figbi. Afa ne enaig mo anwenafig sisna tigag eba weti afa maia pukogba sa bug suialagim mungwali amtakwale fatig.

<sup>7</sup> Tigag eba amtakwalig nihe feg asa ne enam kofla fati eba sa ne suialag gohe asa ofenai bu miaklanai fwainig. Afa Kraisa bigim lahanig asa ne suialag afohie. Kraisa lahag ofenaiba Ju el pasova buyisna maunum sipsipim tigig.

<sup>8</sup> Sa big pasova buyis la enaig eseafufum ese tigag gofufe. Afa sa big amtakwalig nihe mi afa nufwef nihe mi huguflitinim asa big bug tigag fwainigna mo kehli eba suialag nihe mi afa nufunam mo mi.

<sup>9</sup> Afa autunam ka nem ming mo ginofe ninghiani eba enaig esog, nofeka aga taitu elimbi hihe ahfe.

<sup>10</sup> Afa afwambanai el sa aga taitu fig afa gawig fwina membeg fig afa ugwef el fig afa mwakwal godim finig fig asa ka mango enaig elim esoni mo. Afa ne membeg enaig elim oksi ofenfibi eba sa ne mungwali elim fwatinam nimbefum mungu gofum.

<sup>11</sup> Afa kana ginof enaig esog nofeka enaig elim muhla fegon el sa og ka Sisasna el fig afa ehengel sa aga taitu nihe fig afa gawigim fwina membeg fig afa mwakwal godim fingi fig afa molamp mo fig afa gina bu ahgag fig afa ugwef el fig. Afa nofeka enaig el i muhla hawaganam fane ahne.

<sup>12-13</sup> Afa ka mas afwambanai elim kwefihianuge eba mango kana gafugag mo. Amo, eba God ehengelim kwefihianugefe. Afa sa ne nimbeafna sios elni nihem kwefihianuge. Afa Godna ginof enaig esog, "Amtakwalig elim sa ne nengeli naim huguflifati."

## 6

### *Nofeka Kraisa el nilitem kotim me gon*

<sup>1</sup> Afa maia nengel nai yi el mungu nilitem olug kinig fenagba masa ese gavmanna kot la ahkafe. Haigsegba sa ne

el Godim anwenafenag fwainig gaba afug? Eba Kraisna el sa ma eheninigim kwefihianuge.

<sup>2</sup> Eba Kraisna el bitenai elni nihemba kwefihianugifi. Atiaho ne enam etetig? Afa neba sumi yi bitenai elim kwefihianugifi afa haigsegba ne glau mas nengel nai yi weti kinigim kwefihiagig mo.

<sup>3</sup> Eba sa big oflanai elim gafa kwefihianugifi. Atiaho ne enam etetig? Afa sumi yi big enaig esofifibi asa ne ati weti bitenai kinigim mo kwefihiagifim.

<sup>4</sup> Afa maia nengel nai yi enaig kinig pugugba asa haigsegba ne afwambanai elim nangum afug asa ehengel enam kwefihiagigim.

<sup>5</sup> Afa ka enaig esog asa nengelim afwanfug flig. Haigsegba nengel nai yi mas anwenag el go mo asa ena sios nilitena kinigim tigeflakanigim?

<sup>6</sup> Afa eba awai. Afa maia nengel nai yi el mungu nilitem kotim enagba asa afwambanai el eheningim kwefihianugeg.

<sup>7</sup> Afa maia ne mingnag sios nilitem kotimenigbi asa eba ofgug nengel ati apaiyegog Kraisna nihem patalfuiagim. Afa maia nilite neana gawig flanam afa nem amtakwalig nihe esenaiba eba sa ne esug fwaha enag nihe eba kotimenag nihem gosenag.

<sup>8</sup> Afa nimbe gwenag eseg ne amtakwalig nihe feg afa mwakwalnigim ne gawig lambinig. Afa ne Kraisna elim gafa gwenag esenig.

<sup>9</sup> Ati ne anwenafig amtakwalig el mas Godna bog megam seaifui. Masa ne mwakwal mo kehlafe. Afa enaig el sa aga taitu fig afa mwakwal godim fingi fig afa angwafig alagag la nai afa saglag angwafigni aga taitufiahgig afa saglag awauwuna fig,

<sup>10</sup> afa ugwef el fig afa gawigim fwina membig fig afa gina bu ahgag fig afa molamp mo fig afa gauna mengig tikiflag el fig. Afa enaig el mas Godna bog megam seaifui.

<sup>11</sup> Afa autunam nengel mingnag eba enaig el fini. Afa bigelni Ainiyag Sisas Kraisna unehlag la afa Godna Sungwabugni kigmog la God nengelni amtakwalig nihem huguflaitinig asa neba mungwali God heafna fig afa ne Godna nof la afsug el fig.

*Sa neana eligni suialafiahge eba sa el Godim fingi fi*

<sup>12</sup> Afa mingnag enaig esogog, “Mungwali gawig sa gohka eba ka eseagefe eba nihe mo mas kam kwenag mo.” Afa mango enag mungwali gawig nem kwefwag mo. Afa ka gafa enaig esoi, “Mungwali gawig sa gohka eba ka eseagefe eba

nihe mo mas kam kwenag mo.” Afa ese ka enam ahnai skaufenafe.

<sup>13</sup> Afa mingnag el enaig esog, “Fane eba ehnog gam ikag afa ehnog eba faneana kifeg.” Afa God ena ningim amtakwale klaitife. Afa big mas biafna eligim fli aga taitu nihe la usiei. Amo, sa big biafna eligim flinim Ainiyagna gafugagim eseagi afa Ainiyag bigelni eligim numwehenuge.

<sup>14</sup> Afa God Ainiyagim lahag la nai ilafo lasug afa heafna kigmogna ehe bigim gafa gwenaign esenife.

<sup>15</sup> Afa ne ati anwenafig nengelni elig eba Kraisna elig kofwag fig. Afa atiaho ka sa enaigba esei Kraisna elig kofwag flanam mina angwafigni nihi pahlai? Amo enaig eba awai nemug.

<sup>16</sup> Atiasi ne etetig me? Afa el mina angwafigni nihi pahla gohugba eba mungwa elig ahfeg. Afa Godna ginof enaig esog, “Eheningina elig eba mungu ahfefe.”

<sup>17</sup> Afa amban el Ainiyag nai yi sa pahla go asa eheningi eba mungu olugni ahfeg.

<sup>18</sup> Afa haig haig aga taitu nihe sa ne membifena. Afa mungwali mingnag amtakwalig nihe el sa eseagig eba eligim afwambanai go. Afa el aga taitu nihe eseg eba heafna eligim amtakwal fiahflag.

<sup>19</sup> Atiasi ne etetig me? God nem heafna Sungwabug faig asa enag Sungwabug nengel nai yi go asa nengelni elig eba Godna lala. Asa nengelni elig eba mango nimbeafna mo eba Godna.

<sup>20</sup> Afa God heafna Legim faigni asa bigim lambig. Afa sa ne nimbeafgelni eligni suialafiahgi eba sa el Godim fingi fi.

## 7

### *Alagag angwagna mo*

<sup>1</sup> Autunam ne kam ginof ningihini asa glau ko ka nengelni sahim pesi sihini. Afa saglag angwafig i hawagig fwainig eba suialafeg.

<sup>2</sup> Afa kaksag el aga taitu nihe eseafu asa mungu mungu saglag sa ma ati heafna angwafigni fi afa mungu mungu angwafig gafa alagagna fi.

<sup>3</sup> Afa angwafig oagna heafna alagag i lala hawag fim asa ese alagag yiskosefe. Afa alagag oagna heafna angwag i wasi ahka asa ese angwag yiskosefe.

<sup>4</sup> Afa angwagna elig eba heafna mungwa mo eba alagagna gafa feg. Eba gwenaign feg alagagna elig eba heafna mungwa mo eba angwagna gafa feg.

<sup>5</sup> Afa eheningi nofeka nimbefim yiskosiag ahfe. Afa atiaba eheningi enaig mungu onigigna hofefiba hawagigim

mwakwalig fwahia haufiba asa Godim beten ahfenam. Afa maia enag awaieba eheningi sa ma pese mungu la hawagi. Masa ne wasneig fwainig feiba asa Satan nem yuhnafe.

<sup>6</sup> Afa ka nem enaig mo sihinig asa ne enaig esofifibi eba ese esi afa ena mo eba mango wasneig mo mo.

<sup>7</sup> Afa ka membeg nengel mungwali sa ne angolfoi fi ka lofug. Afa God mungu mungu elim haig haig kigmog mimagenig.

<sup>8</sup> Afa ka angolfoi el mi afa bontag angwafig mi enaig esonug sa ne nimbe fwaimu gwese gofum ka lofug.

<sup>9</sup> Afa atiaba ehengel heafna eligna sawiegim pigalamb pai-gog fwainigba eba sa ma saglag angwafigni fi afa angwafig saglagna fi. Afa enaig nihe eba suialafeg masa ehengel angolfoi afohiefiba asa aga taitu onigigim tonbusiagifi.

<sup>10</sup> Afa ka alagag mi afa angwag mi wasneig mo sihinig. Afa enag mo mango kiafna mo mo eba Ainiyagna. Afa angwag ese heafna alagagim fwahafe.

<sup>11</sup> Afa ehe enaig esegba asa ehe gwese esug gofi afa ming ehagam eba ehe sa ma pese ikanam alagag i mungu olug ahfei. Afa alagag gafa ese heafna angwagim oksi fatife.

<sup>12</sup> Afa ka mingnagim enaig esonig. Afa enag mo mango Ainiyagna mo eba kiafna mo. Afa saglag Ainiyagna sa feg afa ehena angwag mas Ainiyagim olug oniginag mo. Afa ehe membeg ehem hawag fim enag saglag ese enag angwafigim oksi fatife.

<sup>13</sup> Afa angwag Ainiyagna sa feg afa ehena alagag mas Ainiyagim olug oniginag mo. Afa ehe membeg ehem hawag fim enag angwag ese enag alagagim fwahafe.

<sup>14</sup> Afa saglag Ainiyagim mas olug oniginag mo afa heafna angwag eba ati olug onigig eba alagag gafa Godna numweheageg skaufeg. Afa angwag Ainiyagim mas olug oniginag mo afa alagag ati olug onigig eba angwag gafa Godna numweheageg skaufeg. Afa atiaba enag mo nufunam feg fwainigba eba eheningina luwal eba afwambanai el fig. Afa enag eba awai. Ehengel eba Ainiyagna elni luwal.

<sup>15</sup> Afa amban el sa mas Ainiyagim olug oniginag mo eba atiaba ehe heafna kristen alagag me awai angwag me oksi ofenafiba eba ehe ma esei. Afa atiaba enaig esegba el sa Ainiyagim olug oniginig God enaig elim mas nihe mo fai. Asa God bigim awamonigim asa og olug enesiegna auguiag nihem patalfuiagim.

<sup>16</sup> Afa angwafig sa hig, ne mas anwenafig mo sa ne nimbeafna alagagimba kweagfuiba sa ma ehe Ainiyagna el fi me awai awai me. Afa saglag sa hig, ne mas anwenafig mo

sa ne nimbeafna angwagimba kweagfuiba sa ma Ainiyagna el fi me awai awai me.

*Haig ga sa ne fenaba asa God nem awamonag eba sa ne gwenaig gafe*

<sup>17</sup> Afa Ainiyag haig haig auguiag sa nengelim mimageni. Afa ka mungwali sios la nai elim enaig nihe mo sihifenig. Maia God nem awamonigba haig auguiag sa ne fig eba sa ne gwenaig augufe.

<sup>18</sup> Afa el sa ati heafna nihi lofug kokohiagegba asa God ehem awamonag eba ehe ese el nihi lofug kofwag fwainig el fefe. Afa el mas nihi lofug kokohiageg mo afa God sa ehem awamonag eba ehe ese enaig onigig fefe ka sa nihi lofug kokohiage.

<sup>19</sup> Afa el nihi lofug kokohiagig me awai awai me eba esug feg. Afa Godna nihe mom higi patalfuiag eba naho kwania nemug feg.

<sup>20</sup> Haig ga sa ne fenaba asa God nem awamonag eba sa ne gwenaig gafe.

<sup>21</sup> Atiaho ne esug gafugag el fenaba afa God nem awamonag asa nofeka enam fwina onigim. Afa ati ne mina fegba esug gafugag elni mina fwahagim eba se ese.

<sup>22</sup> Afa el esug gafugag el fenaba asa Ainiyag ehem awamonag asa Ainiyag nai yi fegim ehe mas amtakwalig nihe ahnai skaufeg. Eba gwenaig feg el esug gafugag el fwainig feg asa Ainiyag ehem awamonagba sa ehe Kraisna esug gafugag el feg afa ehe Kraisim ahnai skaufeg.

<sup>23</sup> Afa God heafna Legim faini asa nengelim lambig sa nofeka elni onigigim ahnai skaufini.

<sup>24</sup> Afa nilite haig augu sa ne finibi asa God nengelim awamonig eba sa ne gwenaig augu God i ahfe.

*Angwamingna i afa bontag angwafigna i mo*

<sup>25</sup> Afa glanu koka pese nengelni angwamingna sahighim osihin. Afa Ainiyag mas kam ena nihe mo faig mo. Afa Ainiyag kam aflafenag asa ka nufunam mo sihig asa ne kiafna ena onigigim highim.

<sup>26</sup> Afa glau haig haig kinig ati feg asa ka onigig eba suialafeg sa ne glau haig goheg eba sa ne gwenaig gofum.

<sup>27</sup> Afa atiaba ne angwafigni fegba eba nofeka ehem oksinag olina. Afa atiaba ne angol fwai gohugba eba nofeka angwafig flag oli.

<sup>28</sup> Afa atiaba ne angwafig flagba eba ne mas amtakwalig nihe eseg mo. Afa atiaba angwaming alagagim flagba eba ehe mas amtakwalig nihe eseg mo. Afa el glau ohnanam sa

ati angwafigni fig eba kaksag kinig ehengelim pugunifi asa ka membeg ese nem enaig kinig pugunife.

<sup>29</sup> Nilite, ka enaig sihifeg asa glau ohnanam eba awaiegim meyini ofe. Asa glau feg afa ikag enag osuna feg afa el sa angwafigni fig eba sa ma Godim ahnai skaufinim ofenai el angwafig fwainig.

<sup>30</sup> Afa el sa wewat ogor eba sa ma ofenai el olug kinig fwainig fig. Afa el sa titige ogor eba sa ma ofenai el sifakale fwainig fig. Afa el sa gawigim kigna lambig eba sa ma enaig onigig fi gawig mango kiafna mo.

<sup>31</sup> Afa el sa bite nai gawigna gafugafig eba ese enam fwina onigife. Asa hwa bite glau feg eba mungwali gawig nahgum awaiefe.

<sup>32</sup> Afa ka membeg ese haig onigig nengelni onigigim hugfu lambkufe. Afa el angwafig fwainig eba Ainiyagna gafugagim onigig asa ehe membeg Ainiyag sa ma sifakale.

<sup>33</sup> Afa el angwafigni figbi eba bitenai gawigim onigig asa ehe membeg heafna angwag sa ma sifakale.

<sup>34</sup> Asa enaig onigig ehena onigigim hugflaukug asa ehe sambaga onigig lambtigig. Afa angwafig alagag fwainig afa angwaming feg eba Ainiyagna gafugagim onigig asa ehengel membig ehengelni elig i afa sungwabug i afsug Godna fi. Afa angwafig alagagna fig eba bite nai gawigim onigig asa ehe membeg heafna alagag sa ma sifakale.

<sup>35</sup> Afa ka enaig esog asa ka membeg nem kwaganigim. Ka mas nem kwenagim membeg mo, amo ka membeg ne mangwal eseg eba sa ma suialag gofi afa sa ne nimbefum mungwali Godna gafugagim nufunam nemug fai.

<sup>36</sup> Afa kwablogim angwafig ati eso fwahinig asa ehe enag angwafig i hawagigim fwina onigig afa ehe enaig onigig feg nihe ka ehem esenag eba mas suialafeg mo afa eheningi membeg ahfeg hawagigim asa ehe haig minaba fenam aflafife eba ma esei. Afa ehe enaig sa eseg eba mas amtakwalig nihe feg mo.

<sup>37</sup> Afa amban el enaig onigig feg ka angwag fwainigba eba ka sa amtakwalig eligni sawiegim pigauipi. Afa el ehem hekusinig fwainig afa ehe angwafig flagim oksig asa ehem enag angwafigim ehem esunug afa ehe mas enam flag mo eba enaig gafa suialafeg.

<sup>38</sup> Asa el enag angwafig ehem esunug sa ati flag eba ehe suialag nihe eseg. Afa el enag angwafigim sa mas flag mo eba enag el suialag nemug go.

<sup>39</sup> Afa alagag nofkenagag gohugba ehena angwag sa ma gwese ehe i hawag fi. Afa ehena alagag lahagba asa enag

angwafig ming alagag aflafiba eba heafna sawieg la ma esei. Afa enag alagag eba sa ma Ainiyagim olug oniginag fei.

<sup>40</sup> Afa ka enaig onigig feg ehe esug ogofiba eba ehena sifakaleg kwania fefe. Afa ka onigig Godna Sungwabug ka nai yi gafa gohba asa kam onigig faig.

## 8

### *Fane mwakwal godim faig mo*

<sup>1</sup> Autunam ne kam fane mwakwal godim faig na mom sahini. Afa glanu koka enam sihi. Eba nufunam big suialag anwena ati flig. Afa el anwenagna fig eba hefum fingi fig afa el mingnagim membegonug eba mingnagim fingi fekukug.

<sup>2</sup> Afa el enaig esog kaba suialag anwenagna feg eba enag el mas numwehe anwenafeg mo.

<sup>3</sup> Afa el sa Godim fwina membenag eba God ati ehem anwenafenag.

<sup>4</sup> Asa sis mwakwal godim tuhlu faigim afa sa ka enaig onigig feg. Afa big anwenafig mwakwal god mas goh mo eba sungwag behig feg. Afa ming gafa big ati anwenafig eba mungwa God mungu go.

<sup>5</sup> Afa el enaig onigig fig bite la i afa of la i haig haig “god” gohka. Afa atiaba kaksag “god” i afa “ainiyag” i fegba,

<sup>6</sup> Afa bigelbi ati big anwenafig eba mungwa God mungu go ehe eba Alag fegim afa mungwali gawigim upuguna asa big gohugim ehena gafugagim esig. Eba mungwa Ainiyag mungu go eba Sisas Krais. Afa ehe nai yi mungwali gawig afohieg asa big gafa ehe nai yi nofkenag afohie.

<sup>7</sup> Afa mingnag el enam mas numwehe anwenafig mo. Autunam mingnag el mwakwal godim fingi fi fwiafena asa glau ehe onigig fane el mwakwal godim faig eba enag mwakwal godna. Afa ehengelni onigig mas wasneig mo asa ehe onigig el enag fane ahgagba eba amtakwalig nihe esig.

<sup>8</sup> Afa fane mas bigim Godna nof la kwagani. Afa atiaba big fane foiyugogba enaba mas bigim Godna nof la piga lambpigoi. Afa atiaba big fane ahgagba enaba mas bigim Godna nof la kwaganig mo.

<sup>9</sup> Afa nengel sa haig haig fane gaunam ahgagig sa ne nimbeafum numwehe nof mo fifibi masa ne eseba afa el mas olug onigig wasneig feg mo asa ehe gwenaig esenam ehem pefe.

<sup>10</sup> Afa el mas onigig wasneig mo nem nangugum afa esog ne suialag anwenagna feg afa ne ikagim sefu mwakwal godna lala fane neg. Asa ehe nangunam afa ehe gafa ogra gwenaig ese.



<sup>11</sup> Asa nengelni suialag anwenag enaig esigbi elim onigig mas wasneig mo ehem amtakwalig fatig. Afa enag el eba nengelni nilite afa Kraiss ehem lahanag.

<sup>12</sup> Afa ne enaig esegba afa enag nilite amtakwalig eseg asa eba ne ehena onigigim wasneig fwainigim amtakwale fatig afa ena mina eba ne Kraissim amtakwalig nihe finig.

<sup>13</sup> Asa mangwal fane sa ka negba asa kana nilite ena nai yi amtakwalig nihe eseg eba ka mas ena fanem pese nei asa ka oksig masa nilite amtakwalig nihe esefe.

## 9

### *Pol kanog fwatig elni nihe ehe esegna mom sihig*

<sup>1</sup> Afa ka mas nihe mo ahnai skaufei. Afa ka kanog fwatig el feg afa ka bigelni Ainiyag Sisasim ati nangug. Afa ka Ainiyagna gafugagim esegba asa nengel olug waikefig.

<sup>2</sup> Afa mingnag el enaig onigig kam fini fi eba mas kanog fwatig el feg mo. Eba ne ati anwenafig kaba enaig el feg. Afa ne Ainiyagna el figbi asa enag ati ofug kaba kanog fwatig el feg.

<sup>3</sup> Afa maia el kam sehigbi asa ka pese enaig esonug.

<sup>4</sup> Afa kagel enaig gafugag esigbi asa sios la nai el kam fane i bu i kwaganig. Atiasi enaba amtakwalig me? Amo eba awai.

<sup>5</sup> Afa Pita afa ming kanog fwatig el afa Ainiyagna suminieq mo sihiagiafugum eba heafgelni kristen angwafig nangum afuna. Afa kagel enaig nihe esigbi eba amtakwalig ka esig me?

<sup>6</sup> Afa sios el mingnag kanog fwatieg elim kwaganig. Haiseqba kaningi Barnabas i mungu sa ningana gafuga ahfenam asa kig flagim eligim kwefwagim? Haiseqba ne mas kangelim kwaganig mo?

<sup>7</sup> Afa ami el mas heafna kigna lofugna fanenaba lambig mo. Afa asona alag eba heafna ena asonai fane fla neg. Afa bulmakauni yuwigig el eba bulmakauni tutna ehelum kweagfug.

<sup>8</sup> Afa enag lasug mo mango ka elni onigig la nai mungu fla sihi mo amo eba Mosesna nihe mo gafa gwenag esog.

<sup>9</sup> Afa Mosesna nihe mo enaig esog, "Maia bulmakau neana gafugag enaig esegba ehe sa wit sisigim papaugufiq ofefiba asa fug lambigim. Nofeka ehena mengigim kagfo sa fwahaiba ma ehe gafa mingnag wit fugim ne." Afa God enag bulmakaum oniginig eso mo.

<sup>10</sup> Afa God kagel gafugag elim oniginigim asa enag mo esog. Afa Mosesna ginof eba kagelim ofgunig asa el aso leg nuhmwagefug afa el nog yihwag fe gohug eheningi gafuga ahfegim afa honigig of eba ka ena aso nai fane ogug ahflafe.

<sup>11</sup> Afa kagel Godna mom nengelni olug yi kumu fwahig. Atiaba kagel nengelni mingnag gawig lambi gonugbi ofenai enag el aso nai lambig eba enag nihe amtakwalig me?

<sup>12</sup> Afa atiaba mingnag gafugag el sahtiginim nengel nai yi kwefwag fligbi eba suialag nemug feg atiaba ka nem sahtigigbi.

Afa kagel mas mangwalim nengelim sahtigi goni mo. Amo kagel haig haig kinig kahlig asa ka oksig mangwal nihe esigim eba Kraisna suialag mona minam kagfog.

<sup>13</sup> Afa ne ati anwenafig Godna kwania lala gafugag el heafna fane ena lala nai flag. Afa el enaig gafugafeg sis simesko la tuhlugum asa Godim faig ehe hefum enana koflag flag.

<sup>14</sup> Afa Ainiyag gwenai nihe feg el sa Godna suialag mo sihiagiifu asa ehengel enag gafugag la nai kwefwag lambi.

<sup>15</sup> Afa atiaba ka nem sahnig sa ne kam kweagfug eba na ka esete afa ka mas enaig eseg mo. Afa ka mas enag ginof ningihianig mo asa glau ne kam kweagfu. Afa atiaba kam lahagim muhla fegba ka fwina oksig nem sahnagim sa ne kam kweagfu. Afa enaig ka eseba sa ka kefim fingi feg asa ka mas membeg mo mo behig fegim.

<sup>16</sup> Afa ka Godna suialag mo sihiagiaka asa ka mas enag la kefim fingi fei. Afa God kam wasneig mo sihinag asa ka enam eseg. Kasabam afa ka Godna suialag mo sihiakag fwainigba.

<sup>17</sup> Afa kiafna onigig la enag gafugag esegba asa enanam suialag sa ka fla fe afa mango kiafna onigig mo eba God ehe kam enag gafugag fai asa ka eseg.

<sup>18</sup> Afa mangwal sa ka enag gafugag enanam flag eba enaig eseg ka Godna suialag mo sihiagiaka afa ka sifakale ka mas elim sahna enanam kam mungwag kwefwagim. Afa enag sifakale eba naho kana mungwag kwefwag.

<sup>19</sup> Afa ka mas elni esug gafugag el feg mo, amo eba awai. Afa ka kikefim eseg asa ka mungwali elni esug gafugag el fenig asa ka membeg kaksag elim kwaganiba sa ma Godna el apukefi.

<sup>20</sup> Afa maia ka Ju el nanam gafugafegba ka Ju elni auguiag lofug feg asa ka membeg Ju el sa ma Godna el apukefi. Afa ka mas nihe mo ahnai skaufena mo afa el nihe mo ahnai skaufig sa ka ehengel nanam gwenai augufegim asa ka membeg ehengel sa ma Godna el apukefi.

<sup>21</sup> Afwambanai el eba Mosesna nihe mo fwainig. Afa maia ka afwambanai el nanam gafugafegba sa ka gwenai augufeg asa ka membeg ehengel sa ma Godna el apukefi. Afa ka mas Godna nihe mo fwahag mo amo eba ka Kraisna nihe mom ahnai skaufeg.

<sup>22</sup> Afa el sa olug onigig mas wasneig mo maia ka ehengel nanam gagba sa ka gwenaiig augufeg asa kog ehengel sa ma Godna el apukefi. Afa mungwali haig haig el nanam sa ka gwenaiig augufeg asa haig haig mina gam mingnag sa ma Godna el apukefi.

<sup>23</sup> Afa ka enaig mungwali eseagegba asa kog Godna suialag mo sa ma kwaniafe. Afa ka gafa asa ena mo menai suialag flai.

<sup>24</sup> Afa kaksag el sa kikini kwefwa goseagig afa enanai eba mungu el goseg asa ehe ikag kikini gofseg elni gawigba flag. Afa sa ne gafa kikini gwenaig ikafe ofenai el membeg gofseg gawig ika flagim.

<sup>25</sup> Afa el kwania goeses laba afu afehba ati heafim tagia fuhu fwahagim asa afug. Afa ehe enaig esigbi asa afug gofseg gawigba faflifi afa enag gofseg gawig eba mwakwalig gohug. Afa bigelbi ehenge pusiafuhba eba wahkig gohug gawigim fligim sa ne neagafa fwina ese.

<sup>26</sup> Afa ka enam onigigim asa ka mas kiapeskafe afa malula eba mas ka ninga munum klaitufe.

<sup>27</sup> Asa ka kiafna eligim tigege wasneigim sa ka ikag. Afa ka Godna suialag mom mingnagim sihinugenam masa kikef mo amtakwalig nihe esebe asa ka mas enag goseg gawig flai.

## 10

### *Nofeka mwakwal godim lotuinim*

<sup>1</sup> O nilite, ka membeg sa ne enam pese onigim. Ati ne anwenafig bigelni simbianingag Mosesim patalfuna afa leango ehengelim sagfla fakani afa suialagna kwania bum apaiyegonam ehagam magigim afuna.

<sup>2</sup> Afa leango i bu i ehengelim esenibi asa ofenaiba bu la apaiyegim sa Mosesna el fig.

<sup>3</sup> Afa ehengel mungwali mungwa fane Godna Sungwabug sa faini asa ena ahgana.

<sup>4</sup> Afa ehengel mungwali mungwa bu Godna Sungwabug sa faini asa ena ahgana. Afa Godna Sungwabug fun la buum upuguna afa sa mungwali enag buum ahgana. Afa enag fun eba Kraisa afa sa ehe ehengelim wankafena.

<sup>5</sup> Asa God kaksag enag elim mas sifakaleni mo afa ehe ehengelim amtakwalig klaitini asa ehengelni melig eligim bite behig la klaitifefufena.

<sup>6</sup> Afa God enaigba esenaba eba bigim ogfunig asa bigim kwenig ese big amtakwalig nihe eseagifi asa simbianinga esini.

<sup>7</sup> Masa big mwakwal godim lotufinifi asa mingnag ati enaig esini. Afa Godna mo enaig esog, afa el augugim fane i bu i ahgagigim afa sa angwafigim gose sihiagig.

<sup>8</sup> Afa ese big aga taitu nihe fiahgifi asa ati mingnag enaig esinibi afa sa mungwa osuna 23,000 elim pigihiana.

<sup>9</sup> Afa ese big Ainiyagim yuhnifi asa ati mingnag enaig esinibi afa sa sombine ehengelim guhiagofenaba asa pigihagofena.

<sup>10</sup> Nofeka memtog mona lagim asa mingnag ati enaig esiniba asa oflanai amtakwale tifeule el ehengelim kwaklaitina.

<sup>11</sup> Afa enaig mungwali asa ehengelim puguni eba bigim ofgunig afa el ehengelni enag mo ginofig eba bigim enaig esonig nofeka enaig esi eba bigel ati awaieg osuna muhlafini.

<sup>12</sup> Afa amban sa enaig onigifeg kikeba wasneig go asa ma ehe numwehegofo ese nem pefe.

<sup>13</sup> Afa mungwali yuhnag sa ne pugunagba eba ati mingnag elim gafa pugunig. Eba God ati heafna mo sihi fwahag eba mas enam fwahai. Ehe mas nem yuhnagim fwahianaiba asa enag mas nem filafe. Afa maia yuhnagba nem pugunagba asa God nem kweagfugim afa mina nem ofgunag asa ne enanai yi wasneig gohug.

*Mwakwal godna fane i afa Ainiyagna fane i*

<sup>14</sup> Asa kana suialag hihe sa ne mwakwal godim lotu fenigim membifini.

<sup>15</sup> Afa nengelni onigig ati ne ihlafig asa ka nem sihinig sa ne nimbefum enag mom kwefihiagi.

<sup>16</sup> Afa kaf big Ainiyagim mungwali fligim afa Godim suialag onigbi eba ofgug big mungwali Kraisna taf fligim asa ehe bigim suialafehiageg. Afa amba sa big fligim ahgagba eba ofgug big mungwali Kraisna elig afohie.

<sup>17</sup> Enag amba eba mungu feg afa big kaksag el enag mungu amba ahgagba eba ofgug bigel eba mungu elig fig.

<sup>18</sup> Sa ne Ju elni nihem onigim. Afa mungwali el sis tulfug Godim faigim asa ehe mo ming ehegnai ahgag. Afa enag nihe ofgug enag el God i ahgo.

<sup>19</sup> Afa ka mas enaig sihi feg mo mwakwal god eba nufunam feg afa fane sa mwakwal godim faig eba alganam feg. Eba ka mas enaig sihifeg mo.

<sup>20</sup> Amo, eba awai. Ka enaig sihi feg afwambanai el mangwal sa ne sanelim faig eba mango ne Godim fai mo. Afa ka mas membeg mo ne sanel i ahgo.

<sup>21</sup> Nofeka enaig ese Ainiyagna kaf lanai bu nenam afa ikanam sanelni kaf lanai bu ne fim. Afa nofeka Ainiyagna fanem gafa gwenaig ese.

22 Masa big enaig esibi eba Ainiyag bigim laginifi. Atiaho bigelni wasneigbi Ainiyagna wasneigba filafeg?

*Mangwal sa ne eseageg sa ma Godna unehlag kwaniafe*

23 Afa mingnag el enaig esog og mas kam mangwal kwenig mo afa haig haigba big esofifibi eba big esifi. Eba nufunam afa mingnag nihe mas bigim kwagani afa mingnag nihe eba bigim kwaganig. Haig haigba big esofifibi eba big esifi afa mungwali nihe eba mas bigim wasneig fai.

24 Afa nofeka nimbefum mungu onigim afa sa ne enaig onigife haig sa ka esenam asa ka mingnag elbi kwaganife.

25 Enaba ne esefe maket la nai sis ne flanam ne nefe afa nofeka enam oniginam afa sahim og hwa sis nihig atiame mwakwal godim faig me awai awai me?

26 Afa Godna mo enaig esog;

Mungwali bite i afa mungwali bitenai gawig i eba Ainiyagna feg.

*Sam 24:1*

27 Afa afwambanai el atiaba nem sahnafe og “Aublo na fane ahne” afa ne membeg ika negim afa mangwal fane sa nem fakanag eba seka ne afa nofeka enam oniginam afa sahim og hwa fane atiame mwakwal godim faig me awai awai me?

28 Afa atiaba nem enaig esonafe og, “Hwa sis ati mwakwal godim faig.” Asa nofeka enag sis ne. Afa ne enaig sis neba el sa nem sihinag masa ne ehem kinig faife.

29 Afa ehe enaig onigig safeg amban enaig eseg eba amtakwalig nihe patalkug. Afa enag el nem enaig onigifenaiba asa nofeka enag fane ne.

Afa atiaba amban el enaig sahnafegba og, “Eba haisegba sa ming elni onigig kam kwenag?”

30 Afa fane ka flanam Godim suialag onaiba afa ka nefe haisegba el sa kam lagnag?

31 Afa mangwal sa ne eseg afa fane i bu i ne neg eba sa ne enaig ese eba Godna unehlag kwania feg.

32 Afa neana gohug sa ne suialag gohe nofeka Ju el afa afwambanai el afa Godna el mi kinig fai.

33 Sa ne gwenaign esi asa ka eseg. Koka haig haig eseageba sa ma mungwali elim sifakalig faig. Ka mas kikefum onigi amo, koka mingnag elim kwaganiba sa ma God ehengelim pese lambi.

## 11

*Sios angwafig haig afohie ne fifi*

1 Afa ka Kraiswa nihem esegba sa ne gwenaign kana nihem esi.

<sup>2</sup> Afa nengel mas kam etetinig mo. Afa ka nengelim mo faigbi afa ne enam higigim sa ne patalfug asa ka nengelim sifakalenig.

<sup>3</sup> Afa ka membeg sa ne mungwali anwenafi God eba Kraisna misog fegba afa Krais eba saglagna misog fegba afa saglag eba angwafigni misog feg.

<sup>4</sup> Afa saglag sa mo sihiag afa beten feg enaig ofefiba ese heafna misogim lofugna agife masa Kraisim afwanfug faife.

<sup>5</sup> Afa angwafig sa mo sihiag afa beten feg enaig ofefiba sa ma heafna misogim lofugna agi. Afa enaig eseg fwainigba eba heafna alagagim afwanfug faig. Eba gwenaig asa heafna lapogim gigege.

<sup>6</sup> Afa angwafig misogim agiegim oksigba eba sa ma lapogim mungwali gigegei afa enaig esegim afwanfegim ofefiba eba sa ma heafna misogim agi.

<sup>7</sup> Afa saglag ese heafgelni misogim agifi eba ehe enaig ofug Godna suialag gafugag afa Godna eba fwina kwania feg. Afa angwafig enaig ofug heafna saglag eba kwania feg.

<sup>8</sup> Asa God mango saglagim angwafigni kigna eseamo, amo eba God angwafigim saglagna kigna esena.

<sup>9</sup> Afa God mango saglagim gafugafe angwafigim fai mo. Amo, eba angwafigim gafugafena saglagim faina.

<sup>10</sup> Afa sa angwafig heafna misogim agig enaig eba ofug ehe heafna saglagim ahnai skaufenag afa Godna oflanai el gafa enam nangui.

<sup>11</sup> Afa Ainiyagna onigig enaig eseg angwafig sa ma saglagim kweagfui afa saglag sa ma angwafigim kweagfui ese hefum algam faig ahfefe.

<sup>12</sup> Afa angwafig eba saglag nai yi puguna asa gwenaig eseg saglag angwafig nai yi pugug. Afa mungwali gawig eba Godnai yi apukeg.

<sup>13</sup> Afa nengel nimbefum hwa mom kwefihiagi afa angwafig misogim agi fwainig asa Godim sahna enaigba suialag me awai awai me.

<sup>14</sup> Afa elni nihe bigim enaig ofug fenig saglag sa lapog kwinam feg eba mas suiala feg mo.

<sup>15</sup> Afa angwafig lapog kwinam nafeg afa el ehem nangugim og eba suialafeg. Afa God ehem kwinam lapog faig asa hefum enana kagfoi.

<sup>16</sup> Afa sa mingnag el ogra ena onigigim filafatiba asa ka enaig esog kagel i afa Godna mingnag el i eba mas ming nihe fig mo.

*Ainiyagna fane haig fla sa big flifi*

17 Afa glawo ka nem ming wasneig mo osihin afa ka mas nem sifakalenig mo. Afa maia ne ambe lotuigim alaskuhlagba afa nengelni nihe eba mas elim kwaganig mo amo eba elim amtakwalig esenig.

18 Afa kana lasflam mo eba enaig esog ka enaig higig feg maia ne Godim lotuinigim alaskuhlagba asa ne nimbefum monagigim afa kokohiagig. Afa ka onigig mingnag mo ka higig eba nufunam.

19 Ka onigig nengel haig haig onigigna fig asa enam ambala ogfug amban suialag nihe eseg afa amban amtakwalig nihe eseg.

20 Afa maia nengel laskuhlagim afa ne mas Ainiyagna fane nihe la suialafig mo.

21 Afa ahgag la ne enaig esig nimbeafgelni fane lambigim afa ikagna ahgag afa sum yi mingnag el ambegim bini pigig afa mingnag el fwina wain bug ahgagig.

22 Afa nengel ati nimbeafgelni lala feg sa ne enanai yi fane i bu i ahgagifinim asa ne laskuhlag la mo ambefim. Afa ne mas mingnag kristenim onigigonig mo afa nengelni nihe ne enaig esigbi mingnag gawig fwainigim afwanfig faigog. Haig sihi enaba sa ka nem fenife? Atiaho ka nem enaigimba esonig eba suialag me? Amo eba awai.

### *Ainiyagna fane flig nihe mo*

23 Afa Ainiyag sa kam mo ogfunig asa ka enag flagim afa nem faig. Eba enaig eseg afa sinaini Judas Ainiyag Sisasim angoluweg elni ninga la afwahagim ofefnaba asa ena sinaini Sisas amba flanam,

24 afa Godim suialag onam afa kowagnam enaig esona og, “Hwaba kana lofug, ka nem enaba afaibi nengelim kwaganigim. Sa ne gwenaig eseafufum asa kam oniginafufum.”

25 Afa ahga fwahinim asa kafim gafa gwenaig esena og, “Hwa wain bug eba glaunai Godna mo sihi fwahag afa kana taf ena mom kike fwahag. Afa maia ne enam ahgafiba sa ne kam oniginafufum.”

26 Afa maia ne enag amba i bu i ahgafiba eba ne Ainiyagna lahagna mom sihig afa ne gwenaig eseafufiba asa ehe pese blofe.

27 Asa amban Ainiyagna fane i bu i gauna flafeg mas hefum kwefihiagenam flai eba ehe hefum Ainiyagna lofug mi afa taf mi amtakwalig fatig enaba heafna moala.

28 Asa mungwali el sa ma heafgelni mungu mungug onigigim kwefihiaginim asa ma Ainiyagna lofug i taf i mo fli.

29 Afa amban sa mas numwehe onigwage Ainiyagna lofug flag mog mo enam mas anwenafeg mo asa ehe amba i bu i

gauna flafeg eba hefum amtakwalig gufla blug seaifug asa God ehem kwefihianagefe.

<sup>30</sup> Asa ne enaig esigbi sa ena mog la nengelinai mingnag kaksag elbi mas wasneig mo afa gihe feskofegim asa mingnagimba pigiahiag.

<sup>31</sup> Afa lasflam mo asa big biafna nihem numwehe kwefihianagefeba eba mas God bigim kinig fai.

<sup>32</sup> Afa Ainiyag bigelni nihem ogma suialafe eba sa bigim susug faig. Afa ehe enaig esegba asa maia ehe bitenai elim kwefihianug ofefiba afa mas big ehengel nenam fi.

<sup>33</sup> Kana nilite, maia ne laskuhlanam Ainiyagna fane aflifibi sa ne mingnagim nenge gonifim.

<sup>34</sup> Afa amban nem bini lahafe eba sa nimbeafna lala nenam blo masa God nengelni laskuhlag la nem enam kwefihianugefe.

Afa maia ka blonam asa mingnag wasneig mom mo nem sihinuge.

## 12

*Haig haig wasneig Godna Sungwabug kristenim faig sa ma enana gafugafi*

<sup>1</sup> Kana nilite koka nem sihinibi sa ne numwehe anwenafi asa haig haig wasneig Godna Sungwabug bigim faig.

<sup>2</sup> Afa ne ati anwenafig autunam ne afwambanai el fifnibi haig haig mwakwal god nofkenagag fwainig nem hugfu lambkuiafenaba asa ne ena amtakwalig mina ne ehengelim patal lambfuiafna.

<sup>3</sup> Asa ka membeg nengel sa ne numwehe anwenafi afa amban sa Godna Sungwabugim patalkug ese Sisasim amtakwalig mo sihinafe. Afa el behig mas enaig esoi 'Sisas eba Ainiyag' amo Godna Sungwabug sa ma ehem esenaiba asa ehe enaig esoi.

<sup>4</sup> Afa Godna Sungwabug haig haig wasneig mimagenig afa ena Sungwabug eba mungu feg.

<sup>5</sup> Afa haig haig mina kwaganigim sa big eseagig afa eba mungu Ainiyagim big esenig.

<sup>6</sup> Afa haig haig gafugag sa big esiagig eba mungu God bigim wasneig faigbi asa big mungwali enag gafugag esiagig.

<sup>7</sup> Afa God mungu mungu elim haig haig wasneig faigbi enaba ofgug el ati Godna Sungwabugni fig afa ehengel enaigna figbi sa ma mungwali mingnag elim kwagani.

<sup>8</sup> Afa Godna Sungwabug mungu elim wasneig faig asa ehe suialag ongigna mo sihig afa enag mungu Sungwabug ming elim gafa wasneig faig asa ehe suialag anwenag mo sihig.



<sup>9</sup> Afa Sungwabug elim wasneig olug onigig faigim afa ena mungu Sungwabug ming elim eba elim ugwe fatiag wasneig faig.

<sup>10</sup> Afa ming elim wasneig faig asa ehe haig haig kigmog ofgufiageg afa ming elim wasneig faig asa ehe Godna mo fli sihiafule el lofeg, afa ming elim wasneig faig asa ehe haig haig sungwabugim anwenafeg eba suialag me awai awai me, afa ming elim wasneig faig asa ehe haig haig mona sihiageg afa ming elim wasneig faig asa ehe ena mom waike feg sihig.

<sup>11</sup> Afa ena mungu Sungwabug ehe ena mungwali gafugag eseageg afa heafna membug la ehe haig haig wasneig mungu mungu elim mimagenig.

### *Bigelni eligni lasug mo*

<sup>12</sup> Afa bigelni elig eba haig haig gohka afa elig eba mungu feg. Afa bigel kaksag kristen el asa big Kraisna elig mungu feg.

<sup>13</sup> Afa big Ju el i afa afwambanai el i afa esug gafugag el i afa gafugag el i God bigim mungwali heafna mungu Sungwabugni bu la laitig asa big mungu elig apukeg afa big ena mungu Sungwabugim flig.

<sup>14</sup> Afa bigelni elig eba mas mungu ehengelni feg mo amo eba kaksag feg.

<sup>15</sup> Afa mong enaig esofe, “Ka mango ninga mo asa ka mas elig yi gohfi.” Afa sa enaig esofe eba sa gwese elig yi kufe gofi.

<sup>16</sup> Afa angug enaig esofe, “Ka mango nofug mo asa ka mas elig yi gohfi.” Afa sa enaig esofe eba sa gwese elig yi kufe gofi.

<sup>17</sup> Afa mungwali elig sa nofug fifi eba haig highi sa fifi? Afa mungwali elig sa angug fifi eba fungug haig lag sa fifi?

<sup>18</sup> Afa God heafna membug la enaig eseg mungu mungu eligim lambigim asa mungu la kig feg fwatig.

<sup>19</sup> Afa sa ming ehengenai elig mungu fefe eba mas elig nemug fei.

<sup>20</sup> Afa elig eba mungu feg afa enanai yi eba mong i ninga i kaksag afohie.

<sup>21</sup> Afa nofug mas ningam sihinai “Ka nem oksinag ne kam kweagfufe” afa misog gafa mas mongim sihinai “Ka nem oksinag ne kam kweagfufe”.

<sup>22</sup> Amo ese enaig esofe, afa ming ehengenai eligim big onigig eba auwawig feg afa mas kwania feg mo afa enaig gohug fwainigba asa elig mas suiala gohe.

<sup>23</sup> Afa ming ehengenai eligim big onigig eba mas wasneig mo enaba big suialafiah flag. Afa ming ehengenai eligim sa big afwanfig enam fenagim asa big enam kagfug.

<sup>24</sup> Afa ming ehengenai elig el sa nangug enaba big mas mungwalofug nihena esini. Afa God mungwalig eligim ehe gafugafeg afa ahagam sa el eligim onigig eba mas kwania feg mo asa ena mo fwina numwehe flig.

<sup>25</sup> Masa ese elig algana ikaminefefe asa mungu mungu mungwali sa ne nembefum gwenaiig fakwaganfiahgi.

<sup>26</sup> Afa mungwa ehengenai elig sa susug flafe eba mungwali elig gafa ehenai yi waheg flig. Afa mungwa ehengenai elig sa unehlag kwania flafe eba mungwali elig ehenai yi waheg sifakalig.

<sup>27</sup> Afa bigel mungwali eba Kraisna elig fig afa big mungu mungu ehena ming ehengenai elig fig.

<sup>28</sup> Afa God ati haig haig kifegna gafugag sios la fwatiaka. Afa angig kefeg eba Godna kanog fwatig el afa angieg kifeg eba Godna mo fli sihiaule el afa olyinai kifeg eba ogfuiag el afa ming eba el sa haig haig kigmog ogfuiagig afa enam egig gohug eba el sa wasneigni feg asa enaba gihe elim ugwetifig afa mingnag el gafa mingnagim kwaganig afa mingnag el eba mingnagim mina afuiagim ogfugonug afa mingnag el sa haig haig mona lagwagig.

<sup>29</sup> Afa God mas enaig esei mungwali elim kanog fwatieg elbi fwati afa mungwali el mas Godna mo fli sihiaule el apuke eba gwenaiig feg mas mungwali el enaig esi ogfuiag el afa el sa kigmog ogfug

<sup>30</sup> afa el sa gihe elim ugwe fati afa el sa haig haig mona lagig afa el sa ena mom waike sihi.

<sup>31</sup> Asa ne fwina enaig onigife mangwal wasneig sa kwania feg ka sa enam fla.

*Elim membenig nihe mo*

Afa glau ka nem osihin mangwal nihe sa fwina goseg.

## 13

<sup>1</sup> Afa sa ka elni haig haig mona afa oflanai elni mona sihiagba afa sa ka elim membenig fwainigba eba kana mo lagig ofenaiba li megim tigigbi asa esug lago afa ofenaiba ainim heugugbi asa gokonig.

<sup>2</sup> Afa atiaba God kam wasneig faigba asa ka Godna mo fla sihiaule el lofeg afa atiaba ka mungwali gawigim anwenafeg afa ka Godna mungwali meaganai onigigim anwenafeg afa atiaba kana olug onigig ihlafegba asa ka mugum esonafe sa hili ika afa ka nai yi elim membenig nihe gohug fwainigba eba ka esug feg.

<sup>3</sup> Afa sa ka kiafna mungwali gawig el gawig fwainig elim mimagegoniba afa sa ka kikeafna eligim fwahaiba sa kam suwina tuhlufi afa sa ka nai yi elim membenig nihe gohug fwainig eba enag gafugag sa ka eseg eba mas kam kweagfui.

<sup>4</sup> Afa el mingnagim membenig eba enaig eseg elim nengigim afa aflahlanam enaig esenag afa enaig el mas elim ambobugenai afa mas hefum fingi fei afa mas tonbusiagei.

<sup>5</sup> Afa el mingnagim membenig eba enaig eseg nimagegim eba mas ehe ika gofsei. Afa ehe mas ikagna ninimui afa amtakwalig ehem esinig enam mas onigaufi.

<sup>6</sup> Afa membenag nihe eba mas amtakwaligim sifakalenag mo eba nufunam mom sifakalenag.

<sup>7</sup> Afa membenag nihe eba enaig eseg haig haig kinig sa enaig elim pugunafe eba ehe mas enam oksi. Afa enaig elbi eba wahkig Godim fwina anwenafenagim asa wahkig ningegohba asa wahkig ehem kinig mas pigauipi.

<sup>8</sup> Afa membenag nihe eba gwese wahkig gofife afa Godna mo fli sihiaule elni mo eba awaiefe afa haig haig mona lagwagig gafa eba awaiefe afa el sa kwania anwenafig afa ehengelni enag anwenag gafa awaiefe.

<sup>9</sup> Afa suialag anwenag sa big flig eba mingnagim mungu big lambig. Afa Godna mo fli sihiaule elni mo eba mingnagim mungu lambig.

<sup>10</sup> Afa maia mangwal netini sa puguiba asa mangwal mungu mungug sa big lambig eba gweyi awaiefe.

<sup>11</sup> Afa maia ka luwal lofug gofenaba kana mo lagig i afa onigig i afa kwefihiageg i eba luwal weti nihig. Afa maia ka saglag lofegba asa ka luwalna niheba fwahag.

<sup>12</sup> Afa glau big mangwalim sa nanguig eba ofenaiba mangwalna sungwagim bu nof la mas big numwehe nanguig mo. Afa autunai la big enam numwehe ambala nangufi. Afa glau ka mungu mungugim anwenafeg afa enanam maia mangwal netini puguiba asa kana anwenag gafa enanam netini pugufe asa ofenai mungwalofug God ati kam anwenafenag.

<sup>13</sup> Afa sambaga mungu nihe gwese wahkig gohug eba Godim olug onigig i afa nengeafu God suialag bigim esenig i afa membenag nihe i. Afa membenag nihe enam nihem mungwali gose lambugu.

## 14

### *Sungwabugni wasneigni faigna mingnag mo*

<sup>1</sup> Afa membug nihem sa ne numwehe kehli afa mingnag Godna Sungwabugni wasneig gafa sa ne enam membinim fli. Afa Godna mo fli sihiag enag wasneig eba sa ne enam fwinam membenam fli.

<sup>2</sup> Afa enaig wasneig eba elim suialafenig afa amban el sa ming mona lagig eba mango elim sihin mo amo ehe Godim mungu sihinag. Afa el mas enam mom anwenafi asa ehe Sungwabugni wasneigni nufunam meaganai mo sihig.

<sup>3</sup> Afa amban el sa Godna mo flig sihig afa enaig el eba elim sihigonig. Afa enaig mo elim kwaganigba asa ehengelni onigigim wasneinig afa olug enesieg faig.

<sup>4</sup> Afa amban el sa ming mona lagig eba hefum mungu kweagfug afa amban el Godna mo fli sihig eba mungwali sios elim kwaganig.

<sup>5</sup> Afa ka membeg nengel mungwali sa ne ming mona lagim afa ka fwina membeg sa nengel Godna mo fli sihiafule el fi. Afa sa el Godna mo fla sihig eba mingnag elim ming mona lagigim gosenig. Afa atiaba el enag mog mo ambala upugunigbi asa sios elim mungwali kwaganig asa enag sambaganingi gafugag eba mungu ahfeg.

<sup>6</sup> Kana nilite, atiaba ka nengel nangum blogba asa ka ming mona lagfe afa eba enaig moba nengelim kwagani me awai awai me? Afa sa ka nem Godna mo meaganai upuguiafeg afa suialag anwenag mo fai afa Godna mo flag sihig mi afa ofguiag mo mi faigbi enaba naho nem kwaganig.

<sup>7</sup> Afa sa ne gokonig gawigim onigim fufelo mi afa gita mi. Afa eheningina moag ugwe pugufe fwainigba afa el mas anwenafi mangwal mwanifini sa afati.

<sup>8</sup> Afa el hagig fufum fla ugwe moasife fwaingiba eba el mas suialag higignam asa mas fag hagig la ikagim numweheage.

<sup>9</sup> Afa mangwal sa ne esig eba gwenaig feg afa nengelni ming mona lagig numwehe fwainigba el mas nengelni mo anwenafi asa nengelni mo eba mo behig feg.

<sup>10</sup> Afa kaksag haig haig mona hwa bite la gohka asa mungu mungu eba mog mona ati fiahsaieg.

<sup>11</sup> Afa sa ka mungu mona lagigim etetife asa el enaig esogog sonaig moba mas ka anwenafei ehe ofenaiba membri nai el feg afa ka mas ehena hihe feg mo.

<sup>12</sup> Afa mangwal sa ne esig eba gwenaig feg. Afa ne membeg Godna Sungwabugni wasneigim fligim eba sa ne enaig gafugagim fwina membinim asa siosna elim kwaganim afa wasneig goni.

<sup>13</sup> Asa el ming mona lagigim eba sa Godim sahnibi asa God ehem enaig wasneig faibi sa ma enag mom waikefe sihi.

<sup>14</sup> Asa ka ming mona lagigba afa kana sungwabug eba Godim sihinago afa kana onigig eba mas enam anwenafeg mo.

15 Mangwal sa ka esefe? Afa ka sungwabugni Godim sahnai afa kiafna onigig nai yi gafa sahnai. Afa ka sungwabugni mwanifi fati afa kiafna onigig nai yi gafa gwenaig esei.

16 Afa ne enaig eseg fwainigba afa maia sungwabugni ne ming mona Godim suialag onaiba afa amban el sa ena mona anwenafeg fwainigba eba ehe mas nem mungu onigig fenam esoi eba nufunam eseg asa ehe mas neana ena mom anwenafei.

17 Afa neana suialag onag mo sa ne Godim sihinag eba suialag nemug feg afa enag mo eba mas mingnag elim kwaganig mo.

18 Afa sa ka haig haig mona sihig afa ka enanam eba ka nengelim mungwali elim gosonig asa ka enanam Godim suialag onag.

19 Afa maia sios el alaskuhlagba ka membeg koka afala gohug mo sihiba sa ma ehengel enam anwenafinim mingnagim ogfugoni afa 10,000 kaksag ming mona sihiagigim el mas enam anwenafig mo afa enam kam oksig.

20 Kana nilite, masa ne luwalna onigig lofefe sa ma neana onigig saglag lofei. Afa luwal sa amtakwalig nihem mas onigig mo sa ma enaig nihe la neana onigig gafa gwenaig gofi.

21 Afa Godna nihe mo enaig esog; Ainiyag enaig sihifeg og el haig haig mona lagig fig afa membi nai el fi asa enaig el nai yi ka kiafna elim mo sihinife. Afa ka enaig esenigbi afa ehengel mas kana mom higinig mo.

*Ais 28:11-12*

22 Afa haig haig mona lagig wasneig Godna Sungwabug sa faig eba mango kristen elim ogfuni mo amo eba afwambanai elim ogfunig God eba wasneig feg. Afa Godna mo fli sihiaule wasneig eba kristen elim ogfufenuge eba mango afwambanai elni mo.

23 Afa mungwali sios el laskuhlagim asa mungwali el haig haig mona lagwagig afa atiaba sa afwambanai el ambe nengel nai yi saiye gofe afa mo sa ne ming mona lagwagig ehengel mas enam anwenafi. Afa ehengel enaig esogofe nengel moetetig el fig.

24 Afa maia sios el laskuhlagim asa mungwali el Godna mo fli sihiaule el enaig mo sihig afa atiaba afwambanai el ena mom etetig ambe nengel nai yi saiye gofe afa ehengel enam higinim afa anwenafig ka amtakwalig esig asa enag mo ehengelim kwefhianugeg.

25 Afa heafgelni meaganai onigig eba ambala upugufe asa ehengel mongkokini kwakwaginim asa Godim fingi finim esogofe og, "Eba nufunam God nengel nai yi go."

*Lotuna nihe sa ma suiala pugufei*

<sup>26</sup> Kana nilite, kana mo enaig esog. Afa maia ne laskuhlagim asa ming el mwanifi fatig afa ming el Godna mo ogfuiag feg afa ming el Godna mo meaganai upuguiag feg afa ming el ming mona sihiafeg afa ming el enag mom waikefeg. Eba mungwali gafaugag ne esigbi eba sios elim wasneinig.

<sup>27</sup> Afa amban ming monaba alagfiba nofeka mungwali enaig mona lagim sa ne sambaga me awai sambaga mungu me sa ma enaig esi. Afa masa ese enam kwegfu fukukafe. Eba sa ne enaig esi maia amban mungu sigag la sihi fwa-hafiba sa ne ming gafa gwenai esefim. Afa sa el ena mom waikefe sihi.

<sup>28</sup> Afa el atiaba ena waikefe fwainig fegba eba sa ma el ming mona lagiule mwalfwai laskuhlag la gafiba afa olug megam hefum God i sihiagafei.

<sup>29</sup> Afa sambaga el me awai sambaga mungu el me asa Godna mo fli sihiaule el fig ehengel mungu sa ma sihibi afa mungwali mo sa ma ena mom kwefihiagi.

<sup>30</sup> Asa enag laskuhlag la el sa pegafife afa God ehem mo faife afa mo sihiaule el eba sa ma tigiafui.

<sup>31</sup> Asa nengel mungwali Godna mo sihig eba sa ne mungu mungu sigag la sihiagifim asa ma mungwali el enam anwe-nafinim afa mungu mungum wasneig lambfihagi.

<sup>32</sup> Afa Godna mo fli sihiaule el sa ma hefum tige funam nengefi maia sigag feba sa ma ehe sihi.

<sup>33</sup> Asa God eba mas gasaf lambfinam amtakwal skofe amo ehe enesieg faigbi asa ehengel aflahlanam augug.

Mungwali sios el sa ma enaig esi.

<sup>34</sup> Afa maia alaskuhla fiba angwafig ese mo lagfi. Afa ehengel enanai yi mo sihiag eba awai afa Ju elni nihe mo enaig esog angwafig ese gofsifi.

<sup>35</sup> Afa ehe sahig olugbi ofefiba sa ma heafna alagagim lala sahnai eba amtakwalig angwafig laskuhlag sihiagba.

<sup>36</sup> Eba Godna mo mas nengel nai yi puguiag mo afa God mango heafna mo nem mungu fiah mo.

<sup>37</sup> Afa amban esofe ka Godna mo fla sihiaule el feg afa Godna Sungwabug kam wasneig faig eba sa ma enaig onigifei mangwal sa ka nem ginofenig eba Ainiyagna wasneig mo.

<sup>38</sup> Afa amban sa ena mom oksife eba sa nofeka ehena mo higim.

<sup>39</sup> Asa kana nilite sa ne Godna mo fli sihigim fwina membini afa nofeka ming mona lagigim kwena.

<sup>40</sup> Eba mungwali gafugag sa ma suialag pugufenam ihlafihkai eba mas kwefwa goseagi.

## 15

### *Krais lahag la nai pese buihiagna mo*

<sup>1</sup> Kana nilite, autunam sa ka nem Godna suialag mo sihi fwahani afa glau enam koka nengelni onigigim pese ilafatigi. Afa ena mo sa ne flini asa ne enana olug onigigim wasneig afohiafena.

<sup>2</sup> Afa mo ka nem sihinigbi eba Godna suialag mo. Afa sa ne enag suialag mom ugwe kehlafe eba God nem amtakwalig la nai pese lambife. Afa awaiefe eba neana olug onigig eba esug gō.

<sup>3</sup> Afa mangwal mo sa gofseg sa ka flana ena ka nem sihini. Ena moba Krais lahagim bigelni amtakwaligim huguflaitinig eba gwenaiG Godna mo enaig esog.

<sup>4</sup> Afa ehem kumwahlinibi afa sambaga mungu osuna maia ikanaba asa ehe pese nofkikena buihiana. Ehe enaig eseg gwenaiG Godna mo enaig esog.

<sup>5</sup> Afa ehe glauwana Pitam ika pugunam afa ika 12 pela kanog fwatieg elim puguni.

<sup>6</sup> Afa enaig esenam asa mungu osuna ehe ikanam heafna patalfuiag 500 elim gohugum afa gwesim hilifeg enaig elim puguni. Afa mingnag kaksag enag elbi ene mahim nofkenag afo afa mingnag eba ati pigihiag.

<sup>7</sup> Afa enaig esenam asa ikanam Jemsim mo pugunam afa sumi yi mo mungwali kanog fwatieg el mo nanguini.

<sup>8</sup> Afa sumi yi nemug mo ehe kam gafa blo puguna asa ka ofenaiba luwal nihieg puguiag fwainig fiahfenaba asa mia kam ikagna wanigana.

<sup>9</sup> Afa mungwali kanog fwatieg sa afohie kaba weti fenig. Autunam ka Godna sios elim kinig faiule fena asa ka mango enaig esenam asa el kam unehli og ne kanog fwahag el feg.

<sup>10</sup> Afa God kam esmunagim kweagfugba asa ka enaig elbi feg. Afa enag esmunagim kweagfwag eba ati kam suialag gafaugafenag asa kana gafugag mungwali mingnag kanog fwatieg elim gosening. Afa enag gafugag ka esegba mango kiefna wasneigni eseg mo amo eba God kam esmunagim kweagfug asa ka enaig eseg.

<sup>11</sup> Afa sa ka me awai ehengel me nengelim sihigonife enaba kagel mungwa mo sihig sa ne ena mom kehlinim afa olug onigini.

### *Lahag el pese bugiagafegna mo*

<sup>12</sup> Afa kagelni mo eba enaig esogog Krais lahag la nai pese buihiag afa haigsegba nengel mingnag enaig esogog el lahag la nai mas buihianam pese nofkena flai.

<sup>13</sup> Afa sa el lahag la nai buihia fwainigba eba God mas Kraism lahag la nai ilafo fatina mo.

14 Afa sa Krai laha la nai buihia fwainigteba eba kagelni mo eba esug feg afa nengelni olug onigig gafa gwenai esug feg.

15 Afa ming onigig gafa enaig eseg afa el laha la nai buhianam pese nofkena flag fwainigba asa Godna mom ka nem sihigonug eba mas nufunam feg mo eba kagel enaig esogog God ati Krai laha la nai ilafo fatina.

16 Afa el sa laha la nai buihia fwainigba eba enaig eseg eba Krai gafa mas laha la nai buhiana mo.

17 Afa Krai sa buihia fwainigba eba enaig eseg neana olug onigig eba esug feg asa ne mahi amtakwalig nihe la afohie.

18 Asa ambangel Krai olug oniginifigim asa pigig eba ehengel gafa awaieskofefe.

19 Afa big enaig onigigfibi afa glauwaba Krai bigim kwanig afa sumi yi eba ehe mas enaig esei asa ma el bigim aflafegonim og, niasabanig nengelni olug onigig eba esug feg.

20 Afa eba nufunam nemug Krai laha la nai ati pese buhiana afa enag ofug Krai gof esegba asa el ati pigig ehengel gafa pese bugiagafefe.

21 Afa mungu el esegba asa big mungwali pigiego eba gwenai feg ming mungu el esegba asa melig pigieg el sa ma pese bugiagafei.

22 Afa mungwali el sa Adamna simp fig asa mungwali pigiego eba gwenai feg mungwali el amban sa Krai nai yi fig eba laha la nai bugiagafenam nofkenag flifi.

23 Afa ehengel mungwali heafgelni osuna sa bugiagafefe afa lasflamba Krai ati buhiana afa maia ehe pese bloiba asa heafna el gafa pese bugiagafefe.

24 Afa enanam awaieg osuna maia puguiba asa mungwali gawig awaiefe. Eba enanam mungwali sanelni misog mi afa wasneig sanel mi afa ehengelni mungwali kigmogim eba Krai enam mungwali amtakwalig klaitife afa mangwal sa ehem ahnai skau finig eba enam lambinam God bigelni Alagna ninga la fwatife.

25 Afa sa Krai mungwali gawigim ehe misog fenife afa ikan maia God mungwali angoluwigim filafatiba asa ena mo ehe Krai ahnai skau fwatife.

26 Afa sumi nai angoluwig sa feg ehe enam amtakwale fatiag eba laha nihem.

27 Eba Godna mo enaig esog “God mungwali gawigim ati ehena ahnai skau fwatig.” Afa enag mo enaig esog God mungwali gawigim Krai nai yi ahnai skau fwatig eba mango enaig esoah mo God eba Krai ahnai skaufenag.



<sup>28</sup> Afa enanam Krai mungwali gawigim misog fenim afa ehe hefum luwal lofenam God nai yi ahnai skau fwahaiba asa God mungwali gawigim misog nemug fenfi.

<sup>29</sup> Afa mingnag el sa lahag elni unehlag la bu la apaiyeg. Afa melig pigieg el bugiagafe fwainigba haigsegba sa ehengel enaig esig eba esug gafugafig mas ehengelim kwaganig.

<sup>30</sup> Afa melig pigieg el bugiagafe fwainigba haigsegba sa kagel mungwali osuna gafugag ehenge pusigbi asa ka enanai yi susug flig.

<sup>31</sup> O nilite, mungwali osuna kinig yi ka lahag la ika fapugufe go. Eba nufunam afa ming gafa nufunam feg asa ka sifakale ne ati Sisas Krai bigelni Ainiyag nai yi fig.

<sup>32</sup> Afa mingnag Efesus la nai el ofenai sangwali nai sis lofug asa ka hagfu. Afa sa ka bite nai onigig kehlagufufe eba mango suialag sa kam pugunafe. Afa melig pigieg el bugiagafe fwainigba enaig nufunam fegba asa big bu i fane i mo ugwe ahagafifim asa sini mas big afofi.

<sup>33</sup> Afa ese el nem gasaf lambfifi. Afa ne el amtakwalig enanam wahe afuhugba eba neana suialag nihem amtakwale fatinifi.

<sup>34</sup> Afa sa ne pese suialag onigig fenam asa ne nimbeafna amtakwalig nihe mo fwahanam. Afa ka enaig esog mingnag el mas Godim anwenafinig mo asa enag nem afwanfeg faig.

### *Lahag elig buihiagna mo*

<sup>35</sup> Afa mingnag el enaig sahigfig melig pigieg el haig bugiaga sa finim afa haig elig sa apukefe.

<sup>36</sup> Afa enaig sahig eba onigig etetig el fig. Maia ne li fug kumohlagba asa bite megam nogigim sa nog mo pusufeg.

<sup>37</sup> Afa maia big kon gug afa mingnag li fug big lambigim mas big lig nagum kumui amo big gug mungu fakumufi kumubi asa apuke.

<sup>38</sup> Afa eba God heafna membug la gugim lig faig asa mungu mungu gug heafgelni ligni, lofugna afa figegna fiahsahig.

<sup>39</sup> Afa ka nem buhiag elni lasug ming mo osihin. Afa mungwali nofkenag gawig sa fiahsahig ehengelni elig eba mas mungwalofug feskofeg mo. Afa elni elig eba alganam feg afa sisna elig eba alganam feg afa twafigni afa sawagna gafa gwenai esenig.

<sup>40</sup> Afa of la nai gawig alganafeg afa bitenai gawig alganafeg. Afa of la nai gawig suialag wag eba of la nai feg afa bite nai gawig suialag wag eba bite nai feg.

<sup>41</sup> Afa osu ati heafna wagna feg afa was i bagnofut i gafa gwenai heafningina wagna ahfeg. Afa mungu mungu bagnofut eba ati heafgelni mungu mungu ombusugni fiahsahig.

<sup>42</sup> Asa melig pigieg el bugiagafeg gafa eba gwenaig lofeg. Afa bigelni elig sa lahafug asa big enam kumohlig. Afa elig sa pese buihiag eba mas lahanam nogi.

<sup>43</sup> Afa maia big melig eligim kumohlig eba bitenai elig. Afa maia God enag eligim ilafo fatigba eba suialag nemug feg. Afa elig sa big kumohlig eba auwiauwig afa elig sa pese buihiag eba wasneigni feg.

<sup>44</sup> Afa elig sa big bite megam kumohlig eba bite nai elig afa elig sa buihiag eba heven la nai elig.

Afa bite nai elig ati feg afa heven la nai elig gafa ati feg.

<sup>45</sup> Afa Godna mo enaig esog, God lasflam el Adamim gafugafenam afa bitenai eligim nofkenagag faina. Afa sumi nai Adam\* eba algam feg asa bigelni sungwabugim nofkenagag faig asa bigel heven la afu gofufe.

<sup>46</sup> Afa God mango gof sungwabugni eseamo amo ehe lasflam mo bitenai eligim gafugafenam asa sumi yi mo sungwabugni upuguna.

<sup>47</sup> Afa gof Adam eba bite nai el fena afa sumi nai Adam eba heven la nai blona.

<sup>48</sup> Afa ambangel sa bite nai nihem esig eba ogfug ehengel enag bite nai elim patalfug. Afa ambangel sa heven la nai el fig eba ofenaiba enag el sa heven la nai blona.

<sup>49</sup> Afa glau bigelni elig eba enag bite nai elni lofug fig. Afa sumi yi big mungwalofug enagfifi el sa heven la nai blona.

<sup>50</sup> O nilite, afa kana mo eba enaig esog, afa elig sa nihigni afa tafna fig enaig elbi mas Godna kembang la seaifui afa elig sa lahafug eba mas ika wahkig gohug kembang laba seaifui.

<sup>51-52</sup> Sa hig, ka nem sagmona mo ambala opuguni. Mas bigim mungwali pigiahaia eba maia awaieg osuna puguiba afa sumi fuf moasiba asa big ikagna waikefifi ofenai nofug baikuhla feg. Afa maia fuf moasiba lahag el bugiagafenam wahkig nofkenagag flifi mas pese pigiahaia. Afa bigel sa nofkena fig eba waikefinim ehengel lofwagfifi.

<sup>53</sup> Afa elig sa nogig eba sa ma waikefenam afa mas pese nogi afa elig sa falahafe eba sa ma waikefenam afa mas pese lahai.

<sup>54</sup> Afa elig sa lahagim sa nogig eba sa ma waikefenam afa mas pese lahanam nog i afa enanam maia puguiba eba Godna mo nufunam pugufe. Afa sa enaig esog;

God ati lahagna wasneigim bagagafegim filafe fatigba afa lahagim amtakwale klaitigim asa ehe gose. *Ais 25:8*

<sup>55</sup> Afa ming mo enaig esog;  
Lahag, neana wasneig elim sa pigaupieg eba hanai yi maia?

\* **15:45:** Sumi nai Adam ogfug eba Sisas.

Lahag, neana wasneig elim sa susug faig hanai yi maia? *Hos 13:14*

<sup>56</sup> Afa lahagna agisuwi eba amtakwalig nihe nai blog afa amtakwalig nihena wasneig eba nihe mo la nai flag.

<sup>57</sup> Afa sa big Godim suialag onag asa bigelni Ainiyag Sisas Krais bigim kwaganigba sa lahag mi afa amtakwalig nihe mo filafiawagig asa big enam sifakali.

<sup>58</sup> Asa kana suialag nilite, sa ne wasneinim numwehe afohie. Afa sa ne Ainiyagna gafugam fwinam esena kafim eba sa ne anwenafi mangwal sa ne Ainiyagim gafugafenag eba mas awaie.

## 16

### *Godna elim kig kwaganigni mo*

<sup>1</sup> Afa glau ka nem osihin sa ne kig lambi agogolinim asa Judia nai kristen elim kwagani. Afa sa ka Galesia nai sios elim sihinig sa ne gwenai g esi.

<sup>2</sup> Afa mungwali Sande nengel mungu mungug el mungwali sa ne kig lambfinim algam gisfu sugufum. Afa amban sa kwania kigna feg eba sa ma kwania fakai afa amban sa weti kigna feg eba sa ma weti fakai. Afa enag kig mo sa ne kehli fliafim afa maia ka bloiba asa enag kigba ihlafegim gi asa ne enanam mas agogoli.

<sup>3</sup> Afa enag kig lambi lafiagim sati elim mo wegfug fwati afa ka blonam asa ka ehengelim ogfunig mo ginofenim asa ka ehengelim ginofna kigna Jerusalem gam ningitigife.

<sup>4</sup> Afa ne enaig onigififi eba suialag sa ne nimbe kagelim wanka eba ka sa kike wankai.

### *Pol Korinim nangwagigim mina sugwagena*

<sup>5</sup> Afa lasflam ka ika Masedonia provins la pugunam asa ka blo nengelim mo nangwagfe. Afa kana onigig eba koka Masedonia gam ika.

<sup>6</sup> Asa ka nengelim blo mwakwalig wanganam maia bu nai yi nineg nai yi was tigiafuiba sa ka enanam ikai me. Afa sa ka asimba akofiba sa ne kam kwefu.

<sup>7</sup> Afa ka mas membeg mo nengelim nangwaginam afa ikagna fwati ikai afa Ainiyag kam sawifenagba eba sa ka membeg nengelim mwakwali wangai.

<sup>8</sup> Eba ka wani yi Efesus la auguian maia ikan Pentikosna buyis osuna puguiba.

<sup>9</sup> Afa kaksag el kam oksinig afa kaksag suialag gafugag esegim eba mina kam piginagba asa koka mwakwalig hwanai yi ga.

<sup>10</sup> Afa Timoti eba Ainiyagna gafugag el ka lofug feg asa maia atiaba nem blo pugunigbi eba sa ne ehem suialafe fliba asa ehe mas embefe.

<sup>11</sup> Ese amban ne ehem pigaupife asa ne ehem kwegfunim aflahlanam ningihi asa ma pese blo kam nangui. Eba ka ehe mi afa mingnag nilite mi nengenawo.

<sup>12</sup> Afa glau ka nem bigelni nilite Apolosna mom osihin. Afa ka ehem wasneig mona sihinag kog sa ma ehe mingnag nilitem lambinam afu nengelim nangwagi. Afa glau ehe ikagim oksig afa maia ehem suialafenaiba eba sa bloi.

*Pol fwahag mo sihig*

<sup>13</sup> Afa sa ne numwehenim afa olug onigig mo sa ne wasneig kehli afa nofeka embefe onigi sa ne wasneig afo.

<sup>14</sup> Afa mangwal sa ne eseg sa ne membug nihe la ese.

<sup>15</sup> Afa ne ati anwenafig Stefanas i afa heafna mungu lala nai yi eba naho ehengel Gris provins la lasflam Ainiyagim olug onigig elbi fini. Afa ehengel fwina onigigoni asa kristen elim kwaganigim esini. Kana nilite, ka fwina membeg sa ne enaig esi.

<sup>16</sup> Afa sa ne enaig el mi afa mingnag el sa gwenaig gafugag esig asa ne enam ahnai skaufegon.

<sup>17</sup> Afa maia Stefanas, Fortunatus afa Akaikus maia ambe kam nanguibi asa ka enam sifakaleg. Afa ne fwahaniba asa ehengel ambe nengelni sigagla kam kwegfuni.

<sup>18</sup> Afa ilawana ka nem kuskuni afa ehengel ambe kam sihinig asa ka sifakaleg afa ehengelni mo nengelim gafa sifakalenig. Sa ne enaig elim numwehe anwenafegonim afa suialafegoni.

<sup>19</sup> Afa Esia provins la nai sios el enaig esogog. Ka mas nem etetigonig mo. Afa Akwila i Prisila i afa sios el eheningina lala laskuhlagim asa Ainiyagim unehlag la gwenaig mo nem esogonig.

<sup>20</sup> Afa mungwali nilite hwa nai yi sa ehengel enaig esogog, ka mas nem etetigonig mo. Afa maia ne kristen nilitemba nangwanim sa ne nimbefum kikigiagi.

<sup>21</sup> Afa ka Pol ka kikeafna ningana hwa mo nem ginofenig ka mas nem etetinig mo.

<sup>22</sup> Afa amban el sa mas Ainiyagim membenag mo eba God sa ma ehem amtakwale fati. Bigelni Ainiyag se blo.

<sup>23</sup> Sa ma Ainiyag Sisasna esmunagim kwefwag nengel nai yi gofi.

<sup>24</sup> Sa ka Sisas Kraiss nai yi ka mungwali nem fwina membenig. Eba nufunam nemug feg.

## **Angigieg Mo Pol Korin la nai Siosim Ginofe Ninghiani Hwa buk enaig esog**

Afa Korin la mwakwal ogfugfiag el laskuiahla auguifena asa Polim kwasnaginim afa maia enaig nihe esinibi asa Pol olug kinig flana. Afa ehe ena mo higinam enam pipehianu-gena asa hwa bukba Korin lanaim ginofeni. Sa ma ehegel i Pol i pese sifakal ahfei. Afa lasflam hwa buklaba Pol Korin siosim ambala wasneig mona sihiani. Afa enaig mo autunam sa sihini afa ehe oksig enaig mo pese sihiagim. Afa ehegel maia tonbusinimbi afa ehem mo kwasnaginiba sa ehe wasneig moba nufunam enaig sihifeni. Afa Korin el Polna mom higinim asa mungu olug flinim afa hefum nuwehiaginim asa sifakali afofna. Afa enanam Judia nai Kristen elni auguiag eba mas suialag augufena mo.

Afa Pol Korin la nai Kristen elim awamonim ambe lasgulananam afa kig angogulinim sa ehe flakunam ehengelim kwagana. Afa sapta 8 ika 9 la pugug eba Pol olug fuklag mo sihinaba sa Korin la nai el enag gafugafegim kig faini. Afa sumi yi buk la Pol enaig esog mwakwal kanog fwatieg el ati ambe Korin la auguiaba afa ehegel kana gafugam pigipaigogim afa enaig esogog eba metunig.

Afa Pol ogra Korin la nai el ese mwakwal ogfuiageg elni mo higigonife.

### *God bigim olug enesieg faig*

<sup>1</sup> Ka Pol God heafna sawieg la kaba Sisas Kraisma kanog fwahag el. Na ka Godna Korin la nai sios el mi afa mungwali Akaia provins la nai kristen el mi hwa moba ginofe faig. Afa bigelni nilite Timoti gafa ka hawagba ka ginofeg.

<sup>2</sup> Afa God bigelni Alag afa Ainiyag Sisas Kraisma i sa ma nem esmunagim ahkwagani afa nem olug enesiegna sahfeni.

<sup>3</sup> Bigel Godna unehlagim fingi fi. Afa ehe bigelni Ainiyag Sisas Kraisma God afa heafna Alag feg. Afa ehe bigelni Alag elim aflafenigule afa ehe God elim olug enesieg faig.

<sup>4</sup> Afa maia big kinig fegba afa God bigim olug enesieg faig. Afa enag olug enesieg bigim flighi asa big gafa mingnag elim gwenag olug enesieg faigo.

<sup>5</sup> Autunam Kraisma kaksag kinig flana afa ilawa gafa big kaksag kinig flig. Afa God Kraisma kwania kwefufena afa Kraisma gohugum bigim gafa kwania kwaganig.

<sup>6</sup> Afa maia kagel kinig flig kahligbi afa ka enaig esigbi asa nem olug enesieg faig afa nengelni olug onigig suialafeskofeg. Afa maia God kagelim olug enesieg faigbi afa enag nem kweagfug afa nem ogfunag asa ne aftahlanam gafim maia kinig nem gwenaign opugunafiba.

<sup>7</sup> Afa kagel anwenafig ne wasneig afohie asa ka mas nem fwina kusugoni. Afa kagel anwenafig nengel gafa big gwenaign kinig mungwali kahli asa nengel gafa big gwenaign olug enesieg mungwali fli.

<sup>8</sup> O nilite, kagel membeg sa ne numwehe anwenafi haig haig kinig kagelim Esia provins la asa pugunig. Afa enag kinig kwania kinig feg afa kagelim pigaupig afa ka onigig kagelbi pigife.

<sup>9</sup> Afa kagelni onigig kagel mas afohie. Afa enag pugugba sa ka anwenafig kagel kikefim haig kwegfu mo asa ka God nai yi sefu afohie afa eheba esefe lahaig elim ihlaftigife.

<sup>10</sup> Afa kinig kagelim amtakwalig klaitiegim ofeba asa ehe kagelim ati ena minai kwaganig afa sa sumi yi gafa ehe kagelim kwaganife. Afa kagel olug onigig ehe kagelim gwenaign kwagani gofufe.

<sup>11</sup> Afa neagafa kagelim kwaganam afa Godim sahna. Afa nengel enaig esibi asa God enam higinam kagelim suialafenibi. Afa kaksag el enam nangunim asa Godim suialag oni.

### *Haig esegba Pol mas Korin gam ikana mo*

<sup>12</sup> Afa kagel kike enaig onigig fig hwa bite la God kagelim kwaganig asa kagel afsug nihem esig afa nufunam mo sihig. Afa nengelini na ka nem fwina esinig. Afa kagel mas bite nai onigig patalfui, amo God kagelim kwaganig asa enam kagel sifakalig.

<sup>13</sup> Afa ginof kagel nem ginofegonug mas ka ena mom sisaginim ginofi. Ka enaig membeg,

<sup>14</sup> hwa mo ilawo mas ne numwehe anwenafig mo afa autunai la ena mom ambala numwehe anwenafifi. Asa Ainiyag Sisasna osuna ofefiba ne kam sifakalegonifi afa kagel nengelini gafa gwenaign esegonifi.

<sup>15</sup> Afa ilawana mo ka enaig onigig feg ne kam sifakalenig asa ka onigig koka nem sambaganagim blo nangwagim.

<sup>16</sup> Afa maia ka Masedonia gam blo akofiba ka membeg koka blo nem lasflam mo nangwagnam asa ka esim mo ika. Afa ka Masedoniam fwahanam pese blo nem nanguiba asa ne kam kweagfuiba ka sa Judia gam mo ika.

<sup>17</sup> Atiaho ne enaig onigifig, onigig sa ka mas enag onigig eseg mo? Amo, ka mas bite nai onigigim esegim sawifenam afa waikefe ena mom pese kwei.

18 Afa God elim mas mwakwaleni afa ehe anwenafeg kagelni mo saka nem sihigonig eba mas ka mengena mo eigonam afa onigigna mo kumwahlanam afa awaionam kwei.

19 Afa Sailas i Timoti i afa ka Sisas Kraiss Godna Legna mo na ka nem sihigonig. Afa ehe mas sambaga onigig fei asa ehe mas sawifenam afa waikefe pese kwei, amo, heafna mo eba ei mungufeg.

20 Afa Godna mo sihi fwahanaba afa Kraiss ena mom sawifegim asa enam mungwali mo sihi fwahag ambala nufunam pugug. Asa Sisasna unehlag la bigel Godna unehlag fingi fig afa big esog, "Enaba nufunam!"

21 Afa God nengel mi afa kagel mi enaig eseni asa big Kraiss wasneigi afohie. Afa God ehe bigim hiliku heafna ehagam fwatig.

22 Afa ehe bigim enaig esenigbi asa heafna ginof ati bigel nai yi go eba ofug big heafna el fig. Enag ginof eba heafna Sungwabug bigim faig. Afa ena Sungwabug sa big flig eba bigim ofunug autunai la gafa bigel mungwali Godna suialag gawig lambife.

23 Afa Godna nof la ka nem nufunam sihinig ka oksig Korin gam blogum masa ka blonam nengelim wasneig mona lagninim afa nem kinig faifi.

24 Afa kagel mango nengelni misog el fig mo asa ka nem esogunug sa ne Godim olug onigini. Kati anwenafig nengelni olug onigig wasneigni neafohie asa kagel nengel nenam gafugafibi asa ne sifakali.

## 2

1 Afa sa ka enaig onigifeg masa ka pese bloiba nengelni amtakwalig mom ambala sihinibi afa sa ne olug kinig flife.

2 Afa sa ka nengelim olug kinig enaig esinibi afa amban sa kam enaig esenaiba sa ka sifakalefe. Afa nengel nai yi naho ka sifakalfeg.

3 Afa nengel sa kam sifakalinig afa ka oksig blo kinig flagim asa autunam ka nem ginofe ninghiani. Afa ka anwenafeg maia ka sifakal ofefiba afa ne gafa sifakalefe.

4 Afa ka nengelim oniginim asa ka enag kinig flagim afa ka ufwegim asa ka nem ginofenig. Afa ka mas enaig ginofeg mo asa ne kinig flig amo ka membeg ne numwehe anwenafi ka nengelim fwina membeni.

*Enag nilite amtakwalig esena sa ne heafna amtakwalig fwahana*

<sup>5</sup> Afa el nengelinai mangwal amtakwalig eseg afa nengelim mingnagim kinig faig. Mango kam mungu esena mo eba bigim mungwali esenig. Afa ka oksig enam fwina sihiagim.

<sup>6</sup> Afa nengel ehem mungwag esenig eba enag ogfug ehe amtakwalig eseg. Afa ehem esenigim eba mangwese ati ihlafeg.

<sup>7</sup> Afa glau sa ne heafna amtakwalig fwahanam afa suialag mona wasneifenam afa ehem kweagfu. Masa kinig ehem kwania fenam afa pigapife.

<sup>8</sup> Afa ka nem enaig sihifenig sa nengel ehem enaig esinighi sa ma ehe anwenafe nengel ehem membenig.

<sup>9</sup> Afa koka enam anwenafe ne kana mom higi patalfwi me awai awai me asa ka nengelim ginofe ningihiag.

<sup>10</sup> Afa amban elni amtakwalig sa ne fwahanag ka gafa ehem gwenaig esenafe. Afa atiaba sa ka amban elni amtakwalig nihe huguflaitinagba eba ka Kraiswa nof la enaigba esegim nem kwaganig.

<sup>11</sup> Masa Satan gof sefenam bigim filaitife. Afa sa big ati numwehe ehena gafugag nihem anwenafi.

*Pol Taitusna mom higinam membena*

<sup>12</sup> Afa maia ka Troas kembang ika pugunaba asa Ainiyag kam mina pigina asa ka Kraiswa suialag mo sihiagena.

<sup>13</sup> Afa mas ka bigelni nilite Taitusum enanai yi nanguna mo asa kana olug kinigna. Afa ka ena kembang mo fwahanam afa Masedonia provins gam ikana.

*Ainiyag wasneigni kanog fwatig el wasneig afohie*

<sup>14</sup> Afa bigel Godim suialag onig asa Kraiss mungwalim filafeklaitig asa God bigim goseni ikahba asa enam big patalfuia. Afa God kagel nai yi enaig esegba asa Kraissim anwenafig mo mungwali kembang gam ahkawagminafeg asa enag ofenaiba pauda suialag nifug pugunug.

<sup>15</sup> Afa big gafa ofenai paudana suialag nifug lofug fig asa Kraiss Godim faig. Afa enag nifug pugu ikaminafeg asa elim Godna mina gam afuiagim afa elim amtakwalig mina la afuiagim enam gafa enam mungwali fungug pugunug.

<sup>16</sup> Afa el amtakwalig mina la afug bigelni gafugag ofenaiba melig nifug asa elim amtakwalig klaitig. Afa el Godna mina la afug enag nifug eba elim nofkikenag faig. Afa el mas enag gafugagim heafna wasneigni esei.

<sup>17</sup> Afa kagel mango mingnag el lofug mo asa Godna mo sihiafug afa enanam kig flig. Afa God kagelim ningitigig asa kagel Kraiswa wasneigni nufunam mo Godna nof la sihig.



### 3

*Glaunai sihi fwahag moba kanog fwatig el enag gafugag el fig*

<sup>1</sup> Atiaho ne enaig onigig fig kagel sa kikiafgelni unehlagim fingi fi? Afa mingnag el enaig esig ginof fligim asa enag ginof hefum ogfug kaba suialag gafugag el fig. Atiaho ne enaig onigig fig kagel gafa sa nem ginofe faigoi o ka nem sahgonibi sa kam ginofegoni? Amo awai kagel mas enaig esi.

<sup>2</sup> Afa nengel nimbe eba kagelni ginof lofeg. Afa enag ginof eba kagelni olug yi go. Afa mungwali el enag ginof nangunim afa anwenafi suialag gafugag asa ka nem fegonug.

<sup>3</sup> Afa nengelni nihe elim ogfugonug afa nengel ofenai ginof Kraisa ehe ginofeg kagelni ninga la ningihiana. Ehe mango penna ginof fiah mo amo God nofkikenagag Kraisa ehena Sungwabugna ginofeg. Afa ehe mango fun fifag la ginof fiah mo amo ehe elni olug yi ginofeg.

<sup>4</sup> Afa Godna nof la kagel afohiegim afa anwenafig Kraisa wasneigni enag gafugag ka fig asa kagel enaig esogog.

<sup>5</sup> Afa kagel mas enaig esogog mo kagelba ati ihlafig enag gafugag figim. Amo, God ehe kagelim esenigbi asa kagel enag gafugag esigim ihlafig.

<sup>6</sup> Afa God ehe kagelim esenigbi asa kagel Godna glaunai sihi fwahag mo gafugag esigim ihlafig. Afa enagba mango autunai ginof nihe mo la go mo eba Sungwabug la go. Afa amban el mas autunai ginof nihe mo patalukug mo eba lahad ehem pugunafe afa Godna Sungwabug elim nofkikenagag faifi.

<sup>7</sup> Sa ne enam onigim autunam Godna nihe mo fun fifag la go afa maia Moses fla blu elim fainibi asa el Godna ombusug nanguni. Afa enag ombusug Mosesna nofbusug la mwakwalig gohnam afa awaiena. Afa maia ombusug gofenaba Mosesna nofbusug eba fwina ombusiagena asa Israel el ehem mas fwina nangwafufna mo. Afa enag nihe mo gafugafegba asa elim lahad pugunig. Afa enag Godna ombusugni wahag ahblog.

<sup>8</sup> Asa big enaig onigi Godna Sungwabugni gafugag ombusug eba fwina kwania fegim afa Mosesna ombusugim filafeg.

<sup>9</sup> Afa nihe mo eba mina elim ogfunig bigel eba amtakwalig el asa bigim lahad pugunife. Afa Godna ombusug ogfug enag mina eba suialag. Afa big anwenafig enag gafugag asa elim pese lambigim nofkikenagag faig enag mina eba fwina suialag nemug feg.

<sup>10</sup> Afa big anwenafig eba nufunam Godna glaunai kike fwahag mona ombusug eba fwina goflanaim kwania fenag asa autunai nihe mona ombusug mo gweyi fenag.

<sup>11</sup> Afa enag nihe mo mwakwalig ati gogum afa enag ombusug i waheg ahblog. Afa glaunai kike fwahag mo wahkig gwese gofife afa enagna ombusug eba fwina kwaniafeg.

<sup>12</sup> Afa big anwenafig enag ombusug wahkig gofufe asa kagel enam suialag mo sihigim mas ka embefi.

<sup>13</sup> Afa kagel mas enaig esi asa Moses esena. Asa ehe heafna nofbusugim lofugna kagfunaba asa ehe og masa Israel el nangunim afa anwenafifi enag ombusug ati kehife pegim awai ofe.

<sup>14</sup> Afa autunam Israel elni onigig etetiagini afa ilawa gafa enag lofug gwese go asa maia ehengel autunai sihi fwahag mom suwigigba afa enag lofug ehengelni onigigim kagfunig. Afa enag lofug eheba mas hilifui afa maia el Kraisim olug oniginagba asa ena mina ho Godna enag lofugum hugufu fatig.

<sup>15</sup> Afa ilawa gafa maia ehengel Mosesna nihe mom suwigigba enag lofug ehengelni onigigim kagfunig.

<sup>16</sup> Afa maia amban el onigig waikefenam Ainiyagna gum bloiba asa enag lofug hugufu pekafe.

<sup>17</sup> Afa enag mo "Ainiyag" eba ogfug eba Sungwabug. Afa Ainiyagna Sungwabug asa el nai yi gofiba eba mas mangwal ehem kagfui.

<sup>18</sup> Asa enag lofug mas bigelni nofbusugum kagfui afa Ainiyagna ombusug bigel nai yi gohba asa el nangug. Afa enag ombusug Ainiyagna blog afa bigim esenigbi asa big hef lofug apukeg. Afa Ainiyagna Sungwabug bigel nai yi gafugafeba asa ehena ombusug bigel nai yi hililaku.

## 4

### *Fwina suialag gawig bite sospen la go*

<sup>1</sup> Afa kagel mas enag gafugag yiskosig mo asa God kam aflafenigim afa enag gafugag kagelim faig.

<sup>2</sup> Afa afwanfeg nihe afa nihe meagam sa go ena ka enam masig fatig. Afa kagel mas elim mwakwaligoni afa Godna mom waike algana sihifi. Afa kagel Godna nof la afohiegim asa ka ambala nufunam mo sihig afa enag ogfug kagel haig el maia. Asa mungwali el anwenafig kagel eba nufunam el.

<sup>3</sup> Afa kagel Godna suialag mo sihifug. Afa mingnag el enaig esogog enag mo mas ambala feg mo. Afa el asa suwi lagig mina la patalfuia afa ehengelim mungu enag mo mas ambala fenig mo.

<sup>4</sup> Afa el mas Godim olug oniginag mo asa Satan, hwa bite nai god, ehena onigigim sikulufenag asa ehe mas Godna suialag mona ombusug nangui. Afa enag ombusug suialag mo nai blog eba Kraisna ombusug afa eheba God i mungwalofug ahfeg.

<sup>5</sup> Afa mo ka sihig mango kagelni mo mo eba Sisas Kraisna mo asa ehe Ainiyag feg. Afa kagel Sisasim kwefugum asa kagel nengelni gafugag el fig.

<sup>6</sup> Afa God enaig esog, “Sa ma ombusug ahkauminefei afa sikulufegim filafetig.” Afa ehe bigelni olugim ombusug fenigbi asa bigel Kraisna nofbusugna ombusugum nangugim afa Godna ombusug nemugim anwenafi.

<sup>7</sup> Afa Sungwabugni gawig fwina suialag nemug bigel nai yi go afa bigel ofenaiba bite sospen. Afa enag ofug Godna kigmog kwania eba mango kagelni mo.

<sup>8</sup> Afa haig haig kinig bigelim pugunim afa enag kinig mas bigelim filaiti. Afa maia big enaig esogog, “Haig big esefi?” Asa bigel mas enam yiskosi fwahi.

<sup>9</sup> Afa el bigelim amtakwalig esegonigbi asa God bigelim mas nangwagi fwatig mo. Afa bigelim kwagaitifigbi asa mas bigel pigig mo.

<sup>10</sup> Afa el bigelim wahkig ona kwagiklaiti asa Sisasim esini. Asa Sisas bigelim wasneinig sa ma el ehena nofkikenagim bigel nai yi nangug.

<sup>11</sup> Afa bigel Sisasna el figbi afa maia bigel nofkikena afohieba angoluweg el ona bigelim kwagaitifi asa mas bigelim kagfugonig mo. Asa bigelni auwiau elig Sisasna wasneig nofkikenagim ambala ofug.

<sup>12</sup> Afa eba enaig eseg maia kagel Godna gafugag la afohieba asa lahag kagelim muhla fenig asa nofkikenagag eba nengelim faig.

<sup>13</sup> Afa Godna buk la el enaig ginofena “Ka Godim olug oniginag asa ka sihig.” Afa kagel mungwalofug gwenai olug onigifig asa kagel sihi.

<sup>14</sup> Afa big anwenafig God Ainiyag Sisasim pese ilafo fatigba asa big Sisasna el fig asa God bigim gafa ilafonam afa nengel mi kagel mi asa bigim mungwali wankanam asa big ehena nof la laskuhlafe.

<sup>15</sup> Afa enag haig haig kinig kagel nai yi pugunig eba enag nengelim kwaganigim. Afa Godna esmunagim kwaganig kaksag el nai yi puguiakagba asa fwina kaksag el Godim suialag onig asa enag Godna unehlagim fingi fig.

<sup>16</sup> Asa kagel Godna gafugagim mas yiskosig fwahi. Afa bigelni elig watiau ofe asa mungwali osuna bigelni sungwabug glaunai wasneig lafe.

<sup>17</sup> Afa enag kinig kagel kahlig eba wetiti afa mas fwina gofi. Afa enag kinig kagelim numwehenugegim afa God i wahkig suialag hawag ahfegim. Afa enag suialag gag mungwali bitenai kinigim gofsenig.

<sup>18</sup> Afa bigel mangwal asa nofna nangug mo asa big enam fwina onigig. Afa bigel mangwal asa nofna mas nangug mo asa big enam fwina onigig. Asa mangwalim big nofna nangug eba mwakwalig gohnam awaiefefe. Afa mangwalim big nofna mas nangug mo eba wahkig wahkig gofife.

## 5

<sup>1</sup> Afa bigelni elig ofenai kogma lala big augwia. Afa hwag bitenai lala noginam bwabuhia opefeba big anwenafig God bigelni ming lala nimblag fwahag. Afa enag lala mango el ningana nimbla mo. Eba God ehe heven la nimblag asa enag wahkig gofife.

<sup>2</sup> Afa glau big hwag eligni gafa big kusguageg esog asa ka fwina membig heven la nai lala fligim asa ofenai el lofug yimieg fatiagim membig.

<sup>3</sup> Afa big mulug elig heven la nai flife afa enag elig bigelni sungwabugim kagfufe ofenai el hefum lofugna kagfug.

<sup>4</sup> Afa maia big enag kogma lala la augwiaba big kinig kahlagim asa kusguagegim esog. Afa big mas enaig esogoi bigelni bitenai elig mo ma lahai, amo, big fwina membig glaunai elig sa ma bigim kagfunam afa bigelni bitenai eligim nofkikenag faig.

<sup>5</sup> Afa God ehe bigim enam numwehenugegim afa heafna Sungwabug bigim faig. Afa enag Sungwabug ogfug big autunai la mungwali Godna suialag gawig lambifi.

<sup>6</sup> Afa big enam onigigim asa wasneig afohie. Afa big anwenafig maia big hwag bite nai elig afohieba big Ainiyagna kembigim membifinig.

<sup>7</sup> Afa mangwal sa big nofna nangug bigel mas enam patalukui. Afa bigelni olug onigig bigelim mina ogfunig.

<sup>8</sup> Afa ka pese sihi kagelni onigig eba wasneig go. Afa kagel membig hwag elig fwahanam afa Ainiyag i suialag hawag ahfefe.

<sup>9</sup> Afa kagel hwanai yiba hwag bite nai eligni augug me afa heven la nai eligni gafa ka auguiafiba kagelni mog onigig eba mungu feg kog ma Ainiyag sifakaleg flai.

<sup>10</sup> Afa maia Kraim elim kwefihiag ofefiba asa bigel mungwali heafna nof la afohiefefe. Afa mungu mungu el mangwal asa hwaig eligni esig suialagim afa amtakwaligim eba ehem mungwa faife.

*Bigel elim kwaganig asa ehengel ambeg Godim muhla finig*

11 Afa ehe enaig esefe afa kagel ehem embefigim asa kagel elim God nagum hugufuwan ambeg. Afa God kagelim ati anwenafenig kagel haig el feg. Afa ka onigig nengelni olug gafa kagelim ati numwehe anwenafegonig.

12 Afa nengelni nof la kagel mas pese kiafgelni unehlagim fingi fi, amo, afa kagel enaig sihifig asa negel kagelni nihem sifakalinim afa el eligim fwina oniginag afa olug nihem oniginag mo yiskosig ka membig kagelni mo nengelim kwaganig sa ne enag mo enaig elim waike sihigonig.

13 Afa kagel kikefim enaig esogog asa mingnag el kagelim og nengel misog eteti skofeg. Haig kagel esig eba Godna unehlagim fingi fig. Afa sa ka onigig ne suialag nafifi eba sa ka nengelim kwaganig.

14 Afa Kraiss kagelim membenig asa kagel heafna gafugafig. Afa kagel ati anwenafig enag el mungu mungwali elim lahanigim asa kwaganig. Asa ofenai bigel mungwali ehe i ahlahag.

15 Afa ehe mungwali elim lahagim asa kwaganig asa el nofkena augwia nofeka nimbefim onigi amo, enag el lahagim pese buhiag sa ne ehem oniginim patalfu.

16 Afa glau kagel mas bite nai onigi flig enana elim kwefihiage goni. Eba nufunam autunam kagel Kraissim enaig esini afa glauwaba ka mas enaig esi.

17 Asa amban el Kraiss nai yi gofife eba enag el ati glaunai el feg. Afa autunai nihe ehe nai yi eba ati ikag afa glauwaba ehe nai yi glau nai nihe pugug.

18 Afa God ehe enag eseg. Autunam bigel Godna angoluweg el fini afa ilawo Kraiss bigelim esegim asa bigel Godna hihe fig. Afa ehe kagelim enaig gafugag faigbi asa kagel mingnag elim kwaganig God nagum wanambego.

19 Afa kagelni mo enaig esog God Kraiss nai yi eseg asa mungwali el sa ma Godna hihe fi. Afa God elni amtakwalig nihem mas suwigi amo, ehe kagelim enaig mo faig afa enag mo mina ogfug angoluweg el sa ma Godna hihe fi.

20 Asa kagel Kraissna unehlag la mo sihig eba ofenai God ehe kagelni mengig la sihinig. Afa Kraissna unehlag la ka nem sihigonig nofeka angoluweg el gofim sa ne Godna hihe fi.

21 Afa Kraiss mas mangwal amtakwalig esena mo. Afa God membeg bigelim kwaganig asa bigelni amtakwaligim ehe Kraiss nai yi fwahana asa ehe nai yi big Godna afsug kabag el fig.

## 6

<sup>1</sup> Afa kagelbi God i ka gafuga fig asa kagel nengelim wasneig mo enaig sihi fegonig God nem esmunagim kwaganig asa nofeka enam yiskosi fwahi.

<sup>2</sup> Afa Godna mo enaig esog;

Afa enag osuna kog ka nem suiala lambife asa gwenana ka neana une higig. Afa enag osuna kog ka nem pese gwenana lambife asa ka nem kwaganig. *Ais 49:8*

Sa hig, glaunu eba enag osu God oyna nem suiala lambife afa sa glauwo eba enag osuna God oyna nem pese lambi.

### *Godna kanog faha el haig haig kinig kahlini*

<sup>3</sup> Masa el kagelni gafugagim kwasigonifie afa kagel mas mangwal Godna mina la sugwi asa elim wegumusufe fati.

<sup>4</sup> Amo, afa kagelni nihe ofug kagel Godna gafugag el fig. Sa ne nangu, kagel wasneig afohie asa haig haig kinig kagelim pugunig, afa fwina kwania gafugag esig, afa el kagelim haig haig esegonug.

<sup>5</sup> Afa el kagelim kwagaitifig, afa kalabus yi wanafug, afa angoluweg kagelim kilafatigonug, afa kagel gafugag behig afohie, afa kagelim binipigig asa mas ka asgai.

<sup>6</sup> Afa kagelni suialag nihe afa suialag onigig afa aflahlanam gohugum asa elim suialag esenig, afa Godna Sungwabug afa kagelni membugna nihe ofgunag kagel Godna gafugag el fig.

<sup>7</sup> Afa kagel nufunam mo mungu sihig afa Godna wasneig kagel nai yi go. Afa kagelni suialag nihe ofenaiba kagelni ninumu wag asa kagel nihiginai ningana mo ofenibi afa sahgam mo kefim kagfo.

<sup>8</sup> Afa mingnag el kagelni unehlagim fingi fig afa mingnag kagelim esogonug kagel amtakwalig el. Afa mingnag el kagelim mo sehtigi gonug afa mingnag kagelim nigmag gonug. Afa el kagelim esogonug kagel mwakwal el, amo kagel nufunam mo mungu sihig.

<sup>9</sup> Afa mingnag el kagelim esogonug ehengel mango nufunam Godna kanog fwatig el afa kaksag kristen kagelim numwehe anwenafegonug. Afa el enaig onigifig kagel pigihiagim meyini ofe afa sa nangu kagel nofkikena afohie. Afa mingnag el kagelim susug faigog afa ehengel mas kagelim kwagiskui.

<sup>10</sup> Afa maia kagel kinigni figbi afa kagelni olug yiba sifakal mungu feg. Afa kagel ofenai el gawig fwainig feg afa kagel kaksag elim esigoni asa gawig nupni fig. Afa kagel gawig fwainig afa mungwali gawig asa Godna ninga la go eba kagelni.

<sup>11</sup> O kagelni Korin la nai hihe ka nem ambala nufunam mo sihigonig afa ka mas mangwal mo meagam kumwahli. Afa nengel kagelni olug yi go.

<sup>12</sup> Afa nengelim membeg gonug kagel mas enag fwahig mo eba nengel kagelim membeg gonugim oksig.

<sup>13</sup> Afa ka nem enaig sihifenig ofenai alag legim osihina, kagelim onigig gonug sa nengelni olug yi gofi.

*Sa numwehe nofefiba masa afwabanai el nem guflakufe*

<sup>14</sup> Afa nofeka afwabanai el mungu ahawahlanam ahgofim, amo ehengelbi alganam fig. Atiaho enaig eseg suialag nihe asa amtakwalig nihe i waheg ahfeg? Afa ombusug i afa si i atiaho asa mungwal gafugafafefe?

<sup>15</sup> Atiaho sa Kraisi i Satan i mungu onigig fafefe? Atiaho sa kristen el i afa afwabanai el i mangwal nihem mungu ahfenag? Amo, enaigba awai.

<sup>16</sup> Afa Godna kwania lala i afa mwakwal Godna lala i haig wahla sahfeffe? Afa God nofkikena ga afa bigel heafna kwania lala feg. Afa God ehe heafna elim enaig esonig; Ka ehengelim fenim afa ehengel nenam wagiakafe. Afa ka ehengelni God fefe afa ehengel kana el fifi. *Wkp 26:12*

<sup>17</sup> Afa ming mo God enaig esog;

Sa ne ehengel menai fwahanam afa alganam afu afufum. Afa mangwal asa Godna nof la nufwehig nofeka enam ambe muhlafe asa ne enaig ese afohieffiba asa ka nem awamona. *Ais 52:11, Ese 20:34,41*

<sup>18</sup> Afa ka nengelni alag fefe afa nengel kana luwal fifi. Afa fwina wasneig Ainiyag enaig esog. *2 Sml 7:14*

## 7

<sup>1</sup> Afa kana suialag hihe God bigim asa hwag mo sihi fwanig afa sa big enaig esi amtakwalig nihe klaiti. Afa mangwal bigelni eligim afa sungwabugim nufwehinag nofeka enam blo muhla fe. Afa sa big Godim embefinim asa big bibefim Godim mungwali fai.

*Korin la nai el onigig waike finibi asa Pol sifakalena*

<sup>2</sup> Afa nengel nimbeafgelni olugni sa ne kagelim onigigonig. Afa kagel mas amban elim amtakwalig esinig afa kagel mas amban elni olug onigigim amtakwalini afa kagel mas amban elim mwakwalenam asa ehena gawig esmunagim flai.

<sup>3</sup> Afa ka mas enaig sihifeg mo asa ka nem fenig. Afa ka ati sihina ka nem membenig. Ka mas nem etetina i ka nem fwina onigina kafife.

<sup>4</sup> Afa ka anwenafeg ne kana fenagba naka nem nufunam mo sihinag ka nem sifakalini afa nengelni unehlagim fingi fenig asa ne suialag nihe patalfug. Afa maia kinig kagelim

pugunig afa ka nengelim onigigim asa kana olug fwina sifakaleg.

<sup>5</sup> Afa maia kagel Masedonia provins la apukenaba afa mungwali kembang la kinig pugunaba asa kagel mas suialag augufena mo. Afa kagel ehengel i mo flafiahgini afa kagel olug megam emebefini.

<sup>6</sup> Afa amban elni onigig maia auwiau ofeba asa God ehem wasneinag afa ehe enaig sahfehe. Afa maia Taitus blogba asa God enana kagelim wasneinig.

<sup>7</sup> Afa kagel ehem nangugim afa sifakalig nengel ehem numwehe flig asa ehe blog. Afa ehe kam enaig sihifinig ne membig kam pese nangu afa ne nimbeafna amtakwalig onigig asa ne olug kinig afa ne kam aflafinig asa ka fwina sifakaleg.

<sup>8</sup> Afa ka anwenafeg ginof asa ka ningihiana eba nengel enam olug kinig flig afa enaba ihlafeg asa eba kam olug kinig fenag. Afa ka onigig enag ginof nem mwakwalig olug kinig faig.

<sup>9</sup> Afa glau ka sifakaleg asa enag kinig nem esinig asa ne nimbeafgelni amtakwalig nihem waikefe masig fatina. Afa God ehe enagna nem esenag asa ka mas nem amtakwalig esenig mo.

<sup>10</sup> Afa olug kinig God elim faig og sa ma amtakwalig la nai waikefinim asa God ehengelim lambi. Afa enag mas elim kinig fai. Afa bitenai olug kinig mas elim kweafui asa lahafe.

<sup>11</sup> Afa God nem enag olug kinig faig sa nangu eba suialag nengel nai yi pugug. Afa glau ne mas yiskosig mo, amo ne fwina gafugafig ogfug nengelni nihe eba suialag. Afa amtakwalig nihem ne olug kakagini afa nimbefum embefig amtakwalig esegim afa el amtakwalig eseg asa ne ehengelim kinig faig. Afa ne membig kam pese nangu afa ne Godim fwina patalfug. Afa mungwali enag ne ogfug ne afsug kabag fig.

<sup>12</sup> Afa autunam mungu el amtakwalig esena afa ming el enam kinig flana. Afa ka mas enag sambaganingi elim oniginigim asa ka nengelim enag ginof ningihianig. Amo, ka membeg sa ne numwehe anwenafi nengel Godna nof la kagelim fwina aflafegonug asa enag ginof ka nem ningihianig.

<sup>13</sup> Asa enagba kagelim esenigbi asa ka aflahlanam augug.

Afa Taitus kam enaig sihifenig nengel ehem suialafe flini asa heafna kaksag onigig awaieg asa ka enam fwina sifakalig.

<sup>14</sup> Autunam ka Taitusim mo sihina asa ka nengelni unehlagim finig fig afa ehe nengelim ika nangwagig asa nengel



ehem suialafinigi afa ka mas afwanfeg mo. Afa mungwali mo ka nem sihigonigi eba nufunam asa nengelni nihe ofug enag mo ka Taitusim sihinagi eba nufunam.

<sup>15</sup> Afa Taitus pese onigigi nengel ehem ahnai skaufigim afa sa ehe misog el feg afa heafna mo higigim patalfug afa ehem suialagi mona awamonigi asa ehe nengelim fwina membenigi.

<sup>16</sup> Afa ka mas fwina onigini afa ka ati numwehe nengelim anwenafenigi sa ne suialagi nihe patalfug asa ka sifakalegi.

## 8

*Korin la nai kristen moni agogolini Judia la nai kristenim kwaganigim*

<sup>1</sup> Kagelni nilite ka membig sa na anwenafi God Masedonia la nai siosim esmunagim kwaganigi asa ehengel suialagi gafugagi esigi.

<sup>2</sup> Afa haigi haigi kinigi ehengelim pugunigi eba ehengelim yuhnigi wasneigi el me awai awai me. Afa ehengel gawigi fwainigi asa ehengel fwina sifakaligi afa enanam ehengel numwehe kigi agogolinim sahfaigon.

<sup>3</sup> Afa ka ati nangwagigi ehengel heafgelni sawiegi la mango gawigi gafa asa lambigim agogoligim asa elim fai gog afa ehengel gweyi mingnagi gawigi gafa sisi skogonigi.

<sup>4</sup> Afa ehengel kagelim wasneigi mo sihinigi asa ehengel gafa membig Judia nai Godna elim kwaganigi.

<sup>5</sup> Afa kagel onigigi eba ehengel mango kigi mungu faigoh mo. Amo, ehengel fwina suialafigi lasflam mo ehengel enaigi esigi Ainiyagim ahnai skaufigim. Afa Godna sawiegi la gafa asa kagelim ahnai skaufegonug.

<sup>6</sup> Afa Taitus enaigi gafugagi ilawana nengelim kwagana asa kagel ehem enaigi esonigi sa ne ehengelim kwaganam enagi suialagi gawigi faigim gafugagi auwigi.

<sup>7</sup> Afa mungwali gafugagi nengel suialagi nihena esigi. Afa nengel Godim wasneigi olugi oniginigi afa enagi mo nengel suialagi sihifigi. Afa nengel ati kwania anwenagi nafigi afa sa nengel fwina sawifigi Godna gafugagi esigim. Afa nengel kagelim fwina membegonug. Afa kigi agogoli faigogi nihe nengel esigi asa kagel membig nengel enam gafa gwenaigi suialagi nemugi esigi.

<sup>8</sup> Afa enagi mo mango nihe mo mo. Amo, ka Masedonia nai elni suialagi gafugagi ka nem sihinigi asa ka nem yuhni kog nengelni membug mungwalofugi go me awai awai me.

<sup>9</sup> Afa ne ati anwenafigi Ainiyagi Sisasi Kraisi bigim esmunagim kwaganigi. Afa ehe God i hawagfenaba asa mungwali gawigi heafna fena afa ehe mungwali gawigim fwahanam pe

blonam afa gawig fwainig el puguna asa nengelim kwagana. Afa ehe enaig esegba asa nengel Godna mungwali suwialag gawig lambig.

<sup>10</sup> Afa gof yiana nengel kig agogoli faig enam ne gosini. Afa nengel enaig esigim fwina membini. Sa hig, ka enaig onigifeg enag gafugag nengel sa ne fini sa ne enam auwigi.

<sup>11</sup> Eba suialag glau hwag gawig faigim gafugag auwigibi. Afa gafugag mulug ne esofe fenaba ne sifakalna gafugafena sa ne ilawa gafa sifakale enag gafugam auwigi. Afa hanansi kig sa ne membeg ne og ka fai sa ne fai.

<sup>12</sup> Afa nengel nai yi elim faig sawieg sa gofife afa hanansi kig sa ne membeg sa gauna fai enaba God sifakaleg. Afa mangwal sa ati ne feg God membeg sa ne fai asa mangwal ne mas feg mo ehe mas enam onigi.

<sup>13-14</sup> Afa ka mas enaig esog mo sa ne mingnag elni kinig kahli goni asa ehengel mo esug auguiafi. Afa glaunu ati ne kaksag feg eba suialag asa gawig fwainig el feg sa ne ehem kweagfu. Afa sumi yi nengelni gawig awaieg afa ehengel kaksagna feg nem mungwag kweagfui. Afa enaig nihe sambaganingi mungwalofug ahgo.

<sup>15</sup> Afa Godna mo enaig esog;  
Afa el kaksag fane lambogeg eba hefum mungu ihla fenag  
mingba awai. Afa el wetiti fane lambogeg eba ehem  
ati ihlafenag. *Kis 16:18*

### *Pol Taitusim Korin gam ningihiana*

<sup>16</sup> Afa Taitusna onigig afa kana onigig i mungwalofug asa God ehem esenagba asa ehe nengelim membenigim ona kwagan asa ka Godim suialag onag.

<sup>17</sup> Afa ka ehem sihini kog ma blo nengelim nangwagi afa heafna sawifeg ati gofena. Afa ehe kwania membug fena nengelim kwaganigim asa ehe hefum og ka ika ehengelim nangwag.

<sup>18</sup> Afa Taitus i ahkagim asa kagel ming nilite ningihin. Afa enag el Kraisna suialag mo numwehe suialag sihi feg afa haig haig kembig sios la nai el mungwali ehem fingi fig.

<sup>19</sup> Afa enag sios ehem esuni sa ehe kagel nenam enag kig fli ufunam asa mingnag sios elim kwagani. Afa kagel enaig esini asa Ainiyagna unehlagim finig fig afa enag ofug kagel oyna mingnag elim kwagan.

<sup>20</sup> Afa kagel mungwal afunam elim enag kaksag kig mimagigoni afa kagel enaig nihe patalfug masa el kagel sehegonifi.

<sup>21</sup> Afa kagel membig suialag nihe mungu esi. Afa kagel membig Ainiyagna nof la enaig esi afa kagel membig mungwali elni nof la gafa gwenaig esi.

<sup>22</sup> Asa ka ming hihem ehengel nenam ningihiana. Afa kagel ehem kaksag gafugag yuhnagigim afa ka nangug ehena membugba elim kwaganig feg. Afa ehe nengelim numwehe anwenafenig neagafa enag gawig faigim gafugagim kwegfug asa ehe fwina membeg enag gafugagim eseg.

<sup>23</sup> Afa Taitus eba kana hihe afa ehe i ka i gafugafegim asa nengelim ahkwaganig. Afa ming sambaganingi nilite heafna siosna unehlag la afuna afa Kraisna unehlagim fingi fini.

<sup>24</sup> Asa ehengelim nimbeafna membenig nihe ogfug afa mungwali sios enam nangunim anwenafig afa enag mona ka nengelni unehlagim fingi fenig eba nufunam.

## 9

### *Pol sihina sa ne Judia nai kristenim kwagan*

<sup>1</sup> Afa nengel ati anwenafig kagel Jerusalem la nai kristenim kig agogolinim ningihigoni asa ka mas enam fwina sihiagei.

<sup>2</sup> Afa ka anwenafeg ne sawifeg mingnag elim kwaganigim. Afa ka neana unehlagim Masedonia nai elni nof la fingi fenag. Afa ka enaig esog, “Gof yiana ikag afa ilawa gafa nengel Korin Akaia provins la nai el kwania membug fini elim kwaganigim.” Afa Masedonia enam higigim afa onigig kagel gafa gwenaiig esi.

<sup>3</sup> Masa hwag kana suialag mo mo behig fefe. Afa ka membeg sa ne numweheaginim afa afohiefim asa ka enaig esona. Asa ka hwag nilitem nengel nagum ningitigig.

<sup>4</sup> Masa mingnag Masedonia la nai elim ka wanblonam afa nengelim nangwagibi afa nengel mas numweheagig go mo. Afa nengel afwanfig flifi afa ka enag suialag moba ati ka sihina asa ka gafa enam afwanfeg flafe.

<sup>5</sup> Asa ka onigigim koka hwag nilitem gof ningihiaiba afa ehengel nengelim kwaganim enag gawig numweheagig asa ne sihi fwahig. Afa maia ka blo puguiba mungwali el sa ma enam nanguim anwenafi ka mango nengelim mengna eseni mo sa ne enaig esi amo, ne nimbeafgelni membug la esig ne mas yiskosig mo.

### *El asa gawig mageg God enaig elim suialafiahflag*

<sup>6</sup> Afa sa ne onigi, maia big mimagegonigbi eba ofenaiba el nog weti ihig eba fane weti agogoli lambig afa el nog kaksag ihiwageg eba fane nup agogoli lambife.

<sup>7</sup> Afa nimbeafgelni onigig la hanasi gafa ne afafiba eba sise. Afa ne magegim yiskosenam afa magefe afa maia el nem mengna esunigbi sa ne mageg afa enaigba mas suialafeg mo. Afa amban el asa sifakalna mimageg enaig elim God fwina membenag.

<sup>8</sup> Afa God ma nem ihlafenageba asa neana gawig fwina nupbiagefe. Afa ne mas mangwalim awaie afa enag kaksag gawigna asa ne haig haig suialag gafugag esefe.

<sup>9</sup> Afa Godna mo enaig esog;  
Ehe gawig fwainig elim gawig nup lambigim faig,  
afa ehena suialag nihe wahkig gofufe. *Sam 112:9*

<sup>10</sup> Afa el asa aso feg God ehem nog lambwaig asa ihiwageg afa amba ehem faig asa neg. Afa neagafa God nem kaksag nog lambanam faife afa God ehe neana suialag nihem esenag asa enag kaksag fug lugug.

<sup>11</sup> Afa ehe ne kaksag gawig lambwaie gofufe asa ne mingnag elim kaksag mageni gofim. Afa maia kagel nengelni kig kehliligim afa magigbi afa kaksag el enam nangugim asa Godim suialag onig.

<sup>12</sup> Afa kig faigog nihe sa ne esig eba Godna elim gawig fwainigim kwaganig. Afa enag nihe gafa enaig eseg asa kaksag el fwina Godim kaksag suialag onig.

<sup>13</sup> Afa enaig gafugag ne eseg eba enag ofug ne Kraiswa suialag mo kehliligim afa patalkug. Asa ne ehengelim afa mungwali elim fwina mageni asa kaksag el Godna unehlagim fingi fifi.

<sup>14</sup> Afa ehengel nangug Godna suialag kwefwag neanai yi wasneig go asa ehengel nem fwina onigigonigim afa nengelim Godim sahnig.

<sup>15</sup> Afa enag mangwal asa God bigim esmunagim faig eba fwina kwania feg afa bigelni mengig enam mas suiala sihifiahge. Asa big Godim enam suialag oni.

## 10

### *Pol heafna gafugagim ogfuna eba suialag*

<sup>1</sup> Afa nengel nai mingnag el enaig sihi kam finig afa maia ehe kagel nenam goba ehena mo auwiauwig afa maia ehe kagelim alganam membi fenigbi asa ehe kagelim wasneig mo faig. Afa Kraisa eba suialag afa aflahlanam el feg afa ka Pol ka nem Kraiswa unehlagna sihinig masa nengel kana mo fatifi asa ka nem blo nangwagigim afa ka wasneig go.

<sup>2</sup> Afa mingnag el enaig sihifig kagelni nihe ofug ofenai hwa bitenai elni onigig fig. Nofene kam enaig esini masa ka blonam nem wasneig mona sihinifi afa enaig elim ka lagnifi.

<sup>3</sup> Afa eba nufunam afa ilawo kagel hwaig eligni hwa bite la afohie afa mas kagel enaig hagfe asa bitenai el heafgelni angoluweg elim fafegonife.

<sup>4</sup> Afa kagel mas bitenai fagna maluba hagig amo, afa kagel Godna wasneigni fegonig asa kagel angoluwagna wasneigim enana amtakwalig klaitig.

<sup>5</sup> Afa haig haig amtakwalig onigig ka enam amtakwalig kaitig afa mwakwal onigi elim kagfunaiba asa mas Godim anwenafenai afa kagel enam gafa filaklaiti. Afa kagel bitenai amtakwalig onigigim fwina kehlig ofenai ninimu el angoluweg elim fakehlafe asa enam flagim Kraisna ahnai skaug fakig.

<sup>6</sup> Afa nengel nimbefim ogfuiba nengel nufunam Kraisna el fig afa maia nengel enaig esigbi asa kagel ati numwehe afohie asa amban nengel nai el Kraisim masig fatig eba ka ehem kinig faifi.

<sup>7</sup> Afa nengel afwambanaim mungu fahiageflig. Afa amban el esofe kaba Kraisna asa ehe sa ma anwenafe kagel gafa gwenaiig ka Kraisna fig.

<sup>8</sup> Afa Ainiyag enag gafugag kagelim faig asa kagel nengeln olug onigig wasneinig afa ehe mas membeg mo kagel nengelim amtakwalig esinigim. Afa kagel enag gafugam sifakalinim afa sa ka kikefim mwakwalig fingi fibi afa ka mas enam afwanfi.

<sup>9</sup> Nofene enaig onigifi ka nem ginofinig ningihianig asa ka membeg sa ne embefi.

<sup>10</sup> Afa mingnag el enaig esogog, “Ginof la Polna mo eba wasneigim afa kinig feg. Afa maia ehe kagelni nof la go heafna mo sihig eba auwiauwig afa mo behig feg.”

<sup>11</sup> Afa enaig el sa ma anwenafe enag mo sa kagel ginofig maia kagel membifigbi eba mungwalofug kagel enag mo esifi afa maia kagel nem pese ambe nangwagibi.

<sup>12</sup> Afa mingnag el hefum fingi fig. Afa kagel mas kiafgelni nihem fligim asa ehengeln nihem kwefihianugi. Afa enaig elbi ofenai mo onigig etetig el fig. Afa heafgeln onigig la heafgeln nihem kwefihiagig. Afa ehengel mingnagim nangwagigim asa hefum kwefihiageg.

<sup>13</sup> Afa kagel mas enaig esig mo. Afa kagel enag gafugam onigig God kam faig afa gafugag ka nem esegonig enam gafa ka onigig asa enag la kikeafgeln unehlagim fingi fig.

<sup>14</sup> Afa kagel kikefim mas fwina finig fi amo, kagel gwenaiig mungwalofug esig asa gafugag ka nengelim esigonig. Afa kagel nengelim Kraisna suialag mo ambe sihi fwainigba kagel mas ihlafig mo kikefum fingi figim. Afa kagel goflanai el fig ka Kraisna mo fligim ka sihi ambeg nengel nai yi ambe apukeg.

<sup>15</sup> Afa kagel mas enaig esig mo afa mingnag el gafugag nengelim esegonig afa kagel enam nangugim asa mwakwalig kikeafgeln unehlagim fingi fig. Afa kagel membeg nengeln olug onigig sa ma kwania fei asa enag gafugag kagel nengelim esigonig asa enag gafa sa ma kwania fei.

16 Afa ma kagel nengelim fwahigbi asa mwakwalig hili afugba afa mingnag kembig gafugag el mas enanai yi feg mo asa kagel Kraiswa suialag mo sihigonig. Afa gafugag kagel esig asa enagba kagelim fingi fig afa enag gafugag mas mingnag elni gafuga i waihe.

17 Afa Godna mo enaig esog;  
Afa amban el ogra heafna unehlagim fingi fe enaig magofi  
asa ehe Ainiyagna unehlagim mungu fingi feg. *Jer*  
9:24

18 Afa amban el asa hefum fingi feg afa enaig el eba unehlag fwainig, afa amban el God ehem fingi feg asa heafna unehlagba kwania feg.

## 11

### *Mwakwal Godna kanog fwatig el*

1 Afa ka membeg kam fwahibi asa ka moetetig el lofug sihi. Sa ne kam fwahanai.

2 Afa God fwina membeg nengel ehena el fig afa ka gafa gwenai membeg nengel Kraiswa el fig. Afa nengel ofenai angwafig angwaming suialag asa mas el i ahgig mo. Asa ka membeg nengelim Kraiswa ninga la fwaha ofenai alag heafna enag suialag legim alagag nai yi mungu fwahag.

3 Afa sa ne pese onigi autunam Satan sombine lofenam Ivim mwakwal mo suialag sihinagena afa ehena onigigim gasafenagena. Afa ka onigig masa el nengelim gafa gwenai esegonifi afa nengelni onigigim gasafeagifi asa ne Kraiswa fwina membug nihe mina fwahigim afa sa neana onigig mas Kraism mungu fenai.

4 Afa kagel nem ati Sisasna mo sihinig afa ne ati Godna Sungwabug flig afa ne kagelni mo higini. Haisegba sa ne mingnag elni mom higig. Ehengel ming mo alganam Sisasna mo sihig afa ne membeg ka ming alganam sungwabug fli afa ming alganam mo higig.

5 Afa ne enaig elim seflig goflanai Godna kanog fwatig el. Afa ka onigig ka mas ehengelim weti gafa ahnai skaufeni.

6 Eba nufunam, kana mo sihieg eba gweyifeg afa kana anwenafegba goseg. Afa mungwali kagelni mo i nihe i nengelim numwehe ofgunig eba nufunam.

7 Afa autunam ka nengelim Godna suialag mo sihin-ugeafenaba afa enag gafugag ka mas nengelni kig flana mo. Afa ka kikefum ahnai skaufena asa nengel kwania unehlag flig. Atiaho enaig nihe amtakwalig me?

8 Afa enanam mingnag sios el kam kwegfug kigna gawigna asa ka nengelim kwaganigim gafugafeg. Afa gawig asa

ka ehengelni flanig ofenai ka ugwefe flagim asa nengelim enana kwaganig.

<sup>9</sup> Afa maia bigel auguiafenaba asa kam mangwal awaienag ka mas nengelim sahani mo kam kwegfu. Afa Masedonia la nai nilite ambe kam kwegfugbi asa ka ihlafeg. Afa autunam ka mas nengelim kinig faini mo afa autunai la gafa ka mas enaig eseni.

<sup>10</sup> Afa Kraisna nufunam mo ka nai yi go asa ka nem nufunam sihinig afa mas amban el kam kweni asa ka kikeafna unehlagim fingi fefe afa mungwali Akaia provins la ka enag mo esefe.

<sup>11</sup> Afa ka mas enaig eseg mo asa ka mas nengelim membenig mo, amo God ehe anwenafeg ka nengelim fwina membenig.

<sup>12</sup> Afa mingnag mwakwal Godna kanog fwatig el ogna heafgelni unehlagim fingi fi afa enaig mwakwalig esogog heafgelni gafugag kagelni gafugag i eba mungwalofug. Afa ka membeg ehengelni minam kagfuni asa ka gwenai esefe mas ka nengelni kig flai.

<sup>13</sup> Afa enag el eba mwakwal Godna kanog fwatig el afa heafgelni gafugag elim mwakwalig gonig. Afa hefum waikefigim ofenai nufunam Godna kanog fwatig el fig afa sa Kraisna gafuga fig.

<sup>14</sup> Nofeka enam nangunim asa sineminefe. Afa Satan hefum waikefegim Godna oflanai el lofeg.

<sup>15</sup> Asa nofeka sineminefe Satana gafugag el hefum waikefigim ofenai afsug kabag gafugag el lofig. Afa autunai la heafgel susug flifi eba mungwalofug asa nihe nengelim esegonig.

*Pol Godna kanog fwahag el gofenaba kaksag kinig kahlana*

<sup>16</sup> Afa ka pese sihig nofene kam enaig onigifini ka onigig etetig el feg. Afa ka enaig el fefe sa ne kam fwahibi asa ka kikeafna unehlagim fingi fe asa gwenai mwakwal kanog fwatig el esig.

<sup>17</sup> Afa maia ka enaig esegba ka mas Ainiyagna onigigim patalkug mo eba ka onigig etetig elni nihem eseg.

<sup>18</sup> Afa kaksag el bitenai gawigim onigigim asa heafgelni unehlagim fingi fig. Afa ka gafa gwenai esefe.

<sup>19</sup> Afa nengel enaig esogog, “Kagelni anwena eba suialag nemug.” Afa haisegba nengel onigi etetig elni mo higigim ne sifakalig?

<sup>20</sup> Afa el ambenam nengelim wasneig mona sihigonim afa nengelni gawig lamboginim afa ehengel nengelim esegonibi

asa nengel ehengelim ahnai skaufegonim afa ehengel hefum fingi finim afa nengelni angmogim ninga fana tigeefe. Haisegba sa ne enaig elim isug nangwag fwatig?

<sup>21</sup> Afa nengel haig onigifig kagel wasneig awai me afa kagel embefig me asa mas nengelim gwenai esegoni? Ka mas ehengelni nihe esig mo afa ka onigig ne membig kam og ma enag afwanfig flai.

Afa amban el hefum fingi feba asa ogfug kike wasneig nifig afa ka gafa kikeafena wasneig ogfufe. Afa enaig mo eba onigig etetig elni mo.

<sup>22</sup> Atiaho ehengel Ju el me? Ka gafa enaig el feg. Atiaho ehengel Israel nai el me? Ka gafa enanai el feg. Atiaho ehengel Abrahamna simbianingag el me? Ka gafa enanai el feg.

<sup>23</sup> Atiaho ehengel Kraisna gafugag el me? Ka ehengelim gosenig. Afa kana gafugag eba kwania feg afa kaksag osuna ka kalabus yi fagofe afa el kam wena tige kafu afa ka mas enam suwigi eba nup feg afa kaksag osuna kam ona lahagna muhla pugu. Afa enaig mo eba onigig etetig elni mo.

<sup>24</sup> Afa Ju el kam 39 la gohug enaig la kam wena fliflifenagini. Afa ehengel mas kam mungunagim esini mo, amo ehengel enaig niheba kam esinibi eba afala gohug nagim.

<sup>25</sup> Afa sambaga mungunagim Romna el kam kehlinim agana tikaminefni. Afa mingna el kam funna wagini. Afa sambaga mungu sip enanai yi ka ikag afa enag sip totohia apaiyegog bu la. Afa mingna ka enaig esena mungu osuna afa sinaini bu megam ka gafena.

<sup>26</sup> Afa maia ka mina la wagiakaba afa ka bu fle la peg kam ona petlaku, afa ka ukwef elim ulambig kam ona tigi, afa kiefna hihe Juda nai kam ona tigi afa afwambanai el gafa kam ona gwenai esini. Afa haig haig kaksag amtakwalig kam fapugunafe maia ka kembang kwania la afa sangwali gafa ka wagiakaba afa bu kwania la ka kinig flag afa mwakwal hihe ona kam amtakwalig esena.

<sup>27</sup> Afa ka gafugag la fwina gohug asa ka susug flag. Afa kaksag sinaini ka gafugafeg asa ka mas nongi. Afa mingna ka binilahag afa bu hef kam fenag. Afa kaksag osuna kana fane i afa lofug i awaienag afa kam nenegeg.

<sup>28</sup> Afa mingnag kinig ka sihiegim yiskoseg. Afa ming algana kinig ka kahlag afa mungwali osuna ka mungwali siosim kusgunig.

<sup>29</sup> Afa kristen nilite asa mas wasneig mo afa ka gafa enam kinig kahlag. Afa mangwal asa elim guflakugim asa amtakwalig eseg ka enam fwina ninimug.



<sup>30</sup> Afa ne membeg ka sa kikefim fingi fe afa ka ming algana onigig feg afa kana kinig ofgug kaba auwiauwig el feg afa God eba fwina wasneig. Afa kana kinig Godim fingi feg asa ka enam sifakaleg.

<sup>31</sup> Asa big God eba Ainiyag Sisasna alagim fingi fufufe afa ehe ati anwenafeg ka mas mwakwale.

<sup>32</sup> Afa maia ka Damaskus kembang la gafenaba misog el Aretasna gavmanna el enaig esena. Afa ehe elim kembang bog mengig la lasanam asa anwasa fiahfo asa oagna kam kehli.

<sup>33</sup> Afa kana mingnag hihe kam somb kwania megam kumuhlanam flafunam wena kilinim afa meg la apaiyegona bite gam asa ka enag elni ninga nai embem ikana.

## 12

### *Pol itila lofug nangunam asa enag mom sihina*

<sup>1</sup> Asa ka gweyi kiafna unehlagim fingi fei afa enag nihe mas bigim kwagani. Afa glau ka oagna nem sihini haig haig itiapanag mi afa meaganai mo mi asa Ainiyag kam upugunag.

<sup>2</sup> Afa ka anwenafeg mungu Kraisna el afa 14 yia autunam God ehem sugufu kukuna of nemug sisi yi gam. (Afa ka mas anwenafeg mo ehe eligni ikana me awai itila lofug me afa God mungu enam anwenafeg.)

<sup>3</sup> Ka pese sihi ka anwenafeg God enag elim sugufu kukuna heven gam. (Afa ka mas anwenafeg mo ehe eligni ikana me awai itila lofug me afa God mungu enam anwenafeg.)

<sup>4</sup> Afa enanai yi ehe mo higinamba asa el enam sihiagim mas ihlafeg mo afa el enam sihiagim eba kwenag.

<sup>5</sup> Asa ka enag elni unehlagim fingi feg afa kiafna unehlagim ka mas enaig esei amo afa mangwal ofgug ka auwiauwig el sa ka enam fingi feg.

<sup>6</sup> Afa ka membeg kiafna unehlagim fingi fegba eba mas ka moetetig elni nihe fei amo kana mo eba nufunam fefe. Afa ka mas kikefum fingi fei asa ka mas membeg mo ne enag mo higinim asa onigim ka sisi yi go. Afa gafugag sa ka eseg ne enam nangui afa mo ka sihig ne enam higi asa enag kam nufunam ofgug.

<sup>7</sup> Afa God kam kaksag suialag meaganaim ofgufenageg. Afa ehe oksig ka enam tonbusug el fefe asa ehe kinig ka nai yi ese fwahagba asa ofenai nas kam pifigu. Enag eba Satanna gafugag el asa kam wahkig amtakwalig esenago asa kam og ese tonbusug el fefe.

<sup>8</sup> Afa ka Ainiyagim sambaga mungunagim fwina sahnag sa ma enag kinigim kana huguflaitinai.

<sup>9</sup> Afa ehe kam pese sihinag og, “Esmunagim kwegfwag ka nem fafaifefugu eba ati ihlafeg asa maia ne wasneig fwainigba asa enanam kana kigmogim ambala ogfug.” Afa mangwalim sa ka mas wasneig mo eba ka enam sifakalenag asa Kraisna kigmog ka nai yi gofi.

<sup>10</sup> Afa ka Kraisna gafugag esegim wasneig fwainigba afa el kam amtakwalig mo sihinig afa kinig kam faig afa susug kam faig afa haig haig kinig kam pugunag asa ka aflahlanam go. Afa maia ka wasneig fwainig fegba asa enanam God kam wasneinag.

*Pol Korin la nai elim oniginiau*

<sup>11</sup> Afa enag mo ka sihig eba mo etetig elni nihe feg. Eba suialag sa ne enaig kam esonaite ehe suialag el afa mas ne enaig esona mo. Asa nimbe ne kam esenagba asa ka enaig esog. Afa mingnag el esogog ka unehlag fwainig. Afa ne elim onigig eba kanog fwatiag el kwania fig asa ka ehengelim mas ahnai skaufeni.

<sup>12</sup> Afa maia ka nengel nai yi gofenaba asa ka nengna gafuga fegofena afa ka haig haig kigmog eseagegba asa enag nem ogfunig ka nufunam kanog fwahag el.

<sup>13</sup> Afa mangwal sa ka mingnag siosim esenig sa ka nengelim gafa gwenag esenig. Afa mungu eba algana feg ka mas nem gawigim sahtigig mo. Afa atiaba ne onigig enag nihe amtakwalig fegba eba sa ne kana huguflaitini.

<sup>14</sup> Afa ka nem blo sambaganagim nangwagig afa glanu ka numwehiag ofeba ka pese blo nem nangwagigim. Afa maia ka blonam asa ka mas nem gawigim sahtigi eba ka mas nengelni gawigim membeni amo ka membeg sa ne suialag augufe. Afa luwal mas heafna afahumonigim yuwigi amo eba sa afahumonig luwalim fai yuwig fi.

<sup>15</sup> Ka sifakaleg kiafna mungwali gawig afa kikefum gafa mungwali fwahag asa nengelim kwaganigim. Afa atiaba ka nem fwina membenigbi eba sa ne kam mungwag mwakwalig membini?

<sup>16</sup> Asa eba nufunam ka mas nem kinig fai. Afa mingnag el enaig esogog, ehe mwakwalule el afa ehe nem kilmwan ne nigim asa neana kig mwehinig afa enaigim gosenig.

<sup>17</sup> Afa atiaho amban elim ka nem ningihianig asa ehe blo nem mwakwalnigim afa nengelni gawig lambinig me? Afa ne ati anwenafig eba ka mas enaig eseg mo.

<sup>18</sup> Afa ka Taitusim wasneig mo sihina kog sa ne ika nangwag asa ka ehe mi afa ming nilite mi ningitigi asa nengelim nangwagigim. Afa Taitus mas nem mwakwalenim afa nengelni gawigba lambini mo. Afa ne ati anwenafig ka

nai yi afa Taitus nai yi onigig i afa nihe i eba mungwalofug ahfeg.

<sup>19</sup> Afa ne enag ginof suwigigim afa ne enaig onigig me, kagel membig nengelni nof la kam sehtigig mom ka enam filafatigim, amo eba awai. Afa Godna nof la kagel enaig sihifigi ofenai el Kraiss nai yi sefu go. Afa mungwali gafugag kagel esi eba nengelini kana suialag hihem kwaganig.

<sup>20</sup> Afa ka onigig maia ka nem blo nangwagiba afa nengelini auguiag eba mas suialag auguiagim ka membeg nangwagim. Afa ka onigig ne kana wasneig mom higigim oksig. Afa nimbefim ne mo esim esimiagig afa ne nilitem ambobuge gonug afa ne olug kakagiagig afa nimbefim mungu onigig afa ne kosnag mo elim sihi gonug afa ne kilmwan mo sihi gonug afa ne tonbusug nihem patalfug afa nengelini onigig gasafiahgig.

<sup>21</sup> Afa ka onigawag maia ka blo nem pugunibi afa God sa kam nengelini nof la pugaupife. Masa kaksag el autunam amtakwalig sa esigim afohie afa mas olug waikefig mo asa ka ehengelini nangwagife. Afa autunam ehengel amtakwalig nihe i afa aga taitu nihe i afa amtakwaligim moiniani fiagig nihe i eseagig. Afa atiaba ehengel enam masig fatinig fwainigba asa ka enam kinig flanam ehengelini ufwenfie.

## 13

*Korin la nai el heafgelni olug onigigim sa ma numwehe nisafufum*

<sup>1</sup> Afa ka nengelini sambaganagim nangwagna afa glau ka pese blonam nengelini nangwafe. Afa Godna mo enaig esog, “Afa amban el amtakwalig esefe afa sambaga o sambaga mungu el enam nangunim sihifi afa kwefihiag el sa ma anwenafe enag el nufunam amtakwalig eseg.”

<sup>2</sup> Afa autunam ka nem fwahanam afa ka pese blona. Afa enanam el amtakwalig eseg ka ehengelini wasneig mona sihinig. Afa glau ka membi feg afa mingnag el gwenai esini asa ka ehengelini gafa mungwalofug mo sihinig. Afa enagba kana mo blo nengelini nangwagiba asa mungwali el amtakwalig esig afa ka ehengelini susug faife.

<sup>3</sup> Afa ne membig anwenafig ka nufunam Godna kanog fwatig el me awai awai me? Afa maia ka blonam enag susug afafibi sa ne kam nangunam anwenafenafe Kraiss kana mengig la sihiego. Afa Kraiss mas auwiauwig amo ehe wasneigna feg asa nengelini numwehenugeg.

<sup>4</sup> Afa autunam Kraiss heafna wasneig fwahanam afa ehe auwiauwig asa el ehem li katigeg la tigi kahlini asa lahana. Afa sumi yi God heafna kigmogna Kraissim ilafonaba asa

nofkikena pese gona. Afa kagel Kraiss nai yi sefu afohie afa kagel gafa auwiauwig. Afa maia kagel nengelim ambe nangwagigbi Kraissna nofkikenag kagel nai yi sefugo asa Godna kigmog nengel nangufi.

<sup>5</sup> Afa sa ne nimbeafgelni nihem fahiagenim afa nimbeafgelni onigigim yuhnam asa ne anwenafi nengelni olug onigig wasneig me awai awai me? Afa Sisas Kraiss nengel nai yi go atiaho ne enam etetig me? Afa ne olug onigig fwainigba asa Kraiss mas nengel nai yi go mo.

<sup>6</sup> Afa ka membeg ne kagelim yuhnagim asa numwehe anwenafi kagel eba nufunam Godna kanog fwatig el fig.

<sup>7</sup> Afa kagel Godim sahnig asa nengel mas amtakwalig nihe esig mo. Afa kagel mas kikefim onigig afa el enaig esogofe kagelni gafugag amtakwalig afa ka mas enam fwina onigini afa kagel membeg nengel suialag nihe mungu sa ne esi.

<sup>8</sup> Afa kagel mas mangwal amtakwalig nufunam mo la esi amo afa kagel nufunam mom kwefug sa ma enag mo numwehe ambalafei.

<sup>9</sup> Afa kagelni wasneig maia awaiegba afa nengel wasneig feg asa kagel sifakalig. Afa kagel Godim sahnig asa God nengelim pupenugegim asa nengel Godna afsug el fig.

<sup>10</sup> Afa autunam God kam esona enag gafugag ehena esegim. Asa ka nengelni olug onigigim wasneinig afa ehe mas membeg mo ka nengelim amtakwalig esen. Afa maia ka membi gafenaba asa ka enag ginof nengelim ningihiani. Asa ka membeg maia ka nengel nagum oblofiba ka mas nengelim Ainiyagna wasneigna ninimuhiagei.

*Pol mo afwahia fenaba esona ne eyi auguiafife*

<sup>11</sup> Afa kana nilite hwa mo ka blu afwahiaba asa ka enaig esog ne eyi auguiafife. Afa ka membeg sa ne nihem numwehiagi asa mas suialag feg mo afa kana mom higinim sa ne patalku afa mungu onigig nimbefim fiahgi afa aflahlanam auguiafim. Afa God eba membugna afa olug enesiegna feg sa ma enag God nengel nai yi gofi.

<sup>12</sup> Afa eba suialag maia ne kristen nilitem uflagim sa ne ningana kikigetifeg.

<sup>13</sup> Afa mungwali Godna el nengelim enaig esogonig kagel mas nengelim etetigonig mo.

<sup>14</sup> Afa ka membeg Ainiyag Sisas Kraiss sa ma nem esug kwagani afa Godna membug nengel nai yi gofi afa sa ma heafna Sungwabugni nengel mungwali suialag laskuhlafe gofi.

## **Mo Pol Galesia la nai Elim Ginofe Faini Hwa buk enaig esog**

Afa lasflam el Sisasim patalfugba eba Ju el esini. Afa sumi yi mo Sisas Polim nighiana asa ehe ikanam suialag mo afwambanai elim sihinuwegen. Afa maia mungwali el ambe Sisas nai yi saiye gonaba asa kinig amtakwalig puguna. Afa autunam enag el mas Mosesna nihe mo patalfuna mo sa Ju el enaig safife. Afa maia ehegel Sisasim olug oniginibi ehengel enam etetig sa Mosesna nihem patalfui me awai awai me? Afa mingnag el eba ehengelim kukusihiagonig Ju elni nihem patalfunam afa elig nihig lofug kokohiawagi afa Mosesna mingnag nihem gafa patalfui. Afa Pol enaig esog amo eba awai. Afa ehe enaig esog Sisas Kraism olug onigignig mina eba naho Godna noflaba bigel afsug kabag fegim asa big glaunai nofkigenagog flig. Afa eba enaig eseg mingnag Ju el ati Galesia gam afugim afa Kristinim kukusihiagigim og sama Mosesna nihem mo patalfui. Afa maia enaig Galesia elim pugunigba asa Pol enam mo higinam sa hwa buklaaba ginofena og sama heafgelni olug onigig mi afa nihem mi sama numwehiagi. Afa Pol enaig esog, God ehe kam kanog fwahag el fegba asa ka enaig eseg. Afa ehe enaig esog. Afa amban el sa Sisasim olug oniginig ena ho Godna nofla afsug kabag apukeg. Afa sumiyi hwa buk la ehe enaig esog, maia Kraism bigim esenigbi asa big sigag la afuhe. Afa Godna sungwabug bigelim mina kagim gosening asa bigel mingnag elim suialag nihe esegonig.

<sup>1</sup> Ka Pol, afa kaba Godna kanog fwahag el feg afa enag gafugagba el mango kam faig mo, amo eba God Api asa Sisasim pese ihlafona ehe kam kanog fwahag afa Sisas Kraism gafa asa eheningi enag gafugag la kam ahfwahag.

<sup>2</sup> Asa nilite sa ka mungwali afwaiye kagel nengelim Galesia sios la nai elim suialag onigim ka ginofe ningihig.

<sup>3</sup> Ka membeg bigelni Api God afa Ainiyag Sisas Kraism eheningi nem suiala ahfenafe. Asa olug fulufeg afa God esmunagim nem kweafufe eba nem enaig esenafe.

<sup>4</sup> Afa sa Kraism bigelni Api Godna sawiegim patalku afa bigelim lahanigim asa bigim amtakwalig mina nai lambig asa glanu bite nai amtakwalig onigig mas bigim kehlai.

<sup>5</sup> Asa big Godna unehlagim wahkig fingi ufufum. Eba nufunam feg.

*Godna suialag mo eba mungu go*

<sup>6</sup> Afa nengelim ka iskofakanig nihe sa ne fig. Afa Kraisna kwania gafugag la God sa nengelim aflafenig afa awamonig. Haisegba sa ne ikagna Kraisim masig fatinagim afa ming mom mo sawifenag?

<sup>7</sup> Afa nengelim ka sihinig ming suialag mo eba awai. Asa ka esog afa mingnag el nengelni onigigim gasafehiagig afa Kraisna suialag mo waikafi alganam mo sihig.

<sup>8</sup> Afa kagel suialag mo nengelim ati sihigonug. Sa hig, kagel i afa oflanai el i sa ena mom waikenam alganam mo osihigonifibi nofeka enam hig. Afa amban el enaig esegba eba God sa ma ehem suwi wahkig lagig yi flafati.

<sup>9</sup> Afa kati sihini afa glaunu pese nengelim sihinig afa amban el alganam mo sihinibi asa mas mungwalofeg mo asa ilawana ne flini eba God sa ma enaig elim suwi wahkig lagig yi flafati.

<sup>10</sup> Afa ka mas enaig esog mo asa el kam suialag onai amo ka membeg God mungu sa ma kam suialag onai. Afa kam oksig elim embeg mona sihinigim asa el kam suialag onai. Afa ka elim enaig sihini ka fiba eba ka mas Kraisna gafugag el fei.

*Pol Kraisna kanog fwahag el haig pugufena*

<sup>11</sup> Afa kana nilite ka membeg ne anwenafi hwa suialag mo ka sihina eba mango elni onigig la pugua mo.

<sup>12</sup> Afa el mango hwa mo kam faig mo afa mas amban el kam ogfunag mo. Amo, Sisas Krais ehe enag mo kam upugunag.

<sup>13</sup> Afa ati ne kana mom higini ka autunam Ju elni nihe la seaifuna. Afa enanam ka Godna elim mas ka aflafeni mo ka fwina kwagaiti fiahkafena asa ka membeg ka Godna siosim fwina amtakwalig klaiti.

<sup>14</sup> Afa Ju elni nof la ka mingnag elim goseni asa ka munguna afohiana afa ehengelba sum fini afa kikeba enag nihem goseg patalkuna. Afa ka fwina onigig kiafna simbianigana nihem patalkuna.

<sup>15</sup> Afa autunam mia kam fukla fwainig asa God ehe kam kanogim heafna gafugag el fwahag. Afa ehe kam esmunagim kweafug asa kam unenag.

<sup>16</sup> Afa God heafna legim kam ogfunag asa ka afwambanai elim ehena suialag mo sihig. Afa el mango kam onigig fai mo.

<sup>17</sup> Afa ka mas Jerusalem gam ika gof la nai Godna kanog fwati elim nangwagim amo ka ikagna Arebia provins gam ika puguna afa pese Damaskus kembig gam blona.

18 Afa maia sambaga mungu yia fenaba asa ka Pita nangum ikana. Numwehe mo flagim asa ka nanai yi sambaga wik ahwagana.

19 Ka mas ming elim kanogim nangu mo eba Ainiyagna suminigim mungu Jems.

20 Afa God ati kam anwenafenag ka mas mwakwale. Mangwal asa ka nem ginofenag eba nufunam.

21 Afa enanam ka Siria afa Silisia provins gam ka ikana.

22 Afa enanam Judia la nai sios el kam mas anwenafini mo.

23 Afa ehengel mingnag mo higinim anwenafinim og el mungu asa bigim amtakwalig klaiti fiahkafena ilawaba ehe suialag mo sihig olug onigigna mo afa autunam ehe enam olug onigigna mo fwina amtakwalig klaiti fena.

24 Afa ehengel kana suialag nihem higigim maia ka enaig esegba asa ehengel Godna unehlagim fingi fig.

## 2

### *Pol i afa mingnag kanog fwahag el i*

1 Afa 14 yia ka gagim maia awaiegba asa ka pese Jerusalem gam mo Barnabas i ahkag. Afa Taitus gafa ka mungwal afug.

2 Afa ka ikagba eba God ehe kam esonag. Afa ka enanai yi auguiafenaba ka siosna misog elim mungu sihinugena ka membeg ehengel sa ma anwenafi enag mo sa ka afwambanai elim ka sihinig. Afa ka membeg gafugag ka eseg, sama ehengel mungu onigigna kafi.

3 Afa Taitus eba ka i ahfenam afa ehe afwambanai el fena. Afa ehengel mas haig ehem esoni mo asa ehe nihi lofug kofwagim asa ofenai Ju el lofeg.

4 Afa mingnag el enaig esogog kagelbi kristen el fig afa ehengel mas kagelim sahgonim asa kagelni laskuhlag la seaifu eba heafgelni membug la seaifug ona kagelni nihem faihiage gonim asa Sisas kagelim esonig sa ne mas Mosesna nihe mo ahnai skaufenig. Afa ehengel membig kagel sa ma ehengelni nihem patalfui ofenaiba esug gafugag el fi.

5 Afa kagel ehengelni mo higigim yiskosig asa Godna suialag mo sa ma numwehe nengel nai yi gofi.

6 Afa enag el siosna misog el lofug fena mas mangwal mo sihini mo maia ka osihifenibi afa ehengel eba misog el me awai awai me ka mas enam fwina oningi. Afa maia God bigim nangwagigba eba big mungwalofug.

7 Afa ehengel mas haig esogona mo amo eba ehengel enaig esogona og God ehem enag gafugag faig eba heafna gafugag sa ma afwambanai elim Godna suialag mo sihiakai eba gwe-naig God Pitam faigba asa ehe gafa Ju elim sihinugeakana.

<sup>8</sup> Afa Pita eba kanog fwahag el feg afa God ehem kweafug afa ehe Ju elim kwaganigba asa suialag augufeg. Afa ka gafa eba kanog fwahag el feg afa God kam kweafugba asa ka gafa afwambanai elim kwaganigba asa ehengel suialag augufeg.

<sup>9</sup> Afa Jems, Pita afa Jon afa el ehengelim anwenafe goni ehengelba siosna misog el. Afa ehengel anwenafig God heafna sawieg la enag gafugag la kam faig asa ehengel ka mi Barnabas mi mo kikigegonugim asa kanigim enaig esogonug big mungu fig afa nenigi afwambanai elim sihinugafiahka afa kagelbi Ju elim gafugafe gonigim.

<sup>10</sup> Afa ehengel mungu onigig kanigim sihigonig asa ne gwenai gese elim gawig fwainigim kwaganig. Afa enaig gafugag esegim ka fwina sifakaleg.

*Pol Pitana amtakwaligim ambala upuguna*

<sup>11</sup> Maia Pita Antiok la ika pugunaba afa ka gohugum ehem nof usmuiag la lagnag nofeka amtakwalig enaig ese.

<sup>12</sup> Afa ilawana Pita ika puguna afa ehe afwambanai kristen elim mungwal fane fahgafe. Afa sumi yi Jems mingnag Ju elim ningitiginaba asa ambe apukena afa Pita afwambanai el mungwal nenam ahgagim oksina eba ehe embefeg Ju el eba nihe mo patalfuia.

<sup>13</sup> Afa mingnag Ju el Pitana mwakwal nihem patalfuna afa Barnabas gafa ehengelni mwakwal nihem patal lambkuna.

<sup>14</sup> Afa maia ka nagwagigba ehengel mas Godna nufuna mom numwehe patalfug mo. Afa ka Pitam mingnag elni nof usmuiag la esona afa ne Ju el fefe afa ne afwambanai elni nihe patalkug ofenaiba afwambanai el afa ne mas Ju elni nihem patalkug mo. Haisegba ne fwina wasneig afwambanai el sa Ju elni nihem patalfug?

*Ju el i afa afwambanai el i olug onigig nihe eba mungu feg*

<sup>15</sup> Afa kagelni afahumonig eba Ju fig asa kagel gafa Ju el fig afa mango amtakwalig afwambanai el mo.

<sup>16</sup> Afa kagel anwena enam fig nihe mo patalkuiag eba mango God i ahgohug mina mo. Amo, eba Sisas Kraism olug onigig mungu mina la asa kagel Godna nof la afsug fig. Afa kagel gafa Kraism olug onigigim asa ena mina la kagel Godna nof la afsug apukeg eba mango nihe mo patalfuiag mina la apukeahmo. Afa nihe mom patalkuiag eba enag mina mas elim Godna nof la afsug fei.

<sup>17</sup> Asa kagel Kraism olug onigig minam patalfugum afa enaba ambala pugug kagel gafa ati amtakwalig esig ofenaiba afwambanai el esig. Afa atiaba sa kagel enaig esogog Kraism amtakwaligim kweafug? Amo, ese ka enaig esofe.



<sup>18</sup> Afa nihe mom ati ka pigaupig asa ka enam nihe mo pese gafuga fefe eba kikefim ogfug ati ka nihe mo filafeg.

<sup>19</sup> Afa Mosesna nihe mo enaig ogfug kaba amtakwalig el feg. Afa glau ka mas enaigim onigi eba nihe mo kam enaig esenagba asa ka afsug el pugufe amo eba ka Godim olug onigif fenag.

<sup>20</sup> Afa ka Kraisa i mungwal li katigeg la ahlahag. Asa enag mulug nofkenagag ka nai yi go eba mango kana wasneig mo eba Kraisa wasneig ka nai yi go. Afa eligni glaunu sa ka ese go eba ka Godna legim olug oniginagim asa ka eseg. Afa ehe kam membenagim asa heafna nofkenagag kam faig.

<sup>21</sup> Afa God bigim esmunagim kwaganig ka mas enam yiskoseg. Afa atiaba el nihe mo patalkugba asa Godna nof la afsug feg eba enaig eseg Sisas ehe munum lahana mas mog feg mo.

### 3

#### *Olug onigif mina afa Ju elni nihe mo mina*

<sup>1</sup> O Galesia nai el ne onigif etetig el. Afa amban nengelim esenigbi asa neana onigif gasaflafig sa ne etetig. Afa ka ati nem ambala sihinig Sisasna li katigeg la lahagna mo eba mungwalofug enaig eseg ne nimbeafna nofna enam nangug.

<sup>2</sup> Ka mungu sahig feg ka nem ahsahigi, afa Godna Sungwabug ne flagba mangwal ne esegba asa ne enag Sungwabug flag, Ju elni nihe mo la ne patalfu me awai ne Godna suialag mo ne higigim asa enam ne olug onigif?

<sup>3</sup> Hei haigsegba sa ne enam etetig? Afa ne Godna Sungwabugni ne ilawana enana gafugafena. Atiaho ne membeg ne og ka kikiafena wasneigni enag gafugag auwigigim?

<sup>4</sup> Afa mungwali kinig autunam nem puguna atiaho enag mas neana nai yi fug lugug mo? Ka onigif eba fug lugufe mas esug gofi.

<sup>5</sup> Afa God heafna Sungwabug nem faig afa enag wasneigni nem haig haig kigmog ogfug. Haigsegba God nem enaig esenag ne Ju elni nihe mo patalku me awaiye ne Godna suialag mo ni higigim asa enam ne olug onigif?

<sup>6</sup> Afa Godna mo Abrahamim enaig esona og; Ehe ati Godim olug onigina asa God ehem sawifenam afa enaig esona og neba afsug kabag el feg. *Stt 15:6*

<sup>7</sup> Asa ne enaig onigife amban el sa Godim olug oniginag enaho Abrahamna simbianga lofug fig.

<sup>8</sup> Afa Godna mo ogfuna sumi yi afwambanai el gafa Godim olug oniginifi asa God enaig esog ehengel gafa afsug apukefe. Asa Godna mo ilawana Abrahamim enaig esona og, "Ne nai yiba God mungwali bitenai elim suialafenife."

<sup>9</sup> Afa Abraham Godim olug onigina afa God ehem suialafi-ahflana asa big amban Godim olug oniginafe asa God bigim gafa suiala lafife asa Abrahamim esena.

<sup>10</sup> Afa amban el enaig onigifefe ka nihe mo patalkuiba ka afsug el fefe afa mas manigei eba God enag elim amtakwalig klaitife asa Godna ginof enaig esog, “Afa Moses nihe mo buk la ginofena afa amban el mas enag mungwali nihem wahkig patalkug mo asa God ehem amtakwalig klaitife.”

<sup>11</sup> Afa enag mo ambala ogfunig Mosesna nihe mo mas elim kwefunam asa Godna nof la afsug pugui. Asa Godna mo enaig esog;

Afa amban el Godim olug oniginag asa afsug kabag pugufe asa ehe nufuna wahkig nofkenagag flafe. *Hab 2:4*

<sup>12</sup> Afa el onigig nihe mo la lugwafife eba mas mungwalofug feg mo asa el God nai yi olug onigig la lugwa. Afa Godna mo enaig esog, “Afa amban el sa mungwali nihe mo esenam asa patalkufe afa ehe nofkenagag go.”

<sup>13</sup> Afa bigel mas mungwali nihe mo patalfuna mo asa God enaig esog sa ma ehengel amtakwalig fli. Afa KraiS membeg enag kinig bigelni huguflafatig asa ehe enag amtakwalig ehe flanig asa Godna mo enaig esog, “Mungwali el li yi lugufe eba God ehem amtakwalig faife.”

<sup>14</sup> Afa autunam God Abrahamim suialag mo faina asa KraiS Sisas enag amtakwalig flag asa God afwambanai elim gafa enag suialag mo faini. Afa nengel afwambanai el olug onigigim asa ma ne gafa Godna Sungwabug flifi asa ehe sihi fwahana.

*Mosesna nihe mo Godna mo sihi fwahagim mas flafe*

<sup>15</sup> O nilite, ka biafgelni lasug mo osihini maia sambaganigi el mangwalimba sawi ahfegim afa mungu onigig kike ahfakagim afa haig ese amban enag onigim pigi klaitinam afa ming onigig enanai yi sisi ahfakag.

<sup>16</sup> Afa ilawana God ati Abrahamim afa heafna simbianigana simbegim sihi fwahana afa Godna mo mango kaksag simbianigam sihieni mo afa kaksag simbianiga eba kaksag elim ogfunig afa enag mungu simbeg eba mungu elim ogfug eba KraiS.

<sup>17</sup> Afa enag mo ka esog eba hwaig, autunam God Abrahamim hwa mo sihina fwahana asa enag gwenai g wese gofi. Afa 430 yia sati gof ikagba asa Moses nihe mo flana. Afa nihe mo mas Godna sihi fwahag mom pigi klaitinam asa enam filafatife eba mas Godna sihi fwahag mom enaig ese.

<sup>18</sup> Afa big nihe mom patalfuiagba asa God bigim enag suialag gawig faig. Eba enaig esegba Godna sihi fwahag mo

eba esug go. Amo mango enaig mo, afa God Abrahamim mo sihi fwahana asa enag mo Abrahamim ati nufunam puguna.

<sup>19</sup> Afa nihena gafugag eba haig maia? Eba elni amtakwalig esegim ambala ofgug. Afa God mungu Abrahamim simbianiga mo sihi fwahana. Afa enag nihe mo gafuga fiahkan maia enag simbianiga puguiba. Afa oflanai elni ninga la God Mosesim nihe mo faini. Afa Moses eba gafugafegim olyi fena Godim afa elim.

<sup>20</sup> Afa el mungu ehe behig membeg gafugafe afa ehe mas olyi nai elim awamonai. Afa God eba mungu afa ehe mo ehe sihi fwahana.

### *Nihe mona gafugag haig maia*

<sup>21</sup> Atiaho Mosesna nihe mo afa Godna mo sihi fwahag mo i moanag ahfena me? Amo, eba awai. Afa nihe mo gofiteba asa ma el nofkenagag flifi asa ma el nihe mo patalkui asa Godna nof la afsug kabag feg. Amo enaigba awai.

<sup>22</sup> Afa Godna mo enaig esog amtakwalig nihe mungwali elim kikenana. Asa el Sisas Kraism olug oniginag asa mangwal gawigim God ati sihi fwahana asa enaig el sa ma enag fli.

<sup>23</sup> Afa enanam Sisasm olug onigigna mina mas pigina mo meyifiahfenaba nihe mo bigim ahnai skaufenig ofenaiba kalabusi afohie asa God olug onigigna mina ambala upugunaba asa big Sisasm olug onigini.

<sup>24</sup> Afa maia Sisas blo fwainig fiahfenaba afa nihe mo bigim nangwaghiage lafina. Afa maia olug onigigna mina pigigba asa big Sisasm olug oniginag asa big Godna nof la afsug kabag apukefe.

<sup>25</sup> Afa glauwaba enag olug onigigna mina ati pigig asa nihe mo bigim mas nangwaghiage lafi.

<sup>26</sup> Afa olug onigig minaba nengel mungwali Kraism Sisasm nai yi afoh asa ne Godna luwalig fig.

<sup>27</sup> Afa maia ne bu la apaiyegba ne Sisasm Kraism yi mungu ahgohug asa ne Kraism nihem kehlag ofenai lofug ne fatig.

<sup>28</sup> Afa Ju el afa afwambanai el mas algana feg mo. Afa esug gafugag el afa esug afohiag el afa saglag afa angwafig gafa algana feg mo. Afa bigel mungwali Sisasm nai yi afohie.

<sup>29</sup> Afa big Sisasmna fefe eba ne Abrahamna simbianiga lofug fig asa ne mangwal ne flifi asa God ati sihi fwahana.

## 4

<sup>1</sup> Afa kana mo enaig esog afa maia alag lahaiba afa alagna gawig leg sa lambife asa ehe wetiti fiahfenaba afa sa mungwali gawig ehe kanog. Afa enag wetiti leg ofenaiba esug gafugag el feg afa mungwali gawig eba heafna.

<sup>2</sup> Afa ehe maia wetiti fiahfenaba eba ming el ehem wani siakafena afa gawigim nangwagehiage afa alag sati ehem sihi fwahana maia ika enanai yi opugufiba sa ne mungwali gawig nimbe lambife.

<sup>3</sup> Afa bigel gafa maia big luwal wetitinig asa big bite nai onigigim ahnai skaufinim afa enam esug gafugafini.

<sup>4</sup> Afa maia heafna osu ma blo puguiba asa God heafna legim ninghiana. Afa afag ehem fuklag asa ehe el nihina. Afa ehe gafa Ju elni nihe mo ahnai skaufenag

<sup>5</sup> afa bigel nihe mo ahnai skaufini asa ehe bigim pese lambigim asa big Godna luwalig fig.

<sup>6</sup> Afa big Godna luwalig figbi asa God heafna legna Sungwabug bigelni olug nangum ninghiag. Afa enag Sungwabug bigel nai yi gohugum asa Godim enaig esog, "Api, kana Alag."

<sup>7</sup> Asa ne mas esug gafugag el feg mo afa ne Godna leg feg. Afa ne leg fegba asa mungwali mangwal God heafna legim faig asa ne faife.

*Pol Galesia nai elim fwina oniginig*

<sup>8</sup> Afa autunam ne mas Godim anwenafena mo asa ne mwakwal Godna esug gafugag el fena afa enag mango God mo.

<sup>9</sup> Afa ilawaba ne Godim anwenafenag afa ka pese onigigim sa ka enaig esog God ati nem anwenafenig. Afa haigsegba ne membeg og ka pese ikanam afa bite nai onigigm patalku? Eba auwiauwig afa mas ne kweafui. Haigsegba ne og ka pese ikanam ehena esug gafugag el go?

<sup>10</sup> Afa neana onigig kwania feg afa mungu mungu osuna, wasni afa nihe mo kanog fwahag asa enanam ne laskuhlanam buyis i afa lotu i. Ne onigig eba enam kwania feg.

<sup>11</sup> Afa ka nem fwina kusgunag afa ka oksig mungwali gafugag asa ka nem esenag eba esug feg.

<sup>12</sup> O nilite, ka nem wasneigni sihinig sa ne ka lofi afa autunam kaba nengel lofug fena. Afa nengel mas mangwal amtakwalig kam esinim mo.

<sup>13</sup> Afa ne ati anwenafig kam gihnaba asa ilawana ka Godna suialag mo nem sihinugena.

<sup>14</sup> Afa kana elig mas suialafeg mo asa enag kwania kinig nem faig. Afa nengel mas kam yiskosinim afa masig fatini mo. Amo, nengel kam sugufinim afa kam suialag fefflig ofenai kaba Godna oflanai el. Afa ne kam sugufilig asa ne KraiSisasim sugufilig ne enaig esig.

<sup>15</sup> Afa enanam ne kam kwefugum afa ne sifkalini afa enag sifakal haigsegba enam fwahig. Afa kike nufunam sihi afa enanam ka nengelim sahtiginaba og sa ne nimbeafgelni

nofug fogafila kam lambwaig sa ne sifakali enaig esi asa ka kwefug.

<sup>16</sup> Afa autunam ka neana hihe fena afa haigsegba ilawo ka nem nufuna mo sihinigbi asa ka nengelni angoluwag el feg.

<sup>17</sup> Afa enag mwakwal ogfuiag el membig nengel sa ehengelni mom sawifegoni afa ehengelni onigig nem suialafegoni eba awai. Afa ehengel membig nengel kam fwahinim asa ehengelim mo fwina onigigoni.

<sup>18</sup> Afa suialag el asa suialag onigigna gwenag fe eba sa ne ehena onigigim kweafug. Afa ka nem wangag enanam mungu mo afa asim gafa ka ikaiba sa ne enaig elim onigini.

<sup>19</sup> Kana luwal, ka nem onigigim asa ka pese susug flafug ofenai afag luwalim oningis. Afa enag susug fiahkag maia enanam Kraisna nihe ne nai yi kwania fegba sa ne Krais niheg.

<sup>20</sup> Afa ka nem fwina kusgunig asa ka nem wangafiteba eba ka nem esenite afa ka nem aflahlana sihinife. Afa ka eteti haig sa ka esenam asa ka nem kwaganife.

*Hagar afa Sara nai i lasug mo*

<sup>21</sup> Afa amban nengel nihe mom ne membigim asa ahnai skaufinig sa ka wahigi sihini. Atiaho ne nihe mog mo anwenafig me awai me?

<sup>22</sup> Afa enag ginof enaig esog Abrahamna luwal eba sambaganigi fena. Afa esug gafugag angwafig Hagar Ismaelim foklana. Afa Sara Abrahamna nufunam angwag ming luwal wanigena eba Aisak.

<sup>23</sup> Afa esug gafugag angwafigni luwal eba elni membug la gona. Afa God sihi fwahana asa Abrahamna nufunam angwag enag luwal wanigena.

<sup>24</sup> Afa enagba lasug mo feg. Afa sambaganigi angwafig eba sambaganigi minam ogfug. Hagar Sainai mugum ogfug enanai yi asa Moses nihe mo flana. Afa heafna leg nihe mom ahnai skaufini asa ehengel eba esug gafugag el fig.

<sup>25</sup> Afa Hagar ofenai Sainai mug asa Arebia la go. Afa ehe Jerusalem kembangim ogfug asa glanu hwa bite la go. Afa Jerusalem la nai el nihe mom ahnai skaufig asa esug gafugag el fig.

<sup>26</sup> Afa hevenna Jerusalem la nai el eba mango esug gafugag el fig mo. Afa bigel Sisasim olug oniginag afa enag Jerusalem ofenai bigelni afag.

<sup>27</sup> Afa Godna mo enaig esog;  
Afa angwafig luwal fokla fwainig sa ne sifakale,  
afa angwafig susugim ningisigim mas anwenafe sa  
sifakaligim afa ambwaitinafig afa mwanafi wena  
aitiagig,

asa angwafig saglag fwainig ehena luwalig numbwel fefe, afa angwafig alagagna feg eba mungu mungu luwalna feg.

*Ais 54:1*

<sup>28</sup> Kana nilite ne Aisak lofug. Afa God mo sihi fwahana asa ne heafna luwalig apukeg.

<sup>29</sup> Afa Ismael elni membug la gona afa Aisak eba Godna Sungwabugni sawigna gona. Afa enanam Ismael Aisakim kinig faina. Afa ilawaba gwenai mungwalofug feg.

<sup>30</sup> Afa Godna mo haig sihife? Eba enaig esog, “Afa esug gafugag angwafig afa heafna leg sa ne ningitigi. Masa esug gafugag angwafigni leg alagna gawig lambife. Mungwali gawig eba nufunam angwagna legna.”

<sup>31</sup> Asa kana nilite, bigel mango esug gafugag angwafigni leg mo. Amo, bigel eba nufunam angwagna leg.

## 5

*Nihe mo mas bigim kike*

<sup>1</sup> Afa Krai kwaniam gafugag esena asa ilawo big mas nihe mona esug gafugag el fei. Asa wasneig mo masa ne pese ikanam Mosesna nihe mona ahnai skaufenafe ofenai esug gafugag el fig.

<sup>2</sup> Sa numwehe higi, ka Pol ka nem enaig sihifenig, afa ne nihim kokwahiage Ju elni nihem patalfuiba afa Krai na laha eba mas nem kwaganig mo.

<sup>3</sup> Afa ka pese sihig afa amban el nihi kokwahiage nihe esegim asa enag el mungwali nihe mom patalkui.

<sup>4</sup> Afa amban nengel enaig onigifinim og ka Mosesna nihe mo patalku asa ka Godna nof la afsug kabag fei. Afa enaig el Krai sim masig fatig afa Godna esmunagim kwaganig mina mas ne enanai yi go mo.

<sup>5</sup> Afa big Krai sim olug oniginig afa autunai la God enaig esog ne afsug kabag el feg. Afa Godna Sungwabug bigim kweafug asa big enam nengeafu.

<sup>6</sup> Afa bigel amban Krai Sisas nai yi safig afa sa enaig onigig ne fe. Afa elig kokwahiage nihe mas nem kweafui. Afa el eseg afa el mas eseg mo enag sambaganigi mas Godna nof la algana feg mo. Afa Sisasim olug onigig nihe eba elim membenig nihem ofug eba naho nufunam nemugba.

<sup>7</sup> Afa autunam ne ati suialag ikafe. Afa amban maia nem nufunam mo patalkuiagimba kwenag.

<sup>8</sup> Afa God mas enaig eseg, amo ehe nem awamonag.

<sup>9</sup> Afa lasug mo enaig esog yist\*

\* **5:9:** Afa yist eba smof lofug asa plaua la kokofigim wahgi wahgi figim maia pupkiakugba asa bret gafugafig. Yist weititi esegba sa bret kwaniam pupkiakug. wetiti ne plaua la kokofegba asa mungwali plaua pupkiakug.

10 Afa big Ainiyagna safeg asa ka enaig onigig nengelim fenig nengel kana onigigim kehli afa mas ne mingnag onigigim fli. Afa amban enag el nengelni onigigim sa gasaflafig asa God ehem sa ma susug faife.

11 O nilite, afa ka enaig sihifeteba sa ne nimbeafgelni elig kokwahiagi, haisegba enag patalfuiag el kam kinig fai? Afa ma ka enaig sihifeteba eba nufunam asa enag el mas kam ninimu flini mo maia ka enaig sihiba Krai li katigeg la lahana.

12 Afa ka membeg el asa nengelni onigigim gasaflafigim og sa ne elig kokwahiagi ka membeg ehengelni mungwali eligim kokwahiagonugi sa ma ehengel amtakwalig fli.

13 Kana nilite, God nem awamonig asa ne mas nihe mom ahnai skau gofi eba nufunam asa nofeka ne enaig esog ka kikeafna eligni membugum patalkuagim. Amo, sa ne nimbeafgelni kristen nilitem membeagi afa nimbefim fakwaganiagi.

14 Afa mungwali nihe mo eba enag mungu mo la seaifugo eba enaig esog, "Sa ne mingnag elim membeni asa ne nimbefim membeg."

15 Sa ne numwehe nofeka ninimunam nilitem amtakwalig feni ofenai sangwali nai sis masa ne nimbefim fwina amtakwaliagifi.

*Godna Sungwabugna nihe afa eligni sawieg nihe*

16 Afa ka nem enaig sihifenig. Sa ma nengelim Godna Sungwabug mina ogfunibi sa ne enam patalfu. Afa ne enaig esibi eba ne mas eligni sawiegim patalfui.

17 Afa big ati anwenafig, Godna Sungwabug i afa eligni sawieg onigig i hefim moanag ahfego. Afa eligni sawieg onigig ona Godna Sungwabugim pigaupi afa Godna Sungwabug gohugim ona eligni sawieg onigigim pigaupi. Afa enaig ahsafego asa mangwal sa ne membeg noka ese eba mas ne esei.

18 Afa ne Godna Sungwabugim patalfiafiba eba mas ne nihem mo ahnai skaufenai.

19 Afa eligni sawieg nihe eba ambala feg. Eba enaig eba aga taitu nihe afa nufweh nihe afa amtakwalig moiniaini nihe.

20 Afa el mwakwal godim lotunig afa aisilni nihe afa hefim moanagigim asa angoluweg fiagig. Afa elim ambobugigim nihe afa olug kakagig nihe afa tonbusugiagig nihe asa hefim kokohiagigim afa mungu mungu heafgelni sibna unehlag la sefoakag.

21 Afa el sa mingnag elim onigig amtakwalig fegonig afa uflogna buum fwina ahgagig afa amtakwalig buyis esig afa mingnag amtakwaligim gafa gwenaig esegig. Asa kati

autunam nengelim sihini afa glanu ka pese sihig afa enaig el mas Godna bog meg gam seaifui.

<sup>22</sup> Afa maia Godna Sungwabug bigelim gofsenigbi asa heafna fug bigel nai yi leg enag fug eba, elim membug, afa sifakalig, afa olug enesieg, afa elim aflahlanam esenag, afa elim suiala onig fenig afa elim suialafenig, afa elim onigigna fenag.

<sup>23</sup> Afa nimbefim pigaupinam afa eligni sawieg pigaupinam enaig ne esegba eba mas nihe mo enam kwenag mo.

<sup>24</sup> Afa el sa Kraisa Sisana feg eba ati heafgelni amtakwalig elig sawiegim li katigeg la gufla kahlagba asa enagba awaieg.

<sup>25</sup> Afa Godna Sungwabug bigelim wasneig faig eba sa big ehena sawiegim patalfu.

<sup>26</sup> Afa nofeka tonbusiagig nihem esi afa ninimu oli afa mingnag elim ambobug fegoni.

## 6

### *Kristenna nilite sa ne nimbefum fakwagafiag*

<sup>1</sup> Nilite sahi, afa amban el mangwal amtakwalig esegim asa peg. Afa amban sa ne Godna Sungwabug patalku sa ne ehem aflahlanam pese suguiaflanam afa nengigim aflahlanam sihinage. Afa nimbefum mo numwehe nofefiba masa ne mungwalofug yuhnag pugunafe.

<sup>2</sup> Afa ambanba kinigi peba sa ne nimbefum fakwagani afa ne enaig esebi enaho ne Kraisa nihe mom patalfug.

<sup>3</sup> Afa amban ne enaig onigigfefe og kikeba ati unehlagna feg afa ehe nai yi mas mangwal go mo. Enaig el hefum mwakwaleg.

<sup>4</sup> Afa mungu mungu el sa ne nimbiafnam nihem kwe-fhiage ne suialag me awai awai me. Afa ne nimbefim enaig esenam maia suialafeba sa ne sifakale. Afa nofeka nimbefum flanam afa mingnag el asa mangwal esig enam kwefihianuge.

<sup>5</sup> Afa mungwali el big biafna kinig sa ne mungu mungu el kahli.

<sup>6</sup> Afa ogfuiag el sa nem Godna mo sihinig sa ne nimbiafna gawig suialag sa ne ehem mungwag fai.

<sup>7</sup> Afa nofeka nimbefum mwakwale mas amban weti gafa Godim mwakwale nai afa sa onigi, el asa mangwal li fug bite megam aso la kumug eba gwenai li nog pugug.

<sup>8</sup> Afa ambangel sa heafgelni bitenai onigigim patalfug eba gwenai fane amtakwalig flife asa lahad fe. Afa ambangel sa Godna Sungwabugim patalfug eba fane suialag flife eba wahkig nofkenag feg.



<sup>9</sup> Asa nofeka suialag nihem esegim yiskose afa bigel enam mas fwahi asa maia enag was puguiba asa big suialag fane afu lambogifi.

<sup>10</sup> Asa enanam mina pigieg gofiba asa gwenanam sa ne mungwali elim kwagani. Afa Sisasna el eba bigel mungu Alagna ahfeg asa ne enaig elim suialag fwina fegon.

<sup>11</sup> Sa nangui ginof kwania ka nem kikeafna ningana asa ka nem ginofenig.

<sup>12</sup> Afa el nem sa esonig elig kokwahiage afa enaig el eba enaig onigifeg afa ka enaig suialag eseba elni nof la sa ma kam og ne suialag el. Afa ehengel embefig ka enaig esogoiba Kraisi li katigeg lahad asa el kagelim kinig faigofe.

<sup>13</sup> Afa el elig kokwahiag nihem patalkug afa ehengel mungwali nihe mom higigim afa mas patalfug month Afa ehengel membig sa ne elig kokwahiaginim afa heafgelni patalfuiag el apuke asa ehengel unehlag kwania enana flig.

<sup>14</sup> Afa kaba mas kikeafna unehlagim finig fe. Ka Ainiyag Sisas Kraisi unehlag fingi fenag asa ehe li katigeg la lahad. Afa ehena li katigeg kam enaig esenag asa bitenai onigig kana ati lahad afa ka bite nai onigig la ka lahad.

<sup>15</sup> Afa elig kokwahiageg nihe mas nem kweafui. Afa el eseg afa el mas eseg mo enag sambaganigi nihe mas haigseg mo. Afa God bigim esenig asa big glaunai apuke enaho eba nufunam nemug.

<sup>16</sup> Afa el enaig onigig kehli sa ma olug enesiegna afa aflahlanam ehengelim feni. Afa ehengel eba Godna nufunam Israel nai el fig.

<sup>17</sup> Afa hwa ati ka blu afohiaba. Afa el nofeka kam mingnag kinig faig asa autunam el kam tigeini asa ati kana elim yi enag gokug go afa enag gokug eba Sisasna lofug feg.

<sup>18</sup> O nilite, ka membeg Ainiyag Sisas Kraisi sa ma nengelni sungwabugim esmunagim kwagani. Gwenaho eba nufunam.

## **Mo Pol Efesus la nai Elim Ginofe Faini Hwa buk enaig esog**

Afa hwa bukna mog eba enaig esog God ogna mungwali gawig heven la nai i afa bitenai i Kraiswa ningala fwaha sa ma Kraisa ehe mungwali enam misog feni (1:10). Afa God membeg heafna elim fuklasaniba sa ma ehegelni nofikienag Sisasa nai yi gabahla afuhnam afa mungu onigigna fi. Afa lasflam mingnag buk la Pol wasneigni sihig. Afa ehe enaig esog Godna esmunagim kwaganim eba mungwali el sa ma Sisasim olug onigini afa mungu finim afa mungu el apuke. Afa Sisasna suialag gafugag la God ati elim pese lambigim afa heafna sugwambug faig enag ogfug suialagim sa sihifwahag eba ehengelim nufunam pugunife (1:14). Afa ming mo Pol enaig sihifeg, Kristen el sama Sisasa nai yi afofi afa mungu olug flinim afa Godna nihem patalfui. Hwa buk la Pol lasug mo sihig sama el Sisasa Kraisa nai yi afonam asa mungu el lofug apukei. Afa ehe enaig sihifeg. Godna el eba mungu elig feg afa Kraisa eba enag eligni misog feg (4:1-16). Afa ming lasug mo enaig esog Kristen eba lalalofug feg afa Kraisa eba lalana wofugug feg (2:19-21). Afa Godna el ofenaiba angwafig mungufeg afa Kraisa ofenaiba enag angwafigni saglag (5:22-33). Afa hwa buk la bigelim ogfunig suialag gawig God membeg heafna elim esenigim.

<sup>1</sup> Ka Pol ka Kraisa Sisasna kanog fwahag el afa God heafna membug la ehe kam kanogim afa sa kam kanog fwahag. Afa Efesus lanai el asa ne Sisasa Kraisa nai yi lugwa ka nem hwa ginof fenig.

<sup>2</sup> Afa God bigelni Api afa Ainiyag Sisasa Kraisa i sa ma nem esmunagim ahkwagani afa nem olug enesiegna sahfeni.

*Afa God bigelim Sisasna ninga la mungwali gawig faig*

<sup>3</sup> Afa sa big Godna unehlagim fingi fi ehe God fegim afa Sisasa Kraiswa alag gafa feg afa Ainiyag Sisasa Kraiswa ehe bigim mungwali heven la nai gawig faigim afa enana bigelni sungwabugim kwaganig.

<sup>4</sup> Afa eba God maisim bite fakag fwainig fiahfenaba enanam God ati bigim Kraiswa hefum kanog fwatina og eba sa big heafna nemug finim afa afsug kabag el fife afa mas big heafna nof la mangwal weti fi.

<sup>5</sup> Afa autunam ehe bigim membenim asa kanog fwatinam afa ogna Sisas Kraisna bigim pese tigfe lambigba asa big heafna luwalig fig. Afa heafna sawieg la enaigba eseg.

<sup>6</sup> Afa God heafna legim fwina membenam afa enaba ningihagba asa pe blog bigim lahanig. Eba ehe esmunagim bigim kwaganigba asa big Godna unehlagim fingi fi.

<sup>7</sup> Afa Krais bigim lahanigim asa heafna tafna bigim peseg lambigim afa bigna amtakwalig nihem hugflaitinig. Afa Godna kweafuag eba fwina kwania feg.

<sup>8</sup> Asa ehe bigim fwina nemug esenig. Afa ehe bigim suialag anwenag i afa onigig i faig.

<sup>9</sup> Afa autunam God ati sihi fwahana og sa ma Krais bigim eseni afa autunam enag sawieg meagam gofena afa glawaba bigim ambala upugunig.

<sup>10</sup> Afa enag sawiegba enaig eseg maia mungwa sufuni osuna feiba asa God mungwali gawig heven lanai afa bite lanai agoguliagenam Krais nai yi fwatiba asa ma Krais misog feni.

<sup>11</sup> Afa God heafna sawiegim patalkunaba eba ati autunam kagelim kanog fwatina kagelim og sa ma Krais nai yi muhla finim asa ma Godna el fi.

<sup>12</sup> Afa kagel Juda nai el ka gof gam Kraisim olug onigigim afa ehem patalfug. Afa God kagelim kanog fwatigba asa kagel enam anwenafi ehe kwania feg asa ka heafna unehlagim fingi fi.

<sup>13</sup> Afa nengel afwambanai el ena mona ne gafa ati ne nufunam mo higig, ena suialag moba eba God nem peseg lambig afa sa ne Sisas Kraisim olug oniginig eba sa ne Krais nai yi gabahla afohiefim. Afa God ehe autunam mo sihi fwahag eseg asa enam patalkugim afa nem heafna Sungwabug faig. Enaba ofgug ne heafna el nemug feasaieg.

<sup>14</sup> Afa autunam God heafna elim ati sihi fwahani og ka nem mangwal suialag faifi. Afa ati big Godna Sungwabugbi flig asa enaba ofgug nengigim ehe bigim mingnag gawigim gafa enaig esenifi. Asa big onigim ehe bigim wasneig gafugafenig asa big heafna unehlagim fingi fi.

*Pol Godim sahna og ma Efesus la naim anwenag fai*

<sup>15-16</sup> Afa ka nem beten ofenbi ka nem wahkig oniginigim afa ka Godim suiala onag. Asa ka higigba nengel Ainiyag Sisasim nufunam olug onigig ne finig afa ne mungwali Godna elim membeg fegonig.

<sup>17</sup> Afa ka Godim beten enag bigelni Ainiyag Sisas Kraisna alag fegim afa eba kwania feg afa wasneigni feg sa ma ehe nem Sungwabug faibi asa ma enag nengelim suialag

onigigim ogfuni afa Godim ogfuni asa ne ehem numwehe anwenafife.

<sup>18</sup> Afa ka sawi yi feg God sa ma nengelni onigigim obusenibi asa ne anwenafi ehe nem unetigigim asa nem mangwal suialag gawig sumi yi flife. Afa mangwalim God sa heafna elim sihi fwahani eba suialag nemug feg.

<sup>19</sup> Afa enag wasneig sa God bigim kwaganigba eba fwinam kwania nemug fiahgeg afa mas big kwefihianagi enaig wasneigbi bigel nai yi go ambangel sa Sisasim olug oniginig.

<sup>20</sup> Afa enag wasneig gwenaig autunam God Kraisa nai yi ese fwahagba afa sa Kraisa lahagba ena kwania wasneigni God ehem ilafog fatigim afa heven gam fuku wanikig nihiginai ninga la lasu fwahag.

<sup>21</sup> Asa enanai yi Kraisa mungwali haig haig wasneig sanel i, misog el i, gavman el i, afa bitenai ainiyag i enam sisi yi fenfe. Afa mungwali el unehlagna fig ehem ahnai skaufnig. Afa enaba glawo gohnanam afa nengigim gafa ehe misog fenfe.

<sup>22</sup> Afa God mungwali gawig lambina Kraisa skau sigofe afa sa Kraisa ehe mungwali gawig misog fenfe enaba siosim gafa gwenaig esenig ehe misog fenig.

<sup>23</sup> Afa siosba Kraisa elig feg afa enag elig misog la gabahlagba asa Kraisa eligim ihlafeageg. Afa Kraisa haig haigim mungwali ihlafenugeg.

## 2

### *God Kraisa nofkenagag bigim melig pigieg elim faig*

<sup>1</sup> Afa autunam nengel ne haig haig nihe amtakwalig la afohieafnaba enaig nihe la nengelni sungwabug Godna nof la pigiafna.

<sup>2</sup> Afa enanam ne bitenai nihe amtakwalig la afwaminefifini afa ne sanelni misog elni nihem patalfuafena afa enag sanel glau enaig eseg elni onigigim wasneinugegba afa sa enaig el Godna mom flafug.

<sup>3</sup> Afa ilawonaba big mungwali gwenaig el finim afa bimbeafna sawieg la sahfewagfenaba eba big susug amtakwalig flite God ati mungwali elim faigim numweheageg fwahag.

<sup>4-5</sup> Enaba nufunam bimbeafna moala bigim pigie skofena. Afa maia enaig big finibi Godna aflafeg ihlafeagegim afa bigim fwinam membenigim asa Kraisa bigim esenigbi big nofkikenaba fig. Ei, God bigim esmunagim kwaganig asa nem peseg lambig.

<sup>6</sup> Eba ehe bigim Kraisa Sisasa ilafo klaitigba eba ati big Kraisa i heven la misog elni pegag sime la hawag.

<sup>7</sup> Afa God bigim membenigim asa bigim Sisas Kraisna esmunagim kwaganig afa enag eba fwina kwania feagegim asa ehe ognan enam wahkig ogfuiag gofum.

<sup>8</sup> Afa Godna aflafeg munguhe ne Sisasim oniginigbi asa nem lambig. Enaba mangwal nimbe ne esih mo amo eba God ehe nem esmunagim faig.

<sup>9</sup> Afa mas amban heafna unehlagimba fingi fei, amo eba awai, asa hwaigba mango bimbeafna gafugag la puguia mo.

<sup>10</sup> Eba God bigim Krai Sisasna esenigbi asa big enimuna el feasaigim afa big suialag mina afuia, enaigba God autunam ati numweheage fwahana.

*Krais bigim esenigbi asa big mungu el feasaieg*

<sup>11</sup> Afa ne afwambanai el ne ati anwenafig Judanai el eba nihim kukohiawagig el fig afa ehengel nengelim enaig esogonig og nengel afwambanai elbi nihim kukohiawagig fwainig el ne fig. Afa enaig nihemba eba eligim mungu esig. Sa ne enam onigim autunam ati ne algana elbi afohieafena.

<sup>12</sup> Afa enanaba ne Kraisim membi yi finim afa ne mas Israel elim fig mo afa negel mingnagim sa ne afwabagam fegonig afa ne mas God sa Israel elim mo sihi fwahani ne mas enanai yi saiweg mo. Afa ne mas Godim anwenafig mo afa ne Godim muhla fenagim nem mina awaienag.

<sup>13</sup> Afa autunamba ne membi yi nemug fini afa glawaba Kraisna tafna nem lamblugba asa ne Krai Sisasna feasaiegim afa ne Godim muhla finig.

<sup>14</sup> Afa Krai Ju el mi afa afwambanai el mi mungu wahe fwatigba asa big olug enesiegna suialag augufeg. Autunam Ju el i afa afwambanai el i angoluweg ahfena ofenaiba bog ehengelim olyi gohunig. Afa Krai heafna elig olyi kowagigim enana bogimba toflaitigim asa bigim lambigim mungu wahe fwatig.

<sup>15</sup> Afa Krai Mosesna nihe mo mi afa Ju elni haig haig nihe mo mi enaba ati susuleg klaitig. Afa sambaganigi el sa ma mungu el feasainam afa mungu onigigna finim asa big olug enesiegna augufe.

<sup>16</sup> Afa ehengel angoluweg el ahfena afa Krai li katigeg la lahagim asa ehengelni olug kakagigim tigeflanig asa sambaganigi elim wahe fwatigba asa ehe bigim pese lambigim God nangum wankag.

<sup>17</sup> Afa ehe enaig esegim asa olug enesieg mo sihinugeg. Afa autunam ne afwambanai el Godim membi fini afa Ju el Godim muhla fini ehe enag suialag mo ehengelim sihinugena.

<sup>18</sup> Afa Krai bigim sambaganigi elim mina piginigbi eba mungu Sungwabugni sa big Api nai yi apukeg.

*Bigel mungwali kristenba Godna lala nemug*

<sup>19</sup> Afa autunam ne enmona angoluweg el fena afa glawaba mas ne enaig feg mo. Amo, eba ati ne Godna el i ahfegim afa ne Godna luwalig fig.

<sup>20</sup> Afa nengel eba lala lofug God nem nimblag fwahag afa kagel kanog fwatieg el afa Godna mo fli sihiafule elbi eba lala sumul lofug. Afa KraiS Sisas ehe eba lala goseg sumul feg.

<sup>21</sup> Afa enag lala eba KraiS ehe kike lambugu ena lalaba ehe ese fwahagba asa pugu kwaniafenam asa Godna kwania lala gohiba asa Ainiyag enanai yi gafife.

<sup>22</sup> Afa God nem mingnag el mi agogulig fwatigba asa ne Godna lala feasaig. Afa Godna Sungwabug enanai yi seifo gofufe.

**3***Pol afwambanai elim kwagana*

<sup>1</sup> Afa ka Pol ka Sisas KraiSna gafugag la ka nem afwambanai elim enag suialag mo sihianugegba asa ka kalabus yi go.

<sup>2</sup> Kog atiame ne higig God kam suiala fiaflagim asa kam enag gafugag faigba nengelim kwaganigim.

<sup>3</sup> Afa hwa mo sa God esegba eba autunamba meagam seifo gofena afa eba God heafa ehe kam ambala ogfunagba asa ka enam weti ginofe fwahana.

<sup>4</sup> Afa atiaba ne ena mom suwigigbi enag meaganai moba sa KraiS eseageg enaba mangwal sa ka anwenafeg eba sa ne gafa anwenafife.

<sup>5</sup> Afa autunam sa fenaba enanamba God mas meaganai moba ambala upuguna mo amo eba awai eba glanuwo Godna Sungwabug ehe Godna afsug kanog fwatieg el mi afa Godna mo fli sihiafule el mi kam ambala upugunig.

<sup>6</sup> Afa enag meaganai moba enaig eseg. Afa Godna suialag mo la nengel enmona el mi afa Ju el mi bigim lambigim mungu wahe fwatigba big mungu elig fig afa mangwal gawig God Ju elim faig eba enmona elim gafa faig. Afa Sisas KraiSna gafugag la ehenigi Godna sihi fwahag mo ahflag.

<sup>7</sup> Afa God kam suialafiah flagim afa heafna wasneig kam esug faig asa ka heafna suialag mo sihiakag gafugag el pugug.

<sup>8</sup> Afa ka mungwali Godna elim ahnai skaufenig afa God ehe kam aflafenagim afa heafna suialag mo sihiakag gafugag kam faig. Afa kam og sa ma afwambanai elim ena mo fai. Afa ena moba KraiSna mungwali gawigim sihiageg afa bigel mas enam numwehe anwenafi.

<sup>9</sup> Afa ka enaig gafugag esegba asa mungwali el Godna onigim numwehe anwenafi eba ilawanaba God mungwali

gawig esegim afa heafna onigwageg meagam seifo gofena afa glawaba ka elim ogfunig.

10 Afa autunamba meagam seifo gofena afa glawaba siosim esenigbi afa sios Godna haig haig suialag onigig i afa anwenag i ambala upukeminefenigbi og sa ma oflanai el wasneig elni afa sanelni misog elni enag Godna onigigim anwenafi.

11 Afa autunam God ehe ati bigelni Ainiyag Sisas Kraisna enaig esegim onigiwage fwahana.

12 Afa glawaba big Kraisim olug oniginig asa Krais ehe bigna minaba fenig God nagum apukegimba afa mas big embefi amo eba bigel ofenaiba luwal alagim asahna.

13 Enaig esegba na sa ka nem sihinig nofe ne fwinam onigiwageafafim kinig sa ka flag nem kwaganigim afa masa ese nengelni onigig tigeufefe. Afa ka enag kinig kahlagba eba ne Godna nof la suialag augufefe.

### *Pol Efesus lanaim beteneni*

14 Afa enag mungwali God Api sa eseagegba ka enam onigigim afa ehem mong kokini kwakwagegim ehena unehlagim figifeg.

15 Afa ehe mungwali elim heven lanai mi afa bite lanai mi mog fenig.

16 Afa Godba suialag gawig memtog la puguiag nafeg asa ka enaig beteneg go kog Api sa ma nem heafna Sungwabug nengelni olug yi ihlafenugeiba sa ne enam fwinam wasnei yi.

17 Afa ne Krais nai yi lugwafiba sa ma ehe nengelni olug yi gofi afa ka Godim enaig sahnafege sa ma elim membenag nihe nengelni onigig la fwinam wasnei ofenaiba li bigag bitem kehlaguhba asa libi wasneig go.

18 Afa nengel i afa Godna mungwali el i sa ne anwenag ihlafi afa Kraisna membenag nihem sa ne anwenafi enaba fwinam kwania feagegim gwesim mungwanam pekag, afa kukag afa mungwanam ikaminefeg.

19 Afa ka membeg sa ne Godna membugum anwenafi afa mas big enam mungwali numwehe anwenafig mo. Asa ma God nem heafna nihem memtog la pugunugei.

20 Afa Godna wasneig big nai yi gafugagfego eba mangwalim sa big sahig afa mangwalim sa big onigig enag gafugag Godna gwesim ihlafeg.

21 Asa sios el Sisas Kraisim olug oniginig sa ma Godna unehlagim gwesim fingi feafufi. Eba nufunam.

## 4

*Bigel kristenba Kraisna elig*

<sup>1</sup> Ka Pol, ka Ainiyagna gafugag la ka kalabus yi go. Afa God nem sulufugim asa ne suialag gafugag fifie. Koka nem fuki lasaniba sa ne suialag nihena afohiafim asa enag gafugag la ne ihlafi.

<sup>2</sup> Afa sa ne mingnag Kristenim ahnai skaufegonim afa nihem aflahlanam fegon. Afa nofeka ikagna olug kakagiagi el sa nem haig fegonig. Afa sa ne mingnagim membegonim asa kwaganim.

<sup>3</sup> Afa Godna Sungwabug nengelim olug enesiegna au-guiagim faig asa nengel mungu onigig nafig. Sa ne enaig esi el mas enag mungu onigigim amtakwalihiagi.

<sup>4</sup> Afa big ofenaiba mungu elig fig afa Godna Sungwabug eba mungu feg afa God bigim awamonigim asa big nengeafo mangwal mungu God bigim esenigim.

<sup>5</sup> Afa bigelni Ainiyag mungu feg afa olug onigig mungu feg afa bu la peg mungu feg.

<sup>6</sup> Afa God eba mungu feg afa ehe mungwali elni alag fegim afa Ainiyag feg. Afa ehe mungwali fenigim asa enanai yi seifo gafugafego.

<sup>7</sup> Afa Krai heafna sawieg la bigim mungwali mungu mungug wasneig esug faig asa big enana gafugafife.

<sup>8</sup> Afa Godna ginof enaig esog;  
Afa maia ehe sisi gam fukwako fenaba  
asa ehe angoluweg elim\* filafe klaitigim sa wankag.  
Afa ehe elim gawig esug faig. *Sam 68:18*

<sup>9</sup> Afa enag mo enaig esog, “Ehe sisi gam fukwako” enaba mango maia? Afa enag mo enaig ogfufeg ehe sisi nai fwahagim afa bite la pe blogim asa gwesim bite kife gam pekag.

<sup>10</sup> Afa ehe pe blogim afa sa enag el pese heven gam fukugum afa gwesim kwegfu kukag asa ehe mungwali gohminefe.

<sup>11</sup> Afa ehe enaig wasneig elim esug mimgenig asa mingnag elbi kanog fwatieg el fig afa mingnag Godna mo fli sihiafule el fig afa mingnag suialag mo sihigonug el fig afa mingnag siosna misog el fig afa mingnag ogfuiag el fig.

<sup>12</sup> Afa ehengel sa ma Godna elim kwaganighi asa ma ehengel Godna gafugagim suialafefli. Eba sa Kraisna elig kwania fenam wasneyiagefe.

\* **4:8:** Autunam bigel Godna angoluweg el fini asa Krai bigim pese lambigim.



<sup>13</sup> Asa big mungu olug onigignafife afa Godna legim sa big anwenafig eba mungwalofufeg. Afa big saglag lofinim afa big gwenafig Kraisa i mungwalof ahfefe.

<sup>14</sup> Asa mas big luwal lofig mo. Afa haig haig mo amtakwalig mas bigim lambinam ofenaiba bufle buskom esim esim lambfiegofi afa efef li figegim petla faka lambfiegofi. Afa mwakwal el eba haig haig mina feagegim elim mwakwahiagig oga elim amtakwalig mina wanafu.

<sup>15</sup> Afa big mas enaigba fi, amo sa big elim membegonim afa nufunam mo sihigonfim eba mohna feskofenam ihlafaesaife asa big Kraisa i mungwalofug ahfenam afa ehe bigelni misog fenfie.

<sup>16</sup> Afa maia big elig ehem ahnai skaufinigi asa ninga i, mong i, nofug i afa angug i enag elig yi tutufeakagba asa bigag ehem kike lambugu. Afa maia enag mungu mungug heafgelni gafugag fiahgofibi asa elig mohna fegim afa membug nihe fwina wasneig.

*Bigel sa big ombusug yi nai fi*

<sup>17</sup> Afa Ainiyagna unehlag la ka nem wasneig mo faig nofeka afwambanai el lofug afohiefim. Afa ehengelni onigig mas mog fenig mo.

<sup>18</sup> Afa ehengel ati etetiagigim afa olug liputie skofeg asa ehengel Godna nofkenagagim membi fenig. Afa ehengelni onigig sikulu feskofeg.

<sup>19</sup> Afa ehengelni onigig mas afwane feskofei afa ehe amtakwaligim sifkalinig hefum gwesim mungwali faig afa sa haig haig eseagig.

<sup>20</sup> Afa ati ka nem ogfunig enag amtakwalig mina eba mango Kraisa mina mo.

<sup>21</sup> Afa ka nengelim ehena nufunam mo ogfunig asa ati ne Sisasna mom higigim patalfug.

<sup>22</sup> Afa maia ne Sisasim olug onigig fwainig afohiafnaba afa enanaba ne autunai nofkenagag la afohiafna. Afa ne ati higig autunai nihe nimbeafgelni autunai nofkenagag la sa go enag nihe nem mwakwalen go eba enaho autunai nofkenagagim amtakwalefugu afa sa ne enam huguflifati.

<sup>23</sup> Afa nengelni olug i afa onigig i sa ma waikefe mulug nemug pugui.

<sup>24</sup> Afa sa ne glaunai nihem flifatinim. Afa enaba God ehe lofug feg eba suialafegim afsug nemug feg.

<sup>25</sup> Afa big mungwali Kraisa elig fig asa nofeka mwakwal mo sihiagi afa sa ne mungwali nimbeafgelni hihem nufunam mo sihigonugifim.

26 Afa ne olug kakagig onigig figbi nofeka enam gwese fwaha eba masa ne amtakwalig eseagefe. Afa masa osu pefiba afa ne gwese enam kehlagufufe.

27 Masa ne Satanin mina pigi fwahafe.

28 Afa ukwef el sa enaig nihem fwahinim asa heafna ningana suialag gafugag fiahginim sa ma gawig fwainig elim kwagani.

29 Nofeka amtakwalig mom sihiagi amo sa ne suialag mo sihiage eba sa elim kwagani. Afa mo sa ne sihig enaba elim suiala fenagba asa el ena mo higig.

30 Nofeka Godna Sungwabugim olug kinig faim. Afa enag Sungwabugbi ogfug ati big Godna fig asa autunai la God bigim lambinam amtakwalig fwainig la lasanife.

31 Afa ne elim amtakwalig onigig nihe afa olug kakageg nihe afa ninimu nihe sa ne gwesim fati. Nofeka elim fwina lagigonim afa kwasigonim. Afa haig haig amtakwalig onigigim sa ne fwatiagi.

32 Afa nengelni nihe eba sa ma sios nilitem aflafegonim afa suialafegonugi. Afa Kraisi enaig esegba asa God bigelni amtakwalig huguflafatinig asa bigel nilitem gwenaig esegon.

## 5

### *Sa big ombusug yi afohiefim*

1 Afa ati ne Godna luwalig figba afa ehe nem fwina membenig asa ne gwenaig ehe lofug esi.

2 Kraisi bigim membenigim asa bigim lahanig. Afa enag lahad ofenaiba pris sanda Godin tuhlunigbi asa suialag emblegusug pugugba asa God enam sifakalenag. Asa nengel gafa gwenaig membug nihe la afohiefim.

3 Afa nengelbi Godna el ne fig asa nofene aga taitufi afa haig haigim membehiagi afa elni gawigim membe gonigigim esi. Afa sonaig mo masa nem olyi pugunifie.

4 Afa mingnag mo nofeka enaig esi eba afwanef mo afa haisihi haisihi mo afa molamp mo. Amo, sa ne Godin suialag ona.

5 Afa enam sa ne numwehe anwenafi aga taitu el i afa haig haig membeheawagig el i afa elni gawigim membenag el i eba mas Kraisi nai yi God nai yi bog meg gam afu saigo. Afa el fwina gawigim membeageg enaig elbi eba ehe mwakwal godin lotu fenig.

6 Afa el Godin masig fatinagim afa enaig nihem patalkuba asa God enaig elim olug kakageni. Masa el mwakwal mona nem kilmwan fegonifi.

7 Asa ne enaig elim membi fegon.

<sup>8</sup> Afa autunam ati ne sikulufeg la afofena. Afa maia ne Ainiyagna el figbi asa ne ombusug yi afohie. Afa sa ne ombusug elni nihem afohiefim.

<sup>9</sup> Afa ombusug nihe eba haig haig suialag nihe i afa afsug nihe i afa nufunam nihe i lampugug.

<sup>10</sup> Sa ne enam numwehe yisginim anwenafi mangwal nihe sa God nem og ese.

<sup>11</sup> Afa sa ne sikulufeg nihem membi feni eba mas haig esenam afa fug lugui. Afa sa ne enag nihe ambala lamblu ombusug yi fwati.

<sup>12</sup> Afa el haig haig meagam eseagig eba fwinam afwanefeg asa ka enam sihiagim oksig.

<sup>13</sup> Afa maia ombusug mungwali nihem pugunigbi asa enag numwehe ambala afohie asa amtakwalig elim afwanfug flig.

<sup>14</sup> Afa mangwal sa ambala afohie enag gafa ati ombusug yi afohie. Asa mingnag mo enaig esog og;

El sa ne nongi sa buihia

afa nimbeafna biteg kife nai sa ne buihiaiba

sa ma Kraisna ombusug ne nai yi fenai.

<sup>15</sup> Asa ne numwehe nimbeafna gagim onigim. Nofeka etetig el lofe amo, sa ne suialag onigina el fe.

<sup>16</sup> Afa hwag osuna eba el amtakwalig fig asa nofeka suialag nihem yiskose.

<sup>17</sup> Nofeka ne etetig el fi. Sa ne enam numwehe yisginim anwenafi mangwal nihe sa God nem og ese.

<sup>18</sup> Afa nofeka uflogna bu fwinam ahganam afa moiniaini feagi amo, enaba nem amtakwalig laitig. Afa sa ne Godna Sungwabugim fwahinibi sa ma nem blo ihlafenugei.

<sup>19</sup> Sa ne Kristen elim enaig mo sihigonugi enaba Godna buk la nai mwanafi afa siosna mwanafi, afa mwanafi Godna Sungwabug nem faig. Afa nimbeafna onigig Ainiyag nai yi lugwafiba asa mwanafi mo fatini ehena unehlagim fingi figim.

<sup>20</sup> Afa bigelni Ainiyag Sisas Kraisna unehlag la sa ne mungwali haig haigim God Apiim suialag ona.

### *Alagag angwagna mo*

<sup>21</sup> Afa nengel Kraisim oniginim patalfu asa nembeafum mungwali ahnai skaufiagi.

<sup>22</sup> Afa nengel angwafig sa ne Ainiyagim ahnai skaufenag asa nimbeafna alagagim gwenag esena.

<sup>23</sup> Afa alagag heafna angwagim gosenag ofenaiba Krais heafna elim gosenig. Heafna el eba heafna elig asa ehe enag elim pese lambig.

<sup>24</sup> Afa sios el sa Kraism ahnai skaufini asa angwafig gafa nimbeafna saglagim mungwali ahnai skaufena.

<sup>25</sup> Afa nengel saglag sa ne nimbeafna angwag nai yi onigig lugwafim ofenaiba Kraism sios nai yi onigig lugwanim asa siosim lahanig.

<sup>26</sup> Afa ehe enaig esegba og sa ma sios afsug nemug fei. Na sa heafna suialag mo ofenaiba bu lofug enag elim gigiafenig.

<sup>27</sup> Asa sios Kraisma nof la suialag nemug afofi. Eba mas nihgug ge skofei afa elig hiasafei eba mangwal feg fwainig afa eba afsug feg afa haiseg fwainig.

<sup>28</sup> Afa sa saglag heafgelni eligim afafkig fiahflag asa ne nimbeafgelni angwafigim gwenag esegon. Afa saglag heafna angwagim fwina membenag eba hefum gafa gwenag eseg.

<sup>29</sup> Afa mas amban heafna eligim amtakwal fiahflai amo, eba el heafna eligim fane lahigim afa suialafiahflag. Afa enaig membug nihe esegba eba mungwalofug Kraism siosim gwenag esenig.

<sup>30</sup> Afa bigel eba heafna elig fig.

<sup>31</sup> Afa Godna ginof ena mom enaig esog, “Afa saglag heafna alag afagim fwahagim asa heafna angwagim pahlag gu afa sambaganigi eba mungu elig ahfeg.”

<sup>32</sup> Afa enag mo eba mungwanam pekag. Afa ka enag mom enaig onigig feg eba Kraism mi sios mi ofug. <sup>33</sup> Afa enag mo nengelim gafa sihinig sa ma mungwali saglag heafgelni angwafigim fwina membegoni asa hefum membig. Afa sa mungwali angwafig heafgelni alagagim ahnai skaufegonig.

## 6

### *Alag i afag i afa luwal ehengelni mo*

<sup>1</sup> Afa nengel luwal ati ne Ainiyagim onigig sa ne nimbeafgelni alag nai yi afag nai yi mom higigon eba enaig ne esigbi eba suialag nihe feg.

<sup>2</sup> Afa Godna ginof enaig esog, “Sa ne alag mi afag mi ahnai skaufegon.” Afa enag nihe mo eba gof lanai nihe mo mo sihi fwahag mi waheg.

<sup>3</sup> Afa enag mo sihi fwahag waheg mo enaig esog, eba ne enaig esegba “asa ne mungwali nem suialag pugufenafe afa eba ne hwa bite la numwehe gafe.”

<sup>4</sup> Afa ne alag nofeka luwalna onigigim haig esena eba masa luwalna onigig amtakwalefe. Amo, sa ne luwalim numweh lambfinim Ainiyagna minam ofugon fufum afa maia ha mina afu ofefiba asa ne pese hugfu wanambe.

*Esug gafugag el nai yi afa misog el nai yi mo*

<sup>5</sup> Afa nengel esug gafugag el sa ne nimbeafgelni bite nai misog elim ahnai skaufenim asa ehengelni mo higinim patalfu. Afa enag gafugagim numwehe oniginim asa ofenaiba ne Kraism esofini.

<sup>6</sup> Afa nofeka enaig ese maia misog el nem nofna nangwagofiba ena mo ne og ehe kam sifkalenai afa maia nem nangwag fwainig fegba ena mo ne fwahag. Amo, nofeka enaig ese. Sa ne Godim numwehe oniginam afa heafna sawieg la ese asa Kraisma esug gafugag el ne fi.

<sup>7</sup> Sa ne numwehe wasneig gafugafinim afa enaig esego kaba mango elim gafugafinim mo amo eba awai ka Ainiyagim esenig.

<sup>8</sup> Sa ne enaig anwenafi haig suialag gafugag el sa esig eba Ainiyag ehem mungwag faifi. Afa ehe mungwali elim enaig esenifi, misog el mi afa esug gafugag el mi gwenaig esenifi.

<sup>9</sup> Afa nengel misog el sa ne enaig onigig flinim afa nimbeafgeli esug gafugag elim gwenaig esegon. Nofeka wasneig mo ehengelim sihin asa ehe embefiagifi. Afa ati ne anwenafig nengel nai yi afa esug gafugag el naiyi misog elbi eba heven la ga. Afa ehe mungwali elim mungwa mina kwefihiageg.

*Sa big wasneig afohnam fagiule el lofi*

<sup>10</sup> Afa hwag sumi yi mo ka ginofeg. Afa sa ne Ainiyag i ahgofiba asa ne heafna kigmog la wasneig goh.

<sup>11</sup> Afa hagigna wag God nem lambwaieg sa ne aitiaginim asa ne wasneig afohnam afa Satanna hagig onigigim nem mas pigaupi.

<sup>12</sup> Afa bigelni enag hagig eba mango bite nai el i big hag goh mo. Amo, eba oflanai sanel amtakwalig afa heafgelni misog el i enag big ehengel i hag go. Afa ilawo eba sikulufegba asa nimbasa bite mi afa of mi nangwagihiagego asa big ehengelim gwenaig esegonug.

<sup>13</sup> Afa mungwali Godna hagigna wag sa ne aitiagi. Afa maia amtakwalig osuna puguiba asa ne wasneig gohnam hagofum. Afa maia hagig awaieba sa ne gwese gofum.

<sup>14</sup> Afa sa ne numwehiaginim wasneig afohnam asa nufuna mo nengelni onigig la gofi ofenaiba let engmog la kigi fwahag. Afa afsug nihe nem gohnai ofenaiba minailof fati fwahag.

<sup>15</sup> Afa ne suialag mo sihiagim numwehiagenam gofum ena ofenaiba mong lofug ne fati gu. Afa enag suialag mo enaig esog God ati bigim lambigba asa big olug enesieg nafig.

<sup>16</sup> Afa sa Godim olug oniginag fwina kehla gufum ofenaiba fagiule el mengig kikiseg tof flaugu enaba mungwali gigafeg

lambugu. Afa Satan suwi fagna nem pifigba asa enanai yi blo heugu fatigim mungweg.

<sup>17</sup> Afa God nem pese lambig afa sa ne enag onigig kehla gufum ofenaiba wasneig hat misogim kagfugu. Afa sa ne Godna mo flag eba ofenaiba pina Godna Sungwabug nem faig.

<sup>18</sup> Afa Godna Sungwabugni wasnei yi sa ne wahkig haig haig beten feafufum. Asa numwehe nofiagefiba masa ne yiskosefe. Afa wahkig sa ne mungwali Godna elim beten fegon.

<sup>19</sup> Afa sa ne kam gafa beten fini afa maia ka mo osihifiba sa ma God kam mo fainam afa kam kweagfuiba eba ka mas embefe. Afa suialag mo autunam meagam sefugofena eba ka ambala enam sihife.

<sup>20</sup> Afa God kam heafna suialag mo sihiagim ningihiagba asa glau ka kalabus yi go. Asa ne kam betenagonibi ka Godna suialag mo sihibi sa ma ambala puguiba eba Godna membug la ka eseg.

### *Polna fwahiag mo*

<sup>21-22</sup> Afa bigelni suialag nilite Tikikus afa Ainiyagna gafugagim ehe suialag gafugag el feg. Afa ka ehem nengel nangum ningihiafe sa ma blo ehe kana mom nem sihini asa ne anwenafig ka haig gafeg. Afa ehe nengelni olugim wasneini.

<sup>23</sup> Afa God Api i afa Ainiyag Sisas Krais i sa ma mungwali kristen nilitem olug enesieg ahfai afa ehengelni olug onigig i afa membug nihe i sa ma wasnei. <sup>24</sup> Afa mungwali el Ainiyag Sisas Krais nai yi onigig wahkig lugwafi sa ma God ehengelim esug kwagani.

## Mo Pol Filipai la nai Sios Elim Ginofe Faini Hwa buk enaig esog

Filipai eba kwania kembang Masedonia Provins la gi. Pol Godna suialag mo ena nai yi sihina. Afa ena kembang mo fwahanam sa ming kembang la ikana, asa ehem kalabus yi fatini. Asa kalabus yi gafnaba afa higinaba mingnag el ona Filipai elni olug onigigim gasafihiagi. Afa hwa buk la bigel mas ambala anwenafig mo mangwal kinig Polim sa puguna. Afa Pol olug onigig Sisas Kraisna yi gofna asa sifakalegna gafna. Afa autunam maia Pol gawig fwainig fenaba asa Filipai la nai el ehem kwegfuni. Asa hwa bukba Pol Filipai la nai elim suialagoni maia ehem kwegfunibi. Afa ming onigig gafa Pol membeg Filipai elni olug onigig sa ma wasneig afofi. Masa ehengel enaig onigig flife Polba kalabus yi ga asa enam olug kinig gonifife. Pol ehengelim sihini mangwal sa ne Godna flig eba naho glau nai nofkenagag Ainiyag Sisas nai flig. Eba enaig sihifeni, ehengel mas Ju elni nihem patalufunam asa enaba flig. Amo eba ehengel Sisasim olug oniginigim asa enag flig. Afa Pol membeg Filipai el sa ma Kraisna nihem gwenag esig. Afa Krais mas enaig onigigfena mo, og kaba kwania el feg afa ehe mas hiafna membugum patalkuna mo amo, eba awai. Afa ehe hefim pigaupinamba asa God gafugag ehem fainaba asa ehe enam gafugafena.

### *Pol Filipai la nai elim suialag oni*

<sup>1</sup> Ka Pol i Timoti i kaningi Sisas Kraisna gafugag el ka ahfeg. Ka nem hwa mo ahfaig. Nengel sa ne Filipai la nai Godna el sa ne afohie. Afa siosna saglag el i afa siosna kwaganig el i sa ne mungwali Sisas Kraisim olug onigini enag ka nem hwa ginofba ahfaig.

<sup>2</sup> Ka membeg God bigelni Api i afa Sisas Krais bigelni Ainiyag i sa ma nem enaig sahfeni. Asa ma olug enesieg nem feni afa God esmunagim nem kwagani.

### *Pol Filipai la nai elim oniginim Godim sahna*

<sup>3</sup> Afa maia ka nem oniginig gohba asa ka Godim suialag onagim afa ka enaig esog.

<sup>4</sup> Afa maia ka nengelim betenenigbi asa kana olug sifakaleg.

<sup>5</sup> Afa ilawana sa ne suialag mo higini enag ikag ikag glauwanga gwese gohba eba kana gafugagim kweafug afa sa ka enam onigigim ka sifakaleg.

<sup>6</sup> Afa ati ka enam anwenafeg asa God nem ese fwahanibi sa ehena suialag gafugag pugu gwese gofiba asa Sisas Kraiss pese blofe.

<sup>7</sup> Afa enag kana suialag onigig eba ihlafeg asa ka nem fwina membenig. Afa autunam ka isug gofenaba Godna suialag mo sihiakafena afa ka elim kwangan fena kog sama wasneig olug onigig kehli afa ne kam enag gafugagim kwefug. Afa glauwanga ka kalabus yi gohba ne gwenaisig.

<sup>8</sup> Afa enaba God ati anwenafeg ka nem fwina fwehenig afa gwenaisig Sisas Kraiss gafa nem esenig.

<sup>9</sup> Afa ka Godim sahaiba sama ehe nem enaisig eseni asa ma nengelni membug pugu kwania feni. Afa nufunam onigig i afa suialagim kwefihiageg i gafa sama mungwali membug la wahegofi.

<sup>10</sup> Afa ne enaisig esegbi eba sane numwehe anwenafife ha mina sa hag suialag nemug ika sa ne patalfu. Eba ne suialag el afohiefaba asa ma Godna Gisfu Fwahag elni osuna pugui.

<sup>11</sup> Afa eba mungwali suialag nihe sama nem gohunfi enaba Sisas Kraiss la nai blog. Asa ma el enam nangunim sama Godna unehlag fingi fi.

*Pol membeg Sisana gafugagim og sama gwese gofi*

<sup>12</sup> O nilite, hwaig kinig sa kam pugunagba sa ne anwenafi enaba mas Godna suialag mom kwehlakag mo amo, eba awai, enaba kaksag elim kwaganiba asa ena mo higfi.

<sup>13</sup> Afa enaigba puguba asa Romna misog elni lala nai anwasag el i afa mungwali mingnag el i enanai yi anwenafig kaba Kraissna gafugag el ka kalabus yi go.

<sup>14</sup> Afa mingnag kristen nilite kam nangugim afa ehengelni onigig wasneinim asa ehengel tahlag la Godna moba sihiafu. Afa ehengelni wasneig gwesim fwina fena.

<sup>15</sup> Afa mingnag kam oksinim afa oga kam filafe fatinim asa ehe Godna mo sihiafu. Afa mingnagba suialag onigig figim afa sa Godna mo suialag mo sihig.

<sup>16</sup> Afa sonag el anwenafig God kam hwaig gafugag la fwahagba asa ka Godna mo ambala upugug eba nufunam feg. Afa ehengel kam membinigim asa Godna mo sihiafu.

<sup>17</sup> Afa mingnag nilite kam sa oksinim enag ehengel oga heafgelni unehlagim fingi finim asa Godna mo sihi. Afa ehengel enaisig onigig fini maia ka kalabus yi gofenaba sonaisig moba kam kinig faig.

<sup>18</sup> Afa ka mas enam onigi eba ka sifakaleg. Afa ka anwenafeg mingnag elni onigig eba suialafeg afa mingnag elni onigig eba amtakwalig asa ehengel Godna mo sihiafuba eba ka enam sifakalegba ena sifakal gwese gofufe.



*Pol enaig onigigfena kam lahai me awai ka nofkena gofi me*

19 Asa ati ka anwenafeg ne kam Godim sahnibi afa sa Sisas Kraisna Sungwabug kam kweafufe asa ka ena kalabus lala fwaha pugufe

20 Afa ka enam wasneig onigig feg masa ka wetiklug afwanefug flafe eba ka tahlag la eseagefe asa glau kalabus yi ka feg afa autunai la gafa enaig ka esegba eba ka Sisasna unehlagim fingi fukug. Afa kam lahai me awai ka nofkikena gofi me koka enaig ese.

21 Afa ka mas lahagimba ka onigi. Afa ka nofkikena gohugba mungwali mangwal asa ka eseagegba Krai ehe enaigimba ehe mog feg. Afa ka lahagba eba ka suialag nofkenagag flafe.

22 Afa ka nofkena gofiba eba kana gafugag fug suialag pugu lugufe. Enaig esegba na sa ka sambaga onigi feg afa ka mas anwenafeg mo mangwal sa ka membeg eba ka flafe.

23 Afa ka sambaga mina membeawagig. Afa koka hwa bite fwahanam ika Krai i hawagfim enaba suialag nemug feg.

24 Afa maisiaba ka gofiba eba ka ma nem kwaganife.

25 Afa ka fwina enaig onigi feg kana gafugag eba mas awaieg mo asa ka maisim nofkikena gofiba ka nengelni olug onigigim wasneihiageba asa ne enam sifakali.

26 Afa maia ka nem pese blo nanguagiba sa ne kana gafugag nanguinim asa ne enam Sisas Kraisna unehlagim fingi fi.

*Nofeka angoluweg elim embefegon sa ne tahlag la afofum*

27 Afa sa ne Kraisna suialag mo fwina patalfug sa ne gwenaig esi. Afa ka ne nangwagi me awai awai me eba ka mo higfe ne wasneigim afa ne mungu onigig fig. Afa ne mungu el lofugim afa ne mungu gafugafig sama kaksag el Godna mom olug onigini.

28 Afa nofeka nimbeafgelni angoluweg elim embefegon afa sa ne tahlag la afofum. Afa ne enaig esigbi eba ne angoluweg elim ofugonig eba God nengelim kwaganiba asa ne ehengelim filafe klaitife.

29 Afa eba God nem suiala fenife asa nem sambaga mina fenife eba enaig eseg eba sa ne Kraisim olug onigini afa mingba eba ne heafna el fenim asa ne kinig flifie. Afa ena sambaga minaba eba Kraisna gafugag bigel sa big enaig esi.

30 Afa autunam sa ka kinig i bagag ahfegofnaba ne nanguni afa glauwanga ne higig gwenaig gwese go. Sa big mungwali enag gafugafinim asa big kinig gafa fli.

## 2

*Sisas hefum ahnai skaufena sa big gwenaiḡ esi*

<sup>1</sup> Atiaho sa Kraiḡ nengelni onigigba wasneinig? Afa atiaho sa heafna membuglaba esegba asa nengelni olug enesiegba fai feg? Afa atiaho sa Godna Sungwabug ni ne esinigbi asa ne mungu nilite fig? Afa atiaho sa ne mingnag elimba aflafegonug? Ei, eba nufunam feg.

<sup>2</sup> Afa eba enaiḡ eseg asa ne mungu onigig na afa mungu membug na afa mungu mo na fibi eba ka fwina sifakalefe.

<sup>3</sup> Nofene nembefum fingi finim afa nembefum tutonbusiagi. Afa sa ne mingnagim ahnai skaufegon afa nofene enaiḡ onig og kaba mingnagim gwesim gose gonug.

<sup>4</sup> Masa ne nembefum mungu onigife afa eba sa ne enaiḡ onigifi afa mingnag elim sa ne suialafehiagi.

<sup>5</sup> Afa nengelni onigig sama Sisas Kraiḡna onigig lofe. Eba enaiḡ eseg.

<sup>6</sup> Afa ehe God feg afa ehe mas enaiḡ onigig fena mo og kaba gwenaiḡ wahkig gohug.

<sup>7</sup> Afa ehe heafna haig haigim fwahagim afa sa ehe isug gafugag el lofug fegim afa ehe el pugug.

<sup>8</sup> Afa hefum gwesim sugu pegim afa maia Alag ehem enaiḡ esonagba asa gwenam patalkugim ikag gwenanai yi lahaḡ afa ehe enam higigim asa el ehem li katigeg la tigi kahlifi.

<sup>9</sup> Asa God ehena unehlagim fingi fukugim afa ehem sisi yi nemug hilifukugug fwahag afa sa mungwali gawig ehem ahnai skaufinife.

<sup>10</sup> Asa mungwali heven la nai i, bite nai i, afa bite menai i Sisasim mongkokini kwakwaginim asa ahnai skaufinife.

<sup>11</sup> Afa sa mungwali el ambala enaiḡ esogofe, “Sisas Kraiḡ eba Ainiyag feg.” Afa enag mo gafa God Alagna unehlagim fingi fefe.

*Sa big ombusug lofug fi elim Godna mina ofgugonigim*

<sup>12</sup> Afa kana hihe autunam sa big auguiafenaba afa ne kana mo flini. Afa glauwaba ka kalabus yi gohba sa ne kana mo pese higim. Sa ne nembefum numwehifibi asa ne Godim ahnai skau nemug finim asa ne elni nihem patalfu el sa God pese suluiaflag.

<sup>13</sup> Asa ma God nem nengelni onigigim waika waika fehiagekafiba asa ne nogka wasneiniam afa sa ehena sawiegim patalfu.

<sup>14</sup> Afa gafugag sa ne feagigbi nofekawu lagwaginim afa sa nimbefum monagi.

15-16 Asa ne enaig esi sa ne afsug el fi mas nem setigi. Afa neba ofenaiba Godna suialag luwalig lofug fig sa ne el amtakwalig nihe la nai la afa el amtakwalig onigig la nai lai enag olyi ne afohie. Afa nofkenagag mo sa ne kehlifu sa ne faigo asa ne ofenaiba bagnofut of la ombusig afohie. Afa ne enaig esigbi asa kana gafugag mas awaiye afa sa enag osuna Kraisa bloiba asa ka sifakale fe.

17 Afa Ju elni pris sis tigifinim afa wain bug sugfufinim asa Godim tuhlu faiyifini. Enaba lasug mo ogfug nengelni olug onigigim. Afa sa el atiamba kam tigifatigbi asa kana taf sugfufe ofenaiba wain bug ka Godim afai. Afa sa kam enaig fenagba eba ka sifakale fe afa nengel kana sifakalim ne esinig.

18 Afa gwenag sa ne sifakali afa ka gafa nengelni sifakalim ka esenig.

*Pol Timoti mi Epafroditus mi ningitigina*

19 Afa atiamba Ainiyag Sisasna sawieg fegba eba kog ka Timoti mi nengel nangum ningihia enag ati meyi ofe. Afa sama pese blo kam sihinai nengelni mom ka sa enam sifakale.

20 Afa mas amban Timoti lofug feg mo ka mungu onigig ahfegim afa ehe nem fwina oniginig.

21 Afa mingnag hefum mungu onigig afa mas Sisasa Kraisa gafugagim onigig mo. Eba awai.

22 Afa ati ne ehena suialag gafugagim anwenafig afa sa ehe ka i suialag mo ka gafugag ahfeg ofenaiba leg alag ahfeg.

23 Afa enanam ka higife mangwal sa kam pugunafe eba kog kasa Timoti mi nengel nangum ningihia.

24 Afa ka onigig eba Ainiyag kam kweagfuiba asa ka gafa managig fwainig nem nangwagigim blofe.

25 Afa ne bimbeafna nilitem Epafroditusim ningihigbi asa blog kam kweafug asa ehe ka i mungu gafugag ahfeule feg afa ami lofug fag la wasneig gohule feg. Afa ka onigig koka sa ehem pese nengel nangum ningihian.

26 Afa ehe fwina nem oniginigim asa ona blo afa ehena olug kinig asa ehe higig nengel ati ehena gihim anwenafig.

27 Afa eba nufunam enag gih ehem ati lahagim muhla ofefena. Afa God ehem aflafenagim asa wangene fe fatig. Afa God gafa kam aflafenag asa mas ehem lahai. Masa mingnag kinig kam pugunagefe.

28 Asa ka fwina membeg ehem pese nengel nangum ningihiaiba asa ne ehem nangunim afa ne sifakalini afa ka mas ehena kinigim onigi.

29 Afa maia bloiba asa ne enaig onigigfi Ainiyagna el nengelni nilite ati pese blog asa ne ehem sifakaligna lala

gam wanigafu. Afa sa ne mungwali enaig elim nungwe mo sihigon.

<sup>30</sup> Afa Epafroditus mas hefum onigi. Eba ne membi auguiaba afa ehe blog nengelni kugum flagim asa nengelni gafugagim hwanai yi fiahgeg. Afa enaba Kraisma gafugagim onigigim kam kweafugum asa hefum lahagim meyi ofe.

### 3

*Ambangel sa Sisasim olug onigig enag mungu suialag elbi fig*

<sup>1</sup> Afa kana nilite ka hwa mo fwahagim ofeba ka nem weti mo osihin. Eba enaig eseg ne Ainiyagna el asa ne sifakali. Ilawana sa ka sonaigim ginofenaba enaba ka mas pese ginofegim ka yiskosei sa ma enag nem kokmo lambfegofi.

<sup>2</sup> Afa sa ne numwehifibi masa amtakwalig el nem ambe munia mo sihigofie og sa big Ju elni nihem patalgiafunam asa bimbeafna nihim kokhiagi.

<sup>3</sup> Afa enaig moba mas ihlafeg mo. Eba enaig eseg bigelbi eba enag nihem big nufunam patalfug asa Godna Sungwabug bigim kwaganigba asa big Godna unehlagim fingi fig. Afa big anwenafig bigelni suialag gafugag eba mas bigim kwagani afa Sisas Kraisma munguhe bigim lambig.

<sup>4</sup> Afa atiamba Ju elni nihe elim Godna nof la ihlafenigbi asa kana nihe ehengelni nihem gwesim hilifeg ikag.

<sup>5</sup> Afa ka Ju elni nihem mungwali patalkufena. Afa kikiafena afahumonig eba Ju el afa ehengelbi Benjaminna simbiangag fini. Afa maia elegeg la gohug osuna awaienaba asa kikeafena afag kam wanigenaba asa ehengel kana nihim kokohinagini. Afa kaba farisi el asa ka Mosesna nihe numweheg patalfefku.

<sup>6</sup> Afa kana olug fwina wagofenaba asa ka Ju elni nihem numwehe fukufenaba afa sa ka sios elim kinig faifini. Afa ka Mosesna nihe mo patalfefkufenaba asa mas amban kam haigim sehiana mo.

<sup>7</sup> Autunam ka onigina sonaig nihe eba kam Godna nof la ihlafenafe. Afa glauwaba ka Kraisma olug oniginagim afa kog sonaig niheba eba esug feg.

<sup>8</sup> Afa ka onigig sonaig nihe i afa mungwali kana gafugag i eba esug feg. Afa kana Ainiyag Sisas Kraisma ka ati anwenafeg eba enag goseg. Afa sonaig gawig eba ati ka esgum fungiske lofug klaitig afa koka sa Kraisma numwehe anwenafenam asa ehena el nemug fenam

<sup>9</sup> asa ka ehe nai yi gofim. Afa autunam ka enaig onigig fena ka kike enaig esenaba asa ka Godna nof la ihlafena afa ka Mosesna nihe mo patalkuiafena. Afa glauwaba ka

anwenafeg ka Kraism olug oniginagba asa ka Godna nof la ihlafeg. Afa God kana olug onigigim nangugim asa kam enaig esena.

<sup>10</sup> Afa koka numwehe Kraism anwenafenage. Afa Godna wasneig ehem biteg kifenai ihlafo fatig afa ka membeg enaig wasneig sama kam gohnai. Ka sa gwenaignihem patalkuiba sama kam kinig i lahag i gwenaignihem pugufenai.

<sup>11</sup> Atiamba ka enaig esegba ka onigig ka gafa God sama kam biteg kife nai ihlafo fati.

*Wasneinim mina suf afu*

<sup>12</sup> Afa ka mas enaig esoi kog kati Kraisma enaig nihem flag afa ka suialag el nemug feg. Afa Kraism gafuga fegim kam suliaflag asa ka fwina enaig gafuga feg ka ehena nihem kehla guhminefe.

<sup>13</sup> Kana nilite sa hig, ka mas enaig esoi eba ati ka enaig pugug, amo eba awai. Ka enaig onigig kehlag, masa ka pese autunaim onigife afa sa ka wasneinam sufug mina ika.

<sup>14</sup> Afa ka ming onigi feg koka fwina wasneina ikan mangwal sa go enanai yi pugu. Afa enaigba eba ka Sisas Kraism olug oniginaiiba asa ka God i wahkig nofkikena hawag fife.

<sup>15</sup> Afa bigelnai amban sa saglagna olug onigig lofug fegba enaig el sama kana onigig lofug gwenaignihem esei. Afa ne haig onigig fegba eba God sama nem ogfunai.

<sup>16</sup> Afa atiamba enaig onigig gohugba eba sa mangofi. Afa enaig onigig sama gose ikafiba asa ati big anwenafeg enaba nufunam feg sa big patalfu.

<sup>17</sup> O nilite afa kangel ati ka nem suialag nihe ogfugonig afa sa ne enam patalfu afa ambangel el sa gwenaignihem esig afa sa ehengelim numwehe nangwagim sa ne anwenafi.

<sup>18</sup> Afa sa ne enaig esi afa kaksag el eba angoluweg el asa ehengel Kraisma li katigeg mom amtakwale skofig. Afa autunam ati ka enaig moba sihiagohug afa glauwaga ka pese wena mona sihig.

<sup>19</sup> Afa ehengel hiafgelni eligni sawiegim fingi fig. Afa hiafgelni amtakwalig nihem mas afwanefi eba og eba suialag. Afa ehengel eba bitenai gawigim mungu onigig. Afa nengel sabanig eba nem suwi lagig kembang gam God nem lambi klaitife.

<sup>20</sup> Afa bigelni nufunam kembang eba heven. Asa big nenge afofum bigelni kwefwag el Ainiyag Sisas Kraism hevenim fwahanam asa blofe. Asa big kembang sama ehe ikagna bloi.

<sup>21</sup> Afa eba ehe heafna wasneigni blonam bigna auwiau la-hag lofugim waikefenam asa heafna wasneig elig suialagna big fifi. Afa enag wasneigni mungwali gawig esinibi asa apaiye ehena ahnai skaufifi afa bigna eligim waikefenife.

## 4

*Na sifakalini mungu onigig fli*

<sup>1</sup> O nilite, ka nem fwina membenigim afa koka blo nem nangwagim. Ne kana suialag hihe fig afa ne kana li fug lofug fig. Afa sa ne wasnei afohiefiaba asa ne Ainiyagim olug onigigim fwina kehli.

<sup>2</sup> Afa sambaganigi angwafig nengelnai enaig safeg hefum moanag ahfeg. Ka ehenigim esonig kog, “Yuodia i afa Sintike i nofeka nimbefum flafihiag ahfe. Ati ne Ainiyagim olug honiginag asa ne eteg sumineg lofug mungu ahfe.”

<sup>3</sup> O kana suialag hihe, ka membeg sa ne sambaganigi angwafig kwaganiba asa ma suialag hawag ahfei. Ehenigi ahfeg afa Klemen feg afa mingnag apaiyeg enag kam kwefug suialag mo sihiafuiag. Asa God ehengelni unehlag nofkenagag buk la sko fwahanig. Afa amban el sa Godim olug oniginig enag elni unehlag eba ena buk la go.

<sup>4</sup> Afa sa ne sifakale eba ne Ainiyag i suialag hawag ahfefe. Afa ka pese nem osihini kog eba sa ne sifakale.

<sup>5</sup> Afa sa ne mungwali elim aflahlana fegon asa Ainiyag ati blogim meyi ofe.

<sup>6</sup> Afa nofeka mangwalim fwina onigwageakafim nofeka enaig ese sa ne Godim mangwalim sahnag afa ne nimbeafna onigi la Godim suialag ona.

<sup>7</sup> Afa God olug enesieg fatigba eba kwaniafiageg afa enag elni anwenagim gosenig. Afa ne Sisas Kraisi ati ahgo afa enag olug enesieg ehe fatigba neana onigigim ninimwehefegu asa mas neana olugim tige fupei.

<sup>8</sup> Kana nilite sumiamo ka nem ginof ofen. Afa sa ne mungwali hihe suialag nimbeafgelni onigig la lambi laitiagi eba enaig eseg mangwal sa suialafeg afa mangwal sa nufunam feg afa mangwal sa afsug feg afa mangwal sa Godna nof la ihlafeg afa sama el enam fingi fi afa mangwal mas haig esei afa mas mwakwale asa enaigim ne onigim.

<sup>9</sup> Afa ka nem ogfugnugegba afa ne kana mo higig afa ne nangug mangwal sa ka eseageg sa ne enam patalfu. Ne enaig esibi afa God bigim olug enesieg fatinibi sa nem gohunfufe.

*Pol Filipai sios elim suialag oni*

<sup>10</sup> Afa ne kam pese oniginigim afa glau ne kam kwefug asa ka Ainiyagim fwina sifakalenag. Afa ilawana ka nenge gohug afa ka anwenafeg ne mas kam etetinig mo afa nem mina awaienigbi asa ne mas kam kwefug mo.

<sup>11</sup> Ka mas enaigba esoi afa ka onigig el mas kam membinim afa kwefui, eba awai. Afa ka enaig anwenafeg afa haig haigba kam pugunagba eba ka aflahlana gofufe.

<sup>12</sup> Ati ka anwenafeg enaignam kam tumenag afa ati ka anwenafeg afa ahnanam mo mas kam tumenai. Afa ati ka enaig anwenagba lambig haisegba eba ka suialag gafefe. Afa atiamba kana fane i gawig i fegba awai awai me afa ka mas onigi afa eba ka suialag gafefe.

<sup>13</sup> Afa Kraiss kam wasneig faigba enag maia haig haig kam pugunagba asa ka ehena wasneig i go.

<sup>14</sup> Afa maia ka kinig yi gohba ne kam kwegfug afa enaba suialag nihe ne fig.

<sup>15</sup> Afa nengel Filipai la nai el ati anwenafig enag eba nufunam. Ilawanam ka nem Godna suialag mo sihi fwananim afa ka Masedonia provinsim fwaha akofenaba afa mas ambangel sios kam kwefuni mo eba awai nengel mungu ne kam kwefuni afa sa big bimbefum mimange awagig nihe bifini.

<sup>16</sup> Afa maia ka Tesalonaika kembang la gawig tumeage gafenaba afa ne kam kwegfufini.

<sup>17</sup> Afa nofena enaig onigig kam fenagi ka nengelni enaig lamblu feniguo amo ka sifakaleg God sama neana suialag nihem mungwa fai.

<sup>18</sup> Afa ka nem osihin, afa mangwal sa ne ningihigbi Epafroditus flagim ublug kam faig afa ka glauwaba kam ihlafenagba asa ka kaksag feg. Afa enaig gawig sa ne kam faigbi ofenaiba pris sanda Godim tuhlunigbi asa suialag emblegusug pugugba asa God enam sifakalenag.

<sup>19</sup> Afa Godim sa ka lotufenag enag ehe mungwali gawigba ihlafeageg. Afa ka anwenafeg mangwal sa nem awainig eba God nengelim Sisas Kraissna elim ihlafenugefe.

<sup>20</sup> Afa ehe bigelni God Alag feg asa big ehena unehlagim wahkig fingi finifum. Eba nufunam ehe feg.

### *Mo fwahag mo*

<sup>21</sup> Afa ka Godna elim sa Sisas Kraissim olug oniginig enam ka nem enaig sihi ofen ka mas nem etetinig mo. Afa nilite sa ka auguia enag gafa nem gwenag esegonig.

<sup>22</sup> Afa mungwali Godna el hwanai yi goka gwenag mo nem faigog. Afa Romna misog elni lala nai gafugag kristen el gafa nem fwinam onigigonigim asa mungwalofug mo nem faigog.

<sup>23</sup> Afa ka sawi feg sama Sisas Kraissna esmunagim kwefwag sama nengelim gohunfi. Enag ginofba gwenaho.

## **Pol Mo Ginofe Kolosi Sios Elim Faini Hwa buk enaig esog**

Kolosi eba kwania kembang Esia Provins la gi. Afa enag kembang eba mas membifeg mo Efesus kembangim. Pol mas Kolosi gam blona mo afa maia ehe Efesus la gafnaba asa mingnag elim nigitigina ma afuia mina fenam sa Godna suialag mo sihiagafuna asa Kolosi la gafa ambe gafugafini. Afa Pol mo higina og, mingnag el ona Kolosi elni olug onigigim gasafihagi. Asa Pol hwa bukba ehegelim ginofenim og sa ma wasnei afohie. Afa ehe hwaig sihifeg og, Kraiss eba mungwali gawigim sisi fenig. Ehe mungu bigim pese lambig afa mingnag mina eba awai mas bigim kweafui. Eba bigim sulfu lambigim membigam wanafug ese ambe Kraissim muhla fifi. Afa Kraiss nai yi God mungwali gawigim gafugafegba asa pugug afa Kraissna gafugagna God mungwali gawigim ehe pese lambig afa Kraiss ehe bigel nai yi sefu goba asa bigel glau nai el apukegim afa Kraissna nihem patalfug. Afa Pol hwa buk ginofenam sa sambaganigi elim fainibi ehenigi ahflanam Kolosi gam ahkuna. Ehenigina unehalag eba Tikikus i afa Onesimus i (4:7-9).

<sup>1</sup> Ka Pol God heafna sawieg la kaba Sissas Kraissna kanog fwahag el. Na ka nem hwa moba ginofenig. Afa bigelni nilite Timoti gafa ka hawag fenaba sa ka ginofeg.

<sup>2</sup> Afa ka nem Godna elim hwa ginofba Kolosi la nai elim faig. Nengel ati Kraissim olug oniginigim afa ne kehlig asa ne kana nilite fiahsaieg. Ka membeg God bigelni Api sa ma nem enaig eseni. Asa ma olug enesieg nem fenim afa God esmunagim nem kwaganife.

### *Pol Godim suialag onag*

<sup>3</sup> Afa kangel Godim sahnig ehe bigelni Ainiyag Sissas Kraissna Alag afa ka enaig esig ka nem onigigonugim afa ka Godim suialag onig.

<sup>4</sup> Asa ati ka higig nengel Kraiss Sissasim olug onigig ne numwehe kehlig afa ne Godna elim mungwali membegonug.

<sup>5</sup> Afa maia ilawana suialag nufuna mo pugunaba ne higinig afa mangwal suialag God sa nem sum yi faife asa ne enam oniginim nenge afo. Afa enaba heven la suialag gohba nem nengen go. Eba naho nengelni olug onigig i afa membug i mog feg.

<sup>6</sup> Afa enag suialag mo mungwali bite ikaminefegim fug lugwakag. Afa maia ilawana ne Godna esmunagim kwefwag



mo ne higinim afa ne ati anwenafini asa sonag suialag mo nengelim gafa gwenag esinig.

<sup>7</sup> Afa Epafras kangelni mungwa gafuganai el nem ena mo ati sihinig. Eba Sisas Kraisna suialag gafugag el enag kam kwaganig.

<sup>8</sup> Afa ehe kangelim sihinig og Godna Sungwabug nem kwaganig asa ne elim membegonig.

*Pol Godim sahna og ma Kolosi elim wasneinuge*

<sup>9</sup> Asa ilawana ka nem enam higigonigim asa ka nem betenegon afohug. Afa ka Godim sahnig heafna Sungwabug suialag onigig nem faigim afa nem ogfunigbi ne Godna sawiegim ati ne anwenafig.

<sup>10</sup> Afa ka enaig esigbi asa ma nengelni augwiag ihlafei afa God sa ma sifakale mungwali mangwal sa ne esigbi. Afa neana mungwali gafugag sa ma haig haig suialag fug lugwiba afa Godim anwenafenag neana sa ma gwesim fukwafi.

<sup>11</sup> Afa ka nem betenegonugbi God sa ma nem wasneig fai enag wasneigbi eba heafna kwania wasneig. Asa enag wasneig yi ne afohiefiba asa ne kinigbi fliufufufe.

<sup>12</sup> Afa sa ne sifakalinim Api Godim suialag oni asa ehe nengelim ihlafenigbi sa ne mangwal suialag mungwali flifi. Afa enaba sa el Godna bog megam ombusug yi afohie eba enag elni.

<sup>13</sup> Afa big sikulufeg megam afohiefenaba asa God ehe bigim enanai lambigim lamblug heafna suialag Legna bog megam lambseafug.

<sup>14</sup> Afa ena Luwal bigim sikulieg la nai lambig lamblugim asa bigelni amtakwalig mom huguflaitinig.

*Krais ehe mungwali gawigim gosenig*

<sup>15</sup> Afa bigel mas big Godimba nofna nangui. Afa Kraisimba eba sa big nangug asa eba naho ehe God lofug feg. Afa ehe mungwali gawigim God eseagegba enag ehe goseg.

<sup>16</sup> Afa God heafna Legna mungwali gawig bitenai i afa heven lanai i eseagegba. Mangwal sa big lambusiagig afa mangwal sa big mas lambusiagig mo eba enaig haig haig sanel i afa mwaifig i eseageg. Afa mungwali gawig God heafna Legna eseagegba asa mungwali gawig sa ma Godna Legim fingi fi.

<sup>17</sup> Afa maia mungwali gawig maisim puguiag fwainig fiahfenaba eba ehe ati gofena. Afa heafna wasneig ni mungwali gawig suialag goheg.

18 Siosba ehena elig feg afa ehe misog feg afa ehe siosna mog feg. Afa ehe gof la nai el lahagim pese buihiag. Asa ehe mungu, mungwali gosenig.

19 Afa God sawifeg og ma heafna Leg sa ma ehel lofug fei afa sa Godna mungwali nihe Kraisa nai yi gohi.

20 Asa God sawifeg oga heafna Leg mungwali heven la nai i afa bite la nai i hefum pese lambim. Asa God heafna Legim ningihiag og ma li katigeg la lahanam asa ma taf sugfoi asa Godna olug kakagegim tigeftakag.

21 Afa ilawanaba ne Godim membifinim afa ne ehena angoluweg el fini asa ne amtakwalig onigig finim afa sa ne enaig eseagini.

22 Afa glauwaba Godna Leg li katigeg la lahaiba asa God bigim lambig. Asa big Godna nof la afsug nemug afohiefim afa mas big nufwehini afohiefiba afa mas bigim el sehtigi.

23 Afa sa neana olug onigig gwese fwinam gofi afa nofeka suialag mo patalfwiagim bwalekoblu fiahi eba masa nem God mangwal sumi yi nem faigim na fwahafe. Afa enag suialag mo ne ati higig afa mungwali bite puguiakag afa kaba Pol enag gafugag la nai el.

*Pol ehne pusegim asa sios elim kwaganig*

24 Ka Pol ka nem kwaganigim asa ka kinig flagim afa ka enam sifakaleg. Afa ilawana Kraisa susug flana ona siosim kwaganim. Sios eba ehena elig. Afa ka gafa susug flagim koka siosim kwagan. Afa enag susug Kraisa eba gwese gofiba afa kana susug gwenanai yi pahlaiba asa nengegim enaba ihlafiagefe.

25 Afa God kam esenagba sa ka siosna gafugag el feg. Ehe kam ena gafugag faigba nengelim og sa ma suialag gohe. Ena gafugagba eba enaig eseg sa ka ehena mungwali mo nengelim sihinig.

26 Autunam enag mo mungwali elim meagam sefu gohonfini afa glauwaba ehe heafna elim ambala upugunig.

27 Afa heafna sawieg la heafna meaganai mo heafna elim ambala upugunig og sa ma anwenafi enaig suialag mo meaganai mungwali elim ika minefenig. Afa enag meaganai mo eba enaig esog Kraisa bigel nai yi sefu gofi asa big anwenafi Godba bigim sumi yi suialag feheagefe.

28 Afa sa kagel mungwali elim Kraisa mo sihigonig gi-afufe. Afa ka suialag onigigna fegim afa sa ka ninimug kog nofeka amtakwalig nihe eseagi afa ka nem suialag nihe ofugonig asa ka membig mungwali el sa ma Godna nof la Kraisa fiahsaiyi.

29 Afa Kraisa kam wasneig faig asa enag wasneig yi ka ehegeposeg asa kog ma enaig pugui.

## 2

*Sa wasnei masa nem mwakwal el hugfu lambfufe*

<sup>1</sup> Ka membeg sa ne Kolosi nai el anwenafi ka nem ehegeposenig afa sa mingnag el Laodisia nai afa mingnag el i mas kam anwenafinig mo.

<sup>2</sup> Afa ka enaig esegba asa ehengel ma wasneinim afa membug mungu onigig fi afa nufuna mo sa ma mungwali ambala puguiagei. Asa ma ehengel anwenafi Godna meaganai mo eba Kraisi ehe mog feg.

<sup>3</sup> Afa ehe enaig eseg Godna suialag onigig i afa suialag anwenag i meaganai enag ehe ambala upugugba sa ma enam anwenafi.

<sup>4</sup> Afa ka enaig esog kam oksig masa mwakwale el ambe nem suialag mona mwakwali hiagifi.

<sup>5</sup> Afa ka mas nem wanahmo afa kana onigig laba eba ka nem wango. Afa nengel mungwali waheg esigim afa Kraisi olug onigig ne wasneig kehlighi asa ka sifakaleg.

<sup>6</sup> Afa ne Sisasi Kraisi olug oniginim eba nengelni Ainiyag sa ne mungwali seafufum.

<sup>7</sup> Afa neana olug onigig sa ma wasnei yi Kraisi kehlai ofenaiba li bagag bite megam pekagim bitem kehlag. Afa neana nihe li lofug wasneig gofi. Afa autunam suialag mo sa ne flini sa ma gwesim kwania feageba asa ne Godim fwina suialag oni.

<sup>8</sup> Afa numwehefibi masa el nem mwakwal mona sulufufe. Ehe mas Kraisi mom onigig mo eba ehe mo behig sihiafu eba simbiagana onigig mi afa bitenai onigig mi fligim asa sihiagiafu.

<sup>9</sup> Afa Kraisi pugugim el lofeg afa sa God heafna nihe mungwali sefu Kraisi nai yi gohug.

<sup>10</sup> Afa sa ne Kraisi ahgofim asa God nufunam nofkenagag nem faibi asa nem ihlafenugeg. Afa ehe misog feg afa sa mungwali wasneig sanelni misog el ehem ahnai skaufenig.

<sup>11</sup> Afa ne Kraisi ahgohba asa ne algana nihe lofug kokohiawagig nihe ne flig. Enaba mangwal elni lofug kokohiawagig nihe mo enaba awai eba heafa Kraisi ehe bigim esenig. Afa ehe bigelni amtakwalig onigig nihem koflaitinig.

<sup>12</sup> Afa maia ne bu la pegba enaba ne ogfug eba ati ne Kraisi ahlahagba nem bite megam fati ahwagig. Afa ne olug onigig eba Godna wasneig ehem ihlafofatigba asa God gafa nem mulug nofkenagag faife.

<sup>13</sup> Afa ilawanaba ne haig haig nihe eseaginibi afa enag nengelni amtakwalig onigig nihem gwese gofena asa ne

melig pigieg lofug fiahsaiena. Afa sa God nem Kraisi mi ihlafofatiawagig. Afa sa God bigelni mungwali amtakwaligim flafatinig.

<sup>14</sup> Afa Mosesna nihe moba bigelni amtakwaligim ambala ofgunig afa enag amtakwalig i afa haig haig enag nihe mo i bigim seahiag enag God maia Sisasi li katigeg la lahanaba asa God ena niheba li katigeg la waheg fwahagba asa awaieg.

<sup>15</sup> Afa Kraisi li katigeg la lugugim asa ehe mungwali sanelni misog el mi afa ehengelni wasneig mi filafe klaitigba afa ehe flafatinigim asa ehengel el ambala afwanef fiahsaieg.

*Afa haig haig nihe moba mas bigim kwagani*

<sup>16</sup> Afa masa el nem kukusihiagifi enaig nihe mom esigim eba enaig nihe fane neg nihe, bu neg nihe, buyisig nihe, was puguiag buyis nihe, afa esug auguiag osuna nihe.

<sup>17</sup> Afa enag mungwali nihe eba sungwag lofug ofgug asa enaig pugufe. Afa Kraisi nufunam ofgug.

<sup>18</sup> Afa mingnag el itila fahigeagigim og ka kike gosig el fig. Afa sa ehe mwakwaligim afa hefum ahnai skaufigim asa of la nai elni unehlam fingi fig. Afa ehengel afigigim og kati ihlafig. Afa nofeka ehengelni mo higigon afa God nem suiala lambfiegim nem oksinife.

<sup>19</sup> Afa ehengel bigelni misog elim Kraisi fwahig. Afa Kraisi heafna eligim siosim mungwali nangwagihiageg afa ehe wasneig faigbi asa Godna membug la gwesim kwania fiahfuku.

<sup>20</sup> Afa ati ne Kraisi i ahlahawagig. Haisegba ne maisim hwa bitenai onigig ufu ofenaiba ne bitenai el ne fig? Haisegba sa ne bitenai nihem ne patalfuia?

<sup>21</sup> Eba enag nihe enaig esog, “Nofeka enaigim kehli, afa nofeka enaigim ahga, afa nofeka enaigim tuhum.”

<sup>22</sup> Afa enaig niheba eba elni onigi la nai pugugim afa el maia eseagigbi asa awaieg.

<sup>23</sup> Afa mingnag amtakwalig el onigig enaig nihe eba elim suialag onigig faig. Afa ehengel enaig esog og, sa big of la nai elni unehlam fingi fegon, afa hefum pigaupigog afa ehengel enaigba esigbi eba mangwal nufunam mo, afa heafna eligim amtanafihiagig. Afa enaig niheba mas bigim wasneig fainim asa mas amtakwalig nihem pigauipi.

### 3

*Godna el sa big mulug nofekenagag fli*

<sup>1</sup> Afa ati ne Kraisi i ahlahawagigim afa ahbuihiag asa neana membug sama heven la Kraisi i ahgofi. Afa enanai yi Kraisi ehe misog feg asa Godna nihiginai gam pega.

<sup>2</sup> Afa sa neana onigig heven la sa ne faka fwaha. Masa neana onigig bitenaim onigfe, mangofi.

<sup>3</sup> Asa ati ne lahagim afa neana nufunam nofekenagag mas ambala feg mo eba Krai i Godnai yi sefu ahgo.

<sup>4</sup> Afa Krai ehe neana nufunam nofkenagagba ehe mog feg. Afa maia ehe ambala puguiba afa sa mungwali el ehem nangufie eba ehe kwania misog el feiba asa big ehe nai yi afohiefufe.

*Bigel mulug el apukeg*

<sup>5</sup> Afa amtakwalig nihe neana onigig la go sa ne enam figifati. Enaig nihe eba aga taitu, afa mwakig keawagig, afa haig haig onigwagig enaig puguiageg afa elni mangwalim membenag nihe afa enag mungu nihe ofenaiba mwakwal godim lotufenig.

<sup>6</sup> Afa enaig niheba Godim esenagba God fwina olug kakagenam oga enaig elim amtakwale klaiti.

<sup>7</sup> Afa autunam ne gafa enaig onigig kehlinim nog enaig nihe ka gafa ka esi.

<sup>8</sup> Afa glauwaba sa ne enaigim fwahi. Enaig nihe eba enaig ninimug, afa olug kakageg, afa elim tigege onigig. Afa nofeka elim molambiniam afa kilmwani.

<sup>9</sup> Afa nofeka nimbefum mwakwaleagi asa ati ne autunai onigig i afa nihe i ne masigim fatig

<sup>10</sup> asa God nem esenigbi ne mulug el fig. Afa God nem wahigi fenagba ne hef lofug feg asa ne anwenafe Godba enaig feg.

<sup>11</sup> Afa bigel mungwali mulug el figim asa big gwenai mungwalofug Godna nofla afohie. Nofeka enaig onigifi og kaba Ju el gosig fig amo afwabanai el og ka gosig fig. Afa mangofi afa ambangel el sa lofug kokohiawagig afa ambangel el sa mas lofug kokohiawagig mo enaig elbi eba Godna nof la mungwalofug fig. Afa membri nai el algana mona i afa nihe i fig afa esug gafugag el fig afa esug ahwagifkig el fig enaig elbi gwenai mungwalofug fig. Afa sa Krai ehe bigelim mungwali gosenigim afa bigelni onigig la sefu go.

<sup>12</sup> Afa God nengelim hefum kanog fwatigim afa nem fwina membenig. Afa sa ne enaig nihe fi afa sa ne elim aflafegon i, afa elim suialafegon i, afa nimbeafum ahnai skaufi, afa elim aflahlana fegon i, afa ne mas ikagna ninimu go i.

<sup>13</sup> Afa sa nimbefum fakwaganiagi afa sa nem mingnag el haig esegonfie afa sa ne ehengelni amtakwaligim fwahiagon asa Ainiyag ati enaig eseg nengelni amtakwaligim pigi klaitinig.

14 Afa sa ne elim membegonig nihe fi. Afa enag niheba mingnag nihem gosenigim afa eba enam esenigbi asa mungwali wahegim asa mungwa gafuga suialag fig.

15 Afa God nengelim sulufugim kanog fwatig asa ne mungu elig fi. Afa Kraisa nem olug enesieg faig asa ma enag neana olugim ninimwehefkufi. Afa sa ne Godim wahkig suialag onagofim.

16 Afa sa ne Kraisa mo nimbeafena olug yi fwahibi asa ma enanai yi ihlafiahgeba asa ehe suialag onigim na mingnagim ogfunifie. Afa sa ne Godim suialag onam asa Baibel mwanifi, afa Sisasna mwanifi afa haig mwanifi Godna Sungwabug upugug sa ne enam laitiagi.

17 Afa mungwali sa ne enaig eseagi afa mo sa ne sihiagig eba Ainiyag Sisasna unehlag la ne eseagig. Afa ne Api Godim suialag oni mangwal sa Sisas nem esenig.

### *Eba afahumonigni mo*

18 Afa angwafig sa ne nimbeafna alagagim ahnai skaufena enaig eba Sisasna elni nihe.

19 Afa saglag sa ne nimbeafna angwafigim fwina membena afa nofeka ehem fenage.

20 Afa luwal sa ne nimbeafgelni afahumonigni mungwali mom higigon afa enaig niheba Ainiyag sifakaleg.

21 Afa afahumonig nofeka nimbeafna luwalim fwina fe-gonugi afa masa ehengel olug kininim nem ambofeahla gonfie.

### *Eba misog el mi afa ehengelni esug gafugag el nai yi mom*

22 Afa esug gafugag el sa ne nimbeafgelni bitenai misog elni mom patalfu. Afa misog el fwainig sa ne suialag gafugagfenam asa neana onigim suialafe afa Ainiyagim oniginai. Masa ne misog elni nof la mo ne gafugafefe asa ehe nem enaig oniginagfenafe ne suialag gafugag el.

23 Afa haig gafugag sa ne feagegiba asa ne mungwali numwehe fiahge afa sa ne enaig esog og, “Kaba mangwal elim esena mo amo eba ka Ainiyagim esenag.”

24 Afa sa ne anwenafe eba Ainiyag sa heafna elim ogra mangwal faim asa ehe nem enag mungwag faife. Afa Kraisa eba neana nufunam misog el afa haig gafuga sa ne esofefiba eba sa esena.

25 Afa amban amtakwalig eseiba eba enag God amtakwalig mungwa faife. Afa God mungwali elim numwehe kwe-fihianugenam asa eba mas ambanim mungwaba onigina fwahai.

## 4

1 Afa misog el ne ati anwenafig nimbeafgelni misog el eba heven la nai afa sa ne nimbeafgelni esug gafugag elim numwehiagi afa suialafehiagi.

*Bigel sa big betenifinim asa big numwehe afwaminefifim*

2 Afa nofeka betenigim yiskosi afa sa numwehefibi asa ne enaigba eseafufiba afa ne Godim suialag onifim.

3 Afa sa ne kangelim betenigonibi asa ma God kangelim mina piginibi ka sa ehena mo sihi. Afa Kraiswa mo mas ambala fena mo na ka sa ena mo ambala upugu. Afa mingnag el enag mo mas membeni mo asa ena nangum kam kalabusinig.

4 Asa ne kam betenigonibi ka Godna suialag mo sihibi sa ma ambala puguiba eba Godna membug la ka eseg.

5 Afa mingnag el mas Sisasim olug onigig mo afa ne ehengel yi mungwali wahe ne gofiba sa ne numwehe oniginim asa ne suialag nihe ofgugon. Afa wahkig sa ne numwehiage Sisasna mina ofgufuigim.

6 Afa sa ne suialag mo embena mo sihi asa ne enam anwenafi ena mina pese mungwali elim wahigi sihigonim.

*Pol Tikikus mi Onesimus mi Kolosi kembang gam ningitigina*

7 Afa Tikikus eba blonam nem sihinfie mangwal sa kam pugunag afa mangwal sa ka feg. Afa ehe bigelni suialag nilite eba Ainiyagna suialag gafugag el afa kangelni mungwa gafuganai.

8 Afa ka ehem ningihiagba sa ne anwenafi kangel sa ka haig augufig asa ne enam higinim afigifi.

9 Afa eba Onesimus i ahblofe ehe gafa suialag nilite oblo eba nimbeafgelni hihe. Afa ehe nem ahsihinfe mangwal sa hwanai yi puguiago.

10 Afa Aristarkas ka i kalabus yi mungwal ahgo. Ehe enaig esog og, “Ka mas nem etetini.” Afa Mak eba Barnabasna mangaug ehe gwenaig esog. (Afa ati nem moba faig atiamba Makba bloiba asa ne wanig afunam nugwefli.)

11 Afa Josua heafna ming unehlagba Jastus ehe gwenaig esog. Afa mungwali el kam kwefugim afa sambaga mungu el mungu ehe eba Ju el ehe ati Sisasim olug onigig. Afa ehe kam Godna bog meg gafugagim kam fwina kwefug.

12 Afa nimbefgel nai yi Epafra eba Sisas Kraiswa gafugag el ehe nem enaig esonig og, “Ka mas nem etetini.” Afa ehe fwina wahkig nem betenigonig og God sa ma nem enaig eseni. Afa sa ne wasneinim saglag el lofi afa Godna mungwali sawiegim ati ne anwenafig.

13 Afa ka nem enaig sihi ofen ehe nem fwinam ehenge pose nig afa Laodisia la nai el mi Hieropolis la nai el mi gafa gwenai g esenig.

14 Afa Luk kangelni dokta i afa Demas i gwenai g nem sohonig og, “Ka mas nem etet ahfina.”

15 Afa sa ne Laodisia nai kristen elim enaig sihifegon og, “Pol nem mas etetinig mo.” Afa Nimfa feg afa mungwali Godna el apaiyeg asa Nimfana lala laskuhla fig sa ne ehengelim gwenai g mo faigo.

16 Afa maia enag ginof nem pugunibi asa ne suwiginim asa ne Laodisia nai elim faigoiba asa ma ehengel gafa suwigi. Afa ginof ka Laodisia nai elim faigbi ehengel sa ma suwiginim afa sa nem Kolosi nai elim faigoiba sa ne suwigim.

17 Afa sa ne Arkipusim enaig sihifini og, “Sonaig gafugag Ainiyag nem faigba sa ne gafugafeage auwigi.”

18 Afa kaba Pol hwa moba kikeafena ningana ka enaig ginofeg kog ka mas nem etetinig mo. Afa kaba kalabus yi go nofene kam etetini. Ka membeg sa ma God nem esmunagim kwagani.



## **Angif Ginof Pol Tesalonaika Sios Elim Ginofe Ningihiani Hwa buk enaig esog**

Tesalonaika eba Masedonia na kwania kembig. Maia Pol Filipai kembigim fwahanam sa Tesalonaika gam ikanaba afa ena nai yi siosna gafugagim fuklasana enag kembigim (Aposel 17). Afa Ju el enam nangunim maia kaskag el Polna mo higinim patalfunamba afa Kristen el apukenaba asa Polim onigig amtakwalig flinibi. Asa Pol Tesalonaikam fwahanam afa Korin gam ikanam gafnaba. Asa heafna mungu gafugag la nai Timoti, blonam ehem sihina og, mangwal mangwal sa Tesalonaika nai Kristen elim pugug. Afa maia Pol Timotina suialag mo higinam asa Pol Timoti afa Sailas hwa bukba ginofini Tesalonaikanai Kristenim wasneig goni. Afa hwa buk la Pol sifakaleg ehengelni olug onigig mi afa suialag nihem mi sa Tesalonaika Kristen el asa esini. Afa enaig eseg Kristen el mas numwehe anwenafig mo Kraiss haig blo safe. Afa ehengel membeg og ka numwehe anwenafi. El sa laha afa Kraiss mas pese blog mo, sa ehengel gafa wakig nofikena gagba fli? Afa Kraiss sa mangigna sa blo fe? Pol ehengelni sa higim enaig sihifeni og, sa ne suialag nihem patalfui afa numwehe nisagohi Ainiyag eba pese blofe.

<sup>1</sup> Afa ka Pol hwa ginof nem Tesalonaikanai sios elim ginofenig. Afa Timoti i Sailas i gafa ka mungwal auguiaba asa ka hwa moba nem ginofenig. Afa God bigelni Api nai yi afa Ainiyag Siss Kraiss nai yi el ne feg.

Asa ma olug enesieg fenam afa God esmunagim nem kwaganife.

### *Pol siosna olug onigigim sifakaleni*

<sup>2</sup> Afa kagel nengel nai yi Godim suialag onig. Afa maia ka Godim osihinibi kagel nengelni unehlagim suwigigim asa kagel Godim sahnig.

<sup>3</sup> Afa God bigelni Api ati anwenafeg kagel mas etetig mo nengelni nihem sa ne esig. Afa neana gafugag sa ne eseg enag neana olug onigigim ofgug, afa ne elim membenigim asa ne fwina gafugafeg kwaganigim, afa ne olug onigig Ainiyag Siss Kraiss nai yi sa ne lugwafiba eba mas ne fwahai.

<sup>4</sup> Afa kana nilite ka anwenafeg God nem membenig afa nem wegi fwati heafna.

<sup>5</sup> Afa Godna suialag mo ka nem ublugonug enag mango mo behig mo eba kigmogna afa Godna Sungwabugni afa nengel

numwehe anwenafig asa ka sihig eba nufunam nemug. Afa nengel kagelni auguiagim ati anwenafig maia big enanai yi auguiafenaba afa mangwal ka esig eba nengelim kwaganig.

<sup>6</sup> Afa nengel kagelim afa Ainiyagim ne nangugum sa ne gwenaisig. Eba nufunam, el nem kinig faig afa maia ne Godna mo higigba asa Godna Sungwabug sa nem sifakalig faig asa ne enag mom flig.

<sup>7</sup> Afa ma nimbe enaig mina ogfuibi asa Godna el Masedonia nai afa Akaia nai enaig esogog, “Kagel gafa ka sa gwenaisig esi.”

<sup>8</sup> Afa Ainiyagna mo nengelni mengig la nai pugunam asa fufni moag nihife. Afa nengelni Godim olug onigigna mo asa mas Masedonia mi afa Akaia mi kembang la mungu fe amo eba mungwali kembang ati enam higig afa bigel haig ese ehengelim sihigoni mo.

<sup>9</sup> Afa ehengel hefum enaig sihifig maia ka nengelni kembang gam ambenaba ne kam suialafeni afa haig ne esegim asa ne sanelim patalfug afa ne enam masig fatigim afa onigig waikafenam asa ne Godna gafugag el feg afa eheba nufunam God afa ehe nofkenaga.

<sup>10</sup> Afa ne nengena gofiba asa heafna Leg heven la nai blofe. Afa enag Leg Sisas lahanaba asa God ehem ilafona. Afa autunai la God elim fwina olug kakagenife afa Sisas bigim kwaganig asa bigim mas amtakwale klaiti.

## 2

### *Pol Tesalonaika la gafugafena*

<sup>1</sup> O nilite, ne anwenafig maia kagel nengelim wanau-guiafenaba afa kagelni gafugag mas esug puguna mo.

<sup>2</sup> Afa ne anwenafig, lasflam kagel Filipai la auguiafena afa ehengel mas kam suialafegoni mo afa amtakwalig mo kagelim sihigoni. Asa ka Filipai fwahinim asa ka Tesalonaika gam afunam afa el kagelni mo filafegoni afa God kagelim wasneig faini asa kagel heafna suialag mo nengelim sihigoni.

<sup>3</sup> Afa enag mo kagel sihigoni mas amtakwalig onigig la nai puguna mo afa kagel mas enaig esinim nem mwakwalini.

<sup>4</sup> Amo, God ehe kam esonugum afa kam gafugag faig asa ka suialag mo elim sihigonig. Afa kagel mas enaig onigig fig el sa ma kam sifakalegoni, awai, God ehe kagelni onigigimba ati yahunugum asa ka membig ehem sifakalenig.

<sup>5</sup> Afa ne anwenafig kagel mas ambe nengelim embena mo sihigoni afa kagel mas nengelni mangwalim membigim asa enag onigig meagam go afa God ehe kam nangwagim afa ehe gafa ati anwenafeg.

<sup>6</sup> Afa kagel mas enaig onigifig mo gafugag esinim asa nengel i afa mingnag el i kagelni unehlagim fingi fi.

<sup>7</sup> Afa kagel Kraisna kanog fwatig el fig asa kagel ihlafeg nengelim sahnigonugim sa ma kagelim kwaganig. Afa kagel mas enaig esig mo afa kagel nengelim aflanam esegonig. Afa kagel nengelim enaig esegonig maia big auguiafenaba afa kagel ofenaiba afag luwalim aflahlanam asa tut faig.

<sup>8</sup> Afa kagel nengelim fwina membegonug asa ka sifakali Godna suialag mo nengelim sihigonug afa kagelni olug nengel nai yi lugwa asa kagel numwehiageg piginam sa nem kwagani.

<sup>9</sup> Afa maia kagel Godna suialag mo nem sihinibi afa kagel fwina gafugam henge pusig. Afa ka yiskosi nengel kagelim kig faigim asa naka sinaini osuna gafugafig asa kikeafena ningana kig flig. Nilite, nengel enam ati anwenafig.

<sup>10</sup> Afa kagelni nihe enanai yi Godna elim sa ka esinig afa enaba nengelni nof la afa Godna nof la puguna. Afa ne ati anwenafig hwa nihe eba suialag afa afsug kabag nemwag feg.

<sup>11</sup> Afa ne ati anwenafig sa ka nem esegonug eba gwenai alag heafna luwaligim sa sahfenife.

<sup>12</sup> Afa ka nem wasneinag afa aflahlana mo sihini afa enaig esog sa ne suialag mina patalkui asa ma God enam sifakalenai. Afa God nem unenag sa ne heafna el fenam afa ehem ahnai skaufenam afa God i suialag ahwag ahfe.

<sup>13</sup> Afa maia ka mo ublu sihigba afa ne mo higinim asa ne enaig esog hwaba mango elni moa mo eba Godna mo. Asa gwenai ka Godim suialag onug. Afa enag hwa mo Godna el nai yi sefu gafugafe enag naho ogfu eba nufunam Godna mo.

<sup>14</sup> O kana nilite, nengelni kinig eba mungwalofug asa kinig Judia la nai Godna siosim puguni afa enag el Sisas Kraisna fig. Afa sa Ju el ehengelim kinig faigona asa nimbiafna nilite nengelim gwenai kinig faig.

<sup>15</sup> Afa Ju el Sisas mi afa Godna mo fli sihiaule el mi kwaskofigim afa kagelim gafa lambi ningitigig. Afa God ehengelni nihe mas sifakalenig mo afa ehengel elni angoluweg fig.

<sup>16</sup> Afa kagel Godna suialag mo afwambanai elim sihigoni afa sa ma God ehengelim pese lambi. Afa Ju el ona kagelim kwegoni ena mo sihigim. Afa ehengel amtakwalig wahkig gwenai esiafu afa enag nihe asa ehengel nai yi memtog la pugug. Asa glanwo Godna kwania ninimu ehengelim fenig.

*Pol membeg Tesalonaika nai elim pese ika nangwag*

17 O nilite, kagel nangelim mwakwalig membi fegonug maia kinig kagelim pugunibi afa kagelni onigig nengel nai yi go. Afa kagel fwina nemug membig koka nembe nangwag asa ka minam fwina yisigig nem ambe pese nangwagigim.

18 Afa ka mina yisigiafug afa ka Pol haig haig mina ka yisigig afa Satan kagelim mina kikiseg.

19 Afa ka enag onigifeg asa ka nengelim sifakaleni. Afa maia Ainiyag Sisas oblofiba afa kagel anwenafig ehe kagelni gafugag sifakale nife afa ehe nem nangwagiba asa ne ofe-naiba kagelni suialag lifug le.

20 Afa eba nufunam nengel nai yi kagel suialag unehlag figim afa sifakalig.

### 3

*Pol Timotim ningihiana Tesalonaika nai elim wasnei lafiegim*

1 Afa ka membig koka nem anwenafen ne suialag augufeg me awai awai me. Afa kagelni olug kinig fig asa kagel enaig onigig fig afa ka o Sailas i hwa nai yi Atens la ahwagfiba.

2 Afa Timotim mo ka ahningihiag nem nangwagigim. Afa ehe bigelni nilite asa Godna gafugag el feg asa Kraisna suialag mo sihiakag. Ka ehem ningihig sa ma nengelim wasnei lafinam afa nengelni olug onigigim kwagani,

3 asa enanam kinig nem pugunig afa nengel mas olug onigig fwahag mo. Afa ne ati anwenafig God enaig esog ne kana el figbi sa ma haig haig kinig kehili.

4 Afa autunam maia kagel nem wanflafnaba ka enaig sihifini kinig bigelim pugunigim afa ne anwenafig enag sa ka sihina sati pugug.

5 Asa ka olug kinig fegim afa ka mas mahim fehi eba ka Timotim ningihiaiba asa ehe blo nengelni olug onigigim fahignuge haig augunifig. Ka onigig masa Satan nem yuhnaiba afa kagelni mungwali gafugag nengel nai yi esug awaiefe.

6 Afa Timoti nengel yi nai ka nangum pese blog afa ehe suialag mo kam blu sihinag og, ehengelni membenig nihe afa olug onigig eba suialag. Afa ehe enaig esog ne kagelim onigigonug afa ona kagelim pese nagwag gwenaig kagel membig nengelim gafa nangwag.

7 Asa kana nilite, haig haig kinig kagel nai yi go asa kagel nengelni olug onigig mo higigim enag kam wasneig faig.

8 Afa ka anwenafig ne ati Ainiyag nai yi wasneig gohug asa glanwo kagel suialag augufig.

<sup>9</sup> Afa ka nem onigigonigim asa ka Godim suialag onig. Afa bigelni Godna nof la nengel kam kwania sifakal faigo asa enag sifakalim kagel Godim kwania suialag onig.

<sup>10</sup> Sinaini osuna ka Godim fwina fasahnafufe asa nengelim pese nangwaginim afa mangwal onigig sa nem olug onigig la awaienig ka sa nengelim ambe kwagani.

<sup>11</sup> Afa ka membig bigelni Api God ehe afa bigelni Ainiyag Sisas sa ma eheningi enaig ahsafei, kagelni mina pigi fwa-haiba asa ka nengelim nangwagigim ambego.

<sup>12</sup> Sa ma Ainiyag nem enaig esenai neana elim membeg nihe sa ma kwania fenam kuhi ikai asa nimbefum membiagi afa mingnag elim membegoni asa ka nem gwenaig esegonug.

<sup>13</sup> Afa enag minaba God neana olug onigig wasneifenafe afa maia Ainiyag Sisas heafna elim wanoblofiba asa bigelni Api Godna nofla asa ne afug kabag fe.

## 4

### *Bigelni suialag nihe God enam sifakale*

<sup>1</sup> O nilite, ka nem ati sihinig haig nihe sa ne eseiba asa God enam sifakale. Afa ne enaig esenaba afa glau ka nem wasneig mona sihinig afa Ainiyag Sisasna unehlag la sa ne enaig suialag nihe eseiba enag nihe eba gwenaig kuhi ikagim.

<sup>2</sup> Afa nengel ati enag mo anwenafig Ainiyag Sisas kagelim enaig sihifenigbi naka nem faig.

<sup>3</sup> Afa God nem membenag sa ne afsug kabag gofum afa membi sa ne fe aga taitu onigigim.

<sup>4</sup> Nengel saglag sa ne anwenafig haig augu sa ne nim-beafna angwafig i ahfefe asa elni nof la suialafeg.

<sup>5</sup> Afa afwambanai el Godim mas anwenafinig mo asa aga taitu onigig la afuia sa ne nofeka enaig esi.

<sup>6</sup> Afa el nofeka Kristen nilitem amtakwalig gonim afa mwakwale goni afa ehengelni angwafigim amtakwal lafiagi. Autunam ka nem sihinig sa ne numwehe asa el enaig eseg asa Ainiyag ehem mungwag susug kwania faifi.

<sup>7</sup> Afa God bigim amtakwalig mina nai unenig asa big afsug kabag afoiyefim afa ehe mango bigim og sa ne nufwei nihem patalfu eba awai.

<sup>8</sup> Asa amban sa hwa mom masig fatinag eba mango elim enaig esini mo eba Godim masig fatinag. Afa God heafna Sungwabug bigim faig.

<sup>9</sup> Afa God ehe ati nem ogfunagim og sa ne nimbefum membiagi asa ka oksig enag mo pese ginofe nem faigim.

<sup>10</sup> Afa nengel enaig nihe mungwali Masedonia provins la nai nilitem ogfug gonig. Kana nilite ka nem fwina wasneinag sa ne enaig nihem gwenaig fwina eseakafim.

<sup>11</sup> Autunam ka nem sihinig sa ne enaig onigig kehlanam sa ne aflahlanam augunam afa nimbeafna gafugag mungu sa ne onigi afa nimbeafna ningana gafugafenam sa ne fane fla.

<sup>12</sup> Afa ne enaig eseba eba afwambanai el neana nihem nangunim nem bwata nigmaginife afa ne mas mingnag elni ninga la lugwafi.

### *Sisas pese blogna mo*

<sup>13</sup> Afa afwambanai el enaig onigifig el asa lahag eba mas pese buihiai eba gwesim awaiegim asa enam kinig flig. O nilite, ka membig sa ne nufunam mo anwenafi asa nofeka enag olug kinig fli.

<sup>14</sup> Afa bigel enaig olug onigifig Sisas lahagim peseg buihiag asa big anwenafig el asa Sisasim olug oniginag asa lahag God ehengelim ihlaftigiba asa Sisas ehe mungwali wanblofe.

<sup>15</sup> Afa Ainiyagna mo ka nem osihini afa maia Sisas oblofiba lahag el mo gosigbi asa big nofkena el mo sum engigonifi.

<sup>16</sup> Afa Ainiyag ehe heaven la nai pe oblofiba afa ehe fwina unefe afa oflanai elni misog el gafa kwania mengigna lagfe afa Godna fuf kwania moag fefe. Afa enaig eseba el asa Sisasim olug oniginam sa lahag ehengel gof buihiag gafefe.

<sup>17</sup> Afa sumi yi Ainiyag bigim nofkena elim lambinam afa big mungwali lahag el i afa nofkena el i big leango gam kwalafufi asa Ainiyagim of la enanai yi uflinim asa big Ainiyag i wahkig auguiafife.

<sup>18</sup> Asa ne hwa mona kwaganibi sa ma nengel aflahlanam augui.

## 5

### *Sa big numwehiagi asa Ainiyag oblofiba*

<sup>1</sup> O nilite, ka mango mo nem ginofe sihini mo asa ne anwenafig maia enag wag pugufiba.

<sup>2</sup> Afa ne nimbe ati anwenafig Ainiyagna blog osu eba enaig fefe asa ukwef el sinaini fablofe asa enaig esefe.

<sup>3</sup> Afa el enaig esogofe glauwaba big aflahlanam augufig nofeka embefi. Afa maia enanam el enaig esogofiba afa ikagna mungwalim tofpilapife mas amban mungu embem ikai. Asa susug ehengelim enaig ikagna pugunife ofenaiba angwafig luwalim onigis.

<sup>4</sup> O nilite, ne mango sikulefeg la nai mo afa maia enag osu opugufiba mas ne sineminafi asa ne ukwef elim safenafe.

<sup>5</sup> Afa nengel eba ombusug nai el fig afa osu nai el fig. Afa big mango kulefeg el mo afa sinaini el mo.

6 Asa nofeka nonaskafim asa mingnag el esig sa ne numwehe afohiefim. Asa big nofkena fiahflafim afa suialag onigigna gofim.

7 Afa sinainiba el askag afa sinainiba el uflogna bu ah-gagim afa sa nofpagig.

8 Afa bigel osunai el feg asa big suialag onigigna gofum. Asa bigelni olug Sisnas nai yi lugwafim asa elim membeg goni enag ofenaiba minailof big eligim kafug. Asa big enag onigigim kehli asa God bigim autunai la suialag gag faifi enag ofenaiba hat kapa big misog la fatig.

9 Afa God bigim kanognigim asa pese bigim amtakwalig klaitife enaig eba awai. Amo, ehe bigim kanognigim asa Ainiyag Sisnas Kraisna bigim pese lambife.

10 Afa ehe bigim lahanig asa maia ehe oblofiba big mung-wali lahadag el i afa nofkenagag el i asa ehe bigim mungwali wangafife.

11 Asa ne nimbefgelni naim elim wasneig gonum afa nimbefum fakwagani asa ne ilawo gwenai esofe.

*Pol kristenim sihini sa ne enaig esi*

12 Afa nilite ka nem sihinig siosna saglag asa fwina gafugafig nengelim kwaganigim asa ne ehengelim ningmag fegoni afa Ainiyag ehengelim enag gafugag la fwatig asa nengelim ogfufegonug afa nangwaghiage goni.

13 Afa ehengel kwania gafugag esig asa ne ehengelni unehlagim fingi fegonig afa membegoni. Sa ne mungwali aflahlanam siafufum.

14 Afa nilite, ka membig ne enaig sa esi yiskos elim fegonuginim afa wasneihiagi afa embefule elim wasneihi-age afa auwiaug elim sa ne kweagfu afa mungwali elim nengigim eseni.

15 Asa ne enaig eso el nofeka mingnagim mungwag am-takwalig pese esena amo, nengelni onigig sa enaig esi nimbefum fakwaganiagi afa mingnagim gafa gwenai esegonig.

16 Sa ne wahkig sifakali,

17 afa Godim wahkig sihinagofi.

18 Afa mangwal sa nem apukenag sa ne Godim suialag onag. Afa Godna sawieg eba enaig ne Krais Sisnas el sa ne enaig esi.

19 Afa nofeka Godna Sungwabugni mina kagfu.

20 Afa sios nai el Godna mo fli sihiaule elni mo sihifini asa nofeka ena mom masig fatini,

21 eba sa ne enam mungwali fahiage afa mangwal asa afsug feg asa ne ena mo kehla.

22 Afa haig haig amtakwaligim sa ne membifena.

<sup>23</sup> Eba God ehe bigim olug enesieg faig. Afa ka membeg God nengelim esenigbi sa ne fwina afsug kabag apuke. Ka membeg maia Ainiyag Sisas Kraiss oblofiba asa neana sungwabug i afa onigig i afa elig i ese enanai yi weti nufwef gofife.

<sup>24</sup> Afa ena mo God sa sihi eba nufunam esegim. Afa ehe nengelim unenim asa nem enaigim upugunife.

<sup>25</sup> O nilite, sa ne Godim sahnaiba sa ma kagelim kwagani.

<sup>26</sup> Afa maia ne nilitem suialag onam asa ehengelim kiki-giafla.

<sup>27</sup> Ainiyagna unehlag la ka nem enaig sihifenig sa ne mungwali nilitena nof la hwa ginof sa suwigi.

<sup>28</sup> Ka membeg Ainiyag Sisas Kraiss sa ma nengelim esmunagim kwagani. Gwenaho.



## **Angigieg Ginof Pol Tesalonaika Nai Sios Elim Ginofe Ningihiani Hwa buk enaig esog**

Kaksag sios el Tesalonaika kembig la auguiafnaba afa kaksag onigi flinim esogona og, mangwal sa pugufe maia Kraissese oblofiba. Afa mingnag el enaig sihifig. Ainiyagna osu ati blog pugug. Afa Pol hwa bukba ginofena ehigelni onigigim numwehenugena. Pol enaig sihifeni og, enag kwania osu mas pugu mo. Afa lasflam mo enanam maia kaksag el fwina tonbusiagibi afa haig haig amtakwalig fwina wasneig puguiagefe afa enag el mungu nihe mom filafeule pugunam sa Kraissim fwina angoluweg el fenafe. Pol ehigelim wasneig nugenam og, sa ne numwehi olug onigim wasnei afonam afa kinig mo kahli. Afa Pol membeg ehigel sa ma wasnei afonam afa heafna mungu gafugag el gafa gwenaig esi. Afa nofeka gafugam yisgosi afa nofeka mingna elim kwefweg faigim enam yisgosi amo sa ne esiafufum.

<sup>1</sup> Afa ka Pol ka hwa ginof nem Tesalonaika nai siosim ginofenig. Afa Timoti i Sailas i gafa ka mungwal auguiaba asa ka hwa moba nem ginofenig. Afa God bigelni Api nai yi afa Ainiyag Sisas Kraiss nai yi el ne fig.

<sup>2</sup> Ka membeg God Api i afa Sisas Kraiss bigelni Ainiyag i sa ma nem enaig sahfeni. Asa ma olug enesieg fenim afa God esmunagim nem kwaganife.

### *Pol siosna suialag nihem sifakaleni*

<sup>3</sup> Afa sa kagel nengelim nilitem Godim suialag onig. Afa nengelni olug onigig pugu wasneig afa elim membenag nihe ne gwenaig esigbi eba ihlafeg afa ka enam Godim suialag onag.

<sup>4</sup> Afa nengel ma ne enaig esigbi asa kagel mingnag Godna elni nof la ka nengelni unehlagim fingi fegonig. Afa ka enaig esogog, “Afa sonag Tesalonaika nai sios eba eheba kinig i susugibi fligim gweseg wasneig afohieba afa ehengelni olug onigig gafa fwina wasneig.”

### *God bigim mungwali suialag kwefhiagefe*

<sup>5</sup> Afa ne Godna bog meg gafuga na figbi asa ne enag kinig flig. Eba God ehe nem esenigbi asa ehena bog megam ihlafi saiye afohiefife. Enaba ogfug Godna kwefhiageg eba ihlafeg.

<sup>6</sup> Afa God sa mangwal mungwali esofehba eba ihlafeg. Afa ambangel sa nem mangwal amtakwalig nem esegonibi eba God ehegelim amtakwalig mungwa faifi.

<sup>7</sup> Afa sa ehe nengelni kinig flafatinife afa sa kagelim gafa gwenaign esenifie. Afa enaba eba esefe maia Ainiyag Sisas hevenim fwahanam ambala pugunam asa heafna wasneig of la nai el ni, afa suwi pahla lagigi ni wahe blofe.

<sup>8</sup> Afa el oksigim sa mas Godna fig mo afa mas Ainiyag Sisasna suialag mom higig mo afa sa God ehengelim amtakwalig mungwag faifie.

<sup>9</sup> Afa sa ehengel susug wahkig lambfofufe afa Ainiyag ehengelim plauklaitifie afa ehena kwania wasneigim mas muhla fini.

<sup>10</sup> Afa maia ehe blo heafna osuna esofiba asa heafna el ehena unehlagim fingi fifie afa el sa ehem olug oniginig asa ehena unehlag seflifi. Afa kagelni mo asa ati ne flig afa sa nengel gafa ehengel nai yi afohiefim.

*Pol Godim sahna og sa ma Tesalonaika elim wasneini*

<sup>11</sup> Afa enam ka onigigim asa ka nem wahkig betenegoni afo. Afa God nem kanog fwatig ehem patalfuiagim afa ka Godim sahanig sa ma nem suialag nofkenagagim kwagani. Afa kog ehena wasneig ma nem esinibi asa ne suialag nihem esenim afa sa ma suialag onigig nem gohonifibi asa ne mangwalba esi.

<sup>12</sup> Afa bigelni God nem esmunagim kwaganig afa Ainiyag Sisas Kraisa ma nem enaig esinigi asa ne Ainiyag Sisasna unehlagim fingi fibi asa ehe nem mungwag gwenaign esenife.

## 2

*Satanna el pugufe*

<sup>1</sup> O nilite, ka enaig sihi ofe bigelni Ainiyag Sisas Kraisa eba blofe afa sa bigim lambinam asa big mungwali ehena yi afohiefufe. Afa ka nem osihin, sa hig,

<sup>2</sup> Afa mingnag el enaig mwakwal sihififi og Ainiyagna osuna ati pugug, afa nofe ne enam etetiagi. Afa mingnag el enaig esogofe Godna Sungwabug gwenaign sihifefe afa mingnag el enaig esogofe afa kana Polna ginof gwenaign esog. Asa nofeka enam onigim.

<sup>3</sup> Masa nem el ambe mwakwal mo sihigonim hugfu wanafufe. Afa enag osuna maisi feahba afa sa enaig pugufe kaksag el eba Godim masigim fatigim afa nihe mo ati flafug. Afa Mo Flafwaule El gafa sa puguiba. Asa sonag elim God nengigim suwi lagig kembang gam flafatife.

<sup>4</sup> Afa sonag el ehe mungwali gawigim el sa lotu fig afa unehlagim fingi fig asa ehe enam pega lambife. Afa sa ehe

heafna unehlagim finig fukunam asa Godna kwania lala sefu peganam enaig esofe og, “Kaba God feg.”

<sup>5</sup> Afa ilawana sa ka nem wanana enanam sa ati ka nem moba faini. Atiame ne etetig?

<sup>6</sup> Afa ne ati anwenafig sonag elimbi mangwal ehe mina kafonagba asa ehe mas glauwaba ambala pugug mo. Afa maia enanam God esoiba afa sa sonag Mo Flafwaule Elbi pugufe.

<sup>7</sup> Afa enag mo flafwag nihe nengigim fwina kwania pugufe asa enam mas big numwehe anwenafig mo, afa glau enaba ati gafugafego. Afa mangwal sa minam kafogo afa sumi yi God enam hilifi fati.

<sup>8</sup> Afa enanam Godna angoluweg El Mo Flafwaule eba ambala pugufe. Afa sumi yi Ainiyag Sisas heafna wasneig ni wahe bloiba asa sonag elbi awaiefefe. Afa heafna efefug ni sonag elim esenaiba asa awaiefefe.

<sup>9</sup> Afa ilawanaba sonag amtakwalig elbi eba ehe Satanna wasneig ni blonam asa ehe wasneig gafuga fei afa mwakwal kigmog ogfuiagei.

<sup>10</sup> Afa ehe mungwali haig haig kilimwaneageba asa el ena amtakwalig mina afufe. Afa ehengel awaiesaiife afa eba ehengel nufunam mom masig fatig asa God ehengelim mas lambi.

<sup>11</sup> Asa God wasneigim ningihiaiba asa el mwakwal mom fwina onigwagifef og, ena moba eba nufunam.

<sup>12</sup> Afa God enaig esenibi asa ehengel mungwali nufunam mom oksinim afa amtakwalig nihem sifakalinife asa God kwefihiagenam afa sa mungwalig amtakwalig faifie.

### *God bigim Satanna ninga nai pese lambig*

<sup>13</sup> O nilite, God nem fwina membenig. Afa God ati nem gofgam pese lambigim kanog fwatina asa kangel wahkig nengelim Godim suialag onig. Afa God nem enaig esenigbi asa heafna Sungwabugni gafugag nem esinigbi afa ne nufunam mom onigigbi afa sa ne Godna nof la afsug afohie.

<sup>14</sup> Afa ka nem Godna suialag mo faigogba afa God nem wegfu fwatigba asa ne heafna el fiahsaieg. Afa ehe enaig esegim asa ehe enaig membeg asa ne Ainiyag Sisas Kraisma suialag la saiye afohiefim.

<sup>15</sup> Afa nengel nilite sa ne wasnei afohiefiba afa nufunam mo sa ka nem sihigonigim afa ka nem ginofi faigog sa ne enam fwina wasnei kehli ufufum.

<sup>16</sup> Afa God bigelni Api bigim membenigim asa ehe bigim esug kwaganigba asa enag afigige gohug gwese gofi afa sa big anwenafi mangwal suialag sa big sumi yi flifie enam big

nenge afo. Afa kog God i afa Ainiyag Sisas Kraisi sa ma nem enaig sahfeni.

<sup>17</sup> Asa ne wasneinim afa olug tahlag la afohiefimba asa ne suialag nihe finim afa suialag mo sihi.

### 3

*Afa sa ne Godim sahnibi sa ma kam kwagani*

<sup>1</sup> Afa nilite ka nem ming mo sihi afwahan afa sa ne Godim sahnibi sa ma kam ehe kwaganibi asa ma Ainiyagna mo ikagna gwesim mungwanam ikaminefeiba asa ma el enam higinim afa kehlanim afa sa ma sifakali. Eba hosa ati ne higinim esini.

<sup>2</sup> Afa sa ne Godim sahnibi asa ma kam amtakwalig angoluweg elni ninga nai mwehi lambi. Afa mingnag el Godna mo mas higig mo asa ogna kam amtakwal hiagi.

<sup>3</sup> Afa eba Ainiyag ati sihi fwahag eba nufunam esefe. Eba nem wasnei hiagenam asa nem kumo lambgufufe afa mas nem Satan ulambi.

<sup>4</sup> Afa Ainiyag enaig onigig kam faigbi nasa ka anwenafigim afa ka nem mungwali mo faigogba asa ne ilawo figim afa sumi yi gafa ne esefi.

<sup>5</sup> Afa kog Ainiyag sa ma nem mina ogfunigbi asa enam ne numwehe anwenafi eba Godna membug nem gohonifibi asa ne wasneig Kraisi lofug afohiefim maia nem mangwalba pugunibi.

*Nofeka yiskos el fi*

<sup>6</sup> Afa Ainiyag Sisas Kraisi kam enaig sihifenigbi asa ka nem nilitem enaig sihi fwina ofen. Afa nilite yiskos elim ka mo faigogba afa ehe kagelni mom mas higig mo asa nofeka enaig elimbi muhla fegon.

<sup>7</sup> Afa nimbe ati ne anwenafig sa ne enaig nihe fi hosa kagel enaig esig. Afa ilawana big mungwali afofenaba ka mas yiskosini mo.

<sup>8</sup> Asa kagel mas ka elni faneaba esug flini mo, eba awai. Eba ka osuna i afa sinaini i ka fwina kikeafena ningana gafuga fini afa ka mas nem kinig faigona mo.

<sup>9</sup> Afa ka nem Godna mo faigogba afa ka mas esoi kog kam ena gafugag nanam sa mangwal mungwag fai. Ei, enaba ka enaigimba sahinife amo eba ka nem suialag nihe ogfugonig asa ne gafa fwina gafugafi.

<sup>10</sup> Afa ilawanaba big auguiafenaba enanam ka nem enag mo sihini kog, "Afa amban el sa gafuga fegim oksig enaig el masa ese fane flafe."

<sup>11</sup> Afa ka enaig higig nengel nai mingnag el yiskosiagigbi asa ka enaig moba nem sihigonig. Afa sonag el eba esug

auguiahba afa ehe mo behig sihiageafla maia mingnag el eseagigbi.

<sup>12</sup> Afa Ainiyag Sisas Kraiss ehe enaig esog asa ka sonaig elim fwinam esonig afa kog sa ne numwehifibi asa ne suialag augufinim asa ne nimbeafena ningana gafugafiagi.

<sup>13</sup> Afa nilite nofeka suialag nihe feagigim yiskosi.

<sup>14</sup> Afa ambangel el sa kagelni enag ginof mom mas patalfug mo asa ne ehem nangwaginim fwati. Afa ehe fwaimu sa ma afohienam asa ma afwanefi.

<sup>15</sup> Afa nofeka ehengelim enaig onigig fegon nog eba angoluweg el fig. Amo, eba sa ne nilite lofinim asa moainugwefegonim afa sa numwehe sihigon.

*Pol sumi yi mo faini*

<sup>16</sup> Afa olug enesiegba eba Ainiyag ehe mog feg. Afa ka membeg wahkig enag olug enesieg ma nem gohonifi maia haig haig nem pugunibi sa ma enag gwese gofi. Afa sa ma Ainiyag mungwali nem wangofi.

<sup>17</sup> Afa hwa ginofba eba kana ninga afa sa ne nangu, “Ka nem enaig esonig niasabanig.” Asa ne anwenafi hwaba nem ogfunig eba kana ginof afa hwaba ka kike nem faig.

<sup>18</sup> Afa ka membeg Ainiyag Sisas Kraiss sa ma nem esug mungwali kwagani. Hwa moba gwenaho.

## Angig Ginof Pol Timotim Ninghiana Hwa buk enaig esog

Timoti eba kwablog Kristen el. Afa Pol ehem suflanam sa suialag mo ahsihiakana (Aposel 16:1-3). Afa sumi yi Timoti Efesus siosna saglag el puguna. Asa hwa mo Pol ginofe ehem ninghiana. Afa angig ginof la enaig esog. Timoti nofe fefiba ma sa mwakwal el Kristen elni olug onigigim gasafihagife. Afa mwakwal el eba enaig onigigi feg mangwal gawig hwa bite nai eba amtakwalig. Afa mingba enaig esogog og amban suialag gaba ofefiba sa mingnag fanem kwegi afa angwafig mas flai. Afa Pol ming kwania mog mo eba enaig esog suialag lotu nihem nangwakiage nihe mi afa siosna gafugag mi. Afa sumi yi ginof eba enaig esog Timotim og sa ma Sisas Kraisna suialag gafugag el fei afa suialag nihe mungwali sios elim eseni.

<sup>1</sup> Ka Pol hwa mo ginofeg. God bigelim kwaganigim afa bigim lambig asa bigelni onigig Krais Sisasnai yi gofi. Afa eheningina sawieg la asa ka Sisas Kraisna kanog fwahag el feg.

<sup>2</sup> Timoti neana olug onigigba kana mungwalofug asa neba kana leg lofeg asa hwa mo ka nem ninghianag. Ka membeg God bigelni Api i afa Sisas Krais bigelni Ainiyag i sa ma nem enaig sahfenai, asa ma nem esmunagim ahkweagfui afa nem afia ahfenai afa olug enesieg nem ahfai.

### *Numwehe nofefiba mwakwal ogfuiag elim*

<sup>3</sup> Afa maia ka Masedonia provins gam akofenaba ati ka nem enaig esonag sa ne Efesus kembig la gafim. Afa mingnag el enanai yi mwakwal olug onigig mog mom sihiag ofifibi sa ne ehengelim kweni.

<sup>4</sup> Sa ne ehengelim enaig sihifini nofeka autunai mo behigim afa simbiangana unehlagim suwiginim enam fwina onigiafofufum. Afa enaig mo elni onigigim gasafenig afa kaksag sahig ehengelni onigig la fapukefeg. Afa elni olug onigig enag mungu Godna minam ogfunig.

<sup>5</sup> Afa ka nem hwa mo sihinagba asa ka membeg el enaig flinim, suialag olug afa suialag onigig afa nufunam olug onigig. Enaigfibi asa mingnag elim fwina membenife.

<sup>6</sup> Afa mingag el enag nihem fwahigim afa amtakwalig haig haig mo behig higinim asa alganam mina eteti afug.

<sup>7</sup> Afa ehengel og ka Godna nihe mo ogfuiag el feg. Afa ehengel mas anwenafig mo enag mo mangwalim esog. Ehengel wasneig mona sihigim afa ehe mo etetig.

<sup>8</sup> Afa bigel anwenafig el Godna nihe mom suialag patal-fuiba enag nihe eba suialag.

<sup>9</sup> Sa big onigi enag nihe mo mango suialag elim kwaganig mo. Enag nihe mo enaig eseg eba amtakwalig elim kufinig. Asa enaig el nihe mom filafatig afa mas mingnag elni mom higi afa Godim masig fatinig afa haig haig amtakwalig esig afa ehengel Godna nihe oksini afa hwa bitenaina nihem patalfug. Afa Godna nihe mo enaig elim gafa kufinigim afa el asa heafgelni humonig mi afa mingnag el mi kwaskofig,

<sup>10</sup> afa el aga taitufig afa saglag waunam afuiag afa mingnag elim ukwefna lambigim heafgelni gafugag la lasanig asa esug gafugafiafu, afa el mwakwal mo sihig afa el jasna nof la enaig esig afa el mingnag nihe esig mas suialag mog mom patalfug.

<sup>11</sup> Enag suialag mog mo eba Godna suialag mo nai pugug. Godba suialag ehe sisi ga enag suialag mo kam faig og sa ne sihiage.

### *Pol Godim suialag onag*

<sup>12</sup> Afa bigelni Ainiyag Kraiss Sisas kam faihianageg asa esog, “Sa ka nem wasneig faig asa ne kana gafugafe.” Asa ka ehem fwina suialag onag.

<sup>13</sup> Afa autunam kaba amtakwalig el fena. Ka Sisasim amtakwalig mo sihina afa heafna elim kinig faigim afa kwagaitifeg. Afa ka ehem mas anwenafena mo afa kana olug onigig ehem mas ka fena mo. Asa God kam aflafenag.

<sup>14</sup> Afa Ainiyag kam enaig esenag heafna aflafeg ka nai yi kwania pugugba asa kana olug onigig Kraiss Sisas nai yi lugug naka mingnag elim fwina membenig.

<sup>15</sup> Afa Kraiss Sisas hwa bite la ati blona asa amtakwalig elim heafgelni amtakwalig nihe nai lambina. Afa kaba amtakwalig elim gosenig. Afa hwa moba nufunam sa big mungwali enam higinim fli.

<sup>16</sup> Afa ka amtakwalig el afa God kam aflafenag asa ma Kraiss Sisas kam nengigim fenai. Ehe enaig eseba sa ma mingnag el sumi kam nangunim sa ma Sisas nai yi olug lugui afa wahkig nofkenagag fli.

<sup>17</sup> Afa ehe bigelni misog el asa big wahkig heafna unehlagim fingi finim afa suialag ehem ona. Afa ehe wahkig nofkenagag ga mas lahai afa big mas ehem nofna nangui afa ehe mungu God feg. Eba nufunam.

18 O Timoti, kana leg, hwa mo ka nem sihinag eba mungwalofug asa Godna mo fli sihiaule el autunam nem sihi fwahana. Afa ena mo nem kweafug asa ne God i ahgonam sa ne ahfenim.

19 Maia ne Godna suialag mo la hagfiba asa neana olug onigig fwina Sisas nai yi wasnei lugwafim afa enag ninimu sa ne feg eba Godna nof la neana onigig suialag go. Afa mingnag el heafgelni suialag onigig esigim yiskosig asa heafgelni olug onigig eba mas wasneig mo asa tuto apaiyegog.

20 Himeneus afa Aleksander eba enaig el ahfeg. Afa ka eheningim Satanna ninga la fwatig asa eheningi anwena ahfei afa masa ese Godim pese amtakwalig mo ahsihinafe.

## 2

### *Pol Godim sahnag nihem mom sios elim sihinigim*

1 Afa hwa goseg mo ka nem afai. Afa ka fwina onigig el sa ma haig haig sahanig Godim finibi asa God mungwali elim suialag feni. Afa God mungwali elim suiala feni asa ne ehem suialag ona.

2 Sa ne misog el mi afa mingnag gavmanna el mi Godim sahnaiiba sa ma ehengelim suialag onigig faibi asa big aflahlanam augu afa big suialag nihe patalfufi asa big Godim suialag oni.

3 Afa hwa nihe eba suialag asa Godim sifakalena. Ehe bigelni kwefwag el feg,

4 afa ehe membeg mungwali el nufuna mom anwenafifi asa ehe ehengelim kwaganam pese lambife.

5 Afa mungu God ga afa mungu olyi nai el ga. Ehe Godim afa elim olyi fenig. Ehe enag el Krai Sisas.

6 Afa heafna nofkenagag fwahanam asa lahana asa elim pese lambig. Afa enag osuna God sihi fwahag Sisas ati blona afa enag ofug God membeg mungwali elim pese lambi.

7 Asa God kam kanog fwahag na ka afwambanai elni ofgufiag el feg. Afa ka nufunam mo sihig asa ma el Godim olug onigini. Ka mas mwakwale eba ka nem nufunam sihinig.

### *Saglagna i angwafigna i siosna nihe mo*

8 Ka membeg mungwali kembig sios la nai saglag sa ma afsug el fi asa ninga fingi fenam Godim sihini. Afa maia esigbi afa ehengel mas olug kakaginim afa monagi.

9 Afa ka onigig angwafig gafa enaig esi, heafgelni eligim suialag lofugna aitiagig afa enag lofug angwafigni suialag nihe ofug. Afa haig haig wagna angwafig heafgelni eligim



fiagig masa lapo kikeagig afa egig aitiagig afa labana lofug asa kig kwaniaana lambig,

<sup>10</sup> Afa heafgelni suialag wag sa ma heafgelni suialag nihem ogfui. Afa angwafig Godna nihem patalkug enag suialag wag aitig.

<sup>11</sup> Afa angwafig sa ma ahnai skaufinim mwalfwei augunam sa ma numwehenam mo suialag anwenafi.

<sup>12</sup> Ka enaig esog, ese angwafig saglagim puguhafunam afa ogfufenafe saglagim afa angwafig sa ma mwalfwei augui.

<sup>13</sup> Afa God Adamim gof gafugafena afa Ivim sumi yi gafugafena.

<sup>14</sup> Afa Adam mas mwakwal mo higinam mo eba angwafig enag mwakwal mom higinam enaig esenam afa Godna nihe mo filafena.

<sup>15</sup> Afa angwafig sa ma enaig esi Godim olug oniginakafi afa elim membenikafi afa heafna nihe suialag gwenaiig gofi. Afa enaig esibi maia luwal wanigaufiba asa God ehem kweafunam asa suialag augufi.

### 3

#### *Siosna misog el haig el asa fefe*

<sup>1</sup> Afa el membeg siosna misog el ofefiba afa enag gafugagba ehe membeg eba suialag. Hwa mo eba nufunam.

<sup>2</sup> Afa siosna misog el masa haig haig amtakwalig esefe. Ehe sa ma mungu angwafigni fei, afa heafna onigig masa ese fapusofefe, sa ma aflahlanam fei, afa saglagna onigifei, afa afwambanai elim lala gam wankai afa Godna mo mingnagim ogfunigim eba ma sefei.

<sup>3</sup> Afa ehe bu gina negim foiyug mas fei afa mas ikagna ninimui afa aflahlagna gagim afa nengigim sihiageg afa kig flagim mas fwina onigi.

<sup>4</sup> Afa siosna misog el sa heafna luwal angwafigim suialalafi afa heafna luwalig sa ma ehem ahnai skaufinim afa ningmagini.

<sup>5</sup> Afa enag el heafna luwal angwafigim suialalafig fwainigba eba ehe mas anwenafeg mo Godna elim numwehenugegim.

<sup>6</sup> El asa Sisasim glaunu olug oniginig ese enag el siosna misog el go fe. Masa heafna unehlagim fingi fefe eba God ehem susug faife asa Satan enaig esenaba asa God ehem susug faina.

<sup>7</sup> Afa el Sisasim olug onigi fwainig sa enag elim sihini og, "Eba suialag el." Masa enag elim amtakwalig mo sihinifi asa ehem Satanna bume la pefe.

*Siosna kwefwag el haig el asa fefe*

<sup>8</sup> Afa siosna kwefwag el ehe gafa sa ma saglagna onigig lofug fi ese eba mango sambaga mengigna el fefe afa mo ehe sa sihi eba nufunam month Afa ehe bu gina negim foiyui afa kig flagim mas fwina onigi.

<sup>9</sup> Afa nufunam mo God ehe upuguna enag el sa kehlanam og ka Godna nof la heafna mom patalku.

<sup>10</sup> Afa ilawana mo sa ne ehengelni gafugag i nihe i fahigenugenam asa ihlafeba sa ma ehengel siosna kwefwag elni gafugag esei.

<sup>11</sup> Afa ehengelni angwafigni nihe gafa sa ma suialafi afa esi elim mo sumifinife afa esi mina la wahgi gofife afa enaig angwafig sa sihig eba naho nufunam mo sihig.

<sup>12</sup> Afa siosna kwefwag el sa mungu angwafigni fei afa heafna luwal angwafigim suialalafi.

<sup>13</sup> Afa enag kwefwag el asa suialag gafugafeg eba suialag unehlag flag. Afa ehe wasneigni enaig esog ka Kraisisasim olug onigina.

<sup>14-15</sup> Afa ka onigig ka mwakwalig fenam sa nem blo nangufe afa ka ikagna blo fwainigba hwa mo ka nem ginofenag sa ne anwenafe afa big Godna lala laskuihlanam afa big haig esifi. Afa big Godna el afa God nofkenafeg bigel heafna sios. Afa enag sios sama ofenaiba wasneig sumul lofug sa Godna nufunam mo gofeg.

<sup>16</sup> Afa big anwenafig nufunam mo God ehe upuguna afa enag fwina kwania feg. Afa enag nufunam mo enaig esog;

Ehe hwaig el lofug gohna  
asa bitenai el heafna mom higinim  
ehem olug onigini.

Afa Godna Sungwabug ogfuna ehe suialag  
afa oflanai el ehem nanguni  
afa ehe heven gam kukagim God i hawag.

## 4

*Mwakwal ogfuiag el elni onigigim gasaf lafifi*

<sup>1</sup> Godna suialag Sungwabug sihig autunai la mingnag el Sisasim olug onigig fwahigim afa enag el mwakwal sungwabugna mom higi afa sanel enag ogfufenim asa enam patalfufe.

<sup>2</sup> Afa mwakwalule el sa enaig mo sihiakag afa enag elni onigig etetig afa maia amtakwalig esigim eba mas afwanfi.

<sup>3</sup> Afa enaig el sa enaig sihifeg nofeka angwafig fli afa nofeka haig fane ahgai. Afa ena wag God ehe gafugafeg asa el Godim oniginim afa nufuna mom anwenafenim afa ma Godim suialag onam asa ahgai.

<sup>4</sup> Afa mungwali gau God sa gafugafena eba suialag masa big fatife afa big mungwali gawigim suialag onigbi eba sa big fli.

<sup>5</sup> Afa Godna suialag mona afa bigelni sahig ena gawig eba suialag mungwali Godna nemwag feg.

*Afa Krai Sisasna suialag gafugag el haig maia*

<sup>6</sup> Afa ne hwa mo nilitem sihinibi eba ne Krai Sisasna suialag gafugag el fefe afa Godna suialag mo la neana sungwabugim wasneig flafe asa ne enag onigig afa anwena suialagim sa ne flagnam patalku.

<sup>7</sup> Afa nofeka mwakwal elni mo behigim onigi. Ena mo mango Godna blo mo afa mas nem kweafui. Sa ne fwina gwenaig segofum asa neana nihe Godna minam patalku.

<sup>8</sup> Afa big gafugafigbi asa bigelni elig wasneig flag enag kwefwag eba wetifeg. Afa big gwenaig sungwabugim esinighi enagba naho fwina kweafug afa enag ilawo bigim wanai yi kweafui afa autunai la bigim gwenaig fenife.

<sup>9</sup> Afa hwa mo eba nufunam asa ne kehlinim auguiafim.

<sup>10</sup> Afa bigelni olug sa ma nofkenagag Godnai yi lugwafi asa ka hwa gafugam hengepuseg. Ehe mungwal elni kwagani el asa amban ehem olug oniginag ehengelim pese lambife.

<sup>11</sup> Sa ne hwa mo elim sihini afa ogfuni sa ma enam patalkwi.

<sup>12</sup> Afa ese nem enaig onigififi og neba kwablog el feg amo sa nimbiafna nihe Godna elim suialag mina ogfuni. Afa neana mo sihiagim afa gafugam afa membeg afa olug onigini afa suialag gag sa ma el enam nangunim nem patalfwi.

<sup>13</sup> Afa ka ikagna blog fwainigba sa ne enaig ese. Afa mungwali elni ang la sa ne Godna mo suwiginam afa ogfufenugenam afa sihinuge.

<sup>14</sup> Afa maia siosna misogyn el nem kehlinibi afa el nem Godna mo faina asa ne Godna Sungwabugni wasneig flana. Afa nofeka enam yiskose.

<sup>15</sup> Afa numwehena nimbiafna gafugam suiala kehlafe asa ne flag. Afa neana onigi sa ne ena gafuga la lugwafiba sa ma el neana nihem nangunim eba sa suialag gwenaig siafufi.

<sup>16</sup> Afa nimbefum suiala kafefiba sa ne elim mo sihinug fiahkafim afa moba ne osihinifiba sa ne nufuna mo sihini afa ne enaig eseba eba God nem afa el asa neana mo higig ehe nem kwaganife.

## 5

*Timotina nihe sios elim enaig eseni*

<sup>1</sup> Afa maia ne ogna saglag elim numwehenug ofefiba nofeka ninimu mona sihinuge. Sa ne negnag mona sihini

sa ne ofenaiba nimbiafna alagim sahfenafe. Afa siosna kwablog elim sa ne enaig esen asa nimbeafna suminegim sahfenafe.

<sup>2</sup> Afa watiaug angwafigim gafa sa ne enaig eseni asa ne nimbiafna afagim sahfenafe afa angwaming angwafigim sa ne enaig esini asa nimbiafna muwaligim sahfenafe afa nofeka amtakwalig onigig nihe fla.

*Bontag angwafigna mo*

<sup>3</sup> Afa nofeka bontag nemug angwafigim eteti fwaihi sa ne kweafu.

<sup>4</sup> A fa sa ehe luwaligna afa simbianingana fefe sa enag luwaligim sihini og, afa lasflam sa ne nimbiafgelni afa humonigim nangwaghiagig asa autunam ehengel nengelim esegoni sa ne mungwag enaig esegoni. Afa enag nihe eba Godna afa God enam sifakalenag.

<sup>5</sup> Afa bontag nemug angwafig mas amban ehem weti gafa kweafui afa heafna onigig Godim fenagim asa osuna sinaini Godim fasahnafe sa ma kam kweafui.

<sup>6</sup> Afa mingnag bontag angwafig bitenai onigigim patalfug afa ehe nofkena feg eligni afa sungwabugni ehe lahag lofeg.

<sup>7</sup> Sa ne ehengelim hwag wasneig mo fai masa el ehengelim sehini.

<sup>8</sup> Afa amban heafna nilitem afa afahumonigim mas nangwaghiage afa enaig el heafna olug onigigim amtakwal fiah-flag asa ehe eba amtakwalig el afa afwambanai elim gosenig.

<sup>9</sup> Afa bontag angwafig asa 60 krismas feg afa enaig bontag angwafigni unehlag mungu ginofe apaiye goh asa sios ehengelim kwagani. Afa sa ehe mungu alagag flanam afa suialafiah flana.

<sup>10</sup> Afa mungwali el enag angwafigim enaig esonig ehe suialag nihe esena afa ehe luwaligim suialafenig afa afwambanai elim heafna lala gam wankag afa Godna elim ahnai skaufenigim asa ehengelni mongim giafenugeg, afa amban kinig yi pefe asa ehe ehengelim kwaganig afa haig haig suialag nihe eseg.

<sup>11</sup> Afa nofeka kwablog bontag angwafigni unehlag lambi pipali mungwal enanai yi ginofe apaiye goh. Afa autunai la ehengelni onigig buihiafe alagag la gagim asa Kraisna nof la mo enaig sihifena ka mas alagag la gai eba koka Kraism gof flafati asa ehe ena mom filafefe.

<sup>12</sup> Afa enag mo Kraism gof sa sihina sa enam amtakwalig fatife asa ehem amtakwalig flafe.

<sup>13</sup> Afa ehengel gafa enaig esig afa gafugam mas oniginam gafugafei afa ehe mo fla la wagiakaba asa elni lala kwape-fiahka. Afa ehengel elim mo sumi lagnag afa mingnagna

gawigim nangugum afa ehe membeg heafna onigig esug sa blu seafui afa mo behig mas elim kweafu sa enam sihiagig.

<sup>14</sup> Asa ka membeg kwablog bontag angwafig sa ma pese alagag la gai afa luwalna fei afa lalam numwehiagei. Afa enaig eseba angoluweg el mas bigim amtakwalig mo sihigoni.

<sup>15</sup> Afa mingnag bontag angwafig suialag mina fwahigim Satanna minam patalfug.

<sup>16</sup> Afa nengel angwafig Godim asa olug onigini asa bontag angwafig nengel nai yi gofiba sa ne enag angwafigim kwefu. Afa ne siosna ninga la fwaihibi masa sios enag kinig fla fe. Asa sios sa ma bontag angwafig nemug mungum kweafui.

*Siosna misog elni mo*

<sup>17</sup> Afa siosna misog el fwina suialag gafugafe afa enaig el asa sihiagim afa ogfunagim asa sios el enaig elim suialafe flinim afa kig gafa suialag faifi.

<sup>18</sup> Afa Godna mo enaig esog;  
Afa maia bulmakau wit lambigim gafuga ofefiba ese ne  
negim kwenafe. *Lo 25:4*

Afa ming mo enaig esog;  
El sa gafugafeg sa ma kig flai. *Luk 10:7*

<sup>19</sup> Afa el misog elim osehinfiba nofeka enag mo higim. Afa sa sambaga me awai sambaga mungu el mungwal mungwa mom osehifibi eba sa higim.

<sup>20</sup> Afa misog el amtakwalig eseba sa ne ambala siosna nof la sihibi sa ma mingnag enam nangunim embefini.

<sup>21</sup> Afa ka nem wasneig mo osihina God, Krai Sisas, afa Godna oflanai elni nof la ka hwa mo nem osihina sa ne kana mom suialag kehlafe afa mangwal asa ne eseg sa ne mungwalofug gwenaig mungwali elim eseni nofeka nimbeafna hihe mungu onigig.

<sup>22</sup> Afa nofeka ikagna elim ningana kehlanam asa ne esog ne Ainiyagna gafugag kehlagim. Afa enag el asa amtakwalig la peba eba neana moala ne gafa amtakwalig eseg. Afa nimbeafna nihe sa ne afsug gofum.

<sup>23</sup> Afa Timoti gih ne faflafe asa nofeka bu behig ne sa ne weti wain bug ne sa ma neana atagim kweafui.

<sup>24</sup> Afa mingnag elni amtakwalig ati ambala feg afa mungwali anwenafig Ainiyag sa ehem kwefihianugenam asa susug faifi. Afa mingnag elni amtakwalig meagam afoiye asa sumi yi ambala pugufe.

<sup>25</sup> Afa suialag nihe gafa ambala feg afa mingnag suialag nihe ambala feg mo eba mas meagam seaifui.

## 6

*Esug gafugag elni mo*

<sup>1</sup> Afa esug gafugag el asa Godim olug onigig asa ehengel heafgelni misogyn elim suialafeni afa gafugag suialafei asa afwambanai el esi Godna unehlag mi afa bigelni mog mom ogfunag mi amtakwalig mo faife.

<sup>2</sup> Afa misogyn el eba Godna el fegba masa esug gafugag el enaig esofe, “Afa misogyn el kana nilite lofeg” asa ehe mas ehena suialag gafugafei. Amo, ehengel sa fwina henge pusig. Asa ehengel Godna elim kwefugim afa enaig elim membenig.

*Kig flagim fwina membenag mo*

Sa ne hwa mom ogfunigim afa sihinuge.

<sup>3</sup> Afa amban el asa algana mo ogfunag afa mas Ainiyag Sisas Kraisna nufunam moi afa mo suialag nihe minam ogfug asa enam oksiba,

<sup>4</sup> afa enaig el eba tonbusug el feg afa ehe anwena eteti. Afa ehe membeg weti mom esi asa hefum esim osum fiahgig afa moanagig. Afa enaig mo la hwaig onigig pugufe elim filafeg, afa elim esmunagim lakinig, afa elim amtakwalig mo sihinag, afa elim esmunagim sehinig,

<sup>5</sup> afa elim mas suialag wangafei. Afa ehengelni onigig amtakwalig asa nufunam mo mas ehengelni goh mo. Afa ehengel enaig esogog, “Ka Godna mo la ka fiba ka kaksag gawig lambig gofife.”

<sup>6</sup> Afa el Godna mo patalku afa ehe enaig esog, “Mangwal gawig sa ka feg eba kati ihlafeg.” Afa enaig elbi mas tumeni ofenaiba kaksag gawigna el lofug feg.

<sup>7</sup> Afa maia bigim afag foklanaba mas big mangwal gawig kehla bluna mo hwa bite la. Afa maia bigim alahafiba big mas mangwal gawig lambkui.

<sup>8</sup> Afa big fane i afa lofug i fefe asa big enaig esog mangwe-sei.

<sup>9</sup> Afa amban sa fwina onigig og ka kaksag gawig lambi asa Satan ehem yuhnagba asa haig haig amtakwalig onigig fegba asa ehem wegmosug fe fatig. Afa enaig onigig ublu seaifug afa ehem ati amtakwalig fatig.

<sup>10</sup> Afa kigim membeg nihe eba enaba mog feg asa haig haig amtakwalig onigig ehe nai yi fapukefeg. Afa mingnag el enaig onigig fig asa Godna mina eteti fwahigim afa kaksag haig kinig flig.

*Pol Timotim onigig faina*

<sup>11</sup> Afa ne Godna el feg asa enaig nihem embem hilfuka. Asa neana nihe enaig suf eseg sa ne Godna sawieg patalkui afa Godna nihe esei afa Godim olug oniginai afa elim membeni

afa kinig ne pugunaiba asa ne wasnei goh afa elim aflanam fenugei. Sa ne hwa nihem fwina kehla.

<sup>12</sup> Afa el asa gosis la kikini fakafe sa ne enaig ese Sisasim olug oniginam kikini enaig kafe eba nimbe wahkig nofkenagag flafe. Afa maia ne kaksag elni nof la enaig sihifenaba kaba Godna el asa God nem wegfu fwahag asa ne enag nofkenagag flafe.

<sup>13</sup> Afa mungwali gawig asa nofkena feg God ehe mog enag nofkena faig. Afa Kraiss Sisas heafna suialag mo Pontius Pailatim sihina. Afa eheningina nof la ka nem enaig esona,

<sup>14</sup> Enag mo asa God nem faig asa ne enam suialag gafugafe ese el enanai yi nufweh mo nangumfifi. Asa ne enag gafugag kehla ukwian asa Ainiyag Sisas Kraiss blofe.

<sup>15</sup> Afa suialag osuna God ehe ati wegfu fwahag asa Sisas ambala puguiba big nangufi. Afa God eba suialag ehe mungwali gawigim nangwaghiageg, afa ehe mungwali misog elni misog feg, afa ehe Ainiyag mungwali ainiyagim kwania fenig.

<sup>16</sup> Afa ehe mas lahai afa ehe ombusug kwania nafeg mas amban ika muhla fenai. Mas amban ehem weti ga mo nangug mo afa mas amban ika ehem gafa nangui. Afa heafna kigmog gwenaig wahkig goh afa big sa heafna unehlagim fingi fifi. Ei, eba nufunam.

### *Kaksag gawig elni mo*

<sup>17</sup> Afa el kaksag bitenai gawig nafeg sa ne enaig elim enaig sihifeni og, nofeka tonbusug el fi. Afa ese enaig onigififi ma kiafna gawig kam kweafufe, amo Godim mungu sa ne onigini asa ehe bigim mungwali gawig faig asa big enanai yi suiala augu fenam asa sifakalife.

<sup>18</sup> Afa sa ehengelim sihini nihe suialag fi afa kaksag suialag gafugafi. Mingnagim kwefwag onigig sanefe asa nimbiafgelni gawig kaksagna kwagani.

<sup>19</sup> Afa enag nihe eba mina asa ehengel hefum kaksag gawig agoguligim asa autunai la lambifi. Asa nofkenagag flifi afa enag nofkenagag eba nufunam nofkenagag.

<sup>20</sup> O Timoti, gafugag sa God nem faig sa ne enam suiala fiahfla. Afa mingnag mwakwalule el enaig esog kagelni anwena onigig eba suialag afa enam mo behigim sa flafihiagigim afa amtakwalig mo sihig. Sa ne enaig elni mom membifeni. <sup>21</sup> Afa mingnag el enaig mom sihigim asa Godim olug onigig ena mina ati fwahig. Sa ma God aflahlanam nengelim esug kwagani.

## **Angigieg Ginof Pol Timotim Ningihiana Hwa buk enaig esog**

Timoti eba Pol i mungu gafugag nai. Afa Pol hwa ginofe Timoti nagum ningihiana og sa ma suialag nihem nagunam sa enam patalfui. Timoti ese olug onigigim auwiauwife afa nofeka suialag mo Sisas Kraiss na sihiagim fwaha. Ehe sa ma God na numwehe suialag patalkufe. Afa el ehem susug i afa kinig i faig afa enag kinig yi penam afa ese yiskosefe. Ehe sa ma wasneinam enag gafugam ese asa God ehem faig. Afa Timoti nofeka el onigig amtakwaligna mo behigim higig nugenam. Afa enaig mo eba naho elni nofkikenam amtakwale klatigi maia enam higibi. Eba suialag feg Timoti sa ma Polna nihem nangunam sa ma enam patalkwui. Enag nihe eba enaig eseg fwina olug onigig wasneig afa mungu olug fli afa mingnagim membeg gonig afa haig haig kinig fligim ena nai yi wasneig afohie.

<sup>1</sup> Ka Pol hwa mo ginofeg. Godna sawieg la ka Sisas Kraissna kanog fwahag el feg. Kana gafugag eba enaig eseg ka enaig mo sihiakagim asa autunam God enaig sihi fwahana amban el Sisas Kraissim olug oniginibi eba sa nofkenagag flifi.

<sup>2</sup> Timoti neba kana leg lofeg asa hwa mo ka nem ningihianag. Ka membeg God bigelni Api i afa Sisas Kraiss bigelni Ainiyag i sa ma nem enaig sahfenai. Asa ma nem esmunagim ahkweagfui afa nem afa ahfenai afa olug enesieg nem ahfai.

### *Polna mo Timotim wasneig fiahflana*

<sup>3</sup> Afa bigelni simbianiga Godna gafugag esinibi afa Godna nof la ehengel onigig heafgelni nihe eba suialafeg. Afa ka gafa gwenaig eseg. Afa osuna i sinaini i ka Godim beten enag afa ka nem oniginagim asa ka Godim suialag onag.

<sup>4</sup> Ka pese onigig maia neana nob pegogba asa ka fwina sawifeg ka pese nem nangwagim asa ka sifakalefe.

<sup>5</sup> Afa ka pese nem oniginag neana olug onigig eba mas mwakwaleg mo. Afa ka anwenafeg neana awag Lois i afa neana afag Yunis i ehenigina olug onigini eba suialafena afa ka onigig eba gwenaig ati neana yi gafa goh.

<sup>6</sup> Afa ka enam onigigim autunam ka kiafena ninga neana misog la kehlanaba asa God enag wasneig nem faina. Asa nofeka Godna wasneigim eteti, amo sa ne suwim pese gohwifuiafe.



<sup>7</sup> Afa Godna Sungwabug mas bigim embe onigig fai. Amo, heafna Sungwabug bigim enaig faig wasneig afa mingnagim membenig nihe afa nimbefim numwehefku nihe feg.

<sup>8</sup> Afa nofeka Ainiyagna mo ambala sihiagim afwanfe afa nofeka kam ningmange eba ka enaig esegba asa ka kalabus yi goh. Afa sa ne ka i ahgonam Godna suialag mo la big kinig ahflafe. Afa Godna wasneigni ne enaig esefe.

<sup>9</sup> Afa God ehe bigim amtakwalig la nai lambigim afa esonig kana el nefeg. Afa bigel mango suialag nihe esih mo amo eba ehe bigim enaigba esenig asa eba heafna sawieg la bigim esmunagim kwaganig asa ehe enaig eseg. Afa ilawanam bite gig fwainig fiahfenaba ehe enaig onigigfena og ka KraiS Sisasim ningihiaiba sa ma bigim esmunagim kwagani.

<sup>10</sup> Afa KraiS Sisas bigelni kwefwag el ati blog asa ilawo bigel enam anwenafig. Afa ehe blogum lahagna wasneigim filafatigim afa heafna suialag mo la ehe bigim nufunam nofkenagag ambala upugunig.

<sup>11</sup> Afa God kam enaig esenag na ka Godna kanog fwahag el feg afa tisa feg sa ka heafna suialag mo sihiageg.

<sup>12</sup> Afa ka enaig esegba asa ka enag kinig yi kalabusig. Afa ka mas enam afwanfeg mo. Eba kati Sisasim olug oniginag asa ka anwenafeg gafugag ehe sa kana ninga la fwahag eba Sisas enam numwehefkufufe ikan asa ehe pese blofe.

<sup>13</sup> Afa sa ne numwehe hwa mo kehlanam asa ka nem faig sa ne mingnagim gwenaig ogfuni. Afa olug onigig nihe i afa membug nihe i sa ne enam patalku asa Sisasna el enaig fasahfifi.

<sup>14</sup> Afa God nufunam mo neana ninga la fwahag asa ne suialafiahfla. Afa Godna Sungwabug bigel nai yi sefu goh afa heafna wasneigni sa ne enam mom numweheafla.

<sup>15</sup> Afa ne anwenafeg mungwali Esia provins la nai el kam mas fatinig. Afa Figelus i afa Hermogenes i ehenigi gafa gwenaig sahfig.

<sup>16</sup> Afa Onesiforus ka nangum blogum ehe kam olugim kigmonag asa ka og ma Ainiyag heafna afahumonig aflafeni. Afa ka kalabus el feg asa ehe mas kam ningmangenai.

<sup>17</sup> Afa ehe Rom kembang la ika pugunam afa ehe kam fwina yisigi kanam asa kam nanguna.

<sup>18</sup> Afa maia Godna Kwefihawageg osuna ofefiba ka membeg Ainiyag sa ma ehem aflafenai. Afa ne ati anwenafeg Efesus kembang la nai ehe kam suialag kwefufini.

## 2

*Sa ne KraiS Sisasna ami lofeg gofum*

<sup>1</sup> O Timoti, afa KraiS Sisasa heafna elim ehe esmunagim kwaganig kana leg ka membeg sa ne enam wasnei gofum.

<sup>2</sup> Mungwali mo sa ne higig asa ka kaksag elim sihinugeg, sa ne flanam kigmog elni ninga la fwahani asa ehengel mingnagim gafa ogfu goni.

<sup>3</sup> Afa ne KraiS Sisasna suialag ami lofegba asa ne kinigbi big mungwali flifi.

<sup>4</sup> Ne anwenafeg amina niheba enaig eseg. Amiba ogohba eba mas ming gafugafe asa ehe membeg heafna misog el ehem suialag onai.

<sup>5</sup> Afa el gosisba ofibi sa ma gosisna nihem patalfui. Afa ne enag nihem patalfuiag fwainigba eheba mas prais fli.

<sup>6</sup> Afa el asa asom fwina ehge pusefeg enag el fane mo ehe gof falambfe.

<sup>7</sup> Sa ne kana hwa lasug mom numwehe onigim afa Ainiyag nem kweagfuiba sa ne enag mogum mungwali anwenafefe.

<sup>8</sup> Hwam sa ne onigi Sisasa KraiS eba Ju elni misog el Devitna simbeg sa lahagim pese buihiag. Enag mo eba suialag mo ka sihiageg.

<sup>9</sup> Afa ka enaig suialag mo sihiagegba asa ka kinig flagim afa kam kikenageg ofenaiba kalabus el feg. Afa el mas Godna mo kwini.

<sup>10</sup> Afa ambangelim God sa kanog fwatig ka membeg ehengelim kwaganig. Asa mungwali kinig ka flagim ka mas enam oniginai afa ka enag kinigni gafugafeg. Ka membeg KraiS Sisasa ehengelim gafa sa ma pese lambi asa ehengel Sisasa nai yi wahkig suialag afofi.

<sup>11</sup> Enag mo eba nufunam feg;  
Afa big ehe i ahlahagwagiba  
asa big gafa ehe i nofkena hawag fufe.

<sup>12</sup> Afa big kinigni wasneig afohugba,  
asa big gafa elni numwehiageg misog el ehe i ahfefe.  
Afa big ehem masig fatigba,  
asa ehe gafa bigim masig fatife.

<sup>13</sup> Afa big enaig sihi fwahaiba og ka ehem patalkuiagim eba big mas enaig esei,  
Afa heafna mo ehe sihi fwahag eba ehe nufunam esefe.  
Asa ehe mas heafna mom mwakwale.

*Pol Timotim sihina suialag gafugag el sa ne goh*

<sup>14</sup> Sa ne elim hwa mo fasihin fegofum masa ehengel etetifi. Afa Godna nof la sa ne ehengelim enaig wasneig mo faig. Nofeka mo behigim moanagi. Enag mas elim kweagfui amo eba amban el sa higig ehem amtakwale fatig.

<sup>15</sup> Sa ne Godna nof la suialag gafugafe sa ma God neana gafugagim suialag onai. Afa enaig gafugag el mas heafna

gafugagim afwanfe afa ehe Godna nufunam mo ugwe si-hifefe.

<sup>16</sup> Afa mo behig mas Godna onigigim patalkui sa ne enaig mo mas fatina. Afa enaig mo elim hugfu lambkug asa Godim mas fatinagim gwesim ikawo.

<sup>17</sup> Afa ehengelni mo eba nehugug weti fegim afa ik-agim ningiel lofeg. Afa sambaganingi el enaig ahfeg eba Himeneus i afa Filetus i.

<sup>18</sup> Afa ehengelni nufunam mo ahfwahagim afa ahsog, “Ati big biteg kife nai buguiagafeg asa big mas pese buguiagafe.” Afa enag mo mingnag elni olug onigigim amtakwale fatinig.

<sup>19</sup> Afa Godna nufunam mo eba wasneig sumul lofeg mas wokukgei. Enanai yi hwa mo ginofig og, “Ainiyag ati anwenafeg amban sa heafna elbi.” Afa ming mo enaig esog, “Amban el sa enaig esofe kaba Ainiyagna el sa ma amtakwaligim mas fatinai.”

<sup>20</sup> Afa kig elni lala la haig haig dis i kaf i afogwa. Mingnag eba gol nai yi afa silva nai yi gafugafig. Enaba suialag gafuga la lambigim enanai yi gafuga fiahgig. Afa mingnag eba bite nai yi afa li nai yi gafugafig. Enaba esug lambigim enanai yi gafuga lambfiahfu.

<sup>21</sup> Eba enaig eseg el asa amtakwalig nihem mas fatig. Ehe Godna nof la afsug goh asa God ehem suialag gafuga la lasug. Afa Ainiyag mangwal gafugag ehem faig enag el ati numwehe gohugum asa ehena suialag gafugag fenag.

<sup>22</sup> Afa kwablog elni amtakwalig nihem nangunam sa ne embem ika. Afa suialag nihe, olug onigig nihe, mingnagim membenig nihe, afa olug enesiegna gohug nihe sa ne enaig nihem wasnei patalku.

<sup>23</sup> Afa el maia mo behig mom moanagiafufiba ena mo higi sa ne kwagani ika. Asa ne anwenafeg enaig mo la eba malwo fapugufe.

<sup>24</sup> Afa Ainiyagna gafugag el nofeka ninimu el goh. Amo, eba ehe sa ma mungwali elim suialafiahge afa ehe suialag ogfuiag el fenam sa ma nengigim sihinuge.

<sup>25</sup> Afa tohiawagig el ehena mo filafifi asa ehe aflanam ehengelim sihinugenam asa ehengelni onigigim numwehe nugefe. Afa ehe membeg sa ma God ehengelni onigigim waikafenibi sa ma nufunam mo anwenafi.

<sup>26</sup> Satan ati ehengelim lambigim asa ehengel ehena onigigim patalfug. Afa ehengel suialag onigig pese finim afa ambegba eba enaig ehengel Satanna wegmusum fwahi ambeg.

### 3

*Bite awaiegim muhla ofefiba haig haig amtakwalig nihe pugufe*

<sup>1</sup> Sa ne numwehe hwam anwenafi! Afa maia bite awaiegim muhla ofefiba eba kaksag kinig nemug pugufe.

<sup>2</sup> Afa el enaig esifi hefum membug figim afa kig fligim fwina onigig. Afa ehengel heafna unehlagim fingi finim afa fwina tonbusiagifi afa molamp mo sihiagefufi, afa afahumonigim filafe gonifi, afa mas nem suialag onai, afa Godim mas fatinifi.

<sup>3</sup> Afa ehengel mas mingnagim membegoni afa afla fegoni. Afa ehengel elim munum sehi gonifi afa ikagna ninimugum asa mingnag elim kwagaitifig. Afa ehengel suialag nihem olug kakag finifi.

<sup>4</sup> Afa elim mwauwi gonifi afa ikagna heafgelni amtakwalig onigigim patagfufi afa hefum sogofe kaba saglag kwania ofi. Afa ehengel membenim heafgelni eligim mungu sifakalififi afa Godim mo mas membi.

<sup>5</sup> Afa ehengel mwakwalinim og kagel ati Godim patalfug afa Godna wasneigim mas fatigim. Sa ne enaig elim membi fegoni.

<sup>6</sup> Afa mingnag enaig el lala naim mwakwale gonigim. Afa angwafig sa mas sawiegim numwehe aflag mo. Afa enaig angwafig heafna nufwefum olug kiniagegim asa ehe haig haig onigigim patalfug asa enaig el enaig angwafigim mwakwale gonigim.

<sup>7</sup> Afa enaig angwafig mulug onigig ona fli afa ehengel mas ihlafi nufunam mo anwenafigim.

<sup>8</sup> Autunam Janes i afa Jambres i Mosesim ahpigauwpwina afa sonaig el nufunam mom gwenaig esig. Afa enaig elni onigig eba ati amtakwalig afa ehengelni olug onigig eba mwakwalig.

<sup>9</sup> Afa ehengelni gafugag mas kwania fei afa ehengelni amtakwalig onigig ambala puguiba asa mungwali el anwenafifi sa enaig autunam Janes nai yi Jambres nai yi puguni.

*Pol Timotim sihina Godna mo sa ne numwehe kehla*

<sup>10</sup> Afa autunam ne ka i ahwagfena asa ne kana mo mi afa nihe mi ne nanguna. Ne kam anwenafena, kana onigigim afa kana olug onigig eba wasneig afa ka mas ikagna ninimu i afa ka elim membenig afa ka mas kinig yi pei,

<sup>11</sup> afa susug ka lambig afa haig haig kinig kam pugunagba asa ne mungwali enam anwenafig. Afa mungwali kinig asa ka flana Antiok la afa Aikoniam la afa Listra la asa ne gafa anwenafeg ka enag kinig i ka wasneig gohna. Afa Ainiyag enag mungwali kinig yi kam kweagfuna.

<sup>12</sup> Afa amban el sa membeg KraiS SisasiM patalku afa suialag nihem esegba asa mingnag el enaig elim kinig faifi.

<sup>13</sup> Afa amtakwalig elni afa mwakwalule elni gafugag eba amtakwalig asa ikan fwina kwaniafefe. Afa ehengel elim mwakwale gonugbi afa mingnag el ehengelim gafa gwenaiG esegonig.

<sup>14</sup> Afa neba nufunam mo el nem ogfunig afa ne wasnei kehlanam sa ne ena mom wahkig patalkuiefim. Afa ati ne anwenafeg neana ogfuiag el eba suialag el.

<sup>15</sup> Afa maia ne wesigig ofefenaba ne Godna buk la mom onigina. Afa enag mo ma nem suialag onigig fai asa ne anwenafeg el asa KraiS SisasiM olug oniginag God ehem pese flafe.

<sup>16</sup> Afa mungwali mo Godna buk la asa goh eba ehe upuguna. Afa enag mo suialafegim enaig eseg nufunam mo ogfunig, afa amtakwalig onigigim lakininig, afa amtakwalig nihem numwehenugeg, afa suialag nihem ogfug.

<sup>17</sup> Afa enag mo Godna elim mungwali ihlafenig asa ma ehe mungwali haig haig suialag gafugafifi.

## 4

### *Pol Timotim sihina wasneigni sa ne Godna mo sihiage*

<sup>1</sup> Afa autunai la KraiS Sisas pese blonam asa nofkenagag el mi afa pigieg el mi mungwali kwefihiagefe. Afa enanam ehe mungwali elni misog el fefe. Afa enam pugufe asa Godna i Sisasna i nofla ka nem enag wasneig mo faig.

<sup>2</sup> Sa ne Godna suialag mo sihi. Afa el sifakale flai me awai awai me sa ne wahkig sihinug fiahkafim. Afa elni amtakwalig nihem ambala ogfuni afa amtakwalig onigig safig sa ne lakinini afa suialag onigigim eba sa ne wasneihiage. Sa ne aflahlanam ogfunuge afa ne sihini sa ma enam anwenafi.

<sup>3</sup> Afa enaig pugufe asa el nufunam mom higigim yiskosifi. Afa ehengel membig haig haig mwakwal mo higigim asa ehengel kaksag ogfuiag elim awamogonugim og ma ambe ena mwakwal mo sihiagibi ka sa higim.

<sup>4</sup> Afa ehengel nufunam mo fwahinim afa mwakwal mo el asa sihiagig ena mom ugwe onigifi.

<sup>5</sup> Afa nimbefum mo numwehe gofiba mangwal sa pugufe, afa maia kinigbi nem pugunaiba sa ne wasnei goh, afa el Godna suialag mo sihinugeaka sa ne gafa gwenaiG gafugafe, eba gafugag God asa nem faig eba neana gafugag sa ne mungwali enaig ese.

### *Pol enaig esog kam lahagim muhla ofe*

<sup>6</sup> Afa osu muhla ofe kaba lahafe eba ofenaiba sis asa suwi la tuhufugum Godim faig.

<sup>7</sup> Afa gafugag asa God kam faig ka wasneigim mungwali eba enam auguiageg asa ofenaiba el kikini ika gof pugug. Afa kana suialag olug onigig mas ka fwahana mo.

<sup>8</sup> Asa kikini gosena prais kam nengenawo eba ka ika flafe. Afa maia Ainiyag mungwali elim suialag kwefihiage ofefiba afa enanam enag prais ka flafe eba God kam og ne sufniag el feg. Ehe mas kam mungu ese nai amo eba mungwali el heafna pese blogum enam membigim asa nenge afla asa enaig elim gafa gwenai g esenifi.

*Pol Timotim sihina og sa ma ikagna bloi*

<sup>9</sup> Nofeka oksi, sa ne ikagna ka nangum blo.

<sup>10</sup> Afa Demas ehe bitenai gawigim fwina membegim asa kam fwahagim Tesolanaika kembang gam ikag. Afa Kresens ehe Galesia kembang gam ikag afa Taitus ehe Dalmesia kembang gam ikag.

<sup>11</sup> Afa Luk mungu ka i hawag. Afa sa ne Makim sugflanam sa ne ahblo asa ehe kam gafugam kweagfui.

<sup>12</sup> Afa ka Tikikusim Efesus kembang gam ninghiag.

<sup>13</sup> Autunam ka nineg lofug Troas kembang la fakag asa ne Karpusum nangunam asa kana flaublu. Afa kana buk gafa sa ne flaublu. Ka fwina membeg enag buk sa sis lofugna gafugafig, nofeka eteti.

<sup>14</sup> Afa Aleksander eba kapa gafugaule el ehe kam fwina amtakwal fiahflag. Afa sumi yi Ainiyag ehem mungwag enaig esenafe.

<sup>15</sup> Afa ehe kagelni mom ona fwina pigalampi asa ne ehem numwehenafiba.

<sup>16</sup> Afa ilawana ka kot la sihiag ofefnaba ka kike mungofena afa mungwali el embem afuna asa kam mas kwefuni mo. Afa ka membeg God nofeka enag amtakwalig ehengelim mungwag eseni.

<sup>17</sup> Afa Ainiyag ka i ahgohugum afa kam wasneig faigba asa ena wasneigni ka mungwali suialag mo afwambanai elim sihinugenaba sa higeni. Afa Ainiyag kam kwefugba asa ka lahagna mina nai pugug.

<sup>18</sup> Afa Ainiyag kam haig haig amtakwalig kinignai flafe asa kam ugwe wanikifenam heafna heven lanai bog meg la seaifufe. Asa big heafna unehlagim wahkig fingi fi fufum. Eba nufunam.

<sup>19</sup> Sa ne Prisila mi afa Akwila mi enaig esogoni ka mas eheningim etetinig mo afa Onesiforusna lala nai el mi gwenai g esogonifi.

<sup>20</sup> Erastus ehe Korin kembang la mahi ga. Afa Trofimus ehe gihegba asa ka ehem Miletus kembang la lasug blog.

<sup>21</sup> Nofeka mahi fefim masa bu was puguiba asa neana minam kagfufe. Afa Yubulus, Pudens, Linus, Klodia afa hwag el nem enaig esonig ehengel nem mas etetinig mo ehengel nem bwatunug afa mungwali nilite nem gwenaiig esonig.

<sup>22</sup> Sa ne Ainiyag ninga la gofum afa heafna aflafeg sa ma nengel nai yi mungwali gofi. Gwenaho.

## **Mo Pol Ginofena Taitusim Ningihiana Hwa buk enaig esog**

Taitus eba afwambanai el fena asa ehe olug waikafenam afa Polna gafugagim kwegfuna. Afa eba enaig feg Pol Taitusim Krit ailan la lasunaba sa ehe siosna gafugagim ena nai yi nagwagihagegofna.

Afa lasflam ginof enaig esog, og Krit elni nihe mas suialag feg mo. Afa siosna misog el ena nai yiba amban elbi ogofiba sa ma suialag nihem patalkwi. Afa sumi yi Pol mungu mungu saglag mi afa angwafig mi ogfufenag nihe Taitusim sihina. Afa ehe og enaig el eba watiauwug afa kwablog afa esug gafugag el sa ne ehengelim ogfufenuwage. Afa sumi yi ginof eba enaig esog. Taitus sa ma mungwali saglagim afa angwafigim mungu olugni ahwagigim ogfufenuwage. Afa ehengel sa mingnagim suialag nihe fegonig afa ma sa hefum flafihianim afa moanagife.

<sup>1</sup> Ka Pol hwa mo ginofeg. Afa kaba Godna gafugag el afa Sisas Kraiswa kanog fwatig el. Afa God kam kanog fwahagim afa kam ningihiag asa ka enaig gafugafeg. Afa elim God asa kanog fwatig asa ka ehengelim kwaganig asa ehengelni olug onigig sama kwania fei afa nufunam mo ogfunig asa ehengel suialag nihe patalkui. <sup>2</sup> Autunam nemug God ati sihi fwahag afa heafna mo mas mwakwalei ehe og ka ma nengelim wahkig nofkenagag faife. Afa enag mo eba bigelni olug onigig mog mo feg. <sup>3</sup> Afa enanam suialag osuna mungwali ati numwehiagini afa heafna mo ambala puguna. God, bigelni kwaganig el feg ehe kam enaig gafugag faig asa ka heafna mo sihiaka.

<sup>4</sup> Afa ka Taitusim ginofenag afa heafna olug onigig enaig eseg eba ka i mungwalofug asa ehe kana leg lofug feg. Ka membeg Api God afa Sisas Kraisa bigelni kwaganig el ahfeg eheningi nem suiala ahfenife. Asa olug enesieg afa God esmunagim nem kwaganife eba nem enaig esenife.

### *Siosna misog elba haig el maia*

<sup>5</sup> Afa ka nem ailan Krit la lasu fwahaniba asa ne enanai yi gafiba afa siosna gafugag numwehiage. Nofeka kana mo eteti sa ne siosna saglag elim mungu mungu kembang kanog fwatiakag. <sup>6</sup> Afa siosna saglag el mas mangwal amtakwalig haig esig mo eheba sama suialag nemug fei. Afa enag el sama angwafig mungunafei afa heafna luwalig sama



Godim olug onigini afa mingnag el heafna luwaligim enaig esogoni og ehengel alagna mo patalfug afa ehengel mas haig haig esi. <sup>7</sup> Afa enag siosna misogyn el Godna gafugag nangwahiageg asa ehe mas mangwal amtakwalig haig eseg mo. Afa enaig el mas tonbusug fei afa mas ikagna ninimu i afa mas numwehe uflog bu ne afa mas elim kwagaitifei afa mas amtakwalig nihena kig flai. <sup>8</sup> Afa ehe elim kwaganiule maia membi ambegoba afa suialag nihe membeg afa hefum numwehiefku afa heafna nihe suialag afa ehe Godna nihe mo patalkug afa ehe fwina wasneig el enag suialag mina patalkuia. <sup>9</sup> Afa ehe mog mo asa flag sama fwina suiala keahlafei asa ehe mingnag elim kwagani sama nufunam mo anwenafi. Afa amban og ka Godna mo filafefe afa enag saglag el sa ne ikanam enag mog mo sihinage asa ehena amtakwalig mo filafati.

<sup>10</sup> Afa kaksag el kana mo masigim fatig afa enaig elni mengigba eba busewug lofug. Afa enag mwakwal el elni onigigim gasafiahnugifi afa nubwel Ju el Sisasim olug onigigim asa enaig esig. <sup>11</sup> Asa ne ehengelim kwegonibi masa sihiagifi. Afa masa ehengel enaig amtakwalig mo ofgugonife asa alagna luwaligna ena mo higigim onigig fingi fig. Ehengel kigim onigigim asa mwakwal mo sihi ambeg gohug. <sup>12</sup> Autunam nihe mo sihiaule el eba ehe Krit la nai ehe enaig esog, mungwali ailan Krit la nai el eba mwakwal el afo afa enaig amtakwalig sangwalinai sis lofug fig afa gafugam yiskos fiahgigim ahgagim mungu onig ga fla. <sup>13</sup> Afa enag mo eba nufunam asa ne wasneig mona laginibi sama ehengelni olug onigig suialafei. <sup>14</sup> Afa haig haig mo ehengel mas higi. Afa mingnag el nufunam mo masigim fatig asa wasneig mona ka nem faigog afa nofeka ehengelni mom patag afu. Afa nofeka enaig mo afa Juna wahigna mo fwina keahli. <sup>15</sup> Afa amban el heafna onigig eba suialafeg asa haig haig mungwali heafna suialafeg. Afa amtakwalig el mas Sisasim olug oniginai afa haig haig mungwali heafna mas suialafeg mo. Afa heafna onigig asa amtakwalig afa mas kwefihiage mangwal suialag afa mangwal amtakwalig. <sup>16</sup> Afa heafna mengigna mo og ka Godim anwenafenag asa heafena nihe ofgug eba Godim masig fatinag. Afa ehe totohiawagig el feg asa suialag nihe mas ehem ihlafenag mo enaig esegim.

## 2

### *Suialag mo sa ne patalku*

<sup>1</sup> Afa ne Taitus asa ne elim sihinig enag mo sama Godna nufunam mog mo mungu lofei. <sup>2</sup> Asa ne saglagim enaig esoni numwehe nimbiafna nihem onigiwage asa mungwali

el nem enaig esoni neana mo eba nufunam. Afa ehengel hefum numweheagig afa heafna Sisasim olug onigig eba suialag afa ehe mingnagim membegoni asa kinig ehengelim pugunibi sama ehe wasnei afofi. <sup>3</sup> Asa ne mungwa mo wati-aug angwafigim sihigoni ehengel sama wati-aug angwafigni nihem patalfui afa ehe mas mwakwal mo sihiagi afa mas elim munum sehtigi afa ehe mas numwehe uflog bu ne. Afa heafna nihe mo nem ogfunig eba suialag. <sup>4</sup> Asa ma ehe angwaming angwafigim sihigoni nimbiafna alagagim afa luwaligim sa ne membeni. <sup>5</sup> Afa nimbefim numwehiagig afa onigig suialafi afa ne gafugam keahli afa nimbiafna alagagna mo ahnai skaufegoni asa ne enaig esigbi afa el ne nangwagnim asa mas Godna mom molamp oni.

<sup>6</sup> Asa kwablog elim gwenag sihifegonigi nimbiafgelni elig mi afa onigig mi sa ne numwehe lamfifim. <sup>7</sup> Asa Taitus ne gafa suialag nihe sa ne ogfuni sama el enam nangunim asa suialag mina patalfui. Nofeka gosis mo sihi afa neana moba saglagna mengig sa ne fla. <sup>8</sup> Afa neana mo ambala fegba afa el nem og ka nem filafefe afa ehena mo awai bigim kufenigim asa ehe afwanefug flag.

<sup>9</sup> Afa ne esug gafugag elim sihigonig ehengel sa enaig esi, heafgelni misog elim ahnai skaufini afa nofeka ehem mo pese waikafe haig esogon afa misog elni gafugam suialafinibi eba ehe nengelim sifakalinife. <sup>10</sup> Afa nofeka misog elni mangwal ukwefena. Afa ehe nengelim ati anwenafenig nengel suialag el afa nufuna gafugaule el afa ehengel enaig esibi asa Godna mo fingi fife.

<sup>11</sup> Afa God membeg mungwali bigelim amtakwalig elim pese lambig asa God esmunagim bigim kwaganig afa ilawo enag kwefwag ati ambala pugug. <sup>12</sup> Afa God enaig eseg sama bigel suialag mina patalfui. Suialag minana nihe enaig eseg. Nofeka Godim masigim fatinam afa bitenai onigigim fla. Asa befum numwehiagenam afa suialag nihe hwa bite la sa ne enaig ese. <sup>13</sup> Afa maia big enaig esibi asa big nengia afofufiba asa suialag osu pugufe. Afa enag osuna Sisas wasneig ni afa heafna ombusug na asa blofe. Afa ehe eba bigelni wasneig God feg afa kwaganig el feg. <sup>14</sup> Afa bigel amtakwalig esigbi afa ehe blogim lahagim asa bigim lambig asa bigelni amtakwaligim huguflafatig. Asa big heafna el mungu afohie afa bigelni sawieg suialag nihem big esig.

<sup>15</sup> Afa enag mo sa ne saglagna mengig lofug fei. Afa neana mo sama enaig ese mingnag elim mo kwaganig afa mingnag elim mo lagnig. Afa el nem enaig og ne saglag mo masa ne ehengelni mom higinam fwahafe.

### 3

#### *Mango nihe kristen asa esifi*

<sup>1</sup> Afa elim sa ne nangwahiageg asa ne enaig eson ehengel sama gavmanim afa misog elim ahnai skaufegoni afa ehengeln mo higigon. Afa sa ehengel ma numwehiaginim afofi suialag nihe esigim. <sup>2</sup> Afa ehengel nofeka amtakwalig mo mingnag elim enaig esegon afa nofeka ninimu mo sihi. Afa ehengel aflahlanam augui afa mungwali elim suialafehiagi. <sup>3</sup> Afa autunam bigelni onigig etetini afa bigel mo filafig afa big onigig mwakwal mom eba nufunam feg afa bigelni olug buihiag haig haigim asa hwa bite la feg afa enaig onigig bigim keahlag asa ofenaiba we bigim mong yi wegmus feg. Afa biafgelni nihe enaig esena mingnag elim olug amtakwalig fegoni afa enaig esogona bigel gafa sama enaig gawigna fei. Afa mingnag el bigim olug kakafegonug asa big gafa gwenai mungwag elim esegonug.

<sup>4</sup> Afa big enaig esini afa God bigelni kwefwag el feg afa maia heafna membug i afa kweafuiag i bigim ofgunigba <sup>5</sup> asa enaig eseg, ehe bigim pese lambig. Afa God mas bigelni suialag nihem onigini mo asa bigim lambig, amo eba awai. Afa bigel mas suialag nihem enaig esini mo asa ehe aflafegim asa bigim Satanna ninganai lambig. Afa Godna Sungwabug bigelni nufwehim buna suflag asa big enaig feg ofenaiba luwal weti afag ilawo wanigag asa big glaunai nofkenagag flifi. <sup>6</sup> Afa Sisas Kraisa bigelni kwefwag el feg afa sa enaig gafugafeg asa enaig feg el bu kwania sufugba asa God heafna Sungwabugna bigelim gwenai esenig. <sup>7</sup> Asa God bigim esmunagim kwaganig asa bigim nangwagig afa heafna nof la bigelni amtakwalig eba awai. Afa God enaig bigim esinigi asa big heafna luwalig fiahsaieg afa big enaig onigig finim asa nengiafufum asa wahkig nofkenagag big flifi.

<sup>8</sup> Afa enag mo eba nufunam. Afa enag mo sa ne keahlanam wasneigni sihi afa amban Godim olug onigig asa ehe suialag nihem fwina onigigim asa enaig eseg. Afa enag mo eba suialag asa elim kweafug. <sup>9</sup> Asa ne mo behig mo kwefuka afa mangofi ne nimbiafgelni simpna unehlagim sugu ambegim asa blog ilawo feg afa nofeka nimbefum moanaginim afa Mosesna nihe mom flafiahgi. Afa enaig moba eba mas fug lugui. <sup>10</sup> Afa maia amban el blonam sios elim kukoiti ofefiba asa ne ehem wasneig mo faiyiba sama fwaihi. Afa ne sambaganagim enag mo sihinag asa ehe neana mo high fwainig fefe eba sane ehem mas fatina. <sup>11</sup> Afa ne ati anwenafeg enaig elbi eba ofenaiba laig asa balekoblufeg mas ne pigapiga fenagenam afa suialafenage folfui. Heafna amtakwaligim eba ati ambala ofgug.

<sup>12</sup> Afa maia ka nem Artemas i me awai Tikikus i me ningihiaba afa ka membeg ne Krit fwahanam afa Nikopolis gam ika. Afa bu ofe gofiba ka gafa Nikopolis la gafife asa ne kam blo nangu. <sup>13</sup> Afa Senas eba gavmanna nihe mo anwena el. Ka membeg ehe mi afa Apolos mi sa ne eheningim numwehe gonibi sama ahkai afa mas mangwal awaiyeni. <sup>14</sup> Afa ne bigelni Sios elim sa ne enaig sihifen sa ma ehengel fwina suialag nihem gafugafi asa ehengel ma esug elim kwagani. Afa sa ma ehengelni nihe eba fug lugui.

<sup>15</sup> Afa mungwali el asa ka wanga enag og ka nem mas etetinig mo. Afa kana mangau sa ne mungu olug onigig elim gwenaig sihifenim. Afa ka membeg eba God nengelim esmunagim kwaganife. Gwenaho.

## **Pol Mo Ginofena Filemonim Ningihiana Hwa buk enaig esog**

Filemon eba saglag el feg afa eheba Kristen el Kolosi kembang la nai. Afa ehena esug gafugag el eba Onesimus asa ehe heafna misog elim fwahanam afa embem ming kembang ikana. Afa ena kembang la Onesimus ika Polim auflanam asa olug waikefena. Afa enanam Pol eba Kalabus yi gafnaba sa mas Filemon kembang gam ikana mo. Asa ehe hwa mo eba ginofe Onesimusim fainaba asa Onesimus pese heafna misog el nangum flakuna. Afa ena ginof la Pol Filemonim enaig sihifena og nofe ne nibeafna esug gafugag elimba ninimuafla. Afa enag esug gafugag el eba ati olug waikefeg. Filemon sa ne ehem pese sugiafla ofenaiba nembiafena nilitem ne pese sugiaflag.

<sup>1</sup> Ka Pol Sisas Kraiswa kalabus el afa Timoti bigelni nilite hwa mo ninghiag. Filemon kana mangau mungo gafuganai el hwa mo ka nem ninghianag.

<sup>2</sup> Afa bigelni muwalig Apia mi afa Arkipus mi eba soldia kana gafugagam kweafug afa mungwali el neana lala laskuhlagim Sisasna unehlagim fingi fig afa ka membeg sa mungwali enag ginofim sama nangui.

<sup>3</sup> Ka membeg bigelni Api God afa Ainiyag Sisas Kraiswa eheningi nem suialafenafe. Asa olug fulufeg afa God esmunagim nem kweafufe eba nem enaig esenafe.

*Filemon eba Godna suialag el*

<sup>4</sup> Afa maia ka Godim sahnai afa ka nem oningim asa ka Godim suialag onag.

<sup>5</sup> Mo kam blonag afa ka higigim neana olug oningim Ainiyag Sisasim fenag eba suialag afa mungwali Godna elim ne membenig.

<sup>6</sup> Afa ka Godim sahnai asa ne suialag gafuga Godim fenafe asa kagel enaig esig asa ne mungwali suialagim fwina anwenafi afa maia ne Kraiswa mina la gofiba.

<sup>7</sup> O nilite, ne Godna elim suialag oningim fuklag lasanig afa ka onigim ne Godna elim membenig asa ka sifakaleg afa olug kam buhiag.

*Pol Filemonim sahna og Onesimusim pese sugiafla*

<sup>8</sup> Afa ne enaig eseg asa ka anwenafeg ne suialag el asa ka oksig enaig eteg lofug Sisasna unehlag la wasneig mo nem sihinagim.

<sup>9</sup> Ka nem membenag asa ka nem sahnag wasneig mona eba awai. Afa ka Pol kaba saglag afa ka Sisasna gafugam keahlag asa ka kalabus lala la go.

<sup>10</sup> Afa ka nem neana gafugag el Onesimusna mo sihinag. Afa maia ka kalabus lala goba afa ka ehem Kraisna mina ogfunag asa ehe kana leg lofug feg afa ka ehena alag feg.

<sup>11</sup> Autunam ehe mas nem ugwe kweafu feg mo afa ilawaba ehe kaningim ugwe kweafu feni fe.

<sup>12</sup> Ka ehem neana nangum ningihiag afa olug kana ehenai yi go.

<sup>13</sup> Afa ka oningig ka ehem wani yi wanigiafim sama neana kukim flai asa Godna gafugam kam kweafui.

<sup>14</sup> Ka mas nem mengigna esonai Onesimus kam wani-giagim. Ka nem nengena gofife maia nembe sawifeba. Ka membeg biningibi mungo oningig ahflai asa ne membeg og ka enaig ese.

<sup>15</sup> Ka oningig Onesimus nem mwakwalig fwahanam afa maia pese ne nangugim bloiba ne wahkig ahwagigim.

<sup>16</sup> Autunam Onesimus eba neana esug gafugag el afa ilawo ehe kana nilite. Afa maia ne enag esug gafugag elim nanguiba afa ne anwenafefe ehe Sisasna el eba neana nilite.

<sup>17</sup> Afa ne kam oninginam og Ka Pol i mungo gafuganai el asa ne Onesimus pese suguiaflag asa ne ehem numwehiafla asa ne kam enaig esenag.

<sup>18</sup> Afa ehe nem mangwal fenaiba afa kig neana esug flaiba asa kam sihinaiba ka sa kike nem mungwag fai.

<sup>19</sup> Sa nangug kike ningana ginofe ka Pol nem mungwag faife. Nofeka eteti Godna mina esmunagim ka nem ogfunag asa ne nofkenagag fla. Afa ne kam mas enaigim mungwag fai mo.

<sup>20</sup> Afa nilite Ainiyagna mina patalku afa etegim enaig esegba asa kana olug sifakalefe.

<sup>21</sup> Afa ka anwenafeg enag mo ka ginofegba afa ne higinam esefe. Afa ka anwenafeg ne gwesim nimbiafna oningig la gafugafiakafe.

<sup>22</sup> Afa ming mo ka nem osihina kana kugum numwehi-agefiba. Afa ne ati Godim sahnagba afa ka oningig God neana mo higinag eba mas mungwanamfei ka kalabus lala fwahanam neana nangum blogim.

<sup>23</sup> Epafra ehe gafa Sisas Kraisna gafugag el asa ka kalabus yi mungwal ahwag. Ehe nem og ka mas nem etetinag mo.

<sup>24</sup> Afa mingnag el Mak, Aristarkas, Demas, afa Luk asa ka mungo gafuga la afo ehengel gafa gwenag esogog.

<sup>25</sup> Afa ka membeg Ainiyag Sisas Krais esmunagim nenge-lim kuganife.

## **Siosna Misog El Hibru Kristen Elim Ginofeni Hwa buk enaig esog**

Afa hwa ginof Kristena olug onigigim kweganig. Afa mingnag Kristen ogna heafgelni olug onigigim fwahi maia mingnag el ehengelim pigau pegonigba afa kinig faigonig. Hwa buk ehengelni olug onigigim wasnei hianigeg afa ehengelim kwania gafugag ofgunig asa God Sisas Kraiss nai yi esena. Afa Kraiss mungu feg bigim God na nufunam minaba ofgunig.

Hwa bukba sambaga mungu mog mo sihig. (1) Sisass eba nufunam Godna Leg feg. Maia Sisass bite la gofenaba afa ehe kasag kinig flana afa kwania susug kahalana. Afa enag mina la, God Sisass esenaba lasflam asa bigim mungwali elim kwaganig (2:10) Asa Sisass fwina kwania fegim afa autunai Godna mo fli sihiaule elim gosenig afa oflanai elim gafa gwenaign esenig afa Mosesim gafa fwina kwania fenagim gosenag. (2) God ehe Sisassim gisfu fwahag sa ehe prisni misog el feg sa wahkig gofife. Afa ehe Ju elni misog Prisim gosenig. (3) Sisass eba misog pris feg ehe heven la go, afa eheba kwania fegim sa elim pese lambife amban sa nufunam ehem olug onigignag. Afa Mosesna nihe mo i afa Ju elni lofuna nihei eba sugwagim ofgug kwania gafugag Sisass sa esena.

Hwa buk eba elni olug onigigim wasneihugeg asa kaksag mo sihiageg autunam Israel elni olug onigigim wasneinugena asa enam ofgug. Saptas 11 eba enam sihig: Afa ming mo enaign esog afa haig haig kinig negelim pugunifiba sa ne nimbiafna olug onigigim mo fwina suialag kehlifi ufufum sa lahag nem pugunife. Afa negelni nofug sa ne Sisassim nangwafufum afa heafna nihem patalufui asa kinig i afa susug i mas negelni olug onigigim enam filafati (12:1-11).

### *Sisass Kraiss Godna Leg oflanai elim gosenig*

<sup>1</sup> Autunam God bigelni Ju elni simbianigam mo faigim Godna mo fli sihiafule elni mengig la sihi fwahafena. Afa haig haig was mi afa haig haig mina mi God sihi fwahagim

<sup>2</sup> Afa glauwo awaiegim osuna muhla fegim ofeba God heafna Legna bigelim sihinig. Afa ena Luwalna ehe mungwali gawig eseageg fwahagba afa maia sumi yi osuna awaiegim ofehba God ehem ati gisfu fwahag asa ma ehe enaign gawigim lambife.

<sup>3</sup> Afa ena Luwalba eba God lofug mungwalofug asa ehe Godna ombusugug ogfufe. Afa heafna wasneig mo mungwali gawigim kike lambku gufufe. Afa ehe maia elim mina gafugagfenibi asa afsug fifi ehe ati heven gam ikag Godna sisi yi nemugna pegag sime muhla la go.\*

<sup>4</sup> Asa ehe oflanai elim gosenig. Afa unehlag God ehem faigba eba oflanai elni unehlagim gosenig.

<sup>5</sup> Afa enag moba Sisasna unehlagim fingi fukug afa God mas oflanai elim enaig esonig mo ehe enaig esog;

Neba kana Leg feg afa hwag osunaba ka ambala sihig ka neana Alag fefe. *Sam 2:7*

Afa ena gafa mas enaig moba oflanai elim esonig mo;

Eba ka ehena Alag fefe afa ehe kana Leg fefe. *2 Sml 7:14*

<sup>6</sup> Afa God goflanai Luwalim onigihiafiba asa ehe enaig esofe og

Sa ma mungwali Godna oflanai el ehena unehlagim fingi fi.

<sup>7</sup> Afa oflanai elbi eba God enaig esonig;

Ka kikeafna oflanai elim esenibi sa ma efef lofi afa enag gafugag el sa ma suwi meleg lofi. *Sam 104:4*

<sup>8</sup> Afa Luwalimba eba God enaig esog;

Neba God feg asa ne wahkig misogyn el gofufe afa ne mungwali elim numwehe kwefihiafenam afa nangwagihiafefe.

<sup>9</sup> Afa suialag nihe mo ne membeg afa amtakwalig nihe mo ne olug kakagenag. Asa kaba neana God ka neana unehlagim fingi feg afa sa neana sifakaleg kwaniafeg. Afa ne nimbeafna hihem gosenig. *Sam 45:6,7*

<sup>10</sup> Afa God heafna Legim mingnag mo maisim sihinago og;

O Ainiyag, autunam ne hwa bitem esegba afa nimbiafna ningana ne ofum eseg fwahag.

<sup>11</sup> Afa enamba eba awaife afa nimbiafba ne wahkig gofufe. Afa enamba ofenaiba lofug watiauegim afa piplehiagofe.

<sup>12</sup> Afa ne mumwanefku fakafe ofenaiba el lofug huguflakagim afa yimieg fatig. Afa ne gwese gofufe afa ne mas watiauwe. *Sam 102:25*

<sup>13</sup> Afa God heafna Legim enaig esonag og;

Sa ne kana muhla pegaiba ka maia neana angoluwegim filafe klaitiba sa ma ehengel nem ahnai skaufini. *Sam 110:1*

Afa sonaig moba God mas oflanai elimba esonig mo.

<sup>14</sup> Afa mungwali oflanai el eba sungwabug figim afa Godna gafugag el fig. Afa sa God ningitigiba elim God sa ona lambim enam kwaganig.

\* **1:3:** Afa el muhla God nai yi go eba ogfug enag el eba suialag unehlagna feg.



## 2

*Nawo nufunam mom numwehe fli*

<sup>1</sup> Afa enaba nufunam Sisas oflanai elim gosenig asa big kristen el enag mom higinim enam na numwehe fli, masa big fwahini membififie.

<sup>2</sup> Afa autunam God Mosesim nihe mo oflanai elni mengig la faina afa enamba nufunam feg. Afa sa el amban nihe mo patalkuiag fwainigfefe eba susug amtakwalig ehem mungwag faife.

<sup>3</sup> Afa God bigim lambig eba fwina suiala feg afa Ainiyag ehe enag mo bigim faig asa el ena mom higig eba bigim sihigonigbi enamba nufunam. Afa big Ainiyagna mo yiskosigbi eba bigelni mina awai susug amtakwalig mungwag faig mina kwegfukagimba.

<sup>4</sup> Afa enanam God haig haig kigmog ogfugim afa heafna sawieg la elim heafna Sungwagbugni wasneig mimagenig. Afa ehe enaig eseg asa ehe gafa ogfunig ena mo nufunam feg.

*Sisas el fegim afa mina tohlagba God bigim lambigim*

<sup>5</sup> Afa sa big onig mulug auguiag pugunife enamba God mas oflanai elim nangwaghiageg gisfu fwati.

<sup>6</sup> Amo eba Godna buk la mingnag mo enaig esog; Elbi haig feg asa God ehengelim oniginig. Eba neana nof laba weti feg afa ne kwegfug.

<sup>7</sup> Afa mwakwalig ehengel oflanai elim skau fegonig afa ne ehengelim fingi fegonigbi afa ehengelni unehlagim kwania fenig.

<sup>8</sup> Afa ne mungwali gawig fakagba asa enag ehengelim ahnai skau fegonig. *Sam 8:4-6*

Afa enag mo enaig esog God elim esenagba asa ehe mungwali gawigim misogyn fenig. Afa glauwo el mas enaig gofi.

<sup>9</sup> Afa eba big Sisasim onigig. Afa mwakwalig ehe oflanai elim skau fenig afa God oagna elim esmunagim kwagan asa Sisas lahag elim pese lambigim. Afa ehe susug flagim lahag asa God ehem fingi feg afa ehena unehlag kwania fenag.

<sup>10</sup> Afa God mungwali gawigim ehe mog feg afa ehe mungwali eseageg. Afa ehe oagna heafna kaksag luwalim lambinam asa wangafim. Asa Sisasim fwahagba ehe lahagim susug flag afa enag susugba ehem ihlafenag asa ehe Godna minam tohlag. Afa Godna enag nihe eba suialag.

<sup>11</sup> Afa Sisas maia mina tohlagba asa el Godna nof la afsug nemug afohie. Afa ehe amtakwaligim huguflaitinig. Afa ehe

feg afa sonag el fig eba mungu Alagna fig asa ehe ehengelim nilite seflagim afa ehe mas enam ningmange.

<sup>12</sup> Afa autunam ehe Godim esonag og;

Afa sa ka kikeafna nilite nai yi neana unehlagim ambala upugufe. Afa maia ehengel laskuhlaiba sa ka nem mwanifi fatinafe afa neana unehlagim fingi fukukufe.

*Sam 22:22*

<sup>13</sup> Afa ehe pese esog;

Ka Godnai yi nisihlagofufe.

*Ais 8:17*

Afa ming mo enaig esog;

Ka wanai yi wanga afa God luwalim kana ninga la fwatig.

*Ais 8:18*

<sup>14</sup> Afa sonag luwal eba el fig afa elig i afa tafna i fig. Asa Sisas gafa gwenai eseg ehe el fegim asa lahag. Afa heafna lahag eba lahagna misog el Satanism amtakwale fatig.

<sup>15</sup> Afa el lahagim embefigim asa wahkig Satanna esug gafugag el afohie afa Sisasna lahag ehengelim Satanna ninga nai pigi fwatig.

<sup>16</sup> Afa big anwenafig ehe mas enaig eseg mo oflanai elim kwagani, amo ehe ogna Abrahamna luwaligim kwagani.\*

<sup>17</sup> Afa ehe ogna elim kwaganam asa ehe el lofug pugunam afa ehe gwenai heafna nilite lofug fe. Asa ehe prisni misog el gohugim afa elim aflafenigim asa suialag gafugag Godna feg. Asa ma ehe elni amtakwalig nihem huguflaitini.

<sup>18</sup> Afa Satan ehem ati yuhnag kinig faig. Afa Satan elim yuhnagim asa ma Sisas sonaig elim kwagani.

### 3

#### *Sisas Mosesim gosenag*

<sup>1</sup> Afa kana nilite ne afsug kabag el fig asa God nengelim kanog fwatig heven gam afuiagim. Sa ne Sisasim onigi God ehem kano fwahag afa ehe prisni misog el feg asa ehe hwa bite gam pe blog. Asa big ehem olug oniginim kehli asa ehe bigim God nagum wankafe.

<sup>2</sup> Afa God Sisasim gisfu fwahanaba asa ehe Godna sawiegim numwehe patalkug ofenaiba Moses Godna elim kwaganam asa Godna sawiegim sa numwehe patalkuna.

<sup>3</sup> Afa el sa suialag lala nimblagba eba ehe unehlagba kwania flag. Afa elni unehlag lalam gosenag. Asa Sisasna unehlag gafa Mosesim gosenag.

<sup>4</sup> Afa mungwali lala eba el ehe enam gafugafeg eba God ehe mungwali gawig gafugafeg.

\* **2:16:** Abraham luwalig eba ogfug ambangel sa Ainiyagim olug oniginig.

<sup>5</sup> Afa Godna el eba Godna lala. Afa Moses eba enag lalanai suialag gafugag el asa ehe enaig esog mangwalim sa eba God sumi yi sihife.

<sup>6</sup> Afa Kraiss eba suialag gafugafeg afa ehe Godna Leg asa Godna lala misog el feg. Afa bigel Godna lala figbi eba sa big wasneinim afa ena onigig kehli ufufum ehe bigim suialafihigege.

*Bigel nofe nawo Godim masig fatini*

<sup>7</sup> Afa eba Sisas Mosesim gosenag asa ne Godna Sung-wabugni mo higig ehe enaig esog;

Afa atiaba ne Godna mo glau ohigfibi,

<sup>8</sup> nofekawo angug pupuhiagi ofenaiba nimbafgelni simbianga hosa ati enaig esini afa eba autunam ehengel tonbusug el fini. Afa enanam ehengel bite behig la auguiafenaiba Godim yuhni.

<sup>9</sup> Afa maia 40 yia fenaba ehengel kana wasneigim nanguni asa enanai yi ehengel kana wasneigim yuhni.

<sup>10</sup> Afa maia enaig esigbi na sa ka ehengelim olug kakagenig. Afa ka esog ehengelni onigig mas kana membugim wahkig patalfefu mo afa ehengel mas kana nihem anwenafig mo.

<sup>11</sup> Afa na sa ka olug kakagenigim afa ka wasneig mo sihi fwahanig kog, 'Ehengel mas ka nai yi hekuli!' *Sam 95:7-11*

<sup>12</sup> Afa kana nilite sa ne nimbefum mo numwehifibi masa ne nengelnai amban mungu amtakwalig onigig ehena olug yi goh, enag God wahkig gohugum masig fatinafe.

<sup>13</sup> Afa Godna mo enaig sihifeg og, "glau" gohnanam asa big mungwali osuna mingnag nilitem Godna mo kwaganim. Masa ambanim amtakwalig pugunam mwakwalenageba asa kiniafwahla feakafufe.

<sup>14</sup> Afa atiaba bigelni olug onigig gwese wasneig gohugba eba sa ma gwese gohun bigim lahai asa big Kraissna hihe nemug fefe.

<sup>15</sup> Afa Godna buk enaig esog;

Afa atiaba ne Godna mo glau ohigfibi, nofekawo angug pupuhiagi ofenaiba nimbafgelni simbianga sa ati enaig esini afa eba autunam ehengel tothiagig el fini.

*Sam 95:7-8*

<sup>16</sup> Afa ambangel maia Godna mo higinim masig fatini? Eba mungwali el gof lanai Moses lambinam Isipim fwahanam wankana.

<sup>17</sup> Afa ambangelim maia 40 yia laba God ehengelim olug kakagini? Eba Israel el amtakwalig nihe eseaginibi asa bite behig la pigina.

18 Afa ambangelim maia Godba wasneig moba sihi fwahanig ehe enaig esog og, “Ehengel mas ka nai yi hekuli”? Eba el asa ehem masig fwatinig.

19 Asa big anwenafi ehengel Godim mas olug onigini mo asa bite God ehengelim faig mas enanai yi afu saiyeenam hekuli.

## 4

### *Godna el hekulig flifi*

1 Afa glau enag sihi fwahag mo gwese goh sa ma big afu saiyeenam hekulifi. Asa numwehifibi masa nem enag mo ihlafenag fwainig asa ne mas sefunam hekuli.

2 Asa big numwehe Godna suialag mo higim afa eba autunam Israel el ena mo higinim mas numwehe onigini mo nasa ena mo mas ehem kwagana mo.

3 Afa eba bigelnai ambangel sa ena mo higinim afa onigig eba naho afu saiyeenam Godnai yi hekulifi. Afa God enaig esog;

Afa na sa ka olug kakagenigim afa ka wasneig mo sihi fwahanig kog, ehengel mas ka nai yi hekuli! *Sam 95:11*

Afa autunam God mungwali gawig eseagenam enanam ati onigi fwahana. Afa enag mo wahigifeg ming onigig ogfug.

4 Afa elegeg la gohug osunaba God ming mo enaig esog, “Afa God mungwali gawig gafugafeagenam asa elegeg la gohug osuna mo hekulena.”

5 Afa God ming mo enaig esog, “Ehengel mas ka nai yi hekuli!”

6 Afa gof lanai elbi eba ena suialag mo higinim afa ehe mas onigini mo asa mas ehengel saiyegegim Godnai yi hekulig mo. Afa enag onigig gwese gohunigbi eba mingnag el saiyeenam Godnai yi hekulifi.

7 Asa God ming osuna gisfu fwahagba enaba sefligbi eba ‘glauwo’. Afa ati managegba asa Devitna mo la God enaig esona afa enag mo ka ati ginof fwahag eba enaig esog;

Afa atiaba ne Godna mo glau ohigfibi, nofekawo angug pupuhiagi. *Sam 95:7-8*

8 Afa sa ati Josua elim wanika sefu wanhekulite eba God mas enaig esoite og ming osuna fefe.\*

9 Asa big anwenafi enag hekulig onigig gwese gohugba afa sa ma Godna el hekuli asa God enaig esena elegeg la gohug osuna ehe hekuli.

\* 4:8: Josua Israel elim Kenan gam wanikana. Afa ehengel mas numwehe Godna mom onigini mo asa Godna sihi fwahag mo God ehengelim esonig ehengel mas mungwali flini mo.

<sup>10</sup> Afa ambangel sa afu saiyeg hekulig eba heafgelni gafugagim hekulinig asa God gwenaig esena.

<sup>11</sup> Afa na fwinam esinim asa big afu Godnai yi saiyenam hekuli. Afa masa amban mungu simbianiga lofenam Godna mom masig fatinafe eba mas sefu hekule.

<sup>12</sup> Afa Godna mo fwina wasneig nemug feg afa eba mas esug goh mo. Godna moba pina kwinam sambaga signa fegim afa gwesim hilifeg. Asa kigim tofogim afa yugim higiafugim afa gwesim ikag onigig mi sungwabug mi kugufewagig. Afa Godna mo elni sawieg mi onigig mi kwefskofenig.

<sup>13</sup> Afa mungwali gawig God eseagegba mas Godna nofla meagam goh mo eba mungwali ehe ati anwenafeg asa bigelni nihe gafa bigna kwefihianugefe.

### *Sisas eba prisni misog el kwania feg*

<sup>14</sup> Afa Sisas eba bigelni kwania prisni misog el feg. Ehe Godna Leg fegim heven gam God nangum ikag. Asa bigelni olug onigig sa big sihiafu enam sa gwese kehli ufufim.

<sup>15</sup> Afa bigel prisni misog el eba mango mingnag pris lofug mo. Afa mungwali yuhnag bigim pugunigbi eba ehem ati enaigba puguna asa ehe mas haig esena mo. Afa ehe anwenafena bigel mas wasneini mo asa ehe bigim aflafenig.

<sup>16</sup> Afa Sisas eba bigelni prisni misog el feg asa big mas Godim ambe muhla fenigim embefig mo. Afa big ati anwenafig God sa bigim esmunagim kwaganife. Afa maia kinig bigim pugunibi asa enanai yi bigim aflafenim afa sa bigim esug kwaganig.

## 5

<sup>1</sup> Afa mungu mungu prisni misog elim God ehe kanog fwahag. Afa ehe heafna el nai yi blo pugugim asa el Godim gafugag finig enag ehe olyi fegim eseageg. Afa el maia sis i gawig i faigbi asa sonag el enaig gawig Godim faig eba elni amtakwalig nihe numwehenugeg namaunum.

<sup>2</sup> Asa el etetiagigim afa Godna minam fwahig afa enag Israel nai prisni misog el ehengelim aflahlana fenig eba ehe gafa mas wasneig mo.

<sup>3</sup> Asa enanam ehe sis tuhlu Godim faigim eba elni amtakwalig nihem numwehenugegim afa heafna amtakwalig nihem gafa eseg.

<sup>4</sup> Afa el heaba mas hefumba esoi og, ka kike prisni misog el fegim afa unehlana feg amo, eba God ehe mungu ehe enaig elbi kanog fwahag eba hosa ati autunam Aronim gwenaig esena.

<sup>5</sup> Afa Kraiss eba gwenais eseg mas heafna unehlagim fingi fena mo prisni misog el fegim. Afa eba God ehem enais esona og;

Neba kana Leg feg afa hwag osunaba ka neana Alag fefe.

*Sam 2:7*

<sup>6</sup> Afa ming buk laba God enais esog;

Eba ne wahkig pris gofufe ofenaiba Melkisedek. *Sam 100:4*

<sup>7</sup> Afa maia Sisas hwa bite la blo pugunam ehe ambwaitina Godim weanahlum sahna. Afa sa ma God ehem lahad mina fwahai. Afa ehe hefum sugupenam Godna membugim patalkunaba asa God ehem higena.

<sup>8</sup> Eba ehe Godna Leg feg asa ehe susug flagim lahad. Afa enag susug hefum ogfunag Godna nihem patalfuiagim.

<sup>9</sup> Afa eba ehe afsug el nemug feg asa el ehem patalfugba eba ehe wahkig gag mina feg.

<sup>10</sup> Afa God ehem prisni misog el kanog fwahag ofenaiba Melkisedek.

*Numwehi masa nengelni olug onigig penfie*

<sup>11</sup> Afa enag mo kaksag koka sihiage afa ka nem ogfuniba ne mas higen ne yiskosigbi nasa nem anwenag tumenig.

<sup>12</sup> Afa ne Sisasim olug onigini ati manageg afa mas ne elim ogfuiag el fig mo. Amo, eba el sa ma nem Godna mo ogfugonigi glawana fenam sa gwesim ikai. Afa ne mas wasneig fane neageg mo afa eba ne maisim tut ne go.

<sup>13</sup> Afa ambangel sa mas wasneig mo flig mo eba luwal weti lofug fig ehe mas numwehe onigig mo suialag nihem.

<sup>14</sup> Afa wasneig fane eba saglagna feg. Afa enais el eba heafgelni onigigim numweh lambfig mangwal sa suialag feg afa mangwal sa amtakwalig feg.

## 6

<sup>1</sup> Afa mas big mungu nai yi afohiefi, afa masa ne wetiklug mo Kraissna lambofufe. Sa big saglag el lofinim wasneig mo fli. Afa ena moba enais eseg asa big amtakwalig nihem lahad minam masig fatinim afa sa big Godim olug onigini.

<sup>2</sup> Afa bu la laitiag mo, afa siosna elim misog la ninga fakag mo, afa melig pigieg el bugiaga feg mo i, afa God elim kwefihiagenam asa mungwag faig gwese gofufe.

<sup>3</sup> Afa Godna sawieg fegba eba sa big enana fwahinim gwesim afuiafi.

<sup>4</sup> Afa el Godna haig haigim ati anwenafigim afa ehe Godim masig fatinig afa haiseg pese ambe mo. Afa sonag el heven la nai gawig fligim asa gihig. Afa Godna Sungwabugni wasneig gafa flig.

<sup>5</sup> Afa ehengel anwenafig Godna mo eba suialag feg afa ehengel enam nangug Godna wasneig eba nengigim ambala pugufe.

<sup>6</sup> Afa sonag el ehe ati sonaigim anwenafigim asa Godim masig fatinifug. Afa ehengel enaigba esigbi eba ehe Godna Legim peseg li katigeg la kahlibi asa Godna Leg elni nof la afwanefug flag. Asa ehengel haiseg Godna nangum pese ambe mo.

<sup>7</sup> Afa el eba bite lofug. Maia bu fe gohba asa bite bugegim afa fane puguiageg eba elim kweagfug. Enag bite eba God numwehe flag.

<sup>8</sup> Afa ming bite eba nasig we puguiageg afa enag aso eba amtakwalig enaba God amtakwaleg mo faigim meyi feg asa suwi enag asom lagefe.

<sup>9</sup> Kana hihe, ka nem hwag wasneig mo osihin afa ka mas nem esoni ati ka anwenafeg God nem lambinam suialafihi-agefe.

<sup>10</sup> Afa God numweheg kwefihiagegim afa mas nengelni suialag gafugagim eteti. Afa autunam afa glau feg ne Godna elim fakwaganifie enaba ogfug ne Godim fwina membenig.

<sup>11</sup> Afa ka membig sa ne gwenaiig gafugag gwesim fiafu maia ikan mungwali awaiegba. Asa suialagim ne nenge afofiba sa pugufe.

<sup>12</sup> Kamoksig nofeka yiskosiagi. Sa ne enaig esi hosa el Sisasim olug onigini afa wasneigim gwese afohieba nenge afo asa God mangwal sihi fwahagba ehengel enag lambig.

### *Mangwal God sa sihi fwahagba eba pugufe*

<sup>13</sup> Afa autunam God Abrahamim mo sihi fwahana. Afa ehe oagna unehlag seafla asa heafna mo wasneig fwahag. Afa mas ming unehlag ehena unehlagim hilifenag mo nasa God heafna unehlagim seaflanam afa Abrahamim sihi fwahana.

<sup>14</sup> Afa ehe enaig esona og, “Ka nem nufunam sihinag eba ka nem suialafe flanam afa ka nem esenaiba asa neana simbianiga puguiagefe.”

<sup>15</sup> Asa Abraham enam oniginam afa nenge kafena asa God ena mo sihi fwahag Abraham ati flana.

<sup>16</sup> Afa ati ne enaig nihem anwenafig el heafna mo sihi fwahag mom oagna wasnei fwahaiba asa el ehem gosenag enag ehena unehlagim seaflag.\* Afa ehe enaigba esegba eba mungwali mwanawagig gweyi awaieg.

<sup>17</sup> Afa God Abrahamim mo sihi fwahanag el sa enaigim flifi. Afa God membeg ehengel sa ma sonaigim numwehe

\* **6:16:** Afa el enag gosenag unehlagim seaflag eba ogfug enag kwania el sa ma ehem hekusia flaiba asa enag mo sihi fwahagim nufunam fe.

anwenafi nasa mas mo wahigi wahigifiahge eba awai awai nemug asa ehe enag mo sihi fwahagim wasneinag.

<sup>18</sup> Afa ilawo God mo sihi fwahagim afa sumi yi mo enag mom wasneig fwahag afa enag sambaganigi nihe mas wahigi wahigi ahfei afa God mas bigim sonaig nihem mwakwaleni. Afa sa ambangel big ikagna afu Godnai yi apuke gohug asa mas amtakwalig enaig elim nugwakalihiage afa eba ena nihe ehengelim wasneihiageaba asa nenge afofufe.

<sup>19</sup> Afa Godna mo sihi fwahag mo bigelni onigigim kike wasneig lambugu ofenaiba li bagag bite gam apaiyegim afa ligim wasnei ugu bifwatini. Afa Godna mo sihi fwahag mo eba li bagag lofug feg afa lofug Godna kwania lala kahli fwahini asa enag li bagag lofugim tigepeg ikagim Godna afsug lala meg gam pugu goh.

<sup>20</sup> Afa enanai yi Sisas ati gof ikagim bigelni minam tohla fwahag. Afa ehe wahkig prisni misog el fefe ofenaiba Melkisedek.

## 7

### *Melkisedek eba pris gafugag el feg*

<sup>1</sup> Afa Melkisedek eba Salem kembang la nai na misog el ehe God sisi yi nemugna pris el fena. Afa Abraham wanika fag hagnam sambaga sambaga misog elim wanilafe fatinam afa maia pese blonamba Melkisedek ehem mina la uflanam God suialafeflagna mo faina.

<sup>2</sup> Afa mungwali gawig Abraham fagna hagnam sa lambina enag 10 pela hap sugwakanam afa mungwa mo Melkisedekim faina. Enag unehlag Melkisedek mogba enaig feg 'Suialag nihe misog el feg'. Afa ehe Salem la nai misog el feg afa enag mogba eba 'Olug enesieg misog el feg'.

<sup>3</sup> Afa ehena alag i afag i afa simbeg enag mas buk la ginofini mo. Afa afag wanigag osuna i afa lahag osuna i enag gafa mas ginofini mo. Asa ehe ofenaiba Godna Leg lofug feg asa ehe pris wahkig gofufe.

<sup>4</sup> Afa sa ne enaig onigim Melkisedek eba kwania feg afa ehe Abraham mi afa Ju elni pris gosenig. Afa bigelni gof la nai simbianiga Abraham gawig sa fagna hagnam lambina enag 10 pela hap sugwakanam mungu mo Melkisedekim faina.

<sup>5</sup> Afa Livai eba pris elni autunai simbianiga. Afa Godna nihe mo enaig esona og Israel nai el sa ma gawig 10 pela hap sugwakfunam asa mungu mo prisim fai. Afa eba nilitem faig asa ehengel gafa mungwali Abrahamna simbianiga fiahsaieg.



<sup>6</sup> Afa Melkisedekba eba mango Livaina simbianigam mo afa eba Abraham ehe ehem mungu faina. Asa ehe Abrahamim God suialafeflag mo faina afa sonag elbi eba God ehem sihi fwahag mo faina.

<sup>7</sup> Afa ati big anwenafig el sa God suialafeflag mo faig eba gwesim hili fukog afa el sonag mo flag eba ahnai skaufeg.

<sup>8</sup> Afa pris mungu gawig sa flifini enag elbi eba pigiafena. Afa Melkisedek sa mungu gawig flafena afa enag big mas ehena lahagimba Godna buk la nangug mo.

<sup>9-10</sup> Afa Livaina simbianiga sa mungu gawig flifini asa big enaig lasug mo onig Livai Melkisedekim mungu gawig faina. Eheba Abrahamim biteana luwal fena sa big enaig onigim sonaigba eba Abrahamna onigig la gofena. Afa maia Abraham Melkisedekim gawig fainaba enaigba ofenaiba Livai gafa gwenag eseg.

### *Sisasba mulug pris ofenaiba Melkisedek lofug*

<sup>11</sup> Afa Moses Israel elim Godna nihe mo faini afa enag nihe mo enaig esona og pris Livaina simbianigag sa ma mungwali elim kwagani. Afa sonag prisni gafugag atiaba ihlafegba enaba haisegba nasa God enaig esog ka ming mulug pris ningihiag. Enaba mango Aron lofug mo eba heafa Melkisedek lofug feg.

<sup>12</sup> Afa pris atiaba mulug fegba asa ma nihe mo gafa mulug fei.

<sup>13</sup> Afa God Ainiyagim ningihiag mulug pris lofug eba algana simbianiga la nai fena afa mas amban mungu hefgel ehengenai pris gafugag esena mo.

<sup>14</sup> Afa big anwenafig ehe mulug pris eba heafna simbianiga eba Juda. Afa Moses mas ehengelim sihini mo ehengel pris afohiegim.

<sup>15</sup> Afa ming onigig eba ambala ogfug asa ming mulug pris pugug eba ehe ofenaiba Melkisedek lofug.

<sup>16</sup> Afa enag elbi mango Livaina simbianiga mo nasa hihe mo ehem mas esenag mo na moi prisbi fe. Afa ehena nofkenagag kigmog feg nasa wahkig goh asa enag ehem esenagba asa pris feg.

<sup>17</sup> Afa Godna ginof buk la enaig esog; Eba ne pris wahkig gofufe ofenaiba Melkisedek. *Sam 110:4*

<sup>18</sup> Afa enag nihe mo autunai mas wasneig mo asa mas elim kwaganig mo enaig esegba nasa God flagim esugum flafatig.

<sup>19</sup> Afa enag nihe mo Moses asa flana enag mas haig haig Godna nof la afsug nemug fena mo. Asa God mulug mina pigi fwahagba enaba autunai minam gosenagim afa ihlafeg asa big enam mina gam afu Godim muhla finig.

20 Afa ming onigigba enaig feg God wasneig mo sihi fwahana enaig esona og, Sisasba wahkig pris gofufe. Eba mas enaig moba mingnag prisba eseni mo.

21 Afa maia God wasneig mo sihi fwahaiba sa Sisas pris fefe. Eba God ehem enaig esona og;

Ka enaig mo wasneig sihife fwahag asa mas sonaig mom wahigi wahigi fei afa kog, "Neba pris wahkig gofufe."

*Sam 110:4*

22 Afa enag wasneig sihi fwahag mo enaba ofug Sisas ehe autunai minam kwefug kugim afa glaunai mina God nangum ikagim Sisas eseg fwahag enag minaba autunaim minam gosenag.

23 Afa ming enaig feg autunai pris mingnag afohiefenam asa pigiafenaba nasa kaksag afohiefena. Afa maia enag el lahafenaba asa ehe mas pris fiahfena mo asa ming el ehena kugum flafena.

24 Afa Sisasba eba wahkig pris gofena asa ehe mas ambanim enaig gafugagim fwahana mo.

25 Ehe wahkig gohba asa Godim sahnag og sa ma God elim kwagani. Afa glaufenam afa ikan autunai la fefe eba ambangel maia heafna unehlag la God nangum ambefiba asa ehengelim lambfife.

26 Afa Sisas eba prisni misog el feg enaig pris eba bigim kwagani feg. Afa ehe afsug nemug feg afa mas ehem sehi afa ehe mas mangwal weti fe. Afa ehe mas amtakwalig elim muhlafe ni amo, eba God ehem sisi gam nemug fingi fukug.

27 Afa eheba mango ming prisni misog el lofug mo. Afa mingnag pris mungwali osuna enaig esifini sis tigi tuhlu Godim faifini eba ilawana mo hefum esifini afa sumi yi mo eba elim ese gonifini. Afa Sisasba mas enaig esena mo. Eba hefum li katigeg la gwesim Godim faina elim kwaganigim. Afa ehe mungu nagim ese fwahagba asa enaba gwese goh.

28 Afa el mas wasneig mo suialag afohiegim. Asa Mosesna nihe mo elim kanog fwahag prisni misog el gohugum. Afa sumi yi Godna wasneig mo sihi fwahag mo heafna Legim gisfu fwahagba asa ehe wahkig nugweg nemug goh.

## 8

### *Sisasba bigelni prisni misog el feg*

1 Kangelni mog mo eba enaig feg. Bigelbi ati feg prisni misog elbi ihlafeg go. Afa ehe heven la God wasneig nemugna muhla pega.

2 Afa ehe afsug lala meg gam sefugum asa prisni misog el gafuga feg afa enag lala God ehe nimbla fwahag elbi mas ena lalaba esei. Eba Godna nufunam lofug lala.

<sup>3</sup> Afa mungwali prisni misog el enaig esifini gawig Godim faifinim afa sis tigi tuhlu faifini. Asa prisni misog el bigelni ehe gafa sa ma mangwal Godim fai.

<sup>4</sup> Afa sa ehe hwa bite la gofiteba eba mas pris gofite afa eba pris hwa bite la afohiafena afa sa ehengel Ju elni nihe mo patalfuiafenaba asa Godim gawig faifini.

<sup>5</sup> Afa pris gafugag sa finibi enaba eba esug enaigim ogfug afa nufuna nemugba eba heven la goh. Afa enaig Moses esenaba enag gafa esug ogfug. Afa ehe maia Godna lofug lala nimblanaba asa God wasneig mo enaig sihifena og, “Sa ne numwehe gafugafe sa ne mungwali gawig esegba sa ma mungwal lofug fe hosa ka nem mug la ofguna.”

<sup>6</sup> Afa Sisas enag pris gafugag flagba eba sonag elni gafugagim kwegfukag. Afa God ati sihi fwahana asa Sisas God nangum ikag mina tohla fwahag afa eba ena mina mi afa mo mi goflanaim kwegfukag.

<sup>7</sup> Afa goflanai mina ihlafegba God mas ming minaba tohla fwahai.

<sup>8</sup> Afa God heafna elni amtakwalig nihem nangwagigim asa mas sifakaleni afa sa ehe enaig esog og; Ainiyag enaig esog maia enanam ofefiba ka sa mulug mo Israel el mi afa Juda el mi sihi fwahan.

<sup>9</sup> Afa enag mulug mo sihi fwahag mo eba mas mungwal lofug fena mo ehengelni simbianiga hosa ka esini. Afa enanam ka ehengelim ningana kikenam asa ka Isipim wanfwahanam wanikana. Afa hosa ka ehengelim sihi fwahinibi afa ehengel mas patalfuna mo asa ka ehengelim masig fatinig.

<sup>10</sup> Afa nengigim ka Israel elim enaig mo sihi fwahani fi. Afa kana nihe mo ka ehengelni onigig la fwahan fi afa ka ehengelni olug yi ginofe fwahafe. Asa ka ehengelni God fenfie afa ehengel kana el fifie.

<sup>11</sup> Afa mas amban mungu heafna hihem Ainiyagna mo ogfunag mo afa mas amban mungu heafna nilitem enaig esona og, ‘Sa ne Ainiyagim anwenafini.’ Asa ma kwania el i afa esug el i mungwali kam anwenafini.

<sup>12</sup> Afa ka ehengelni amtakwalig nihem flafatinim afa mas ka enam pese onigkafi. *Jer 31:31-34*

<sup>13</sup> Afa God enaig esog ka mulug mo sihi fwahag afa enam eba ogfug goflanai mo ehe sihi fwahag eba ati watiauweg. Afa mangwal sa autunaieg enaba esug gohba awaiegim ofe.

## 9

*Godna unehlagim fingi fig Ju elni nihe enaig fena*

<sup>1</sup> Afa nihe mo God autunam Mosesim sihi fwahanag enag nihe mo enaig esona mangwal mina sa ma Godna unehlagim fingi fi afa lotu lala bite la gafa goh.

<sup>2</sup> Afa el lofug lala nimblig fwahig afa bambug meg enaba seflig afsug meg goh. Asa enanai yi eba lam gohug afa sime gohug afa amba Godim faig gig.

<sup>3</sup> Afa lala menai lofugna masgim eba yiminig meg goh enaba seflig afsug nemug meg goh.

<sup>4</sup> Afa enanai yiba eba gol sime goh afa ena sime laba fungugni gawig wehli fwahifinibi asa suialag emblegusug fungug puguiafena. Afa mingba mo sihi fwahag boksna gofena. Ena boksba gol wagigo fakana afa ena boks megamba gol potna gofena afa ena gol potnaba eba mana bret ena megam afogoafena. Afa mingba eba Aronna agat boks megam gifini. Afa ena agatbi eba li figeg pugu le. Afa mingba sambaga fun enanai yi God autunam heafna nihe mo ginofe fwahanaba enag boks megam gifini.

<sup>5</sup> Afa ena boks sisi yiba sambaganigi oflanai elni sungwagim ginofi fwatigig. Ena sungwagba enaig eseg sonag oflanai el eba Godna nofbosugam wahkig fagofegofna. Afa sa ena boks sisi yiba sambaganigina anglag kokufiageg ahgo. Afa enanai yiba eba God heafna olug kakageg fwahagim. Afa sonaigba eba ahnana ka enag mungwali mog moba upuguiah mo.

<sup>6</sup> Afa maia mungu mungu osuna sonaig gawigba numweheagi fwati finibi asa prisbi afu bambug megam saiye fenam asa heafgelni gafugag eseagifini.

<sup>7</sup> Afa yiminig megamba eba prisni misogyn el mungu sefu fenam asa mungu nagim mungu yia la enaig eseafena. Afa mas esugba sefu ikai eba sisna taf flauku fenam asa Godim faifena. Afa enaigba eseafenaba eba heafna amtakwaligim huguflaiti fenamba eba mungwali elim gigafiahfena.

<sup>8</sup> Afa enanam Godna lofug lala gofenaba eba el mas ena afsug kabag lala megam saiye fena mo. Sonaba naho Godna Sungwabug bigim ogfunig afa maia sonag autunai nihe gofenaba elni mina awaiena afa afsug nemug megam saiye giba.

<sup>9</sup> Afa sonag lala eba lasug mo eba bigim glaunai elim ogfunig. Afa sonag lala bigim ogfunig eba el Godna unehlagim fingi fifinim asa Godim gawig faifinim afa sis tuhlu faifini afa sonaba esenibi eba mas elni olug onigigim suiala fesko fiahfena mo.

<sup>10</sup> Sonag nihe mo enaig esona og fane i, bu i, afa bu la suwagig nihe feg. Eba elni afwambenai eligim esog. Afa sonag nihe mo eba gohun ikan God mulug mina tohlafe.

*Krais heafna taf Godim faig*

<sup>11</sup> Krais eba ati blog afa suialag gawig pugug gohugba ehe enaigna prisni misogyn el feg. Afa Godna lofug lala ehe ika seaifunaba ena lofug lalaba eba bitenaim flafugim afa fwainam suialafiahgeg. Afa ena lala eba el esih mo afa enaba mangwal bitenai mo.

<sup>12</sup> Afa Krais ena lala ika seaifunaba eba ikanam afsug nemug megam mungu nagim seaifugba asa enaba gwese wahkig goh. Afa maia enaig esegba afa eba ehe mango meme afa bulmakauni taf lambku sefu ahmo, amo eba ehe heafna taf uku sefugum bigim enana lambigba asa big gwese wahkig afofufe.

<sup>13</sup> Afa maia el amtakwalig nihe esifinibi asa pris enaig esifini. Memena taf i afa bulmakauna taf i lambfini sufoiti fegonfini afa bulmakau lambag tigi tuhlufinim asa enag smofna susuleti fegonfini asa Ju elni nihe eba ehengel busfug fifini afa enaigba esinibi eba afwabanai esini.

<sup>14</sup> Afa enaba Kraisna taf enam filafeg. Afa Krais mas mangwal weti fena mo afa wahkig gohug Sungwabugni wasneigni asa heafum Godim gwesim mungwali fainam asa lahana. Afa Kraisna taf bigna onigigim busfu klaitinig lahagna mina gam patalkuiagim asa big God nofkenagagim gafugafini.

<sup>15</sup> Afa sa ma Kraisna taf bigelni olug onigigim busfu klaiti asa Godna mulug mo elim sihi fwahanig Krais sa ma enam ninumwehe aflai. Afa sa elim God unenig sa ma mangwal suialag wahkig gohunifi God sihi fwahagim asa ma ehengel enam fli. Afa sa el Mosesna nihem ahnai skaufinim afa amtakwalig eseagini enag Krais lahagim asa elim pese lambigim afa amtakwalig nihe nai pigi klaitigba asa esug afohie.

<sup>16</sup> Afa el enaig ginof fefe og kaba lahaiba ambanim sa ka kikeafna gawigba fwahani fe. Afa el ahmona gawig ese lambifie afa ilawana mo el sa lahag enam anwenafinim sa ma lambi.

<sup>17</sup> Afa el maisiaba nofkena gohba enag ginof eba esug goh. Afa maia el lahagba asa sonag ginofba gafugafeg.

<sup>18</sup> Asa goflanai mo sihi fwahagim gafa sisna taf numwehe flag.

<sup>19</sup> Afa autunam Moses Godna mungwali nihe mo Israel elim sihinuwagena. Afa enanam ehe bu i afa bulmakau lambagna taf i enag lambtinam afa ahnabugu kagag toaflana enaba seflig hisop afa sipsip lag tafnaig flana asa bu la afa taf la figiu gopenam el mi nihe mo buk mi enana faftugo fiahfena.

20 Asa ehe enaig esona og, “Eba God nem wasneig mo sihi fwahanag afa hwa taf eba ena mom numwehe fuguba asa ne enam patalku.”

21 Afa Moses gwenaig esena afa taf ukunanam Godna lofug lala mi sisi gam faftugo fiahgena afa mungwali Godna unehlam fingi fig gawigim gafa gwenaig esena.

22 Afa Mosesna nihe mo enaig esona og, “Haigim sa ne membeg sa ma sonag Godna nof la afsug fei eba taf mungu he enaigba esei. Afa taf sugfog fwainigba eba God mas elni amtakwaligim flafatini.”

23 Afa mungwali Godna lofug lala nai gawig eba ogfug heven la nai gawigim. Afa sa sisna taf enag bitenai gawigim esenaiba asa afsug feskofefe. Afa sisna taf mas heven la nai gawigimba esenaiba afsug fei eba sa ma mangwal enaig esenaiba asa ena tafim hilifenafe.

24 Afa Godna lala afsug meg el sa gafugafig eba Kraiss mas ena megamba seaifui. Enaba nufunam afsug megim heven la go enam ogfug. Afa Kraiss ati ikag heven la sefu Godna nofbusug gam gohugim asa bigim kwaganig.

25 Afa mungu mungu yia la mungu nagim Ju elni prisni misog el sisna taf flafenam asa afsug nemug lala megam sefukuiafena. Afa Kraissa mas enaig ese gofena mo hefum Godim faigimba.

26 Afa ehe enaig ese gofiteba eba susug wahkig lamb gofite ilawana God bite eseagegna fetem afa ikan glaufete. Afa eba mas enaig esena mo. Amo, eba ikag awaiegim meyoifeba enaigna Kraiss mungu nagim pugug ese fwahagba asa gwese go. Afa sa ehe lahagim afa hefum Godim gwesem faigim asa amtakwalig nihem flafatig.

27 Afa mungwali el sa ma mungu nagim pigiba asa God ehengelim kwefihiagefe.

28 Afa eba Kraiss ati enaig eseg mungu nagim lahagim afa hefum Godim gwese faigim asa amtakwalig nihem kaksag elni flafatinig. Afa ehe sumi yi pese pugunam eba mas elni amtakwaligim flafatini amo, eba awai eba blonam el sa ehem nengena afo enam lambfe.

## 10

*Kraiss lahagim hefum Godim mungu nagim fwahagba asa gwese go*

1 Afa Ju elni nihe mo eba ogfug suialag gawig sumi yi pugufe afa enaba mas bigim numwehe nufunam gawigim ogfunig mo. Afa pris mungu mungu yia la wahkig gwenaig eseafufena sis tigi tuhlu Godim faifini afa enag nihe mo mas

ihlafena mo. El sa ognna blo Godim muhla fena enaba mas elim ihlafena mo.

<sup>2</sup> Afa sa ati el Godna unehlagim fingi figim fwina ihlafitiba afa eba sonaig mas wahkig eseafofte. Afa ehengelni olug onigig mas enaig esoi og kana amtakwalig eba gwese go asa ehengel mas sonaig nihe Godim sis tuhlu faigim pese esi.

<sup>3</sup> Afa mungu mungu yia la sonaig nihe eba esenigbi asa pese enam onigig kana amtakwalig gwese go.

<sup>4</sup> Afa bulmakauni taf afa memena taf eba mas elni amtakwaligim eba haise flafatin mo.

<sup>5</sup> Afa sa maia Kraiss hwa bite la blogim muhla ofefiba ehe Godim enaig esonafe og;

Afa ne oksig el nem gawig faigim afa sis tuhlu faig mi.

Asa ne kana eligim numweheageg fwahag eba enam mungwal lofug gafugagfeg.

<sup>6</sup> Afa sis tuhlu faig nihe i afa mingnag nihe eba amtakwaligim flafatiag enaigim ne mas sifakale.

<sup>7</sup> Afa ka esog kaba hogo afa God ne membegba ka sa nimbeafna sawieg la ese hosa ati nimbeafna buk enaig kam esonag.

*Sam 40:6-8*

<sup>8</sup> Afa ilawana ehe sa ati enaig esona og, “Afa ne oksig el nem gawig faig i afa sis tuhlu faig i afa sis tuhlu faig nihe i afa mingnag nihe i eba amtakwaligim flafatiag enaigim ne mas sifakale.” (Afa Mosesna nihe mo enaig esog sa ne enaig nihe fi afa eba Kraiss sonag moba sihig.)

<sup>9</sup> Afa sumi yi mo ehe enaig esona og, “Kaba hogo afa God ne membegba ka sa nimbeafna sawieg la ese.” Asa goflanai mina ehe fwahagim afa sa ming mina tohlag fwahag.

<sup>10</sup> Afa sa Sisas Kraiss gwenaig eseg Godna membugim patalkugim mungu nagim lahaigba asa gwese goh. Afa enaba bigelni amtakwaligim huguflaitinigbi asa big afsug fiahsaieg.

<sup>11</sup> Afa mungwali pris sa mungu mungu osuna Godim sis tuhlu faifinim enaigba wahkig gwese eseafofena afa enaigteba mas elni amtakwaligim huguflaitini eba awai nemug.

<sup>12</sup> Afa Kraissba eba mungu nagim ese fwahagba asa gwese gohba elni amtakwaligim lambaitifen go. Enaig ese fwahagim asa ehe mo Godna muhla ika ga.\*

<sup>13</sup> Afa ehe gwese gaba nengeau maia enanam God ehena angoluweg elim lamblunam asa ehem ahnai skaufinife.

<sup>14</sup> Afa Kraiss mungu nagim lahaigim hefum Godim faig fwahag. Afa enaba Godna elim esenigbi asa ehengel Godna nof la afsug el wahkig afohie.

\* **10:12:** Afa el muhla God nai yi go eba ogfug enag el eba suialag unehlagna feg.

15 Afa Godna Sungwabug gafa ena mo pahlagim asa bigim sihinig. Afa ilawanaba ehe enaig esona;

16 Afa nengigim ka Israel elim enaig mo sihi fwahani fi. Afa kana nihe mo ka ehengelni onigig la fwahan fi afa ka ehengelni olug yi ginofe fwahafe. *Jer 31:33*

17 Afa ming mo ehe enaig esog;  
Afa ehengelni amtakwalig mi afa nufwef nihe mi ka mas enam pese onigi eba ati awaieg. *Jer 31:34*

18 Afa maia God elni amtakwalig nihem flafatigba asa Godim sis tuhlu faig nihe gafa awaieg.

*Nawo wasneinim Godim muhla fini*

19 Asa nilite sa big anwenafi Sisasna taf sugfogim bigim mina piginigbi asa big mas embefi Godna afsug nemug megam saiwegimba.

20 Afa Sisas ehe enag nofkenagag minaba tohlag fwahag. Ena minaba ika lofug sa Godna lala seaifug kahli fwahini. Ena lofugba eba Kraisna elig.

21 Afa ati bigna prisni misog el eba kwania nemug feg afa sa ehe Godna elim nangwagihigeo.

22 Afa ehe heafna tafna bigelni olug yi fastugo fenugeba asa big anwenafig bigelni amtakwalig ati awaieg. Afa ehe bigelni eligim gofwakambag buna gigiafenig. Afa sa big mwakwal nihem olug onigig la nai fwahinim afa Godim nufuna olug onigig finim asa big ehem ambe muhla fini.

23 Afa sa big oniginim Godna mo sihi fwahag mom fwina wasneig kehlifufiba asa big enag onigigim sihifim. Asa big enam anwenafi mangwalim God sa esog eba nufunamfefe mas fwahag.

24 Afa nawo enam oniginim asa big Godna elim kwaganim sa big mungwali elim membegonim afa suialag nihe fegon.

25 Afa nofe nawo Godna laskuhlag nihem fwahi afa ati mingnag el enaig esig ehengel enaigim fwahig. Asa big laskuhanam afa bimbeafna olug onigigim gifiofoli. Afa sa big fwina enam eseagi eba Ainiyagna osuna ati meyofofe.

26 Afa eba big Godna nufunam moba flig anwenafigim afa big enaig esog og kaba Godna moba masigim fatigim afa ka kikiafna membug la haig haig eseagofeka. Enaig elbi eba ehena minaba awaienag amtakwaligim flafatiagimba.

27 Afa el enaig esegba sa ma embefegofi maia enanam God elim kwefihianig ofefiba afa sa ehe kwania suwim nangonam maia ena suwi Godna angoluwig elim la okomohlafiba asa embefeagefe.

28 Afa sa el Mosesna nihe mom masig fatinagba asa sambaga me awai sambaga mungu el me maia nihem



amtakwaligim ambala sihinibi asa mungwali el mas ehem aflafini amo eba ehem tigi fakifini.

<sup>29</sup> Afa sonaig elbi haig sa esenifie afa el Godna Legim masig fatinagba mangwal ehem fenafe? Afa sa enag taf Godna mo sihi fwahagim numweheafilag asa enam ehe flafoiba afa sa ehem mangwal fenafe? Afa sa Godna Sungwabug bigim esug kwagan fig asa ehe enam molampbi nafe eba sa ehem mangwal fenafe? Afa sa enag susug sa ehe flafe enaba gwesim hilifekag.

<sup>30</sup> Afa ati big anwenafig God ehe enaig esona og, “Afa susug mungwag faig niheba eba kana gafugag feg asa ka amtakwalig elim mungwag faife.” Afa ehe ming mo enaig esog, “Eba Ainiyag heafna elim kwefihiagefe.”

<sup>31</sup> Afa enaba fwinam amtakwalig nemug feg enaba God nofkikenagag feg elim ningana kikenam asa mungwag faifie.

<sup>32</sup> Afa sa ne pese onigi ilawana Godna mo nem ombusug lofug pugunig. Afa enanam ne kaksag kinig fligim asa ne mas apaiyeg mo.

<sup>33</sup> Afa ahnana mo nem el ambala molampbi gonigim afa nem susug faigog. Afa ming nana mo maia hihem gwenai geseonigbi asa ne hihe nenam afohiegim.

<sup>34</sup> Afa ne kalabus nai elim aflafegonigim afa sa kwaganig. Afa maia gavman nengelni gawig esug lambigonigbi afa ne mas ninimugoi afa ne sifakaligim afa anwenafi neana nufunam gawig eba suialafegim gweseg wahkig gohfe.

<sup>35</sup> Asa nofe kawo olug onigig fwahi eba God nem suialag mungwag nem faife.

<sup>36</sup> Afa sa ne gwese wasnei afofiba asa Godna sawieg patalfuiafiba afa mangwal sa God nem sihi fwahanig enag ne flifi.

<sup>37</sup> Afa Godna buk eba enaig esog; Afa mas maisiaba fefi afa el enaig esog eba ka blofe asa ehe mas nengigimba segofi eba ikagna blofe.

<sup>38</sup> Afa kana el sa kam olug oniginigim asa afsug afohie ehengel eba wahkig auguiag flifi. Afa ambangel sa pese lakumues afugba enaba mas ka ehem sifakalenig mo. *Hab 2:3-4*

<sup>39</sup> Afa mango bigelbi lakumues afuiag afa olug onigig awaieg el mo. Amo, eba ati big olug onigigbi asa God bigim lambig.

## 11

### *Godim olug onigina nihe*

<sup>1</sup> Afa olug onigig niheba enaig eseg, afa sa mangwal suialag God bigim heven la sumi yi faigim sa feg enam big olug

onigi la kehli ufuhba afa negeafo afa sonaigba mas big nofna nangwig mo amo eba onigigna mungu big anwenafig.

<sup>2</sup> Afa autunam Israelna simbianga Godim olug oniginibi ehengelni nihe ihlafenaba asa God sifakalena.

<sup>3</sup> Afa nawo Godim olug oniginim afa sa big anwenafi God ehe heafna mona of i bite i eseawagigba asa mungwali mangwal sa big lambusig enag autunam big mas lambusig mo enaba God ehe eseagegba asa puguiageg.

*Afa Abel i Enok i afa Noa enag el Godim olug onigini*

<sup>4</sup> Afa Abel Godim oniginam asa sis tige tuhlu faifna ehena sis Godim tuhlu faig Keinim filafena eba ehe mas Godna membugum patalkuna mo. Afa Abelna onigig eba suialafena afa God ehena enaig nihem sifakalenaba afa enaba ogfug God enaig onigig ehe afsug el feg. Afa ehe ati lahaq afa ehena enag olug onigig bigim gafa ogfunig.

<sup>5</sup> Afa Enok Godim olug onignaba afa ehe mas lahana mo eba God ehem nofkikena heven gam sulufufla wanikina. Afa enaba Godna buk enaig esona og, God ehem sulufuflag fwainig masim feafnaba enenam Enok ehena sawiegim patalfukuna.

<sup>6</sup> Afa sa big anwenafi el sa mas Godim olug oniginai sonaig elbi Godim esenagba God mas sifakale. Afa el ogha blog Godim muhla fena enag elbi sa ma enaig onigi God eba nego afa el Godim yisigibi eba God ehem suialafiah flafe.

<sup>7</sup> Afa God Noam sihina og bu pugufe afa Noa mas enaigim nanguna mo eba ena mom mungu oniginam afa ehe Godna sawiegim patalkuna sa sip gafugafena asa ehe mungu suialag wanpuguna. Ehe enaigba esenaba eba bitenai elim ogfunig ne amtakwalig el. Afa Noa Godim olug oniginaba asa God ehem enaig esona og, “Ne afsug el feg.”

*Abraham i Sara i Godim olug honigina*

<sup>8</sup> Afa God Abrahamim enaig sihifena og susum ika afa bite ati ka nem sihi fwahanag asa ne flafe. Afa Abraham Godim olug oniginam afa heafna kembigim fwahanam asa Godna sawiegim patalkuna afa mas ehe anwenafena mo asim sa ikafe.

<sup>9</sup> Afa ehe Godim oniginam asa ika ena bite la puguna. Afa ehe enanai yi gafenaba angoluweg el lofena. Afa ehe lofug lala mungu gafena afa mas kembig fakana mo. Afa Aisak mi Jekop mi gafa God gwenaig esoni og hwa biteba eba ka nem faig. Afa eheningi gafa gwenaig esahfena lofug lala hafena.

<sup>10</sup> Afa Abraham lofug lala gafenaba nenge gofenaba ogha kembigim nangu God ehe sa ma fakai. Enaba gwese wahkig gofufe.

<sup>11</sup> Afa Abraham ati watiauena afa Sara gafa ati mokinaiena afa sa eheningi Godim olug honiginaba asa God Saram wasneig faina luwal foklagim. Afa ehe onigina God ehe heafna mo sihi fwahagim numweheafrafe.

<sup>12</sup> Afa Abraham watiauenam lahagim meiyofe fenaba ehe simbianingana alag fena afa sa ena luwal pugug kaksafeageg ofenaiba bagnofut oflanai afa engig bu lanai.

<sup>13</sup> Afa ehengelni olug onigig gwese gohunug ikag hefum pigig. Afa enanam maia bite la afohiafenaba ehe mas Godna mo sihi fwahagim nanguni mo. Afa eba ehe enaig onigini og, eba sumi yi pugufe asa ehe sifakalini. Afa ehe ambala enaig sihifini og, kagel hwa bite la ofenaiba el nai angoluweg el fig.

<sup>14</sup> Afa el sa enaigba esogoiba eba ogfug ehe heafna ming kembigim yisigig.

<sup>15</sup> Afa sa ilawana kembigim fwahi ambeg enam peseg onigigbi eba sa ma pese afui.

<sup>16</sup> Afa ehengel mas bitenai kembigim onigi amo, eba ehe ogna suialag nemug kembigim fli eba heven la nai. Afa God ehengelni kembigim ninumwehe fwahanig afa ehengel enaig esogofe og ehe kagelni God asa God ena mom mas afwanefe.

<sup>17-18</sup> Afa God Abrahamim enaig sihife fwahana og, “Aisak fenam enanai yi neana simbianiga pugukaminefefe.” Afa sa God Abrahamim yuhna og sa ma Aisakim sis lofug tige Godim fai. Afa Abraham Godim olug oniginam asa ehe ninumwehagena heafna luwal mungu Godim faigim.

<sup>19</sup> Afa Abrahamba enaig onigig fena og atiamba Aisak lahaiba eba God ehe pese ihlafotife. Afa enag lasug moba eba Abraham pese Aisakim lahaig lanai suliaflana.

### *Aisak, Jekop afa Josep Godim olug onigini*

<sup>20</sup> Afa Aisak Godim olug oniginam asa ehe Godim sahna og sa ma God luwalningim Jekop mi Iso mi sumi yi suialafihigei.

<sup>21</sup> Afa Jekop Godim olug oniginam afa hefum lahagim ofefnaba asa ehe Godim sahna og sa ma God Josepna luwalim suialafiahflai. Afa sa ehe agatini gofe gofenaba asa Godna unehlagim fingi fena.

<sup>22</sup> Afa Josep Godim olug oniginam afa hefum lahagim ofefnaba asa ehe enaig esona og, “Afa nengegimba Israel el Isipim fwahinim afuofefiba enanam kana kig lambinim sa ne afu.”

### *Moses Godim olug onigina*

<sup>23</sup> Afa Mosesna afahumonigbi Godim olug onigini afa maia afag Mosesim waniganaba asa flinim meagam kumohlinibi

sambaga mungu was fena. Afa ehe ahnangonam maia ena luwal suialafiahgenaba nasa meagam ahkumohlana eheningi mas Isipni misog elni nihe mo aflafwagim embeah-fena mo eba ena nihe mo enaig esona og fangonai luwalim sa kwagkumofi.

<sup>24</sup> Afa Moses Godim olug oniginam asa ehe maia kwablog gofenaba enaig esona og, nofene kam sefli kaba misog elni luwalna leg feg.

<sup>25</sup> Afa ehe enaig onigig fena og ka sa Godna elim kinig wanflanam asa ehe enaig onigig og masa ka amtakwalig esenam afa ka mwakwalig sifakalefe.

<sup>26</sup> Afa Moses Godna Gisfu Fwahag elni unehlag la afwanefug flafe asa ehe enaig onigig fena og enaba suialafegim afa gwesim hilifeg. Afa ehe onigig suialag gawig Isip nai afa ehengelni kaksag kig eba weti feg eba ehe onigina mangwal suialag God sa sumi yi faife. Afa sa afwanefug flafe Godna Gisfu Fwahag elni unehlagim enaba suialafegim afa gwesim hilifeg.

<sup>27</sup> Moses Godim olug oniginam asa ehe Isipim fwaha ikanaba afa sa misog el ehem olug kakagenaba afa ehe mas ehem embefena mo. Afa mas lakumues pese ikana mo eba ehe gwesim Godim patalkuiafenaba afa nangwakafena afa ena Godba mas nofna nangui.

<sup>28</sup> Afa Moses Godim olug oniginam asa ehe Israel elim enaig sihifeni og, sa ne sipsip kwagnim asa ne taf mo nim-beafgelni lala mengig la laitiagi eba oflanai el kwaskogule ambenam afa sa mas nengelni angwam luwalim kwaskofi. Afa Ju el sonaig buyisba seflini og eba Pasova.

<sup>29</sup> Afa Israelnai el Godim olug onigini asa ehengel bu kwaniem apaiyena ena bu eba seflig Ret Si. Enaba fog la apaiye afu afa Isip el gafa gwenai esini og nawo apaiye afu asa bu blonam mungwali sagfla kumohlanaba asa pigina.

<sup>30</sup> Afa Israel el Godim olug oniginim asa ehengel afu Jeriko kembigim enwesog la gohug osuna wagliauguniba asa ehengelni kembig la nai wasneig bog tofu pena.

<sup>31</sup> Afa aga taitu angwafig Rahap Godim olug oniginam asa bomp ahkukog elim lambi kumotigina. Afa maia Israel el, el sa mas Godna mo patalfuna mo enam kwaskofinim afa Rahapim mo mas tigi fatini mo.

<sup>32</sup> Afa atiaho ming moba ka ginofe fwahag me? Hanana ka enaig moba sihiage mo feg Gideon, afa Barak afa Samson afa Jepta afa Devit afa Samuel afa mungwali Godna mo fli sihiafule el, enam kamoksig ehengelni mo ginofegim.

<sup>33</sup> Afa ehengel Godim olug oniginim asa fag hagigim ming kembigim filafini. Afa ambangel sa haig nihe fini ehengel

enag gwenaiḡ mungwag pese fai gona. Afa Godim olug onigig el enag Godna mo sihi fwahag mo flinim afa mingnagba eba wasneig laionna nihi muhla finibi asa ehengel ena sisna mengigim pwakafinibi asa ena sis mas ambanim tigena mo,

<sup>34</sup> afa suwi kwania mas ambanim lana mo, afa bainat pina mas ambanim higeflaitina mo. Afa autunam mas wasneini mo afa God ehengelim esenibi asa wasneinim afa sa angoluwag elim fagna hagnam filafe fatini.

<sup>35</sup> Afa angwafig Godim olug oniginibi asa ehengel elim pigiegim pese lambigbi afa sa nofkenagag flig. Afa mingnag el Godim patalfug eba amtakwalig elni ninga la afoba afa sa ehengel susug kwania flinim afa Godim oniginim afa sa mas enaig esogona mo og, sa kam fwati ehe enaig esogonam asa pigina. Afa ehengel oḡna nofkikenagag pese fli afa enaba sulafiahgegim gwesim hilifekag.

<sup>36</sup> Afa mingnagimba molamp mo faigonam afa sa wena fliakiletifini afa mingnagim mo wena kikegoniginim asa kalabus lala gam wanafuna.

<sup>37</sup> Afa mingnagim eba funna kwaskofini afa mingnagim eba sona ehengelni eligim olyi gi higfeitifini afa mingnagim eba pinana higfeitifini. Ehengelni lofugba eba sipsip lofug afa meme lofug laitiagini afa kig fwainig fini. Afa el ehengelim kinig faigonam afa sa amtakwalihagini.

<sup>38</sup> Afa hwa bitenai nihe mas ihlafena mo asa mas sonag suialag elbi enaig lamba gai. Afa el ehengelim amtakwale hiagini Asa ehengel bite behig gam ahkawag mine fenam afa sa mingnagim fun meg gam sefu gohna afa mingnag bite meg gam sefu gohna.

<sup>39</sup> Afa ehengel Godim olug oniginibi asa God ehengelim suialag goni afa ehengel mangwal sa God sihi fwahana mas enag flini mo.

<sup>40</sup> Eba God enaig onigig fena oḡna glaunai mo sihi fwahag mo eseba asa ehengel fi afa bigel fi glaunai mo sihi fwahag mom flinim sa big afsug el fiahsaife sa ma glaunai fwina suiala fenam autunaim gosenai.

## 12

### *God heafna luwaligim numwenuge*

<sup>1</sup> Afa sonaig autunai Godna el bigelim wagigo faka gonigim afa sa bigim nangwagafo. Afa bigel ofenaiba seslefofeagofi asa big amtakwaligim fwahinim afa mungwali gawig sa bigim oḡna wegmus fe enam big fwahi. Afa sa big wasnei God sa bigim mina faigbi enam sa big patalfu.

<sup>2</sup> Afa bigelni olug onigigba eba Sisas mog feg afa ehe bigelim esenigbi asa enag onigig kwania fiahgeg. Afa nawo ehem mungu sa big nangwafofum. Afa ehe mas li katigegim fwahana mo amo ehe enaig onigig fena mangwal sa sumi yi pugufe asa enam sifakalena. Afa mas afwanefumba onigina mo maia li katigeg la esofini finibi afa glauwaba eba Godna muhla pega.\*

<sup>3</sup> Afa sa ne Sisasna nihem onigim afa maia amtakwalig el ehem olug kakagenaginibi ehe mas weti pena mo. Asa nofeka yiskosiaginim fwahi.

<sup>4</sup> Afa ne amtakwalig nihem pigau upigofig afa el nem olug kakagegonigim afa mas nem kwagi klaitig mo.

<sup>5</sup> Afa God sa nengelim wasneinig mo faini afa atiaho ne olnitetig? Afa God nem suwigig ne heafna luwalig fiahsaieg afa ehe enaig esona og;

Kana luwal, afa maia Ainiyag nem fenugeiba afa sa ne enam onigim. Afa nem oninimu flafiba afa nofekawo enam olug kininam fwaha.

<sup>6</sup> Eba Ainiyag enaigba esegba eba ehe ambanim sa fwina membenag. Afa amban sa enaig esog og kana luwal asa ehe sonaig elim ninimuhiagegim afa kwaskofeg. *Snd 3:11-12*

<sup>7</sup> Afa sa ne enaig kinig kahlagufiba afa sa ne enaig onigig fenam og eba humon eba kam fenugofe kam kwaganigim. Ena kinig eba ofug ne Godna luwalig fig. Eba mungwali humon sa heafgelni luwalim fegonig fafifi.

<sup>8</sup> Afa Ainiyag heafna mungwali luwalim fenuwag fafefe, afa sa nem fenageg fwainig fefe enaba ofug ne mango ehena luwal nemug mo eba ne mina luwal.

<sup>9</sup> Afa bigelni bitenai humon bigim fenuagigbi asa big ehengelim ahnai skaufe gonig. Eba ihlafeageg bigelni heven la nai humonim sa big ahnai skaufinim afa sa big nofkikenagag fli.

<sup>10</sup> Afa bigelni bitenai humon eba bigim mwakwalig fegonigig afa ehengel eba heafgelni onigigim patalfug. Afa God eba bigim fenugegim afa sa bigim kwaganigba asa big gwenai ehe lofug afsug fig.

<sup>11</sup> Afa maia God bigim fenuagegim afa susug faigbi afa sa enanam mas big sifakali. Afa sa sumi yi maia fug luguiba asa big suialag nihem patalfunam asa olug enesieg big flifi.

<sup>12</sup> Asa nofene yiskosi. Afa sa ne bugia gafenam asa ne ninga mung susnufiagi.

\* **12:2:** Afa el muhla God nai yi go eba ofug enag el eba suialag unehlagna feg.

<sup>13</sup> Afa sa ne misosuf mina gam gwesim afuiafim asa neana mung amtakwalig nugweg gofi masa amtakwalig mina ena mungim amtakwale fatife.

*Afa ne numwehifibi masa el Godna mo masig fatinifi*

<sup>14</sup> Afa sa ne ehengeposinim asa ne mingnag elim olug enesieg fegonim afa afsug nihem patalfu. Afa el enaig eseg fwainigba eba ehe mas Ainiyagim nangug mo.

<sup>15</sup> Afa ne numwehifibi masa amban mungu God esug kwaganigim enam masig fatinafe. Afa masa el kinig upuguiagenam afa sa elni auguiagim amtakwale fatife ofenaiba wahil pegihbi sawagim guhiagi.

<sup>16</sup> Afa ne numwehifibi masa amban mungu aga taitu nihem patalkunam afa Godim masig fatinafe hosa Iso enaig esena. Ehe mas mangwal sumi yi flagim onigina mo. Afa heafna alag enaig sihifena og, nengigim ka etegim kaksag gawig lambwaife. Afa Iso ehem bini lahanaba asa ehe heafna suminegim wahigi mungwali gawig lambwaina afa suminegba eba fane mungu nagim ehem faina.

<sup>17</sup> Afa ne anwenafig sumi yi ehe oagna ena gawig pese lambim afa sa heafna alagim wena mona sihinaba afa alag oksinam og, “Amo, eba ati ne suminegim lambwai eba ne mas pese lambi.”

<sup>18</sup> Afa glawaba ati big God i ahfeg mas mungwal lofug autunai ahfeg mo. Afa autunam Israel el ambe Sainai mug la apukenam asa nanguini afa higini. Afa ehengel suwim nanguini afa si kulufeagegim nanguini afa bifwat mi afwei mi nanguni.

<sup>19</sup> Afa ehengel higinibi fuf lofug moasina afa God lagofna. Afa ena mo lagigim higinim asa enaig esogona og, “Yoi, amban enaig moba hig mo.”

<sup>20</sup> Afa ehengel Godna wasneig mo higigim oksini. Ena moba enaig esona og, “Afa el me awai sis me maia sonag mugimba tohuiba asa ne funna enam tigi faki.”

<sup>21</sup> Afa ehengel enaigim lambusiaginim asa embefeagini. Afa sa Moses enaig esona og, “Ka gafa ka embefegim afa kam olug wahigeg.”

<sup>22</sup> Afa glawo big God i ahfegba eba algana feg. Afa nengel Saion mug la apukegba eba Godna nofkikenagag kembang eba heven la nai Jerusalem afa enanai yi oflanai el kaksag fiahgegim laskuhlag sifakalig.

<sup>23</sup> Afa ne Godna el mungwali laskuhlag afa sonaig el eba Godna goflanai luwalig lofug ne fig afa ehengelni unehlag eba heven la gohun. Afa ne God nangum ambeba asa ehe mungwali elim kwefihianugefe. Afa ne laskuhlag suialag el i afa ambangel ati pigigba afa glawaba afsug nemug fig.

<sup>24</sup> Afa glawa gafa ne Sisas nangum ambeg eba ehe Godna mulug mo sihi fwahagim numwehefugu. Afa ne heafna taf gam ambeba asa ehe heafna tafna nem figifigi fenugegba afa sa amtakwalig awaiyekag. Afa ena tafba Abelna tafim filafegba afa Abelna taf eba el mungwag gwenaig esenai.

<sup>25</sup> Sa ne numwehi, masa ne Godna mom higigim oksife. Afa autunam bitenai el Godna mo sihinaba afa el mas higini mo asa ehengel susug flini. Afa sa big sisi nai elni mo highi fwainig fifie eba haig big meagamba saiye goahmo.

<sup>26</sup> Afa enanam God esonaba asa bite asag fufie blona. Afa glawo ehe ati sihi fwahag og, “Afa mungu nagim ka pese bite mi of mi eseawagiba asa fufiagafefe.”

<sup>27</sup> Afa enag mo “mungu nagim” eba ofgug mungwali gawig God eseagegba asa enam ehe fufiba asa awaiefe. Afa sa mangwal fufieg fwainig feg eba gwese gofufe.

<sup>28</sup> Afa sa big Godna bog meg mo lambfo enaba mas fufi. Asa nawo enam sifakalinim afa sa ehem embefinim afa ahnai skaufini afa sa heafna unehlagim fingi fibi asa ma ehe sifakalei.

<sup>29</sup> Eba bigelni God ehe suwi kwania lofug fenam mungwali gawigim lawagefe.

## 13

### *Godna nihe enaig ikafeg*

<sup>1</sup> Afa el sati Sisasim olug oniginig sa ne ehem fwinam membegoniafufum afa sa ne mungu nilite lofi.

<sup>2</sup> Afa nofeka elnaim nimbeafna lala gam wanafuiagim etiti. Afa mingnag el mingnag elim kwaganigbi afa mas anwenafini mo eba mango elim esegon mo eba heafa oflanai elim esegonig.

<sup>3</sup> Afa ne kalabus la nai hihem oniginam okwefofiba afa atiaba ne kalabus yi fegba. Afa sa ne kinig flig elim aflafegon afa atiaba neanga enaig kinig fegba.

<sup>4</sup> Afa mungwali el sa ma enaig onigifi angwafig flag nihe eba nufunam feg. Nofeka sonaig nihem amtakwaleagi asa God aga taitule el mi afa mwakig el mi kwefihianugefe.

<sup>5</sup> Nofeka kig membenam afa fwinam onikafim. Afa sa ne enaig onigig fe mangwal sa ati ka kehlag eba mangwesei. Afa Godna mo enaig esog og;

Eba ka mas nem fwahai afa ka mas nem masig fatinai eba awai nemug. *Wkp 31:6*

<sup>6</sup> Afa big enam anwenafinim asa big mungu mungug wasneig mo enaig sihi fi og;

Ainiyag eheba kam kweagfwafug asa ka mas embefei. Afa ka mas onigi el sa kam haig esofena fiba. *Sam 118:6*



<sup>7</sup> Afa goflanai siosna misog el hosa ati nem Godna mo sihigoni. Afa sa ne ehengelni nihe onigigon afa ehengelni Godim olug onigig fug luguna afa sa neanga gwenaig esi.

<sup>8</sup> Afa Sisas Kraiss eba gwenaig gwese gofufe. Afa autunam feg, glau feg afa autunai la fefe ehe mas wahigi wahigi feagei.

<sup>9</sup> Afa nofeka haig haig mo higwage masa ena mo nem esenageba ne suialag mina fwaha ikafe. Afa God sa bigim esug kwaganig enag sa ma bigim wasneini. Afa nofeka onigim ka fanena nihe mo patalfu asa ma kam wasneini amo, enaig nihe mo mas elim kweagfui.

<sup>10</sup> Afa pris Godna lofug lala la sis Godim tuhlu faifnim afa ma enag awaieafenaba asa sumi yi enag sisna nihigbi ahgafena. Afa mangwal sa big na amtakwalig nihem huguflaitinig afa ehengel mas enaba ahgai.

<sup>11</sup> Afa Ju elni prisni misog el sisna taf flaukug afsug nemug lala megam useaifug esegba amtakwalig nihem huguflaitig. Afa sisna lofug mo flag kembang ehbegam fatigim suwina tuhlu.

<sup>12</sup> Afa sa Sisas gafa kembang ehbegam susug flagim lahag asa ehe heafna tafna heafna elim esenibi asa afsug fiahsaife.

<sup>13</sup> Afa sa big gafa kembang ehbegam ehe nangum afunam asa mungwal lofug afwanefug fli.

<sup>14</sup> Afa mungwali kembang hwa bite la big mas wahkig gofi asa big yisigi ena kembang sumi yi puguiba asa big enanai yi wahkig gofufe.

<sup>15</sup> Afa Sisasna unehlag la nawo Godna unehlagim wahkig fingi fifum. Afa big enaig Godim faigbi eba ofenaiba pris sis Godim faig. Afa bigelni mo lagig eba ogfug bigel eba Sisasna el fig.

<sup>16</sup> Afa nofeka elim suialafe hiagig nihem fwahi afa sa el mangwal gawig tumenag asa ne enam kwaganim afa eba enaig nihem ofenaiba sis Godim faig asa ehe enam sifakaleg.

<sup>17</sup> Afa sa ne nimbeafgelni misog elni mom higigonim asa ne ehengelim ahnai skaufegonibi asa ma nem wahkig ninumweh lambfiahfufi afa sa ehengel enaig anwenafnim asa nengigim God ehengelni gafugagim kwefihiagefe. Afa atiaba ne misog elni mo higigonigbi asa ma ena gafugagim sifakali. Afa ne enaig esig fwainigba eba ehengel kinig flife afa enaba ehengelni gafugag mas nem kwagani.

<sup>18</sup> Asa ne Godim sahinibi sa ma God kam kwagani. Afa Godna nof la kangel enaig anwenafig ka suialag afohie asa koka suialag nihe wahkig fiahfufum.

<sup>19</sup> Afa ka membeg sa ne wasneig beten kam finibi asa ma God kam mina piginaiba ka sa ikagna pese nengel nangum blo.

<sup>20</sup> Afa bigelni Ainiyag Sisas lahagim asa ehena taf Godna mulug mo sihi fwahag wahkig gohugim ninumwehe fwahag asa God ehem lahag la nai ihlafofatigim esenagba asa sip-sipni nangwaghiawagig el kwania el feg. Afa sonag God sa ma elim olug enesieg fai ka membeg ehe sa ma nem enaig eseni.

<sup>21</sup> Afa ka membeg ehe sa ma nem suialag gafugagim ihlafenugeba asa ne heafna sawiegim patalfu. Afa Sisas Kraisna unehlag la God heafna membug la bigim esenigbi. Afa Sisas sa ma ehe sisi yi nemug fenam wahkig gwese gofufe eba nufunam.

<sup>22</sup> Afa nilite, masa ne kana hwag mo nem wasneinagim ne oksifi afa eba sonag ginof mas mungwanim feg mo.

<sup>23</sup> Afa ka membeg sa ne enaig anwenafi bigelni nilite Timoti ati kalabus lala nai fwaha blog. Afa atiaba ehe ikagna ka nangum blogba ka sa ahblo nem ahnangwag.

<sup>24</sup> Asa ne nengelni misog el mi afa mungwali Godna el mi sa ne enaig esogon og, ka mas nem etetigoni. Afa Itali la nai nilite nem gwenag esogonig.

<sup>25</sup> Afa ka membeg God nengelim mungwali nem esug kwagani. Hwa moba gwenaho.

## **Mo Jems Ginofena Hwa buk enaig esog**

Jems oyna Godna elim enaig ogfuiagim sa ne lahlag nihe pahluhu asa ehe nup lahlag mo ohna buk wa ginofena. Afa ehe og sa ma heafna mom numwehe anuwenafi asa ehe nup waskwas mo sihiagena.

Afa ehe enaig kigfutug mo sihina og, “Afa nofeka Sisasim olug onigig behig fena. Amo, sa ne mingnag elim lahlag nihe esenim. Enag lahlag nihe ogfug nembeafgelni olug onigig eba inimfeg.

<sup>1</sup> Kamba Jems. Kamba God i Ainiyag Sisas Kraisi enagna gafungag feagig el. Amang God sawiegba, enam ka pahlukugum. Israel el autinam ming gugi gohona enag pufambona, enagna bigel nub lual gohka, ena na mingnagwo Sisasna ati na fesaig, eso mingnagwo na nimbeafena kimbigim hwatigim ahua minifeg mingnag elni kimbigwa gohka. Ka nem ohuna mo enag ginofen enag koka nem osonum negeli sifakali.

### *Bigim gihnagba pugunimbi, eba bigim kifutinif*

<sup>2-3</sup> Negelmbi na kana nilite, ati na anuana fig, mayi nem amang amangba negelni olningigimba gihnimbi, ena gihnagmba mayi nem fenimbi na kifutye gofoghogba, emba God nem osonif “Negelni olningugugba yininewug feg.” Enaig nesegba, eso kifutye gofohonam gihinagba enam enag wambahufi. Enag mayi ahanaig gihnogmba nem pugunimbi, emba eso enaig sihi, “Gihnagba enag lahlagba.”

<sup>4</sup> Eso esinim kifutye gofohonam eso kinig enag wambahwi, enaigmba nesimbi emba na kifutinim, kifutininem newug na fif. Amang amang gihnagba nem esenigbi gweyi yikanam awaiegba, emba mas nem awaieni amang amang Godna minag ahuag esel enag mas nem awaieni kifutieg newug na gofwehe fuf.

### *Aman Godna olningigim etetiagegmba, eso ma Godum sahnai*

<sup>5</sup> Negel aman mungwamba Godna olningigim minag kag esel enamba esenam etetiagegmba, enaig elbi ma esenam Godum sahanai eso God enag esenam ogfunagef mungwal elim God ehe numwehe ogfunagef, Godba nalig olningugug enag faiyif, mas esenam nunumuangoi aman esel ehim sahanag enamba.

<sup>6</sup> Enam enag eso ma numwehenam olningnam fanam eso enaig numwehe olningigba Godba emba wa kwegofuf. Wesenam Godum olningnam enag wahiaf enai wa olif, “Godba kam kwegofome awaime?” Aman enaig sambaga olniba feimba, emba enaig eseiba li lofug feg mayi fufwei boimba eso liyim awiawugum pefuafaka fefak, enaig el wa fef.

<sup>7</sup> Aman enaig sambaga olnimba feimba, amang fegim enaig el enag ogum, “Emba God kam kwegofuf amang amangim enag.” Amanba esenam enai sambaga olnimba feimba, mas yuhwafei God ehim kwegofwagim enag, emba awaief! God ehim enag mas esenam amang amangba faiyi.

<sup>8</sup> Emba el enag sambaga olni wa fenam, asika asika wa fef mas mungwa mina sufugmba yikai, enag ahnaig God elim enam kwegfoahmo?

*Aman mambiyig fei afa amang amang amang numbni fei enaig enag esi ma Godum mungo sifakal ahfenai.*

<sup>9</sup> Aman nilite esenam amang amang hwanig feimba, eso ma esenam ol lahlafenam Godum, enag sifkalenai. God ehim esel gufifukug, mang yusug elmo, yawamba ati Godna feg eso enam enag ma sifakalenai.

<sup>10</sup> Aman nilite amang amang numbni fenam esegim, Sisasim olingnagba yuwanawo sisiyi alawieg fena ehenum enag, yawawo Godna fegim fahegagew olingigim ehenum enag opigim Godna feg eso ma esenam enam ol lahlafenam sifakalenai. Elimba ati anuanafeg, aman yuwanam amang amang numbni fena enag, enag yikagna awaief, lanaipos sisig lofug fenam eso wa yikagna awaief.

<sup>11</sup> Enaig ati big anuana fig osui pukogum nal bafeg lige ambiging lofug enaig mungwal linkfeng hutiatanig betenai enag eheasafegim kwehlasaig. Sisig enag yuwanawo lahlag fena eso fufegu awaieg. Gwenaig feg el gimba amang amang numbni lahlag fegim ahnaig ahnaig gafungag enag eseagakagim eso eseg wahagim enag enag gweyi awaief.

*Elim gihinag mo*

<sup>12</sup> Aman kifutig gohonam ahanaig kinig enag wamb fimba, eso ma esenam sifakal nahlum fefi. Ena gihnagim enag flafu aitiagmba, emba esei God ehim wani agagim enag esenaimba hegeg agag fef. Enaig enag wa esef God ese flafukaitig enaihwaba God wa hegeg agag enag faiyif. Aman Godum membe fenagmba, God ehim enag ninimo newugum enag osonag.

<sup>13</sup> Elim enag amang amang gihnaimba pugunaiba enaig gihnagim ena wa fei ka enai olim, “God kam esenagba ena amtakwalig enag keseg.” Eba awai! Ahnaig amtakwalig

Godum tukifehmo God ena, afa God enag mas esenam elimbi wambnam amtakwaligwamba esenifi.

<sup>14</sup> Emba el eheafena olugehe enaigmba eseagef. Ehefena olugehe amang amangim enam nangogum eso membena kagim og “Ka fam”, eso ehefena sawiegwa amtakwaliagegim ehim tuki waniki enag amtakwalig esegim.

<sup>15</sup> Enag elni sawieg amtakwalig enag enaig eseagef. Angwafig enugni esohwi esfafef, eso gweyi numbigim lual fukuaf. El enag enaig esef, enaba lual lofug, amang amang amtakwalig ehefena enag eseagef, enag amtakwalig enag gweyi numbigim pugugum eseagakagim gweyi wahag mungo fegim, el enag mas God i hegeg ahagafi.

<sup>16</sup> Kana nilite newug, nofekesinim olningim God kam tukifek wanikigim enag amtakwalig ena keseg. God ehe enaigba mas esei.

<sup>17</sup> Mungwalyi amang amang newug esel esegim yusug faiyig esel, enamba God mungo faiyini. God mungo bigim lahlag enag faiyini. Ena God Humwan mungwal afwambusugbi ehe mungo eseagena. Ena God Humwan enag osuwi gamba eseagena, mas esenam wahigimba fei osuwi sungwag lofug esel eseg yuwanam kwiye fena, enengim tumena. Enaigmba God mas esei.

<sup>18</sup> Emba awai! Emba esegim eheafena sawiegim mungo gweli pahalukug esegim bigelni humwan fenig. Ehena nihemo newug enag esenigeg bigim fukugum Enag esegim bigim enam, God onugum bigim Ainiyag, ehefena lualim enam, eso enengim mingnag elgimba Godna feasainam eso bigel lofug fef.

*Na mo higinifinim afa pahaluka ahuag fi*

<sup>19</sup> Nilite, ka nem membenemug fenig, numehenim enaig olinginim yikagna esinim mingnag elni mom enag higugifinim, afa eso afa liyaw afwahalanam enengim piske sihiage. Nofeka esinim yikagna ehim nunumoingai fim.

<sup>20</sup> Nunumu olningig mas bigim kwagani Godna minagam ahuagimba.

<sup>21</sup> Enaig agataikug ahnaig ahnaig amtakwalig klambalig esel ahunanam mungwal pugunugwageg, enam enag tatugonam hwatiagi, eso nimbefum wambu apeigonam ambogonam Godna ahanai singag mungo fi, ehefena mom enag numwehe higni. Ena moamba negelni sungwagim kwaganam kifuti gofwahinifeafuf.

<sup>22</sup> Nogofeka ena mom enag yusug hig hwatim pahaluk ahua hwanig. Enaigmba nesimbi emba nimbefena olugum na esigim mwakwaleonug. Numwehinim ena mom enag wambinim pahagياهو.

23-24 Aman ena mom higna wahianam, ese pahalukwia hwanigmba emba enaig eseg, aman eheafena nohmbo-sugum enag bunofwa nangogum afa bunofe fakagim, yik-agna etetig nohmbo-sug enag enumwana eyi ahnaig ehe feg.

25 Godna mulug mo enag bigim wambugum yusug gofohog feg (enaig fegim li we hwanig lofug) ena momba ninem newug fegim yuhwa sufug lahlag newug feg. Afa aman ena mom enag numwehenam fanam nangofimba, eso ena mom enag gwese pahlukwiafim ba ena mom mas eteti wahiaiba aman enaigmba eseimba emba sifakalig wa fef mungwal esel amang amang eseagegim enamwo.

26 Aman enaig ol nofefemba, “Kamba Godim pahlukuag el ka feg,” emba enaig elbi eseg mas eheafena megigim numehiageg mo, eheafena minag esegim Godim pahlukuag eseg Godna moaba esim eskum fatig, mas nufunam Godna mom pahlukui, emba esegim ehafena olugum enag ehe moakwalenag.

27 Aban lualim buluagim awagafag hwanigim enam lahla fenuge, afa angwafigim ligagim wahag enam enag yuwig-inim lahlafehiagi olkinigni feasaigmba, afa mingwo enaig fegmba eheafena minag ahuag ena yuhwa lahla feagig afa ohuna betenai elim amtakwal olni enaig mas fehiagigmo, aman enaig esegmba Godna nofwa eheafena minag Godum pahlukug enaig enag gweyi yuhwafeg, ati numweheg gu-fogbu, olug yini newug feg.

## 2

*Nogofe kesinim amangalimwo lahla fehiagi afa amangal-imwo amtakwalehiagi.*

1 Kana nilite, bimbeafena Ainiyag, Sisas Kraiss ofwanai puko fulok kifutuk lahlag newug feg. Ehim enam na olinginigmba pahaluk ahuagmba enag, nogofeka enaig esinim, aman amang amang numbi esel enamwo lahal fehiagi, afa aman amang amang hwanig esel enamwo am-takwalehiagi. Nogofeka enaig esinim.

2 Aman lahlag lofug agiagenam enaig esel bonam negilni lotu lalagam sahwagba, afa ming el lofug amtakwalig agiagigna ehe gamba bo sahwagba,

3 atiame enaig nesfafif? Na esig el esel lofug lahlag agiagembok, enamwo na figim sia lahlagwa washwik, afa ming el esel lofug amtakwalig agiagembok, enamwo na esigim nogog, “Bonam, sohyi gofum ohiyi bonam betewa mong muhwa pegafum.”

<sup>4</sup> Na suenaig eseahugmba, emba enaig na esigim na wambugum fahegehiagig nimbefena olug amtakwaligna. Atiame enaig nes fafif?

<sup>5</sup> Nilite, ka nem membenewug fenig, enag kana mom numwehe higi. Afa el amang amang hwanig wanai feg, afa enag elimba God ati gisfuhwatig of ma kam hohonam olingini fi. Yuwanam God ninimo kifutuk mo newug osona og, amangal esinim ehim membenewug fenimbi emba ehe-  
lim enag wamnam ehe agagwa wasanif.

<sup>6</sup> Afa nesigim el amang amang hwanig wanaim enam na ahwanifegonug. Afa ka nem sahnim, amangalwo nem esigim amtakwalehiagini? Afa emba amangal nem wanahugum kotgamba fegonug? Emba gwena elho amang amang numbiniho enaigba nem esegonug.

<sup>7</sup> Godba emba esegim nem wa wambugum Sisasna wunehala lahlagwo nem wasanig. Fegba na Sisasna el feasaig, afa el amang amang numbniwo enawo, emba esigim Sisasna wunehala lahlagim enam figim amtakwal mo sihinagigim kiapase fig.

<sup>8</sup> God nihemo kani mungo fainig, mingnag nihemo enag eseg li mog lofug feg. Enag nihemo enaig mo “Asa na esegim nimbefum na membigim lahlafeagig asa guenaig esei mingnag elim gimba membenim suwaulafehiagi.” Nenaig esinim enag nihe mom pataluk ahfuimba, emba Esinim enaig lahlag na esif.

<sup>9</sup> Afa na enaig esinim mingnag el numbni fena enamwo na embegonu lahlafehiagegba afa mingnag el amang amang hwanig enamwo na kwisigonu amtakwalehiagegba, esebe na fiimbi, emba nimbefum amtakwalig eseagif. Nihemo enag nem ati ogfunug na esigim amtakwalig na feasaig ena nihemom na tutofihiafigim flafug.

<sup>10</sup> Aman esenam mungwal nihemom enag pahalukuanam, afa amang mungo nihemom flafumba, emba ati amtakwaleg, mungwali nihemom enag flafug.

<sup>11</sup> Ati big olinigig God enaig mo osog, “Nofeka angwafig awagwanaim flafatinam fam,” afa “Nofeka esenam el tigeakam.” Afa na esenam angwafig awagwanai flafati hugufa hwanig na fenam, afa na elim mungo tigeakag enaig mungo na fenam, emba mungwali nihemom enag gweliehe na flafog.

<sup>12</sup> Enam enag esini olingi enengimba God newa esenam fahegenugug fef, ena nihemom pahaluk ahuagim enag. Enag Godna nihemo enag enaig osog, “Nimbefum na membenagim na lahlafeafag eso gwenaig mingnag elim gimba gweseni.” Autinam osohwi amtakwalig ahnaig ahnaig big

eseahufena, we osohwi liyim kikefukog enaig lofugbi big feasaina. Afa enag yawamba Godna nihemo enag bigim wambugum li lofug enaig big we hwanig pitiga feg amagam gofohog feg. Enaig esinim eso ena nihemom enag pahalukuafimba eso moi minag kagi enag yuhwa gweyi ahuafi.

<sup>13</sup> Afa aman esenam mingnag elim afafeni hwanigba, emba wa God ehim esenam fahegefanam, God enamba mas afafenai. Afa aman esenam mingnag elim enag afafenigba, emba enaig eseg amang amtakwalig esenamoho. Afafug esegim enag, emba God ehem afafenai.

<sup>14</sup> Kana nilite, aman wa sof wa ofei, “Kamba Sisasim olin-genag el,” afa eh efena gohnegim enag lahlafeaka hwanig, elimba Sisasim olningna kag newug enag ehena olyi goho hwanig feg. Enag olningba ehim kwegfoime enag hegeg agafuf? Emba awai newug!

<sup>15</sup> Afa aman nisa, mulual esinim lofug hwanig ninegegba emba wohof hwanig feg

<sup>16</sup> afa esinim negelyinai aman mulwangag enaig mo wosof, “Ma God ne lahla feafai na esei lofug lahlag fati afa mas nem ninegei afa na wohof ne fei.” Afa naman enaig mo osonam elim enag, afa nesenam ohof lofugna lahlafe fa hwanigba enaig elim enag, afa enaig mo bihinigba elim enag emba asenam ena elim enag kwegofuf? Awai!

<sup>17</sup> Enaig elni olungugug bihinig enag emba esegim mom bihinig yusug feg. Olungugug mungo fenam, afa amang amang esel eseagigwo hwanig eseli enag olungugug mom bihinigwo yusug fegim, emba olningig enag wahag feg.

<sup>18</sup> Afa naman enaig mo wa osogof, “Kawo olungugug feg, afa wa nawo lahlag minag kag enaig feg.” Emba kikewa enaig mo nem osonaf, “Ahnaig nesenam, kam ogfunahmo na minagim kag lahlaka feg hwanig afa wankeneg olungugug na feg? Enaig enag ahnaig neseahmo? Kikehmba sa ka esei minag lahlag kag enag ka eseagei, lahlag minag kag enag sa ka esei kikefena olning olungugug newugum enam ogfunagef.” Ka nem enaig mo osonaf.

<sup>19</sup> Ati na enai anuana fig, God ena mungwehe aga. Enai olmbi na feimba, emba yuhwaho feg. Satanba (ming wunehalamba Wuflog), ehena nihiyinai enag ehngamba ati enai anuanafig, God enag mungwehe aga. Enaig anuanafig, esigim afa Godum embefenag enag kukugia faka fig.

<sup>20</sup> Mwetetig elna olningig mungo na fenam, afa enaig gamba na esenam, lahlag minag kag enag na fe hwanigba, emba nyana olningigba yusug feg. Emba enaig ka nem numwehe ogfunaf, enaig na membegho?



<sup>21</sup> Autinam bigelni simbiagag Abraham esena eheafena legim Aisakim fanam ona na tige suwiwa tuhulu lanam Godum faiyim. Enaig mayi ona nawo tigenam, enaig Abraham Godna mom pahlukuk, God enag enam nangonam eso God ehim enag sufug lahlag newug el moaogona.

<sup>22</sup> Ati nolningig ehena minag kag lahlag enag enaig esenam eso ehena olningigwo enag gweyi yuhwa newug feagena.

<sup>23</sup> Ena mo God enag autinam esel esonamba eso mingnag el ginofini. Ena mo enaig osona, “Abraham esenam Godum enaig olningena, enaig olningig enag God nangona osona ogum ‘Abraham ba yuhwa sufug el newug feg’.” God enaig osona eso mingnag el Abrahamum enaig sifafifini, “Godna hiheg newug.”

<sup>24</sup> Enag enaig ka nem ati ogfunig, enag ati nolningig, olningig mungwamba mas Godna nofwa enag yuhwafei, afa aman minag kagim gamba lahlag feimba, enaig elbi, Godna nofwa enag yuhwa newug feg.

<sup>25</sup> Afa Rehap gamba gwenaig minag kagim lahlafeina, eso God enaig osona ogum yuhwa newug sufug angwafig. Autinam Rehap enaig esekafena angwafig amtakwalig fena. Afa sumiyimwo enag angwafig enag enaig fena. Mayi Josua el sambagam ningihiaogonamba Jeriko kimbis naligim, bom kukog el sambaga enag, enam fahegagahfekagim, afa eso ahkanam Rehapna lalawa ahpuguna, mayi Jerikonai el ogona, “Nawo patigiagkaogum,” Rehap enaig esenam, olinam ena sambaga elni Godba yinim newug feg, enaig olinam enag Rehap el sambagam enam kwegfwaogona, wamtinam kumwatigina afa ming mina ningihiaogona, eso Jerikonai el mas patigimo. Rehap enaig esenam, enag God Rehapim lahlag moaogona (ogum ati yuhwafeg).

<sup>26</sup> Ati big olningig enam enag, elig enag sungwag hwanigba emba esegim ati wahag. Afa gwenaig feg aman esegim olningig bihini fegim afa minag kag lahlag eseg hwanigba, emba ehena olningig enag esegim wahag lofug feg.

### 3

#### *Nimbefena ningalni melegim numohsaf wambufehufum*

<sup>1</sup> Nilite, nogofeka etitinim el ogfugonugug el fim, enaig gafungagim enag. Ati bi olingig, enengimba God wa ogfugonugug el tizam enam numwehe newug fahegenugef afa mingnag Kristen elimwo afwahalana fahegenugef.

<sup>2</sup> Big wahig mungwalyi ahnaig ahnaig wesigimba big esig fapegof afa esenam aman el mungoga amtakwalig mo e nag ehena mengwo pugua hwanigba emba esegim lahlag el

newug feg. Emba esenam ehafena eligim mungwalyi gamba enag numohsafefuku.

<sup>3</sup> Ati big anuana fig big esigim ain tofagna hos sisim enag memtowa angangim kaga tigezim weana huhugeagezim esegim enag enanayi kikehalagim fag oghuhnife. Big esfafif amang enag ahnaig ahnaig big osofifimbi emba sis hos ehe enaig esef, enaig big ehim enag esinim eligim nalig enam big we wesigna wahigi fehiagif.

<sup>4</sup> Afa big siplalam gamba olingig siplala enag nalig ehe fegim, afa fufwei nalig fagim asim famba oagna okum siplalam enam afa ena siplala naligyi stia amta wesig ati enanayi oghuag sip kepten asim kagim mwaogogum eso fag enanayi okuk. Afa gwenaig feg li nalig fegim eso we wesig na pifuakug eso ahana minagam og ma kai enamba we wesigni pifuagim fsafakug.

<sup>5</sup> Meleg gamba gwenaig fegim eseg, meleg enag wesig newug fegim afa enaig esegim motonugezim mo pagpagiahiagi. Ati na anuanafig suwi gamba yuwanam amtawesig newug fegim emba esef pugunam naliagenam eso pos nalig lagef sangwal nahalum, enaig feg.

<sup>6</sup> Bigna meleg gamba enaig fig, enag suwelofug leageg. Elig mewa wesigehe fegim, eso esegim ena numbiageg ahanaig amtakwalig etini enag, esegim eso eligim wo mungwal kagef elig ena gweyi pugugum amtagwalig fef. Ena meleg enag esegim suwe lofug enaig wesig meyiz pugugum lakagim. Enaig Satan enag amang amang amtakwalig esena, afa eso suwi lofug enaig esena enag ehe suwi enag wehlana.

<sup>7</sup> El enag esigim mungwal sis sangwalyinai enag, ahanaig sis, tuafig, sombine, sawug enam wambugum yuwigigbi numo sahfefaf elni ningagawa nihiyi gofohogum yuhwa esig elni mom ang higugig pahlukahuf. Autinam enaig esini afa enam enag yawangamba gwenaig esig.

<sup>8</sup> Afa as aman melegim numosafefagim yuhwafegmo gwenaig sisim esegonug, ahnaig esigim m elegim enag numosafefahmo? Emba awai! Emba esigim wahig memtog enag wahigi wahigifig ahanaig mo amtakwalig. Wahig esigim ahanaig mo amtakwalig eseagig, mo gwenag agisuwi lofug fegim. Mo amtakwalig enag gwenaig feg.

<sup>9</sup> Mengigwo big lahlag mwaogogog Ainiyag mi bimbeafena Humwan mi enag. Afa God enag big elim enag mungwal eseagenam wasana ehaf lofug enaig esel, afa big mengigna enag mingnag el, enam gamba God eseagena, elim enam big amtakwalehiagig.

<sup>10</sup> Mungwa mengigwa mo sabaga ahfeg, yuwanam Godum lahlag mwaogonag afa enengim mingnag elim amtakwalig mo feg. Nilite, big nofei enaig esim.

<sup>11</sup> Mas ahana bu bete meg mungo yinai esegim enaig pugugmo? Yuwanam bu lahlag pugug afa enegim bu nuhwefni amtak pugug. Ahnaig bu enag pugug? Emba awai newug!

<sup>12</sup> Nilite, hwatamba enaig eseime, hwatamof lenam wahigifenam, ming lifugum sigeime? Afa baf li gimba enaig eseime fug ena lenam wahigifenam hwatamofugum sigeime? Emba awai newug! Afa gwenai feg bu nuhwefni enag pugunam mas lahlag bumba pugui. Afa ahnaig big elni meleg gwenai esihmo?

<sup>13</sup> Negelyinai aman mugo lahlag olug anuana olugnigug fegba, asa mesenam minag ka lahlag enag gohminifei yuhwa lahlag. Afwahalana so enaig esenam Godna singag fenam, enaig esegba, eso eh efena minag kag lahlag enag esena mingnag elim enaigim ogfuni eh efena olungugugwo enag lahlag newug feg.

<sup>14</sup> Afa atiame mingnag negelyinai amtakwalig olug enaig esig na fegonugig mingnag elim afa ne enaig eseime nimbefena wunehalamwo hognam nalg newug fukwalagom sisiyigam, nenaig esigim nofeka enam sifakalinim. Enaigba nesigbi na Godna nihemom enag na yafiflag, na mwakwal lofug ga na feg.

<sup>15</sup> Enaig olungugugba enam God mas faigmo, elimba ohuna betenai, enai olungugugba Godna Sungwagna, Holi Spirit, enam mas faigmo emba awai newug, emba enaig olungugug enag Satan Wuflogna nihiyinai feg.

<sup>16</sup> Mayi mingnag elmbi ahanaig amtakwalig esinim mingnag elim amtakwalig esegonugimbi, esinim eh efena wunehalam gufyi fukwala gonam sisiyi hugnam amtakwalehiagigimbi, enaig elni nihiyi enaig gohonugum esea-gahugba, eba esigim, mungwal enaig enag amtakwale sun-gofig, yuhwa fe hwanig ahanaig amtakwalig esigim gweyi pugugum amtakwalig newug feageg.

<sup>17</sup> Aman lahlag olungugugna enag God faini, emba enaig esfafef lahlag olug enag eseagegim ahnaig ahnaig amtakwalig olungugug sahkenig, afa ming gwenai feg mungo olugna lahlag fehiagig (afwahalana lahlag fehiagig) afa ming gamba enaig feg mingnag elim enag enana olningnim afwahalana fahegiahiageg, afa ming gwenai feg afwahalana lahlag olug mingnag elni mom higinigim afwahalana ena mom enag pahalukwiag afa ming gwenai feg mingnag elim nangwagegim afa wahanig nemog fenageg kwaganyeg

feg afa ming gwenaiḡ feg mungo kafolug moakulug mungo enaiḡ feg mungwal elim enaḡ afa ming gwenaiḡ feg mas mwakwalenageḡba fei, emba inim mo fegim. Godna mo lahlag nemo feg.

<sup>18</sup> Aman afwahalana olug eseageḡba mungolug mungwalim enaḡ enaiḡ lofug. Afwahlana olug enaḡ nog lofug. El enaḡ ena nog yihignam eso fug gweyi pugugum lahlag feakef mungwal gohminefef. Ena fug enaḡ enaiḡ feg, emba elni minag enaḡ enaiḡ lahlag newug wa fef, eso ming el gimba gwenaiḡ pahalukahuaminife.

## 4

<sup>1</sup> Bagageahug nunumu enaḡ ahana minagam fa puguf negelniyi enaḡ? Ati enai olningig na fig nogof, “Ka kifutuk esenam amang amang ena kikefum wambugim lahlag olug sifakalig ka fim.” Enaiḡ olug enaḡ mungo mungog elni olyi enaḡ enaiḡ fenig enaiḡ olningig ol mewa enaḡ eseagig enaiḡ goh. Olningig enaḡ olyi nugwageḡim enai bagagig fig.

<sup>2</sup> Amang amang enaḡ nog kawo nog ka esinim wambugim, afa na wambugig hwanig mas figmo eso nesigim elim enaḡ nog ka kukwag sungofena. Na hognam esigim memb naliḡ newug feagigim, afa na wambu hwanig figim mayi awaieḡba eso na hognam olug kakageḡim na nunumingayi fig. Godum na esi sahnimo amang amang wambugum enaḡ, enaḡ nesigim wambu hwanig gik amang amang enaḡ.

<sup>3</sup> Enanayi na amtakwalig olug enaiḡ feg, yuhwa feasaig hwanig. Enaiḡ na ahananam esigim Godum sahinigbi amang amang enaḡ nog “Ka wambum enam,” afa so na wambug hwanig figim. Nogog ka esi wambunim eso nimbefum mungo lahla feagim, enana enaḡ.

<sup>4</sup> God ati nem esegim wambuk, afa nesigim biskigim ohuna betenaigam ahug, Godum na enaiḡ wahiagba, agataikuna gofwamineḡ lofug enaiḡ na fig. Amangal enaiḡ esigim ohuna betenaim na membim enaiḡ eseahugba, emba Godum ehe na amtakwalefigim kwisinig.

<sup>5</sup> Baibel enaḡ enaiḡ mo esog, “God eh efena Sungwagim esel big elni olyi washog. Ena Sungwag kifutuk newug enaḡ bigim memb naliḡ newug fenig bigim enaḡ og, ‘Kana mungo ma fi.’” Afa enaḡ Baibel mo ba, amang nogog, yusug mom bihinigho?

<sup>6</sup> Enaiḡ nesigbi amtakwalig, afa God enaḡ enaiḡ eseg emba bigim kusguni naliḡ nemug fenugeḡim afa fegim bigim kwaganig feg eh efena mom pahlukahuagim. Baibel mo enaiḡ osona;

God kalambalig elimbi pega wambupefef, afa aman el eh-fum pegaugug opeigba Godna singa fegba enag enaig elimbi, God kisigu nalg fenigim kwaganig feg. *Snd*  
3:34

<sup>7</sup> Nimbefum nimbehe enaig esi epikunam Godna singag finim gofwehe, ehfena mom pahlugafum. Enaig esi, Satan Uflogumo plauwofati emba sa esenam Satan ehenag embem ikai.

<sup>8</sup> Enaig esinim ahunam Godna muhwa apukugoimba, afa God gamba gwenaig esefe bonam negelni muhla fenif nem wangafuf. Amangam amtakwalig esahugba eso nimbeafn-galni olugum enag gigiafeaginim lahlag feagi, gwenaig big ningagagim buwa suflagim lahlag feagig enaig olugum ma fei. Amangal esinim sambaga olni figbi, emba asa ming amtakwalig olugummo enamo hwatigoi.

<sup>9</sup> Nimbefum fahegaginim olningugi amtakwalig newug esel na fegig enam, enam ahwanif fenim, eso enam kinig finim wewu fei, titige hwatinim wahigifinim afa esinim weawu numwehenim nalg ogoi, yawo esel na sifakalig afa enam enag wahigifinim olkinig nalg newug fegi.

<sup>10</sup> Nimbefum enag pegaugupinam, ahwanifinim, enaig apeigonam Ainiyagna singag fe, enaig nesiimbi, emba Ainiyag nyana wunehalam gufiyi wembufukuf.

<sup>11</sup> Kristen nilite, nogofei ka sumigim amtakwal mo wag-onuf mingnag Kristen nilitem. Aban enaig nilitem es-enaimba, elimba Godna nihemom enag og amtakwalig feg. Afa na Godna nihemom fahigagenam oi amtakwalig, enag elimba nesegba mas na Godna nihemom pahlukugmo. Awali nemug. Jas amtak lofug na feg.

<sup>12</sup> Afa amang fegim na jas lofug enaig feg? Mungwehe enaigba feg nihemo lahlag faiyigi afa ahnaig ahnaig fahege-hianugeg jas yinnewug enag esel feg, enamba God mung-wehe feg. Ehe mungwehe yuhwa newugba fegim mingnag elim enag wankeneg hegeg augwiagim fafaiyif afa mingnag elimwo enamwo amtakwalehiagef. Ehe mungwehe enaig kifutukba feg. Afa naman enai olimbi na feageg, na enai ol unguguegim mingnag elim fahegehianigigimba enaigba? Enaigba amtakwalig!

<sup>13</sup> Amangal na enaig mo osogoimba, “Yuwai me big ahuf, sini me big ahuf ming kimbis nalgim enam nesinim stua gafungag lofug enaig feagigim mungo krismas ga enaig. Neso esinim mani nalg gi enag numwehenim wambum.” Amangal na enaig mo osogoimba, elimba ka nem enaig mo osonug,

<sup>14</sup> amang na enai olig, Godim na etetinig, negelbi anu-anamo amang ehe amangwo pugunufe sinimba. Negelni

augagba ahnaig maia? Nemba leango lofug enaig feasaig, yikagna pebogum asa fukukag gweyi awaieg.

<sup>15</sup> Enaigba ohunaig mo ehe osogoi, “Ainiyag na membugba, siini i esinag i enag yisehe big augwiafuf, anuanamo amansihe bigim pigif. Afa ehe membegba, emba sa big ahnaig ahnaig gafungag ga enag eseagi.” Enaig mo ga ehe osogoi, emba yuhwa feg.

<sup>16</sup> Afa enaig nimbefum enag nesig, nimbefna olyi kalambalig enag nesegigim mingawo nimbefena wunehalamwo gufigim fukwalgog. Enaig kalambalig enag elimba enaho amtakwalig newugba feg.

<sup>17</sup> Aman enam enag kag suwealagim enam ati anuana fegim afa enam enag pahlukuag hwanigba, elimba gweliehe amtakwalig enag eseageg.

## 5

<sup>1</sup> Yawo hig nimbehe el amang amang numpni enag, numwehe olningugi, emba olkinig nalog nem pugunuf, enag ati esinim, nimbefena kinig nalogim enag afafenim wewat nalog ogufum.

<sup>2</sup> Negelni amang amang gawig enag, wahegageg na nuwageg mungwalyi nongiagefe negelni lofug mungwal enag kinkenig ahagag ofi.

<sup>3</sup> Nimbefngalni golum silvam enag nyana bwambugu-genugofe. Ena bwambugug enag emba esenam amang amang amtakwalig esel na eseagehufena enag esinim wambuk apekgof nimbeafngalni eligim enawa nem eseasaif suwi lag lofeasaif. Bete awaiegim ati muhwa ofe, enana wa kanam awaief, afa enag negel enag gwesigim mahiyim mungwal gawig enag na wambugigim mungowa nuwagahu.

<sup>4</sup> Numwehe nangwinim higugi! Nibeafngalni aso gafungag wanai elim enag ehelni mani enag na yuhwa faiyigog hwanig. Ehengelni mani nalog enag na nimbefum wambuk, ena man enag wunonuk amtakwalig esel na esegonug. Afa eso gafungag wanai el enag wewat ogog. Ena ehelni wewat enag yikagim Ainiyagna ang megam sahog. Enag Ainiyag enag ofwanaini betenaini, enag mungwalni Ainiyag.

<sup>5</sup> Na wahig ohuna bete wa enag ogwieahba, na lahlag ogugum, amang amang mungwal enag na wambugigim nimbefum mungo na lahlafeagig. Nimbefum esigim elig numbiageasaig, enaig nesigim nimbefum enag meini feasaig sis lofug kuwagim ahagag lofug na feasaig. Nimbefum enag nesigim sis nalog osohwi fa tata lofug na fig wohof nalog ahagagim eso muhwa tigungim ofe, enaig lofug na fig.

<sup>6</sup> Nesig wanigim tigekegim sufug elim enag ahnaig ahnaig esihwanig elim enag, afa nem mungwag tige hwanig esmunagim na kugwagsungog fig.

<sup>7</sup> Enaig fenamba, nilite, esinim olug kifutiaginim afwahalana kwisieg augwiag finim, nisanafafum Ainiyagba emba wa bof. Enam elingi aso yihugug el esel esig, esigim afwahalana kwisieg agagim nanguwog ogum enag aso enag ma afwahalana ehe pugunam lahlag fug lei. Aso yihugug el enag enaig esfafif afwahalana nanguwogum osu bu enag ehe eseagei ehe ma eseagenam eso ago enag ma numwehe pugwi.

<sup>8</sup> Afa neangamba eso gwenaiig nisanawog ehe fei, kwisieg mwahalai augwiag. Gwenaiig feg Ainiyag bogum meini feaka, enag emba ese mwahalai kwisieg ol lahlag augwiafum.

<sup>9</sup> Nilite, nofeka esinim nimbefum mo bagagig esim ahnaig ahnaig mo amtakwalig, afa mingnag elim sumigim amtakwalig migig wagoni haig haig mo. Enaigba nasibi, emba esinim negelimba munguag wambinim kotgam wanahuf. Jas newug, God, mengig muhwa go.

<sup>10</sup> Nilite, negel enag piske olingi autinam God mo faini ona sihiage ahu enag profet elim enag. Ena profet elim enag mingnag el wambinim amtakwalehiagahufena. Enaig mayi esegonufinimba afa ehelwo es mwahalai gweyi kwisieg esegonu ahufena. Ehel enag enaig esinimba, enag enag nem ofugonug, negel enag eso gwenaiig esi.

<sup>11</sup> Ati big olningig amangalbi kifitinim kinig amtakwalig (nalg) wambahugba, enamba yuhwa mesinim sifakalahufi. Ati na higni Jopna mom, Jopba olkifuti gohnam kinig nalg wamp kafena, es mayi fenamba eso Ainiyag kwegofonam mungwal amang amang etini enag wambwaina. Ati big olningig, Ainiyag na afafug enag esegim numwageg bigelim kisigonug.

<sup>12</sup> Ai! Nilite! Yuwanam esinim enaig olungugi kifuti, nogofeka kifutig mo osogonam agi kweogonam esinim ofum betem amang amang esel enam enam amtakwalig nahalum mwalampli uhugigim kifutig mo enaig. Enaig nogofeka esim. Ei, mwaogogogmba, eso gwese wahiyi afa na esinim awai mwaogogogmba emba eso gwenaiig gwesmungogonam wahiyi. Na enaig kifutuk mo kweogoimba, emba God nem yuhwahonam wambinim waginim amtakwalehiagef.

<sup>13</sup> Atiame na esigim mingnag ahnaig ahnaig amtakwalig kinigni gohka? Aman el enaigna fegmba, eso mesanam Godum sahanai. Afa aman esenam wankeneg lahlag

sifakaligna fegmba, eso ma esenam sangikuagei Godna wunehalam sisigam gufyi fukui sifakaligna.

<sup>14</sup> Afa aman nilite esenam gihnanga fegmba eso ma esenam sios wanai anuana el nangwagiahiagigim ese wunonimbi, eso ena anuana el enag ma esinim Godum sahini ehna gihim enag, afa esinim wel bug susulanagi eligim enag Ainiyagna wunehalawa.

<sup>15</sup> Enaigim olningi ogoi emba God esenam ehim enag kwegfuf. Enai elbi figbi, enai olinim esinim Godum enag sahininiimbi, emba Ainiyag esenam ena gihnam enag lahlafenagenem gifiohluf, ena gihna el enag ahnaig ahnaig amtakwaligesegmba ena gamba God wa wambihianagef.

<sup>16</sup> Enaig fenamba, enag esinim ahnaig ahnaig amtakwalig nimbefena enag ambawa mingnag nilitem ambawa sihigonugimbi, eso enag nilete enag mesinim nem sahini. Feimba God esenam negelim enag lahlafehianigef. Aman el Godna fenam yuhwa sufug fegmba, afa Godum sahanaimba, emba ehna sahig enag kifutuk yuhwa feg.

<sup>17</sup> Elijah gamba el bigel mungwa lofug. Enag enaig esena Godum kifutinam sahana buum ogum masa fef, afa eso bu enag fe hwanig 3 yia fenam afa ming yiawo olugi fena.

<sup>18</sup> Enaig esenam afa enengim pisenam mayi Godum sahanamba, eso pisenam bu fenamba afa wohof asonai lahlag puguakana pisenam.

<sup>19</sup> Kana nilite, afa aman negelyinai nilite mungo esena etetiagakagba Godna ninimom enag, eso ming nilite kwefonam piske wanimbui. Enaig ming nilitem enag esenagba, eso ma esenam enai olig

<sup>20</sup> aman esel amtakwalig elim kwegfogum mina amtakwanai sulufa God nangum wanimbuk. Aman enaig esegmba, emba ena el pisenam enaig elim enag ehafena sungwag faf, mas esenam wahai. Enaig enag eseimba emba God esenam ahnaig ahnaig amtakwalig wahigageg enag God wambihiafeg.



## **Angig Mo Pita Ginofena Hwa buk enaig esog**

Hwa bukba sihigba emba Kristen elim kwaganigim afa ehengelni olug onigigim wasneihanugi sa kinig kwania kahlig. Afa enaig sihifeg, Kristen el sa ma pese onigi Sisas Kraisa na suialag mom. Enag mo eba enaig sihifeg. Sisas lahagim afa pese buhiagim afa ehe hwaig sihifeg fwahag, ehe pese blofe. Ehengel sa ma fwina onigiaflafi sa ehe heafna mo sihi fwahag enam ningiaflafim ehe pese blofe. Eba nufunam enag Kristen el kinig kahlig, eba Kristen na olug onigigim yuhnag og, sa ma olug oniginam wasnei afofiba sa ma ikagna Kraisa pese bloi. Afa enanam ehengel suialag augu flife.

<sup>1</sup> Afa ka Pita Sisas Kraisa kanog fwahag el. Afa nengel Ju el Sisasim olug onigig na ka nem hwa mo faig. Afa el nem fegonigigbi asa ne nimbeafna kembangim fwahigim mingnag kembang gam ikaminefeg. Afa glau nengel provins Pontus afa Galesia afa Kapadosia afa Esia afa Bitinia enanai yi gohka.

<sup>2</sup> Afa autunam God Api nengelim wefug fwatig sa ne Sisas Kraisa mo patalfuiba asa heafna tafna nem gigiafeni. Afa Godna Sungwabug sa ma nem esenibi asa ne afsug el fi. Afa ka membeg sa ma God nem fwina esug kwaganig i afa olug enesieg i fai.

### *Suialag nofekagag bigim heven la nengen go*

<sup>3</sup> Asa big God eba Ainiyag Sisas Kraisa alagim suialag oni. Afa ehe bigim kwania aflafenigim asa Sisas Kraisa ningihiagim afa ehe pese biteg kife nai ilafo fatig. Afa enaba God bigim mulug nofkenagag faig. Afa big ati anwenafig Godna mo sihi fwahag eba ehe nufunam esefe.

<sup>4</sup> Afa suialag gawig God bigim ona fai asa big enam glau nengeafo. Afa God enam heven la faka fwahag afa enanai yiba eba mas nogi afa amtakwale afa awaie.

<sup>5</sup> Afa nengel Sisasim olug onigigbi asa God heafna wasneigni nem kikagfo lambfiego afa sumi yi osuna ehe nem ambala pese lambiba asa ne suialag augufefe.

<sup>6</sup> Afa enam ne onigigim asa ne sifakalig. Afa glauba mwakwalig ne haig haig kinig yi susug flig.

<sup>7</sup> Afa enag kinig nengelni olug onigigim yuhni fi nufunam me awai awai me. Afa el golim suwi la tuhlfugba og sa ma nufunam gol pugui. Afa enag golba mas wahkig gofi. Afa nengelni olug onigig golim gosenag afa kinig nengelni

olug onigigim yuhnigba asa ma enaba olug onigig wahkig gofufe. Afa maia enanam Sisas Kraiss ambala puguiba afa sa ehe nem sifakalenim nengelni unehlagim fingi fenfi. <sup>8</sup> Afa nengel ehem mas nangug mo afa ne ehe nai yi fwina onigig lugwafba afa glau nengel ehem nangu fwainig fig afa ne ehem olug oniginigim asa ne sifakalig. Afa enag sifakaligba hwa bite nai sifkalim gwesim hilifenag enaba mo mas ihla ogfui.

<sup>9</sup> Afa ne Sisasim olug onigig la kehla guba asa God nengelimb lambgofufiba afa eba ne suialag afofufe.

<sup>10</sup> Afa Godna mo fli sihiafule el sihini og Godba nengelimb esmunagim kwaganife. Afa enag el mogim yisigigim afa fahiginim ha mina bigim Godba pese lambife.

<sup>11</sup> Afa autunam Kraissna Sungwabug ehengelimb sefugohon finiba asa mo ehengelimb mengig la enaig sihifeni og ilawanaba Kraiss eba susug flanam asa sumi mo ehe kwania unehlag nemug flafe. Afa ehengel sahani og, eba amban maia afa ahnana sa pugufe?

<sup>12</sup> Afa God ehengelimb mo fli sihiafule elim ogfunig afa heafgelimb gafugag eba mango hefum mo eba nengelimb sumi naim kwaganig. Afa ehengel ena mo sihinibi afa glau ne gwenaig mo higig. Afa God heafna Sungwabug heven la naim ningihiagba asa heafna wasneig yi el Godna suialag mo sihigbi afa ne gwenaig mo higig. Afa mangwal suialag God sa bigim esinigbi oflanai el ogra enam anwenafi.

### *Sa big afsug kabag el fi*

<sup>13</sup> Masa nengelimb onigig haig haig la ikaminefenfie sa ne Sisasna mo numweheg kehlagufiba asa ne nof feagegofim. Afa sa ne gunag onigig la afohiefiba asa ne nenge afofum eba maia Sisas Kraiss ombusug yi puguiba asa God nem esmunagim kwaganife.

<sup>14</sup> Afa sa ne Godimb higina ofenaiba suialag luwal. Afa nimbeafna sawieg nengel nai yi go maia nem anwena gohug fwainig fenagba nofeka enam patalfu.

<sup>15</sup> Afa God nem awamonag eba ehe afsug kabag el feg. Afa nengelimb nihe gafa sa ma gwenaig afsug kabag fe.

<sup>16</sup> Afa Godna ginof enaig esog;  
Kaba afsug kabag feg asa ne gafa gwenaig afsug kabag fi.  
*Wkp 11:44,45*

<sup>17</sup> Afa maia nengel Godimb ahsahnifibi asa enaig seflififi Api. Afa God elni haigimb fahigeagegim asa mungwali elim mungwa mina kwefihianugeg. Afa sa ne onigi hwa bite mango nimbeafgelimb mo eba maia ne nofkenagag gofiba sa

ne enaig onigife, masa kam God kwefihianagefe eba kana nihe sa mas suialafeg mo.

<sup>18</sup> Afa autunam ne nimbeafgelni simbianigana nihe mo la ne gofena afa enag nihe nem mas kwagana mo afa sa nem God enanai lambig. Afa ehe mango bitenai wagna silva afa golna esei mo amo enaig eba sumi yi amtakwalig saihe.

<sup>19</sup> Eba Kraisna taf fwina numwehe fukog enana God nem lambig. Afa Krais ofenaiba sipsip luwalig mangwal ehem feg fwainig asa Ju el sipsip tigi tuhlu Godim faig lofeg.

<sup>20</sup> Afa maia God bitem gafugafeg fwainig maisim fiahfenaba afa enanam Kraisim ati kanog fwahana. Afa hwag osuna eba sumi yi osuna asa Krais ambala ati pugugim nengelim kwaganig.

<sup>21</sup> Afa ne Kraisna mo kehligim asa ne Godim olug oniginig. Afa God ehem biteg kife nai ilafo fatigim unehlag kwania faig. Asa ne Godna mo oniginigim afa ne nenge afofofe ehe heafna mo eseba nufuna pugufefe.

<sup>22</sup> Afa ne nufuna mo higigim patalfugba asa ne afsug fig afa ne Kristen nilitem membegonug. Afa enag membug onigig sa ma nengelni olug yi gofi.

<sup>23</sup> Afa Godna mo eba nofkenagag mo gwese wahkig gofufe. Afa enag mo nem fuklag mulug nofkenagag faig afa ofenaiba alag mas lahai.

<sup>24</sup> Afa Godna mo enaig esog;  
Mungwali el pos lofug eba mwakwalig afohie  
afa ehengelni suialag gawig pos sisig lofug eba awaienfi.  
Afa pos fofenam afa pos sisig bogohia apaiyefe,

<sup>25</sup> afa Ainiyagna moba gwese wahkig gofufe. *Ais 40:6-8*  
Enag mo eba Godna suialag mo el nem sihigonug.

## 2

### *Ainiyag eba nofkenagag sumul feg*

<sup>1</sup> Afa sa ne mungwali amtakwalig nihem masigim fati. Afa nofeka mwakwal mo sihi afa sambaga mengigna fi afa ambobugiagi fiahgi afa elim sehii.

<sup>2</sup> Afa luwal ninganai mas mangwalim onigi eba ehe tumungu membenag afa ne gafa sa ne Godna nufunam fanem membena. Afa enag fane nengelni sungwabugim kwaganiba sa ma wasneig fei asa ne ihlafenam sa ne God i suialag hawag ahfe.

<sup>3</sup> Afa Godna mo enaig esog, “Ati ne nangug Ainiyagna nihe eba suiala feg.”

<sup>4</sup> Afa Ainiyag eba sumul nofkenagag feg afa el ehem fahige flinim og eba amtakwalig. Afa God ehem fahige fiaflagim og,

eba suialag asa ehem kanog fwahagba asa big ehem nangum afu.

<sup>5</sup> Afa nengel gafa nofkenagag sumul fig afa Godna Sungwabugni wasneig yi ehe ogna nem esenibi asa ne Godna lala fife. Asa nengel afsug pris fig afa Kraisna unehlag la sa ne suialag nihe Godim faig ofenaiba pris sa Godim sis tuhfu faini.

<sup>6</sup> Afa Godna mo enaig esog og;  
Sa higim, autunam ati ka suialag sumul kanog fwahana eba mingnagim gosenig afa fwina suialag lala sumul feg eba ka Saion kembang fakag.

Afa ambangel ehem olug oniginibi eba mas afwanfi. *Ais 28:16*

<sup>7</sup> Afa ambangel sa ne olug onigig enag sumul eba nengelim suialag nemug fenig afa ambangel mingnag mas olug onigig mo enaba ming mo enaig esog;

Afa lala nimblag el sumulim fahigenagigim og eba amtakwalig sumul asa esugum fatig.

Afa sona sumul eba ehe gosegim afa fwina suialag lala sumul lofug feg. *Sam 118:22*

<sup>8</sup> Afa ming Godna mo enaig esog;  
Afa enag sumul eba kaksag elim mwelkel fetife gofiba asa el ena sumul mogug yi apaiyegofe. *Ais 8:14*

Eba ehe Godna mom fingi fatigbi nasa ehengelim mwelkel fetife go. Eba autunam God ati anwenafe fwahana eba enaig esifi.

<sup>9</sup> Afa nengel eba God ati nem kanog fwatig afa God ehe misog el feg afa nengel heafna pris fig afa ne afsug kabag el figim afa Godna el fig. Afa ehe nengelim enaig esinigbi asa ne heafna suialag gafugagim ambala sihiagi. Afa ehe nengelim awamonugbi asa ne sikulufeg la nai fwahinim heafna suialag ombusug nemug gam ambegog.

<sup>10</sup> Ilawana ne mas Godna el fini mo afa glau ne heafna el fig. Afa ilawana mas ne heafna aflafegim anwenafini mo afa glau ati ne flig.

### *Asa big misog elim ahnai skaufegon*

<sup>11</sup> Kana hihe, maia big hwa bite la auguiaba sa big onigigim hwa bite eba mango bigelni mo. Asa hwa bite nai amtakwalig onigig elig ona ese, asa nofeka enam patalfu. Asa enag onigig nengelni sungwabugim ahuflogo.

<sup>12</sup> Afa nengelim nihe afwambanai elni nof la sa ma suialag nemug fei. Afa maia ehe nem mwakwal sehtigifibi asa mungwali el anwenafi nengelni nihe eba suialag asa enag osuna God oblofiba ehengel ehena unehlagim fingi fifi.

13 Afa sa ne Ainiyagim onigigim asa haig haig bite nai misog elim ahnai skaufegon. Afa sa ne gavmanna misog elim ahnai skaufegon eba heafna mo sisi yi feg.

14 Sa ne gavmanna gafugag elim gafa gwenai esegon. Afa misog el ehengelim ningitigiba asa amtakwalig elim susug faigogim afa suialag elni unehlagim mo fingi fig.

15 Afa God enaig membeg og, ne suialag nihe esigbi asa enaba anwena fwainig elim afwanefug faig asa ehe mengig pwakafegim afa ehe mas amtakwalig mo sihi.

16 Afa God nem og, se eseafufum asa nofeka enaig onigigi ne og ati ka enaig mo flag eba ka amtakwalig esefe. Amo, sa ne Godna esug gafugag el afohie.

17 Afa sa ne mungwali elim suialafegon, afa Kristen nilitem fwina membegon, afa sa ne Godim bwata ningmanginim asa ahnai skaufini afa gavmanna misog elim suialafini.

*Krais susug flag asa big gafa gwenai esei*

18 Afa ne esug gafugag el sa ne nimbeafgelni misog elim ahnai skaufegon. Mangofi ehe aflafenig el me amo ehe wasneig el me. Sa ne ehem suialafini.

19 Afa atiaba ne Godim mungu oniginagba afa suialag gafugafe asa el munum nem susug faigbi afa ne esmunagim susug flag. Eba enanai yi God nem suialafenafe.

20 Afa atiaba ne amtakwalig nihe esegba asa nem ena nagum tigifi eba ne esmunagim susug flag eba el nem og eheba suialag el ehe? Amo, el mas enaig esogoi. Afa ne suialag gafugafegba asa ne esmunagim susug flag eba God nem suialafenafe.

21 Afa Krais nengelim kwaganigim kinig flag asa God nem kanog fwatigba asa ne gafa gwenai esi. Afa Krais ehe mina ofug asa ne gwenai nihe fi.

22 Afa ehe mas mango weti fena mo afa ehe mas mwakwal mo sihina mo. *Ais 53:9*

23 Afa el ehem amtakwalig mo fainibi afa ehe mas mungwag esoni mo. Afa maia ehe kinig flagba ehe mas mungwag ehengelim enaig esinigim mo sihini mo. Afa ehe og ka kikeafna onigig gwesim God nai yi fwahaiba asa God eba suialag kwefihiageg el feg.

24 Afa maia el Kraisim li katigeg la akahlifnibi ehe heafna eligni bigelni amtakwalig mo flani. Afa ehe enaig esegba asa big amtakwalig nihe gwesim fwahinim asa suialag nihe la saiye afofum. Afa ehe susug flagba asa enanam bigim suialafe klaitig.

25 Autunam ne sipsip lofug minam etetiageni afa glau ne sipsip nangwaghiawagig el nangum ambegba asa ehe nem nangwaghiawagego.

### 3

#### *Alagag angwag nai yi mo*

<sup>1</sup> Afa nengel angwafig sa ne nimbeafna alagagim ahnai skaufegon. Afa ehe Godna mo higigim oksigba asa ma ehe nengelni nihem nangunim asa ma onigig waikefi. Afa enamba nengelni mo sihiagim goseg.

<sup>2</sup> Asa ehe nem nangwagi ne Godim ahnai skaufigim afa neana nihe suialafeg asa ehe gafa ona Godim patalfu.

<sup>3</sup> Nofeka enaig onigwagi ka kikeafna eligim wagwagi afa lapogim kikeawagi afa engig aitiagibi ka sa suialag angwafig apuke.

<sup>4</sup> Afa neana suialag wag sa ma olug yi gofi. Sa ne aflafeg nihe i afa nengnag augufeg nihe i aitiagi. Eba neana suialag wag mas amtakwale. Afa enaig nihem eba naho God fwina membeg.

<sup>5</sup> Afa afsug angwafig autunai heafgelni onigig God nai yi fwahini enaig esenibi asa suialag angwafig apukenam ehe heafgelni alagag bugugum ahnai skaufegoni.

<sup>6</sup> Afa Sara enaig angwafig feg. Ehe Abrahamna mo higinam patalkunam afa ehem og ne kana saglagluwal. Afa ne atiaba suialag nihe esigbi eba ne mas embebefi eba ati ne Sarana luwal fig.

<sup>7</sup> Afa nengel saglag nembeafna angwafig i sa ne suialag hawag ahfe. Sa ne enaig onigifi angwafig mas wasneig mo asa ne bwata fegon. Afa God ehengelim gafa esmunagim kwaganig afa nufunam nofkenagag faife. Afa ne enaig esigbi eba mas mangwal nengelni betenim kagfoni.

#### *Big suialag nihem esinim asa kinig fli*

<sup>8</sup> Afa kana mo muhla fwahagim ka ofe. Sa ne mungu onigigna augu i afa elim aflafegon afa nilitem membegoni afa elim suialafehiagi afa haig haig tonbusugim fwati.

<sup>9</sup> Afa el nem amtakwal fiahflaiba nofeka mungwag gwe-naig esena. Afa el nem agi mo faiba nofeka mungwag gwe-naig esona. Amo, sa ne Godim sahnibi God sa ma ehem suialafehiage. Afa God nem awamonagim asa ehe nem enaig mo faife.

<sup>10</sup> Afa Godna mo enaig esog;  
Afa amban el membeg ogra suialag augufe afa heafgelni nofkenagim sifakali.

Eba ehe sa ma amtakwalig mo mi afa mwakwal mo mi fwahi.

<sup>11</sup> Afa sa ehe amtakwalig nihem fwahinim afa suialag nihe la saiye afohiefi.

Afa sa ma ehe enaig onigifi ka sa mingnag el i mungwal onigig ahfe

afa sa ehe ena minam fwina patalfui.

<sup>12</sup> Afa Ainiyag suialag elim nangwaghawagego afa ehe ehengelni sahigim higinig.

Afa ehe amtakwalig elim masig fatinig. *Sam 34:12-16*

<sup>13</sup> Afa sa ne sifakalna suialag nihe fefe eba amban sa nem amtakwale fetife?

<sup>14</sup> Afa ne suialag nihe esegba afa enanai yi ne susug flag sa ma God nem suialafiahflai. Nofeka ehengelim embefnim afa enam fwina onigkafim.

<sup>15</sup> Sa ne Kraism nimbeafna onigig la flafatinam afa sa ne eso ehe kana Ainiyag feg. Afa nimbeafgelni olug onigigim ambala sihiagim numwehiagi afofum. Afa maia el nem sahinibi sa ne suialag sihife.

<sup>16</sup> Afa sa ne ehengelim nengna mona wahigi sihigoni afa suialag fegoni. Afa Godna nof la sa ne suialag nihe fi. Afa maia el nem sehtigibi eba nem nangwagig maia ne Kraisma elni nihe figbi asa ehengelni mo ehem afwanfenig.

<sup>17</sup> Afa God enaig esofe afa suialag nihe la ne kinig flifie eba suialafeg. Afa ne amtakwalig nihe la kinig flifie eba amtakwalig.

*Krais lahadim pese buhiag bigim God nangum lamblug*

<sup>18</sup> Afa Kraism bigim lahanigim bigelni amtakwalig huguflaitinig afa bigim God nangum lamblug. Afa enag suialag el amtakwalig elim enaig esenig. Afa ehe mungunagim lahadim afa enag lahadim gwenanai yi blo fegba asa amtakwalig huguflaitiag gafugagim tigeftakag. Afa ehe el feg asa ehem tigeftatini afa God ehem ilafo fatigba afa ehe glau sungwabug feg.

<sup>19</sup> Afa ehe enaig gohugum afa kalabus la nai sungwabugim ikag mo sihinig. Afa ehengel elni sungwabug.

<sup>20</sup> Afa enanam Noa sipim gafugag ofefenaba afa ehengel Godna mom higinig oksini. Afa God nenge gofena mas ikagna kwefihianugena mo asa ehengelni sungwabug ena sungwabugni kalabus yi saie afuna. Afa enanam eba mingnag el sip yi saiyena afa bu wagi fakanaba asa God enag gug yi gohug elim mungu kwagana.

<sup>21</sup> Afa ehengel bu sisi yi afohie fenaba afa God ehengelim pese lambina. Afa enaba bu la aitiagim ofug afa glau ne bu la apaiyegba afa God nem pese lambig. Afa enaba mango nufwefim gigiafeg mo amo, eba ne Godim sihi fwahanag ka neana nof la afsug el afofufe. Afa God Sis Kraism bite kife nai ilafo fatig asa enana nem pese lambig.

<sup>22</sup> Afa ehe heven gam ikagim afa Godna nihiginai ningagam ga asa mungwali oflanai el i afa wasneig sanel i afa haig haig wasneig gawig i ehem ahnai skaufinig.

## 4

*Sa big autunai nihem masig fatini*

<sup>1</sup> Afa Kraiss heafna eligni susug flag asa ne gafa numwehi-aginim gwenaig esi. Afa el heafna eligni susug flagba asa ehe mas haig amtakwalig nihem onigig mo.

<sup>2</sup> Asa ehe hwa bite la gohba asa mas bite nai onigig ehem kehla gufi afa ehe Godna sawiegim patalkug.

<sup>3</sup> Afa nihe afwambanai el sa membig autunam ne gwenaig fena. Afa ehengel sa enaig esini aga taitu i afa haig haig membug i afa moiniainig i afa buyis la sifkalig i afa mwakwal godim oniginig. Afa enaig nihem patalfuiagba ati ne fwahig.

<sup>4</sup> Afa enag amtakwalig nihe ne masig fatig asa ne mas afwambanai el i wahe enaig esi. Afa ehengel sineminefigim asa nem amtakwalig mo sihigonig.

<sup>5</sup> Afa nengigim God elim kwefihia ofefiba asa ehengel heafgelni mungwali haig haig amtakwalig nihe ambala sihiagifi. Afa God ati numwehiageg nofkenagag el mi afa melig pigieg el mi kwefihiagegim fwahag.

<sup>6</sup> Asa ehe melig pigieg elim gafa suialag mo sihini. Eba nufunam ehengel ati pigi asa gwenaig mungwali el haig haig fiahgig eba pigife. Afa ehengelni sungwabug eba wahkig gofufe ofenaiba God ehe go.

*Sa big gawig God bigim faig suialafe fli*

<sup>7</sup> Afa mungwali gawig ati awaiegim muhla ofe. Afa sa ne onigiwaginim afa numwehiagifim asa ne beteni.

<sup>8</sup> Afa sa ne mingnagim fwina membegon. Sonaig nihe eba naho mingnag nihem gosenig. Afa ne elim membenighi enag eba kaksag amtakwalig nihem fwatigim asa ne mas mungwag esini.

<sup>9</sup> Afa sa ne Godna elim nimbeafna lala gam wanikiafim afa nofeka enam lagni.

<sup>10</sup> Afa God nem haig haig wasneig mungwali nem mima-geni. Sa ne enag numwehe suialafinim afa enag wasneig God nem faig asa Godna mingnag elim kwaganim.

<sup>11</sup> Afa amban Godna mo sihiag el feg sa ne mo sihig ena mo God heafna mo lofeg. Afa amban kwefwag el safeg asa Godna wasneig yi enaig ese. Asa el nengelni mungwali gafugagim nangwaginim afa Sisas Kraissna unehlag la Godim fingi fifi. Afa kwania unehlag i afa kwania wasneig i eba heafna feg afa enaba wahkig gofufe. Enaba nufunam.

*Afa bigel Kraiss lofug kinig fligbi asa big sifakali*

<sup>12</sup> Afa kana hihe, maia enag kinig nem yuhnigbi nofeka sineminefi eba mango mulug mo.



<sup>13</sup> Kraisa kinig ati kahlagba asa ne gafa gwenaig esinim asa enam sifakalini. Afa nengigim heafna kwania unehlag ambala puguiba asa ne fwina sifakalife.

<sup>14</sup> Afa ne Kraisa el fig ma nem el amtakwalig mo sihigonibi sa ne sifakali. Afa enaba enaig ogfug feg Godna Sungwabug nengel nai yi go. Afa enag Sungwabugbi eba kwania unehlag nai yi wasneig nai yi feg.

<sup>15</sup> Nofeka ne elim tigifati, afa gawig ukwefi, afa haig haig mingnag nihe fi, afa nofeka pwetigeflag el lofi. Masa ne enanai yi kinig flafe.

<sup>16</sup> Afa ne Kraisa patalfugba asa enanai yi kinig ne flig eba nofeka enam afwanfi. Sa ne Godim suialag oni eba ati ne Kraisa unehlag na fig.

<sup>17</sup> Afa Godna kwefihawagig osuna muhla ofe afa sa ehe heafna elim enanam gof gam esenifi. Afa ehe bigim gof gam esofenifife eba sumi yi gafa el ehena suialag mom masig fatig ehe ehengelim fwina amtakwalig esenifi.

<sup>18</sup> Afa Godna mo enaig esog;  
Afa atiaba suialag el Godna mina gam kinig flagba asa  
God ehem suliaflag afa sa haig amtakwalig elimbi  
pugunifie? *Snd 11:31*

<sup>19</sup> Afa atiaba Godna sawieg la mingnag el kinig fligbi asa ehengel suialag nihe esibi asa enaba ogfug hefum Godna ninga la fwahig. Afa God elim esenaiba asa heafna mo sihi fwahagim suialafiahflafe.

## 5

### *Siosna misog elni mo*

<sup>1</sup> Afa koka nem siosna misog elim mo sihinuge. Ka gafa siosna misog el feg. Afa maia Kraisa susug flagba asa kikeafna nofna ka nangug. Afa maia Kraisa kwania unehlag ambala puguiba asa ka gafa suialag heafna flafe. Nasa ka nem enaig sihifenig.

<sup>2</sup> Afa sa ne Godna sipsipim numwehe nangwaghiagi asa ehe ehengelim nengelni ninga la fwatig. Afa enag gafugagba nimbeafna membug la sa ne esi afa God enaig onigig membeg masa el nem hekusihagifi. Nofeka kig flag onigigna gafugafi amo sa ne Godna elim oniginim asa gafugafi. Ehen- gel eba sipsip lofug.

<sup>3</sup> Afa nofeka misog el lofinim afa Godna elim mo piga lambpaigo. Nofeka enaig esi. God ehengelim nengelni ninga la fwatiba asa ne suialag mina ogfugonibi sa ma enag sipsip ena mina patalfui.

<sup>4</sup> Afa maia sipsipni nangwaghiawagig elni misog el ambala puguiba asa ne suialag nemug wag flifi ena wag mas amtak-wale.

<sup>5</sup> Afa nengel kwablog el sa ne gafa misog elim ahnai skaufegon. Afa ne mungwali nimbefum ahnai skaufeganim. Afa Godna mo enaig esog;

God tonbusug elim pigalau pifi. Afa el sa hefum sugupeg eba  
God ehem suialafenife. *Snd 3:34*

<sup>6</sup> Asa ne Godna wasneigim ahnai skaufini afa osuna sa ehe eso fwahag, enanam ehe nem fingi fefe.

<sup>7</sup> Afa God nem fwina aflafenig asa nimbeafgelni kinig heafna ninga la fwahi.

<sup>8</sup> Sa ne numwehiaginim afa nof fiahgifibi. Afa Satan nengelni angoluweg eba ofenaiba laion\* euaka ona elim tige ne.

<sup>9</sup> Afa ne anwenafig mungwali hwa bite la nengelni kristen nilite gwenaig kinig flig asa nengelni olug onigig wasneig gofiba afa Satanim fingi fati.

<sup>10</sup> Afa ne Sisas Kraisim olug oniginibi asa ilawana God nem aflafenigim awamona sa ne heafna suialag gawig la wahkig hawag fife. Afa kinig sa ne flag eba mwakwalig gofe afa sumi yi God ehe nem pese suiala fiahflanam asa nem wasneig na geba asa ne wasneig gofufe.

<sup>11</sup> Na Godna unehlagim fingi fi asa ehe kwania wasneigni wahkig gofufe. Eba nufunam feg.

### *Pitana sumi yi mo*

<sup>12</sup> Afa hwa weti ginofba Sailas kam kwefug ginofeg. Afa ka anwenafeg ehe bigelni suialag nilite. Kog ka nem wasneinuge na ka enaig esog hwa ginof eba Godna suialag kwefwag ofug. Sa ne hwa mo kehlanam wasneig gofum.

<sup>13</sup> Afa Babilon la nai sios el nengelim enaig esogog ka mas nem etetigoni. Afa God ehengelim gafa kanog fwatig. Afa Mak ofenaiba kana luwal ehe nem gwenaig esonig.

<sup>14</sup> Afa mingnagim nilitem sa ne kikigeahiagi enaba ofug ne kristen nilitem fwina membegonig. Ne mungwali Kraisna el fi sa ma nem olug enesieg gohoni.

---

\* **5:8:** Laion eba wasneig sis sangwalinai pusi lofug.

## **Angigieg Mo Pita Ginofena Hwa buk enaig esog**

Hwa bukna ginog mog mo eba hwaig esog Pita ogra Kristen elim sihinibi ese mwakwal ogfuiag elni haig mom higigonifi afa enag el ati el nanam waheg og na ehengelni olug onigigim gasafihiagi afa suialag nihem gafa esi. Afa ehengel kanog fwatieg elni mom sa ma fwina wasnei kehli. Afa enaig esigbi ehengel God mi afa Sisas mi suialag anwenafegonig. Afa kanog fwatieg el ati Sisasimba keafgelni nofna ka naguni afa heafgelni ehena mo higini. Afa mingnag el enaig sihifig, Sisas eba mas pese bloi. Afa hwa buk enaig sihifeg, Sisas eba nufunam pese blofe. Eba nufunam ehe mas ikagna bloi. Enag mog eba enaig eseg. God mas membeg mo el mungu awaiegim. Afa heafna membug og mungwali el sa ma olug waikefi, asa ehe enam nengigim enam awawiyifego (3:9).

<sup>1</sup> Ka Saimon Pita Sisas Kraisna gafugag el afa ka ehena kanog fwahag el feg. Ka hwa mo nengelim ningihianig asa ne Sisas Kraisim olug onigig. Afa Sisas ehe bigelni God fegim afa Kwefwag el feg. Afa heafna suialag nihe la asa nengelni olug onigig eba kagel nai yi mungwalofug.

<sup>2</sup> Afa ka membeg ne God mi afa Sisas bigelni Ainiyag mi sa ne numwehe anwenafi sa ma God nem fwina esug kwagani i afa olug enesieg i fai.

### *God bigim kanog fwatig asa big enaig gafugafi*

<sup>3</sup> Afa maia big ehem numwehe anwenafigi afa ehe heafna wasneig kigmog la bigim kwaganigba asa bigna auguiag sa ma ehena suialag nihem patalfui. Afa ehe bigim awa-monigim og sa ne kana kwania unehlag mi afa suialag nihe mo fli.

<sup>4</sup> Eba ehe enaig eseg afa mangwal suialag gawig ehe sihi fwahana asa enag big flig. Afa amtakwalig olug sawieg amtakwalig bite nai onigigim flau pugug. Afa big enag suialag gawig fligim asa amtakwalig bite nai onigig mas bigim amtakwale laiti. Afa big Godna nihe fig.

<sup>5</sup> Afa God enaig esegba asa ne enaig nihe esibi eba nengelni olug onigig wasneig pugufe. Sa ne suialag nihe esi afa enag nihe i anwenag i waheg.

<sup>6</sup> Asa ne eligni onigigim numwehefkuba afa enaba anwenag i waheg. Asa ne kinig yi wasneig gohug afa enaba eligni

onigigim numwehefkug i waheg. Asa ne God nai yi fwina onigig lugwag afa enaba kinig yi wasneig gohug i waheg.

<sup>7</sup> Asa ne nilitem membig afa enaba God nai yi fwina onigig lugwag i waheg. Asa ne elim fwina membenig afa enaba nilitem membig i waheg.

<sup>8</sup> Afa atiaba ne enaig nihe nengel nai yi wasnei kwania fegba eba ena anwenag fug lugufe. Afa ne bigelni Ainiyag Sisas Kraism numwehe anwenafifi.

<sup>9</sup> Afa amban el enaig nihe feg fwainigba eba ehe ofenaiba nof tetini el mas numwehe nangui. Afa ehe etetiageg God sa ehena amtakwaligim huguflaitinag.

<sup>10</sup> Asa nilite numwehenim asa ne Godna mom fwina patalfu afa enaba ofug God nem awamonigim afa kanog fwatig. Afa enaigba ne esigbi eba nengelni olug onigig ne mas fwahi.

<sup>11</sup> Afa ehe nem sifakaligna Sisas Kraisma bog megam lablug saiyegog. Afa Sisas eba Ainiyag fegim afa bigelni kwaganig el feg afa heafna bog meg eba wahkig gofufe.

<sup>12</sup> Afa ka anwenafeg ati ne nufunam mo higigim kehlig. Asa kog ka nengelni onigigim pese fwakig lasani.

<sup>13</sup> Afa ka onigig eba suialafeg ka gwese gofiba ka sa nem enaig mom sihinifibi asa ne pese onigim.

<sup>14</sup> Afa Ainiyag Sisas Kraism kam sihinag asa ka anwenafeg ka mas maisim gofi.

<sup>15</sup> Afa ka mas nem sihinigim yiskosei. Afa maia kam lahaiba asa ne ena mom pese onigim.

*Afa kanog fwatig el Kraisma wasneig kigmog nanguni*

<sup>16</sup> Afa maia kangel nengelim enaig sihigonibi Ainiyag Sisas Kraism wasneig kigmogna pese blofe afa kagel mango mwakwal wahigna mo sihi mo. Amo, kikeafna nofna heafna wasneig kigmog nanguni.

<sup>17</sup> Afa maia Api God ehem kwania unehlagna afa ombusugni\* faigba afa kagel enanai yi afofena. Afa Godna kwania ombusug pugunaba afa enanai yi Godna mengig enaig sihifena og, “Enagba kana leg. Ka ehem fwina membenagim. Afa ka ehem sifakalenag.”

<sup>18</sup> Afa kagel ehe i enag Godna mug la afofenaba afa ka enag heven la nai mengigim higin.

<sup>19</sup> Afa mangwal sati ka nanguni eba ofug Godna mo sihiafule elni mo eba nufunam nemug feg. Asa ne enag mom higim. Enag ofenaiba ombusug sikulufegim ombusug faig. Afa enag ombusug gwese gohun ikan Godna osuna pugufe

\* **1:17:** Godna ombusug eba ofug Godna kigmog i afa suialag gawigna feg.

afa Kraisna ombusug nengelni olug yi ofenaiba ambagana bufyi laugwa.

<sup>20</sup> Afa sa ne enag numwehe anwenafi Godna mo sihiafule elni mo Godna buk la go eba mango heafgelni onigig mo. Eba awai.

<sup>21</sup> Afa el mas enaig mo upuguni mo. Amo, Godna Sungwabug elim ihlafenigim afa mangwal God sa sihig asa ena mom ehengel sihig.

## 2

### *Mwakwal ogfuiag el nengel nai yi pugufe*

<sup>1-3</sup> Afa autunam mwakwal mo sihiafule el Ju el i waheg gofena. Afa mwakwal ogfuiag el nengel nai yi gwenaig esi ne i waheg gofe. Afa ehengel mwakwal mog mom nem sagmona sihigonugifi. Afa enaig mo eba nem amtakwale laitife. Afa Ainiyag ehengelim lambigba asa ehengel ehem masig fatinig. Afa kaksag el ehengelni aga taitu nihe mi afa enaig haig haig nihe mi patalfufe. Afa ehengel enaig esibi asa mingnag el God nangum ogfuiag minam molampbifi. Afa enag mwakwal ogfuiag el gawigim fwina onigig. Afa ehe nengelim mwakwal mo sihigonugigim asa kig enana flig. Afa God mas ehengelim kwefihianugegim yiskoseg mo amo, eba ehe mungwag amtakwalig faigim ati numweheage go. Afa ehengel enaig esigba asa God ehengelim ikagna amtakwale klaitife.

<sup>4</sup> Afa ne anwenafig autunam mingnag oflanai el amtakwalig nihe esinibi asa God mas ehengelim fwatina mo amo ehe ehengelim suwi lagig kembangam lambig klaitina. Afa God ehengelim wasneig wena kikenugenam asa sikulufegim la skaugum lambaitiba asa kwefihiageg osunam nenge afo.

<sup>5</sup> Afa enanam Noa gofenaba asa ehe enaig sihiakafena og, sa ne suialag nihe patalfu afa mungwali el Godim masig fatini asa God mas ehengelim fwatina mo amo ehe kwania bufle esenaba asa mungwali awaiena. Afa God Noa mi afa mingnag elegeg la gohug el mi lambinaba asa suialag gohena.

<sup>6</sup> Afa ne anwenafig autunam God sambaga kembangim Sodom mi Gomora mi amtakwale klaitinam. Afa ehe ena sambaga kembangim suwina tuhlu fatini. Afa enag ogfug amban el sa Godim masig fatinig eba ehe ehengelim gwenaig esenifi.

<sup>7-8</sup> Afa enanai yi Lot gofena afa ehe suialag el fena. Afa ehe amtakwalig elni aga taitu nihe mi afa enaig haig haig nihe mi nangwagnim asa ehe olug kinig. Afa enag suialag el amtakwalig el i hawagenam asa mungwali osuna ehe ehengelni amtakwalig nihe higifinim afa nangwag fena asa

heafna olug kinig feg. Afa God ehem suluaflanaba asa ehe suialag gohena.

<sup>9</sup> Afa enag bigim ogfunig suialag el asa kinigni afohie eba God ati anwenafeg ehengelim haig kwagan fenigim. Afa God ati anwenafeg amtakwalig elim kalabus yi haig kehla fegim nenge afohun ikan ena kwefihiage osuna pugufe.

<sup>10</sup> Afa ehengel susug flife. El sa heafna eligni amtakwalig sawiegim patalfug afa Godim masig fatinig afa enaig el eba fwina susug flife.

Afa enaig mwakwal ogfuiag el eba tonbusug el fig afa hefum mungu onigig feg. Afa ehengel amtakwalig wasneig oflanai el sisi yi go mas embefinig mo asa ehengelim gafa amtakwalig mo sihigonig.

<sup>11</sup> Afa Godna oflanai elni wasneig eba mwakwal ogfuiag elni wasneigim fwina gosenig. Afa Godna nof la heafna oflanai el mas amtakwalig oflanai elim setigigim afa amtakwalig mo sihigonig mo.

<sup>12</sup> Afa enaig mwakwal ogfuiag elni onigig sisna onigig lofig afa mangwal onigig ehe nai yi pugug eba gaunam esegim. Afa ehengel ofenaiba sangwali nai sis. Afa mangwalim ehe anwenafi fwainig eba enam gaunam esig afa molamp mo sihinig. Afa God ehengelim amtakwalig klaitife ofenaiba el sangwali nai sisim kwagi klaitig.

<sup>13</sup> Afa haig susug ehengel sa mingnag elim esegonug eba ehe gwenai gflifi. Afa ehengel heafgelni eligni sawiegim elni nog la ambala patalfug asa enam sifakalig. Afa ehengel nengel nai yi ahgagigim afa heafgelni nihe eba mwakwal feg afa afwanfeg eba ehe enaigim og, eba suialag.

<sup>14</sup> Afa ehengel aga taitu nihem wahkig onigigim afa amtakwalig nihem wahkig esi asa mas fwahi. Afa ehengel auwiaug elim amtakwalig mina la hugfu lambfug. Afa ehengel heafgelni olugim mungu fli fakigim asa kig i gawig i enam fligim mungu onigig. Asa nengigim God ehengelim amtakwale klaitife.

<sup>15</sup> Afa ehengel sufniag minam fwahigim asa afu etetia-giafu. Afa ehengel Beorna leg Balamna nihem patalfug. Balam ehe amtakwalig nihe fiahgeg mina oagna kig fla asa ehe enam fwina membenag.

<sup>16</sup> Afa God ehem fenagena. Afa heafna donki tata elni lagenam asa Balamim fenagena afa ehem amtakwalig nihe feg mina ikagim kwenag.

<sup>17</sup> Afa enag mwakwal ogfuiag el eba ofenaiba bume bu hiaflag afa leana leango lofug wasneig efef petilambkug. Afa God ehengelim ati kug fwatinig afa ehengel ena fwina sikulufeg megam apaiyefe.

18 Afa ehengel fwina lagigim asa hefum fingi fi afa beheg mona sihig. Afa el sa nufunam mo mas patalfug mo afa mingnag el oagna ehengelim lasaniafunam asa nufuna mo patalfu. Afa maia ehengel lasaniafu afa mwakwal ogfuiag el ehengelim yuhnigim afa sihigonug sa nimbeafna eligni sawieгим patalfu.

19 Afa ehengel enaig esogog sa ne kagelni nihe patalfuibi eba asa mangwal mas nem kike lambugufi. Afa ehengel eba esug gafugag el fig asa amtakwalig nihe ehengelim kikelambugu. Afa mangwal elim filafatig asa enag el eba ehena esug gafugag el fig.

20 Ainiyag Sisas Kraiss bigim lambig afa el ehem anwenafinigim asa amtakwalig bite nai onigig fwahig. Afa ehe atiaba pese ikagba afa enag onigigim pese patalkuiagba eba ehe fwina amtakwalig gofe. Afa ilawana ehe esug gofenaba.

21 Afa ilawana ehe mas ona sufniag minam anwenafitiba eba suialafete. Afa glau eba fwina amtakwalig asa ehe Godna mom fligim afa pese enam masig fatinig.

22 Afa mwakwal ogfuiag elni nihe ogfug enag lasug mom eba nufunam. Afa lasug mo enaig esog, “Malang heafna mealfugim pese blo neg.” Afa ming mo enaig esog, “Tata bu la sugum afa ehe pese ika saning la peg.”

### 3

#### *Eba nufunam Ainiyag pese blofe*

1 Kana suialag nilite, hwa moba angieg mo ka nem ginofe ningihianig. Afa ka enag sambaganingi mo ka nem ginofenag asa nengel enam onigi afa nengelni onigig sa ma pese suialafe.

2 Ka membeg nengel pese oniginim afa anwenafi hwa mo autunam Godna mo fli sihiafule el enaig sihifini. Afa bigelni kwefwag el Ainiyag heafna wasneig mo sa ne gwenaig esi. Afa enag mo heafna kanog fwatig elim sihinig asa ehengel nengelim kwaganigim afa waike sihigonig.

3 Ilawana mo enam ne anwenafinim, maia osu awaieгим ofefiba afa mingnag el amtakwalig apukenam heafgelni onigigim patalfug asa nem amtakwalig mo gosis mona sihigonufe.

4 Afa ehengel nem titige mona enaig esogonug, “Ainiyag enaig sihifena ka pese blofe, hai yi sa eheba blog? Bigelni simbianigag pigihiag blogba afa mungwali gau gwenaig hwa bite la afohie. Afa hwa bite God lasflam gafugafena sa blog ilawofeg mas mango pugu mo afa mungwali gawig gwenaig feg.”

<sup>5</sup> Afa ehengel enam onigigim oksig afa autunam God mo sihinaba asa of gini afa bu gini maia God bu flanam alganam fakanaba asa bite puguna.

<sup>6</sup> Afa mwakwalig maia fenaba God pese esonaba asa bu hwa bitem sagflanam afa mungwali amtakwalig klaitina.

<sup>7</sup> Afa God ati sihi fwaha asa hwa bite i of i gohun ikan afa enag osu maia awaiegim ofefiba. Afa el asa Godim masig fatinig asa maia God ehengelim kwefhianugenam amtakwale klaitifiba asa enanam God hwa bite mi of mi suwi la wehlafe.

<sup>8</sup> Kana nilite nofeka ena mom eteti afa Godna nof la mungu osuna eba ofenai 1,000 yia afa 1,000 yia eba ofenai mungu osuna. Enag sambaganingi Godna onigig la eba mas algana feg mo eba mungwalofug.

<sup>9</sup> Afa mingnag el enaig onigifig Ainiyag heafna mo sihi fwaha esegim eba mahi nengigim gafugafeg. Afa eba ehe mas enaig eseg mo, amo, ehe nem oniginagim asa ehe mas ikagna ese. Afa ehe mas membeg mo el mungu awaiyegim amo eba ehe membeg mungwali el sama heafgelni olug waikefi.

<sup>10</sup> Afa Ainiyagna osuna blogba ofenai ukwef el asa ikagna blog. Afa enanam watig kwania moasife asa of awaiye fe. Afa oflanai gawig gafa suwi la lasgofefe. Afa bite afa mungwali bitenai gawig gafa suwi lage kumwahlafe.

*Afa big Ainiyagim nengen afufiba asa big suialag nihem patalfu*

<sup>11</sup> Afa God mungwali gawigim enaig esegba nengel haig esifi? Sa ne amtakwalig onigigim fwahinim afa suialag nihem esi asa God membeg.

<sup>12</sup> Afa ne og Godna osu maia ikagna gefe pugui afa ne nengenafiba asa neana gafugag enag osum ikagna gufla blufe. Afa enanam of suwi la fe afa osum, wasim, afa bagnofutim gafa suwi nolugna mwanmwanife.

<sup>13</sup> Afa bigel Godna mo sihi fwahagim nengeafo. Afa ehe enaig esog mulug of i bite i pugufe afa el suialag nihem mungu esig enanai yi fifi.

<sup>14</sup> Afa kana suialag nilite, ne og Godna osu maia ikagna gefe pugui afa ne nengenafiba asa nofeka amtakwalig nihem Godna nof la esi. Sa ne nimbe suialag gafugafenam afa God i mungwa onigig ahfe.

<sup>15</sup> Afa sa ne enaig onigifi Ainiyag membeg elim pese lambigim asa ehe bwatam bwatam gafugafiau. Afa God bigelni suialag nilite Polim suialag onigig faig asa ehe enaig mom nem ginofenig.



<sup>16</sup> Afa maia Pol Godna osuna blog mom ginofegba ehe gafa gwenaig mo ginofena. Afa heafna mingnag ginofba mas bigel numwehe enam anwenafi. Afa onigig wetitina el afa el onigig auwiawig ehena mom waikefigim afa algam mo sihig. Afa ehengel Godna mingnag mo gafa gwenaig esig asa enag nihe ehengelim amtakwalig klaitig.

<sup>17</sup> Afa kana suialag hihe ne ati enam anwenafig asa ne numwehe suialag nisagohe. Afa el Godim masig fatinag masa nem amtakwalig mina gam guflagkufe afa ne wasneig gohug la nai pefe.

<sup>18</sup> Nofeka enaig esi. Sa ne Ainiyagna wasneigim fwahana sa ma nengel nai yi kwaniafe. Afa bigelni kwefwag el Sisas Kraism anwenafenag sa ma nengel nai yi kwaniafe. Afa heafna unehlag sa ma kwaniafe ilawo afa gwenaig wahkig gofi. Enaba nufunam.

## Angig Mo Jon Ginofena Hwa buk enaig esog

Hwa buk la emba sambaganigi mog mo sihig. Jon membeg Kristenim kwaganiba sa ma mungu olug Api God i afa heafna Leg Sisas Krai i afei. Ehe enaig membeg ehegel ese sikulufeg elim esogonife au ambe go. Emba ehegel negelni olug onigigim mwakwale gonibi asa ne Godim fwahinim membi gam nem wanafufe. Afa enaig el emba sikulifeg la nai el fig afa ehengel enaig sihifig og, “Hwa bitena gawig eba amtakwalig. Afa Sisas eba Godna Leg, asa ehe mas hwaig elig na blonam el lofugfei afa mungwali bite nai gawigna angoguli asa bigel fasife. Afa ehegel enaig esogog, el membig God i suialag hawag ahfe ehegel ese bite nai gawigim fwina onigiafufufe.” Afa ehengel gafa enaig esogog, “Suilag nihe afa elim membeg nihe eba bitenai nihe nofene enam fwina oniginim afa enag nihem patalfu.” Afa Jon membeg Kristen el nofe ka enaig mo higi. Ehe enaig sihifeg og, Sisas nufunam blona asa el lofug gona afa el sa Sisasim olug oniginig ehegel sa Godim fwina membig afa sa ma mingnagim gafa membegoni.

### *Nofkenagag Mo eba Sisas*

<sup>1</sup> Kagel nengelim ginofegonig enag el ehe nofkenagag mo. Enag Mo autunam nemug ati gofena. Enag ati kagel higig afa kiafna nofna nangug, afa kiafna ningana kehligim faig eflig.

<sup>2</sup> Autunam enag wahkig nofkenagag el eba Alag i awag afa ilawaba ati bigim ambala fenig. Afa maia enag nofkenagag el pugugba kagel nangug asa kagel nengelim sihigonug.

<sup>3</sup> Kagel ati higig afa nangug afa nengelim sihigonug asa bigel mungu oningig fli. Sama Alag i heafna Leg i Sisas Krai olug usumuiag la bigim ahwangofi.

<sup>4</sup> Kagel hwa mo ginofig sama bigelni sifakal fwina gofi.

### *Bigel asa ombusug mina patalfu*

<sup>5</sup> Hwa mo Sisas kagelim sihinigbi afa kagel higigim asa ka nengelim sihigonug. Enag mo enaig sihifeg Godba ombusug sikulufeg mas ehena yi go mo, eba awai nemug.

<sup>6</sup> Afa bigel haig haig nihem patalfuiba eba bigelbi sikulufeg la afwaiye. Afa enaig esinim afa bigel esogofe kagelbi heafna eba awai bigelni mo eba mwakwaleg afa bigel mas suialag nihem patalfug mo.

<sup>7</sup> Afa bigel ombusug yi afwaiyefiba asa God enaig esefe asa heafna Legna taf la bigelni amtakwaligim huguflafatife afa bigel mungu oningig mungwali laskuhlag.

<sup>8</sup> Afa bigel esogofe kagelbi haig haigba awai eba bimbefim mwakwalig afa nufunam mo mas bigelni oningig la feg mo.

<sup>9</sup> Afa biafna haig haig amtakwalig Godim sihinaiba eba enaig esefe ehe ati sihi fwahag asa bigelni mungwali haig haig amtakwaligim huguflafatig asa mas big nufweni afofi.

<sup>10</sup> Afa God enaig esog nengel mungwali el ati haig haig amtakwalig esig. Afa bigel esogofe kagelbi mas haig haig esig mo asa enag mo enaig esog Godna mo eba mwakwaleg afa heafna mo mas bigelni oningig la feg mo.

## 2

### *Sisas bigelni kwaganig el feg*

<sup>1</sup> Kana luwal hwa mo ka nengelim ginofenig asa nofeka amtakwalig enaig esi. Afa amban el enaig esegba eba Godna nof la suialag el mungu ati feg nem kwefwagim eba Sisas Kraiss. Ehe Godim sihinam asa bigim kwaganife.

<sup>2</sup> Sisasna lahag eba mina pigig fwahag sama God bigelni amtakwaligim huguflafati asa God mas bigim ninimuni. Ena mina mango bigelim mungu mo eba mungwali el hwa bite la feg.

<sup>3</sup> Afa bigel Godna mo higinim patal afufefiba eba ati ambala feg bigel ati ehem anwenafinig.

<sup>4</sup> Afa amban el esog ka ehem ati anwenafenag afa ehe ena mo patalku fwainig eba mwakwalule afa nufunam mo ehena oningi la awai.

<sup>5</sup> Afa Godna mo sane amban suiala flafefe neana membug Godim eba kwania fenag. Asa bigel ati anwenafig bigelbi Godna feg.

<sup>6</sup> Afa amban el esofe kaba Godna feg asa ehena mina ikag sama Sisas lofugfei.

<sup>7</sup> Nilite, hwa wasneig mo ka ginofeg eba autunai mo, glaunai moba awai. Enag autunai mo nengel ati hig ambeg.

<sup>8</sup> Afa mingigam, hwa autunai mo glaunai mo lofeg. Hwa mo enaig sihifeg bigel sa mingnag elim membegoni. Sisas ati ogfug hwa moba eba nufunam afa nengel gafa ati enaig esig. Godna suialag moba ombusug lofug kwaniafeg asa sikulufegim filafefe.

<sup>9</sup> Afa amban el esog kaba suialag el ka ombusug yi go afa heafna nilite mo olug kakagenugeg enaig elbi maisim sikulufeg la go.

<sup>10</sup> Afa amban el heafna nilitem membenig enaig elbi ati ombusug yi go. Afa heafna nihe mas ambanim amtakwalig mina ukui.

<sup>11</sup> Afa amban heafna nilitem olug kakagenugeg eba siku-lufeg la go. Afa si ehem wagifakag ehe ena mina wagicgoba asa ehe etetiagego enaig elbi nof tetini.

<sup>12</sup> Kana luwal, God Sisasna gafugag ati nangugum asa heafna unehlag la neana amtakwaligim huguflafatig. Asa ka nengelim ginofenig.

<sup>13</sup> Saglag, nengel ehem ati anwenafini ehe autunam fena asa ka nengelim ginofenig. Kwablog el, nengel Satanim ati filafig asa ka nengelim ginofenig.

<sup>14</sup> Luwal, nengel Alagim ati anwenafini asa ka nengelim ginofenig. Saglag, nengel ehem ati anwenafini ehe autunam fena asa ka nengelim ginofenig. Kwablog el, nengel wasneig el afa Godna mo nengel kehligufuiaba afa ne Satanim ati filafig asa ka nengelim ginofenig.

*Nofeka hwa bitenaina nihem fwina membena*

<sup>15</sup> Nofeka hwa bitenai oningig lamboge. Afa ne amban hwa bitenai nihem fwina membefe eba Apina membugba mas ne nai yi goh mo.

<sup>16</sup> Hwa bitenai nihe bigel ati anwenafig eba enaig eseg bigelni amtakwalig oningig sa pugug afa big ambana mangwal nangugum fwina membegim og ka sa fla afa tonbusug el enaig oningifeg kikeba mungwali gawig nafeg. Hwa nihe eba mango Godna mo eba hwa bitenai nihe.

<sup>17</sup> Hwa nihe i afa bite i maia ika awaiegba afa amban el sa Godna sawieg la eseg enaig el wahkig nofkenagafife.

<sup>18</sup> Kana luwal, hwag osu ati muhla ofe mungwali gawig awaiegim. Ati nengel higig mungu mwakwal el enaig esofe kaba Kraisa ehe blofe. Afa ilawo kaksag enaig el ambegofe asa bigel anwenafi hwa osu ati muhla ofe.

<sup>19</sup> Autunam sonaig el bigel mungwali auguia afa ehengel mas bigelni mungu oningig fig mo asa bigim lasanig afuiagohug. Asa ehengel bigelni nilitefefe eba big mungwali auguafife asa afuiagoiba eba bigim ogfunig mungwali ehengel mango bigelni nilite mo.

<sup>20</sup> Afa nengel mas enaig fig mo. God heafna suialag Sungwabug ati nengelim faig asa nengel mungwali el nufunam mo anwenafig.

<sup>21</sup> Ka mas oningi nufunam mo nengel mas anwenafig mo asa ka nengelim ginofenig eba awai. Nengel ati anwenafig asa ka nengelim ginofenig afa nengel anwenafig mwakwal mo mas nufunam mo la goh mo.

<sup>22</sup> Mwakwal elbi amban maia? Amban el enaig esofe Sisas mango Godna Gisfu Fwahag El mo enag el ehe mwakwalule. Enag elbi Kraiswa angoluwag el feg. Ehe Alag mi Leg mi masig fatinig.

<sup>23</sup> Amban Legim masig fatig eba Alagim gwenaign esenag. Afa amban Legim ahnai skaufenafe eba Alagim gwenaign esenag.

<sup>24</sup> Sa numwehe, hwa mo autunam nengel higig sa ne nugwe kehlifi. Asa ne enaig esigbi Alag i Leg i nem ahwan gofufe.

<sup>25</sup> Afa Sisas ati sihi fwahag ehe bigelim wahkig nofkenagag faigim.

<sup>26</sup> Afa mingnag el ambe nengelim mwakwal gonigfie asa ka nengelim ginofenig.

<sup>27</sup> God heafna suialag Sungwabug nengelim ati faig asa nengel mingnag elim algam fegon. Afa heafna Sungwabug nengel nai yi gofiba eba mas nengel mingnag elni mo patalkui. Eba enag Sungwabug nengelim suialag mina mungwali ogfunugefe. Heafna mo nufunam nemug, mwakwal mo eba awai. Heafna mo sa higinim asa nengel Sisas i mungu oningig fli.

<sup>28</sup> Kana luwal sa ne enaig esi afa maia ehe puguiba bigel mas embefi. Afa maia ehe bloiba bigel mas ehem afwanefini heafna nof la.

<sup>29</sup> Nengel ati anwenafig Sisasba Godna nof la suialag el afa amban el suialag nihem patalkug eba Sisas lofug feg enag elbi Godna luwalig apukeg.

### 3

#### *Godna luwal*

<sup>1</sup> Sa hig, God Api bigim kwania membug fenig asa ehe bigim esonug nengel kana luwal. Hwa mo eba nufunam feg. Hwa bitenai el Godna onigigim mas anwenafig mo asa ehengel bigelni onigig mi afa nihe mi mas anwenafig mo.

<sup>2</sup> Kana hihe, bigelba Godna luwalig. Afa ilawo mas ambala feg mo autunai la haig augug big fifi. Afa bigel ati anwenafig maia Sisas ambala puguiba bigel nufunam ehem nangufi asa enanam bigel hef lofifi.

<sup>3</sup> Afa mungwali el enam membig asa nengi afu og ka enam nangu asa ehengel heafgelni haig haig nihe lambaitifig. Ehengel onigig Sisas eba suialag el afa kagel gafa sa gwenaign esi.

<sup>4</sup> Afa amban el amtakwalig nihem ati eseg eba ehe Godna nihe mom masigim fatig enagba mog feg haig haig amtakwalig nihe esegig.

<sup>5</sup> Afa nengel ati anwenafig Sisas ati blog bigelni amtakwalig nihem huguflafatig. Afa ehena amtakwalig nihe eba awai.

<sup>6</sup> Asa amban el Sisasna fefe afa ehe mas amtakwalig nihem wahkig gwesim patalkuiagifi. Afa amban el amtakwalig nihem patalkuiagifiba ehe mas Godim nangui afa anwenafeg mo.

<sup>7</sup> Kana luwal, nofeka mwakwal elni mo higinim. Sa ne anwenafe afa amban el suialag nihem patalkug eba ehe suialag el afa suialafenig asa gwenaig Sisas fena.

<sup>8</sup> Enag autunam fenam afa ilawagaba Satan amtakwalig nihem eseg afa amban el amtakwalig nihem patalkuiagba eba ehe Satanna el. Afa Godna Leg blogim asa Satanna gafugagim fwina filafatinag.

<sup>9</sup> Afa amban el eba Godna luwalig ehe mas enag amtakwalig mina fakafe mo asa ehe Godna mungu usumuna feg afa Godna nihe ehenai yi go. Afa God eba ehena Alag asa enag el mas haig haig mina gomine fefi.

<sup>10</sup> Maia enaig mina figbi big anwenafig afa Godna luwalig afa Satanna luwalig. Afa amban el haig haig nihem esenam afa nilitem olug kakagfenife eba mango Godna luwalig mo.

*Mingnag elim sa ne membeni*

<sup>11</sup> Autunam ne ati hwa mo higini afa sa ne mingnag elim membegon.

<sup>12</sup> Nofeka enaig el Kein lofugfi. Ehe asa suminigim tigiakana asa lahana eheba amtakwalig el Satanna. Afa heafna nihe mas suialafena mo afa suminigna mo suialafenaba asa ehe suminigim enaig esena.

<sup>13</sup> Kana nilite, nofeka sineminafi hwa bitenai el nengelim kristenim haig esegonibi.

<sup>14</sup> Afa bigel nilitem membegonig asa big anwenafi ati bigel lahagna mina fwahigim afa nofkena mina la afu. Afa amban el mas mingnag elim membenig mo eba lahagna mina la wahkig go.

<sup>15</sup> Afa amban el nilitem olug kakagfenig eba enaig ehe ati nilitem geflakag asa nengel anwenafig enaig el nofkena wahkig gag ehenai yi eba awai.

<sup>16</sup> Afa bigel anwenafig nufunam membenag eba enaig eseg autunam Sisas bigim membenim asa bigim lahani asa bigel gafa gwenaig nilitem esegoni.

<sup>17</sup> Afa kaksag gawig el nilitem gawig fwainig nangonam asa ehe mas aflafenam kweagfui afa haig esegba ehe enaig esog Godna membeg kanai yi gofife.

<sup>18</sup> Kana luwal, nofeka mo behig eso ka nilitem membenig asa ne nufunam membeg nihe ese.

<sup>19</sup> Afa bigel enaig esigbi asa big anwenafig bigel nufunam mo patalfu ambeg. Afa bigel Godna nof la mas afwanefi afa bigelni olug eba enesieg feg.

<sup>20</sup> Afa bigelni enaig onigigfifi kagel ati amtakwalig esig asa bigelni onigig la enaig esefe asa nofeka embefi. God ati bigelni mungwali nihem anwenafenig afa ehe enaig esog nengel ati amtakwalig enaig esig afa kana aflafeg nengelim fwina kwania fenig.

<sup>21</sup> O hihe, bigel enaig amtakwalig esig fwainigba asa bigelni onigig enesieg gofi. Afa mas big Godna nof la afwanefi.

<sup>22</sup> Afa bigel heafna mo mungu higigim afa heafna sawiegim patalfug asa big mangwalim sahnaiba eba bigim faife.

<sup>23</sup> Afa heafna mo enaig esog sa ne kana Legim olug onigini eba Sisas Kraiss afa mingnag elim membenig ena mo Sisas ati bigim sihini.

<sup>24</sup> Afa amban el Godna mo patalkugba asa ehe God i ahwag afa God enaig el i ahwag. Afa God heafna Sungwabug bigim faig asa big anwenafig God bigelni onigig la go.

## 4

### *Sungwabugim sa ne yuhunuge*

<sup>1</sup> Hihe, afa amban el esofe kagel Godna Sungwabug mo sihig nofeka ehengelni mo higinam ikagna fla. Afa yuhunuge nufunam Godna Sungwabugna me awai awai me. Afa kaksag mwakwal el Godna mo fli sihiafule ati hwa bite la apukeg.

<sup>2</sup> Asa enaig mina ne Godna Sungwabugim anwenafefe. Amban el esog Sisas Kraiss nufunam hwaig eligni lofug ati blog afa enaig mo eba Godna Sungwabugna mo.

<sup>3</sup> Afa amban el esog enag mo eba awai enaig el Godna Sungwabug ehenai yi mas go mo. Afa enaig sungwabugba eba Kraissna angoluweg. Afa autunam ne higena enag amtakwalig sungwabug blofe afa ilawo hwa bite la ehe ati pugug.

<sup>4</sup> Afa luwal, enaig elim ati ne filafatig. Afa God nengelini olug yi ga afa Satan hwa bitenai el i ahwag asa Godba fwina wasneig feg afa nengelbi Godna fig asa nengel enaig elim ati ne filafatig.

<sup>5</sup> Afa enaig elbi eba bitenai asa ehengelni onigig eba bitenai onigig fig. Maia sihigonigbi asa bitenai el ogka ena mo higi.

<sup>6</sup> Afa bigel Godna luwalig afa mingnag el eba ati Godim anwenafenig afa big mo sihigonigbi asa bigelni mo higig. Afa amban el Godim anwenafenag fwainig enaig el bigelni mo

mas higi. Enaig mina asa big anwenafifi Godna nufunam Sungwabug ehengel nai yi goh me afa awai mwakwal mo sihiaule sungwabug ehengel nai yi goh me.

*Membenigna mo*

<sup>7</sup> Kana hihe, sa ne mingnag elim membegon afa enag membug eba God ehe mog feg. Afa amban el enaig esegba eba Godna leg afa ehe Godim anwenafenag.

<sup>8</sup> Afa God ehe membenig mog feg asa amban el enaig eseg fwainigba eba ehe mas Godim anwenafenag mo.

<sup>9</sup> Afa God bigelim membenig afa heafna Legim mungu nemug fena enag hwa bite la ningihiana asa ehe bigim nufunam nofkena gag faig afa enag mina God heafna membug ati bigim ogfunig.

<sup>10</sup> Afa bigel Godim membinig eba mangwal bigel upugugwa mo. Afa membenig mog eba hwaig God bigelim fwina membenigim asa heafna Legim hwa bite la ningihigba afa sa bigelni amtakwaligim huguflafatinig.

<sup>11</sup> Kana hihe, God bigim membenig enaig esegba asa bigel gafa mingnag elim asa membegoni.

<sup>12</sup> Mas bigel amban Godim nangug mo afa bimbefum mungu mungu membeagibi asa nengel anwenafifi God bigim wangafufe afa heafna membug bigelni oningig la kwaniafefe.

<sup>13</sup> Afa God heafna Sungwabug bigim faig asa big anwenafig God bigelni olug yi ga afa big God i ahwag.

<sup>14</sup> God heafna Legim hwa bite la ningihigba asa mungwali elim mina amtakwalig la nai lambigim afa mina suialag la lasanig. Asa bigel enaigim nangugim afa mungwali elim ena mo sihigonig.

<sup>15</sup> Afa amban el esofe Sisasa eba Godna Leg afa God ehena olug yi ga afa ehe God i ahwag.

<sup>16</sup> Afa bigel ati anwenafig eba nufunam nemug God bigim fwina membenig.

Membegna mina eba God ehe mog feg. Afa ne amban ena membeg la gofife ehe God i ahwag afa God ehena olug yi ga.

<sup>17</sup> Enag nihe bigim kwaniafenig afa bigelni nihe hwa bite nai Sisasa nihe mungu lofeg. Asa maia God mungwali elim kwefihiag ofefiba bigel mas embefini.

<sup>18</sup> Afa el mingnag elim fwina membenagba asa ehenai yi embefeg eba awai. Afa enag nihe ihlafegba asa embefig nihem ningihigba asa el embefefe og God kam mungwag amtakwalig faife afa ehe mas elim nufunam membenag mo.

<sup>19</sup> God ilawanam bigelim fwina membeni asa bigel gafa gwenag esi.



<sup>20</sup> Afa amban el enaig esog kaba Godim membenag afa heafna nilitem mo olug kakagfenag enag el eba mwakwal el. Afa ne nilitem mas membenig mo asa ne ehem nangwagig afa ne Godim mas nangug mo haisegba ne esog kaba Godim membenag. Nofeka enaig eso.

<sup>21</sup> Afa God bigim sihinig afa amban el Godim membenag eba ehe sa nilitem gafa gwenaign esenafe.

## 5

### *Big amtakwalig nihem filafig*

<sup>1</sup> Afa amban el heafna olug oningig og Sisas eba Godna Gisfu Fwahag El afa enaig el eba Godna Leg. Afa amban el alagim membenag asa heafna legim gwenaign esenag.

<sup>2</sup> Afa enaig mina big anwenaign big Godna luwaligim membenig asa big Godim membenigim afa heafna mo mungu kehlifua.

<sup>3</sup> Afa Godim nufunam membenigba asa ne heafna mo higinam patalkui. Afa heafna moba mas ekieg mina lofug feg mo eba suialag mina asa mas bigim kinig fenig mo.

<sup>4</sup> Afa Godna luwalig eba wasneigna fig asa hwa bite la nai amtakwalig nihem filafig. Afa bigel Sisasim olug oningigim asa ehe bigim wasneig faig asa big amtakwalig nihem filafig.

<sup>5</sup> Afa amban el olug oningig Sisas eba Godna Leg afa enaig el amtakwalig nihem filafefe. Afa ne Sisasim olug oningig fwainigba eba awai.

<sup>6</sup> Afa Sisas Kraiss hwa bite la ati pe blog afa maia ehe bloba ehe sambaganingi mak ogfug eba bu i taf i. Afa bu eba ehe bu la pegim ogfug afa tafba heafna lahagim ogfug. Mango bu behig ogfua mo. Afa eba Godna Sungwabug esog sambaganingi mak eba nufunam afa heafna mungwali mo eba nufunam nemug feg.

<sup>7</sup> Afa enag sambaga mungu mo sihig og.

<sup>8</sup> Afa Sungwabugna mo afa bu la pegna mo afa tafna mo eba mungu mo gi. Afa enag sambaga mungu mo esog Sisas eba Godna Leg.

<sup>9</sup> Afa bigel elni mom higinim og eba nufunam afa Godna mo eba nufunam nemug feg. Afa enag sambaga mungu mo God ehe ati bigim faig. Afa enag mo eba heafna Legim sihinag.

<sup>10</sup> Afa amban el Godna Legim olug oningigba asa enag Godna mo ehena oningig la go. Afa amban el mas Godna mo olug oningig afa ehe enaig oningig enag mo God heafna Legim sihinag mas nufunam feg mo asa ehe og Godba mwakwalule el.

11 Afa enag mo bigim blonig God ati bigim wahkig nofkenagag faig afa heafna Leg ati mina pigi fwahag asa God sama enaig esei.

12 Afa amban ne Sisasna fefe eba ati nofkenagag flag. Afa amban ne Godna Legna feg fwainig ehenai yi enag nofkenagag awai.

13 Afa amban ne Godna Legna unehlagim olug oninginag ka nengelim ginofenig. Ka membeg nengel sa anwenafi nengel ati wahkig nofkenagag flig asa ka hwa mo nengelim ginofenig.

14 Afa hwa mo eba nufunam asa bigel nofeka Godim sahnagim embefi. Afa big Godna sawieg la mangwalim sahnibi big anwenafig ehe bigelni mo ati higig.

15 Afa bigel anwenafig ehe bigim higinig big ehem mangwalim sahnibi afa big onigig la enaig esogoiba asa ehe higinam bigim ati faig.

16 Afa ne nilitem nanguiba amtakwalig esegba afa hwa nihe mas lahad mina patalkug mo asa Godim sahnaiiba sama ehem kweagfui. Afa God ehem nofkenagag faife. Ka sihig el enaig eseg heafna nihe mas lahad mina patalkug mo. Afa mingnag amtakwalig nihe el eseg eba lahad mina patalfug afa ka mas nem enaig sihifenig mo sa ne enaig elim Godim sahnaiiba sama ehem kweagfui.

17 Afa mungwali amtakwalig nihe eba amtakwalig mina patalkug afa mingnag amtakwalig nihe mas lahad mina la patalfug mo.

18 Afa bigel anwenafig Godna luwalig mas amtakwalig mina fafufiah mo. Afa Godna Leg enaig elim nangwaghiagego asa Satan mas ehem haig eseni.

19 Afa bigel anwenafig bigel Godna fig afa mungwali bite Satan nangwaghiagego.

20 Afa bigel anwenafig Godna Leg ati blog asa bigim anwenafeg faig. Asa big anwenafig Godba nufunam. Afa Sisas Kraisa bigelni olug yi ga asa God gafa bigelni olug yi ga. Afa Sisas eba nufunam God feg afa ehe wahkig nofkenagag mog feg.

21 Kana luwal, nofeka mwakwal godim muhla feni. Gwe-naho.

## **Angigieg Mo Jon Ginofena Hwa buk enaig esog**

Hwa bukba siosna misog el angwafig mi afa heafna luwalig mi ginofeni. Afa kaksag anwena el sa enaig onigig fini. Enag angwafig i luwal i eba mungu sios la nai elim ofgunig. El sa hwa buk ginofeg eba ehe membeg ehegelim og sa ma mingnagim membegonim afa ehegel gafa sa ma mwakwal ofgufeg elim membi yi fegoni. Sonaig el eba Godna mo fligim afa gasaf sihifeg.

<sup>1</sup> Ka siosna misog el hwa mo angwafig i afa heafna luwalig i sa ma hwa mo fli. Angwafigi God ati wegfu fwatig afa ka nem fwina membenig. Mango kable mungu enaig esiah mo, afa mungwali el Godna nufunam mo anwenafigim ehengel gafa nengelim fwina membenig gonug.

<sup>2</sup> Hwa nufunam mo bigel kehlifua afa enag moba wahkig wanai yi gififi asa ka nengelim membenig.

<sup>3</sup> Ka membeg God Alag afa heafna Leg Sisas Kraiss sama bigim enaig esini. Ehenigi sama bigim afla ahfenim, afa olug enesieg bigim ahfai, afa enagba esumunagim bigim suiala ahfenig. Ambangel sa nufunam mo anwenafigim afa mingnag elim membegonim hwag sambaga mungu mo ehem pugunafe.

<sup>4</sup> God Api bigim wasneig mo faig. Maia ka nangwagigba neana mingnag luwal enag nufunam mo patalfugba asa ka sifakaleg.

<sup>5</sup> Asa ka nem enaig sihifenig bigel sa mingnag elim membeg gonug. Hwa wasneig moba mango graunai mo mo, eba awai, eba autunam ati big hig ambefena.

<sup>6</sup> Afa ne enaig nihem patalkuia fiba asa ne Godna wasneig mom gwenaisi. Autunam ne ati enag wasneig mo higeni eba enaig esog sa ne elim membegonim.

<sup>7</sup> Afa kaksag el fambegofifibi eba mwakwal el. Enag el oningig Sisass Kraiss mas hwaig elig bloi. Enaig elbi mwakwal el ehe enaig esife Sisass lofugife.

<sup>8</sup> Numwehenam suialag afu fifum afa mo mungu sa ne patalfu eba gafuga sa ne feg mas awaiye afa God nem mungwali mungwag nem faife.

<sup>9</sup> Afa amban el ne Kraissna mo ne fwahanam afa ming mo ne flaiba eba ne mas God i ahwagfi. Afa amban el hwa moba patalkuia fiba eba Alag i Leg i ehem ahwanigiafife.

<sup>10</sup> Afa el nem nangwagim blogba asa atiamba hwa suialag mo flabluiog fwainigba nofeka ehem lala gam waniki. Afa nofeka nugweafla.

<sup>11</sup> Afa amban enaig elim nugwehiagigbi eba ne ehengelni amtakwalig gafugam kweafunig.

<sup>12</sup> Kana moba kwaniafeg afa kam oksig ginofegim. Ka oningig ka nem nangwagife. Enanam bigel augunam asa mo sihiagi asa bigel sifakalifi.

<sup>13</sup> Neana suialag nilite heafna luwalig esogog kagel mas negelim etetigonig mo. Gwenaho.

## **Olyinai Mo Jon Ginofena Hwa buk enaig esog**

Hwa bukba siosna misog el ginofenam afa ming misog elim nigihiana. Ehena unehlag eba Gaius. Afa ehe Gaiusna unehlagim figifena afa ehe eba mingnag Kristen elim kwaganifna. Asa ehe Gaiusim sihina og mungu tonbusug elim sa ne membi fena ehena unehlag eba Diotrefes.

<sup>1</sup> Ka siosna misog el hwa mo ka Gaiusim fatinag. Kiafena hihe nangum, ka nem fwina membenag.

<sup>2</sup> O hihe, kati awenafeg neana sungwabugba suialag. Ka membeg neana augwiag sama gwenaig gofi afa nem mas gih fei.

<sup>3</sup> Afa mingnag nilite kam ambe sihinig Godna nufunam mo ne mas fwahiag mo ne gwese kehlagu. Asa ka sifakaleg.

<sup>4</sup> Maia ka higigba kana luwal gwenai eseg asa ka fwina sifakaleg. Enag sifakalba kwaniafeg.

<sup>5</sup> O mangauo, mingnag Godna elim membinaim ne mas anwenafegonug mo afa neana membug ehengelim aflafegonim asa gawig faigo.

<sup>6</sup> Afa ehengel sios elim neana suialag nihe, mo sihigonig. Afa enag nilite wagiafugba Godna gafuga la. Eba suialag ehengelim enaig gawig kwaganigba enaig mina God membeg sama ehengelni gafugag gwenaig gofi.

<sup>7</sup> Asa ehengel wagiafugba Godna gafuga la og sama Godna unehlag kwaniafei afa afwambanai el ehengelim mas kwaganig mo.

<sup>8</sup> Asa bigel kristen enag elim aflafegonim afa kwagani sama nufunam mo pugui bigel mungwali gafugafi.

<sup>9</sup> Ka sios elim weti mo ginofe faig, afa mungu el Diotrefes ehe og kike goseg asa kana mo mas higi.

<sup>10</sup> Maia ka bloiba heafna haig haig mwakwal mo asa bigim esonig ka ambala pigi skogim. Mingamba ehe mas nilitem suialafenugei afa amban el og kasa enaig ese eba ehem kwenag nofeka enaig ese. Afa enag elim sios lanaim laginigim asa ningitigifeg.

<sup>11</sup> Kana hihe, nofeka nangwaginam afa haig haig amtakwalig nihe patalku afa neau sa suialag nihe mungu patalku. Amban sa suialag nihe eseg eba Godna feg. Amban sa amtakwalig nihe eseg eba mas Godim nangui.

<sup>12</sup> Mungwali el esogog enag el Demetrius eba suialag el afa mingnag nufunam mo el gwenaig esog. Afa ka gafa

heafna nihem suialag sihifenag afa ne anwenafeg kana moba nufunam.

<sup>13</sup> Kana moba kwaniafeg afa kam oksig ginofegim.

<sup>14</sup> Ka oningig ka mas managei eba ka nem nangufe. Enanam biningi ahwaganam asa mo sihiagafefe.

<sup>15</sup> Ka membeg neana gag sama suialafei. Mungwali nilite hwanai yi augwia og ka mas nem etetinig mo. Sa ne kana mingnag nilitem gwenanai yi ne augwia hwa mo sa ne sihini. Gwenaho.

## **Mo Jut Ginofena Hwa buk enaig esog**

Hwa mona ginof eba 2 Pita la sa go muhla mungwalofug ahfe. Jut membeg God mungwali elim sihinig og maia Godna suialag mona angolugwag el osihifibi nofka ehengelim higigon. Afa ginof enaig esog. God ati olug onigig nihe heafna elim faig. Asa enam big numwehe nangwahiage ma sa mwakwal el bigelni olug onigigim amtakwal klaitifi.

<sup>1</sup> Ka Jut Sisas Kraisna gafugag el afa ka Jemsna suminig. Ka hwa mo nengelim ginofenig asa God nengelim unenig afa nengel Api Godna membug la afohie afa Sisas nengelim nangwahiagego.

<sup>2</sup> Ka membeg Godna aflafeg afa olug enesieg afa Godna membug sama nengelim fwina kwania puguni.

<sup>3</sup> Kana hihe, ilawo ka enaig onigig fegim ka nengelim ginofenig asa God ati bigim lambig afa ming onigig kam pugunag eba hwaig, ka nengelim ginofenig afa ka membeg asa ne wasnei. Hwa olug onigig God ati bigim faig asa ne numwehe kehli. Afa ming olug onigig eba awai gwenag mungu ati bigim faig.

<sup>4</sup> Afa mingnag amtakwalig el ambegim asa bigel nai yi meagam saiye afoiye. Autunam God ati sihig fwahana ehe enag elim amtakwalig mungwag faifie. Enag el mo flagim asa nufunam sihi afa mwakwalna sihi fafefe asa ehengel og kana amtakwalig nihe eba suialag. Afa ehe og afa eba Sisas Krais mangwal mungwa mo eba mingnag ainiyag ati feg.

<sup>5</sup> Afa mo ka nem pese osihini enag nengel autunam ati anwenafini. Afa autunam Israelnai el Isip yi auguiafena asa God ehengelim lambina. Afa maia ehe enaig esenigbi afa mingnag el mas Godim olug onigini mo asa God enaig elim amtakwale klaitina.

<sup>6</sup> Afa nofeka oflanai elim etetigoni afa mingnag of la nai el Godim masig fatini afa heafgelni gafuga i afa latu i eba ati fwahini. Afa ati God ehengelim wasneig we na kikenugegim asa sikulufeg la skaugum lambaitiba asa nengia afofufe. Afa maia kwefihiage osuna puguiba asa God ehengelim susug faife.

<sup>7</sup> Autunam Sodomnai Gomoranai afa muhla mingnag latunai el gafa enaig esini. Afa ehengel aga taitu fig afa angwafigim keahlag afa saglag hefum awauna fiahfufna. Asa God ehengelim ati suwi la amtakwale klaitina. Afa bigim

ogfug gonug afa nofeka enaig esi afa ne enaig esigbi wahkig suwi lagig yi nem lambaitifi.

<sup>8</sup> Afa enag el bigelni onigigim asa gasafiahgig ehengel gafa amtakwalig nihe enaig esig. Afa ehe itila nangugim asa heafgelni eligim amtakwalig fiahgig afa Godim masig fatinig afa oflanai elim amtakwalig mo sihigonig.

<sup>9</sup> Afa ehengel mas embefi asa enaig esig afa Maikel oflanai misog el ehe anwenafegim asa mas enaig eseg mo. Afa maia ehe Satanim moanagafenam afa og sa amban Mosesna meligbi sa flafe afa ehe embefenam asa mas Satanim amtakwalig mo sihina mo. Afa ehe og Ainiyag ehe sa nem lagnai.

<sup>10</sup> Afa enag el mangwalim anwenafig fwainig asa of la nai elim moalamp mo sihigonug. Afa heafna onigig sisna onigig lofig afa mangwal onigig ehenai yi pugug eba gauna esegim afa enag asa eseg eba enag ehem amtakwale fatig.

<sup>11</sup> Niasabunig, ehengel kinig fligim. Afa enag el Keinna nihe patal afug. Afa ehengel monim mungu onigig asa autunam Balam esena. Afa haig haig amtakwalig nihe gafugafigim asa enana kig flig. Afa autunam Kora Godim masig fatina asa God ehem amtakwale fatina afa enag el gwenai esifi asa God ehengelim amtakwale klaitifei.

<sup>12</sup> Afa maia nengel buyis la augunam afa ahgafiba asa enag mwakwal el buyis la pugunam afa sa hefum mungu onigife afa afwanfeg eba ehenai yi awai. Asa mingnag el esog ofe nengelni buyis mas suialag feg mo. Eba enag el leango lofug afa bu mas feg mo asa bigim mas kweafug mo afa efef blogum asa leango lambkug. Afa enag el amtakwalig li lofug afa maia heafna was ofefiba eba fug mas lugui. Eba enaig li asa mog la fagafla kigbi asa ati fofeg.

<sup>13</sup> Afa enag mwakwal el eba bu sewug lofug asa pegim afa heafgelni amtakwalig nihe ne nangugbi eba bu meug lofug. Afa enag el bagnafut lofug mas mungu nai yi gofi. Asa God fwina sikulufeg kembig ati numweheg fwahag afa enag elim amtakwalig kembig la lambi klaitiba asa enanai yi wahkig afofife.

<sup>14</sup> Enok eba Adamna simbianinga. Adam la gohugum blog Enok la pugug, Enok eba elegeg la gohug el. Autunam ehe ati sihi fwahana og, “Sa nangu, Ainiyag heafna kaksag oflanai elim wanblonam,

<sup>15</sup> afa ehe mungwali elim kwefihiagefe. Afa maia enaig esebe afa amban asa Godim molamp ognag afa haig haig amtakwalig nihe eseg asa God mungwag susug faife.”

<sup>16</sup> Afa enag el ehe mas sifakale asa memtog mona hefum lagig afa mangwal amtakwalig asa pugug eba mingnagim kufenigim. Ehe heafna amtakwalig onigig patalkugim asa



hefum fingi feg afa ehe embeg mo sihiageg asa ehena membeg sa goh sama enaig la pugui.

*Sa ne Godna olug onigigim fwina keahla*

<sup>17</sup> Kana hihe, autunam bigelni Ainiyag Sisas Kraisna kanog el ati sihi fwahini. Nofeka ehengelni mo eteti.

<sup>18</sup> Ehengel nengelim enaig esogonife afa maia osu awaiegim muhla ofefiba afa amtakwalig el nem enaig esogonife og neana onigig wetiti fig asa neana suialag mo mas patalkui afa heafna amtakwalig onigigim patalfug.

<sup>19</sup> Afa enag amtakwalig el apukenam afa nengelim Sisasna elim mungu mungugim kokoitifiahgifi. Afa enag elbi eba Godna Sungwabug eba awai afa heafgelni onigig hwa bitenai patalfug.

<sup>20</sup> Kana hihe, neana olug onigig eba suialag sama nengelni kwaniafeni afa Godna Sungwabug wasneig ni sa ne Godim sahani.

<sup>21</sup> Afa bigelni Ainiyag Sisas Krais sama nengelim aflafenim asa wahkig nofkenagag nengelim faifi. Afa maia nengel enaigim nengiafofiba sa ne Godim muhlafini asa ehe nengelim membenife.

<sup>22</sup> Sa nengel mingnag elim aflafegon asa ehengelni olug onigig wetitifeg.

<sup>23</sup> Afa mingnag el mina la suwi muhla afohie asa nengel ehengelim kwaganim asa lambim. Afa mingnag el amtakwalig nihe esig afa nofeka ehengelni nihem membegon afa enaba ne eligim aflafegba eba esese afa ne embefefiba ne eteti ehengelni nihem lambinim patal afufe.

<sup>24</sup> God ehe nengelim kwaganig asa mas nengelim ambanim pei. Afa ehe nengelim lambig lamblug asa heafna nof la afohie afa nengelni amtakwalig eba awai sifakaleg mungu feg.

<sup>25</sup> Afa God eba mungu feg afa Sisas Krais bigelni Ainiyag mina pigig sama God bigim ena mina pese lambi. Afa ehe kwania feg afa kigmog feg afa suialag ombusug feg asa mungwali elim nangwaghiageg afa autunam afa ilawo gafa gwenaign gwese ikafife. Gwenaho sama enaig esei.

# Sisas Jonim Sumi Yi Upuguiaigim Ogfuna Hwa buk enaig esog

Maia el Kristenim amtakwalig esegonfiniba enanam Jon hwa bukba ginofna. Afa mungwali Kristen enaig onigig, Sisas Kraiss eba ehgelni Ainiyag feg asa ehengel enag kinig flini. Hwa bukna mogba sama Kristen elni olug onigigim wasnehiageg ese ehgel kinig kwaniam nagufwahibi ehegelim pigalapife. Afa mangwal sumi yi sa pugufe enam hwa bukba lasug mo sihiageg. Afa enanam Kristen eba enaig lasug moba ati awenafini, afa afwambanai el eba mas awenafeg mo. Afa lasug mona mog eba enaig esog. Sisas eba Ainiyag. Asa ehena nigana God angoluwigim mungwali pigalapife. Afa Satanig gafa pigaupife. Afa Sisas maia heafna gafugagim auwigiba afa amban Kristen sa wasinei afohiegim afa mas heafgelni olug onigigim fwatig mo. Eba God ehgelim suialag mungwag faife. Afa ehgel afunam Godim wanig aflafiba asa mas kinig pese puguni. Afa mungwali gawigim God esenibi asa pese mulug apukefe.

<sup>1</sup> Hwa bukba God mo Sisas Kraissim fainaba mangwal sa ikagna pugufe. Sisas ambangel sa Godim patalfug enam ogfuni. Ehe enaig esena heafna of lanai elim kam mo faigim ningihiana.

<sup>2</sup> Kaba Jon, mangwal sa ka mungwali fahigiageg nasa ka ambala enam osihi. Hwaba Godna mo afa ena nufuna mom Sisas Kraiss ogfug.

<sup>3</sup> Amban sa hwa buk osuwigfiba sama sifakale. Ambangel sa higig afa patalfug ena mo hwa buk la go enaig esog mangwal sa sumi yi pugufe ehengel gafa sifakali. Afa mas managei eba ikagna pugufe.

<sup>4</sup> Kaba Jon ka hwa ginof nem elegeg la gohug Esia nai provins sios elim faig. Sama God nem esmunagim kwaganig faibi sama olug enesieg nem gohunifi. Sonaig God bigim fafaife eba ehe autunai fegim afa glaunai feg afa autunai la gafa gwese gofufe, afa elegeg la gohug sungwabug heafna pegag sime la afohie.

<sup>5</sup> Afa Sisas Kraiss eba nufunam ambala sihiaule afa ehe goseg lahagim afa buihiag, afa ehe mungwali bite nai misog elim Ainiyag fenig.

Ehe bigim fwina membenigim, afa lahagim asa heafna tafna amtakwalig nihe mo la nai bigim tigfe lambigim,

<sup>6</sup> afa lambkug heafna bog megam aitig fwahagim afa bigim esenigbi asa big pris figim sa big heafna God Apiim gafugafini. Afa sa Sisas Kraiss ehe wahkig unehlag kwania flanam asa mungwali nangwagihiage gofufe. Eba esefe.

<sup>7</sup> Afa sa ne nanguibi leangona wahe blofe afa mungwali el i afa Sisasim tigi kahliule el i gafa asa ehem nangufi afa bitenai el mungwali enaig puguiaim oniginim wewatife. Eba nufunam enaig pugufe.

<sup>8</sup> Afa God Ainiyag ehe mungwali kigmogna feg esog, “Kaba kike ka goseg afa kike ka sum feg.” Eba ehe autunai fegim afa glaunai fegim afa autunai la gwese gofufe.

### *Jon Kraissim nanguna*

<sup>9</sup> Ka Jon nengelni nilite, ka Sisasim patalkugum afa ka enag kinig flag asa ati ne nengel gafa enaig flig. Enaig big esigbi eba ati big wasneigim saiweg Godna bog megam nenge afo. Afa ka Godna mo sihibba ena nufunam moba Sisas ofug asa ka enag kinig flagim afa kam Patmos ailan gam ningihig.

<sup>10</sup> Afa enanam Ainiyagna osuna Godna Sungwabug kam sulufu wanikina afa ka higinaba elni mengig la fuf lofug kana masigim fwina moasina.

<sup>11</sup> Enaig esona og, “Mangwal sa ne mungwali fahigegba asa ne buk la ginofenam elegeg la gohug siosim fai. Ena siosba Efesus, Smerna, Pergamum, Taiataira, Sardis, Filadelfia, afa Laodisia.”

<sup>12</sup> Afa koka anwenafe amban maia esogo asa ka wahigife nangunaba afa sa elegeg la gohug lam afohiafna. Afa ena lamba eba gol.

<sup>13</sup> Afa lam olyiba eba el lofug gofenamba afa ehena lofug mo mungwanam peka kigim safla gufna afa minailof fatina enaba gol ehe.

<sup>14</sup> Afa ehena misog i lapog i fwina busiagena ofenaiba lambo busug enaig fena. Afa ehena nofugba suwi meleg lofug kukoitifego.

<sup>15</sup> Afa ehena mongfifagba ofenaiba kapa yimieg ombusug afa ehena moagba ofenaiba bu sisewug kwania lagi.

<sup>16</sup> Afa ehe heafna nihiginai ningana elegeg la gohug bagnofut kike lambgu. Afa ehena mengig la naiba bainat sambaga sig ahgo enaig pugukag. Afa ehena nofbusugba osu lofug fwina pukofakag.

<sup>17</sup> Afa maia ehem nangugba afa ehena kig mong la kam pegim lahag lofeg. Afa sa kam heafna nihiginai ningana tuhugim afa esog, “Nofeka embefe, eba kikehe gof fegim afa ka sumi feg.

<sup>18</sup> Afa ka kike nofkikena feg. Autunam ati kam lahana, afa sa nangu, ilawaba ka nofkikena wahkig gofufe. Asa lahag i afa melig pigieгна kembig i ambe kam ahnai skaufenig.

<sup>19</sup> “Afa sa ati ne enaigim nangug haig haig sa ilawo go afa haig haig sumi yi pugufe, sa ne enam ginofe.

<sup>20</sup> Afa mangwalim sa ne lambusig ena mogim ka nem osihina. Elegeg la gohug bagnofut kana nihiginai ninga la go eba elegeg la gohug siosna of lanai el afa elegeg la gohug lam eba elegeg la gohug sios.”

## 2

### *Mo Efesus gam ikana*

<sup>1</sup> Ena moba maisim sihiagofna Sisas enaig esona og, sa ne ginofenam Efesus lanai siosna of lanai elim fai. Afa el elegeg la gohug bagnofut nihiginai ninga la lambigim asa elegeg la gohug lam golna olyi ika asa hwaba ehena mo.

<sup>2</sup> Ka ati anwenafeg mangwal sa ne fiagigbi eba ne wasneigim afa ne gwesim fwina gafuga fiaka. Ati ka anwenafeg sa ne amtakwalig elim lambinam ningitigi. Afa el mwakwaligim enaig esogo kangelbi siosna kanog fwatieg el fig afa sa ne enanai yi fahiginigenam sa anwenafi eba mango nufuna mom mo.

<sup>3</sup> Afa ne kana gafugaba feafoba afa sa ne ena kinigbi fligim afa mas ne yiskosinim fwahi.

<sup>4</sup> Afa ka nem osehtigi ne mas kam fwina membinig mo sa ne ilawana esini.

<sup>5</sup> Sa ne enam numwehe onigig autunam sa ne afohieafna enanamba ne ihlafini asa ne olug waikefi ilawana sa ne esig. Afa ne enaig esig fwainigba eba ka blonam neana lam flakun fie eba mas ne afofi.

<sup>6</sup> Afa eba ne suialag olug ufufba, ne Nikolasna elni nihem na olug kakagegonig kable sa ati ka enaig eseg.

<sup>7</sup> Afa amban ne anganaba eba sa ne ena mo higim Godna Sungwabug sa siosim sihinig. Afa amban ne haig haig amtakwaligim filafe fatiba eba ehem fwahaiba sama li fug nofkikenagag faiba sa ma nei. Ena libi Godna aso la heven la go.

### *Mo Smerna gam ikana*

<sup>8</sup> Ena moba maisim sihiagofna Sisas enaig esona, sa ne ginofenam Smerna lanai siosna of lanai elim fai. Afa enag el ehe gof fegim afa ehe sumi feg enag elbi ehem ati lahagim afa ehe pese nofkikena gohug. Hwaba ehena mo.

<sup>9</sup> Afa ka ati anwenafeg ne kinigni feg afa ne gawig fwainig feg afa enaba nebeba numwehifie. Afa minganag esofog og

kaba Ju el eba ehe mwakwalig afa eba ehe Satanna lala nai el afa ati ka anwenafeg eba ehe nem amtana mo osihigoni.

<sup>10</sup> Afa maia enaig susug nem sumi yi opugunifibi nofeka embefi. Sa hig ka nem osihin Satan eba nem gihnag fainim afa nem lambinam kalabus lala aitife afa sa ne 10 pela osuna haig haig kinig nem faifie. Afa sa ne kam patalfehfu maia el nengelim kwagi klaitibi eba ka nem suialag misog lofug faifi. Sonagba ogfug ne fagim flafoaule el eba ne enag nofkikena gag flifi.

<sup>11</sup> Afa amban ne anganaba eba sa ne ena mo higim Godna Sungwabug sa siosim sihinig. Afa amban ne haig haig amtakwaligim filafe fatiba eba angigieg lahad mas ehem pugunai.

### *Mo Pergamum gam ikana*

<sup>12</sup> Ena moba maisim sihiagofna Sisas enaig esona sa ne ginofenam Pergamum lanai siosna of lanai elim fai. Afa enag el bainat sambaga signa enaig nafeg. Hwa ehena mo.

<sup>13</sup> Afa ati ka awenafeg nengelni kembigba Satan enanai yi misog el feg. Afa ne mas kam mas fwatinag mo. Afa maia Antipasim kam ambala patalkuiaule el enanai yi ehem tigifatigbi afa ne gweseg kam oniginag na kehlagu.

<sup>14</sup> Afa ka nem osehtigi afa minganag el gwese Balamna onigigim patalfuia. Autunam Balam Balakim mina tohlanag ogma Israel elim amtakwalig nihe la saiye afa sama mwakwal gotim faig fane ahagai afa sama apukenam aga taituna afui.

<sup>15</sup> Afa minganag gwenag esig Nikolasna elni nihem ogfugonug.

<sup>16</sup> Afa sa ne olug waikefe afa ne awaiegba eba ka mas managei eba ka blonam kikeafna mengig la nai bainatna sonaig el i ahufrafe.

<sup>17</sup> Afa amban ne anganaba eba sa ne ena mo higim Godna Sungwabug sa siosim sihinig. Afa amban ne haig haig amtakwaligim filafefatiba eba ka ehem meaganai heven la nai amba seflig mana faifie. Afa ka ehem fun busug, mulug unehlag enanai yi go enag ka faifie. Afa amban sa flag eba ehe mungohe enag unehlagba anwenafeg.

### *Mo Taiataira gam ikana*

<sup>18</sup> Ena moba maisim sihiagofna Sisas enaig esona sa ne ginofenam Taiataira lanai siosna of lanai elim fai. Hwaba Godna legna mo. Heafna nofugba suwi mileg lofug kukoitifego afa ehena mong fifagba eba mulug kapa lofug. Afa ehe enaig esog.

19 Afa ati ka anwenafenag ne enaig gafugafeg, afa ne kam oniginag afa elim membenigim afa ne kwaganig afa ne wasneigim afa ne haig haig kinig flag. Afa ilawo ne gafugafegba eba gwesim hilefego.

20 Afa ka nem osehtigi afa ne mas Jesebelim kwini mo enag angwafig ehe enaig esog og, “Kaba Godna mo fla sihiakaule” afa ehe kana gafugag elim mwakwalenigim afa ehe aga taitunagim ogfuhiageg afa mwakwal godna faig fane ahagagim ogfuhiageg.

21 Ka ehem fwahag sama sonag angwafig heafna amtakwalig nihem fwahai. Afa ehe mas nihem fwahag mo afa ehe olug waikefegim oksina.

22 Afa ehe gwenaig esig fwainigba eba ka sonag angwafigim gih fainam afa ka ehem afa ambangel sa ehem fapukefe nafo enam ka lambinam asa ka kifegam lambi taitinam afa sa ka kinig kwania ehengelim faifie.

23 Afa ambangel sa ehem patalfug eba ka ehem gafa kwagi taitife sama mungwali sios el enam anwenafi kaba olugim afa onigigim fahigeageule asa ka mungu mungu ehengelim mungwag gwena susug faifi.

24 Afa nengel amban Taiataira nai el ne mas ena angwafigni nihem patalfu mo afa ne mas anwenag flig mo asa seflig Satanna meaganai mo. Afa ka nem enaig sihifenig ka mas nem ming gafugag fai.

25 Afa sa na kam oniginig gwese wasnei kehli ufufiba sama ikan kike blog la pugui.

26-27 Afa ambangel sa fagim filafigim afa sa kikeafna gafugag la gwenaig esiafuiam ikan asa mungwali awaieg la pugufe eba ka ehengelim mungwalofug unehlag kikeafna alag sa kam faig eba sa ka ehem faibi asa ma ehengel mungwali elim kwefihianig ofifibi eba mas mangwal weti eyi fwahi eba enaig elim lambinim pwapo mungwali lambi kigafibi asa ofenaiba bite munug lofug enaig esifi.

28 Afa mingba ka leana nai bagnofut ombusug ehem faife.

29 Afa amban ne anganaba eba sa ne ena mo higim Godna Sungwabug sa siosim sihinig.

### 3

#### *Mo Sardis gam ikana*

1 Ena moba maisim sihiagofna Sisas enaig esona sa ne ginofenam Sardis lanai siosna of lanai elim fai. Ena el elegeg la gohug sungwabug Godna ehenai yi gohug afa elegeg la gohug bagnofut ehenai yi go afa sa enag el enaig esog kati anwenafeg mangwal sa ne mungwali eseg. Afa el nem

nangugbi eba ne nofkikena go afa eba ne melig lahad lofeg mas ne nufuna gafugafeg mo.

<sup>2</sup> Is, nofeka nongi, sa buihia! Afa nimbeafna suialag nihe amtakwaligim ati meiofe sa ne enam wasnei afla. Afa neana gafugag kana Godna nof la eba mas ihlafeg mo.

<sup>3</sup> Sa ne pese onigim mangwal sa ne higigim afa flag sa gwenam patalkunam sa ne olug waikefe. Afa ne enaig esefe ofe el nongi eba ka ukwef el lofug blofe afa mas ne kam anwenafenai sa ka ahnana neanangum blofe.

<sup>4</sup> Afa mungu mungu el Sardis lanai mas heafgelni nihi lofugim nufwehe skofig mo. Eba ihlafifie busug lofug laitinin asa ka afuamine fififie.

<sup>5</sup> Afa ambangel sa fagim filafig eba ehengel gafa busug lofug laififi. Afa mas ka ehengelni unehlagim nofkikenagag buk la susuleni. Eba ka kikeafna api mi afa ehena of lanai el mi sihinfi hwa kana el.

<sup>6</sup> Afa amban ne anganaba eba sa ne ena mo higim Godna Sungwabug sa siosim sihinig.

#### *Mo Filadelfia gam ikana*

<sup>7</sup> Ena moba maisim sihiagofna Sisas enaig esona sa ne ginofenam Filadelfia lanai siosna of lanai elim fai. Ena elbi afsug fegim afa nufunam feg hwaba ehena mo. Afa enaig eseg Devitna ki gufnaba asa ehe Israelim nangwage hiagegofna, ena elbi heven ki kehlagu asa ehe mungwali nemug nangwage hiagego. Afa ehe mangwaliba pigiba eba mas amban kikise afa ehe mangwaliba kikiseba eba mas amban pigi. Enag el enaig esog.

<sup>8</sup> Ka ati anwenafeg mangwal sa ne fiagig. Sa nangu, mengigba ka nem pigi fwahanag afa mas amban kikise. Ati ka anwenafeg ne gweseg maisim weti wasneigbi gu afa ne kana mo kehla gwese ukwia afa mas ne kana unehlagim mas fatinai.

<sup>9</sup> Afa Satanna lala nai el ehe esogog ka Ju el eba ehe mwakwalig eba ka esinibi asa ambe nengelni kigmongug la apaiyenam afa ehengel anwenafi ka nem fwina membini.

<sup>10</sup> Afa maia enanam kwania kinig mungwali bite la pugu-nam elim yuhug faibi. Afa kana mo enaig esog sa numwehe wasnei afofum asa ati ne ena mom patalfug, eba ka nem nangwaghiage gofufe eba mas nem amtakwale saiyi.

<sup>11</sup> Afa eba ka ikagna blofe. Sa ne kam olug onigig wasneig kehli ufu afa masa ukwef el nem haig esegonibi afa maia ne Godna kembang la apukegba eba God mas nem mangwal suialag fai.

<sup>12</sup> Afa amban sa fagim filafeg eba ka ehem sumul lofug kikeafna Godna lala ugu fwahaiba eba mas ehe wahkig

enanai fwaha fakafegofi. Afa eba ka kikeafna Godna unehlag i afa heafna kembigna unehlag i ka ehem ginofenafe. Afa eba mulug Jerusalem kikeafna God ningihiaiba asa hevenim fwahanam pe blofe. Afa ka kikeafna mulug unehlag ehem gafa ginofenafe.

<sup>13</sup> Afa amban ne anganaba eba sa ne ena mo higim Godna Sungwabug sa siosim sihinig.

*Mo Laodisia gam ikana*

<sup>14</sup> Ena moba maisim sihiagofna Sisasa enaig esona sa ne ginofenam Laodisia lanai siosna of lanai elim fai. Afa el sihi og, eba esefe hwaba ehena mo. Eba Godna mungwali sawiegim patalkuiaule afa Godna mo nufunam sihiaule. Afa God sa mungwali gafugag fiageg eba ehe mog feg. Ehe enaig esog.

<sup>15</sup> Ka ati anwenafeg mangwal sa ne fiagigbi eba mas ne kam patalkuiagim fwina wasneig mo afa ne mas fwina yiskoseg mo. Hanai yi ne afofufe? Sa ne gosi me awai sumi yi me.

<sup>16</sup> Eba ne olyi gohug ka mas enaigim membeg mo eba ka nem ningihiafe ofenaiba el melfu aitig asa ka nem enaig esenifi.

<sup>17</sup> Ena ne enaig esogog, “Ka kikeafba kaksag kig i gawig i fiasaieg. Ka kikeafba ati ihlafeg.” Afa ne mas anwenafig mo nengel eba amtakwalig el gawig fwainig afa ne nofug etetini afa ne lofug fwainig elig behig.

<sup>18</sup> Sa ne kana onigig flinim asa ne kana gol yimieg nemug kam baimini afa sa ne kig kaksagna el finim asa ne kana busug lofug lambinim asa ne nembeafna eligim kikagu fiaginim afa sa ne kana nofug marasin lambinim sa ne nimbeafna nofug la laitiagibi eba sa ne fahigiagifi.

<sup>19</sup> Afa ambanim sa ka membenag eba ka ehem ninimuaiflaiba asa ma suialag el fe. Asa ne wasneinam olug waikefe.

<sup>20</sup> Sahig, ka neana olug yi tigege ne amban higinam sa ne olug pigiba ka sa blonam enanai yi sefuganam ka sa fane ahne.

<sup>21</sup> Afa amban ne haig haig amtakwaligim filafefatiba sama ka i hawaganam asa ka mungwal nangwagehiag ahfegofufe asa ka haig haig amtakwaligim filafefatig asa ka gwenaig kikeafna Alag i safeg.

<sup>22</sup> Afa amban ne anganaba eba sa ne ena mo higim Godna Sungwabug sa siosim sihinig.

**4**

*Jon itila lofug hevenim nanguna*



<sup>1</sup> Afa ka mingim itila lofug nangunaba mengig heven la pigi gofena. Afa ka higinaba elni mengig la fuf lofug fwina moasinam afa esona og, “Au sis gam fuko blo ka nem mungwali mangwal sa sumi yi puguiaḡegim enam ka nem ofuna.”

<sup>2</sup> Afa ikagna Godna Sungwabug sulufu la heven gam wanikanam afa ka nangunaba el enanai yi misog elni pegag sime la gafena.

<sup>3</sup> Afa ena elbi ehena nofbosugba tafnaiḡ i gwemaug i enaig ginofna fena enaig funba kig numweheg. Afa tafnag pegag simem wagi go fakana. Ena tafnagba yibiyibug fakanam fwina tonbusiagenam enaig gwemaug fun bus lofug.

<sup>4</sup> Afa mingba 24 misog elni pegag sime ena simem wagigo fakana. Afa 24 saglag el nanai yi auguiafna. Afa busug lofug i afa misog elni gol misog lofug enaig fiasaina.

<sup>5</sup> Afa enag olyi sime la asa afwei ifiyi ifiyi fiagena afa hug fwina pialele fenam lag kanam afa elegeg la gohug lam ehena nofbusug gam afohiafna. Eba elegeg la gohug Godna sungwabug.

<sup>6</sup> Afa gwenanai yi bu kwania la glas lofug gifini. Eba fwina ombusiagena.

Afa olyi nai sis lofug sambaga sambaga nof blistanig simem waki fakana. Afa ehengelni nihi yi kaksag nofug afohieḡna gifini, fig nofbusug gam afa masigim.

<sup>7</sup> Afa angigba eba ofenaiba laion lofug afa angigieḡba eba ofenaiba bulmakau lofug afa olyinaiba eba ehena nofbusugba ofenaiba el afa fignieḡba eba ofenaiba osianig efugukag lofug.

<sup>8</sup> Afa mungu mungu ehengelni anglagba eba enwesog la gohsaina afa nofug munggwali eligim gohsaina afa anglag skau gohsaina. Afa osuna i afa sinaini i ehengel mwanifi yi gwese fagohegoba og;

God eba wasnei nemug feg ehe afsug feg, afsug fegim, afsug nemug feg. Eba ehe autunai fegim afa glaunai fegim afa autunai la gwese gofufe.

<sup>9</sup> Afa ena sis sambaga sambaga blistanig afohieḡim afa enaig mwanifi fatig og, Ne God fwina kwania nemug feg, afa mungwali haig haig gawig nem ahnai skauḡinḡim afa nem suialag onig. Afa sa elim wahkig ena sime la gaulem esinig. Maia enaig esinibi

<sup>10</sup> asa 24 saglag el ehenai yi apaiyegim afa sonag el eba wahkig gohug ehena unehlagim fingi fig. Afa heafgelni misog elni misog lofug ehenangum lambi aitinig enaba ofguni og ehe kam nangwaghiaḡawig wasnei faig afa kagel ehem ahnai skauḡinḡim. Afa ehengel enaig esogona og;

11 Ne kangelni Ainiyag fegim afa God feg. Asa mungwali sama neana unehlag fingi finim afa mungwali nem ningmaginim afa ne kigmog flag afa mungwali gafu-gafiageg eba nimbiafna sawieg la ne esegba asa gohug.

## 5

### *Hwa moba pepa moanmoanig fakig i afa sipsip i*

1 Afa ka nangugba el misogyn elni pegag sime la gafenaba afa nihiginai ningana pepa moanmoanig kehla uguiafna. Enaba ginof enanai yi ohogam gohna afa ehegam gohna enaig elegeg la gohug ugwanina pakopako fenagini.

2 Afa ka higinaba Godna of lanai el wasneig el enaig lagfe-gofena og, “Amban el sa unehlana feg asa ena ugwaniniba hugfo taitinam asa pepaba pigife?”

3 Afa heven lanai yi, bite nai yi, afa bite menai yi amban el mas ihlafeg mo pepaba pigigim afa enam nangug mo.

4 Afa ka fwina enam ufwenaa afa mas amban ihlafeg mo pepaba pigig nangwagba.

5 Afa ena saglag el blog kam sihina og, “Nofeka ufwe, sa nangu, ena elbi eba Juda nai Laion afa ehe Devitna simbianinga ehe ati fagim filafeg fatig. Eba ehe ihlafefe ugwaninim hugfo taitinam asa pepaba pigife.”

6 Afa ka nanguba Sipsip Luwalig pegag sime olyi goh. Afa ena simem sambaga sambaga sis blistanafeg afa saglag el enam wakig fakag. Sona sipsip ofenaiba ati lahag afa mas lahag mo. Afa ehe elegeg la gohug aninguog nafeg afa elegeg la gohug nofug feg enaba Godna sungwabug elegeg la gohug God mungwali bitem ningitigi.

7 Afa ehe blogim el pegag sime naina ena pepa nihiginai ninganai flag.

8 Afa maia ena pepa flanaba afa sa sambaga sambaga sis blistanig i afa 24 saglag el i Sipsip Luwalig nai yi apaiyena asa ehena unehlag la fingi fig. Afa mungu mungu moag lagwagig lambwagini afa sanda gol disni flini eba suialag fungugni feg enaba Godna elni beten.

9 Afa ehengel mulug mwanifi enaig fatifini og; Eba ne pepa flanam ihlafefe ugwanin hugfo aitife, haisegba eba ati nem tigigbi ne lahagim afa taf sugfogim enana elim mungwali mungwa usumuna, afa haig haig mona, afa haig haig lofugna, afa haig haig kembig afa sa lambigim God nangum lambig lamblug pugug.

10 Afa ne ehengelim esinigbi asa pris figim afa sa bigelni Godim gafugafinig asa ehengel mungwali bite nangwaghiagife.

<sup>11</sup> Afa ka nangunam higinaba of lanai el fwina kaksag fiagena afa haig suwigih mo. Enag pegag simem, afa sis blistanig mi, afa saglag el mi enam waki fakana.

<sup>12</sup> Afa sa mwanifi fwina fatini og;  
Ena Sipsip Luwaligim tigifatigbi lahag ehe ati ihlafeg eba ehe kwania kigmog feg, afa mungwali gawig feg, afa mungwali anwenafig, afa wasneig feg, afa mungwali ehem ahnai skaufinigi asa ehe sisi feba afa sa bigel ehena unehlagim fingi fifie.

<sup>13</sup> Afa ka higinaba heven lanai yi, afa bite nai yi, afa bite menai yi, afa bu menai yi enag mungwali God sa gafugafena enag ehengel mwanifi fatini og;

Afa el sa pegag sime la gag mi afa Sipsip Luwalig mi afa sa bigel wahkig eheningina unehlagim fingi fiawag gwese ufufim eba enaig eseg sama mungwali eheningim ahnai skaufegonibi asa eheningi sisi ahfefe afa eheningina wasneig gwenaig wahkig gwese ahgofufe.

<sup>14</sup> Afa sambaga sambaga sis blistanig esog, “Eba esefe” afa saglag el apaiyenam eheningina unehlagim fingi fiawagig.

## 6

### *Sipsip Luwalig ugwanin hugfo taitig*

<sup>1</sup> Afa ka nangunaba pepa la ugwanin elegeg la gohug enaig afohiafna afa Sipsip Luwalig angig ugwaninim hugwafugba afa ka higigba mungu sis blistanig enaig moasifeg ofenaiba hug, Ehe enaig esog og, “Aublo!”

<sup>2</sup> Afa ka ena nangugba el busug hos la fango lambuguia. Afa ehe fagim filafeule elni misog lofug flauguia. Afa ehe fag la akog eba ehe fagim filafeule el lofug feg.

<sup>3</sup> Afa maia Sipsip Luwalig angigieg ugwaninim hugwafugba afa ka higigba angigieg sis blistanig enaig esog og, “Aublo!”

<sup>4</sup> Afa ming hosba eba tafnaig puguna. El enanai yi gagim God ehem esonag og sa ne enaig gafugag bite la esegba asa el hefum fagna hagim kwagaitifig. Afa God ehem bainat kwania faig.

<sup>5</sup> Afa Sipsip Luwalig olyinai ugwaninim hugwafugba afa ka higigba olyinai sis blistanig enaig esog og, “Aublo!” Afa ka nangugba el yimilig hos la skel flauguia.

<sup>6</sup> Afa ka higigba elni mengig lofug sambaga sambaga sis blistanigna olyi enaig lagofena og, “Fane tumeg, el sa mungu osuna gafugafeiba asa kig flanam ena kigna weti fane wit i bali i lambtigi afa nofeka oliv wel mi afa wainbug mi amtakwalig fatiauwag amo asa ma gwese ahgofi.”

<sup>7</sup> Afa maia Sipsip Luwalig fignieg ugwaninim hugwafugba afa ka higigba fignieg sis blistanig enaig esog og, “Aublo!”

<sup>8</sup> Afa ming hosba eba sifikologum ka nangugba. El enanai yi ga afa ehena unehlagba ‘atilahag’ afa melig pigieg kembig lanai ehem masigim patalfuia. Afa ehengel wasneigni sa figbi asa elim enanai yi pigig eba enaig eseg el fag havig, afa bini pigi, afa gihe skofeg, afa sangwali sis kwaskofig. Afa enanam sambaga sambaga simbianinga augunaba asa mungu simbianinga namo pigina afa sa gwenaig esefe mungwali bite enaig pugufefe.

<sup>9</sup> Afa maia Sipsip Luwalig afam ugwaninim hugwafugba sa ka nangugba elni sungwabug Godim faig sime la, skau afohiafna. Afa sonag el Godna mom oniginim sihiafuiag ehengelim kwagig klaitig.

<sup>10</sup> Afa ehengel enaig fwina esogog og, “Ne Ainiyag wasneig ne afsug feg afa nufuna nemog feg. Afa ahnana ne bite nai elim kwefihiagefe afa sa ne susug mungwag faig asa kam kwaskofig?”

<sup>11</sup> Afa God ehengelim lofug bosug faigim afa sihinig og, “Sa mwakwalig nengefiba maia ikan minginag gafugag el mi afa nilite el mi kwagi klaitiba asa enag ihlafefe eba enanam God mungwag esenife.”

<sup>12</sup> Afa ka nangugba Sipsip Luwalig enwesog ugwaninim hugwafugba. Afa sa asag kwania pugug ilafogba asa osu yimilig pugug ofenaiba yimilig wula afa was tafnaig pugug ofenaiba taf.

<sup>13</sup> Afa bagnofut of lanai fagahiagim bite gam apaiyeg ofenaiba efef maia blog ifum fisap skofegba asa yifu ambug pwatihiag apaiyegog.

<sup>14</sup> Afa of gweyi awaiyeg ofenaiba kombke moanmoanig fakig afa mungwali mug i afa ailan i heafna kugim fwatig afuahie.

<sup>15</sup> Afa enanam bite nai misogyn el i, afa saglag el i, afa amini misogyn el i, afa kaksag kig el i, afa wasneig el i, afa esug gafugag el i, afa mungwali el enag embem afunam mug la saiyeminefefe.

<sup>16</sup> Afa sa mug mi fun mi esogonifi og, “Kam meagam lambi kumu masa el pegag sime nai kam nangwagfe afa enaba masa kam Sipsip Luwalig amtakwalhiagefe.

<sup>17</sup> Enag kwania osuna asa eheningi olug kakag ahfeba afa sa amban mas enaigim kweagfui.”

## 7

*Godna of lanai el Godna elim ginof faka fwahanig*

<sup>1</sup> Maia enaig awaienaba, afa ka nangunaba sambaga sambaga Godna of lanai el sambaga sambaga bite ehbegam afohiafna. Ehengel sambaga sambaga efefim kwenagim lambug afo asa efef mas bite mi, bu mi, afa li ni sahini.

<sup>2</sup> Afa mingba of lanai el osu puguiaq lanai blogim nana Godna ginof fakag flauguhba. Afa ehe sambaga sambaga of lanai elim fwina unenig. Ehengelim God wasneig faig sa ma bite mi afa bu mi afa li mi amtakwale fati. Ehe enaig esonig og,

<sup>3</sup> “Nofeka ahmona esi. Kagel ma Godna gafugag elim mingig la ginof skonibi asa ne sumi yi enaig mo esi.”

<sup>4</sup> Afa ka higigba hanansi el Godna ginof lambig. Enaig pugufeg 144,000 feg afa Israelna 12 pela simbianinga mungwali el feg.

<sup>5</sup> Afa enaig eseg, Judana 12,000 simbianinga puguiageg

afa Rubenna 12,000 simbianinga puguiageg

afa Gatna 12,000 simbianinga puguiageg

<sup>6</sup> afa Aserna 12,000 simbianinga puguiageg

afa Naptalina 12,000 simbianinga puguiageg

afa Manasena 12,000 simbianinga puguiageg

<sup>7</sup> afa Simeonna 12,000 simbianinga puguiageg

afa Livaina 12,000 simbianinga puguiageg

afa Isakarna 12,000 simbianinga puguiageg

<sup>8</sup> afa Sebulunna 12,000 simbianinga puguiageg

afa Josepna 12,000 simbianinga puguiageg

afa Benjaminna 12,000 simbianinga puguiageg.

### *Kaksag el busug lofugna feasaina*

<sup>9</sup> Maia enaig awaienaba afa ka nangugba afa el fwina kaksag feageg afa el haiseg suwigih mo. Eba mungwali mungwa usumuna, afa haig haig kembang, afa haig haig lofugna, afa haig haig mona enag ehengel busug lofug laitiagigim afa li fegeg lambug afo. Sonag el, el pegag sime la gag mi afa Sipsip Luwalig mi eheningina nofbusug la afohieba.

<sup>10</sup> Afa ehe fwina enaig esogog og;

Kagel eheningim sifakal fegonug. Afa kagelni God pegag sime la ga afa Sipsip Luwalig i ehe kam ahlambig.

<sup>11</sup> Afa mungwali of lanai el pegag sime mi afa saglag el mi afa sambaga sambaga blistanig sis la mi enanai yi ambe muhla afohiakanam asa heafgelni nofbusug bite gam apaiyenam Godna unehlagim fingi finim,

<sup>12</sup> enaig esogona og;

Eba nufunam, biafgelni God sisi feba, asa big ehena unehlagim fingi fifie, afa ehe mungwali anwenafeg, sa big ehem suialag oni, sa ma mungwali ehem ahnai

skaufini afa ehe wasneig fegim afa kigmog feg. Sa ma enaigna gwese wahkig gofi. Eba nufunam.

<sup>13</sup> Afa saglag el mungu kam sahana og, “Sonag el busug lofugna figbi atiaho ne anwenafeg eba ambangel afa hanai ambeg?”

<sup>14</sup> Afa ka wahigi sihina og, “Saglagluwal, ka mas anwenafeg mo. Sa kam sihina.” Afa ehe enaig sihifena og, “Sonag suialag elbi kwania kinig menai apukeg ambegim afa heafgelni lofug Sipsip Luwaligna taf la gigiafiagigbi asa ehengelni lofug busug feasaieg.

<sup>15</sup> Afa enaig esigbi; asa Godna pegag sime muhla afohiegim osuna i sinaini i Godna lala gafugagfiafu. Afa sa God ehe nangwagihiegego afa el mas ehengelim pese amtanafehiagi.

<sup>16</sup> Afa bini mas pese pigi afa bu hef mas pese feskofe afa osu i afa haig haig i mas aftukuhlaskofe.

<sup>17</sup> Afa sonag Sipsip Luwalig pegag sime nai gohugim ehengelim nangwagihiegego, ofenaiba el sipsipim nangwagihiegego. Ehe gose ika sulfu wanblogim nofkikenagag bu faig ofenaiba fun bu. Afa God ehengelni nombim titenigefe asa ehengel mas pese ming kinig flinim wewatigoi.”

## 8

### *Elegeg la gohug ugwaninim hugwafugba*

<sup>1</sup> Afa maia Sipsip Luwalig elegeg ugwaninim hugwafunaba afa heven lanai mungwali sifinam hap aua gohna.

<sup>2</sup> Afa ka nangugba elegeg la gohug oflanai el Godna nofbusug la afohiaba elegeg la gohug fuf lambig.

<sup>3</sup> Afa ming oflanai el blog Godim faig gol sime la gohba. Ena simeba Godna pegag sime muhla go. Ehe sanda gol disni flaugu eba suialag fungugni feg afa enag kaksag sanda i afa elni beten i lambigim. Afa ehe enanai yi wahrenam asa Godim faife.

<sup>4</sup> Afa maia sonag of lanai el sanda disni suwi la tuhugba asa suwiegig i afa elni beten i namba Godim suialag fungug pugunag.

<sup>5</sup> Afa of lanai el dis flagim Godim faig sime suwi lambig dis yi aitagim maia memtola pugugba asa bite gam kokofeg klaitig afa sa hug fwina pialele fenam lagkafenaba afa afwei fwina falaugu fiafenaba afa asag gweyi ilafona.

### *Sambaga sambaga of lanai el fuf goagini*

<sup>6</sup> Afa enag elegeg la gohug of lanai el fuf lambigim memtola ati kufeg lambfuhie.

<sup>7</sup> Afa angig of lanai el maia fuf gogba asa ais bu fun lofug afa suwi tafna wahrenam asa bite gam apaiyenam atiaba sambaga mungu bitemfegba maia mungwa mo awaiyeba asa ming sambaga mo ahgofufe. Afa li gwenai esefe atiaba sambaga mungu fegba maia mungwa mo suwi laiba afa sa ming sambaga mo ahgofufe afa sa mungwali suialag pos suwi tuhlu fatig.

<sup>8</sup> Afa maia angigieg of lanai el fuf gogba asa ofenaiba mug enanai yi suwi lasai enag figafogim solwara la peiba afa sa ena bu mugwehegam mo tafna feiba afa sambaganingi mo esug fefe.

<sup>9</sup> Afa bu lanai sisim gwenai esefe mungwa mo pigiba afa sambaga mo afohiefufe. Afa sip gwenai esefe mungwa mo amtakwaleiba afa sambaga mo gwese ahgofufe.

<sup>10</sup> Afa olynai of lanai el maia fuf gogba afa sa bagnofut kwania ofenaiba suwi lagig enaig heven lanai fwahag pe blogim mungwa suialag bu la pegba afa ming sambaga mo esug ahgo.

<sup>11</sup> Enag bagnofutbi ehena unehlagba gifin. Afa ehe maia buum esenagba asa ena bu miaklafeg. Afa maia kaksag el maia ena bu ahagagba asa ehem pigig.

<sup>12</sup> Afa maia fignig of lanai el fuf gogba osu mungwa mo amtakwaleba afa sa ming sambaga mo ahgofufe afa was gwenai esefe mungwa mo amtakwaleba afa sa ming sambaga mo ahgofufe afa bagnofut gwenai esefe mungwa mo amtakwaleba afa sa ming sambaga mo ahgofufe. Afa si gwenai esefe mungwa mo ombusug awaiyeba afa sa ming sambaga mo gwese ombusugugni ahgofufe. Afa osuna gwenai esefe mungwa mo ombusug awaiyeba afa sa ming sambaga mo gwese ombusugugni ahgofufe.

<sup>13</sup> Afa mingba ka nangugba eba osianig efuguwagiegoba afa ka higigba ehe fwina lagofenaba og, "Hoi, hoi, hoi, mungwali bite nai el niasabanigte afa maia ming sambaga mungu of lanai el fuf goagibi asa mangwal enanai yi pugufe."

## 9

### *Ming of lanai el fuf gogba*

<sup>1</sup> Afa ka nangugba afa of lanai el maia fuf gogba bagnofut mungu of lanai fagafonam bite gam pena. Ena bagnofut eba el. Afa ehem ki faibi ena kibi mina tigeflaitiag ki kehlaugu.

<sup>2</sup> Afa maia enag el tigeflaitiag mengig bafogba afa sa ena bume nai suwieg pugug. Enaig suwiegba kwania suwi nai suwieg feg. Afa namba osu mi of mi gigafeg fakagba asa sikulufeg.

<sup>3</sup> Afa suwieg lanai saglig apukegim bite gam afug. Afa ehengelni ninmuiaba gongig lofug.

<sup>4</sup> Afa God ehengelim sihinig og, “Nofeka pos mi, li fegeg mi, afa haig haig fegeg yimilig mi amtakwale skofi. Afa ambangel el sa Godna ginof mingig la gohunug enam nofene ese gon afa sa ne minginagim mungu amtakwale aiti.

<sup>5</sup> Afa sa ne ehengelim susug lambaigoiba sa ma afa pugufeg wasi yi enaig la fei. Afa nofekawo kwagi aiti.” Afa el ena susug flagba eba gongig lofug.

<sup>6</sup> Afa enanam el sa minam yisigifie hefum pigiegim afa eba awai. Afa sa ehengel enaig membig og ma kam pigi afa mas ehem pigina mo.

<sup>7</sup> Afa ena saglig eba enaig feg ofenaiba hos fag la afuofeba hefum wagwagig. Afa ehengelni misog la eba misog elni hat gol lofug laitig afa nofbusugba ofenaiba elni nofbusug lofug.

<sup>8</sup> Afa ehengelni lapo ofenaiba misiona lapog lofug kwina afa ehengelni gog ofenaiba kafana gog.

<sup>9</sup> Afa ehengelni nihiba minailof kapa lofug afohie afa ehengelni lag efugukagna moag ofenaiba kaksag elni watig fag hagig la fafuofe.

<sup>10</sup> Afa ehengelni emblugba ofenaiba gongig emblug lofug afa ehengelni emblug laba nas lofug afohien. Afa sa afa la pugufeg wasi yi enaig susugba elim falambwaigo fiahfo.

<sup>11</sup> Afa ati misog el fenig enaig misog elbi tigeflatig kembig mina nanguago. Afa hwag misog elni unehlag Hibru monaba eba enaig seflafig ‘Abadon’ afa Grik monaba eba seflig ‘Apolian’ ena unehlag mogba eba enaig eseg ‘mungwali amtakwale hiagofufe’.

<sup>12</sup> Afa ma gof lanai kinig mo awaiyeba afa ming sambaga kinig sumi yi puguia Mo mahi ahfe.

### *Ming of lanai el fuf gofe*

<sup>13</sup> Afa maia enwesog of lanai el fuf gogba afa ka nangugba gol sime Godim faig sime Godna muhla gohba afa ka higingba sambaga sambaga ehembeg sime lanai mo pugug.

<sup>14</sup> Afa sona of lanai elim fuf kehlaugu ehem enaig esonag og, “Afa autunam God sambaga sambaga of lanai elim Yufretis kwania bu la kike fwatig sa ne ikanam ehengelim pigi laitin.”

<sup>15</sup> Afa sa ehe ma ika ehengelim pigi fwatiba sa ma afunam elim minginag mo kwagi laitibi afa sa ma sambaga mo ahfofi. Afa God ehe enag sambaga sambaga of lanai elim sa ma ena yiana, afa ena wasni, afa ena osuna gwenanam ehengelim wegi fwatig.



16 Afa ka higigba ami hos la auguiag ehengelni nambaba 200 million enaig pugufeg.

17 Afa itila lofug ka nangugba hos i afa el hos la auguiagi. Ehengelni nihi yiba minailof afohien enaba tafnaig suwi meleg lofug, afa ongug umwal fug lofug afa lafweg lambo gigewug lofug. Afa hosna misogba ofenaiba laionna misog lofug. Afa suwi afa suwieg afa salfa ehena mengig la nai apukeg.

18 Afa sonag sambaga mungu enaig apukenam mungwa mo el ena suwiala pigiba afa sa sambaga mo ahfohie.

19 Afa hosna wasneigbi mengig la gohug afa efleg la gohug, ehena eflegba sombine lofug misogna feg enana elim susug faig.

20 Afa ambangel sa mas sona suwi la pigig mo eba ehe mas onigi waikefini mo ehe sa haig haig esig enam. Eba gwenaig maisim esiafu ehe haig haig sanel mi afa mwakwal God mi lotu fegoniafu. Ena mwakwal God eba gol i, silva i, bras i, fun i, afa ungewekig i afa enaba mas nanguinim afa higinim afa afu i.

21 Afa el mas heafgelni nihem fwahig mo gwenaig maisim el tigifatig i, afa agisu i, afa aga taitu i, afa ukwef i gwenaig go.

## 10

### *Of lanai el weti buk kehlaugu*

1 Afa ka nangugba heven lanai ming of lanai el wasneigni pe blog. Afa heafna nihi nai lofug fatiagba eba leangona fenam afa misog sisi mo tafnag fakana, afa ehena nofbusugba ofenaiba osu afa mongug yiba suwi lagi ofenaiba lala sumul suwi lagi.

2 Afa enag of lanai elbi weti buk ningana bafu ugu. Afa ehena nihiginai mong kwania bu sisi pafe uguba afa sahanagai mong mo bite la pafe uguba,

3 afa ehe fwina ofenaiba tata gungo amoasi yi afa maia moasigba afa sa elegeg la gohug hug wahigi moasigim lakag.

4 Afa enag hug maia moasi yi figbi nasa kog kawo ehengelni mom ginofen afa ka higigba el heven la moasig. Ehe enaig esog og, "Asa ne elegeg la gohug hugni mo sa ne meagam kumoahla, nofeka ginofe."

5 Afa ena of lanai el sa ka nangugba bu la pafeg afa bite la pafeg enag heafna nihiginai ninga sisi gam nehego.

6 Asa ehe enaig esog og, "Afa God wahkig gohug ehena nofla ka hwa mo sihig, ehe heven fakagim afa enanai yi mungwali gawig fwatiageg afa ehe bite fakagim afa enanai yi mungwali gawig fwatiageg afa ehe bu fakagim afa enanai yi

mungwali gawig fwatiageg nasa ka Godna unehlag la enaig esog, eba mas maisi feffi!

<sup>7</sup> Afa maia enanam elegeg of lanai el fuf ogofiba asa Godna sawieg meagam sefu go afa enag pugunam eseagefe enaba ati Godna gafugag el eba mo fli sihiaule elim naig eso fwahani asa gwenai gesefe.”

<sup>8</sup> Afa heven la nai mo kam pese sihinag ena mo enaig esog og, “Sa ikanam of lanai el sa mong bu la pafeg afa bite la pafeg goh ehe ningana buk bafuag flaugu sa ne enag flag.”

<sup>9</sup> Asa ka ikagim of lanai elim sahana kog, “Kam weti buk fai.” Afa kam enaig sihifenag og, “Flanam asa na ne. Afa maia na neba eba neana mengigim suialafe ofenaiba laugwe suwig one afa sa sumi mo waikefenam sa nem atag titigefe.”

<sup>10</sup> Afa sa ka ehena ninginai ena weti buk flanam nena. Afa maia ka nenaba nengig mo kam suialafena gofena afa sumi mo waikefenam kam atag titigena.

<sup>11</sup> Afa kam enaig sihifinig og, “Sa ne Godna sihiafule elni mo pese sihiakaiba sa enag mo ogfug mangwal sa mungwali elim mungwa usumuna, afa haig haig kembigna, afa haig haig mona, afa misog elim sa pugunife.”

## 11

### *Sambaga el Godna mo ahsihina*

<sup>1</sup> Afa kam aga bitem yuhwagig faig eba agat lofug. Afa God kam sihinag og, “Sa ikanam Godna kwania lala mi afa Godim faig sime mi yuhunuge. Afa sa suwigim hanansi el enanai yi afohiegim Godna unehlagim fingi fig.

<sup>2</sup> Afa nofeka Godna kwania lala afwambag la yuhuwage enanai yiba mangofi afa enaba angoluweg elim faifie. Afa sonag el Jerusalem suialag kembim 42 wasiyi sa haig ga esifie.

<sup>3</sup> Afa ka kikeafena sambaganingi elim wasneigna ningitigiba sama amtakwalig lofug aitiag ahfenam enaba ogfug eheningi Godna mo fla ahsihiaule el ahfeg sama kana mo ahsihiag el ahfei. Eheningi enaig namba la sa ahfefe 1,260 enaig osuna sa ahfefe.” (Ena 42 wasbi eba 1,260 osuna feg.)

<sup>4</sup> Sonag sambaga elbi eba sambaga oliv li ahfeg afa sambaga lam ahfeg eheningi Ainiyagna nofbusug la ahgo enaig Ainiyagba mungwali bitem nangwaghiagego.

<sup>5</sup> Afa ambangel sa ona eheningim patigi afa eba suwi eheningina mengig la nai pugunam enag elim amtakwale laitife. Amban enaig onigig fegba eba ehengelim enaig pigifefe.

<sup>6</sup> Afa maia sonaningi Godna mo ahosihifiba ehe asa ma ofim ahkwenaiaba asa bu mas fei. Afa eheningi maia heafningina wasneigni sahfeiba asa buum taf fei afa haig haig kinig bite la puguiaqakafe enaigba eba heafningina onigig la esiaqahfefe.

<sup>7</sup> Afa maia eheningi Godna gafugag auwig ahfeiba afa sa sangwalinai sis amtakwalig tige flaitiag bume menai pugu-nam blofe afa blonam asa sambaganingi ahfei afa ehfei sa hefum bagagifife. Bagagin asa eheningim patigife.

<sup>8</sup> Asa eheningina elig mo kwania kembigna mina la ahgifu-fufe. Ena kembig eheningina Ainiyag ati li katigeg la enanai yi lahag. Ena kembigna kumuhlag unehlagba Sodom i afa Isip i.

<sup>9</sup> Afa sa el mungwali haig haig mona, afa haig haig lofugna, afa haig haig kembig lanai, afa mungwa usumuna mungwali eheningina eligim sambaga mungu osuna afa hap osuna fanangufifi. Afa elim kwegonug masa eheningina eligim ese bite megam kumotigifife.

<sup>10</sup> Afa sonaningi el bite nai elim kinig lambwai ahfeakag asa maia ahlahagba afa sa mungwali sifakaligim hefum buyis i afa gawig esug lambwaigogi enaig feagig.

<sup>11</sup> Afa maia sambaga mungu osuna afa hap osuna awaienaba afa sa God efef fug eheningim faigbi asa ahbuihiag ahgoba. Asa el nangwagigim afa fwina embefeagig.

<sup>12</sup> Afa heven lanai une pugnaba afa sa eheningi ahiginaba og, "Sa fuko ahblo." Maia enaig esonibi asa heven lanai leango pe blonam lambti fukuiafenaba afa sa mungwali angoluweg el nangwag sigafena.

<sup>13</sup> Afa sa gwenanam asag kwania enag kembig la pugugim gwena mungu bitem amtakwalig fatig afa sa ming 9 pela bite mo afohie. Afa enag asag la 7,000 el enanai yi ati awaieg. Afa minginag el mas pigig mo enag ehengel fwina embefeagigim asa heven lanai Godna unehlag seflinim og God ehe kwania feg.

<sup>14</sup> Afa angigieg kinigbi ati awaieg afa olyi nai kinig eba puguiaqim ati meiyofe.

### *Hwaba elegeg fuf*

<sup>15</sup> Afa elegeg of lanai el maia fuf gogba asa heven la mo fwina lagig apukeg afa og;

Bigelni God Ainiyag afa heafna Gisfu Fwahag el i glau gohnanam ehe mungwalim bite naim misog el ahfenig. Ehe gwenaig wahkig sahfe gofufe.

<sup>16</sup> Afa 24 saglag el misog elni pegag sime la Godna nofbusug la afohiegim asa apaiyeg Godna unehlagim fingi fig.

<sup>17</sup> Afa enaig esogog og;

Ne God Ainiyag neba mungwali kigmogna feg afa ne autunai fegim afa glaunai feg. Kangel sifakalig ne nimbiafena wasneigni misog el mungwal elni feg.

<sup>18</sup> Afa angoluwag ninimugog afa ilawaba neana olug kak-agig opuguhba afa sa enanam ne melig pigieg elim kwefihianugefe. Afa ilawaba ne nimbeafna gafugag el eba mo fli sihiaule el mi afa nimbeafna el mi ne suialafehiageg asa nem ahnai skaufenig afa misog el i esug el i gwenai nem esinig. Afa ambangel sa bitem amtakwalig fatig enag ilawaba ne gwenai esenie.

<sup>19</sup> Afa Godna kwania lala heven la asa enanam pigi gofufe asa nanguibi enanai yi bokis kontrak gofufe. Afa sa afwei ifiyi fegim afa hug pialele feg afa asag ilafog afa ais bu fun lofug pe minefeg.

## 12

*Angwafig i afa kafa kwania i mo*

<sup>1</sup> Afa Jon mangwal kwaniam of la nanguna ofenaiba angwafig osum lofugna fatina fwahag afa wasbi ehena mong skaugo afa 12 pela bagnofut ehena misog sisi hat lofug la afohie.

<sup>2</sup> Afa afnialigni fegim luwal foklagim meyoifeba afa sa susugim ningisuageafba eyiamo ogo.

<sup>3</sup> Afa ming of la nangunaba eba kwania kafa tafnaiig elegeg la gohug misogna fena afa 10 pela aninguogna fena. Afa misog elni hat ehena misog la afohiena.

<sup>4</sup> Afa sa ehe heafna eflegna bagnofutim kalefeg lambig taitigba asa mungu ehgenai mo bite gam apaiyegba afa ming sambaga mo of la gweyi ahgofufe.

Afa angwafig oga luwal foakla, asa ehe ika angwafigni muhla gohba oga sa luwalim tige ne.

<sup>5</sup> Afa maia enag angwafig fangonai luwalim foaklaiba asa ena luwal autunai la ehe wasneig bite nai elim mungwali lambi lambugufiba asa nangwaghiage gofufe. Afa sa ena luwalim God nangum afa heafna pegag sime gam wanig afufe.

<sup>6</sup> Afa God ati ehem el fwainig la numwehiageg fwahag asa enag angwafig esim ikagna ikafe. Afa sa enanai yi 1,260 osuna numwehefugufufe afa sa fane faifofe.

<sup>7</sup> Afa fag heven la hagna. Afa Godna oflanai el apaiyena afa ehengelni misog el Maikel fena asa kafam afa kafa heafna of lanai el fini sa fag hagna.

<sup>8</sup> Afa sa hagin kafam filafinibi kafa mas heafna of lanai elim enanai yi wan nafi.

<sup>9</sup> Afa ena kwania kafaba eba Satan. Ehe sombine autunai fegim mungwal bitenai elim mwakwalenugego. Enam flig afa heafna of lanai elim lambig asa heven lanai lambi ningitigigbi asa bite gam apaiye ambeg.

<sup>10</sup> Afa ka higigba heven lanai mo enaig esog og; Afa glau Godna kwefuag ati ambala pugug. Afa heafna wasneigni mungwali bite ehe nangwagihagego. Afa heafna Gisfu Fwahag el gwenaig esefe. Afa osuna i afa sinaini i Satan Godna nofbusug la gohba Godna elim fasehtigifego afa sa ilawaba ati ehem heven lanai fli ningihig.

<sup>11</sup> Afa Godna el hefum mas onigini mo, hefum pipegiba afa Sipsip Luwaligna taf i afa heafgelni nufuna mo i ehengel ati enana Satanim filafatig.

<sup>12</sup> Afa nengel sa heven la go sa ne sifakali eba ati Satanim enanai ningihi. Afa bite nai i afa bu lanai i niasabanig, Satan ati anwenafeg ehena osuna awaiegim meyoife. Afa sa nengel nangum pe blonam asa ehe fwina olug kakageagefe.

<sup>13</sup> Afa enag kafa ati anwenafena ehe sa pekana afa ehe pekagim angwafig fangonai luwal wanigagim yisigikag uflag.

<sup>14</sup> Afa ena angwafigim osianigna anglag kwania sambaga faigbi asa enana Satanim fwahagim sa enag anglagna el fwainig gam heafna kugam efugukag. Afa sa enanai yi ehem sambaga mungu afa hap yia enaig la numwehefufufe.

<sup>15</sup> Afa ena kafa maia kausu fegba asa bufle ena mina pugugim angwafigim patalkugim og sama angwafigim petla ukwi.

<sup>16</sup> Afa bite angwafigim kweafug. Afa bite maia kugufegba asa bufle kafana mengig menai blogim ena mina pekag.

<sup>17</sup> Afa sa kafa angwafigim olug kakagenagim asa ona ikanam ehena luwaligim ambangel sa Godna nihe mom patalfuiag mi afa Sisasna mo sihig mi asa ehengelim fagna hagim.

<sup>18</sup> Afa ena kafaba bu blug yi goh.

## 13

### *Sis sambaga ahpugug*

<sup>1</sup> Afa ka nangugba sis elegeg la gohug misogna bu menai pugugim afa ehena aninguogba eba 10 pela fena afa hatba misogyn elni hat lofug 10 pela aninguog la afohiafna afa enag misogyn laba unehlag eyi afohiafna enag unehlagba Godim haig haig moalampinag mo afohiafna.

<sup>2</sup> Ena sisba ofenaiba sangwali nai kwania pusi lepat lofug afa ehena mongwagba ofenaiba bea lofug eba sangwal sis ninimule, afa ehena memtogba ofenaiba laion lofug eba

kwania pusi feg. Afa maia kafa ehem heafna kwania wasneig faiba asa ehe misog el lofefe.

<sup>3</sup> Afa maia ehena ming misogim ahpifigba ona laha afa ehe mas lahag mo afa ehe ati suialafe. Mungwali el nangugim sineminefinim asa ehem patalfufe.

<sup>4</sup> Afa kafa maia sisim wasneig faigba asa el kafana unehlagim fingi fig. Afa sisna unehlagim gafa fingi figim afa esogog og, “Amban enaig wasneig sisba feg? Amban sa mas enaig fagimba filafei?”

<sup>5</sup> Afa God ena sisim fwahagba og sa ma haig haig mo sihiage afa sa ma ehena mom flaflafenam afa Godim moalamp mo fai. Afa God ehem fwahagba og sa ma 42 was yi misog el feg.

<sup>6</sup> Afa sa Godim amtakwalig mo sihinagim afa ehena unehlagim pigaupigim afa Godna kembang mi afa ambangel sa enanai yi gohug mi enam moalamp mo faig.

<sup>7</sup> Afa God ehem fwahagba og sa ma God heafna elim fag hagnam sa ma ehengelim filafatinim afa sa wasneinam elim mungwali mungwa usumuna, afa mungwali kembang afa mungwali mona, afa mungwali lofugna asa ehe misog el fenife.

<sup>8</sup> Afa mungwali bitenai el sa sisna unehlagim fingi fig afa Godna el sa mas enaig esini mo. Afa autunam God maisim bite fakag fwainig fiafenaba enanam ehe ati ehengelni unehlagim nofkikenag gag buk la sko fwahani. Ena bukba Sipsip Luwaligna buk ati ehem tigifatig.

<sup>9</sup> Afa amban ne anganaba eba sa ne ena mo higim.

<sup>10</sup> Afa God ati ambangelim wefug fwatigba sa ehengelim kalabus yi afui asa gwenai esifi. Afa ambangelim sa el pinana kwagi klaitigfifi eba sa ma gwenai esi. Afa sa ma Godna el olug onigig fwina wasnei afohiefiba nengiafufi.

<sup>11</sup> Afa ka nangugba ming sisba bite menai pugugim afa ehena misog laba sambaga aninguog ahfeg ofenaiba sipsipni aninguog lofug afa ehena moaba ofenaiba kwania kafana mengig.

<sup>12</sup> Afa hwa sumi nai sisna wasneig eba gof lanai sis i mungwalof ahfegim ahgoba. Afa sa ehe mungwali bite nai elim kukusihiageg og sa ma gof lanai sisna unehlagim fingi fini. Ena sisna misogim ati fagna ahpifnaba afa sa ena fagokug ati titigifeg.

<sup>13</sup> Afa hwa sumi nai sis heafna haig haig kigmogim ogfufe afa sa elni nof la eseiba asa suwi oflanai bite gam pe blofe.

<sup>14</sup> Afa maia ehe gof lanai sis i ahgoba afa God ehem fwahag og sa ma bite nai elim haig haigna mwakwalihiage. Afa

elim esonigbi asa ma ehengel gof lanai sisna sungwagim nifenaginim fli folfui. Afa ena sis eba ati fagna ahpifna afa sa ehe nofkikena gwesego.

<sup>15</sup> Afa God sumi nai sisim fwahanagba asa ma ehe gof lanai sisna sungwagim nifegim nofkikenag faiba asa ehe mo lagwagegim og, “Amban ne kana unehlagim fingi feg fwainigba eba nem lahafe.”

<sup>16</sup> Afa enag sis sungwagim ginofenig nofkikena flag ehe enaig esog og, “Sa ma mungwali el ginof nihi yi gohonkai. Misog el i afa unehlag fwainig el i, kaksag kigna el i afa kig fwainig el i, gafugag el i afa esug el i sa ma mungwali ginof mingigig la me awai nihiginai ninga la me sa ma lambafwi.”

<sup>17</sup> Afa amban ena ginof fwainigba eba mas kignaba mangwalba flai afa mas mangwalba fai kignaba. Ena ginofba sisna unehlag i afa heafna nambaba unehlagim ogfug.

<sup>18</sup> Afa sa big enam fahigenagenim afa sa amban suialag anwenafegba sa ma enag sisna nambam ambala upugunai ena nambaba elni namba eba 666.

## 14

### *144,000 el mulug mwanifi fatini*

<sup>1</sup> Afa ka nangugba Sipsip Luwalig afa 144,000 el i Jerusalem la Saion mog la afohie. Afa sonag elbi eba ati Sipsip Luwaligna unehlag i afa heafna Alagna unehlag i ehengelni mingigig la gohun.

<sup>2</sup> Afa ka higing mo heven lanai blog ofenaiba kwania bu sisewug alagi afa ofenaiba hug pialele lagka. Eba ofenaiba gita moag lagsai.

<sup>3</sup> Afa enag el Godna pegag sime la mi, afa sambaga sambaga sis blistanig mi, afa saglag el mi enanai yi muhla afohiegim asa mulug mwanifi fatig. Minginag elim mas enam anwenafi eba 144,000 el God ehe bite nai lambigba enag mungohe anwenafig.

<sup>4</sup> Afa sonaig elbi mas aga taitu feg mo eba awai ehengel afsug el fiasaieg. Afa maia asim Sipsip Luwalig akoba afa ehengel ehem patalfug. Afa God sonaig elim bitenai el nai yi lambigba. Afa gof gosig afuiaba eba God i afa Sipsip Luwalig i ehe ahlambig.

<sup>5</sup> Afa ehengel mas mwakwal mo sihini mo, eba awai, mas ehengel haig fig mo.

### *Sambaga mungu of lanai elni mo*

<sup>6</sup> Afa ka nangugba of lanai el sisi yi of la efukafenaba asa bite nai elim wahkig gohug suialag mo sihinuwageakafna ena moba eba mungwali kembig i, afa mungwali mungwa

usumunai i afa mungwali monai i afa mungwali haig haig lofugnai i enam faig.

<sup>7</sup> Ehe fwina enaig sihifeg og, “Enanam God mungwali elim kwefihianugefe afa sa ehem embefinim asa ehena unehlagim mungu fingi fi. Eba ehe mungohe heven i, bite i, kwania bu i, afa fun bu i enag ehe mungwali fwatiageg sa ne ehena unehlagim fingi fi.”

<sup>8</sup> Afa ming of lanai el ehem sum patalkuihba ehe enaig esonig og, “Kwania kembig Babilon eba ati amtakwale fatig. Enag kembig lanai elbi ehe mungwali minginag kembig lanai elim wanambe minefegim haig haig nihe amtakwalig fiagig. Sonaigba ofenaiba angwafig saglagim uflogna bug wasneig faigim asa ahsahfeg.”

<sup>9</sup> Afa ming of lanai el sambaganingim sum patagikahba ehe enaig esog og, “Ambangel sa sis mi afa sis heafna sungwag mi sa lotu fegonugbi eba ehena ginof mingig la me awai nihiginai ninga la me sa lambfie,

<sup>10</sup> afa enaig elimbi God olug kakageg heafna mungwali faifie asa ehengel enag susug flifie. Afa sonag elbi suwi i salfa i ahlagig yi enanai yi afohiefiba asa Godna of lanai el fi afa Sipsip Luwalig fe afa sa ehengelim nangwagfufufe.

<sup>11</sup> Afa suwi wahkig lagig sonag elim susug faifie enag suwieg wahkig puguiaigo. Afa ambangel sa sis mi afa sis heafna sungwag mi lotu fegonug i afa ehena unehlag la ginof lambig i asa wahkig osuna i afa sinaini i ena susugba lambafufufe.”

<sup>12</sup> Afa ambangel Godna nihe mo higigim afa Sisasim patalfug, sahis, asa ne wasnei sama Godna gafugag gwese gofi.

<sup>13</sup> Afa ka higig heven lanai mo enaig esog og, “Sa ginofe, ohnanam ilawo fenam ikan autunai la fefe ambanim sa Godna gafugag la lahafe eba sa ma sifakalei.” Afa Godna Sungwabug gafa gwenaig esog og, “Eba nufunam, heafgelni kinig fwahinim hekulifibi afa heafgelni suialag nihe eba ambala pugunifie.”

### *Fane lambigim ati meyiofe*

<sup>14</sup> Afa ka mingim nangugba leango busug yi el bigel lofug ga afa misog elni hat gol fatigim afa ehe ningana pina sig nemog flauguia.

<sup>15</sup> Afa of lanai el Godna kwania lala fwahagim afwambagam pugukahba ehe fwina leango la gag elim enaig esonag og, “Bite nai fane ati ambigoh afa ilawaba ati lambigim feg sa pinana enag fanem higfelambka.”

<sup>16</sup> Asa gwenaig eseg leango la gag el pinana higfehiagegim sa bite nai lambig.



17 Afa ming of lanai el Godna kwania lala heven lanai fwahagim afa ehe gafa pina sig kehlaugu.

18 Afa ming of lanai el suwim nangwag gohug Godim faig sime nai fwahagim pina flauguhug elim fwina esona og, “Bite nai wain fug ati ambie skofeg sa ne aso gam ikanam pina na higfehiagenam agoguli.”

19 Asa ehe gwenaiig eseg pinana higfehiagegim sa bite nai wain fug lambigim fun bwiltigefwag lofug la skogim asa mongini pigagegba asa bug pe minefeg. Ena bwiltigefwagba eba God enaig esefe, ninimunam sa amtakwalig elim amtakwale laitife.

20 Enag bwiltigefwag lofugba eba Jerusalem la ambwafagam goh. Afa ehengelni taf ena bwiltigefwag gam blogim bite gam pegim fafokaminefeg enaba 300 kilomita\* enaig la feg afa mungu fegim afa hap feg enaig mita eba mungwanam fukugag. Afa ena tafba ofenaiba bugogi.

## 15

*Eleg la gohug of lanai el eleg la gohug kinig lambug afo*

1 Afa ming alganam enaig ka nangug enaba enmonafeg eba enam el sineminefinig. Afa ka nangugba eleg la gohug oflanai el eleg la gohug kinig lambug afo. Sona kinigbi Godna olug kakagig enaba sumi nai nemog feg.

2 Afa mingba enaig ka nangug ofenaiba bu kwania glas lofug suwina waheg go. Afa el bu blug yi afohieaba gita lofug God lambwaiyigbi asa lambug afo. Ena elbi eba ati sis mi, sis heafna sungwag mi, afa enag namba unehlag ogfuiag mi ati enam filafig.

3 Afa ehengel gita lambigim afa sa Moses Godna gafugag elna mwanifi i afa Sipsip Luwaligna mwanifi i laitiagig. Afa sa enaig fatifig og;

God Ainiyag ne mungwali wasneigni feg afa neana suialag gafugag enmonafeg afa ka nangugim ka sineminefig. Afa ne mungwali elni misog el fenig afa neana nihe eba nufunam feg afa fwina suialafeg.

4 Afa Ainiyag ne mungohe afsug feg afa sa mungwali el nem embefinim sa ma neana unehlagim fingi fi. Afa mungwali el bite nai sa ma neana nihem nanguinim ambe nem lotufini.

5 Afa ka nangugba Godna kwania lala heven la pigig go ena lala meg gamba God enanai yi ga.

6 Afa enag eleg la gohug oflanai el Godna kwania lala fwahigim eleg la gohug kinig lambug ambeg. Sonag el

\* 14:20: Grik mona enaig esog, ‘1,600 stadia’.

ehengelni lofugba fwina busbusiagegim afa gol we heafgelni bahalig yi kagatige fiagig.

<sup>7</sup> Afa sambaga sambaga sis blistanig afohieaba afa sa mungu enanai gol disni flagim elegeg la gohug of lanai elim faig. Ena dis yiba God wahkig gohugna olug kakagig memtola pugugo.

<sup>8</sup> Afa God i afa heafna wasneig i enanai yi Godna kwania lala suwieg lofug puguiagi. Mas amban mungu ika ena lala seaifui eba maia elegeg la gohug kinig ma awaieba.

## 16

### *Godna olug kakagig elegeg la gohug disni afo*

<sup>1</sup> Afa ka higigba Godna kwania lala la mo elegeg la gohug of lanai elim enaig pugufenig og, “Afa sa ne Godna olug kakagig elegeg la gohug disni afohie afa ena flinim asa ne ufunam bite gam sugufoitifi.”

<sup>2</sup> Afa sa angig oflanai el heafna disni maia bite gam sugoflaitigba asa ambangel sisna ginof fligim sa sisna sungwagim lotufinig asa enaig elim susug nehug amtakwalig pugunugefe.

<sup>3</sup> Afa angigieg of lanai el heafna disni maia bu kwania la sugoflaitigba asa ofenaiba elni biimp lofug feiba asa bu lanai mungwali pigife.

<sup>4</sup> Afa olyi nai of lanai el heafna disni maia afalig bu mi afa lileg bu la mi sugoflaitiba asa ena gafa taf lofeg.

<sup>5</sup> Afa ka higigba of lanai el buum nangwaghiawageg el enaig esog og;

God ne ilawo nai feg afa autunai feg. Ne God fwina afsug nemog feg. Neana kwefihiawagig eba fwina suialafeg.

<sup>6</sup> Afa el sa God neana el mi afa neana mo fli sihiaule el mi kwagiskug afa ehengelni taf bite la peg asa God amtakwalig elim mungwag faibi s a taf ahagafe. Eba heafgelni moala.

<sup>7</sup> Afa ka higigba Godna faig sime la mo enaig pugufeg og; God Ainiyag ne mungwali wasneigni feg neana kwefihiawagig eba nufunam feg afa ihlafeg.

<sup>8</sup> Afa fignieg of lanai el heafna disni maia osuwim sugoflaitigba asa osu fwina nolugeagenam elim aftukuhlaitifefe.

<sup>9</sup> Afa sa maia osu elim aftukuhlaitifeba asa ehengel Godna unehlagim moalampbi nagife. Afa ehengel mas olug waikefinim afa mas enaig esogona mo og God ehe wasneig fegim asa enag kinigbi ningitigifeg.

<sup>10</sup> Afa mingba eba afa of lanai el heafna disni maia sis kwania sangwali nai pusi lofug eyi gohug la sugoflaitigba asa enanai yi enag sis nangwaghiageg kembigim kigifenifeba

asa enanam susug elim opugunifibi afa sa ehengel gog sifiagifife.

<sup>11</sup> Afa sa enag susug i afa nehgug i maia kwania fiageba asa heven lanai Godim moalampi nagim afa heafgelni amtakwalig nihem mas fwahig mo.

<sup>12</sup> Afa enwesog of lanai el heafna disni maia kwania bu afalig Yufretis yi sugoflaitigba asa bu mungwali heflagegba. Eba osu puguiaig misog elim mina numwehe fwahanig.

<sup>13</sup> Afa ka nangugba sambaga mungu sanel amtakwalig miakal lofug kwania kafana mengig la nai afa kwania sangwali sisna mengig la nai afa mwakwal profetna mengig la nai apuke gohug.

<sup>14</sup> Afa enag sanel haig haig kigmog fiahgifi asa ehe afugim mungwali bite nai misog elim unegonigigbi asa ambeg laskuhlag. Afa enag kwania osuna God ehe fwina wasneig el feg asa enanam fwahagba asa ehengel ona hagim.

<sup>15</sup> (Afa Ainiyag enaig esog og, “Sa hig, ka oblofiba eba ofenaiba el ukwefnagim oblo. Amban sa nonigig fwainig heafna lofugim numwehefugufufe afa mas ehe emefwai ikaiba eba ehem afwanefefe. Ena elbi sa ma sifakalei.”)

<sup>16</sup> Afa ena sanel misog elim wanambegim mungu la laskuiahlago. Enaba Hibru monaba og Armageton.

<sup>17</sup> Afa elegeg of lanai el heafna disni maia efefim sugoflaitinagba asa pegag sime la Godna kwania lala nai fwina moasiyigim og, “Hwaba eba gwenaho feg!”

<sup>18</sup> Afa afwei ifyi ifyi fegim afa hug pialefe lakagim afa asag kwania fwina ilafog. Afa autunamba enaig asag mas enaig fena mo.

<sup>19</sup> Afa maia asag enaig liafofenamba asa kwania kembang la bitem sambaga mungu kugufe klaitig afa minginag mungwali kembang amtakwale skofiakana. Afa kwania Babilon kembang fwina amtakwaleaginibi asa God mas ehengelni enaigim etetini mo asa heafna mungwali olug kakagig faig.

<sup>20</sup> Afa mungwali ailan awaieg afa mungwali mug tu-toitifeakag.

<sup>21</sup> Afa ais bu fun lofug of lanai elim apaiyenig. Ena ais buba eba 50 kilogram enaig feg. Afa el ena kinigim nangugim maia fwina amtakwaleagegba asa ehengel Godim moalamp mo faig.

## 17

### *Mina nai angwafigni mo*

<sup>1</sup> Afa elegeg la gohug of lanai el elegeg la gohug dis lambug afohie enanai mungu blog kam sihinag og, “Aublo, ka nem

ogfuna sonag mina angwafig eba unehlag kwania feg ehe kaksag bu afalig yi gohba eba God ehem susug faife.

<sup>2</sup> Afa bite nai misog el ehem fapukefe nafo. Afa mungwali bitenai el gafa gwenaig esig. Afa angwafigni amtakwalig nihe ofenaiba uflogna bug ahagagba asa ehengel moetet el fiasaieg.”

<sup>3</sup> Afa maia kam Godna Sungwabug wasneignagba asa of lanai el kam el fwainig gam wanikig afa sa ka enanai yi ka nangugba angwafig sangwalinai sis tafnaiig yi ga. Ena sisba elegeg la gohug misog feg afa 10 pela aninguog ena misog la apuke afohie. Afa ehena nihiba unehlag amtakwalig afohie. Ena unehlagba Godim moalampinag afohie.

<sup>4</sup> Afa enag angwafigbi tafnaiig lofug suialagna afa engig golna afa haig haig wag enaig suialag aitiageg. Afa kaf gol ningina flaugu. Ena kaf laba heafna aga taitu nihe i afa haig haig amtakwalig mo i enanai yi memtola pugugo.

<sup>5</sup> Afa ehena mingig laba laskwas unehlag gofena. Afa ena ginofba enaig esog og:

Kaba wasneig Babilon feg, afa mungwali mina nai  
angwafigni afag afa ena mogba eba amtakwalig nihe bite  
nai.

<sup>6</sup> Afa ena angwafig Godna el mi afa Sisasna mo ambala sihiule el mi taf nenugeg. Ehengelni taf ofenaiba uflog bug neg asa angwafig moetetageg. Ka ehem nangugum ka sineminefeg.

<sup>7</sup> Afa enag of lanai el kam sihinag og, “Haisegba sa ne sineminefeg? Ka nem mogim ogfunag sonag sisba eba elegeg la gohug misog feg afa 10 pela aninguogna feg afa angwafig sis laba fukoga.

<sup>8</sup> Afa sona sis sa ne nangugba eba autunam nofkikena gag fena afa ilawaba eba awai. Afa ati tige flaitiag bume menai muhla fwaha puguiaigim ofeba eba ikanam hefum amtakwale fe. Afa autunam God maisim bite fakag fwainig fiasenaba enanam ehe ati minginag elni unehlagim nofkikena gag buk la sko fwahani. Afa ambangel ehengelni unehlag sa ena buk la gohug fwainigfeg eba ehengel sisim nangunim asa sineminefifie. Afa sisba autunam gag afa ilawaba mas gah mo afa eba pese pugufe.

<sup>9</sup> “Afa amban suialag onigigna fegba sa ma enam anwenafi. Afa ena elegeg la gohug misog eba elegeg la gohug mug enanai yi angwafig ga.

<sup>10</sup> Afa mingba eba elegeg la gohug misog el feg. Afa afa la gohug enaba ati pigigba afa ilawaba mungu go afa mingba maisife eba nengigim pugufe. Afa eba pugunam mwakwalig gafe.

<sup>11</sup> Afa enag sangwali sis eba autunam gag afa ilawaba mas gah mo. Afa eba gug misog el fena afa ehe elegeg la gohug la nai fena. Sonaba eba ikanam hefum amtakwale fe.

<sup>12</sup> “Afa sona 10 pela aninguog ne nangugba eba 10 pela el sumi yi apuke misog el fiasaife. Afa ehe wasneig flinim afa sa afunam mwakwalig sis wan gafugafefe.

<sup>13</sup> Afa enag misog el mungwali mungu onigig flinim asa heafgelni wasneig i afa unehlag i sisim faini.

<sup>14</sup> Afa Sipsip Luwalig fei afa ehengel apaiyegog asa hefum hagig afa sa Sipsip Luwalig afa heafna el apaiyeg enag ehengelim filafe fatig. Afa ehe mungwali saglag elni Ainiyag feg afa misog elni misog feg afa ambangel sa ehe kanog fwatig afa sa ehengel ehem fwina patalfug enag ehengel fagim filafig.”

<sup>15</sup> Afa enag of lanai el kam sihinag og, “Afa sa kaksag bu afaligim ne lambusigba asa angwafig enanai yi ga eba mungwali el i afa mungwali kembig i, afa mungwali lofugna i, afa mungwali mona i enaig feg.

<sup>16</sup> Afa ena sis mi afa 10 pela aninguog sa ne nangugba eba enaig eseg eba mina nai angwafigim olug kakagenaginim asa ehena lofug hugfuhia naginim afa sa ehem fwahibi asa gawig fwainig fefe. Afa sa ehena nihigim ahaganam suwi na tuhlufatife.

<sup>17</sup> Afa sa enag 10 pela misog elim God onigig faibi asa gwenaig esifie autunam God ati sihi fwahana. Asa ehengel sisim ahnai skaufinifie asa ikan gwena Godna moa ihla nufunam pugufe.

<sup>18</sup> Afa enag angwafig sa ne nangugba eba kwania kembig enanai yi mungwali misog elim bite naim nangwagehi-agego.”

## 18

### *Babilon kembig ati amtakwaleg flag*

<sup>1</sup> Afa ka nangugba ming of lanai el hevenim fwahagim pe blog. Ehe kwania unehlagna fegim afa ehena ombusugug mungwali bite gam ika minefeg.

<sup>2</sup> Afa ehe fwina enaig esona og;  
Babilon kwania kembig eba ati amtakwaleg ena kembigba eba haig haig sanel amtakwalig enanai yi pugu esiagefe. Afa haig haig fwesna twafig i afa nongug mengna twafig i ena kembig la go.

<sup>3</sup> Afa mungwali minginag kembig lanai elim wanambe minefegim haig haig nihe amtakwalig fiagig. Sonaigba ofenaiba angwafig saglagim uflog bug wasneig faigim asa asise fiaflag. Afa bite nai misog el ehem fapukefe nafoba asa

Babilon kaksag gawigna feg. Afa ena kembang lanai oagna haig haig kaksag gawig lambwagi afa sa mungwali bisnis el ehem enaig lambwaigogim asa kaksag kig lambig.

<sup>4</sup> Afa ka higigba ming elni mengig heven la pugug. Ehe enaig esog og;

Kana el sonana mo fwahigim asa apuke ambe, masa ne mungwal wahe haig haig nihe eseagifie, masa ne mungwal ena susug flifie.

<sup>5</sup> Afa ehena nufwef mo heven la skoa fwaligog fwahi afa God mas enam eteti mo.

<sup>6</sup> Afa ehe sa nem esenagba sa ne gwenaig mungwag ehem esena. Afa sa ne ehem mungwag sambaga nagim esenawag. Afa ma nem mungu kinig faiba asa ne ehem kinig mungwag sambaganagim lambtigiiai.

<sup>7</sup> Afa ehem kaksag susug i afa kinig i faibi eba mungwalofug kaksag gawig i afa heafna unehlag fingi fukuiaigi hefum sa fai. Ehe enaig onigig og, 'Kaba kwin ga, kaba mango alagag fwainig mo, afa kinig mas kam pugunai.'

<sup>8</sup> Afa sa haig haig kinig ikagna ehengelim pugunibi afa sa ehengelim gih puguni, afa ehengel wewatoi, afa ehengel bini pigi afa sa ehem suwi la tuhlu fie. Enaba mungu osuna pugunifie. God Ainiyag ehe wasneig feg asa ehem kwefihianagefe.

<sup>9</sup> Afa mungwali bitenai misog el ehem fapukefe nafogim afa ehena amtakwalig nihem patalfuiag asa enag suwiegim nangugim afa sa kusugu watigo.

<sup>10</sup> Afa ehengel embefigim enag susugim membiyi finigim afohieba afa esogog og;

Hoi yo, Babilon kwania kembang niasabam, autunamba ne wasneig fena afa ikagna amtakwaleg nimbiafena moala nem opuguna.

<sup>11</sup> Afa el mas bisnis elni gawig mas pese lambigoni afa sa ehengel gafa Babilon kembangim kusugunigim wewatigo.

<sup>12</sup> Afa heafgelni gawig eba gol i, silva i, suialag fun i, kopu i, haig haig suialag lofug i, fini i, nemtaiwe i, afa mungwali haig haig wag ginofena ungewekig i, fun i, afa bras i afa kapa i enaig eseagini.

<sup>13</sup> Afa ming gawigba eba sinamon li lofug i, fakseg i, haig haig suialag fungugna sanda i, wain bug i, wel bug i, plaua i, wit i, bulmakau i, sipsip i, hos i, afa hos sime i enaig feg afa esug elim ningitigigim asa enana kig lambig.

<sup>14</sup> Afa bisnis el enaig esog og, "O Babilon, mungwali gau sa ne fwina membeg lambig eba enaba awaiyefe. Neana unehlag i gawig i eba mas gofiba ne mas pese enam nangui."

15 Afa ena bisnis el sa enanai yi gafugag feagig afa kaksag kig lambig afa sa ehengel enag susugim membiyi finigim afohiefa afa sa kusugugim wewatigona.

16 Afa ehengel enaig esog og;  
Hoi yo, Babilon kwania kembang niasabam, autunam ehe haig haig suialag lofug fatina afa gol i, suialag fun i, afa kopu i laitiagena.

17 Afa ikagna ehena mungwali gawig awaiena.

Afa mungwali sip yi misog el i afa sip yi afuiaule el i, afa sip yi gafugag el i, afa sip nai bisnis el i membiyi afohieba.

18 Afa sa ena suwieg nangunim enaig esogona og, “Sonag kembangba ehe minginagim gosenig.”

19 Afa smof lambinim misog gam kokofeaginim afa wewatigona enaig esogona og;

Hoi yo, Babilon kwania kembang niasabam, afa sa sip kaksag gawig ena kembang gam lambkugba asa sipni el kaksag kig enanam lambig. Afa sa enaba mungwali ikagna gweyi awaieg.

20 Afa ma ena mo awaieba sa heven sifakale fe. Afa sa Godna el i, afa kanog fwatieg el i, afa Godna mo fli sihiaule el i sa ne sifakali sa nem haig esehiag lambsiegohug eba God ehe ati mungwag susug faig.

21 Afa wasneig of lanai el kinigni fun kwania flagim bu gam fwina taitugim afa ehe enaig esog og;  
Eba Babilon kwania kembang gwenaig esefe afa el mas pese nangui.

22 Afa gitana moag i, afa fufni moag i, afa fufelona moag i, afa elni mwanifi i mas nem pese pugunai. Afa ambangel sa suialag gafuga fegim anwenafig gafa mas enanai yi gofi afa el mas nasneg moagim pese highi.

23 Afa lamna ombusug mas enanai yi gofi afa enanai yi el angwafig lambigim mas gofi. Afa ena kembang lanai bisnis el kwania unehlagna fegim afa Babilon lanai elim agisu fihigim afa sa mungwali mwakwale gonugig.

24 Afa ehe Godna mo fli sihiaule elni taf i afa Godna elni taf i enam ahagagim afa minginag elim gafa gwenaig esegonigbi asa God Babilonim mungwag susug faig.

## 19

### *Heven la nai el sifakalig*

1 Ena mo ma awaiegba afa ka higigba auneh kwania heven la esofua sona elbi eba kaksag el gohba enaig esogog og;  
Sa big Godna unehlagim fingi fi, God bigim lambigba, afa sa heafna unehlag kwania fegim, afa ehe wasneig feg.

<sup>2</sup> Ekena kwefihiageg eba nufunam fenam ihla fefe. Afa sa mina nai angwafigim kwefihianagefe. Sona angwafig haig haig amtakwalig eseagegim afa elim og sa ma enaig esiagi. Afa Godna gafugag elim kwagi laitig asa God ehem susug mungwag faig.

<sup>3</sup> Afa ehe pese enaig esogona og;  
Nawo Godna unehlagim fingi fi. Afa suwieg wahkig ena kembig gwese go.

<sup>4</sup> Afa God heafna pegag sime la gaba afa sa 24 saglag el i afa sambaga sambaga blistanig sis i apaiyegim ehem lotu fenigim enaig esog og;

Eba nufunam, sa big Godna unehlagim fingi fi.

<sup>5</sup> Afa mo sime lanai pugugim enaig esog og;  
Sa hig afa ne Godna gafugag el i afa unehlag fwainig el i afa unehlagna el i ambangel sa ne ehem ahnai skaufinig eba sa ne bimbeafgelni Godna unehlagim fingi fi.

*Sipsip Luwaligna angwafig buyis*

<sup>6</sup> Afa ka higig ofenaiba kaksag el laskuhlagim auneh ho afa ming ofenaiba bu sisewug kwania lagi afa ming ofenaiba hug piale piale ogi afa ehengel enaig esogog og;

Afa bigelni Ainiyag eba God wasneig fegim eba ehe kwania misog el feg sa big ehena unehlagim fingi fi.

<sup>7</sup> Afa Sipsip Luwalig angwafig aflahba asa nawo olug suialagna sifakalinim ehena unehlagim fingi fi. Afa enag angwafig hefum ati numweheageg.

<sup>8</sup> Afa God ehem fwahanagba asa suialag lofug afsug fegim afa fwina busbusiageg enag fatig.

(Enag lofugba eba suialag nihe Godna el enaig esini.)

<sup>9</sup> Afa ena of lanai el kam sihina og, “Sa ne enaig ginofe: Ambanim sa God sihinag og sa ma sonag el Sipsip Luwaligna angwafig buyis la bloi asa ma enag elbi sifakale. Hwaba eba Godna nufuna mo.”

<sup>10</sup> Afa sa ka of lanai elni kig muhla pegim ko ka ehem lotu fena, afa ehe enaig esona og, “Mas esi! Ka gafa Godna gafugag el feg afa gwenaiig sati neangafa nimbeafena nilite i ne sahfegba asa ehengel Sisasna nufuna mo kehliligim patalfug. Afa sa ne Godim mungohe lotu fini.” Sisas sa mangwalim upugunaba asa ena mom Godna fli sihiule el fli sihiafug.

*El busug hos la ga*

<sup>11</sup> Afa ka nanagogba heven la mengig pigi goba afa busug hos mungu eyi go. Afa el sona hos la ga eba seflig Sawieg El fegim afa Nufunam El feg. Afa heafna kwefihiagegba eba ihlafeg afa fag hagimba eba ihlafeageg.



<sup>12</sup> Afa ehena nofugba ofenaiba suwi lagi afa ehena misog laba eba misog elni kaksag hat lofug afohie. Afa mungu unehlag ehe nai yi gofena enaba ehe mungohe anwenafeg.

<sup>13</sup> Afa ehena lofugim taf gigafena. Ehena unehlagba eba seflig 'Godna Mo.'

<sup>14</sup> Afa heven la nai ami busbusiageg lofug laitiagegim afa busug hos la augugim asa ehem patalfug.

<sup>15</sup> Afa pina sig nemog ehena mengig la nai pugunam enana mungwali bite nai elim filafatife. Afa ehe mungwali kembigim wasneinam lambinam bwiltigefwag la skogna asa wasneig God ninimufenam nag lofug sunam laitife.

<sup>16</sup> Afa heafna lofug la i afa bigisig la i enaig ginofig fwahig og:

Saglag elni Ainiyag feg afa misog elni misog feg.

<sup>17</sup> Afa ka nangugba of lanai el osu la gohugim afa maia ungwe twafig sisi yi efih afuhiaba asa ungewem fwina enaig esonig og, "Au ambe Godna kwania buyis la laskuiahla.

<sup>18</sup> Sa ne ambenam misog elni nihigim ahagai afa amini misog elni nihigim ahagai afa wasneig elni nihigim ahagai hos mi afa el hos la auguiaule mi ena nihigim ahagai afa esug el nai yi afa unehlagna el nai yi afa mungwali el nai yi sa ne ehengelni nihigim ahagai."

<sup>19</sup> Afa mingba ka nangugba kwania sangwali sis i afa bite nai misog el i afa heafgelni ami i enag ambe laskuhlagim ogna el hos la gag mi afa heafna ami mi sa fag hagim.

<sup>20</sup> Afa sangwali sis mi afa mwakwal profet el mi lambtigim afa sa eheningim nofkikena lambtighigbi suwi wahkig lagig yi. Ena suwiba eba fun salfa suwi lagi. Sonag mwakwal profet sis i mungwa si ahogohba afa sa ehe haig haig wasneig ofgunig afa el sati sisna ginof lambig afa ehena sungwagim fingi fig ehe ehengelim mwakwalenig.

<sup>21</sup> Afa enag el hos la gag ehena mengig la nai pina sig pugugim asa mungwali minginag elim enana kwaskofeg. Afa sa tuwafig ambegim ehengelni nihigim ahagawagigba sa enogieskofeg.

## 20

*Satanim 1,000 yia la kikenagig fwahig*

<sup>1</sup> Afa ka nangugba of lanai el heven lanai pe blog bume tigeflaitiag ki mi afa wasneig sen mi ningana lambtigigu.

<sup>2</sup> Afa ehe kafa kwanium kehlagu. Afa ena kafaba eba sombine autunai nemog enaba seflig Satan. Afa of lanai el ehem 1,000 yia la senna kike fwahag.

<sup>3</sup> Afa of lanai el ehem ena bume tigeflaitiag la fla fatigim mengigim pwaka fegim kikiseg fwahag. Afa sa mas elim ehe

enanam 1,000 yia la mwakwalhiagei. Afa maia 1,000 yia awaieba afa sa enanam bume nai fwaha mwakwalig pugufe.

<sup>4</sup> Afa ka nangugba misog elni pegag sime afa sa ena sime laba el enanai yi auguia enaba God ehengelim kwefihiageg gafugag faig. Afa ambangel Godna mo fliufuba afa sa Sisasna mo ambala sihig afa sa ehengel mas sis mi afa sisna sungwag mi lotu fegonig mo afa sisna ginof mas ninga la mi mingig la i gohonig mo asa ehengelim kwaskofigbi asa ati ka ehengelni sungwagimba nanguagig. Eba ehengel nofkikena gag pese flinim eba misog el feasainam asa 1,000 yia la Sisas i mungwal nangwagihiagifie.

<sup>5</sup> Afa sonag elbi eba gof la nai hefba pese nofkikena gag lambig. Afa mungwali minginag pigieg el eba maia 1,000 yia awaiba asa nofkikena gag flifie.

<sup>6</sup> Afa ambangel sa gof gam pese bigiagafeg eba afsug finim asa sifakalfie. Afa sumi nai lahagba eba ehengelim mas amtakwale asaiyi. Afa eba God mi afa Kraiss mi pris feasainam asa 1,000 yia la Sisas i mungwal nangwagihiagifie.

### *Ati Satan filafeg*

<sup>7</sup> Afa maia ena 1,000 yia awaieba afa sa Satanim kalabus lala nai pigi fwahinigbi.

<sup>8</sup> Afa sa ambala pugugim mungwali bite gominefiahba asa elim mwakwalenugiakaba afa sa Gok kembang lanai el i afa Magok lanai el i ehem elni enaig esinig lamblug mungu la laskuihlagim asa hagig. Sonag elni nambaba ofenaiba engig bu lanai.

<sup>9</sup> Afa ehe mungwali bite la afu apukegim asa Godna elni kembangim wagigo fakag ena kembangba God fwina membeg. Afa suwi heven la nai pegim elim amtakwaligim lagkumuhlag.

<sup>10</sup> Afa Satan enaig mwakwalenugiakag afa sa God ehem suwi lagig yi afa salfa fun lagig yi enanai yi fatig. Afa enanai yiba sangwali sis i afa mwakwal profet i ati ahgofenaba asa ehengel ena susug wahkig osuna i afa sinaini i lambafofofe.

### *Sum kwefihiageg feg*

<sup>11</sup> Afa ka nangugba kwania busug pegag sime afa el enanai yi gaba. Afa sa heven i afa bite i ehena embem ahkag afa mas nangwagi.

<sup>12</sup> Afa enanai yi melig pigieg misog el i afa esug el i sime muhla afohiaba. Afa buk bambohiagig afa ming bukba bafogba eba nofkikena gag buk. Afa ena buk laba elni haig haig nihe ginof afohiafena asa enag ginofim fahigiagigim afa sa enaig elim kwefihianigig.

<sup>13</sup> Afa mungwali melig pigieg el heafna kembang mi afa kwania bu lanai mi fwahigim afugba asa God ehengelni nihe kwefihianigefe.

<sup>14</sup> Afa God mungwali haig haig la sa el enanai yi pigig enam flag afa melig pigieg la nai kembang flagim asa suwi lagig bume gam lambtianhag. Ena suwi lagig bume enaba ming lahad enanai yi go.

<sup>15</sup> Afa ambangelni unehlag mas nofkikena gag buk la goh mo enaba suwi lagig bume kwania la lambi aitifie.

## 21

### *Mulug heven i afa bite i ahpugu*

<sup>1</sup> Afa ka nangugba mulug heven i afa bite i ahgo. Afa gof lanai heven i afa bite i ati awaiei ikag afa kwania bu gafa mas gi mo.

<sup>2</sup> Afa Godna afsug kembang eba mulug Jerusalem ka nangug. Eba God heven la nai ninghiaba asa pe blog. Enaba suialag wagna ofenaiba angwafig alagag la ako.

<sup>3</sup> Afa ka higigba elni une pegag sime nai fwina esog og, “Sa hig, Godna lala eba mungwali elni olyi go God elim mungwa si wango afa ehengel heafna el feskofegba afa ehe ehengelni God feg.

<sup>4</sup> Afa ehe ehengelni nombim titenigefe asa ehengelim mas pese pigi afa mas susug i afa kinig i mas pese puguni afa mas pese wewatigoi. Afa enaig autunaiba ati awaieg.”

<sup>5</sup> Afa el misog elni pegag sime la gahba kam enaig esonag og, “Sa hig, ati ka mungwali gau mulug eseageg fwahag. Enaba sa ginofe, ena moba nufunam nemog feg.”

<sup>6</sup> Afa ehe kam sihina og, “Mungwali gafugag ati ihlafeg. Afa kaba kike gof lanai feg afa sumi nai feg. Afa mungwali gawig kike mog feg afa mungwali gawig awaiyegim eba kike mungohe feg. Afa ambanim bu hefegba eba ka ehem bu esug faife ena buba eba nofkikena faig bu.

<sup>7</sup> Afa ambangel sa fagim filafifie eba ehengel sa ma sonaig suialag auguiaq fli. Eba ka ehengelni God feniba afa ehengel kana luwalig feasaife.

<sup>8</sup> Afa el ambangel sa lakumuis afug el i, afa mauule el i, afa nufweh el i, afa elim tigifatigule el i, afa aga taitu el i, afa agisu el i, afa mwakwal Godim lotu fenig el i, afa mwakwal el i afa enaig elbi asa suwi lagig kwania bume la enanai yi fun salfa lagi asa enanai yi apaiye afufe. Enaba ming lahad sum go.”

*Jon mulug Jerusalem nanguna*

<sup>9</sup> Afa elegeg la gohug of lanai el elegeg la gohug disni lambug afofena enanai yiba elegeg la gohug kinig afoguafna enanai mungu kam sihinag og, “Au blo ka nem ogfunu sonag angwafig eba Sipsip Luwalig flafe.”

<sup>10</sup> Afa Godna Sungwabug kam wasneinagim afa sa kam kwania mug gam wani fokukagim asa afsug kembang mulug Jerusalemim kam ogfunag. God heven lanai ningihiagba asa pe blog.

<sup>11</sup> Ena kembangba Godna ombusugug kaminefeg ofenaiba Jasper fun suialag glas lofug afsug feg.

<sup>12</sup> Afa ena kembangba bog wagigo fakigba asa fwina fukokageg afa mengigba 12 pela afohie. Afa ena mengig laba Israelna 12 pela simbianingana unehlag afohiakana. Afa 12 pela of lanai el ena mengig laba afohiakana.

<sup>13</sup> Afa ena mengigba osu puguiaigam sambaga mungu afohiena afa osu pegam sambaga mungu afohiena afa ming ehbegam sambaga mungu afohiena afa ming ehbegam sambaga mungu afohiena.

<sup>14</sup> Ena 12 pela funba bog enanai yi sisi yi go ena funba bogim wasneinag. Afa enanai yiba Sipsip Luwaligna kanog fwatieg elni unehlag eyi afohiakana.

<sup>15</sup> Afa ena of lanai el kam sihinagba enaba gol aga yuhug flaugu enaba ognu kembangba, bogna afa mengignam yuhuwage.

<sup>16</sup> Afa ehe kembangim yuhuwagenaba afa sa sambaga sambaga ehbeg mungwalof feskofena. Ehbegba eba 12,000 statia\* afa sisi gam kwag eba gwenaig mungwalofug.

<sup>17</sup> Afa ena bogim yuhuwagenaba 144 kubit† hofulug fena enaba yuhuwagenaba eba mungwalofug el sa sifafife.

<sup>18</sup> Afa bogba fun Jasper fena afa kembangba gol suialag nemog fena afa namba glas lofug afsug fena.

<sup>19</sup> Afa ene kembangba bog eyi gohugba eba haig haig ginofna fun suialag afogopina. Afa angig eba fun Jasper, afa angigieg eba ongug fun sapaia, afa olyinai eba busug fun aget, afa fignieg eba gwemaug fun emeral,

<sup>20</sup> afa ming eba afa fun eba satonakis tafnaig busug fun, afa enwesog eba tafnaig fun konilian, afa elegeg eba lafweg fun krisolait, afa gug eba ongug gwemaug fun beril, afa tut eba lafweg fun topas, afa ming tut eba gwemaug lafweg fun karisopres, afa ming gug eba ongug gwemaug fun haiasin, afa ming elegeg eba tafnaig fun ametis.

<sup>21</sup> Afa 12 pela mengig eba 12 pela sale afofena afa ena saleba eba kaksag kigna feg. Afa ena saleba eba mungu

\* **21:16:** 12,000 statia eba 2,200 kilomita. † **21:17:** 144 kubit eba 65 mita.

mungog mengig la afohiakag. Afa kembig minaba eba gol suialag nemog feg ofenaiba glas lofug afsug feg.

<sup>22</sup> Afa ka mas lotu lala nangug mo afa God Ainiyag ehe wasneig feg afa Sipsip Luwalig enanai yi ehe ahgo afa ehe lalana kifegim ahflag.

<sup>23</sup> Afa ena kembigba God ehe osu lofug ombusugug feg afa Sipsip Luwalig ehe wi lofug gaflagoba asa eheningi ena kembigim ombusugug ahfaig afa osu i was i eba mas ahfeg mo.

<sup>24</sup> Afa mungwali el enag ombusugug i ahwagifgo afa mungwali bitenai misog el heafgelni suialag suialag gawig lambug ambeg enanai yi saiyeg.

<sup>25</sup> Afa osunaba eba mengig gwese pigi go. Enanai yiba sinaini fwainig asa mengig mas kikisi.

<sup>26</sup> Afa mungwali el heafgelni suialag suialag gawig i afa kaksag kig i lambug ambegim enanai yi saiyegohug.

<sup>27</sup> Afa el haig haig esig i afa mwakwal el i mas ena kembig la saigo. Afa enaig nufwef mo mas ena kembig gofi. Eba ambangelni unehlag sa nofkikena gag buk la go ena mungohe ena kembig laba saiyegofe.

## 22

### *Nofkikena gag bu i afa nofkikena gag li i*

<sup>1</sup> Afa of lanai el kam afalig buum ogfunag. Eba nofkikena faig bu fegim afa glas lofug falaugufego. Godnai i afa Sipsip Luwalig nai i pegag sime nai pe blogim.

<sup>2</sup> Afa kembig mina ikag la enanai yi ena buba olyi ikagi. Afa ming magig ikag afa ming magig ikag enanai yiba nokikena faig li afohie. Afa ena libi eba mungu mungu wasi yi 12 pela haig haig fug leafo. Afa figegba elim mungwali bite naim suilafetifeg.

<sup>3</sup> Afa God mas amtakwaligimba membena mo enanai yi gohuguba.

Afa Godna i afa Sipsip Luwaligna i pegag sime kembig la gohun. Afa sa ehena gafugag el ehem lotu finim,

<sup>4</sup> afa sa ehena nofbusugim nanguini afa ehena unehlag ehengelni mingig la afohienfina.

<sup>5</sup> Afa enanai yiba sinaini fwainig eba God Ainiyag ehe ombusugugba feg afa osu i lam i eba esug ahgo. Asa ehengel misog el wahkig gwese afofufe.

<sup>6</sup> Afa of lanai el kam sihinag og, “Hwa moba eba nufunam nemog feg. Afa God Ainiyag ehe Godna mo fli sihiaule elim anwenag faini. Afa sa heafna of lanai elim ninghiagba asa blog gafugag elim ogfunigbi afa sa mangwal ikagna pugufe.”

<sup>7</sup> Afa Sisas enaig esog og, “Sa hig, eba ka ikagna blofe! Hwa buk laba mangwal sa sumi yi pugufe, afa ambangel sa ena mom patalfuiagba eba sama sifakali.”

<sup>8</sup> Afa ka Jon ka higig afa ati ka enaigimba nangug. Afa maia of lanai el kam enam ogfunagba afa koka ehem lotu fena asa ka ehena kigmuhla peg.

<sup>9</sup> Afa ehe kam enaig sihifenag og, “Mas esi! Ka gafa Godna gafugag el gwenaiig feg afa gwenaiig neangafa afa gwenaiig minginag gafa Godna mo fli sihiaule el gafa afa ambangel ena mo buk la patalkuiag gafa gwenaiig esi. Sa ne Godna unehlagim mungohe fingi fe!”

<sup>10</sup> Afa ehe pese ming mo gwesim sihina og, “Ena sumi nai mo ati meyi puguiagim ofe asa nofeka ena mo buk lanai kumoahla.

<sup>11</sup> Afa amban sa amtakwaligim eseageg eba sa fwahiba sa ma gwenaiig eseakafi. Afa amban nufwef mom eseakafofe eba sa fwahiba sa ma gwenaiig eseakafi. Afa amban sa suialag nihem eseagefe eba sa fwahiba sama gwenaiig eseakafi. Afa amban afsug fegba eba sa fwahiba sa ma gwenaiig fe.”

<sup>12</sup> Afa Sisas enaig esog og, “Sa hig, eba ka ikagna blonam afa sa ka mungu mungu elim mungwag gwenaiig faife.

<sup>13</sup> Afa kaba kike gof lanai feg afa sumi nai feg. Afa mungwali gawig kike mog feg afa mungwali gawig awaiyegim eba kike mungohe feg.

<sup>14</sup> “Afa ambangel sa heafgelni lofugim gigiafiagig enaba sama sifakalinim afa sa ma nofkikena gag faig li fug aha-ganam afa sa ma kembig mengig megam saiyenam afui.

<sup>15</sup> Afa ambangel sa Godim mas fatinig, afa sa agisu fig, afa aga taitufig, afa elim kwaskofig, afa mwakwal Godim lotu finig, afa mwakwalig enaig elbi eba kembig la afwambala afohiefofe.

<sup>16</sup> Kaba Sisas ka kikeafna of lanai elim ningihiagba ehe ati sios elim ena moba faig. Kaba Devitna biteana luwal fegim afa ka ambagna bufiyi ombusugni feg.”

<sup>17</sup> Godna Sungwabug i afa Sipsip Luwaligna angwafig i enaig sihi ahfe og, “Au sa blo!” Amban sa higig ehe gafa sa ma sihi og, “Au sa blo!” Ambangel sa ne buhefe skofeg sa ne blo nofkikena faig bu ne eba God nem esug faife.

### *Wasneig mo i afa sumi nai mo i*

<sup>18</sup> Kaba Jon wasneig mo osihi amban sa ne ena buk la sumi nai mo go sa ne higim afa amban sa ne algana mo enanai yi pahrafe eba God nem ena kinig sisi pahlanifie.

<sup>19</sup> Afa amban sa ne sumi nai buk la go afa ne enam flafatiba eba God neana nofkikena faig li fugim flafatinibi asa mas heafna kembang la afu saiye hwa buk la enaig esog.

<sup>20</sup> Afa el sa ena mo sihinaba enag ilawo sihig og, “Eba nufunam, eba ka ikagna blofe.” Eba esefe. Sisas Ainiyag au sa blo.

<sup>21</sup> Afa sa ma Sisas Ainiyagna esmunagim kwaganig Godna elim gohoni. Eba nufunam.